

**THEOLOGICI
TRACTATUS EX
SACRIS CODICIBUS,
ET SANCTORUM
PATRUM...**

François Feu





Ex Bibliotheca
majori Coll. Rom.
Societ. Jesu

48.6.9.

48
B
1

THEOLOGICAL
TRACTATES

BY JOHN CALVIN

AND HENRY PETER

OF THE UNIVERSITY OF ZURICH

• • • • •

THEOLOGICI TRACTATUS

EX SACRIS CODICIBUS,

ET

SANCTORUM PATRUM
MONUMENTIS EXCERPTI.

*Operâ FRANCISCI FEU Arverni,
Doct̃oris Theologi Sacræ Facultatis Parisiensis,
& Pastoris SS. Gervasii & Protasii.*

TOMUS PRIMUS.



PARISIIS

Apud JOANNEM BOUDOT viâ Jacobæâ
sub Sole Aureo.

M. DC. XCII.

Cum Privilegio Regis Christianissimi.

THEOLOGICI TRACTATUS

EX SACRIS CODICIBUS,


ET

SANCTORUM PATRUM

MONUMENTIS EXCERPTA

Opera ERANÆSCI FÉLIX ABRAMI
Docteur Théologal Sacre Faculté de Paris
& Pasteur de la Paroisse de St. Germain l'Auxerrois.

TOMUS PRIMUS



PARISIIS

Apud JOANNEM BORDOT viâ Jacobæ
sub Sole Aureo.

M. DC. XCII.

Com Privilegio Regis Christianissimi.

ERRATA.

Pag.	Lin.	Err.	Lege
80	14	1f. c. 21	c. 22
	30	Pf. 138. c. 8	v. 8
81	4	S. Amb. l. 1. de fide c. 4 & 7	c. 4 & 16
	5	lib. de dignit. animæ	l. de dignit. condit. humanæ
	36	S. Aug. ep. 17. l. 7	l. 7
90	21	Theoph. Antioch. l. 1 c. 72	c. 72
95	31	1. Coe.	2. Cor.
	31	S. Iren. lib. 4. c. 35	c. 37
	39	S. Epip. hær.	S. Epiph. hær. 70
	35	S. Aug. l. 4 de civ. c. 17	l. 14 c. 17
96	26	Retulimus q. 3. art. 1.	Retulimus q. 3. art. 1.
97	9	S. Aug. l. 83. q. 14	S. Aug. l. 83. qq. q. 15
	13	expositiones	verba
	18	Jerem. 31. v. 1.	v. 19
98	2	lib. 83. q. 14	l. 83. qq. q. 15.
	31	cognitio totum	totum
100	27	Apoc. 2	Apoc. 12
101	28	docet	docet
103	11	idem	dele
105	28	martyrium	martyrium
109	25	S. Aug. l. 11 de civ. c. 11	cap. 1. mox citato
112	28	S. Amb. l. 1. de fide	lib. de fide orthodoxa
113	5	inflexisse	inflexisse
	17	superat	super erat
	21	ordine sic	dele sic
114	5	num sic	cum sic
	30	ageret	adde Deus
115	6	videti posse	videre posse
117	8	2. Cor. 5. v. 8	v. 7
	30	Phil. 1.	Phil. 1.
	44	v. 16	v. 30
118	14	dial. 9	9.
119	27	confirmatur	adde à sulpitio
121	13	ep. 59. ad Thessalon.	15 Numerio
122	21	serm. de S. Malach.	serm. 2
	22	epist. 126	266
125	16	matris	nostris
	22	cap. 18	cap. 22
126	32	cap. 23	cap. 24
128	15	lib. 10	lib. 20
	31	epist. 112	epist. 162
129	1	c. 55 & 64	64
	2	Lact. l. 7. c. 2 & 14	c. 2
130	1	Orig. lib. 12. de princ.	l. 1. & 2
	30	S. Hil. in Pf. 24	in Pf. 114
	45	adhuc futuri	adde judicii
131	30	S. Aug. ep. 199	epist. 99
	38	S. Aug. l. 20 de civit.	lib. 2.
132	22	S. Aug. l. 20 de civ.	lib. 2.
136	20	Rayn. ad an. 1341.	1331.
137	5	num. 44.	num. 45
141	34	Apoc. 12 v. 4	v. 5
143	10	S. Aug. l. 4	lib. 14
	28	S. Anselm. l. 20 c. 2	lib. 2. c. 10
144	33	1. Cor. 8	1. Cor. 3 v. 2
	35	v. 31	v. 41 & 42
145	28	S. Iren. l. 1. c. 72	c. 72
	30	S. Hier. l. 20 cont. Iovin.	lib. 2
146	38	S. Greg. M. l. 35. Mor. c. 25	c. 14
149	27	1. Cor. 3	1. Cor. 13
	26	S. Greg. l. 4. dial. c. 14.	cap. 33
150	29	S. Greg. l. 12 Moral. c. 17	cap. 14
152	11	epist. 118	epist. 6
	18	se autem	se autem
155	8	l. 5. de Trinit. c. 9.	cap. 10
156	23	l. 11. c. 10.	l. 15. c. 16

ERRATA DE SS. TRINITATĒ.

Pag.	Lin.	Err.	Lege
3	23	attenderet	ostenderet
6	35	potest	posse
9	25	icitur	dicitur
14	13	proinde	proinde
16	30	prolativum	prolaticum
17	16	ita professus	professus est
66	14	s. Thomæ sensu	s. Thomæ sensu
83	40	lib. c. Marcion.	lib. 1 contra Marcionem
85	42	non stet	constet
116	26	sed quid autem inde	sed quid inde
113	19	postea genuisse	postea Patrem genuisse
124	24	extabat	extat
131	37	eum	se
181	3	definitio	definitio
ibid.	43	enarræ promittentes	enarrare promittentes
191	10	reproduca	reproducta
196	13	in spiritus	in spiritum
197	34	oppositio	oppositio
203	28	spiritus pariter procedere	spiritus procedere
207	30	propositionibus	propositionibus
ibid.	39	propositiones	propositiones
219	12	caritatem	claritatem
242	2	diabotum	diabolium

AD
THEOLOGICÆ
CANDIDATOS.

DE OPERIS,
& Studiorum ratione.

QUI MORES ET FACTA SCRUTANTUR aliorum, arguent dubio procul, damnabuntque Sacerdotem scribendis libris occupatum eo tempore, quo gregem sibi creditum verbo pascere deberet opere simul & exemplo. Ad quid enim, inquit, tot consarcinata, tot interpolata Theologiæ volumina conferunt, nisi ut cum jacturâ temporis, Studentium labor augeatur & dolor, novique oneris fiat accessio? Verum si consilii mei rationem paulisper attenderint, non solum veniam dabunt, sed unâ probabunt consilium: nec aptiorem forte ullam tractandæ Theologiæ rationem esse susceptam, nec indignam Pastore fatebuntur. Neque enim rivulos consectamur, sed ad fontes recurrimus, hoc est, ad Codices sacros, & Antiquitatis venerandæ monumenta, ex quibus varias in Scholâ non traditas quæstiones hausimus; tradi verò solitas autoritate adedò colendâ firmare conati sumus, quamvis ad Logicæ leges, seu ad laudabilem Scholæ formam exigamus omnia. Eâ ratione conficimus eam Theologiam, quam commendarunt Sancti Patres, Theologiam quæ nihil docet, nisi veritatem; nihil præcipit, nisi charitatem; nihil spondet, præter felicitatem.

PRÆFATIO.

Tantum abest igitur, ut huic incumbentes operi defera-
mus Pastoris officium, quin potius illud præstemus imprimis,
& iis potissimum, quibus illud debemus maximè: nimirum
informandi sunt Operarii, quos Cœlestis Agricola missurus
est in vineam; instituendi sunt Clerici, Ovilis nostri portio
præcipua; è quorum ore, Dei legem aliquandò requirant
Populi. At quomodò requirent? nisi eorum labia custodiant
scientiam, quæ defursum est, nec aliundè derivatur, quàm
ex illis divinitus institutis principiis, Verbo Dei scilicet, scri-
pto & tradito. Sic quia Magister unicus est, nosque vocari
Magistros vetat unà cum Joanne, Discipulos mittimus ad
Christum, ut audiant ipsimet verbum, & accipiant singuli
doctrinam ejus; sicque speramus fore, ut optimi fiant ali-
quandò præcones, qui prius auditores fuerint, cultoresque
veritatis.

Et quoniam sine usu languescit omne studium Litterarum;
idcirco, ne vanus sit labor noster, jugi exercitatione acuimus
Candidatorum ingenium, probamus vires, exploramus indu-
striam; ut, dum alternis responderet unus, & arguunt cæteri;
dum ter in hebdomadâ strenuè propugnat alius, quod reli-
qui certatim oppugnant; tandem post crebras oppugnatio-
nes & acutos ejusmodi velitationibus animos, sint paratiores,
tùm ad reddendam Fidei rationem, tum ad implendam sa-
cræ Facultatis expectationem.

Verùm quid proderit usus, & illa jugis exercitatio, si de-
sit delectus librorum & argumentorum; si desit ordo seu me-
thodus, hoc est, recta ratio Studiorum? Vagum igitur no-
lumus studium & instabile; nolumus interruptum & abrup-
tum. Volumus certis libris, & argumentis, statis temporibus,
Theologiæ Candidatum immorari, iisdemque innutriri, ut
possit aliquandò trahere, quod animo fideliter infideat. Fasti-
diosi scilicet & ægrotantis est stomachi simul degustare plu-
rima, quæ suâ varietate mentem inquinant, non alunt. Quam-
obrem ne longius excurrat, præfigimus limites, ac veluti repa-
gula, quibus Candidati contineantur in obsequio fidei, & in
debitâ Ecclesiæ observantiâ perseverent; ac ne cursim pro-
perantes prætereant meliora, ne levioribus oleum tempusque
perdant, amputamus noxia, refecamus inutilia, vana præter-
mittimus; nec sumus solliciti, quid de rebus ex Philosophiâ

PRÆFATIO.

petitis senserint Scholæ Magistri isti; quid statuerint alii: & hæc excutient, si libeat, cum per otium licuerit, si fidem nobis placuerit non negare. Post emensa diligenter Philosophiæ spatia, præcipuam ponent operam in ediscendis Dogmatibus Catholicis, quod præstari nequit absque optimo duce, ac perito viæ magistro, qui per syrtes & scopulos, per vada tot juvenum cladibus & naufragiis nobilitata, salvos & incolumes ducat ad portum sine periculo novitatis, sine damno veritatis. Felices Discipuli, quibus dux ejusmodi divinitus obtigerit; sed quoniam rarus est, hæc præsertim ætate, in quâ plerique ponunt fortunæ mensam, & libant super eam, pauci Scripturæ sacræ consilium ex Antiquorum lectionibus dant operam, quibus non dati sunt, in illis laboribus & studiis versati. Author sum, ut ad divinas Litteras juxta unanimem Sanctorum Patrum consensionem expositas, tanquam ad sacram confugiant anchoram, huic inhereant firmiter, illisque quotidianum hocce pensum præscribimus. Tria singulis diebus Scripturæ capita summo studio, singulari modestiâ & veneratione legant, captivantesque intellectum in obsequium fidei, nihil properè, nihil temerè, nihil suo sensu & arbitrio definiant; ex hæc enim temeritate, ac perversâ definienti libidine tot orti sunt errores, tot opinionum portenta, tot monstra novitatum; dum salus, virtus, Deus, facta est cuique immanis libido. Hinc infelix illud in agro Christi lolium; hinc avenæ steriles, hoc est; tot Magistri prurientes auribus, qui fabulas secuti, ad gratiam potius loquentur, quàm ad veritatem, Christi vineam in olera lasciviæ convertunt, fiuntque Magistri erroris, qui nunquàm fuère discipuli veritatis.

Hos scopulos non modò declinabunt Candidati nostri, si præscriptum pensum ritè persolvant; sed & universam Scripturam intra annum absolvent, & quolibet trimestri percurrent unum Theologiæ Tractatum; sicque de universâ Theologiâ prius respondere poterunt, quàm exploratâ à Magistris industriâ admittantur ad ponendum in sacrâ Facultate tyrocinium.

A sacris Codicibus, singulisque Tractatibus, Baccalaureatum adepti, transibunt ad Historiam Ecclesiasticam, ad Conciliorum Patrumque notitiam, quæ ut sit & faciliior simul & fructuosior, Scriptores legent antiquos juxta seriem tempo-

PRÆFATIO.

rum; quo quique floruerunt. Ac ne inanes & vacui discedant ex hac Patrum Scholâ, Scriptoris cujusque mentem compendiosè colligent, notabunt insigniora loca, quæ postmodum ad marginem, & in indicibus tractatum, ad doctrinæ & morum, ac disciplinæ capita revocabunt, præfixis natalibus, vitâ, morte, dotibus cujuslibet Authoris. Verùm paucis datum est hæc omnia præstare ante Licentiæ stadium cursus. Quamobrem ne gravius imponatur jugum Baccalaureo; satis erit SS. Clementis Ignatii, Polycarpi Epistolas & Acta Martyrii legere; SS. Justini Apologias & Dialogum; Clem. Alex. Pædagogum; Tertull. Apologeticum, Lib. de Præscriptionibus, de Penitentiâ, de Baptismo, ad Uxorem, de Coronâ militis, de Pudicitia, de Jejuniis; Origenis Libros contra Celsum, Epistolam ad amicos; S. Cypriani Epistolas omnes, & Lib. de lapsis; S. Athanasii Apologias, Lib. de Synodis Arimin. & Seleuc. S. Hilar. Fragmenta, Lib. de Synodis, & ad Constantium; SS. Basil. & Greg. Nazianz. Epistolas, S. Cyril. Hierosol. Catecheses, S. Epiphani Lib. de Hæresibus; SS. Ambros. August. & Hieron. Epistolas & Tractatus contra Vigilantium, Jovinianum; S. Optatum, & Vincentium Lirinensem. Ex Historicis Eusebium, Rufinum, Socratem, Theodor. Sozom. Theodorum Lectorem, Evagrium Ex Conciliis ferè omnia ad Ephesium usque, & Oecumenica cætera. Licentiæ gradum consecutus Theologus prætermittit SS. Clementis Alexand. Tertull. & aliorum Veterum opera sibi sumet pari studio evolvenda; quæ notaverit prioribus suis Codicibus adjunget: indè postmodum quasi è fundo suo accipiet, quæ ad Doctrinæ Catholicæ capita propugnanda, & ad suam, & Catholicæ plebis institutionem poterunt conducere.

Hanc Studiorum rationem, hoc iter ad totam Theologiam nobis olim aperuit S. M. N. Antonius Faure Lemovicensis, Theologus Parisiensis, nostri seculi lumen eximium, & sacræ Facultatis decus mirabile, cujus ingenio nihil in Theologiæ ambitu subducebatur. In amplissimâ Litterarum Divinarum serie, in Patrum ordine nihil fugiebat ejus solertiam; nihil erat tam reconditum, quod è latebris non erueret; nihil involutum, quod non retegeret: quod præstabat omnibus tanto affectu, tam facili aditu, tantâ comitate,

PRÆFATIO.

ut singulorum] votis ejus domus, voluntas, animus, industria, bibliotheca, gratia, crumena paterent; adeò vir religiosissimus, pariter ac doctissimus; adeò totius Ecclesiæ dignitati, & sacri Ordinis gloriæ commodisque serviebat.

Neque verò satis est valere memoriâ, pollere ingenio; requiritur insuper in Theologo morum candor & sanctimonia; requiritur lenitas & mansuetudo christiana: quamobrem à verbis contumeliosis abstinere debet, præsertim si fortè res illi fuerit cum viris catholicis. Doleo interdum, acerbèque fero, cum video, audio, lego Catholicos ejusdem Communionis vinculo feliciter copulatos, de rebus aut levis momenti, aut certè non definitis, & quæ non pertinent ad fidem, verbis durioribus inter sese conflictari (non mediocri Fidelium scandalo.) Immane quantum! Ab hoc dicendi, scribendi, disputandique genere abhorrebant veteres Antiqui, quibus juxta illud Philipp. 3. v. 18 persuasum erat ambulanti- bus in Ecclesiæ unitate potuisse Deum id illis revelare, quod aliter sapiebant; nec illis quandoque aperire veritatem, ut eorum patientia, humilitas, & charitas in custodiendâ salubriter pace patescerent non solum illius temporis Christianis, sed etiam posteris Sicque factum ad medicinalem disciplinam, ut videlicet per illos filios pacis aliquid aliud supereminenter videretur, scilicet quod pro unitate servandâ studium postulat pacis & unitatis author.

Si verò pugnandum fuerit adversus schismatum authores, quos nunc Antichristos, modò canes, quandoque nubes sine aquâ, ipsimet vocaverunt Apostoli, vestigiis illis tutò poterunt insistere: ceteris verò in errore natis nefas illis videatur insultare; aberrantium saluti meliùs consulat, qui comitem veritatis sequetur charitatem quàm si viros, qui cum lacte nutriti errorem suxerunt, verbis asperioribus insectetur.

Has lenitatis & concordia leges à me violatas esse quis fortasse criminabitur, cum agerem in Socinianos? Quâ quidem in re, fateor, servavi justitiæ, non lenitatis regulas: quænam enim cum hostibus infensissimis & subdolis posset esse mansuetudo? Multi sunt Christianæ Religionis hostes; sed nulli capitaliores, nulli magis versutâ nocendi ratione utuntur, quàm Sociniani; scilicet abutuntur nomine Christiano, ut tanti nominis specie alliciant, seu potius decipiant

S. Aug. lib.
1 de unico
Baptismo
c. 13. & 18.

PRÆFATIO.

incautos, à quibus defererentur continuò, si se Philosophos & naturæ solius sectatores aut magistros profiterentur. Detegenda fraus est, nec cum tam pernitiolis hostibus per cuniculos, sed palàm & aperto Marte dimicandum: præmonendi que fuerunt diligenter Theologi è Candidatis de familiari Socinianis, & iniquo penitus Verbi Divini exponendi genere ad eorum tempora.

DE QUÆSTIONIBUS, *quæ Theologicis Tractatibus vulgò premittuntur.*

PRO peregrinis haberentur forsan in re Theologicâ, qui Tractatus à nobis conscriptos ediscerent, si de variis, à quibus auspicantur plerunque Scholæ Magistri, quæstionibus silerem omninò, quòd eas non noverit Antiquitas: idcirco paucis referam, quæ fusiùs solent proponi.

Querunt igitur 1^o Theologi, quid sit, & quomodò dividatur Theologia?

Reponunt sermonem esse de Deo, rebusque divinis distinctum à Theologiâ naturali, seu metaphysicâ, & à Theologiâ infusâ; quòd naturalis Theologia ex principiis lumine naturali cognitis conclusiones colligat; ista verò suas ducat ex principiis revelatis: quòd Theologia infusa Prophetarum & Apostolorum animis illapsa fuerit; ista verò labore non modico comparatur. Dicitur alia Positiva, Scholastica altera: prior in uberiori & oratoriâ Fidei mysteriorum expositione constituitur; posterior in logicâ differendi ratione, seu per divisiones, definitiones, strictas argumentationes. Hæc in unicâ veritatis contemplatione si posita sit, speculativa nuncupatur; moralis verò, si morum leges præscribat.

Querunt 2^o Theologi, utrùm Theologia sit virtus intellectualis, & quænam?

Respondent dubitandi locum non esse, quin sit mentis habitus; cum inclinet ad verum: nec tamen, inquirunt, est intelligentia; quia non versatur circa prima principia immediate nota. Nec etiam ars est, vel prudentia, ut palàm est.

PRÆFATIO.

Scientiam esse non negabit qui attenderit : cognitio enim certa est, eâque longè certior cognitione, quæ rationis ministerio habetur. Evidentem dicunt, non quòd Deum, ut in se est, contempletur ; sed quòd evidenter demonstret revelata esse principia, & conclusionum connexionem cum illis esse necessariam.

Nec scientiæ nomen Theologiæ detrahendum est, quòd agat de singularibus, ut de Christo, Deiparâ, Adamo, &c. necnon de contingentibus, ut de actibus humanis. Enimverò licet de singularibus atque de contingentibus non possit dari scientia purè naturalis ; potest tamen dari scientia ex fide ; ac divinâ revelatione procedens, qualis est Theologia nostra. Hæc enim pendet ex lumine fidei, divinæque revelationis, se se etiam ad singularia & contingentia extendentis, quæ quatenus tali subsunt lumini, necessaria sunt, saltem necessitate certitudinis.

Addunt Theologiam esse quoque sapientiam, quòd ea sit cognitio rei per causam, non quamcunque, sed altissimam : judicat enim de rebus per altissimam omnium causarum, nempe Deum revelantem.

Ceterum Theologia non modò conclusiones infert ex Fidei articulis, verum etiam illos articulos explicat, solvitque sophismata, quæ contra congerunt Heretici, non singula quidem evidenter, ut aiunt, positivè, sed saltem negativè, scilicet ostendendo ex talibus argumentis nihil evidenter confici.

Querunt 3. Theologi, an Theologia nostra subalternetur scientiæ Beatorum?

Ad illam subalternationis rationem vulgò tria cum Philosophis requirunt Theologi. 1^o ut utriusque scientiæ, inferioris & superioris idem sit objectum ; sed cum alquo additamento accidentario in inferiori : sic numerus, ut sonorus, objectum est Musicæ, & Arithmeticæ ut numerus. 2^o ut principiorum suorum probationes subalternata mutuetur à subalternante, ut à Physicâ depromit Medicina. 3^o ut simul possint consistere.

Jam verò respondent plures Theologi, idem esse quidem objectum Theologiæ nostræ ac Beatorum, nempe Deum, aut Divinitatem revelatam, sed absque additamento ullo :

PRÆFATIO.

non enim contrahitur objectum, quòd clarè, aut obscurè videatur. 2. Nullatenùs à Theologiâ Beatorum nobis imperviâ mutuari sua principia Theologiam nostram. 3. Nec ullâ ratione posse simul coherere visionem intuitivam cum cognitione per fidem, quæ ideò non manet in Beatis. Undè colligunt Beatorum cognitioni Theologiam nostram non esse subalternatam.

Profitentur quoque Theologiam nostram, licet præcellat ceteris scientiis, sitque extrinsecùs supernaturalis ratione objecti & principiorum; non esse tamen supernaturalem intrinsecùs; seu ratione entitatis; cum sit habitus industriâ nostrâ comparatus.

Contendunt ex Theologis quidam, Theologiam non esse unam scientiam unitate specificâ. Alii stant è contra; nec obesse illi unitati specificæ asserunt, quòd de Deo agat, de Angelis, de hominibus, de vitiis & virtutibus, aliisque de rebus pluriquàm specie diversis; quia hæc non considerat nisi quatenùs divinæ subsunt revelationi, sicque unam esse rationem formalem & specificam Theologiæ.

Consentiunt Theologi de objecto totali Theologiæ, seu attributionis, Deum scilicet esse, ut subest revelationi; quia, inquit, qui cunque considerantur in Theologia, vel sunt ipse Deus, aut sub ipso comprehenduntur, non ut partes, vel species, aut accidentia; sed ad ipsum pertinent, aut per modum proprietatis ut attributa; vel ut effectus ab ipso profecti, ut res create; vel ut media, quæ ad ipsum conducunt tanquam ad principium & finem, cujusmodi sunt actus humani, leges, gratia, virtutes, Incarnatio, & Sacramenta.

Hinc colligunt Deum sub ratione Deitatis esse objectum Theologiæ; quatenùs nimirum subest revelationi; sicque dicunt objectum materiale Theologiæ saltem primarium esse Deum secundum se; formale verò *quod*, esse Deitatem; formale *sub quo*, revelationem virtualem ac mediatam: quæ quidem ratio formalis Theologiæ non est intrinseca, licet hanc conditionem exigant inferiores scientiæ; quia, inquit, scientiæ merè naturales ducuntur ex naturali lumine intellectus, & cognitione primorum principiorum, in quæ suas resolvunt conclusiones; Theologia verò infertur ex articulis fidei,

P R Æ F A T I O.

Fidei, & in extrinsecâ Dei dicentis autoritate fundatur.

Adjiciunt Theologiam esse habitum à Fide, à Metaphysicâ, aliisque scientiis naturalibus distinctum; à Fide quidem Divinâ, quia Fides innititur revelationi divinæ, quæ revelatio dicitur formalis; à Metaphysicâ quoque & ab aliis scientiis naturalibus, quæ nituntur principiis solo lumine naturali notis.

Querunt 4. utrum Theologia sit speculativa simul & practica?

Respondent Theologiam eminenter esse speculativam & practicam; quia objectum Theologiæ, nempe Deus, simul est regula speculationis, & praxeos; cum sit simul prima veritas, & ultimus finis. Addunt autem esse magis speculativam, quam practicam; quia principalius agit de rebus divinis, quam de actibus humanis, de quibus non agit, nisi quatenus per eos ordinatur homo ad perfectam Dei cognitionem, perfectumque illius amorem. Nec volunt sermonem institui de Theologiâ, ut de scientiâ merè naturali. Quocirca remonent procùl difficultates, quæ petuntur ex divisione scientiæ in speculativam & practicam: licet enim, inquiunt, speculativum & practicum sint differentię essentialis scientiæ naturalis; ideoque non possint in illâ adunari; tamen non se habent eodem modo respectu Theologiæ: quandoquidem quæ sunt in inferioribus dispersa, in superioribus sunt conjuncta, uti patet exemplo Angeli primi ordinis, qui multo plura per unum conceptum cognoscit, quam quæ cognoscuntur ab inferiori per plures.

Querunt 5. undè Theologia ducat argumenta sua?

Respondent recenseri vulgò locos decem Theologicos; ex his alios necessarios, alios probabiles; aliquos proprios, aliquos verò extraneos. Primo loco constituunt Scripturam sacram Libris Canonicis contentam. 2^o Traditionem Apostolorum. 3^o Ecclesiam Catholicam. 4^o Concilia generalia. 5^o Ecclesiam Romanam. 6. Sanctos Patres. 7. Theologos & Juris Pontificii peritos. 7. Rationem naturalem. 9. Philosophos. 10. Humanam Historiam.

Verùm quia non unus est Scripturæ sacre sensus, operæpretium esset dignoscere, ex quo potissimum ducatur conclusionis certitudo. Scripturæ verò sensus historicus, seu lit-

PRÆFATIO.

teralis, est quem immediatè Spiritus sanctus significare voluit, sive propriè sumantur voces, seu impropriè: undè sensus parabolicus ad litteralem refertur; nec litteralis est ipsa figura, sed id quod figuratum est; ut cum dicitur Brachium Dei, sensu litterali in Deo non indicatur quædam pars corporis: sed nomine Brachii significatur Dei virtus atque potentia. Mysticus sensus ille est, quo res significatæ per voces, iterùm res alias significant: & triplex est, allegoricus, moralis seu tropologicus, & anagogicus. Sicut enim Scripturæ sacræ verba propriè, figuratève accepta, immediatè significant res sensu litterali; sic eadem res aliquandò significant aliud, quod ad fidem & Ecclesiam militantem pertinet, & hic est sensus allegoricus. Cum verò exprimunt quod ad morum informationem, & Charitatis officia spectat, hic est sensus moralis seu tropologicus. Si quod ad Ecclesiam triumphantem, & nostram in Cœlis expectationem pertinet, denotent, sensus hic est anagogicus. Itaque sensus allegoricus pertinet ad Ecclesiam; tropologicus ad mores; anagogicus ad gloriam: qui sensus his duobus comprehenduntur versiculis.

Littera gesta docet; quid credas Allegoria;

Moralis quid agas; quid speres Anagogia.

Allegoria iterùm vel in vocibus, vel in rebus sita est: in vocibus nihil aliud est, quàm continuata metaphora: in rebus est res gesta & significata, aliam rursus ex divinâ institutione significans: sed prima ad sensum litteralem; & secunda ad mysticum est referenda.

Investiganda forent plura circa Scripturæ sensus; cur plerunque metaphorici occurrant. parabolici, & obscuri? Cur iisdem verbis multiplex contineatur sensus? Cur tam variâ usus sit Deus œconomiâ, in veteri & in novo Testamento? Sed hæc quæ profundioris sunt disquisitionis aliud in tempus esse mittenda censemus; cum scilicet Theologiæ Candidati lecto sæpius universo Dei verbo, pares erunt, qui mysteria tam occulta, tam magnifica, & immensæ erga nos divinæ benignitatis tam insignia monumenta complectantur animo. Theologiæ Candidato satis sit nunc temporis intelligere propria Theologiæ principia divina esse, illaque esse Scripturam sacram, & Traditionem Apostolicam; Scripturam verò sacram, ut definit Conc. Trid. sess. 4. in decreto de editione

PRÆFATIO.

& usu sacrorum Librorum, nonnisi juxta sensum ubique & semper receptum, intelligendam esse, nec contorquendam *Contra cum sensum, quem tenuit & tenet sancta Mater Ecclesia, cujus est judicare de vero sensu & interpretatione Scripturarum sacrarum, aut etiam contra unanimum consensum Patrum, ipsam Scripturam sacram interpretari audeat.* Deum igitur in suo Verbo audiat Candidatus, neque putet adherere Dei Verbo, nisi cum deprehenderit ita intellexisse sanctam Matrem Ecclesiam: ita verò percipiet, si legat Sanctos Patres non aliter exposuisse.

Ad intelligendum, ut par est, Traditionis Apostolicæ pondus, necdum etiam idoneus videtur Theologiæ Candidatus: hujus autoritatis intelligentiam ratione postmodum tenebit, ubi fuerit perscrutatus antiqua nascentis Ecclesiæ, priorumque temporum secula: comperiet enim quanti fecerint Antiqui universæ Ecclesiæ in aliqua capita consensionem, cujus momenti in Conciliis Oecumenicis fuerint Orthodoxorum Patrum autoritates; quo pietatis sensu abhorruerint à novitatibus, & à Verbi divini recens excogitatâ, nec à Patribus acceptâ interpretatione. Satis sit Candidato Catholicæ insistere Doctrinæ, & S. Pauli verbis 2. Thess. 2. v. 14. *Itaque Fratres stete, & tenete Traditiones, quas didicistis, sive per sermonem, sive per Epistolam nostram.* Sciat hanc fuisse temporibus subsequen-
tibus receptam differendi rationem adversus Hæreticos; & non aliundè profectas hæreses, quàm quòd ab illâ divinâ reguâ defecerunt novitatum authores Sic disse-
ruit secundo seculo Sanctus Irenæus libro 3. c. 3. Sic 2 & 3. seculo Tertull. lib. de Præscript. *Nobis verò nil ex nostro arbitrio inducere licet, sed nec eligere quod aliquis arbitrio suo induxerit: Apostolos Domini habemus authores, qui nec ipsi quicquam ex suo arbitrio quod inducerent, elegerunt; sed acceptam à Christo disciplinam fidelibus nationibus assignaverunt.* Ità quoquè S. Cyprianus tertio seculo, quem laudat S. August. contra Donatistas lib. 5. de Bapt. cap. 16. his verbis: *Quod Cyprianus nos admonet, ut ad fontem recurramus, id est ad Apostolorum Traditionem, undè canalem in nostra tempora dirigamus, sine dubitatione faciendum est.* Sic tandem quinto etiam seculo adver-
sus hæreses omnes, præsertim Nestorianam, Vincentius Lirinensis in Commonit. *In ipsâ item Catholicâ Ecclesiâ maxime*
c. 1j.

PRÆFATIO.

errandum est, ut id teneamus, quod ubique, quod semper, quod ab omnibus creditum est: hoc est enim verè proprièque catholicum, quod ipsa vis nominis, ipsaque ratio declarat; qua omnia ferè universaliter comprehendis. Sed hoc ità demùm fiet, si sequamur universitatem, antiquitatem, consensionem: sequemur autem universitatem hoc modo, si hanc unam fidem veram esse fateamur, quam tota per orbem terrarum confitetur Ecclesia: Antiquitatem verò, si ab his sensibus nullatenùs recedamus, quos sanctos Majores ac Patres nostros celebrasse manifestum est: Consensionem quoque itidem, si in ipsâ vetustate omnium, vel certè penè omnium Sacerdotum pariter & Magistrorum definitiones, sententiasque sectemur. Ità institutus Candidatus noster à novitatibus procul recedet, nec magni faciet, nisi quod Deo acceptum eâ ratione habuerit.

Querunt 6. Theologi quænam sint Theologiæ proprietates?

Triplicem afferunt; dignitatem videlicet, certitudinem, & necessitatem.

1. Statuunt Theologiam scientiis purè naturalibus dignitate præcellere; cum alicujus disciplinæ dignitas sit æstimanda ex dignitate & nobilitate objecti: Theologiæ verò præstantissimum est objectum, nempe Deus, & quæcumque divinitùs sunt revelata.

2. Duplicem supponunt esse certitudinem; objectivam alteram, formalem aliam: prior est firma & constans objecti determinatio: posterior, firma intellectùs ad verum adhesio. Ratione hujus utriusque certitudinis scientia dici potest alterà certior quoad se, quandò ex naturâ suâ firmiores habet suæ certitudinis causas; & quoad nos, cum ejus certitudo magis est connaturalis, & intellectui nostro magis accommodata, quandò scilicet certitudo est cum evidentiâ conjuncta.

Theologia porrò quâlibet scientiâ naturali certior est certitudine objectivâ; quia versatur circa Deum, apud quem non est transmutatio, nec vicissitudinis obumbratio.

Certior est etiam certitudine formali; quia certitudo formalis oritur ex efficaciâ & infallibilitate medi intellectum ad veritati assentiendum determinantis: quod quidem medium longè certius est mediis, quibus scientiæ naturales utuntur. Nec tamen evidentior est scientiis naturalibus, utpotè cum obscuritate sit conjuncta,

PRÆFATIO.

3. Definiunt Theologiam non esse singulis hominibus necessariam, sed Pastoribus saltem, qui egent eruditione illi divinâ, cujus beneficio plebem fidelem ad finem divinitus promissum dirigere possint: opus est enim divinâ institutione, quæ divinitus accepta ab unico veritatis Magistro revocet homines ab errore, & ab erroris periculo servet; quod eloquenter adversus Ethnicos, Religionis Christianæ vindices, S. Just. Athenagoras, Tertull. & alii demonstrant, nec posse hominem edocere hominem, nullumque vel ex Philosophis celeberrimis extitisse, qui singulos & rudes homines edocendos susceperit, & qui non peccarit in gravissimis, seu graves in errores non fuerit lapsus. Pythagoras animarum transmigrationem somniavit. Lucretius cum Dicæarcho mortalitatem asseruit animæ. Lucippus, Democritus, & Epicurus cuncta sponte nata ex fortuito Atomorum concursu commenti sunt. Plato innumeras ideas per se subsistentes, & à singularibus separatas sibi finxit. Heraclitus res omnes ex se moveri putavit. Aristoteles mundi æternitatem admisit. Tandem, inquit Tertull. lib. de Præscript. *plius hominibus nocuit, quam profuit antiqua Philosophia, ex quâ hæreses omnes subornantur: hæc omnium errorum genitrix, alitrix, gubernatrix: Hæreticorum Patriarcha fuere Philosophi, de quorum ingeniis omnis hæresis animatur.*

Querunt ultimò, utrùm Theologia juxta formæ regulas tradita, sit utilis & necessaria?

Resp. non modò utilem esse, sed & necessariam ad depellendos errores, & ad servandam adversus novitates Ecclesiæ fidem illibatam, & ad eam adducendos infideles & devios: nam, ut jam superiùs ex S. August. monuimus lib. 14. de Trinitate cap. 1. *Per eam fides saluberrima in nobis gignitur, nutritur, defenditur, & roboratur.* Non tamen est necesse singulos homines esse Theologos: satis est aliquos extare, qui fidei veritates alios edoceant, errores impugnent, credendique impedimenta removeant.

Ex quibus licet inferre quantùm à scopo veritatis aberrarint, qui cum Luthero & aliis Hæreticis Theologiam scholasticam non modò ut inutilem, sed ut Ecclesiæ perniciosam assererent; eamque nihil aliud esse, quàm veritatis inscitiam, inanemque fallaciam; & quam præcavere monet Apostolus.

PRÆFATIO.

Alii cum Philippo Melanctone profanam esse scholasticam, quâ semel admisâ, obscuratum est Evangelium, ac fides penè extincta. Ceteri cum Calvino ipsam esse velum Christi, ac totius Reipublicæ Christianæ perniciem. Hinc Theologos Scholasticos passim appellat asinos cornutos, bestias bipedes, & Sophistas. Lutherus Christianas Academias vocat Antichristi Lupanaria. Wiclesus Castra Carnitica. Quis verè fidelis ab eis convitiis non abhorreat? An Evangelium docet sic excipiendos esse Doctores, qui Rempublicam Christianam plurimum in dissolvendis ac infirmendis Hæreticorum cavillationibus adjuvarunt? Quandoque si peccassent, collocatâ diligentiori operâ in subtiliorum quæstionum disquisitione, corripiendi fuissent mansuetudine summa. Vitium esset hominum, quos animi subtilitas impelleret; non vitium doctrinæ, quæ commoda plurima parit Ecclesiæ. *Disputationis disciplina*, inquit S. August. lib. 2. de Doctrinâ Christ. cap. 31. *ad omnia genera quæstionum, quæ in Litteris sanctis sunt penetranda, & dissolvenda, plurimum valet: tantum ibi cavenda est libido rixandi, & puerilis quadam ostentatio decipiendi adverſarium.* Monere sedulò operæ fuisset pretium, declinandam esse hanc rixandi libidinem? Quod igitur est tam immane Scholasticorum scelus? An quòd ex Scripturæ contextibus, & autoritate conclusiones colligant? Collegit Christus: collegere Apostoli, tum in Concilio Hierosolymitano, tum in suis Concionibus, tum in Epistolis: Collegere puriorum temporum Authores adversus exortas temporum illorum novitates. An quòd ex unanimi Ecclesiarum consensione antiquâ disserunt contra recens excogitata dogmata? Igitur litem moveant Sancto Irenæo, Tertulliano, Sancto Cypriano, Sancto Augustino, & cæteris Ecclesiæ Defensoribus. Numquid non ipsi Lutherus, Melancton, Calvinus, & alii, novitates suas ex Scripturis conantur exprimere? Numquid non Antiquorum dicta, si possunt, solent opponere? Quid igitur in Scholasticâ dignum occurrit tam gravi censurâ? Nihil profectò, debitos modò intra fines contineatur. Quinimò plurimum intervrit secernendis à falso ac verisimili dogmatibus catholicis.

Invehitur, inquam, Tertullianus in Scholasticam, cum:

PRÆFATIO.

lib. de præscript. Hæretic. cap. 7. ait : *Quid Athenis , & Hierosolymis ? Quid Academia , & Ecclesiæ ? Quid Hæreticis , & Christianis ?* Nostra institutio de Porticu Salomonis est , qui & ipse tradiderat Dominum in simplicitate cordis esse querendum. Invehitur , inquit , Sanctus Gregorius Nazianzenus orat. 26. & 34. cum dolet ac deplorat illam disputandi de Deo rationem , quæ suis invaluerat temporibus. Invehitur Sanctus Hieronymus in cap. 10. S. Matth. Eos enim damnat , qui humanæ ratiocinationis præsidii innituntur.

Verum Patres illi carpunt dumtaxat Hæreticorum industriam & artificium in syllogisticâ & humanâ ratiocinatione positam , cujus abusu incautis ac simplicibus illudebant ; ut Praxeas , Sabellius , Arius Eunomius , Aëtius , Pelagius , Julianus , & alii : quod & testificantur quoque Sanctus Ambrosius in Psalm. 118. Sanct. Gregorius Nissenus lib. 1. contra Eunomium , Sanctus Epiphanius hæres. 76 Sanctus Augustinus lib. 2. contra Julianum , Cocrates lib. 1. cap. 5. Sozomenus lib. 1. cap. 1. Dolent & dolebunt continuo Ecclesiæ hostes , quod hâc methodicâ differendi ratione convellantur palàm eorum cavillationes & versutie politiori stylo circumornatæ , quibus simpliciorum animos capere solent. Pseudo-Apostolorum Corinthiorum vestigiis insistent , qui simplicem & non elaboratam , ut dicebant , differendi rationem Apostolicam arguebant , ut à Sancti Pauli scholâ & doctrinâ suas in partes Christi Discipulos abducerent Deo juvante , constanter Apostolicæ ipsius simplicitati adhærebitus ; novitati cum Apostolo bellum inferemus continuum ; sectabimurque , non quæ Calvinus , Melancton , & Lutherus excogitarunt , licet è Cœlo referre se accepta profiteantur ; sed quod Christus Apostolis tradidit , traditum sibi depositum sacrum Ecclesiæ crediderunt Apostoli , & Ecclesia semper , & ubique filios suos edocuit ; divinumque depositum illud Scholasticæ nostræ beneficio propugnabimus , fremant licet Oviles Christi prædones & depopulatores.



INDEX

QUÆSTIONUM, ARTICULORUM, Conclusionum, & Quæstiuncularum.

QUÆSTIO I. <i>Utrum Deus sit?</i>	pag. 2
ART. I. <i>Utrum innata nobis sit Existentiæ Dei cognitio?</i>	ibid.
CONCL. <i>A naturâ omni homini rationis compoti, Dei Existentiæ cognitio est inserta.</i>	pag. 3
<i>Solvuntur Objectiones.</i>	6
ART. II. <i>Utrum hæc propositio, DEUS EST, sit nota quoad nos?</i>	10.
CONCL. <i>Propositio, DEUS EST, quoad nos nota est.</i>	11
ART. ult. <i>Utrum Existentiæ Dei demonstrari possit?</i>	12
CONCL. I. <i>Dei Existentiæ per res creatas demonstrari tradunt sacri Codices.</i>	13
CONCL. II. <i>Plurima de Deo demonstrationes afferri possunt.</i>	14
<i>Quæritur cujus momenti habende sint probationes illa ex cognitione ingenitâ petita, & non per sensus intermedios?</i>	19
QUÆST. II. <i>Utrum Deus sit unus, an multiplex?</i>	21
ART. I. <i>Qui unitatem Dei impugnarunt?</i>	ibid.
ART. II. <i>Unitas Dei demonstratur.</i>	22
ART. III. <i>Idololatra confutantur.</i>	24
<i>Idololatria origo.</i>	ibid.
<i>Varia species Idololatriæ.</i>	26
CONCL. I. <i>Ex iis, quos delusa Gentium antiquitas Deorum loco habuit, nullus unquam fuit, qui vel levissimam Divinitatis umbram affecutus fuerit, omnesque penitus fuere indigni, qui Deorum numero ascriberentur, aut divinis honoribus colerentur.</i>	27
CONCL. II. <i>Defunctorum anima Deorum numero annumerari non possunt.</i>	28
CONCL. III. <i>Principes, dum viverent, aut viri eximii, divinis honoribus colendi non erant.</i>	29
CONCL. IV. <i>Confutantur Idololatra, qui non Deos plures, sed varias virtutes, ut Dei partes, aut multos Deos ex unâ Dei substantiâ; seu divina attributa, quæ per illos Deos in Templis designarentur, divinis honoribus se colere afferebant, seque à plurium Deorum confessione longè abesse.</i>	ibid.
CONCL. V.	

INDEX.

- CONCL. V. *Virtutes humana Deorum nominibus non sunt insigniende.* 30
- CONCL. VI. *Plures Deos velut plures ministros uni Deo subditos divinis honoribus colere fas non erat.* 33
- CONCL. VII. *Refellitur sententia subtiliorum Ethnicorum, qui Deum unicum colere se profitebantur: sub reliquorum verò Deorum nominibus, virorum illustrium memoria debisum deferre honorem, ut ad eorum amulationem posteros excitarent.* 34
- CONCL. VIII. *Creaturis inanimatis, ut Soli & Sideribus, divinus cultus non est exhibendus.* ibid.
- CONCL. IX. *Nec Statuis (quod apud Antiquos solemne erat) divinus honor debetur.* ibid.
- CONCL. ult. *Cultus quilibet apud Ethnicos solemnissimus, seu qui pro objecto haberet Deos Gentium; aut animas defunctorum, aut homines, dum viverent, fuit semper horrendus, inhonestus, absurdus, inhumannus, & impius.* 37
- ART. ult. *Confutantur haeretici, qui unitatem Dei impugnarunt.* 43
- QUESTIO III. *Quid sit Deus, seu in quo sita sit natura Dei?* 46
- ART. I. *Utrum in hac vitâ, quid sit Deus, nosse possit homo?* ibid.
- Errores.* ibid.
- CONCL. *Non potest homo in hac vitâ nosse quid sit Deus.* ibid.
- ART. II. *Quae de Deo noverimus, seu quae sint attributa Dei, & quis inter illa ordo?* 48
- CONCL. *Attributa negativa videntur positivis esse potiora; seu perfectior est Dei cognitio, quae per negationem, quam quae per affirmationem habetur.* 49
- ART. III. *Quae sit distinctio inter attributa divina?* 50
- CONCL. I. *Distinctio rationis ratiocinata ac virtualis, inter attributa & essentiam divinam est admittenda.* 53
- CONCL. II. *Attributa divina absoluta, seu relativa aut personalia, non distinguuntur ab essentia divinâ distinctione reali majori, vel minori seu modali.* 56
- CONCL. III. *Non est admittenda distinctio formalis Scotistica inter attributa & essentiam divinam.* 58
- Quaer. num Essentia & Existencia in Deo distinguantur vel ratione?* 59
- ART. IV. *Quid in Deo sit quod videatur primum habere locum differentiae?* ibid.
- CONCL. *Summum esse, seu esse à se & necessario, aut omnimoda independentia locum differentiae in Deo obtinere videtur.* ibid.
- QUEST. IV. *De simplicitate Dei.* 62
- ART. I. *Utrum Deus sit corporeus?* ibid.
- Errores.* ibid.
- CONCL. I. *Deus corporeus non est, quocunque sensu sumatur corpus.* 63
- CONCL. II. *Non datur in Deo compositio ex genere & differentia.* 65
- CONCL. III. *Non datur in Deo compositio realis ex essentia, & existentia; aut ex essentia, & personalitatibus divinis.* 67

INDEX

CONCL. IV. Deus non componitur ex substantiâ & accidente.	68
CONCL. ult. Non datur in Deo compositio virtualis, nec formalis.	70
ART. ult. Quid de simplicitate Dei censuerit Tertullianus?	ibid.
CONCL. Tertullianus Deum esse corporeum, seu ex materiâ & formâ constitutum non existimavit.	ibid.
QUÆST. V. De Dei Immutabilitate.	74
ART. Utrum Deus sit immutabilis, & quidem solus?	ibid.
CONCL. Deus est immutabilis, & quidem solus?	ibid.
QUÆST. VI. De Aeternitate Dei.	78
ART. unicus. Utrum Deus sit æternus, & quidem solus?	ibid.
CONCL. Deus est æternus, & quidem solus.	79
QUÆST. VII. De Dei Immensitate.	80
ART. I. Utrum Deus sit substantialiter immensus, & solus?	ibid.
Errores.	ibid.
CONCL. Deus est in omnibus rebus ratione substantiæ, & solus.	ibid.
Quæritur an Deus sit ubique, tanquam in loco.	82
ART. II. Utrum Deus sit formaliter in Deo per actionem?	ibid.
CONCL. Deus formaliter in loco est per actionem.	83
ART. III. Utrum Deus sit extra cælos, seu in spatiis imaginariis, & quomodo?	86
CONCL. I. Deus non est in spatiis imaginariis, seu extra cælos.	ibid.
CONCL. II. Deus dici potest extra cælos omnipotentiâ suâ, ita ut designetur potentia Dei orbis circumferentiâ non circumferibi, & posse alios mundos creare.	87
QUÆST. VIII. De invisibilitate, aut visibilitate Dei.	89
ART. I. Num Deus oculis corporeis videatur, aut videri possit?	90
CONCL. Oculis corporeis nec videtur Deus, nec videri potest.	ibid.
ART. II. Utrum Deus ab intellectu creato, solis natura viribus instructus, videri possit?	95
CONCL. Solis natura viribus instructus homo Deum insucri non potest.	ibid.
ART. III. Utrum Deus sit incomprehensibilis, seu num ab intellectu Angelico aut humano, quocunque auxilio juvetur, comprehendi possit?	96
CONCL. Deus absolutè comprehendi non potest.	97
ART. IV. Utrum intuitiva Dei visio possibilis sit, & utrum illius visionis possibilitas demonstrari possit?	100
CONCL. I. Possibile esse Dei visionem intuitivam fides docet.	ibid.
CONCL. II. Possibile absolutè intuitivam Dei visionem ratio suadet, & demonstrat, saltem negativè.	106
CONCL. III. Possibile Dei visionem ratio non demonstrat positivè.	ibid.
ART. V. Utrum in hac vitâ constituto homini visionem sui intuitivam possit Deus concedere? & utrum eam conceçerit?	111
CONCL. I. Viatori visionem sui intuitivam potest Deus absolutè concedere.	ibid.

INDEX.

- CONC. II. *De non concedendâ viatori visione sui intuitivâ, legem Deus sancivit.* ibid.
- CONCL. III. *Sui visionem nunquam Deus concessit, nec Moysi, nec S. Paulo. &c.* ibid.
- ART. VI. *Utrum Justis statim atque deceſſerunt, viſio intuitiva concedatur?* 106
- CONCL. I. *Justi statim atque è vivis exceſſerunt, ſi nihil impurum ſuperſit expurgandum, viſione beatificâ donantur.* ibid.
- Queritur num Joannes XXII. Juſtos decedentes, quibus nihil purgandum ſuperest, viſione beatificâ frui ſtatim poſt mortem cenſuerit?* 136
- ART. VII. *Cujus natura & virtutis ſit auxilium, ſeu gloria lumen elicienda beatifica viſioni neceſſarium?* 141
- CONCL. I. *Auxilium viſioni beatifica neceſſarium, à Theologis merited gloria lumen nuncupatur.* ibid.
- CONCL. II. *Lumen illud ad ſuſcipiendam viſionem, inſtar diſpoſitionis ſe habere, non videtur dicendum.* 142
- CONCL. III. *Intellectus virtutem eſſentialem non inſendit lumen gloria: quia intenſionis & remiſſionis incapax eſt intellectus, utpote facultas ſubſtantialis & ſpiritualis.* ibid.
- CONCL. IV. *Gloria lumen intellectum juvat per modum qualitatſ intrinſeca, & habitus.* ibid.
- CONCL. V. *Non poteſt eſſe creatura intellectuâli connaturale lumen gloriæ, ſeu dari non poteſt creatura, que per ſeipſam Deum videat, ſeu cui Dei viſio intuitiva ſit debita.* 143
- ART. VIII. *An equalis ſit in Beatis viſio intuitiva Dei?* 144
- CONCL. I. *Inequalis eſt viſio beatifica.* ibid.
- CONCL. II. *Ex gloria luminis majori aut minori participatione, viſionis beatifica equalitas aut unequalitas oritur.* 147
- CONCL. III. *Viſio beatifica mutationi, aut ſucceſſioni obnoxia non eſt.* ibid.
- CONCL. IV. *Ejuſdem ſpeciei ſunt viſiones beatifica, tum Angelorum, tum hominum.* 148
- ART. IX. *Viſionis beatifica latitudo.* ibid.
- CONCL. I. *Fidei myſteria, quorum fidem in terris habuerunt, clarè inſuentur Beati: non tamen res omnes ſupernaturales, ſaltem quoad adjuncta ſingula.* ibid.
- CONCL. II. *Dei attributa absoluta omnia, & votionalia, ſeu que ſunt in Deo formaliter, vident Beati.* 149
- CONCL. III. *Naturalem rerum ordinem, & que in terris geruntur, ſimulque facta ſunt, vident Beati & videre poſſunt.* ibid.
- CONCL. IV. *Vident quoque Beati præterita, & que ad ſui & ſuorum ſtatum pertinent.* 150
- CONCL. V. *Se invicem, & ſuos noſcunt Beati.* 151
- CONCL. VI. *Damnatorum quoque pœnas Beati vident.* ibid.
- CONCL. VII. *Non perſpectam habent Sancti divinarum perfectionum infinitatem; ſeu totaliter Deum non inſuentur.* ibid.

INDEX.

- CONCL. VIII. *Nec vident Beati futura omnia, nec omnia singularia de crinate.* ibid.
- CONCL. IX. *Possibilia videre omnia non possunt Beati.* ibid.
- CONCL. ult. *Essentia divina sine attributis, attributa sine se invicem videri non possunt, vel per absolutam Dei potentiam.* 152
- Queritur quotuplex sit Beatorum visio?* 153
- ART. ult. *In quo qua vident Beati inueantur?* ibid.
- CONCL. I. *Ut inutiles prorsus, imò & impossibiles à visione beatificæ species impressas, & expressas mox explicatas removeri oportet.* 154
- CONCL. II. *Qua ad beatitudinem spectant, vident formaliter Beati in Deo, seu in Verbo; qua verò ad beatitudinem non spectant, vident in ipsis creaturis, vel per revelationem, aut per Angelorum & hominum relationem, aut in ipsâ essentiâ divinâ, ut in causâ.* 157
- QUÆST. IX. *De Dei Ineffabilitate.* 158
- ART. unicus. *Utrum Deus sit ineffabilis? quibus potissimum delineanda Dei natura nominibus uti sit conveniens?* ibid.
- CONCL. I. *Deus est ineffabilis, nec verba illa Deo digna proferuntur, seu qua ejus naturam exprimant.* ibid.
- CONCL. II. *Deus appellari nihilominus potest nominibus, qua imperfectè ejus naturam & substantiam designent, ut qua in Scripturis continentur.* 160
- Queritur quod nomen illud sit, quod Deus Antiquos celarat, & Moysi Exod. 3. revelare dignatus est?* 161
- QUÆST. X. *De Bonitate Dei.* 162
- ART. unicus. *Utrum Deus sit infinitè & essentialiter bonus, solus simul, & omnes omninò perfectiones contineat?* ibid.
- CONCL. I. *Deus est infinitè & essentialiter bonus in se, & solus, & eâ ratione summè bonus.* ibid.
- CONCL. II. *Deus est creaturis summè bonus.* 164
- Queritur 1. utrum Deus omnes perfectiones contineat?* 165
- Queritur 2. utrum Deus sit aliquid melius aut perfectius cum rebus creatis, quàm si solus spectetur?* 166
- Quer. 3. utrum Deus sit veritas?* ibid.
- Quer. ult. utrum in Deo sit vita?* ibid.
- QUÆST. XI. *De Scientiâ Dei.* 167
- ART. I. *Utrum in Deo sit scientia; & qualis sit; & circa qua versetur?* ibid.
- CONCL. I. *Datur in Deo scientia.* ibid.
- CONCL. II. *Deus qualibet etiam diversè à se natura novit, & solus, & ab eterno.* 168
- CONCL. III. *Novit Deus futura, seu datur in Deo præscientia.* 169
- CONCL. ult. *Novit Deus futura conditionata, quorum conditio nunquam est ponenda.* 171
- ART. II. *Quomodo, aut in quo seipsum, & cetera, seu præsentia, seu futura absoluta, aut conditionata Deus noverit?* 172

INDEX.

CONCL. I. Semetipsum novit Deus, & per seipsum;	ibid.
CONCL. II. Deus in se, & per se novit omnia.	ibid.
CONCL. III. Novit Deus peccata objective tantum, & ex obliquo.	173
CONCL. IV. Res futuras non novit Deus, quod sibi coexistant ab aeterno secundum illud esse reale, quod in tempore consequuntur.	ibid.
CONCL. V. Non cognoscit Deus res futuras in voluntate sua, ut in rerum futurarum causa.	174
CONCL. VI. Non ideo novit Deus futura libera, quia futura sunt.	178
CONCL. ult. Res futuras liberas in sua essentia videtur Deus notas habere, non liberas vero in omnipotentia, ut earum causa.	179
ART. III. Utrum detur scientia media?	180
CONCL. Scientia media, seu conditionata, proprie & intrinsece in Deo videtur non esse.	ibid.
ART. ult. Quotuplex scientia Dei? quis in illa ordo? quid praestet? quaeve sit praescientia?	187
CONCL. I. Scientia Dei est rerum causa, non quidem solitarie sumpta, sed prout adjunctam habet voluntatem; ita ut in divinarum operum partem & societatem venire dicantur, scientia, ut dirigens; voluntas, ut inclinans; potentia, ut exequens.	ibid.
CONCL. II. Scientia Dei, aut praescientia non inducit necessitatem, nec officit libertati.	189
Quaeritur utrum in Deo sint ideae?	192
QUESTIO XII. De Voluntate Dei.	193
ART. I. Utrum sit in Deo voluntas? quae? & quotuplex?	ibid.
ART. II. Circa qua versatur Dei voluntas? & an circa peccata, & mala poena?	195
CONCL. I. Deus non vult per se mala poena; sed tantum per accidens.	ibid.
CONCL. II. Nec Deus vult mala culpa, seu peccata per se, nec per accidens; licet ea quidem permittat.	ibid.
CONCL. III. Voluntas Dei est causa rerum.	198
ART. III. Utrum Deus sit liber? & quomodo?	199
CONCL. Non est liber Deus quoad actus, qui ad ejus essentiam pertinent; in ceteris vero est liberrimus.	ibid.
ART. IV. Utrum semper impleatur Dei voluntas?	200
CONCL. Beneplaciti voluntas, & consequens semper impletur; non autem antecedens, nec voluntas signi.	ibid.
ART. ult. Utrum inter Dei decreta instituendus sit ordo?	201
CONCL. Videtur nobis inutilis, nec decere Divinam Majestatem, hic divinarum decretorum ordo.	202
QUEST. XIII. De Omnipotentia Dei.	203
ART. An Deus sit omnipotens? & in quibus sita sit omnipotentia?	ibid.
CONCL. I. Deus est omnipotens.	ibid.
CONCL. II. Potest efficere Deus alia, eaque perfectiora, quam quae condidit.	204

INDEX.

- CONCL. III. Non potest Deus efficere, ne praterita sint non praterita; nec ideo minus omnipotens est habendus. 206
- CONCL. ult. Potentia Dei infinita est; & ideo omnipotens est Deus, quod pati nihil possit, omniaque possibilia, seu qua contradictionem non involvant, prestare & efficere. 207
- QUÆSTIO XIV. De Justitiâ & misericordiâ Dei. 208
- ART. unicus. Utrum in Deo sint misericordia & justitia? & quomodo? ibid.
- CONCL. I. In Deo est justitia. ibid.
- CONCL. II. Proprie non est in Deo justitia commutativa, bene tamen distributiva. 210
- CONCL. III. Misericordia in Deo non est secundum affectum; cujusmodi laudatur in hominibus, qui calamitosum aliorum statum misererentur, seu quorum cor quasi miserum sit malorum aspectu. ibid.
- CONCL. IV. In Deo sibi non adversantur justitia & misericordia. 211
- QUÆST. XV. De Providentiâ Dei. 213
- Errores. ibid.
- ART. I. Utrum fatalis sit quadam necessitas? an fatum & sors quomodocunque probari possint? 214
- Errores. ibid.
- CONCL. I. Fatum non datur. ibid.
- CONCL. II. Nihil sit fortuito; idcirco casus, aut fortuna rejicienda sunt. 215
- CONCL. III. Christiano sensu admitti potest fatum quoddam, si fati nomine intelligatur Dei voluntas, aut prescientia. 216
- CONCL. IV. Licita dici potest aliquando sors; nec inde tamen colligendum fortuito aliquid fieri. ibid.
- ART. ult. Utrum Dei providentia omnia, etiam vel minima, subja- ceant? 217
- CONCL. Dei providentia nihil est quod non subdatur, seu cujus admi- nistrationem Deus non sustineat. ibid.
- Queritur 1. an equalem omnium curam Deus gerat? 222
- Queritur 2. num providentia leges expendere possimus? 223
- QUÆSTIO XVI. De Predestinatione Sanctorum. 224
- ART. I. De nomine, atque naturâ Predestinationis. ibid.
- ART. II. An Predestinatio detur? & qui sint ejus effectus? 225
- Errores. ibid.
- CONCL. I. Predestinatio est admittenda necessario. 226
- CONCL. II. Predestinatio non ad quosdam tantum, & eximios homines; sed ad singulos electos pertinet. 227
- ART. III. De causis Predestinationis: & an ad primam gratiam, ele- ctio sit gratuita? 228
- Errores. ibid.
- CONCL. Hominis ad primam gratiam & vocationem electio est omnino gratuita, nec ex meritorum prescientiâ, nec ex liberi arbitrii usu, aut

INDEX.

<i>ex aliâ causâ in homine positâ, est repetenda: gratia vero secunde incrementum, operum bonorum, quæ divino beneficio eliciuntur, merito est tribuendum.</i>	229
ART. IV. <i>An ad gloriam Prædestinatio sit ex meritis prævisis? an merè gratuita?</i>	237
CONCL. I. <i>Ad gloriam electio, seu Prædestinatio, positâ peccati originalis labe, non ex meritis prævisis, sed ex gratuita Dei benignitate oritur.</i>	238
CONCL. II. <i>Ad gloriam quorundam prædestinatio gratuita peccatum originale supponit.</i>	251
<i>Quer. utrum eadem sit ratio Angelica Prædestinationis?</i>	252
ART. V. <i>De Prædestinationis effectibus.</i>	253
ART. VI. <i>De Prædestinationis proprietatibus, certitudine scilicet, et necessitate.</i>	254
<i>Errores.</i>	ibid.
CONCL. I. <i>Prædestinatio est secundum se certissima.</i>	ibid.
CONCL. II. <i>Nemini præter revelationem à Deo acceptam certus est Prædestinatorum numerus: nec ullus sine eâ cerè scit, an ex illo sit numero.</i>	257
<i>Quer. an hoc revelationis beneficium aliquibus fuerit concessum?</i>	260
CONCL. III. <i>Agendi necessitatem non imponit Prædestinatio, licet certissima; quidquid contra reclamet Calvinus.</i>	261
<i>Quer. an Electorum numerus, Reproborum numerum superet?</i>	262
QUEST. XVII. <i>De Reprobatione.</i>	263
ART. I. <i>De nomine & essentiâ Reprobationis.</i>	ibid.
ART. II. <i>An detur Reprobatio?</i>	ibid.
ART. III. <i>De causis Reprobationis.</i>	265
<i>Errores.</i>	ibid.
CONCL. I. <i>Deus non reprobât positivè; seu penam non decernit instigendam, nisi prævisio seu originali, seu actuali peccato.</i>	ibid.
CONCL. II. <i>Reprobatio negativa, seu decretum, quo Reprobi à gloria repelluntur, actualia eorum peccata prævertit.</i>	268
CONCL. III. <i>Reprobationis causa prima, est originalis macula.</i>	269
CONCL. ult. <i>Idem de lapsorum Angelorum reprobatione judicium est ferendum.</i>	270
ART. IV. <i>De Reprobationis effectibus.</i>	ibid.
ART. V. <i>De Reprobationis proprietatibus.</i>	271
<i>Queritur 1. an Reprobatio sit certa?</i>	ibid.
<i>Quer. 2. an Reprobatio in Reprobis sit culpa causa?</i>	ibid.
<i>Quer. 3. an Reprobatio peccandi necessitatem imponat?</i>	ibid.

TRACTATUS DE SANCTISSIMA TRINITATE.

Q UÆSTIO I. De hujus Mysterii cognitione.	pag. 1.
ART. I. Quâ ratione, quibusve gradibus ad Trinitatis cognitionem ascendere possimus?	ibid.
CONCL. I. Naturali ratione demonstrari non potest Trinitatis Mystrium.	ibid.
CONCL. II. Probari potest Trinitatis Mystrium negativè, ut loquuntur, seu ostendi potest non esse impossibile.	7
ART. II. Utrum Trinitatis Mystrium noverint Judæi?	9
CONCL. Judæorum vulgus Trinitatis Mystrium latuit; nec ferè, nisi Prophetis, innotuit, iisque, quibus ob vitæ sanctimoniam singularis è cælo lux fuit oborta.	ibid.
ART. ult. Quâ cautione de hoc Mysterio agendum?	12
CONCL. Nec levibus, nec nutantibus utandum est argumentis; sed quæ ex revelatione, seu ex Scripturis, & Traditione eruuntur.	ibid.
Q UÆSTIO II. De tribus in Deo Personis.	14.
Errores.	ibid.
ART. I. Utrum sint in Deo tres Persona, quæ sint unus Deus?	20.
CONCL. Tres sunt in Deo Persona à se invicem distinctæ, quæ sunt unius & ejusdem substantiæ; seu unus Deus.	ibid.
Objectiones ex Scripturâ sacrâ solvuntur.	34.
Solvuntur objectiones veterum Hæreticorum.	41.
ART. II. Verbi Divini, seu Christi divinitas una & eadem cum Patris divinitate probatur.	44.
Immensitas, & omnipotentia, quæ sunt essentia divine attributa, Filio competere probantur.	59.
Alia Dei attributa in abstracto sumpta conveniunt Filio Dei.	60.
Adoratio, seu latria, exhibenda est Christo, sicut & Patri.	61.
Christus se Deum proficitur.	63.
Evangelistæ, & Apostoli Divinitatem Christi profitentur.	66.
Trium priorum seculorum consensione, Filii seu Verbi Divinitas confirmatur.	68.
S. Clemens Romanus.	69.
S. Ignatius.	ibid.
S. Polycarpus.	70.
S. Justinus.	ibid.
Athenagoras.	

INDEX.

<i>Athenagoras.</i>	73
<i>S. Theophilus Antiochenus.</i>	74
<i>Tatianus.</i>	75
<i>S. Irenaeus.</i>	76
<i>S. Clemens Alexandrinus.</i>	79
<i>Tertullianus.</i>	82
<i>Origenes.</i>	87
<i>S. Gregorius Thaumaturgus.</i>	91
<i>Minutius Felix.</i>	ibid.
<i>S. Cyprianus.</i>	ibid.
<i>S. Cornelius Papa.</i>	92
<i>S. Firmilianus.</i>	ibid.
<i>Novatianus.</i>	ibid.
<i>Theognostus.</i>	97
<i>SS. Dionysius Romanus, & Alexandrinus, Martyres.</i>	ibid.
<i>Synodus Antiochena.</i>	99
<i>Arnobius.</i>	ibid.
<i>Lactantius.</i>	109
<i>Objectionum ex Scripturis solutio.</i>	105
<i>Objectionum ex SS. Patribus solutio.</i>	117
ART. IV. Probatur Spiritus Sancti divinitas.	139
<i>Probatur Spiritus Sancti divinitas ex Traditione.</i>	144
QUAEST. III. De variis vocabulis, quae ab Antiquis & Recentioribus ad illustrandum Trinitatis Mystrium fuerint usurpata.	150
ART. I. Quid de illis sentiendum sit?	ibid.
<i>Queritur 1. utrum dici possit, Divinitas est Trinitas; quae propositio damnatur canone 2. Concilii Braccarensis?</i>	151
<i>Quer. 2. quid per essentiam, seu naturam, & hypostasim significetur?</i>	ibid.
<i>De voce οὐσιον, seu Consubstantialis.</i>	152
<i>Quer. 1. num antiquum sit nomen, Consubstantiale, seu οὐσιον? & num à Nicenis Patribus fuerit adinventum?</i>	ibid.
<i>Quer. 2. num explicando Trinitatis Mystrio idonea sit vox, Consusubstantialis, seu οὐσιον? & num à Concilio Nicano rectè & appositè fueris Fidei Symbolo inserta?</i>	153
<i>Quer. 3. num statim à Concilio Niceno ad Catholicam Fidei Professionem, verbo οὐσιον uti in Fidei formulis fueris necessarium?</i>	160
<i>De vocabulo οὐσιον.</i>	161
<i>Queritur 1. num vox οὐσιον Fidem Nicenam exprimeret? & an qui ea uterentur, Nicena Fidei adhaerere se concessati, vocabulum licet οὐσιον rejicerent, sint pro Catholicis habendi?</i>	162
ART. II. De vocabulis, personâ, hypostasi, subsistentiâ, & existentiâ relativâ & absolutâ.	170
<i>Queritur 1. quae fueris inter SS. Paulinum & Meletium Antiochia Episcopos, de unâ vel triplici hypostasi contentio; & num ad Fidem pertinueris?</i>	171

INDEX.

<i>Queritur 2. in quibus sita sit ratio personæ?</i>	173
<i>Quer. 3. an detur in Deo subsistentia absoluta?</i>	174
<i>Quer. 4. num deneganda sit absoluta existentia Deo, sicut ipsi denegatur absoluta subsistentia? num etiam dentur in Deo tres existentia relativa, sicut dantur tres subsistentia?</i>	175
<i>Quer. 5. num in Deo sit numerus?</i>	177
<i>Quer. 6. num in Deo sint tres substantia, tria entia, tria individua?</i>	ibid.
<i>Quer. 7. num sint in Deo tres unitates, tres veritates, tres bonitates?</i>	ibid.
ART. III. De nominibus Patris, & Filii, & Spiritus Sancti, & aliis, quæ tribus Personis tribuuntur.	178
ART. IV. De Processionibus.	179
<i>Quer. 1. quid, & quotuplex sit in Deo processio?</i>	ibid.
<i>Quer. 2. num ejusdem rationis sint Filii & Spiritus Sancti processionem?</i>	180
CONCL. I. Discriminis, quod inter utramque Processionem intercedit, ratio nulla evidens asserri posse nobis videtur.	181
CONCL. II. Non placet sententia prima, quæ Filium idè esse Filium statuit, quod fecundum à Patre naturam accipias; talem verò Spiritus non habeat.	187
CONCL. III. Nec generationis Verbi rationem assequi videtur sententia, quæ Verbum idè genitum esse docet, quod per intellectionem actua-lem, prout est ultima Dei differentia, procedat.	ibid.
CONCL. IV. Nec etiam placet opinio, quæ Verbum idè Filium esse tradit, quod procedat ut imago; non verò ità Spiritus Sanctus.	ibid.
CONCL. V. Nec etiam facit satis ex omni parte sententia, quæ Filium idè genitum esse asserit, quod per intellectum perfectissimum procedat.	188
<i>De principio Processionum.</i>	190
ART. V. De relationibus divinis.	193
CONCL. Relationes secundum esse ad, in divinis sunt reales.	ibid.
<i>Quer. quot sint in Deo relationes reales?</i>	194
ART. VI. De Notionibus.	195
CONCL. Quinque sunt admittenda notiones.	ibid.
ART. ult. De Circuminsessione.	196
QUEST. V. De Processione Spiritus Sancti.	198
ART. I. Errores,	ibid.
ART. II. Ex quo procedat Spiritus Sanctus? an ex Patre & Filio?	199
CONCL. I. A Patre procedere Spiritum S. apud omnes, tum Græcos, tum Latinos Catholicos semper indubitatum fuit.	ibid.
CONCL. II. Ex Patre, & Filio Spiritus S. procedit.	ibid.
<i>Queritur num, si à Filio non procederet Spiritus Sanctus, ab eo esse distinctus?</i>	209
ART. III. Utrum Symbolo Constantinopolitano particulas, ex Filio, addiderit Ecclesia Latina? & an eas addere licitum fuerit?	211
CONCL. Ecclesia Latina Symbolo illi nihil quidquam addidit.	ibid.

INDEX.

ART. IV. Quo tempore, particulis, ex Filio, additis, in Ecclesiâ novum Symbolum prodire coperit?	216
ART. ult. Quaestiones quaedam circa Spiritûs S. divinitatem solvuntur.	218
Quar. num in Concilio Nicano Spiritûs S. divinitas fuerit definita; & ex hypothese quod explicitè definita non fuerit; num ante Conci- lium Constantinopolitanum primum pro haereticis habiti sint, qui Spi- ritûs S. divinitatem non sunt professi?	ibid.
Quar. 2. quis omnium primus Spiritûs S. divinitatis apertam profes- sionem edidisse videatur?	220
Quar. 3. cur S. Basilii Spiritûs S. divinitatem professus, Dei no- men Spiritui S. ad Catholicam Fidei Professionem necessariò non esse tribuendum existimari?	ibid.
Quar. 4. an donum & donatum in Spiritu S. discrepent?	222
Quar. ult. cur Spiritus S. sub specie ac figurâ columbae, aqua, ignis, venti, & linguae igneae conspicabilem se fecerit?	223
QUEST. ult. De Missione Divinâ.	224
ART. unic. Quid, & quoruplex Missio?	ibid.
Quar. 2. cui Persona mitti conveniat?	ibid.
Quar. 3. num reverà se conspiciendum in formâ exteriori Pater Ater- nus obulerit?	ibid.

TRACTATUS DE ANGELIS.

QUESTIO unica.	226
ART. I. Utrum existant Ange'?	ibid.
CONCL. De Fide est existere Angelos.	ibid.
Quar. an naturali ratione possit demonstrari Angelorum existentia?	227
ART. II. An, & quomodo sint creati Angeli?	228
CONCL. I. Cum rebus ceteris creatos fuisse Angelos probabilius censemus cum S. August.	ibid.
CONCL. II. Quo in loco creati fuerint Angeli est incertum.	ibid.
ART. III. Cujus naturae sint Angeli? an corporei? an spirituales?	229
CONCL. Materiae omnis Angeli expertes dicendi videntur.	231
ART. IV. Quae sint Angelorum apparitiones?	232
Quar. 1. num quid certi de illarum apparitionum qualitate, & mo- do statui possit? aut num à talibus questionibus satius abstinendum foret?	ibid.
Quar. 2. num in promptu sit Demonum apparitiones à Sanctorum Angelorum manifestatione secernere?	ibid.
Quar. 3. num vera sint corpora, quae sibi sumunt tum Angeli, tum Dæmones? & quomodo?	ibid.
ART. V. Utrum Angeli sint immortales?	223

INDEX.

- ART. VI. *An differant Angeli, & quomodo?* 234
- ART. VII. *Quis Angelorum numerus? & quo sint ordine inter se constituti?* ibid.
- CONCL. Incertum est quot sint Angeli, cum Angelorum numerus nullibi tradatur. ibid.
- CONCL. II. *Est inter Angelos ordo hominibus incognitus.* 235
- Quar. 1. *an liceat de Angelorum ordinibus nobis incognitis differere?* ibid.
- Quar. 2. *quid de ordine à S. Dionysio inter Angelos constituto sentiendum sit?* 236
- Quar. 3. *an etiam inter Damones quidam sit ordo?* ibid.
- Quar. ult. *an aliis possint donari nominibus Angeli, quàm quibus in Scripturis inscribuntur?* ibid.
- ART. VIII. *Qua sit Angelorum intelligentia?* 237
- Quaritur 1. *an multa cum bonis Angelis, cum Demonibus ignota sint?* ibid.
- Quar. 2. *an Angeli per infusus species res corporeas habeant sibi perspectas?* 239
- Quar. 3. *an Angelorum bonorum cognitio ab errore penitus sit immunis?* 240
- Quar. 4. *an, & quomodo se invicem alloquantur Angeli?* ibid.
- ART. IX. *An ad inferiora mittantur Angeli?* 141
- ART. X. *Quibus creaturis præsiciantur Angeli? & quorum custodia eis demandetur?* ibid.
- CONCL. I. *Non solum specialem aliquorum hominum curam habent Angeli sancti, sed etiam omnium hominum custodia præsiciuntur & incumbunt.* 242
- Quar. 1. *an cuique suus sit quoque Demon?* 243
- Quar. 2. *an Ecclesia Generali, & Ecclesiis quibusdam, Regnis, & Civitatibus sui sint Angeli?* ibid.
- Quaritur ult. *quorum Angelorum ministerio infligendis panis utatur Deus?* 244

F I N I S.

APPROBATIO.

MONET Sapiens, ne quis innitatur prudentiæ suæ; quod si semper damnabile est, tùm sanè præsertim, cum id fit in his, quæ ad Fidem, & Religionem pertinent: undè à Beato Hieronymo sancitum est prudentiæ suæ inniti, qui ea, quæ sibi agenda, vel dicenda videntur, Patrum decretis præponit. Quantum verò effatum hoc apud Virum Doctissimum, & Pastorem Vigilantissimum, cujus Theologici Tractatus tantoperè expetiti, tùm - primùm in lucem prodeunt, compertum sit atque exploratum, facilè cuivis legenti patebit. Hujus enim præcipua & summa, meo quidem judicio, laus est; quòd similis homini Patrifamilias de Thesauro suo, hoc est de Studio, quod lectioni Scripturæ sacre & sanctorum Patrum consecravit, nova & vetera proferat; ut rectè hoc titulo donati publici juris fiant Theologici Tractatus ex sacris Codicibus, & sanctorum Patrum monumentis excerpti.

Datum in Ædibus Beatæ Mariæ, decimo Kalendas Novembris anni 1691.

COURCIER Canonicus
Theologus Parisiensis,

CLARISSIMO VIRO DOMINO,
FRANCISCO FEU,

SACRÆ FACULTATIS PARISIENSIS DOCTORI,
SS. GERVASII ET PROTASII PARISIIS
PASTORI VIGILANTISSIMO,

CLAUDIUS GALLIOT S. P. D.

UTRUM tibi magis gratulari debeam nescio ,
VIR CLARISSIME , an Religioni Cbristia-
ne : Tibi quidem , quòd animum appuleris ad istud
Operis perficiendum , quòd Doctorem Parisiensem decet
quàm maximè : ipsi verò Religioni , quòd ejus dogmatum
Sanctitati ex isto tuo labore novus splendor accesserit.
Dudum optabamus , ut quos in gratiam Abbatis Illustris-
simi Theologicos Tractatus olim texueras , publici juris
faceres : Ac obsistebat imprimis tua singularis modestia ;
moras necessebat insuper , hæc , cui totum dedisti te , gregis
tui cura , & sollicitudo. Neque verò nobis officii istius
impetrandi à te spes aliqua affulgebat , nisi Cleri tui ,
quem amas , & ad omne pietatis genus , & eruditionis
informas , te ad id præstandum utilitas compulisset. In
quo quidem eximio opere quoties recolo quæ me , cum
illud legerem , afficiebant , mirari toties subit præstan-
tiam ingenii tui , & ubertatem doctrinæ. Quid enim
magnificentius quàm ea , quæ de Deo sentis ? Quid elegan-
tius , quàm quæ adversus Atheos , & Idololatrias scribis ?
Ubi scrutaris Divinitatis arcana , & Hereticorum , So-

cinianorum verò maximè, impietati opponis Scripturas ;
quàm penetras altè ! quàm exponis dilucidè ! quàm
subtiliter arguis ! Ubi verò Patrum sententias, & An-
tiquitatis Ecclesiastice monumenta prodis ; quanta, Deus
Bone, in his recensendis exundat copia ! quanta & in
expendendis sagacitas micat, atque solertia ! At unum
præ ceteris rapit ; illud autem eò impensius, quod in isto
genere scribendi sit rarum : is nempe qui passim spirat
in libris his tuis Religionis amor ; qui quidem talis est,
ut nemo sit, qui illos legat, & subindè non sentiat ani-
mum pertentari suum stimulis quibusdam præcipuarum
virtutum ; & non intelligat in iis habere se imaginem
expressam ejus, quæ in te est, sincere fidei, pietatis castæ,
& ardentissimæ charitatis. Scriberemus plura, VIR
CLARISSIME, nisi quam veremur virtutum tuarum
custos modestia stylum nostrum comprimeret. Fruantur
igitur dono hoc tuo Theologiæ Studiosi ; & ex illo discant
ea, quæ Dei sunt, magnificè, piè, ornatè eloqui. Nos verò
qui te ex quo novimus, coluimus semper, & constanter
amabimus, tu velim, ut facis, redamare pergas. Appro-
bationem nostram, quam pro tuâ humanitate requiris,
tibi mittimus. Vale.

EG O infrà scriptus, sacrae Facultatis Theologiæ Pari-
siensis Doctor, legi Opus, cui titulus, *Theologici Tra-*
ctatus, ex sacris Codicibus, & sanctorum Patrum monu-
mentis excerpti, in quo nihil à Fide Catholicâ, vel bonis
moribus alienum deprehendi. Datum Parisius decimo-sexto
Kalendas Septembris anni Domini 1692.

GALLIOT Collegii
Thesaurarii Moderator.

APPROBATIO:

MIHI Theologicos istos Tractatus evolventi statim venit in mentem, quod & olim Beato Hieronymo legenti quadam Opera Sancti Augustini, nihil videlicet in iis deesse, quod vel ad eorum dignitatem atque præstantiam, vel ad ipsorum complementum & integritatem desiderari posset. Quid enim, quæso, requireretur iis in Tractatibus, in quibus Catholicum Dogma fortiter defenditur, Hæresis funditus profligatur, palam detegitur Falsitas, Veritas penitus illustratur? Quoties eos pervoluto manibus, intentis oculis inspicio, mente animoque considero, non possum, quin demirer in illis, quod in Scriptis Angelici Doctoris demirabatur Innocentius VI. *proprietatem nempe verborum, modum dicendum, veritatem sententiarum.* Quam sapienter etiam in ipsis digesta sunt singula! quam eruditè omnia discussa! cum scienter tractata Veterum Scriptorum Sententiæ! Utinam à pluribus jam annis opera tam excellentia prodissent in lucem; forsitan eorum lectione Sociniani, ceterique Novatores, in Mysteriis Christianæ Religionis ampliùs instructi, in tot ineptias & errorum laqueos non fuissent prolapsi. Quantum igitur in me est illos adhortor, ut dent operam legendis istis Tractatibus, quos, ob suam summam ad dilucidandas Fidei quæstiones utilitatem, dignissimos reputo, qui sine morâ prodeant in publicum, & in omnium manibus quamprimùm versentur. Datum Parisiis decimo-sexto Kalendas Septembris anni Domini 1692.

LE SENECALE D. Theologus
Sacra Facultatis Parisiensis.

TRACTATUS



TRACTATUS

DE

ATTRIBUTIS.

PROPOSITÆ HIC QVÆSTIONES plurima quibusdam proculdubio recens excogitate videbuntur, ut qua vulgò non exponantur in Scholis. Ejusmodi erunt forsan, quæ de ingenitâ singulis hominibus Dei cognitione, de gravitate momentorum, qua illam Dei notitiam stabiliunt, si cum argumentis ex creatâ re collectis conferantur; quæ de negativis Attributis, de uberiori Traditionis circa Dei visionem fustis in alterâ vitâ concessam expositione, dogmatibusque aliis exscribimus. Cui verò qua referimus, perpendere molestum non fuerit, has à nobis non fuisse adinventas sententias, sed à Majoribus, & Ecclesiæ Defensoribus illustrissimis acceptas animadvertet continuò. Aliis fortè non placebit curiosior, & non leviter operosa de Idololatria origine, progressu, Statuis, & variis Idololatrarum opinionibus disquisitio; sed qui Patrum antiquorum memoriam veneratione complectentur, singulari licet Dei beneficio non supersint Idololatra confutandi, nobis, ut spes est, indulgebunt faciliè, cum collectam paucis priorum quatuor seculorum de Dei unitate doctrin-

nam unico obtutu perspektam sibi fieri deprehenderint. In ceteris Scholæ conclusionibus nihil à nobis fuit omissum, quod vel levissimum apud Antiquos sortitum fuerit monumentum. Ne quid verò è quætionibus aliis ad exercitationem nuper excogitatis Candidatos lateret, eas, licet à Sanctis Patribus prætermisissas, intactas non reliquimus.

QUÆSTIO PRIMÆ.

Utrum Deus sit?

PERMAGNI momenti hæc est quæstio: nam ab eâ Theologiæ disciplina pendet universa; nisi enim Deus existeret, nullus esset omninò Theologiæ locus; videri tamen posset omittenda; quia ex S. Clemente Alex. lib. 1. Strom. quæ aperta & palàm posita sunt, de his nulla est quæstio, velut cum dies est, utrum dies sit. Et ex Arnobio lib. 1. rerum, quæ sunt evidentissimæ, perspicuitati detrahi videtur, cum adducuntur in disputationem; ubi enim impugnantur, nutare & in dubium revocari creduntur, ac sæpè animi nostri infirmitas, objectionibus magis, quàm argumentorum pondere percellitur.

De hac ergò quæstione silendum omninò foret, nisi mens fidelium esset munienda contra tentationes varias, quibus concuti potest; vel eorum animis, qui dicunt *in corde suo, non est Deus*, ingerenda lux esset; rùm etiam nisi contundenda foret eorum temeritas, qui existentiam Dei negasse, aut impugnasse referuntur.

Psalm. 82.
vers. 2.

ARTICULUS PRIMUS.

Utrum innata sit Existentiæ Dei cognitio?

ARGUMENTATIONE solâ, vel rerum creatarum consideratione duci nos in Dei cognitionem contendunt plurimi; disputant alii non solo creaturæ testimonio, sed etiam cuilibet ingenito lumine nobis innotescere Dei existentiam. Ingenitam verò cognitionem dicunt, quæ ab Authore naturæ omnium animis est ingenerata, quæque à co-

gnitionibus per institutionem, meditationem, laborem, aut experientiam partis, utpotè nullo discursu comparata, scernitur.

CONCLUSIO.

*A naturâ omni homini rationis compoti, Dei
Existentiæ cognitio est inserta.*

HUJUS Conclusionis veritas hinc vel maximè commendatur, quòd sententia negans ex nullo penitus Scripturarum testimonio possit erui; nostra verò pluribus Scripturæ locis juxta interpretationem Sanctorum Patrum, ut Athan. orat. adversus gentes, Basil. lib. 1. contra Eunom. S. Gregor. Magn. Hom. 19. in Ezechiel. expositis innitatur: Psalm. quippè 4. v. 7. *Signatum est super nos lumen vultus tui Domine.* Isaia 46. v. 8. *Redite pravaricatores ad cor.* Luc. 17. *Regnum Dei intra vos est.* Nec enim ob aliud super nos signatum lumen Dei dicitur, & intra nos regnum illius, nisi quia suæ existentiae notitiam, seu lumen suum omni homini Deus ingeneravit; nec ad cor suum peccator revocatur, nisi ut Deum, per lumen naturaliter insitum in seipso intueatur, & ab ipso audiat, quantum à Domino aberraverit.

Præterea quod in omnibus universim occurrit, quod nullo monitore ex intimis hominum animis erumpit, quod attendenti statim affulget, & ità constanter apertum est, ut nullus excusandæ superstiti ignorantiae locus, insitæ cognitioni debetur, scilicet hæc sola cognitionis ingenitæ argumenta possunt afferri: nec enim aliâ de causâ, cujusmodi est ea, *Alteri ne feceris, quod tibi fieri non vis*, cognitio à naturâ infusa dicitur, quàm quòd ex notæ, quas ad naturalem cognitionem requiri diximus, illi convenient. Antiquos autem Scripturarum interpretes, tùm Fidei Christianæ Apologistas, & Doctores si consuluerimus, hanc esse verbi divini doctrinam, & crescentis in dies Ecclesiæ Catholicæ sententiam compertum erit, scilicet omnibus Dei cognitionem esse ingenitam, seu exposita cognitionis ingenitæ argumenta illi competere.

1. Cognitio existentiae Dei in omnibus hominibus universim occurrit. Propterea veteres Ecclesiæ Defensores, tam eximie cognitionis beneficium in singularem Dei providentiam referunt, quæ Dei existentiam ità perviam fecit, ut hanc non perspicere homo non possit. Ità S. Clemens Alex. lib. 5. Strom. *Nam Dei quidem manifestatio erat unius omnipotentis apud omnes, qui rectè sapiunt, omninò naturalis, & æternum ex divinâ providentiâ beneficium apprehenderunt plurimi, qui non planè omnem exuerunt pudorem adversus veritatem.*

Hoc ingenitæ cognitionis argumento utitur Tertull. cap. 17. Apolog. ubi, postquam rationes ex creatis rebus petitas attulit pro existentia Dei, ad animæ ipsius testimonium Ethnicos revocat, ut ad argumentum.

quod ejus virtutis est, ut Deum non patiatur ignorari; hinc ut colligit, ipsi Gentiles variis in casibus ad Deum confugere coguntur, seque naturaliter Christianos comprobant, saltem quoad istud de Dei unius existentia documentum. *Hæc est*, inquit, *summa delicti nolentium recognoscere, quem ignorare non possunt.* Et infra: *Vultis ex anima ipsius testimonio comprobemus? quæ licet carcere corporis pressa, licet institutionibus pravis circumscripta, licet libidinibus & concupiscentiis evigorata; licet falsis exancillata Diis; cum tamen resipiscit, Deum nominat, hoc solo nomine, quia propriè verus hic unus Deus, bonus, & magnus; & quod Deus dederit, omnium vox est. Judicem quoque contestatur illam, Deus videt, & Deo commendo, & Deus mihi reddet. O testimonium anima naturaliter christiane! Eandem naturalem Dei cognitionem eodem argumento probant Minutius Felix, S. Cyprianus, qui fermè Tertulliani verba repetit, & Arnobius lib. 1. cujus hæc sunt verba: Quisquam-ne est hominum, qui non cum istius principii cognitione diem primæ nativitatis intraverit, cui non sit ingentum, non affixum, imò ipsi penè in genitalibus matris non impressum, non insitum, esse Regem ac Dominum cunctorum quæcunque sunt, moderatorem. Urget argumentum ejusmodi S. August. Tract. 106. in Joan. in hæc verba: Manifestavi nomen tuum hominibus, quos dedisti mihi. Hæc est enim, inquit, vis vera divinitatis, ut creatura rationali, jam ratione utenti, non omnino ac penitus possit abscondi.*

Hanc veritatem, ut dogma constans, & de quo Eunomius ipse conveniret, supponebat S. Basilii lib. 1. adversus Eunom. ita enim errorem, quo Dei substantiam sibi perspectam esse contendebat, refellit ipse S. Basilii: *Quâ ratione divinam naturam complectitur? An-ne idèò communis beneficio? Sed ab eo hoc unum habemus, Deum scilicet existere; non verò quæ sit natura? An è Scripturis incomprehensibilem predicant?*

1. Existentiæ Dei cognitio nullo monitore, ex intimis hominum pectoribus erumpit, ut disputat Tertullianus libro primo contra Marcionem, capite decimo, ubi docet nullo non tempore, & ante Moysen, seu antequàm prodiret Doctor, qui Dei existentiam homines commonefaceret, hanc veritatem cuilibet à naturâ, seu à Deo fuisse inditam, & inde fieri, ut quibus in locis, etiam nunc temporis Moyses ignotus esset; Deus tamen esset conspicuus sensu naturali. *Antè anima*, inquit, *quàm Prophetia; anima enim à primordio conscientia Dei dos est. Eadem nec alia & in Aegyptiis, & in Syris, & in Ponticis &c.*

Illa quoque Dei cognitio ex invitis pectoribus erumpit, inquit Lactantius libro secundo cap. primo; & idèò omni veniâ indignos esse Idololatrias propugnat, qui Deum verum non colunt, quem ab homine fas non est ignorari; cum vel ipsos Ethnicos, ubi quædam incumberet necessitas, cogeret ipsa natura unius Dei cognitionem profiteri. *Nam & cum jurant; & cum optant; & cum gratias agunt;*

non Jovem, aut Deos multos, sed Deum nominant; adeò ipsa veritas, cogente naturâ, etiam ab invitis pectoribus erumpit. Quod quidem non faciunt in prosperis rebus: nam tum maximè Deus ex memoriâ hominum elabatur; cum beneficiis ejus fruente, honorem dare divina indulgentia deberent. Eadem ferè tradiderat jam antea Sanctus Clemens Alexandrinus Admonitione ad Gentes, ubi sic loquitur: Omnibus simpliciter hominibus, maximè autem iis, qui versantur in doctrinâ & litteris, instillatus est quidam divinus influxus; quâ de causâ vel inviti quidem fatentur unum esse Deum ab interitu alienum & ingenitum, qui in Cæli vertice, in propriâ speculâ verò sit semper.

3. Existentiâ Dei attendenti statim affulget: nam, ut docet Tertullianus libro primo contra Marcionem capite tertio, *Id omnium conscientia agnoscit & de isto convenit apud omnes, existere Deum, & ipsum esse quid summum.* Nec fieri potest, ut scribit idem Tertullianus libro de animæ testimonio, capite secundo, quin ab homine, si ratione utatur, clarè & distinctè percipiat Deus, vel ut ens perfectissimum, aut sub aliquâ ratione Divinitatî congruâ; verbi gratiâ, quatenus est omnipotens, bonorum largitor, vel Judex maximè formidandus &c. Hinc vel ex uno innato Justitiæ Divinæ timore ingenitam nobis esse Existentiâ Dei cognitionem probat: *Quid timeatur, inquit, nisi ira? Undè ira, nisi ex animadversione? Undè animadversio, nisi de Dei judicio? Undè judicium, nisi de potestate? Cujus potestas summa, nisi Dei solius? Hinc ergò tibi, anima, de conscientia suppetit domi ac foris, nullo iridente, vel prohibente predicare, Deus videt omnia, & Deo commendo, & Deus reddet, & Deus inter nos judicabit.* Addit Lactantius libro septimo capite nono, nobis itâ perspectam esse Dei existentiam, ut in dubitationem adduci non possit. *Qui nullum, inquit, omninò Deum esse dixerunt, non modò Philosophos, sed ne homines quidem fuisse dixim.*

4. Itâ constanter aperta est Existentiâ Dei cognitio, ut nullus excusandæ superfit ignorantia locus, quod ingenitæ cognitionis argumentum ex superioribus satis superque probatum videtur; si etenim existentia Dei cognitio in omnibus hominibus universim occurrit, si nullo monitore ex intimis hominum animis erumpit, & attendenti statim affulget, nullus profectò excusandæ superest ignorantia locus. Id colligere est ex Origene, initio libri primî contra Celsum, ubi sic habet: *Quapropter non est mirandum eundem Deum eorum, quæ per Prophetas, & scrutatorem docuit, semina indidisse omnium mortalium animis, ut in divino judicio omnis homo sit inexcusabilis, habens legem mentis scriptam in corde suo.* Et ex Minutio Felice in Octavio: *Eos autem merito torqueri, qui Deum nesciunt, ut impios, ut injustos, nisi profanus, nemo deliberat; cum parentem omnium, & omnium*

Dominum non minoris sceleris sit ignorare, quàm ledere. Ità ferè Sanctus Cyprianus, Arnob. & Lactant.

Huc accedit, quòd Deus cæteris rebus creatis naturalem largitus est instinctum, quo in bona naturæ suæ congrua ferrentur: cur ergò homini cæteris animantibus longè præstantiori, naturalem denegasset suiipsius cognitionem, quâ ferretur in suum ultimum finem? Divinæ certè culpanda videretur Providentia, si vel unum hominem ità destituisset, ut illi naturalem illam cognitionem non indidisset.

Unum addidero, impossibile est naturam universam errare; communis verò illa persuasio de Existentiâ Dei, à solâ naturâ accepta inest omnibus, ut certò constat ex naturæ instinctu, quo ad hanc illam veritatem, quasi uno ore confitendam adducuntur homines, & demonstrat vetustas, tum perpetuitas illius cognitionis & constantia: cum enim homines tot diversarum Regionum consuetudinibus, legibus, linguis &c. maximè dissideant, quis illos inter se pactum iniisse dixerit, ut in eam sententiam conspirarent. Huc spectant probationes ex Sancto Augustino articulo ultimo adducendæ, quæ ex innatâ nobis notitiâ boni perfectissimi, veritatis supremæ & incommutabilis, summi nostri boni, seu beatitudinis colliguntur.

SOLVUNTUR OBJECTIONES.

OPPON. I. Ingenita si esset Divinæ Existentiæ cognitio, nulli darentur Athæi; plurimos autem extitisse Athæos constat; Psal. enim tredecimo & quinquagesimo-secundo, versu primo: *Dixit insipiens in corde suo, non est Deus.* Prothagoras Abderitanus in dubium vocavit Dei existentiam, ex Cicerone libro primo de naturâ Deorum; & his solebat verbis uti, ex Laërtio in ejus vitâ: *De Diis quidem neque utrum sint, neque utrum non sint, habeo dicere.* Idèò ab Atheniensibus exilio fuit mulctatus. Diagoras verò palàm Dei existentiam negavit, ut habet Cicero ibidem, & Plutarchus de Philosophiæ placitis; eumque vocatum fuisse Athenis Athæum asserit Lactantius de irâ Dei, capite nono. Eiusdem sententiæ fuerunt Theodorus Sirenaïcus, teste Cicerone ibidem; Evemerus Thegeates ex Theodoro, libro primo & tertio de Curatione Græcarum affectionum; item etiam Anaxagoras, quem Cleo Atheniensis impietatis accusavit; in eumque Jovem vibrasse fulmen in Timone ait Lucianus, quòd Deos non esse docuisset. Eundem oratione ad Græcos Athæum appellat Justinus Martyr.

Resp. Deum non esse, dixisse insipientem errore practico, non speculativo; practicus autem error est, cum non tam intellectus errat, quàm voluntatis impulsu, ad eum sibi errorem suadendum inducitur; ità autem affecti sunt insipientes illi, de quibus David:

cum enim se totos libidinibus dederint, omnem Dei conscientiam exuere conantur: undè subjungit versu secundo: *Corrupti sunt, & abominabiles facti sunt in studiis suis.* Quem practicum errorem sic exponit Sanctus Hilarius in eum Psalmum quinquagesimum secundum. *Fit frequenter, ut nos cum verè necessitas ad confessionem Dei cogat, oblectatio tamen vitiorum Deum non esse persuadeat, & quod contra fidem credimus, id tamen de consilio cordis impii eloquamur.* Cum scilicet illi voluptatibus servire vellent, aut Dei justitiam tollere conati sunt, ne timore quodam voluptatum suavitas perstringeretur; aut Dei providentiam negarunt, cum ejus œconomiam intelligere non possent. Hinc in verba Psalmi tredecimi & quinquagesimi secundi observat Genebrardus non esse in Hebræo, *non est Deus, sed Elohim*; quod nomen, *Judicem* præcisè significat. Paraphrastes Chaldaeus idèò scripsit, *non est potestas in terra*; & ipse Genebrardus, *non est Dei providentia.* Error verò speculativus est, cum mens humana errori cuidam assensum præbet. Nullus autem, quisquis ille sit, Deum non esse sibi suadere potest, & cognitioni sibi naturaliter insitæ reluctari.

Nec Athæi erant, nec Dei existentiam negabant Prothagoras, Anaxagoras, &c. Ac ne Athæorum nomen, quod quibusdam fuit impositum, præjudicium faciat, in more fuisse apud Antiquos constat haberi pro Athæis, qui Deorum cultum improbatent; idèò ipsi Christiani Athæismi fuerunt inculcati, ut habet Sanctus Justinus Apologiâ secundâ: *Vocamur autem Athei, & sanè confitemur talium, qui habentur Deorum nos esse expertes, & hâc ratione Atheos; sed non verissimi illius Dei, Patris justitia, & temperantia, & cæterarum virtutum, & ab omni vitio intacti.*

1. Ex Prothagoræ verbis, quæ attulimus, patet cum de solâ multitudine Deorum verba fecisse. 2. Anaxagoras à Cleone impietatis & Athæismi fuit accusatus, quòd Solem, quem pro Deo Athenienses colerent, ferrum candens atque ignitum, aut globum ignitum dixisset; hic quidem, nisi Periclis discipuli sui autoritate periculo subductus fuisset, capitis pœnam non evasisset; quinque talentis & exilio multatus fuit, quod videre est in Plutarcho, ubi de Pericle. Primus autem omnium, teste ibidem Plutarcho, Anaxagoras universitati non fortunam, neque fatum, sed mentem puram sincerè & palàm præfecit. Sic Cicero libro primo de naturâ Deorum. Undè impietatis potius inculcandi essent Athenienses. Hic ergò Athæus dictus, quèd à populari Atheniensium de Sole sententiâ recessisset, veri Dei notitiam professus. Idem Socrati contigit, qui ab Anito impietatis quoque accusatus, quòd non eosdem cum Atheniensibus Deos veneraretur; ducentis idèò & octoginta sententiis & pluribus cum absolveretur, ab Atheniensibus tamen condemnatus fuit, ut testatur Cicero libro primo de Orat. Alii quidam populi, ut Æthiopes, Athæi crediti sunt,

ut habet Strabo lib. 17. quod simulacris non uterentur, & à recepto in aliis genibus cultu alieni essent.

Mentem ergò infinitam cognovit Anaxagoras, quæ ex infinitâ congerie paries similes secerneret, easque componendo res novas produceret, & segregando res veteres destrueret: sed primus è Philosophis Græcis non fuit, qui mundi agnoverit Opificem: nam & Ioniciæ Philosophiæ conditor Thales Milesius, à quo disciplinam suam hausit Anaximander, uti ab illo Anaximenes Anaxagoræ Præceptor, eâ in sententiâ fuit, ut author nobis est Cicero lib. 1. de naturâ Deorum.

Quandoque à nostris, ut à Sancto Justino, & Lactantio, Philosophi quidam dicuntur Athæi, non quod Athæos illos fuisse censerent, sed quod ad receptam loquendi rationem sermonem suum accommodarent, nec de Philosophorum illorum sententiâ iudicium ferebant. Aliquando, ut Athenagoras in Apologiâ, in eo operam collocarunt, ut ab Athæorum, quos pœnis esse subjiçendos Ethnici prædicabant, errore Christianos vindicaret; nec esse cum Diagorâ, quem ut Athæum Athenienses damnant, confundendos, quod de Deo cum plebe non sentirent, sed cum Euripide, Sophocle, Philolaquo, & aliis optimæ famæ Philosophis.

Si quidam verè Athæi fuissent, nullo loco essent habendi, tùm quod infinita sit aliorum Philosophorum copia, qui contrariam sententiam docuerint; tùm quod perditissimâ vitæ illi fuerint. Theodorum refert Læctius omnem pudorem exuisse, adeò ut in propatulo se scelus omne patraturum profiteretur, & cum scortillo sem habiturum; veritas ex apparenti quorundam sententiâ elicienda non est; quandoquidem licet Pyrrhonicæ prima principia in dubium vocent, nullus tamen est de illis dubitandi locus.

OPPON. 1. Job. 12. vers. 7. Sapient. 13. vers. 13. Roman. 1. vers. 20. Ex rerum creaturarum intuitu existere Deum demonstratur, nec aliam Dei cognoscendi rationem Scripturæ tradunt.

Resp. iis in locis certam quidem cognoscendi Dei rationem tradi, sed aliam non excludi, quam ex aliis Scripturæ locis colligimus, & colligit S. Athanasius orat. adversus Gentes: *Ità quodque nec via, quæ ad illum tendit procul, aut foris, extraque nos consistit, sed in nobis sita est, & initium ejus à nobis investigari potest, quemadmodum & Moyses docuit his verbis, verbum fidei intra cor tuum est, quod & Salvator noster significavit, ac confirmavit dicens, Regnum Dei intra vos est. Et postea: Quod si ex me percuncteris, quamam illa sit via, dico eam uniuscujusque animam esse, & in animâ ipsam mentem. Et infra: Idèò certè divina contemplationis vim, intelligentiamque possidet, ipsaque sibi ipsi ut via ac methodus quedam, non aliundè, sed ex se ipsâ Verbi divini scientiam apprehensionemque haurit ac percipit. Addit, necesse est, ut in mundandis ex peccato ortis sordibus operam anima col-*
loget.

locet, & quæ sunt extranea pro virili exorat, ut in seipsâ, quasi in nitido speculo divine imaginis sibi impressa vestigia, & insculptas veritates possit contemplari & introspicere. Quæ conclusionem admodum confirmant, sicut & laudati Religionis Christianæ vel primi defensores pluribus pariter exponunt.

INST. 1. Omnis cognitio à sensibus habet originem, & si quæ de Deo habeatur certa cognitio, discursu nititur, & proindè figmenti loco sunt illæ Dei cognitiones ingenitæ.

R. Plurimas esse notitias ingenitas, vel ipsi Scripturis tradentibus, quæ sensuum ministerio non nituntur, ut de lege naturali, de principiis vulgaribus, alteri *ne feceris quod tibi fieri non vis*; quales sunt generales istæ propositiones; *impossibile est idem simul esse & non esse*; *quodlibet est vel non est*; *virtus vitio est anteponenda*; harum enim cognitio propositionum minimè pender ex ministerio sensuum; hæc enim omnia sensibus cum percipi non possint, ut quæ nec colorata, nec sonora, nec tactilia sint, sensuum certè ministerio in omnium animos non venerunt, quod uberrimè probat S. Aug. l. 10. Conf.

INST. 2. Quilibet cognitio Dei vel intuitiva est, vel abstractiva, Theologis consentientibus; cognitio autem illa, quæ dicitur ingenita non est intuitiva, quia per eam Deus ut in se est, & totus videretur; nec est abstractiva quia hæc ratiocinio uritur.

R. Præterea admittendam esse aliam cognitionis speciem immediatam, scilicet per quam, nullo discursu adhibito, Deum existere cognoscimus, quæ quidem cognitio instar intuitivæ, non ab objecto quod se totum præbeat spectandum ducatur, sed ab eâ, ut ita loquar, inscriptione quam animis nostris insculptam deprehendit quisque, dum naturam suam consulit, ut Scripturæ & Patres laudati monent; hincque Deo summa habenda sunt gratiæ, quodd animum nostrum ita sibi esse addictum voluerit, ut non possit, quin intra se introspiciat ipsum, aut scelerum, si deficiat, vindicem aequissimum; aut, si Domino adhareat, benignum præclarè gestorum remuneratorem.

INST. 3. Si Existentiæ Dei cognitio nobis esset naturaliter indita, Essentiæ quoque Dei cognitio nobis esset naturaliter inserta, cum Essentia & Existentiæ Dei ne quidem virtualiter distinguantur.

R. Non sequi, licet enim non possit Essentia Dei concipi, quin & Existentiæ cogiteretur, quia Essentia Dei tantummodò sub ratione entis perfectissimi apprehenditur: non habetur tamen Existentiæ Dei conceptus adæquatus: scilicet ratio independentis, ratio omnipotentis, & cæterarum Dei perfectionum animo non sese offerunt statim, & sic conceptâ Dei Existentiâ, cognoscitur quidem inadæquatè Dei Essentia, non verò adæquatè; quamvis enim Dei Existentiæ cognosci non possit, quin & cognoscatur ejus Essentia sub ratione Entis perfectissimi considerata, tamen concepta ipsius Dei Existentiæ, non habetur propterea conceptus Essentiæ adæquatus, seu, ut Theologorum Scolasticorum more loquar, non ideo cognoscitur quoad quæstionem quid est. Innumera sunt, de quorum

Existentiâ nemo dubitat, ut de lucis Existentiâ : pauci verò sunt, qui ejusmodi rerum naturam cognitione assequantur.

INST. 4. Adhuc, idæa Entis summè necessarii supponit in nobis idæam Entis planè contingentis, cùm efficaciter probetur Existentiâ causæ alicujus necessariæ, ex effectuum contingentium Existentiâ : ergo cognitio quam habemus de Deo, pendet ex effectuum cognitione, idèdque innata nobis non est atque congenita.

Lib. 1. contra
Marcion.
Lib. 1. ortho-
dox. fide.
Lib. de testim.
animæ

Hæc passim in
toto libro.

Lib. 1. de nat.
Deor.

R. Falsum esse idæam entis planè contingentis, in nobis præcedere idæam entis summè necessarii : Nonne enim [ut cum Tertulliano loquar] *Prima anima rationalis deos Dei notitia est ?* [ut scribit S. Damascenus] *Omnibus à naturâ est insita.* Quod iterum confirmat ipse Tertull. in lib. de animæ testimonio, & infert ex publicis illis vocibus (adsit mihi Deus) (ô Deum immortalem) quas in extremis periculis positi, vel vi inimicorum oppressi emittere solemus. Quis enim, inquit, *Ejusmodi eruptiones anime non putaverit doctrinam esse nature congenita, seu ingenita conscientie tacita commissa.* Certè prior anima, quàm littera, & prior sermo, quàm liber, prior sensus, quàm stylus, & prior homo ipse, quàm Philosophus, & Poeta. Numquid ergo credendum est ante litteraturam & divulgationem ejus, multos absque hujusmodi pronuntiationibus vixisse homines ? Et unde hoc didicit anima ? Certè non à Philosophiâ, non à litteris, vel scripturis, nec à disciplinâ. Hæc enim pronuntiat, non scholis formata, simplex, rudis, impolita, idiotica, de compito, de textrino tota : hæc à naturâ didicit, magistra natura, anima discipula. Quam etiam veritatem eleganter exprimit Tullius lib. 1. de nat. Deor. his verbis : *Quæ gens unquam fuit, vel est, aut quod genus hominum, quod non habeat sine doctrinâ anticipationem quamdam Deorum, quam Epicurus appellat ἀεὶ ὄντων, id est, anteceptam rationem, & anime præviâ rei quamdam informationem, sine quâ nec intelligi quidquam, nec queri, nec disputari possit.* Ex quibus planum prorsus est insitam nobis esse ac innatam Dei cognitionem. Potest insuper addi, idæam Entis summè necessarii per discursum partam supponere Entis planè contingentis idæam ; secus verò, si illa Entis summè necessarii idæa nobis sit congenita, qualis est ea quam habemus de Dei Existentiâ.

ARTICULUS SECUNDUS.

Utrum hæc propositio, DEUS EST, sit nota quoad nos.

PROPOSITIO nota dicitur quoad se, cùm prædicatum de ratione subjecti est, nec datur medium seu causa, aut ratio formalis à priori, quâ prædicatum conveniat subjecto, sed prædicatum ita est essentiale subjecto, ut nihil sit verius aut prius : Unde si statim non appareat connexio essentialis inter prædicatum & subjectum, id non ex defectu rei oritur,

sed ex defectu intellectus nostri, qui immediatè & tam perfectè rem cogitare non potest.

Propositio verò nota quoad nos, vel spectatur primò pro eâ quæ rei essentiam oculis nostris ita clarè objicit, ut eam penitus perspectam habeamus, talis est hæc: *Totum est suâ parte majus*. Secundò pro eâ quæ ex terminis ita inter se connexis constat, ut statim terminorum connexio appareat, nostramque mentem in sui assensum rapiat, ut, *omnis triangulus duobus angulis rectis est equalis*. Propositionem, *Deus est*, notam secundùm se certum est, quia prædicatum est de Essentia subjecti, seu Existere de Essentia Dei, nec datur causa aut ratio formalis à priori, cur Existencia Deo conveniat. Secundò propositio, *Deus est*, non ita nota est quoad nos, ut omni sublato velo, Dei Essentiam nobis exhibeat.

Controversia verò est, num posteriori ratione secundùm nos sit nota.

CONCLUSIO. *Propositio, DEUS EST, quoad nos nota est.*

Primò. Quia constat terminis ita inter se connexis, ut non possimus ei assensum non præbere, ubi termini nobis expositi fuerint. Propositiones ex v. c. *circuli circumferentia à medio equaliter distat, totum est majus sua parte*, quoad nos nota censentur; quòd qui in dubium eas vocaret, aut iis assentiri recusaret, non posset eis assensum non præbere, ubi propositionum illarum termini essent explicati.

Qui autem concipit id quod Deus est, is utique Ens omnium perfectissimum, seu id quo nihil melius concipi potest, cogitat, ut ex omnium consensu Tertull. probat lib. 1. contra Marcion. c. 3. *Deum ut scias unum esse debere, quere quid sit Deus, & non aliter invenies. Quantum humana conditio de Deo definire potest, id definitio, quod & omnium conscientia agnosceret, Deum summum esse, magnum, in aternitate constitutum, innatum, infectum, sine initio, sine fine, hunc enim statum aternitati censendum, quæ summum magnum Deum efficiat dum hoc est in Deo ipsa atque ita & cetera, ut sit Deus summum magnum, formâ, & ratione, & vi, & potestate; cum de isto conveniat apud omnes, (nemo enim negabit Deum summum magnum quid esse, nisi qui poterit Deum, imum modicum quid è contrario pronunciare ut Deum neget auferendo quod Dei est) quæ erit jam conditio summi magni, nempe ut nihil illi adequetur, id est ut non sit aliud summum magnum. Item Lact. l. 1. c. 3. S. Aug. l. 1. de doctr. Christ. c. 7. & ipsi Ethnici, ut Cic. lib. 2. de nat. Deor. Non potest autem concipi Ens perfectissimum, seu quo nihil melius, quin concipiatur Existens, conciperetur alioquin ut quid perfectissimum, & non conciperetur, quod implicat; ex hypotèsi conciperetur; non conciperetur autem, quia illud non censendum concipi sub ratione Entis perfectissimi, & quo nihil melius, si quid ipso possit apprehendi perfectius & melius: posset verò apprehendi quid melius & perfe-*

Etiam, illud nempe cui non deesset Existencia. Quomodo concipietur Ens perfectissimum, cui Existencia non competeret? Quomodo potest concipi ut id quo non datur melius, & simul non existens? Simul enim coherere non possunt duæ illæ idææ Entis perfectissimi, & Entis perfectissimi non Existentis: Unde sicut de ratione trianguli est, ut concipiat sub ratione Entis, quod constat ex tribus angulis; ita de ratione Dei est, ut apprehendatur Existens, si sub ratione Entis perfectissimi proponatur; non alia autem est Dei perceptio: unde S. Aug. lib. 1. de doct. Christianâ c. 7. *Qui unicum Deum agnoverunt, & qui multos Deos agnoverunt, etsi quid esset Deus, ipsos latuerit, semper tamen quod melius concipiebant, Deum crediderunt, & omnes pro excellentiâ Dei dimicabant.* Lib. de morib. Manichæor. c. 7. *Summum bonum, omnino, & quo esse, aut cogitari nihil melius potest, aut intelligendus, aut credendus Deus est; si blasphemis carere cogitamus.*

2. Nota est quoad nos propositio, cujus ingenita nobis est cognitio; ex superiori autem articulo constat naturaliter nobis inferiam Dei Existentiæ notitiam.

OPPON. Hæc propositio nota non est quoad nos, quæ probari exigat, hæc propositio, *Deus est*, ejus est naturæ.

R. Propositionem, *Deus est*, variis quidem demonstrationibus confirmari, non quod confirmari indigeat, sed ut quorundam refrænetur pertinacia, qui veritati manifestissimæ obsistere non verentur.

IN S T. 1. Illa propositio probari exigat, quæ non constat terminis ita inter se connexis, ut statim animus assentiri cogatur; hujusmodi est ista, *Deus est*, nam potest Ens perfectissimum ut possibile apprehendi, sicut res creatâ perfectissima ut possibilis concipi.

R. Non posse concipi Ens perfectissimum quin concipiat ut Existens; deesset enim illi perfectio, scilicet Existencia, & sic non esset perfectissimum; res quidem creatâ perfectissima potest cogitari ut possibilis, quia res creatâ, quâ creatâ est, ab actuali & possibili Existentiâ abstracta, nec est in omni genere absoluta.

IN S T. 2. Non potest Deus cognosci, nisi ut prima causa, & proinde per discursum.

R. Deum cognosci ut primam causam, cum attenditur habitudo quam dicit ad res creatas, non verò cum ut Ens perfectissimum cognoscitur; Nullâ enim tunc opus est ad res creatas attentione.

ARTICULUS ULTIMUS.

Utrum Existencia Dei Demonstrari possit.

DEMONSTRATIO à priori de Dei Existentiâ non datur, quod Dei causa non deur. Questio ergo tantum est de demonstrationibus à posteriori, & an Existat Deus, non verò quid Deus sit.

CONCLUSIO PRIMA.

*Dei Existentiam per res creatas Demonstrari tradunt
Sacri Codices.*

1. Qui Codices tradunt Dei cognitionem ex rebus creatis aded esse in propatulo, ut satis sit eas adire, ad eas attendere, eas interrogare, vel audire, & tam aperto testimonio majestatis suæ existentiam exprimere, ut hominibus singulis excusandæ ignorantie locum præcipiat, palam faciunt Dei Existentiam ex rebus creatis manifestò elucidari; hæc autem est divini verbi doctrina, Job. 12. v. 7. *Interroga jumenta, & docebunt te, & volatilia cæli, & indicabunt tibi, loquere terra, & respondebit tibi, & narrabunt pisces maris. Quis ignorat, quòd omnia hæc manus Domini fecerit.* Addunt Scripturæ, Dei opera ejus gloriam oculis subicere, ejus magnitudinem ostendere, præsertim frequentia beneficia Psal. 18. v. 2. *Cæli enarrant gloriam Dei, & opera manuum ejus annuntiant firmamentum.* Sap. 18. v. 5. *A magnitudine enim speciei & creatura cognoscibiliter poterit creator horum videri* Act. 14. v. 14. *Qui fecit cælum & terram & mare & omnia quæ in eis sunt, qui in præteritis generationibus dimisit omnes gentes ingredi vias suas, & quidem non sine testimonio semetipsum reliquit, benefaciens de cælo, dans pluvias & tempora fructifera, implens cibo & lætitiâ corda nostra.* Addunt ex operibus Divinitatem intelligi, imò conspici, & ita apertè, ut peccato eximi ignorantie non possit homo, Rom. 1. v. 2. *Invisibilia enim ipsius à creaturâ mundi per ea quæ facta sunt intellecta conspiciuntur, sempiterna quoque ejus virtus & divinitas, ita ut sint inexcusabiles, &c.*

Licet creaturæ omnes quasi loquantur, & apertè demonstrent Dei Existentiam, plurimi tamen creaturas vident, neque eam vocem audiunt, quia ut monet S. Aug. lib. 10. Confess. c. 6. *Nec respondent ista interrogantibus, nisi judicantibus, nec vocem suam mutant, id est, speciem suam, si alius tantum videat, alius autem videns interroget, ut aliter illi appareat, aliter huic, sed eodem modo utrique apparens, illi muta est, huic loquitur, imò verò omnibus loquitur, sed illi intelligunt, qui ejus vocem acceptam foris, intus cum veritate conferunt, veritas enim dicenti mihi, non est Deus tuus cælum & terra, neque omne corpus, hoc dicit eorum naturam videnti; moles minor est in parte, quàm in toto, jam tu melior es tibi dico anima mea, quoniam tu vegetus, mole corporis tui præbens ei vitam, quod nullum corpus præstat corpori, Deus autem tuus etiam tibi vita vita est.*

Opp. Non sequi res creatas Existentiæ Dei esse medium certum, sed probabile tantum, quòd excusationis omnem locum tollere potest; media enim probabilia id præstant: sic illa quibus Christi adventus, v. g. & hic homo Pauli pater probantur licet probabilia sint tantum, excusationis locum tollunt omnem; tenetur enim quisque Christi fidem ample-

cti, & Paulus homini quem pro patre habet, honorem lege divina præscriptum deferre.

R. Res creatas esse medium certum Existentiæ Dei. 2. Nec medium probabile, nisi à re indubitata saltem moraliter pendeat, homines à peccato non eximere; proptereaque quemlibet è legitimo matrimonio progenitum matris suæ conjugii debitum parentibus honorem deferre tenceri. 3. Media verò, quibus Incarnatio demonstratur, non pro probabilibus tantum mediis, sed pro certissimis sunt habenda.

CONCLUSIO II. *Plurimæ de Deo Demonstrationes afferri possunt.*

1. Spectari non possunt solis, lunæ, & syderum conversiones, constans ordo, quin statim intelligatur Existere, qui & ea condiderit & moderetur: non potest enim fieri ut ea semetipsa condiderint, aut moderentur: nec casu tam apta sit moderatio. Existit itaque à quo condita sunt & reguntur, seu prima causa quæ Deus est: has rationes sic SS. Patres illustrent; qui amplissimam civitatem ingressus, eamque summâ pace frui conspiciat, omnesque illius cives æquo jure vivere inter se, facile adducitur, ut credat ibi adesse aliquem tam miræ pacis cum auctorem, tum etiam conservatorem. Qui humani corporis eximiam formam, necnon partium ex quibus constat mirificum situm paulò attentius considerat, opus adedò egregium unâ cum eccellente illius opifice miratur & suspicit, statimque animam esse in corpore libens confitetur, quæ omnes corporis partes citra dissensionem ad omnia obunda munera moveat. Qui exercitum rectè instructum & in hostes prodeuntem ex montis supercilio viderit, Imperatorem coniciet qui copiis præsit, huncque præclarum ordinem instruxerit. Nec potest in medio maris conspici navis ad quemdam portum dirigens iter, quin statim in mentem veniat adesse gubernatorem, qui cursum navis moderetur; necessariò igitur omnium quæ in mundo sunt & tantâ sapientiâ administrantur, bonorum fontem, & moderatorem, Deum scilicet agnoscere oportet.

2. Idem argumenti genus ita perspicuum iterum potest fieri. Quidquid Existit, vel est mutabile, vel immutabile, creatum, vel increatum; omnia verò non esse immutabilia & increata constat; datur ergo Ens quod cætera creaverit, res enim seipsam facere non potest. Quod ergo cætera condidit, sine principio & ab æterno est; quidquid enim ex tempore cæpit esse, aliquando non fuit; & si nihil à semetipso esset, res Existere non potuissent.

Mundus certâ mole & magnitudine donatur, quæ ab ipso determinari non potuit, sed aliundè; nec ejus est molis quâ major dari non possit. Admittendus est ergo necessariò artifex, qui illam molem definiat, ac subindè necesse est illum artificem esse substantiæ intellectuales & perfectissimæ, quæ de rebus omnibus tam sapienter constituerit.

Mundus etiam necessariò conditus non est, nec casu. Non 1. nam & plurimi alii & longè ampliores mundi possibiles sunt, potuitque iste non creari; non autem potest dici casu conditus quin supponatur causa illius; non enim seipsum fecit, imo nihil contingit per accidens quod causam per se non supponat, sic v. c. regulà homo opprimitur. per accidens nempè, sed illa oppressio supponit causam per se, nempè aut hominem, qui lapidem illum projecit alio quidem consilio, aut molem, & pondus insitum lapidi qui à pariete avulsus in terram movetur, & hominem illac transeuntem consulto obruit.

3. Eidem argumento accedit nova illustratio si sic oculis subjiciatur. Omnia entia, vel sunt contingentia, vel datur aliquod Ens necessarium. omnia entia dici non possunt contingentia; si enim ita esset, fieri posset ut nullum Ens existeret; contingens enim ex naturâ suâ potest non esse; hac autem factâ hypothesi, res omnes & possent esse & non esse, quod implicat; esse possent ex hypothesi, & non esse possent; quia illud non esse posset, cuius non daretur causa: nec enim Entia semetipsa possent producere: nihil quippe sibi dat esse: prius est enim rem esse, quàm operari; ergo omnino admittendum est aliquod Ens necessarium, seu quod sit à se & non possit non esse.

4. Quòd omnes orbis terrarum populi, in hanc sententiam conspirent, & Deum Existere inter se conveniant, nullus Philosophorum diffiteatur. In hoc ergo natura & ratio consentiunt, licet in aliis cum dogmatibus, cum consuetudinibus, & legibus dissideant; impossibile est autem, ut suprà probatum est, naturam universam errare: ex naturæ instinctu ad cognitionem Dei omnes terræ homines adducuntur, nec ullo pacto inito in hunc de Dei Existentiâ consensum venerunt. Neque etiam omnium sapientium ratio in errorem lapsa dici potest, quæ naturæ instinctu congruit, & tam mirabili, & tantâ sapientiâ elaborato operi præesse quamdam sapientiam, eamque supremam cōjicit. Nec illud inconsultò factum asseri potest, nec reddi ratio cur sit mandus, & non aliter fuerit constitutus.

5. A Sancto Augustino eadem veritas probatur variis demonstrationibus quæ ex ingenitâ Dei cognitione, non verò ex discursu ex rebus aliis creatis ducto eruantur. 1. Perfectius quid nostrâ ratione est agnoscendum: ratio enim nostra omnium Entium se non esse rem perfectissimam novit: scit enim se esse mutabilem, & immutabile mutabili præstare, seque non mutabili lumine uti, sed immutabili, & quod suprà se sit. Lib. 2. de Lib. Arb. c. 12. Lib. de Vera Relig. c. 3. Ergo datur Ens immutabile & supremum, quod Deus est.

2. Quæ in corporibus pulchritudine sua nos delectant non aliâ ratione animos deliniunt, quàm aptâ partium dispositione aut proportionem; nobis autem illa partium dispositio non placet, nisi ob unitatem & æqualitatem, quæ iudicii nostri lex & forma est. Hæc autem unitas & æqualitas rebus (quæ locorum & temporum vicissitudinibus sunt obnoxia) non inest; cum ipsa immutabilis sit; illæ autem res varias mu-

rationes patiantur; ⁴suprema igitur est aequalitas, quæ nec à locis, nec à temporibus pendet. Anima autem nostra, seu ratio aequalitas illa suprema non est: cum ipsa tot mutationibus sit obnoxia, & modò incitiæ tenebris obscuratur, modò scientiæ lumine perfundatur. Alibi non quaerenda est igitur quàm in Deo omnis aequalitatis authore immobili, nec eam appetere, nisi alicubi existeret. Sic l. de Musi. c. 12. lib. de Quantitate Animæ c. 8. 9. 10. lib. de Vera Relig. c. 3. lib. 8. de Civit. Dei.

3. Existit veritas incommutabilis, nunquam cessans, quæ Deus est: nam de omnibus rebus incommutabili quadam veritate judicamus. Hæc autem veritas nobis nobilior est: cum non de ipsa, sed secundum ipsam judicemus: nec iudicio nostro subest: nec mutationi obnoxia est: nec mens nostra habet veritatem à se: errare enim non posset. lib. de Vera Relig. c. 3. lib. 2. de Lib. Arb. c. 6. & 12. l. 3. c. 12. Insuper, veritas admittenda est nunquam cessans & semper subsistens; nam annihilari mundum supponamus, & proinde perire omnes, qui in illius veritatis partem asciti fuerant. Veritas, in hac hypothese, aut in nihilum est redigenda, aut non. Non utique annihilaretur; ergo admittendum esset subiectum in quo subsisteret; illud autem non potest esse ex iis quæ annihilari & destrui possunt, cum ipsa veritas illis annihilatis & destructis superesset; ergo admittendum est aliquod immutabile, quod nunquam pereat. Existit ergo aliquid immortale, quod sit verum, seu in quo sit veritas; non autem annihilaretur, seu destrui posset veritas, in nihilum reductis rebus omnibus creatis, semperque vera esset illa propositio, mundus fuit, mundus perit. Jam si illud semper futurum verum esset, quæro quodnam subiectum illius existeret: perire enim non posset, quod semper futurum verum est; admittendum ergo aliquod subiectum veritatis, quod immortale & mutationi obnoxium non sit. Lib. 1. Soliloq. c. 2. & 15. lib. de Lib. Arb. c. 12. lib. 2. de Vera Relig. cap. 39. lib. 3. Quæst. 4. Quæst. 5.

4. Necessariò supremum bonum est: cum sint maiora & minora bona, quæ sunt ejusmodi tantum, quia vel minus, vel magis ad illud supremum bonum accedunt. Datur mutabile bonum, cujusmodi sunt omnes res creatæ: quod autem mutabile, idè tale est, quia ad aliquem actum, seu perfectionem tendit, & assequi conatur; eam autem assequi nititur, quod eam à se non habet, & ab alio eam obtinere quàm à se debet: nemo enim sibi conferre potest quod penes se non est. Agnoscendum ergo supremum aliquod bonum ad quod omnia creatæ confugiant, ut quæ sibi defint, accipiant; hoc autem bonum, Deus est, qui solus animas & corpora perficere potest. Omnibus etiam naturaliter inditum est, immutabile bonum: mutabili esse præferendum, sic sapientiam immutabilem mutabili sapientiæ longè præstare; illius autem boni immutabilis existentia elicitur necessariò ex bonorum mutabilium Existentiâ, idè enim tantum bonum mutabile dicitur, quia minus vel magis accedit ad bonum incommutabile, & bona mutabilia necessariò ab immutabili

invariabili bono emanant. Lib. 2. de Lib. Arb. c. 17. Lib. de Morib. Eccl. c. 6. Lib. de Morib. Manich. c. 11.

O P P. 1. Demonstrationes adductæ non necessario Existentiæ Dei inferunt. 1. Quæ petitur ex necessitate admittendæ primæ causæ, seu quæ omnia è nihilo eduxerit, nullius momenti est; nam demonstratio, quæ concludit necessario, debet concludere omni suppositione facta: Demonstratio autem Existentiæ Dei, posito quod mundus sit ab æterno, non concluderet; daretur enim progressus in infinitum in creaturis à se invicem productis, & proinde non posset demonstrari 1. causâ, &c.

R. Dato progressu in infinitum non posse demonstrari primam causam ejusdem ordinis: posse verò si sit ordinis diversi; sic licet infinitæ darentur plantæ, & non posset assignari primâ; daretur necessaria semper plantarum causâ, quæ esset alterius ordinis; & quamvis lineâ infinita existeret, nec posset primâ aut ultimâ ejus pars designari, posset demonstrari digitus qui lineam illam descripsisset; ita licet mundus esset durationis perpetuus, & à parte ante, & à parte post, & proinde nec primâ, nec ultimâ ostendi posset res creata, existeret semper causâ quæ ipsas creasset: quia nempe talis Entium congeries non esset à se, sed ab alio; nam licet illa Entia forent infinita, essent tamen Entia per participationem, cum essentia rerum immutabiles sint: dantur enim v. c. infiniti homines, non desinent esse animalia rationalia, quia de ratione hominis est, ut sit animal rationale.

I N S T. 1. Licet hoc vel illud Ens sit ab aliqua causâ, non sequitur tamen Entium congeriem esse ab alio: quemadmodum licet hic & ille quàmplurimique homines sint albi, non sequitur omnes homines esse albos: Et re verâ non valet argumentum à distributione ad collectionem; sicut nec valet à partibus ad totum.

R. Non valere in rebus contingentibus, sed in essentialibus & necessariis; sic quod hic & ille homo sit ratione præditus, bene inferitur hanc esse omnium hominum naturam: quia ad hominis naturam pertinet polleere ratione: non verò sequitur, quia hic & ille sunt medicina periti, omnes homines tali scientiâ esse instructos: quia ad hominis essentiam non spectat, & per accidens est, quod quidam illi scientiæ operam navent. Addo res quantitate donatas excipi debere; quod enim hic & ille motus partes habeat priores & posteriores, non proinde omnis motus est ejusmodi: quia in rebus quantitativis, aut illi affinibus, plus est in toto quàm in partibus: & sic aliquid potest convenire toti, quod non conveniat parti; motus enim qui primò creatus fuit, non habuit partem se priorem. In rebus verò essentialibus & necessariis, quod singulis convenit, seu parti, convenit quoque collectioni, seu toti; unde quia omnis res creata necessario est ab alio, rerum pariter creatarum collectio est ab alio. Proinde licet à distributivo sensu ad collectionem, à partibus ad totum non valeat consecutio in attributis quantitatem, totalitatem, & ejus appendices denotantibus: valet tamen in attributis Essentialitiam spectantibus.

INST. 2. Etiam collectio Entium non potest conferre ad demonstrandam Dei Existentiam, quia deberet esse & necessaria & evidens; demonstrationis enim medium & necessarium & evidens esse debet: sed palam est collectionem hanc esse confusam & contingentem.

R. Collectionem hanc esse quidem ratione sui contingentem, non verò in ordine ad Deum: cum fieri non possit, quin à Deo esse suum non acceperit; eam quoque esse satis evidentem, ut demonstrationis partem conficiat. Nam propositiones universales, quæ ad demonstrandum assumuntur, singularia tantum confuse complectuntur: non enim ea distincta à se invicem oculis subiciunt, cujusmodi est ista, *omnis homo rationis est compos*; nec necesse est ut medium demonstrationis sit ex se evidens, satis enim est quod sit pars propositionis, seu extrema connectat, & ita certò & aperte ut aliquid totum necessariò sequatur.

INST. 3. Ex effectuum proportionem cum causâ haberi solum potest à posteriori demonstratio causæ; cum ergo creaturæ non habeant sufficientem cum Deo proportionem, ex illis simul vel seorsim sumptis demonstrari nequit Deum esse.

R. Per creaturas nos quidem habere non posse perfectam de Deo cognitionem, quia per eas cognoscere non possumus quid sit propriè Deus: Sed posse nos per illas clatè ac evidentè cognoscere Deum ipsum Existere: ex quocumque enim effectû à causâ necessariò dependente certò colligitur ac infertur Existentia causæ: Cum igitur creaturæ necessariò dependant à Deo ut effectus à suâ causâ, ex illis manifestè demonstratur Dei Existentia.

OPP. 2. Articulus fidei demonstrari nequit: atqui Deum esse est fidei articulus, ex Apostolorum Symbolo.

R. Deum esse, Deum esse unum, non modò esse fidei articulos, sed quasi vias, & ad fidem præambula: & idè nobis aperta esse, tum ex ingentia Dei cognitione, tum ex discursu mox exposito, quibus momentis utitur Apostolus Rom. 1. ad eximendam Ethnicis omnem excusandæ ignorantia causam. Fides igitur supponit quandoque rationem naturalem, sicut gratia naturam.

OPP. 3. Contrà rationes ex S. Augustino petitas; si Deum Existere hinc colligi posset, quod datur majus bonum, aut minus; sequeretur quoque dari summum malum, quod dantur gravia & graviora mala: hominibusque dari sapientissimum, quod dantur homines sapientes & sapientiores.

R. Id non sequi: nam, ut demonstrabimus cont. Marcio. & Manich. summum malum dari non potest, sicut nec plures Dii esse possunt. Mala gravia, vel graviora non ea sunt, quod magis vel minus ad summum malum accedant: sed quod à summo bono magis vel minus recedant.

INST. Ideæ illæ boni supremi, veritatis semper existentis, & nunquam cessantis, sapientiæ immutabilis & justitiæ sapientiæ, nullius sunt momenti; non enim sunt naturaliter nobis indicatæ, ut supponuntur: nec etiam est necesse dari aliquod Ens summè bonum, & sapiens, & justum,

cujus idea nobis occurrit: nos enim talem ideam boni, & justitiæ, & sapientiæ nobis effluximus; sic cum plurimos virtutis, sapientiæ, & justitiæ actus elici perspexerimus, boni & justitiæ aut sapientiæ communis ideam quamdam exprimimus. Quemadmodum singulares naturas cum inspicimus, naturæ communis & universalis idea in nobis exurgit. Bicititiæ ergo & commentitiæ penitus sunt illæ rationes quæ ex S. Augustino, ut validissimæ, asseruntur.

R. 1. Veritates æternas à conceptibus nostris adeò independentes esse, ut falsum penitus futurum esset judicium, quod de bono & sapientiæ aut justitiæ latitudine ferremus; si ad solos attenderemus privatos nostros conceptus, seu ad perspectam privatorum virtutem; quin imò de privatorum virtute judicamus, secuti ideam naturaliter nobis insitæ lumen, & à nemine moniti seu instituti: v. g. *alteri non esse faciendum, quod nobis fieri volumus* à nemine audivimus, & ad illam regulam, quæ jure vel injuria sunt, expendimus & metimur. 2. ut supra probatum est, cum id, quo nihil majus est, concipimus, necessariò illud Existens admittendum est; alioquin simul duo contradictoria admittenda essent: nam in intellectu illud esset omnium maximum, & non esset; esset ex hypothesi, non esset autem, quia esset aliquid eo majus.

Q. Cujus momenti habendæ sint probationes illæ ex cognitione ingenitæ petitiæ, & non per sensus intermedios?

R. Argumentationes quæ ex cognitione congenitâ petuntur plurius esse faciendas, si Sanctorum Patrum doctrinæ adhareamus, quàm argumentationes ex rebus creatis, seu ex discursu confectas.

1. Quia perceptiones quæ quibuscumque naturaliter sunt insitæ, quæ facilius menti sunt obviæ, quæ videntur splendidiore in imagine, seu in homine, quàm in rebus extrâ hominem positis, præponendæ videntur cognitionibus certissimis quæ ratiocinationis ministerio comparantur. Probationes autem Existentiæ divinæ cuilibet homini à Deo insertæ ex Patribus antiquis sunt certissimæ, animis sunt obviæ, in Dei imagine sunt conspicuæ. Ità de illis perceptionibus Tertull., ut de cognitionibus sine fæco, & à Deo Doctore acceptis, qui non seducit l. de Testim. Anim. c. 5. *Hæc testimonia animæ quando verà, tantò simplicia: quanto simplicia, tantò vulgaria: quando vulgaria, tantò communia: quando communia, tantò naturalia: quando naturalia, tantò divina. . . . quidquid aut illa edocuit, aut ista perdidit, à Deo traditum est, Magistro scilicet ipsius Magistra.*

2. Quæ immediatè novimus, certiora sunt, & nobis magis manifesta, & facilius, quàm quæ per sensus intermedios percipimus. Notiones hæc, v. g. *quod veritas perpetuò Existat, &c.* sunt ex illo genere rerum quæ immediatè habentur, & non per intermedios sensus. Ubi quid sensuum auxilio perspicitur, dubitandi ratio plerumque occurrit: ubi verò quid novimus non fieri sensuum auxilio, illud ita compertum est, ut de eo dubium moveri nullum possit. Idea verò Dei, ut absolutissimi Entis, ut summæ veritatis, &c. seu ut innata, seu alio modo à mente percepta,

ita necessariò mentem afficit, ut non possit de hac veritate dubitare; cùm enim Ens absolutissimum apprehendi non possit ut non Existens, ex hypothese quod percipiatur à nobis, assentietur mens Deum Existere, ubi hanc veritatem apprehenderit.

Ex his quæ immediatè noscuntur cognitiones, sunt, *binarium esse parrem binario: septem & tria decem efficere*; ex his quæ per sensus nota sunt, sunt *solem lucere, diem esse*: Certius & faciliùs mens novit res primi generis: sunt enim necessariae, posteriores verò sunt contingentes: neque necesse est semper lucere solem, aut diem esse, etsi dies sit quando sol luceat; sed non potest esse binarius quin sit binario par, nec septem & tria, quin decem constituent. Item & prioris generis cognitiones faciliùs assequimur, quàm posterioris: quàm enim obicura sit lucis & aliorum sensibilium notitia, tot sibi adversantium opinionum varietas apertè indicat.

Si certiores non essent ab intellectu solo cognitiones perceptæ, quàm quæ per sensus intermedios excipiuntur, sequeretur sensus esse intellectu certiores, nobiliores, & magis infallibiles, quod esset absurdum; nam quis unquam hoc asseruit? Quis rectori quem Deus instituit, nobilitatem, infallibilitatem, seu amplius lumen detraxerit, ut illud potentia, quæ regitur, deferat. Sensus ad errorem duces fuisse etiam circa Dei Existentiam constat: certò enim Deum existere gentiles noverunt; sed quia sensuum ministerio in investigandâ Dei naturâ utebantur, idè ab unius Dei cultu in infinitorum Deorum venerationem prolapsi sunt. Mens attingit plurima, quæ sunt sensibus impervia, & de quibus dubium moveri non potest. Sic novit se esse, se intelligere, se vitam agere; hanc autem noticiam à sensibus non hausit: illud enim neque coloratum est, neque sonorum. Prima scientiarum principia sensuum beneficio non apprehenduntur, cujusmodi est illud, *impossibile est idem simul esse & non esse*. Primorumque principiorum veritas est infallibilis, immutabilis & æterna; at veritas, infallibilitas, ut ita loquar, immutabilitas, æternitas sub sensus non cadunt; sensus enim id solum percipiunt quod est sensibile aut mutabile.

Res spirituales magis subsistant, quàm corporeæ. Atque adeò certiores sunt cognitiones rerum spiritualium quàm corporearum. Sic illa cognitio, *justitia arbori præstat*, certior est eâ, *arbor existit*. At si non existeret justitia, procul dubio arbor ipsi præferenda foret: ita etiam certissimum est immutabile bonum mutabili esse anteponendum. Bona autem spiritualia sunt immutabilia, imò quæ mutabilia sunt ab immutabili existentiam suam mutuuntur. Ita S. Aug. lib. de Quant. Anim. c. 4.

Ultimò. Certius & faciliùs res in imagine dignoscitur quàm in vestigiis. Homo imago Dei est: creaturæ verò corporales vestigia tantum Dei sunt, sic S. Basil. Homil. 17. in Ezech. *Præposterum valdè esset si anima omnem veritatis, seu Dei naturam à sensibus mendicare adigeretur. An enim ipsa medium limitem insidens intelligibilis & sensibilis mundi, ut superiora videat, oculos ad inferiora inclinabit? Ut proxima videat, longinqua consulit? Ut lucem videat, tenebrarum sedem adibit? Non*

igitur anima sensus & sensibilia adibit, ut de Deo consulat, sed ab imis quibus jam flagitioso amore devincta est, revellit se, ut se in seipsam recolligat. A seipsa autem ad Deum exurgat, ad hunc modum scala sibi apta erit, non ut descendat prius ad corporalia, & inde ad Deum ele-
vetur: intempestivum enim esset descendere ut ascenderet; sed ut sensi-
bilibus in qua turpiter prolapsa est innitens, & ad seipsam enitens, à se
 tandem ad Deum gradum molietur. S. Bernard. l. 5. de Consider. c. 1.
Anima non potest sine ingenti dispendio compelli ad emendicandum quid-
piam à naturâ corporeâ, nedum ad emendicandum rem tanti pretii, seu
 cognitionem Dei. Lib. de Dono interiori c. 13. Cum omnis natura cor-
 poreâ vestigium Dei sit, anima autem imago: cum illa velut umbra sit,
 hac speculum: quis ambigat Deitatem splendidius fulgere in speculo &
 in imagine suâ, quàm in vestigio & umbrâ. Longè clariùs igitur in il-
 lis cognitionibus animo naturaliter inhiis & obviis Deus dignoscitur,
 quàm in illis operibus externis, quamvis magnificis; nec est necesse, ut
 ad illa divinitatis vestigia confugiat homo, ut divinam Existentiam de-
 prehendat: eam perfectiori ratione in seipso apprehendit.

QUÆSTIO SECUNDA.

Utrùm Deus sit unus, an multiplex,

ARTICULUS I.

Qui Unitatem Dei impugnaverunt.

DE o s plurimos & infinitos penè in honore habitos fuisse apud
 Gentiles, ex omnibus monumentis compertum est: in plerisque etiam
 cæteris nationibus adhuc superesse idololatras, & Deorum plurium
 cultum.

Ad ann. Christi circiter 145. Valentinus tot commentus est figmenta,
 ut vix excogitari possint plura: Confinxit enim duo rerum omnium
 principia, quæ appellavit profundum & silentium: dixitque profundum
 esse patrem, & ex conjugio profundi & silentii processisse intellectum &
 veritatem, & protulisse in honorem patris Æonas octo; de intellectu
 autem & veritate processisse verbum & vitam, & protulisse Æonas de-
 cem: De verbo & vitâ processisse hominem & Ecclesiam, & protulisse
 Æonas duodecim, quæ omnes simul sunt triginta, hoc est triginta
 sæcula. De trigesimo sæculo dicit diabolum esse natum, & à diabolo
 alios natos, qui hunc mundum fecerunt. Quæ quidem omnia mera sunt
 figmenta ex solo delirantis cerebro derivata. Ea ex majori parte secuti
 sunt Secundus quidam à quo Secundani, Ptolomæus & Marcus, Valen-
 tini sectatores.

Ad ann. 155. duos Deos statuit Cerdo, bonum alterum & omnibus

ignotum, quem patrem **JESUS** nominavit; alterum malorum Creatorem, omnibusque conspicuum, qui in Lege veteri locutus esset, & Prophetis se videndum præbisset. Hæc doctrina aliis hæresibus erat communis, ita S. Epiph. hæres. 41.

Marcio Stoicus Philosophus plures quoque Deos admisit, duos ex Sancto August. : tres ex S. Epiph. & S. Damas. : novem ex Tertull. libro 1. contra eum c. 13.

Manes, seu Manichæus ad an. 177. duos esse Deos opinatus est; Primum bonum & animæ creatorem; alterum malum & corporis conditorem. Hinc in odium Dei mali voluptatibus omnibus docebat esse servendum. Duo illa principia ab æterno & in æternum sibi invicem adversa fuisse & futura esse asserbat, ita S. Epiph. hæres. 45.

S. Aug. lib. de Hæres. contra unitatem Dei has hæreses paulò aliter delineat; Deum unum bonum, & alium malum sibi adversos fingebant, inquit, Gnostici, Cerdonii, & Marcionitæ. Duos item, sed sibi non adversos & à se invicem præcedentes, malum nempe Deum à bono statuebant Apelleitæ. Duos item credidit Deos Manichæus, id est, manna fundens, qui prius Manes, seu insipiens vocabatur: qui duo Manichæorum Dii ab æterno soli adversabantur, unusque principium bonorum, alter verò malorum habebatur.

Appelles Marcionis discipulus duos Deos agnovit: unum bonum, alterum malum. Non dixit tamen illos duos Deos esse duo rerum principia: sed unum tantum, scilicet Deum bonum, & ab illo factum alterum Deum, qui cum malignus esset, mundum in sua malignitate fecit.

Fuerunt & alii qui tres admisere Deos, tresque spiritus æternos essentiali numero differentes apud Theodoret. l. 1. Hæret. Fabul. c. 18: Philoponus apud Nicephor. l. 18. c. 48: Quidam Gallus adversus quem S. Ansel. scripsit librum de Incarnatione Verbi: nec non tandem teste Benedicto Areto in Histor. Valentinus Gentilis in suis Prophetibus.

ARTICULUS SECUNDUS.

Unitas Dei demonstratur.

QUIBUS probata fuit rationibus Existentia Dei, iisdem Unitas demonstratur, ut vel attendenti patet, & iisdem argumentis. Tertull. Minut. S. Cypr. Arnob. Lactant. &c. utramque probandam suscipiant veritatem, ut ex eorum rationibus & autoritaribus superiori questione relatis liquet.

PROBATUR insuper ex Deut. 6. v. 4. *Audi Israël, Dominus Deus noster, Deus unus est.* Psal. 85. v. 10. *Magnus es tu, & faciens mirabilia, tu es Deus solus.* Scripturarum autoritatem urget in Apol. g. Athenag., quod nempe Prophetiæ adimpletæ earum fidem & autoritatem astruant & certissime confirmant.

1. S. Justin. lib. de Monarch. Dei, Poëtarum & Philosophorum in Unitatem Dei conspirantium auctoritates refert, Eschyli, Sophoclis, Philemonis, Orphei, Pythagoræ, Platonis, Menandri; illis addit in Apolog. Athenagoras Eutipidem, Philolaum, Pythagoricos, Aristotelem; eosdem etiam citant & designant Minutius Felix in Octavio, S. Cypr. de vanitate Idolorum, Arnobius, Lactantius, Euseb. Addit quidem S. Cypr. Trinegistum: sed hic author suppositus est. Sibillasque plerique Patrum in testimonium adducunt: earum autem pluribus videtur nutare auctoritas. Philosophorum sententiæ admiratione prorsus dignæ sunt, sed prolixiores quàm ut hic referantur. Clemens Alex. addit Hesiodum, &c.

3. Duos non posse esse Deos aut plures l. contra Hermog. c. 4. demonstrat Tertull. *Quod si Deus est, unicum sit necesse est, ut unus sit, aut quid erit unicum & singulare, nisi cui nihil adequabitur? quid principale nisi quod super omnia, nisi quod ante omnia, & ex quo omnia? Hæc Deus solus habendo est, & solus habendo unus est, si & alius habuerit, tot jam erunt Dii, quot habuerint.* Et infra. *Deum autem unum esse oportet, quia quod summum sit Deus est. Summum autem non erit, nisi quod unicum fuerit: Unicum autem esse non poterit cui aliquid adequabitur.* Eadem etiam ratione utitur lib. 1. contra Marcion. c. 30. & S. Cypr. lib. de vanitate Idolorum. Igitur quod cæteris præstat & omnium summum est, ut Deus nec juxta se, seu compar, nec supra se quidquam esse patitur. At quod hujuscemodi est, solum est & unum; ergo Deus est unus. Deus autem cæteris præstat, & omnium Entium summum est, quòd nihil melius & majus eo sit, ut jam probatum est, ac proinde nihil ei adæquari potest.

4. Si plures Dii essent, eorum potentia esset quâdam orbis parte definita, vel non; vel essent æquales, vel inæquales; vel omni genere perfectionis ornati, vel non. Si eorum potestas esset quâdam orbis parte definita, si inæqualis auctoritatis essent, & non omni genere perfectionis instructi, Dii non essent; Dei enim & potentia infinita & immensa perfectio esse debet, &c. Si verò eorum potentia nullis finibus coërceretur, essentque paris perfectionis, & in omni genere absolutæ; jam quæro 1. utrum omnes orbi præessent, aut unus tantum; si unus non præsit, quæro iterum unde id oriatur? An ex impotentiâ, an ex defectu voluntatis, an sibi adversentur, an in omnibus consentiant, an Deorum illa multitudo sit quid melius quàm quilibet Deus seorsum constitutus? Primò si quilibet Deus suppositus orbi non præsit, quia non potest, aut quia minimè vult, Deus esse non potest, ut planum est. Item si sibi adversentur, Dii non sunt: cum pugna illa aliundè originem ducere non possit, nisi quòd unus alterius jura velit invadere. Quòd si etiam Deorum multitudo cuilibet Deo seorsum sumpto præstet, Deus seorsum sumptus erit Deus, ex hypothese: non erit autem Deus, quia in eo omne perfectionis genus non occurrit. Nec etiam possunt dici plures simul omni genere perfectionis ornati; non possunt enim

esse duo Entia in omni genere perfectionis absolutissima ; nam vel unum alterius perfectionem assequeretur, vel non ; non obtineret ex hypothesi, quia essent distincta, & consequenter omne divinarum perfectionum genus non haberent, cum omnes, quæ in Deo sunt, perfectiones infinitæ necessariò sint. Nec etiam eorum Deorum numerus determinari posset, nec ratio asferri cur tot essent & non plures, aut pauciores. Hæ rationes occurrunt apud S. Iren. Præf. in lib. 1. Athenag. in Apolog. Laët. lib. 1. c. 3.

Postremò. Quò sunt pauciores administri, tantò major est concordia ; nulla autem præstantior est concordia, quàm quâ administratur orbis universus ; ergò penes unum moderatorem est orbis universus : Si enim essent tot Imperatores quot cunei, quot cohortes, rueret penitus militaris disciplina, nec præstare quid potest exercitus, nisi cum uni pareretur Imperatori. Abest etiam tranquillitas omnis & ordo à familiâ, nisi Dominus unus præsit ; ergò à pari rueret orbis concordia, ubi plures administratores orbi præessent. Et aut unus Deus istius orbis administratori par esset, aut non ; si primum ergò supervacanei sunt alii Dii, nihil autem est bonum quod superfluum. Nec multos patitur natura soles, cum unus sufficiat. Jam si unus id muneris sustinere non posset, non esset Deus ; est, quod est impossibile, in plures rectores orbis administratio divisa esset, orbis ipsius summa constare non posset ; unoquoque Deo nihil aliud curante, nisi quod ad ipsum spectaret. Hæ rationes excerptæ sunt ex Minur. in Octavio. Laët. lib. 1. cap. 3. c. 19. S. Athan. Orat. contra Gentes.

ARTICULUS TERTIUS.

Idololatre confutantur.

DIIS Gentium & creaturis divinum delatum cultum Idololatriam dicimus, sed priùs quam ad Idololatriæ confutationem veniamus, præmittenda nobis quædam sunt de origine, authoribus, propagatione, & variis speciebus Idololatriæ.

Idololatriæ origo.

Idololatriam recens esse figmentum Orphei, Homeri, Hesiodi, & Herodoti, qui Salomonis vivebant temporibus, fusè probat in Apolog. Athenag. tum quòd hi omnium primi Deorum originem & posteritatem descripserint, tum quòd vivis illis, quos Deorum nomine salutant, aut coævi fuerint, aut paulò post viguerint. Ipse, cujus verba refert, Herodotus asserit ad sua usque tempora, Deorum originem, naturam, & figuram ignotas fuisse, & à paucis annis eorum naturam delineatam, imaginesque depictas, ex quo nempe Saurias artem picturæ adinvenerat.

Varij

Varii à variis Idololatriæ authores perhibentur. Sap. 14. ad vitæ corruptionem Idololatriæ origo refertur, & in dolorem patris qui ex imagine demortui filii solatium sibi quærebat: Initium etiam illius ducit Sapiens ex desiderio absentium hominum colendorum, præsertim Regum qui aberant, & ex grati animi affectu:

2. Asserit S. Justin. Orat. ad Græcos ob defectionem ex Paradiso pulsos fuisse primos parentes, quod divinitatem ambiissent, & idè Deorum nomen, quod obtinere non potuerant, filiis suis detulisse.

3. Chamum primum Idololatriæ authorem facit Lactant. lib. 2. c. 14. quod à Noë maledictus, Dei cultum à Patre non acceperit, & divinitatis ignorantiam posteris reliquerit; purum veri Dei cultum in reliquis Noë filiis permansisse; temporis verò lapsu unumquemque pro vario affectu Deum sibi effinxisse.

4. Clem. Alex. admonitione ad Græcos Idololatriam ex Orphæo & Metimæo musicis originem duxisse docet, qui cantus musici suavitate quorundam hominum facta & scelera commendarunt, eosque in Deorum numerum referri curaverunt. Lact. lib. 1. c. 15. Poëtas plurimum ad errorem contulisse docet, qui compositis ad voluptatem carminibus, viros illustres, quorum commendationi studebant, in cælum sustulerunt, quod est adulatoribus familiare.

5. Dæmonibus Idololatriæ causam & ortum adscribunt Sanct. Justin. Apol. ad Senat. & Clem. Alex. in Admon. ad Gentes. Minut. Fel. in Octavio asserit Dæmones spiritus vagos terrenis cupiditatibus depravatos substantiæ simplicitate deperditæ, ad solatium calamitatis suæ non desinere pravitate errore infundere, & cum à Deo alienati sint, ab eo homines segregare inductis pravis Religionibus. Euseb. lib. 5. de Præparat. c. 11. docet etiam Idololatriam à Dæmonibus fuisse inductam. Et S. Greg. Naz. Orat. 39.

6. Quod divinæ naturæ essentiam curiosius & audacius perscrutati homines sint, seu quod perspectum habere voluerint quid sit Deus, Idololatria orta est ex Arnob. lib. 7. *Nequennes homines quidnam sit Deus scire, quamvis sit vis ejus natura, substantia qualis, utramque habeat formam, an nulla sit corporis circumscriptione finitus, agat aliquid, an non agat, vigiletne perpetuò, an aliquando solvatur in somnos; currat, sedeat, ambulet, an ab hujusmodi motibus & cessatione sit liber; Hac omnia, ut dixi, nequennes scire, neque ratione aliquâ pervidere, in eas sunt opinationes lapsi ut Deos ex se fingerent, & qualis sibi natura est, & illis talem darent actionum, rerum, voluntatumque naturam.* S. Greg. Naz. Orat. 34. Omnis natura rationis particeps principem illam causam appetit; at cum à rebus sensibilibus extricare se nequeat, in languorem quemdam & virium defectum adducitur, quo fit ut rerum corporearum auxilio solummodò nixa, ad spiritualium notitiam & unionem assurgere incassum conetur. Hinc operæ deperditæ damna graviter ferens atque resarcire quoquomodo enitens, in sublunaria oculos conjicit, & ex eis seligit quædam, quibus divinos honores deferat.

7. Ex pravo hominum affectu ortum habuisse Idololatriam docet Origenes Hom. 2. in *Judices*, quod nempe homines velint, quæ sibi arri-
dent, Deos esse: unde quæ amant, Deorum aut Deorum nomine insi-
gnire solent. Clem. Alex. lib. 7. Strom. ait inde Deos sceleratos, va-
riisque cupiditatibus obnoxios fuisse ab hominibus adinventos, ut eâ ra-
tione vitiis suis autoritatem conciliarent. Hinc etiam fit, ut quæ gentes
nigræ sunt, nigros Deos effingant, & qui rustici, rusticos. Docet verò
S. Greg. Nyss. Orat. 3. contra Eunom. inde natam esse Idololatriam,
quod creaturarum pulchritudine decepti homines creaturis adhæserint,
quibus, ut gradibus, ut ad Deum assurgerent, utendum fuerat.

Ultimò. Pœnam peccati Idololatriam esse docet Deus. Sap. 15. v. 6.
& Rom. 1. v. 23. quam doctrinam ex Scripturis acceptam tradiderunt,
S. Geg. Naz. Orat. 39. & S. Aug. lib. 1. Confess. c. 3. & lib. de
Verâ Relig. c. 36. Homini quod artificis opera ipsi supremo orbis Ar-
tifici prætulerit, digna fuit pœna, deserto Opifice, operi adhærere. Ars,
consuetudo, affectus, & Regum leges Idololatriam promovère, & ad
posterum transulere. Sap. 14. Clem. Alex. Admon. ad Gentes, cum
olim sola Martis hasta in honore esset, accedente sculpturæ artificio,
novæ divinitates accesserunt, Regesque & privati fabularum fallitate &
vanitate perspectâ, Deorum sibi nomen asciverunt, cum sibi nihil ve-
rerentur ab hominibus qui Dii habebantur, *Affectis autem ipsos honore
& fabula & tempus: solent enim nescio quomodo ea quidem, quæ sunt
præsentia, despici propter consuetudinem; quæ autem sunt præterita, quia
propter incertitudinem temporis argui ac convinci non possunt, in honore esse.*
Et ut notat Lact. l. 1. c. 15. Qui Reges prioribus successerunt ad errorem plu-
rimùm contulerunt, cum, ut ex divinâ stirpe nati viderentur, parentibus
suis aut divinos honores detulerunt, aut deferri jussissent. Euseb. l. 1. de Præp.
c. 9. scribit ex ipsis Ethnicorum authoribus, ut Porphyrio, Diodoro, San-
chuniatone Phenice qui Trojanum excidium præcesserat, &c. Antiquos
Gentiles primùm sydera Deorum loco habuisse: nullasque ab eis consti-
tutas esse statuas: variaque malorum genera imprecatos esse in eos, qui vel
levissimum quid de Religione detraherent aut immutarent.

Varie species Idololatriæ.

PRO vario hominum affectu, ut notatum est, & variâ ingenii sub-
tilitate, variæ fuere Idololatriæ species, quas in Idololatrarum confutatio-
ne ex ipsismet referunt S. Justin. Athenagoras, Tertull. Orig. Minutius
Felix, Arnobius, & Lactantius.

Prima censeri potest, quæ ubique terrarum viguit, Deorum nempe &
Dearum Gentium cultus, Jovis, Saturni, & cæterorum Deorum, & Dea-
rum. Alia Idololatriæ species statui potest, cultus singularis defunctorum
animabus delatus. Tertia, præcipuis aut viris eximiis, dum viverent, adoratio
exhibita. Quarta eorum fuit, qui se unius Dei cultui addictos profitebantur,
simul & per plures illos Deos, qui in templis colendi proponerentur,
intelligere se, aut Dei virtutes, seu Attributa, aut virtutes humanas, aut

plures Dei ministros, aut ceremonias virorum illustrium memoriæ commendandæ idoneas. Quinta species fuit adoratio illa animantibus, aut rebus inanimatis, ut Soli, aut Statuis exhibita: Quas omnes Idololatriæ species sigillatim perstringemus, & probationes, quibus usi sunt antiqui, afferemus, non quoddam necessariæ sint: apud nos enim Dei beneficio superstitiones illæ non supersunt: sed ut nulla sit humanæ mentis aberratio, quæ nos lateat: nec ignorentur momenta, quibus in eorum confutatione fuerunt usi Patres antiqui: simulque fiat compertum, qui dominantis ubique ferme Religionis esset status, cum Christiana Religio cœpit propagari.

CONCLUSIO I. Ex iis quos delusa Gentium antiquitas Deorum loco habuit, nullus unquam fuit, qui vel levissimam divinitatis umbram assecutus fuerit, omnesque penitus fuere indigni qui Deorum numero ascriberentur, aut divinis honoribus colerentur.

1. Quia de eorum origine turpi, vitâ infami & sceleratâ, mutuis bellorum concertationibus, perjuriis, adulteriis, zelotypiis, calamitatibus, morte, &c. constabat ex ipsis authoribus Ethnicis, Homero, Hesiodo, aliisque ut urget S. Justin. Orat. ad Græcos; & quod gravius est Apol. ad Anton. refert Bacchi & Apollinis prædæstiam solemnitatibus seu mysteriis, quæ Bacchanalia dicebantur, fuisse consecratam.

2. Idem S. Justinus probat ex Deorum genealogiis. Si enim Dii verè extitissent, aut perpetuè, aut nunquam suscepissent filios: si perpetuè suscepissent filios, Deorum profectò numerus in infinitum excrevisset, & hominum multitudinem longè superasset. Si autem nunquam suscepissent, ad quid eorum genealogia? Aliud argumentum petit ex Deorum domiciliis quæ Poetæ sapius designant, hinc enim manifestè sequitur eos ubique terrarum minimè adfuisse. Ita Jovem in monte Ida statuit Homerus: & reverà obierat, cum in insulâ Cretensi ejus tumultus diceretur extare. 3. Refert juxta Hesiodum ex caho quasi Entium omnium primo Deos illos necessariò emergisse. 4. Ex Historicis contendit eos, qui tunc haberentur Dii, olim homines extitisse, ita Bacchum, omnium primum Ægyptiorum Regem. 5. Nihil aliud ferme crepant Historici veteres quam varia Deorum flagitia, nec non & turpissimas voluptates quibus fœdissimè servierunt. Addit S. Clem. Alex. Admon. ad Gentes, eos non censendos esse pro Diis, qui non tantum sceleribus, sed etiam vulneribus, ignorantia, morbis obnoxii fuerunt. Iis etiam rationibus subjungit Arnob. lib. 3. hos non esse Deos, in quibus sexûs varietas contingit, quod ex Cicero confirmat; cum enim Deus corporeus non sit, fieri nequaquam potest, ut in eo sexûs differentia reperiat. 2. Si Dii procreent, mulierum infirmitatibus Deæ subjacebunt, quod certè à divinitate alienum est; quod demùm corporeum esse deprehenditur, mortale necessariò est; ac idcirco prorsus ineptum & ridiculum esset, ejusmodi Diis vel minimam immortalitatis umbram adscribere. Idem probat S. Aug. lib. 8. de Civit. c. 26. Adde hominibus fuisse deteriores illos Deos, ut probat Clem. Alex. Admonit. ad Gent. Nullum enim est scelus quod Dii non patrarent. Solon & Lycurgus

Dij.

longè præstantiores fuere Diis, quorum cultui addicta erat antiquitas. Et ex ipsis authoribus Ethnicis, scilicet Pythagorâ, Platone in Timæo, Menandro, Hypolito, Sophocle, &c. præsertim ex Euripide probat S. Justin. lib. de Monarch. Deum esse non posse, qui non ab omni crimine sit alienissimus, qui homines à vitiis non avocet, qui hominum imperio & nutui subiaceat; indeque infert Ethnicorum Deos hoc nomine immeritò fuisse donatos, cum tot sceleribus coinquinati sordescerent, cum exemplo suo ad vitia homines provocarent, & impellerent, juvenum animos omni vitiorum genere imbuerent, & pro hominum arbitrio in statuis inclusi circumferrentur.

Insuper quomodo Dii essent, qui ab hominibus plurima, ipsammet divinitatem accipiunt. Ex S. Justin. in lib. de Monarch Dei Æsculapius & Apollo medicinæ artem à Chirone didicerunt; divinitatem quoque ab hominibus: Nam hi Deos sibi similes fingunt ex Minutio, Tertull. in Apol. *Verus erat decretum, ne Deus ab Imperatoribus consecraretur, nisi à Senatu probaretur. Facit & hoc ad causam nostram, quod apud vos de humano arbitratu divinitas pensetur. Nisi homini Deus placuerit, Deus non erit, homo jam Deo propitius esse debet.*

Denique Dæmones fuisse, qui Dii dicerentur, probat Minutius, qui cum vitiis dignitatem suam amiserint, ad solatium calamitatis sue non desinunt perditii perdere, & depravati errorem pravitatis infundere, & alienati à Deo inductis pravis Religionibus à Deo segregare. A Poëtis dicuntur Dæmones: Ex eis unus Socrati aderat, eique omnia referebat. Item ipse Minutius ex Hostanis celeberrimi Magi, & Platonis, & aliorum autoritate omnia Magorum opera, quæ mira videntur, Dæmonum lusus esse evincit. Et illi spiritus impuri sub statuis & imaginibus consecrati delitescunt, & afflatu suo, auctoritatem quasi præsentis numinis consequuntur, dum inspirantur interim vatibus, dum fanis immorantur, dum nunquam extorum fibras animant, avium volatus gubernant, sortes regunt, oracula efficiunt falsis pluribus involuta, nam & falluntur & fallunt, ut & nescientes sinceram veritatem, & quam sciunt in perditionem sui non confitentes. Ita etiam Lactant. lib. 2. c. 17. in eos Astrologiæ, Auguriorum, Nicromantiæ, Magiæ, Picturæ & imaginum, criminumque inventionem refert; Deorumque nomen ambitu asserit, non quòd aliquid de Deo detrahare velint, sed ipsis abundè satisfieri, modò homines ab immortalitate consequendâ avocent. Et lib. 4. c. 27. ait quòd à Christianis adjurati Dæmones se Deos Gentium confiterentur. Idèd autem Diabolus adorationem hanc ambiit, inquit Euseb. lib. 4. de Dæmonstrat. Evangel. c. 9. ut impleret illud: *Ero similis Altissimo.*

CONCLUSIO II. Defunctorum animæ Deorum numero annumerari non possunt; hæc est altera Idololatriæ species.

Duplex fuit defunctorum cultus; privata auctoritate colebantur Lares, qui alio nomine ob bonum omen, Manes vocabantur.

Publicâ auctoritate colebantur defunctorum animæ, quæ optimatum, aut populi, aut Imperatorum auctoritate in Deos referebantur, vel quòd

urbis conditores fuissent, vel quòd rebus præclarè gestis, aut aliâ ratione de hominibus benè meriti essent. De iis agunt Minut. Lactant. lib. 1. c. 15. S. Aug. lib. 8. de Civ. c. 26. Dii indigetes à Latinis vocabantur quasi Dii invocati.

Divinus cultus & divinitas deferri non debent mortuorum animabus: Nam ex S. Aug. Fortunat. quod est mutabile, peccato & ærumnis obnoxium, liberatoremque requirit, id sanè Deus esse non potest, nec quod creatum est creatori æquari. Et certè sibi debitum honorem aliis deferri non ferunt Imperatores: Necdùm ergò Deus divinos honores creaturis exhiberi patietur.

CONCLUSIO III. Principes, dum viverent, aut viri eximii divinis honoribus colendi non erant: atque hinc tertia Idololatriæ species refellitur.

Honores divinos ambierunt Principes, vel ut vitæ suæ consularent, vel ut existimationem singularem sibi apud populos conciliarent, vel demùm eò dementiæ prolapsi sunt, vano dignitatis suæ splendore excæcati, quales fuere Nabuchodonosor, Alexander Macedo, vel aliis de causis mox.

Hæc autem illorum sententia iisdem rationibus, quibus superiores, impugnatur; ad eamque refellendam satis esset referre quod Theocritus concubibus suis post Alexandri Magni obitum dixit: eos nempe bono animo esse debere; eùm Dii præmaturore, quàm homines, fato præriperentur. ita Clem. Alex. Admonit. ad Gentes.

CONCLUSIO IV. Confutantur Idololatriæ qui non Deos plures, sed varias virtutes, ut Dei partes, aut multos Deos ex unâ Dei substantiâ; seu divina Attributa quæ per illos Deos in Templis designarentur, divinis honoribus se colere asserabant, seque à plurium Deorum confessione longè abesse.

Hæc & quæ sequuntur conclusiones Ethnicorum Philosophorum argutiis impugnandis insumuntur. Hos enim Philosophos cùm Christianorum doctrina plurimum urgeret, aut ipsa ratio Idololatriæ insaniam tam apertè demonstraret: ne & rudioris ingenii homines ab antiquo popularique cultu avocarentur, varias subtilitates excogitarunt, ut patriam consuetudinem tuerentur, & ne scilicet præconceptam opinionem populi deponerent. Primum ergò ad allegorias confugere, dixeruntque se injuriâ accusari tam multiplicis Deorum cultûs: cùm externa cultûs species, quæ invaluerat, eorum multitudinem non argueret, sed varia Dei Attributa significaret, vel varias virtutes, quibus Deus homines instruit; aut varios Dei ministros, qui uni Deo subessent; aut tandem virorum duntaxat illustrium memoriam renovaret, ut posteri eorum exemplo ad imitationem & ad præclara facta excitarentur.

Varias Dei virtutes per orbem universum diffusas colere se & venerari testati sunt. Ita sit ut dum ejus, nempe Dei, quasi quadam membra carptim variis supplicationibus prosequuntur, inquit Maximus Madaurenf. ad S. Aug. Epist. quæ est 43. totum profecto colere videantur.

Ea etiam quorundam ex antiquis Ethnicorum Theologis fuit opinio;

cum referat S. Aug. lib. 6. de Civit. Dei c. 5. Theologiæ gentilis divisionem excerptam ex Varrone, qui eam triplicem faciebat, fabulosam Poëtarum, alteram Civitatum & Sacerdotum, tertiam Philosophorum. Priorem Varro, ut majestate Deorum indignam, eorumque naturæ adversam rejicit. Secundam exponit. Tertiam ad Philosophorum scholas remittit. Eusebius lib. 4. de Præp. cap. 5. aliam subtiliorum Ethnicorum Theologiæ divisionem refert quadripartitam: primam, quæ supremum Deum: 2. quæ minores Deos, quos lunam inter & cælum statuebant: 3. quæ Dæmones in aëre commorantes: 4. quæ Heroïum animas in terris versantes spectaret, diceretque, his Heroïbus, si boni, debita esse sacrificia; si verò improbi, offerenda esse quoque, ut placarentur.

Refelluntur 1. illæ Theologorum gentilium argutiæ, nempe varios, qui colerentur, Deos esse ex Dei substantiâ, seu varias Dei virtutes, aut Attributa, à S. Aug. lib. 4. de Civit. Dei c. 11. ubi parvulos, seu minores illos Deos ex Gentilium ipsorum sententiâ non esse Jovis partes demonstrat; si enim ita censerent Gentiles, uni Jovi divinum exhiberent honorem. *Quid enim ejus contemneretur, cum ipse coleretur? Si autem metuendum fuit ne pratermissa, sive neglecta partes ejus irascerentur, sequitur varias illas ex hypothesi Jovis partes, à se ipsis, ut à Jove, sejunctas & independentes haberi, utpotè in aliis atque aliis Diis Deabusque sparsas, cum aliâ sedatâ, altera gravi irâ incitaretur: unâ adversâ, esset alia propicia: Mulciber in Trojam, ut ait Ovidius, pro Trojâ staret Apollo.*

2. S. Aug. lib. 6. de Civit. c. 6. divisionem Theologiæ à Varrone laudatam nullam esse probat, cum ii qui in theatris exhiberentur Dii ut luderentur, iidem colendi in Templis proponerentur: & sic Templorum Dii à Poëtarum Diis alii non essent. *Nec alii videntur in theatris, quàm qui adorantur in Templis: nec aliis ludi exhibentur, quàm quibus victime immolantur.* Imò civilem Theologiam Diis graviolem inferre injuriam, quàm quæ Poëtarum esset, ait Cap. 10. *deteriora enim sunt templa ubi hæc aguntur, quàm theatra ubi finguntur.* Et ipse Seneca vehementius in civilem invehitur, quàm Varro in fabulosam. Probat idem S. Aug. Primates, seu, ut vocabant, majores Gentium Deos principatum suum sortitos non esse, quòd majori potestate pollerent, sed quòd augustiori, & ampliori cultu à populo afficerentur, & Poëtarum fabulis notiores fierent. Unde infert fabulosam Theologiam civili præstare, cum nihil haberet civilis, quod ei fabulosa non contulisset.

3. Divina Dei Attributa, dotes & perfectiones, nomine Jovis, Apollinis, aut aliorum hominum contaminanda non fuisse probat Orig. lib. 4. contra Cels. *Sed puram ergà Deum pietatem exercendo, & pulcherrima ejus opificia laudando, nec nomine tenus res divinas contaminamus approbantes Platonis in Philebo doctrinam nolentis voluptatem in Deorum album recipi.* Et Lactant. lib. 1. c. 4. absurdam probat eorum sententiam qui unum Deum, quem colere se profiterentur, nomine Jovis insignirent. 1. Quòd speciem quamdam Deo prorsus indignam animo

nomen Jovis objiciat ; utpotè cui Junonis & Minervæ filix cogitatio semper adhæreat. 2. Quòd Dii illi variis sceleribus contaminati nihil nisi sordidum menti subicere possint. Deniquè vel ipsum Jovis nomen nihil nisi abjectum & humile præ se fert , cum ex Cicerone juvenem patrem significet ; Dei autem non tantum juvare est , sed & vitam & omnia bona conferre.

Refelluntur 4. Ab Arnobio lib. 5. Quòd non soli Poëtæ , quæ de Diis circumferuntur commemorant , sed celeberrimi ipsorum historici , qui Deorum matrem ex lapidibus à Pyrrhâ & Deucalione , exacto diluvio post tergum projectis ortam asserunt ; Jovem matri vim inferre conatum ; undè & non semper fuisse Deos , eisdemque sceleratissimos extitisse constat. Idipsum etiam prodidere non Poëtæ tantum , sed & historici de eorumdem sacrificiis , puta Bacchanalibus , &c.

Toto acumine ingenii subtilioribus Ethnicis opus erat , ut quæ ex historicis & sacrificiis in Deos dedecora redundarent , diluere conarentur : Fingebant igitur , ut habet lib. 5. Arnob. historias illas & sacrificia iis probro non esse vertenda : utpotè quæ mysteria augusta tegerent , & nonnullis rationibus sublimioribus & mirandis niterentur : sique nec in cortice , nec in rerum involucris esse hærendum , sed ad sensus allegoricos & occultos transeundum. Itaque Jovem cum matre mixtum nihil obsceni significare , sed pluviam à Jove immissam designare , quæ terræ afferat fecunditatem.

Respondet ibidem Arnob. allegorias illas meras esse argutias , nec non inepta paulò callidioris ingenii commenta , quibus Sophistæ uti solent in judiciis , cum malam causam queri simul & obtinere contendunt ; ab iis enim non verum quæritur , sed species solum aliqua veri , ut minus attentâ mente res considerantium perstringant oculos ; cumque demùm hos pudeat genuini verborum sensûs , aut illorum apertæ significationis , horrendis illis Religionis suæ potentis honestum quemdam & speciosum titulum prætexere , & quâdam honestatis specie horrenda illa occultare , ac demùm honesto inhonestum obvelare tentarunt. Sed 1. ab iis quærit Arnobius , unde habeant Deorum suorum historiam sensu allegorico fuisse scriptam , cum nullum authoribus ipsis consilium fuerit ea quæ scriberent velandi ? Temerarios esse , qui eos consecuti sunt , quòd hominum oculis aperta esse nollent , quæ nunquam velata fuerant. 2. Penes quemlibet esse quam velit allegoriam Deorum historię affingere. Cum enim è rebus occlusis , omnis ista , qua dicitur , allegoria sumatur , nec habeat finem certum , in quo rei quæ dicitur sit fixa atque immota sententia , unicuique liberum est in id , quod velit attrahere lectionem & affirmare id positum , in quod eum sua suspicio & conjectura opinabilis duxerit. At , inquit , forsàn respondebitis vestras omnes historias sub allegoriis non latere. Praclara , inquit , subtilitas , cum quæ pars allegoriis contineatur , ab aliis distingui nequeat , nec certò statui possit infectum , quod ælum est. Quidquid profertur ex Deorum vestrorum historiis , & pudendum est , & Deos penitus dedecet : Licet enim Martis

& Veneris concubitus, vitiorum excidium, si vobis credatur, designet; duo certe menti objicit, alterum vestrâ quidem sententiâ honestum, alterum vero fœdissimum, quæ omnia tolerari nequeunt, cum quidquid Religionis est in omnibus etiam verbis, rebusque minimis, nonnisi honestam & venerabilem speciem animis exhibere par sit.

Euséb. lib. 2. de Præp. in præmio. Deorum historiam spiritali interpretatione non posse sic exponi, probat; quod qui primi de Diis scripserunt, summâ simplicitate Deorum naturam cultumque commendarent. Manetis historici Ægyptii autoritate utitur. Expositionem naturalem quam Philosophi fabulis affingebant, non meliùs Deorum historiam vindicare, lib. 3. de Præp. c. 1. demonstrat, quod in expositionibus illis sibiinetsipsis contrarij essent, & nihil incertius, nihilque fictitius esset quàm quod magno molimine proferrent; Plutarehus, inquit, Junonem modò terram, modò oblivionem, aliàs noctem, & matrimonium facit. Cap. 2. concludit Deum à rebus concretis distinctum non novisse Gentiles: Et c. 13. Si uni Deo adhæsisent, huic putum & idoneum cultum certissimè exhibuissent.

S. Greg. Naz. easdem rationes eloquenter congerit Orat. 3. quæ est 1. in Julianum, ostenditque Ethnicorum allegorias vanas penitus esse, nec ea quæ de Diis perhibentur videri Ethnicis fabulosa, cum illa tantis impensis in templis proponerent; idque ut verum certissimè haberi, quod tantis laudibus, totque honoribus divinis soleat à populis coli.

Respondabant Ethnici à Christianis damnari non posse Gentium ceremonias, nec expositiones allegoricas. Quandoquidem apud Christianos ceremonia, nec non expositiones allegoricæ usurparentur.

Reponit S. Greg. à Christianis usurpatas ceremonias nihil continere nisi quod esset laudabile, externâ specie veritatem adumbrare, & speciem externam nihil quidquam referre, nisi quod honestatem, & decorum saperet; Quod verò velarent non modò eximium esse, sed mirandum omninò velutique præclarum corpus aptissimis ornatum vestibus; *Nec enim, inquit, ullo modo res divinas sub specie turpi delitescere, Disque adscribere quæ homines sibi imputari non paterentur.* Et in signis sacris addit requiri, ut ad significandum idonea sint, & ab omni dedecore, seu inhonestâ specie removeantur, ita ut eruditis possint placere & longè absint à nocumento infirmis ferendo. Quod Gentilium ceremoniis vitio jure & merito vertebatur, ut quæ non nisi indigna quibus fides haberetur occultarent. Quæ verò sensibus objiciebant, scelera referebant, & sic incitamento erant spectatoribus ad scelera, sceleribusque autoritatem oppresso pudore conciliabant. Quod iterum probat Orat. 23. Item S. Greg. Nyss. Orat. 10. Hasque expositiones allegoricas ab Idololatriis recens excogitatas pro recentis Idololatriæ figmento subjungit esse habendas.

CONCLUSIO V. Virtutes humanæ Deorum nominibus non sunt insigniendæ; hæc erat altera obtegendæ & excusandæ Idololatriæ excogitata ratio.

1. Aïnob.

1. Arnob. l. 3. ait, Virtutes humanas Dñs non esse tribuendas, nec Deorum nominibus appellandas, nec honoribus divinis prosequendas: *Quis dixerit Deum fortem, constansem, frugi, sapientem? Quis probum? quis sobrium? quis imò aliquid nosse? quis intelligere? quis providere? quis ad fines officiorum certos actionum suarum decreta dirigentem? Humana sunt hac bona, & ex oppositione vitiorum existimationem meruerunt habere laudabilem; quis est autem tam obtusi pectoris, tam bruti, qui humanis bonis Deum esse dicat magnum? aut ideò nominis maiestate præcellere, quòd vitiorum careat fæditate? Quidquid de Deo dixeris, quidquid tacita mentis cogitatione conceperis, in humanum transiit & corrumpitur sensum: nec habet propria significationis notam quod nostris dicitur verbis atque ad negotia humana compositis; unus est hominis intellectus de Dei naturâ certissimus, si scias & sentias nihil de illo posse mortali oratione depromi. Et o. 4. Idem probaturus, ab Ethnicis, & præcipuè à Romanis quærit, num pietatem, concordiam, & alias virtutes, quibus altaria erigerent, vim divinam habere, & in cælis commorari censerent? Si enim nomina nuda sunt, quæ Deos: reverâ non designent, Deos irridere est, figmenta ipsis æquare: quòd si Deos esse existiment, quomodò id probent, postulat. Nos enim, nisi fortè communem tollitis nobis, atque eripitis sensum, nihil horum sentimus, ut cernimus habere vim numinis, neque in aliquâ contineri sui generis formâ: sed esse virtutem viri, salutem salvi, honorem honorati, victoris victoriam, concordis concordiam, pietatem pii, memoriam memoris, feliciter verò viventis ac sine ullis offensionibus felicitatem.*

2. Statuit Lactant. lib. 1. cap. 10. Virtutes extra hominem in honore haberi non posse: cum ab illo avelli non possint, nec sint uspiam ab homine separata; verumque honorem virtuti exhiberi, cum ipsa possideatur; si autem sunt extra hominem: *Quid opus est ea colere quibus careamus? Virtus colenda est, non sacrificio aliquo, aut thure, aut precatatione solenni: sed volumine sobriâ atque proposito; nam quid est aliud colere virtutem, nisi comprehendere animo & tenere, quod unusquisque, simul ac caput velle, consequitur. Hic solus virtutis est cultus: nam religio & veneratio nulla alia nisi unius Dei tenenda. Quod ab homine separari nequit, nec ab eo avulsum existere, id Deus censeri nequit, nec divino honore donandum, cuiusmodi sunt virtutes humanæ, &c. Addit veros virtutis esse cultores, qui eâ præditi sunt; colum enim thure & summis digitis quæ sensibus intimis colere debuerunt.*

CONCLUSIO VI. Plures Deos velut plures ministros uni Deo subditos divinis honoribus colere fas non erat. Qui tertius est error eorum, qui Idololatriam hanc pietatis specie obvelabant.

1. Qui divinis honoribus afficiuntur, vel omnem divinitatis habent rationem, vel tantummodò aliquem ejus gradum; omnem autem rationem divinitatis non obtinent Dii minores; non enim essent plures: Neque etiam quemdam duntaxat divinitatis gradum, qui divinum cultum mereatur, sunt consecuti; nam ut rectè docet Tertull. contra Hermog. c.

7. *Divinitas gradum non habet*, *utparè unica*. Ergò solus unus Deus divino cultu est colendus : cum cultus divinus nonnisi Deo sit exhibendus.

Arnob. lib. 1. Eosdem Ethnicos refellens, qui Jovem, ut supremum Deos verò alios, ut ipsi subditos, assererant; probat Jovem inter Deos principatum illum obtinere non posse; cum & ab avis & atavis sit oriundus: ergò & fictitius est ille primarius Deus: ergò & fictitia minorum illorum Deorum multitudo: cum divinitas una sit & indivisa.

CONCLUSIO VII. Refellitur sententia subtiliorum Ethnicorum, qui Deum unicum colere se profitebantur: sub reliquorum verò Deorum nominibus, virorum illustrium memoriæ debitum deferre honorem, ut ad eorum æmulationem posteros excitarent.

Idoneis honoribus quidem honoranda virorum illustrium memoria; divinus autem, qui illis habetur honor, penitus non convenit. Deus enim solus, ut jam dictum est, adorandus est: nec homines adeò sunt instituti, ut aliorum hominum adorationi proponantur: Sicut enim Reges aut Cæsares subditis suis Regum aut Cæsarium nomen & honorem deferri nolunt; ita nec Deus etiam patitur suum nomen ac cultum communicari. Sic Theoph. Antioch. lib. 1. Nec penes homines est mortuorum animabus Deorum aut Dæmonum nomina attribuire, easque divino honore dignas habere, quòd vitæ suæ merito quamdam auctoritatem à supremo Deo præstandorum hominibus hic vitam agentibus officiorum consecuti sint facultatem. Ita etiam Clem. Alexandr. lib. 6. Strom.

Obiciebant Ethnici cultum, quem minoribus Diis aut hominibus illustribus exhiberent, à Christianis inculari non posse: cum ipsi alium à summo Deo, nempe Christum, divino honore colerent.

Respondet huic objectioni Origen. l. 8. contra Celsum, summum esse inter Deos & Christum discrimen. Primò quia Scripturæ Sacræ eundem Patri & Christo debitum cultum docent. 2. Quia Pater & Filius, ex iisdem Scripturis, unum sunt, seu unus & idem Deus, &c. 3. Quia Filius est æternus, qui est ipsa veritas.

CONCLUSIO VIII. Creaturis inanimatis, ut Soli & syderibus divinus cultus non est exhibendus. Hæc est ex Idololatriæ speciebus altera, quæ quidem olim Solis adoratio & temporibus Mosis invaluerat, ex cap. 4. Deut. v. 19. & Job. 31. v. 26. & 27. fuitque inter primas Idololatriæ species, ex Sap. 13. v. 2.

In refellenda hac opinione non est immorandum: cum nemo non videat creaturas irracionales, sensu & vitæ destitutas divino cultu ipsis hominibus longè esse indigniores.

CONCLUSIO IX. Nec Statuis (quod apud antiquos solemne erat) divinus honor debetur. Hæc est alia Idololatriæ species.

Priusquam ad probationes veniamus, de origine & Statuarum inauguratione paucis est agendum.

Statuis & Statuarum cultui originem dederunt Patris Filio orbatu lu-

Etus Sap. 14. v. 15. hominum longè distitorum desiderium, & eorumdem ex iis regionibus allatæ statua.

Ex Lact. lib. 2. c. 11. Prometheus Jovis temporibus fuit primus simulachrorum adinventor, ut qui de pingui & molli humo hominis formam finxerit; ejusdemque ævo Statuis primùm templa constitui, & novi Deorum cultus esse cæperunt. Euseb. lib. 1. de Præparat. c. 9. Statuas recentes esse probat, & propagatam Statuarum arte Idololatriam, quod & habetur Sap. 14. v. 18.

Divinitatem consequi existimabantur Statuæ ex ornatu, consecratione, & ex arbitrio hominum. Minut. Felix in Octavio. Ecce funditur, fabricatur, senlpitur, nondum Deus est. Ecce plumbatur, construitur, origitur, nec adhuc Deus est: Ecce ornatur, consecratur, oratur, tunc postremo Deus est, cum homo illum voluit & dedicavit. Arnob. lib. 7. de semetipso sermonem habens. Si quando conspexeram rubricatum lapidem, & ex olivi unguine sordidatum, tanquam inestis vis præsens adulabar, affabar, & beneficia poscebam: Nihil sentiente trunco, & eos ipsos divos, quos esse mihi persuaseram, afficiebam contumeliis gravibus, cum eos esse credebam ligna, lapides, atque ossa, aut in hujusmodi rerum habitare materia. Lib. 6. refert Ethnicorum responsum, qui se nec colete materiam, nec pro Diis Statuas habere profitebantur, se se in his Deos colere, quos dedicatio, ut habet, infert sacra; & fabrilibus efficit inhabitare simulachris.

Duplex fuit de Statuis Ethnicorum sententia. Subtiliores, de quibus Arnob. lib. 9. & Cell. apud Orig. lib. 6. & 7. Statuas divino non affici cultu asseruerunt, earumque usum fuisse institutum ad Dei exhibendam præsentiam, & ad cultum numinis certo ritui constituendum. Ita Julianus Apostata in operibus editis: Nam Statuas, inquit, ipsas, & aram nec non eterni custodiam ignis, & ut uno verbo dicam, cetera omnia, id genus Deorum præsentia signa majores nostri constituerunt: Non ut ista Deos esse credamus; sed ut ipsos per illa veneremur. Et enim quoniam nos in corpore degentes consentaneum corpori cultum adhibere Diis oportebat, iidem porro corporis sunt expertes, primum illi nobis simulachrorum genus ostenderunt, nempe secundum à primo Deorum ordinem, qui circum caelestes orbis assidue volvitur; sed cum ne istis quidem corporeus cultus attribui possit; nam suapte naturâ nullius rei indigent; tertium in terris simulachrorum genus est inventum, ad quod cultum nostrum accommodantes, Deos nobis propitios reddemus. Sic, inquit, qui elaboratam Imperatoris effigiem venerantur, eam ipsum esse Imperatorem non existimant, licet Imperatoris nomine, appellent. Alii autem Ethnici, quorum numerus erat amplissimus, plebemque ferme omnem complectebatur, pro veris Diis Statuas habebant, aut in iis Deos versari & delitescere, Sap. 13. v. 17. Baruch. 6. v. 40. censebant; ut etiam ex infra citandis fiet compertum.

Utraque tum rudiorum, tum subtiliorum de Statuis sententia refellitur.

1. Absurdam fuisse omninò Statuas esse Deos existimantium sententiam, iisque divinum honorem deferentium, docet Sap. 13. v. 10. *Infelices autem sunt, & inter mortuos spes illorum est, qui appellaverunt Deos opera manuum hominum, aurum & argentum, aereis inventionem, & similitudines animalium, aut lapidem inutilem opus manus antiquæ, &c.* Et v. 13. fortunam suam & soliditatem artificii debere Statuas, & esse sine animâ, nihilque conferre posse: *Assimiles illud imagini hominis, aut alicui ex animalibus illud comparet, perliniens rubricâ, & rubicundum faciens fuco colorem illius, & omnem maculam quæ in illo est perliniens: & faciat ei dignam habitationem, & in pariete ponens illud, & confirmans ferro, ne forè cadat, prospiciens illi, sciens quoniam non potest adjuvare se: imago enim est, & opus est illi adiutorium.* Et de substantiâ suâ, & de filiis suis, & de nuptiis votum faciens inquit. *Non erubescit loqui cum illo, qui sine animâ est: & pro sanitate quidem infirmum deprecatur, & pro vitâ rogat mortuum, & in adiutorium inutilem invocat: & pro itinere petit ab eo, qui ambulare non potest: & de acquirendo, & de operando, & de omnium rerum eveni-
tu petit ab eo, qui in omnibus est inutilis.* Et c. 5. v. 17. probatur. Iplis operibus suis præstare artificem, quia vivit ipse, & ejus opera vitâ destituuntur. Idem probatur ex Baruch. 6. Quia nec loqui possunt Statuæ, nec boni quidquam conferre, nec avertere mala, nec latronum manus effugere. Quia in illis nihil occurrit, quod aut artificibus, aut sacerdotibus, qui statuas coronis aureis, & aliis vestibus exornant, non sit tribuendum.

2. Arnob. lib. 6. ab Ethnicis quaerit, num Deos in cœlis esse existent, an extra cœlos? Si primùm; eos ergò esse ad quos dirigendæ sint preces, & sic Statuas inutiles esse: Si verò dubitent, num à cœlo Dii absint, rerum incertarum Statuas non esse erigendas. Demonstrat autem vanam hanc Ethniconum subtiliorum esse rationem, nempe idè Statuas confici, ut præsentia quædam numinis per simulacra exhiberetur: & quia Deos videre non datum est: eos sic coli, iis & munia officiosa præstari, hoc qui dicit & asserit, Deos esse non credit: nec habere convincitur suis Religionibus fidem, cui opus est videre quod teneat, ne inane forè sit, quod obscurum non videtur. Deos, inquit, per simulacra veneramur. Addit esse incertum, num hæ Statuæ veras Deorum formas exhibeant; imò certò alterius & diversæ figuræ proponi; nam ad humanam formam sol orbicularis excuditur: & sæpiùs absurda penitus est eorum forma. v. c. Jupiter Ammon cornua gerens, & Venus omninò nuda, oculis proponuntur; vestibus tantummodo mutatis, Dei nomen mutatur nihil verò magis à ratione alienum, quàm coram opere suo prosterni.

Contendebant subtiliores Ethnici Statuarum beneficio Deos præsentem fisci, utpotè quòd Statuas inhabitarent; & licet in illis non includerentur, earum rudiori populo religiosum timorem incuti, & debitam Diis venerationem suaderi.

Reponit Arnob. fieri non posse, ut Bacchus v. c. qui sub specie humanâ oculis objectus sit, tot & tam variis in locis adesse existimetur.

2. timorem religiosum Bacchi Statuâ non inferri; nihil enim, quod non ad hilarem comotationem induceret, Bacchi simulachrum exprimebat. 3. Illis Statuis adeò non comprimi vitia: cùm vel ipsum innocentiae nomen penitus obscuratum & oppressum esse constaret. Scitè nos monet Lactant. lib. 2. c. 2. absurdum penitus fore, ut amicus unam amici imaginem attento animo intueretur, dum amicus ipse adesset; si ergò ubique interesset Dii credantur, coram eorum Statuis non utique orandum est, sed ad Deos solos attendendum. Denique, ut prudentissimè observat Athenagoras in Apolog. (& quod plurimùm valet ad confutandum subtiliorum Idololatriarum commentum) Cultus ille censurâ eximi non potest, qui in errorem naturâ suâ inducit; plures autem & penè infiniti, Deorum materiam à Diis, qui spiritualiter inesse aut designari existimantur, minimè secernunt; non dijudicant plerique quid materia sit: Quid Deus: & quantum utrimque intervalli pateat.

Hæc nullatenus ad cultum imaginibus à Concilio septimo delatum pertinere faciliè animadvertet, qui hanc Ethnicorum sententiam, & Ecclesiæ Catholicæ de cultu sacrarum imaginum doctrinam animo complexus fuerit, quam in Tract de Incarn. exponemus. Nec enim pro Deo, aut pro Sanctis, imagines illas habent Christiani, aut aliquid posse conferre, aut aliquâ virtute polleere censent; nec ab illis aliquid auxiliû quærunt, vel in ipsis fiduciam figunt & collocant: Sed qui exhibetur eis honos, ad prototypa quæ representantur, refertur; ad conspectum earum imaginum, quas osculamur, & coram quibus caput aperimus & procumbimus, Christum adoramus: & Sanctos, quorum illarum similitudinem gerunt, veneramur.

Conc. Nic. 2.
A. d. 4.

Undè summam diligentiam jubentur adhibere Pastores, ut ab alio sensu, & existimatione, & superstitioso cultu populum alioquin rudiorum suis institutionibus avocent: & doceant alio fine imagines non proponi, nisi ut in Sanctorum memoriam nos revocent, ad eorum imitationem, simulque ad meritum exhibendum eis honorem sint incitamento.

Sess. 25. Conc.
Trid.

CONCLUSIO ULT. Cultus quilibet apud Ethnicos solemnissimus, seu qui pro objecto haberet Deos Gentium, aut animas defunctorum, aut homines, dum viverent, &c. Fuit semper horrendus, inhonestus, absurdus, inhumanus & impius; & proinde, quidquid in ejus gratiam proferant Gentiles, excusanda Idololatriæ causâ, nihil penitus conficiunt.

1. Cultum qui apud Ethnicos invaluit, horrendum, & insanum fuisse S. Clem. Alex. Admonit. ad Gent. probat, Quòd eorum ceremoniæ essent fœdissimæ; cum partes humani corporis præ pudore minimè nuncupandas impudenter Ethnici colerent; quòd adulteria, hominum constuprationes, homicidia, quæ in theatris ludébantur, in ceremoniis venerationi proponerentur. Demonstrat S. Greg. Naz. Orat. 39. horrendas adeò eorum esse ceremonias & absurdas, ut gravior illis Idololatriæ pœna infligi non potuerit, additque eas ludibrio Gentiles magis exponere quàm ipsos Deos. Ostendit S. Aug. lib. 1. de Civit. Dei c. 32. Ro-

1. Absurdam fuisse omnino Statuas esse Deos existimantium sententiam, iisque divinum honorem deferentium, docet Sap. 13. v. 10. *Infelices autem sunt, & inter mortuos spes illorum est, qui appellaverunt Deos opera manuum hominum, aurum & argentum, artis inventionem, & similitudines animalium, aut lapidem inutilem opus manus antiquæ, &c.* Et v. 13. *fortinam suam & soliditatem artifici debere Statuas, & esse sine animâ, nihilque conferre posse: Assimilet illud imagini hominis, aut alicui ex animalibus illud comparet, perliniens rubricâ, & rubicundum faciens fuco colorem illius, & omnem maculam quæ in illo est perliniens: & faciat ei dignam habitationem, & in pariete ponens illud, & confirmandum ferro, ne fortè cadas, prospiciens illi, sciens quoniam non potest adjuvare se: imago enim est, & opus est illi adiutorium. Et de substantiâ suâ, & de filiis suis, & de nuptiis eorum faciens inquit. Non erubescit loqui cum illo, qui sine animâ est: & pro sanitate quidem infirmum deprecatur, & pro vitâ rogat mortuum, & in adiutorium inutilem invocat: & pro itinere petit ab eo, qui ambulare non potest: & de acquirendo, & de operando, & de omnium rerum evenitu petit ab eo, qui in omnibus est inutilis.* Et c. 5. v. 17. probatur. Iplis operibus suis præstare artificem, quia vivit ipse, & ejus opera vitâ destituuntur. Idem probatur ex Baruch. 6. Quia nec loqui possunt Statuæ, nec boni quidquam conferre, nec avertere mala, nec latronum manus effugere. Quia in illis nihil occurrit, quod aut artificibus, aut sacerdotibus, qui Statuas coronis aureis, & aliis vestibus exornant, non sit tribuendum.

2. Arnob. lib. 6. ab Ethnicis quaerit, num Deos in cœlis esse existiment, an extra cœlos? Si primum; eos ergo esse ad quos dirigendæ sint preces, & sic Statuas inutiles esse: Si verò dubitent, num à cœlo Dii ab sint, rerum incertarum Statuas non esse erigendas. Demonstrat autem vanam hanc Ethnicorum subtiliorum esse rationem, nempe idè Statuas confici, ut præsentia quædam numinis per simulacra exhiberetur: & quia Deos videre non datum est: eos sic coli, iis & munia officiosa præstari, hoc qui dicit & asserit, Deos esse non credit: nec habere convincitur suis Religionibus fidem, cui opus est videre quod teneat, ne inane fortè sit, quod obscurum non videtur. Deos, inquit, per simulacra veneramur. Addit esse incertum, num hæ Statuæ veras Deorum formas exhibeant; imò certò alterius & diversæ figuræ proponi; nam ad humanam formam sol orbicularis excuditur: & sæpiùs absurda penitus est eorum forma. v. c. Jupiter Ammon cornua gerens, & Venus omnino nuda, oculis proponuntur; vestibus tantummodo mutatis, Dei nomen mutatur nihil verò magis à ratione alienum, quàm coram opere suo prosterni.

Contendebant subtiliores Ethnici Statuarum beneficio Deos præsentem sisti, utpotè quòd Statuas inhabitarent; & licet in illis non includerentur, earum rudiori populo religiosum timorem incuti, & debitam Diis venerationem suaderi.

Reponit Arnob. fieri non posse, ut Bacchus v. c. qui sub specie humanâ oculis objectus sit, tot & tam variis in locis adesse existimetur.

1. timorem religiosum Bacchi Statuâ non inferri; nihil enim, quod non ad hilarem comotationem induceret, Bacchi simulachrum exprimebat. 3. Illis Statuis adeo non comprimi vitia: cum vel ipsum innocentia nomen penitus obscuratum & oppressum esse constaret. Scitè nos monet Lactant. lib. 2. c. 2. absurdum penitus fore, ut amicus unam amici imaginem attento animo intueretur, dum amicus ipse adesset; si ergo ubique interesse Dii credantur, coram eorum Statuis non utique orandum est, sed ad Deos solos attendendum. Denique, ut prudentissimè observat Athenagoras in Apolog. (& quod plurimum valet ad confutandum subtiliorum Idololatriarum commentum) Cultus ille censurâ eximi non potest, qui in errorem naturâ suâ inducit; plures autem & penè infiniti, Deorum materiam à Diis, qui spiritualiter inesse aut designari existimantur, minimè fecerunt; non dijudicant plerique quid materia sit: Quid Deus: & quantum utrimque intervalli pateat.

Hæc nullatenus ad cultum imaginibus à Concilio septimo delatum pertinere facile animadvertet, qui hanc Ethnicorum sententiam, & Ecclesiæ Catholicæ de cultu sacrarum imaginum doctrinam animo complexus fuerit, quam in Tract de Incarn. exponemus. Nec enim pro Deo, aut pro Sanctis, imagines illas habent Christiani, aut aliquid posse conferre, aut aliquâ virtute pollere censent; nec ab illis aliquid auxilii quærunt, vel in ipsis fiduciam figunt & collocant: Sed qui exhibetur eis honos, ad prototypa quæ repræsentantur, refertur; ad conspectum earum imaginum, quas osculamur, & coram quibus caput aperimus & procumbimus, Christum adoramus; & Sanctos, quorum illarum similitudinem gerunt, veneramur.

Conc. Nic. 2.
Añ. 5.

Undè summam diligentiam jubentur adhibere Pastores, ut ab alio sensu, & existimatione, & superstitioso cultu populum alioquin rudiores suis institutionibus avocent: & doceant alio sine imagines non proponi, nisi ut in Sanctorum memoriam nos revocent, ad eorum imitationem, simulque ad meritum exhibendum eis honorem sint incitamento.

Sess. 25. Conc.
Trid.

CONCLUSIO ULT. Cultus quilibet apud Ethnicos solemnissimus, seu qui pro objecto haberet Deos Gentium, aut animas defunctorum, aut homines, dum viverent, &c. Fuit semper horridus, inhonestus, absurdus, inhumanus & impius; & proinde, quidquid in ejus gratiam proferant Gentiles, excusandæ Idololatriæ causâ, nihil penitus conficiunt.

1. Cultum qui apud Ethnicos invaluit, horridum, & insanum fuisse S. Clem. Alex. Admonit. ad Gent. probat, Quod eorum ceremoniæ essent sceleratissimæ; cum partes humani corporis præ pudore minimè nuncupandas impudenter Ethnici colerent; quod adulteria, hominum constuprationes, homicidia, quæ in theatris ludebantur, in ceremoniis venerationi proponerentur. Demonstrat S. Greg. Naz. Orat. 39. horridas adeo eorum esse ceremonias & absurdas, ut gravior illis Idololatriæ pœna infligi non potuerit, additque eas ludibrio Gentiles magis exponere quam ipsos Deos. Ostendit S. Aug. lib. 1. de Civit. Dei c. 32. Ro-

manorum Deos esse pessimos, ut qui ludos Scenicos, utpotè penitus obscenos in sui honorem exegissent, dum peste urbs laboraret; Naticam, qui eos, quò depravandis hominum moribus tantùm inservirent, abrogasset, divino honore longè digniorem fuisse, quàm Deos illos obscenitatis tam horrendæ authores. Lib. 2. c. 9. & 12. scribit etiam tam impudentes fuisse Scenicos Ludiones, ut quominus de civium famâ detraxerent, interpositâ mortis pœnâ, prohibere Senatus fuerit coactus. Hinc colligis Dii sapientiâ præstare Senatores; cum ipsi Dii adulteria & alia sua scelera in ludis illis omnium conspectui exhiberi vellent, sicque in auctoritatem adduci. Puderet hîc referre, quæ in Bacchanalibus aliisque mysteriis fieri solebant.

2. Absurdum fuisse cultum illum, utpotè qui solis fabulis niteretur, probant S. Clem. Alex. Adm. ad Gent. & Minut. in Octav. ubi de eâ, quæ apud Ægyptios quondam vigebar, in honorem Isis celebritate, in quâ qui aderant, luctus edebant ingentes. *Nonne, inquit, ridiculum est, vel lugere quod colas, vel colere quod lugeas.* Quod etiam Romani in Cereris mysteriis, & Galli, quòd Cibeles adulterum suum Eunuchum fecisset, à turpi cum ea commercio abhorentem, lacerabant. Propter hanc fabulam Galli eam (Cibelem) & semiviri sui corporis supplicio colunt, hæc jam non sunt sacra, sed tormenta. Lactant. lib. 10. c. 21. Nihil absurdius esse & insanius scribit cultu illo, qui hominum immolatione contaminaretur. Quid illis isti Dii amplius facere possent, si essent iratissimi, quàm quod faciunt propitii; cum suos cultores parricidiis inquinant, orbitatibus mactant, humanis sensibus spoliant? quid potest esse his hominibus Sancti? Lib. 5. c. 20. nihil absurdius, quàm in templis colere quod in theatris luderetur.

3. Inhumanum cultum illum fuisse probatur, quòd homines immolarent, ut ex Lactant. retulimus & Sap. 14. v. 23. *Aut enim filios suos sacrificantes, aut obscura sacrificia facientes, aut insanie plenas vigiliis habentes, neque vitam, neque nuptias mundas jam custodiunt, sed alius alium per invidiam occidit, aut adulterans conristas, & omnia commissa sunt, sanguis, homicidium, furtum & fictio, corruptio & infidelitas, turbatio & perjurium, Dei immemoratio, animarum inquinatio, natiuitatis immutatio, nuptiarum inconstancia, inordinatio mæchie & impudicitie.*

4. Cultus illius impietas probatur ab Euseb. lib. 6. de Præp. c. 4. Quòd Deos, quos colerent, criminum & scelerum authores facerent; omnium autem gravissima impietas sit, Deum scelerum authorem facere.

Ultimò cultus ille ad nihil aliud erat idoneus, quàm ad plebem in errorem inducendam, ut ex Athenag. fuit observatum. Vix enim plebs materiam, à rebus spiritualibus quæ designantur, secernit, nisi summo studio edoceatur. Ex S. Aug. lib. 1. de Civit. c. 10. Ethnicorum ceremoniæ, quæ Deorum scelera proponebant, à Dæmonibus adinventæ fuerunt, *Ut ad scelestæ & turpia perpetranda velut ab ipso celo tra-*

duci in terram satis idonea videntur auctoritas. c. 25. Ne imitari talia crimina civica trepidaret affectio, sed potius humanum scelus divino excusaretur exempla. Sic apud Terentium, ut habet c. 7. Adolefcens adulterium sibi proponit, quod Jovem idem scelus perpetrantem in imagine conspexisset. Ex quibus compertum fit quàm grave crimen Idololatria fuerit, Undè meritò Tertull. lib. de Idololat. c. 1. Principale crimen generis humani, summus seculi reatus, tota causa judicii, Idololatria. Et sæpiùs probat omnia scelera Idololatriam continere, homicidium videlicet, cum hominem Diis immolet, & adulterium, cum ipsum laudet. S. Greg. Nyss. Orat. 8. omnium scelerum gravissimum ait esse Idololatriam. Idololatre duplici tenentur impietate: priore quidem, quâ cum qui Deus est ignorant, eum, inquam, qui verè est Deus, non agnoscen-tes: alterâ & secundâ, quâ per eum errorem, eos qui non sunt, esse existimant: & eos Deos nominant, qui non sunt verè; imò verò ne sunt quidem, sed solum nomen obrirent. Omnium scelerum originem Idololatriæ tribuit. Sap. c. 14. Infandorum enim Idolorum culmen omnis mali causa est, & initium & finis. Nec prodest ad Idololatrarum excusationem, quod in Poetas referantur, & crimina, & mysteria horrenda Deorum; cum nunquam talia de iis vulgari prohibitum fuerit; &, ut habet Arnob. lib. 4. Quisquis enim patitur peccare peccantem, is vires subministrat audacia: & majoris contumelie res est, falsis quæquam notare atque insignire criminibus, quàm vera ingerere atque objectare delicta; quod enim scis dici, quod esse te sentias, morsum habet minorem testimonio tacite recognitionis infractum; illud verò acerbissimè vulnerat, quod inuritur innoxio, & quod decus nominis atque existimationis infamat.

OPPON. 1. Divino honore dignos esse Deos, utporè qui fortis humanæ auctores sunt & arbitri; quorum cultus est antiquissimus: qui pœnis, quas ab illusoribus Diis susceperunt, simul & oraculorum, auguriorum, plurimorumque miraculorum auctoritate confirmatus est. Ita Cæcilius apud Minut. contendens, præsertim quod institutus ille Deorum cultus fuerit, aut ut averterentur mala, quæ irati Di fuerant, interminati: aut ut gratiarum actiones ob beneficia accepta rependerentur. varia autem exempla affert Cæcilius, quibus Deorum majestas & potestas asseratur.

R. 1. S. Aug. lib. 2. de Civit. c. 23. humanæ felicitatis auctores Deos non esse: cum vel ii, qui eorum cultui maximè fuerunt addicti, ut Regulus, Cato, &c. gravissimis malis oppressi perierint; è contrâ verò qui eos maximè despexerunt, ut Sylla & Marius, summam potestatem obtinuerint, & prosperâ fortunâ fuerint usi.

Respondet 2. Minutius Felix à Diis Gentes prosperitatem non accepisse, v. c. Romanos imperii amplitudinem Diis non debere, ut quod latrocinio & audaciâ fuerat comparatum; nec pietatis nomine templorum everisionem, Deorum expoliationem, sacerdotum unimolationem obvelari posse. Diis victis cum immolarent Romani, Diis ipsis insula-

bant, inquit, & sacrilegia sua consecrabant; sicque Romanos sibi gradum ad autoritatis culmen stravisse non Deorum cultu & veneratione, sed sacrilegiorum impunitate; nec dubium est, ut habet, quin suis præsto fuissent Dii, si quâdam autoritate valuissent.

R. 3. Cum Min. Fel. Idololatriæ minimè patrocinari antiquitatem; cum & scelerati, & tot libidinibus infames fuerint Dii: eorum quidem defensores fuerunt numero plures; sed furentium multitudo est tantum communis furoris defensio. Lact. l. 2. c. 8. *Quare cum sapere, id est veritatem querere omnibus sit innatum, sapientiam sibi adimunt, qui sine ullo iudicio inventa majorum probant, & ab aliis pecudum more ducuntur; sed hoc eos fallit, quod majorum nomine posito, non putant fieri posse, ut aut ipsi plus sapiant, quia minores vocantur, aut illi despiciant, quia majores nominantur.*

R. 4. Minutius Felix ex auguriis in gratiam Deorum nihil posse repeti; cum Regulus & Paulus & plurimi alii, quibus augures fausta portendebant, fuerint infelices: è contra verò, qui auguria neglexerant, ut Cæsar, dum in Africam trajiceret, victoriam nihilominus retulerit.

R. 5. Minutius argumento ex oraculis petito: 1. Oracula esse inutilia, ab illisque deceptum Amphiaræum nescivisse se ab uxore proditum iri. Item & Apollinem Pythium nihil aliud quam ambigüe respondisse, & de oraculorum ambiguitate conquestum fuisse Demosthenem. 2. Si ab illis prædicta aliquando evenerint, illud aut casu contigit, aut operâ spirituum immundorum, qui sub Statuis & imaginibus delitescabant consecratis, & afflatu suo autoritatem quasi præsentis nominis consequuntur, inquit, dum inspirantur, dum fanis immorantur, dum nonnunquam errorum fibras animant, avium volatus gubernant, sortes regunt, oracula efficiunt falsis pluribus involuta, nam & falluntur & fallunt, ut & nescientes sinceram veritatem, & quam sciunt in perditionem suâ non confitentes. Ita S. Cypr. de Idol. vanit. Arnob. lib. 4. Lactant. lib. 4. c. 27. oraculorum vanitatem demonstrat, ostendit eorum auctores esse Dæmones eorumque impotentiam evincit inde, quod silerent & fugerent ubi adesset Christianus. Idem probat Euf. lib. 4. de Præp. c. 1. ubi ait Templorum Sacerdotes à Romanis ad quæstionem adactos scientiam suam esse impostorum artem fuisse falsos; idemque à Philosophis, ut à Chrysippo probatum, & à pluribus aliis, quorum autoritatem refert. Idem probat l. 5. & oracula jceleberrima expendens contendit à Deo non fuisse reddita, sed à Dæmonibus; cum cruenta, ambigua, dolosa, obscura, gravissimorumque bellorum causa & origo fuerint; nihil seriò, nihil quod honestati & virtuti conducere proponerent: imò & partibus injustis, ut Tyrannis, faverent, aliisque viris improbis.

Opponebant Gentiles, ejusdem esse autoritatis vates suos ac Judæorum Prophetas: & utrisque utrum esse Deum, ut providentiæ suæ generalis argumenta præberet, ut sua hominibus aperiret consilia simul & suaderet quàm utilia essent.

Huic objectioni respondet Euseb. lib. 5. de Demonstr. Evang. c. 1. summum intercedere discrimen oracula inter & Judæorum Prophetas, cum
oracula.

oracula essent Dæmonum opéra, nihilque utile docuissent; Judæorum verò Prophetas in hoc unum incubuisse, ut homines à vitiis ad virtutem & ad Dei cultum revocarent. 2. Gentilium vates sine sensu quasi animam efflissent, vaticinia sua proferre solitos, eisque nec perspectum, quid dicerent, nec quid sentirent, hocque modo tenebricosos illos spiritus homines sibi subigere; è contrà verò Deum, cum lux ipsa purissima sit, animum perspicacem & facilè res intelligentem Prophetis infundere; undè quæ prædicerent ipsis perspecta essent: 3. Prophetas illos vitæ sanctimoniâ cæteris hominibus præluxisse; Ethnicorum verò fuisse, qui Deorum suorum mores æmulerentur, & idcirco nonnisi scelestissimos fuisse.

R. 4. Minut. Felix argumento ex miraculis petito, cum dicerentur Dii sanitatem ægris contulisse, & alia patrasse miracula, Dæmones ipsos temperamenti mutatione morbos illos inflixisse, & secedendo visos sanitatem restituere; nihilque, quod naturæ vires superaret, præstitisse; & pro virili hominum animis illudere conatos fuisse.

O P P. 2. plurima præcepta morum à Diis tradi, & sic non esse traducendos ut pessimos, & divinis honoribus indignos.

R. S. Aug. lib. 2. de Civit. c. 16. Dæmones se ad quorundam ad virtutem proclivium affectus quandoque attemperasse, ut eos in errorem inducerent; sed virtutis leges occultas tantùm præscripsisse, publicas verò vitiorum corrumpendis populis aptas. *Foris populis strepitu celeberrimo impietas impura circumsonat, & intus paucis castitas simulata vix sonat Quod bonum dicitur, vix aliquos invenit auditores, quod malum geritur omnes convocat spectatores, tanquàm honesta erubescenda sint, & inhonesta glorianda susurrant in occulto verba justitie ad decipiendos etiam paucos bonos, frequentant in aperto invitantia nequitia ad possidendos innumerabiles malos.*

O P P. 3. Quâ ratione plures in Deo Personas Christiani adorant, eâdem ratione plures Deos, qui ex eâdem Dei substantiâ aliquam divinitatis partem sibi vindicarent, colebant Ethnici; quæ erat de Diis Gentium opinio, ut notatum suprâ concl. 4. aut saltem subiliorum Idololatriarum sententia.

R. S. Greg. Naz. Orat. 37. admitti non posse Gentilium sententiam, qui unicam divinam naturam pluribus Diis communem, sicut unicam naturam humanam in pluribus hominibus agnoscere se profiterentur; nam primò naturæ illius humanæ communis idea, seu unitas in solâ mente subsistit: cum individua illius naturæ communis à se invicem penitus sint diversa quoad tempus, vires, & affectus; imò in nobis ipsa varietas quædam inest: cum & mens & corpus sibi invicem obstant, & in perpetuâ sint mutatione. Sic Gentium Dii potentiâ, ordine, affectu, &c. à se invicem differunt, ut pluribus suprâ probatum est, & ipsi assentiuntur Ethnici; non ita autem de tribus divinis Personis statui potest, cum unam & eandem naturam individuum habeant, & ejusdem sint penitus authoritatis, &c.

bant, inquit, & sacrilegia sua consecrabant; sicque Romanos sibi gratum ad autoritatis culmen stravisse non Deorum cultu & veneratione, sed sacrilegiorum impunitate; nec dubium est, ut habet, quin suis præsto fuissent Dii, si quâdam autoritate valuissent.

R. 3. Cum Min. Fel. Idololatriæ minimè patrocinari antiquitatem; cum & scelerati, & tot libidinibus infames fuerint Dii: eorum quidem defensores fuerunt numero plures; sed furentium multitudo est tantum communis furoris defensio. Lact. l. 2. c. 8. *Quare cum sapere, id est veritatem querere omnibus sit innatum, sapientiam sibi adimunt, qui sine ullo iudicio inventa majorum probant, & ab aliis pecudum more ducuntur; sed hoc eos fallit, quod majorum nomine posito, non putant fieri posse, ut aut ipsi plus sapiant, quia minores vocantur, aut illi desipuerint, quia majores nominantur.*

R. 4. Minutius Felix ex auguriis in gratiam Deorum nihil posse repeti; cum Regulus & Paulus & plurimi alii, quibus augures fausta portendebant, fuerint infelices: è contra verò, qui auguria neglexerant, ut Cæsar, dum in Africam trajiceret, victoriam nihilominus retulerit.

R. 5. Minutius argumento ex oraculis petito. 1. Oracula esse inutilia, ab illisque deceptum Amphiaræum nescivisse se ab uxore proditum iri. Item & Apollinem Pythium nihil aliud quam ambiguum respondisse, & de oraculorum ambiguitate conquestum fuisse Demosthenem. 2. Si ab illis prædicta aliquando evenerint, illud aut casu contigit, aut operâ spirituum immundorum, qui sub Statuis & imaginibus delitescabant consecratis, & afflatu suo autoritatem quasi præsentis nominis consequuntur, inquit, dum inspirantur, dum fanis immorantur, dum nonnunquam extorum fibras animant, avium volatus gubernant, sortes regunt, oracula efficiunt falsis pluribus involuta, nam & falluntur & fallunt, ut & nescientes sinceram veritatem, & quam sciunt in perditionem suam non confitentes. Ita S. Cypr. de Idol. vanit. Arnob. lib. 4. Eactant. lib. 4. c. 27. oraculorum vanitatem demonstrat, ostendit eorum auctores esse Dæmones eorumque impotentiam evincit inde, quod silerent & fugerent ubi adesset Christianus. Idem probat Euf. lib. 4. de Præp. c. 1. ubi ait Templorum Sacerdotes à Romanis ad quæstionem adactos scientiam suam esse impostorum artem fuisse falsos; idemque à Philosophis, ut à Chrysippo probatum, & à pluribus aliis, quorum autoritatem refert. Idem probat l. 5. & oracula jecleberima expendens contendit à Deo non fuisse reddita, sed à Dæmonibus; cum cruenta, ambigua, dolosa, obscura, gravissimorumque bellorum causa & origo fuerint; nihil serio, nihil quod honestati & virtuti conducere proponerent: imò & partibus injustis, ut Tyrannis, faverent, aliisque viris improbis.

Opponebant Gentiles, ejusdem esse autoritatis vates suos ac Judæorum Prophetas: & utrisque utrumque esse Deum, ut providentiæ suæ generalis argumenta præberet, ut sua hominibus aperiret consilia simul & suaderet quàm utilia essent.

Huic objectioni respondet Euseb. lib. 5. de Demonstr. Evang. c. 1. summum intercedere discrimen oracula inter & Judæorum Prophetas, cum
oracula.

oracula essent Dæmonum opéra, nihilque utile docuissent; Judæorum verò Prophetas in hoc unum incubuisse, ut homines à vitiis ad virtutem & ad Dei cultum revocarent. 2. Gentilium vates sine sensu quasi animam efflasset, vaticinia sua proferre solitos, eisque nec perspectum, quid dicerent, nec quid sentirent, hocque modo tenebricosos illos spiritus homines sibi subigere; è contrà verò Deum, cum lux ipsa purissima sit, animum perspicacem & facile res intelligentem Prophetis infundere; undè quæ prædicerent ipsis perspecta essent: 3. Prophetas illos vitæ sanctimoniâ cæteris hominibus præluxisse; Ethnicorum verò fuisse, qui Deorum suorum mores æmularentur, & idcirco nonnisi scelestissimos fuisse.

R. 4. Minut. Felix argumento ex miraculis petito, cum dicerentur Dii sanitatem ægris contulisse, & alia patrassent miracula, Dæmones ipsos temperamentum mutatione morbos illos inflixisse, & secedendo vicos sanitatem restituere; nihilque, quod naturæ vires superaret, præstitisse; & pro virili hominum animis illudere conatos fuisse.

O P P. 2. Plurima præcepta morum à Diis tradi, & sic non esse traducendos ut pessimos, & divinis honoribus indignos.

R. S. Aug. lib. 2. de Civit. c. 26. Dæmones se ad quorundam ad virtutem proclivium affectus quandoque attemperasse, ut eos in errorem inducerent; sed virtutis leges occultas tantum præscripsisse, publicas verò vitiorum corrumpendis populis aptas. *Foris populis strepitum celeberrimo impietas impura circumsonat, & intus paucis castitas simulata vix sonat Quod bonum dicitur, vix aliquos invenit auditores, quod malum geritur omnes convocat spectatores, tanquam honesta erubescenda sint, & inhonesta glorianda susurrant in occulto verba justitiæ ad decipiendos etiam paucos bonos, frequentant in aperto invitantia nequitia ad possidendos innumerabiles malos.*

O P P. 3. Quâ ratione plures in Deo Personas Christiani adorant, eâdem ratione plures Deos, qui ex eâdem Dei substantiâ aliquam divinitatis partem sibi vindicarent, colebant Ethnici; quæ erat de Diis Gentium opinio, ut notatum suprâ concl. 4. aut saltem subtiliorum Idolatriarum sententia.

R. S. Greg. Naz. Orat. 37. admitti non posse Gentilium sententiam, qui unicam divinam naturam pluribus Diis communem, sicut unicam naturam humanam in pluribus hominibus agnoscere se profiterentur; nam primò naturæ illius humanæ communis idea, seu unitas in solâ mente subsistit: cum individua illius naturæ communis à se invicem penitus sint diversa quoad tempus, vires, & affectus; imò in nobis ipsis varietas quædam inest: cum & mens & corpus sibi invicem obstant, & in perpetuâ sint mutatione. Sic Gentium Dii potentiâ, ordine, affectu, &c. à se invicem differunt, ut pluribus suprâ probatum est, & ipsi assentiuntur Ethnici; non ita autem de tribus divinis Personis statui potest, cum unam & eandem naturam individuum habeant, & ejusdem sint penitus authoritatis, &c.

INST. Posse fieri, ut tres naturæ perfectissimæ sibi identificentur in eâdem personâ; sicut tres personæ in unâ & eâdem naturâ identificantur sibi invicem.

R. Tres personas in eâdem naturâ sibi identificari, nec indè sequi plura perfectissima, plura omnipotentia, seu plures Deos: At verò naturæ plures sibi identificatæ integritatem suam & proprietates servarent; & sic, si essent divinæ naturæ tres, essent absolutissimæ, suam quæque voluntatem haberet, sibi invicem adversarentur, altera haberet quod non alia, & sic nulla esset perfecta, nulla divina: & etiamsi inter se penitus convenirent, verùm esset ab alterâ posse aliam præpediri, & sic posse sibi invicem adversari. Cætera in Tractatu de Sanctissimâ Trinitate solventur.

OPP. Potuere Ethnici cultum divinum minoribus Diis exhibere, ut quibus rerum creatarum præfecturam & sollicitudinem Deus credidisset & esset partitus: & sic quamdam divinitatis suæ participationem communicatam esse voluisse. Quâ ratione scilicet in Scripturis sacris Angeli, quos Deus hujus orbis administrationi præfecit, Dii vocantur & adorantur: idè ut habetur Josue 5. v. 15. adoratur Angelus. Et Exodi 3. v. 6. & 14. qui alloquitur Moysen vocat se Deum: *Ego sum Deus Abraham*: quod etiam refertur Act. c. 7. v. 32. & 33. Angelus autem erat ex S. Stephano ibidem, *Apparuit illi in deserto montis Sina Angelus in igne flamma rubi*; adorandus autem ex eo est, què Dei nomine ornetur; Dei enim nomen adoratio sequitur; imò ex adoratione, quæ Angelis deferrebat, infert S. Aug. cont. Maxim. Arian. l. 3. c. 26. esse adorandum Spiritum Sanctum. *Vides namque à viro justo Angelos fuisse adoratos, & tu non vis adorari Spiritum Sanctum, quem vos quoque omnibus sine ambiguitate preponitis.*

R. Deum solum in Angelis, qui conspiciebantur, à Patriarchis fuisse adoratum, ut qui per eos representaretur; non verò Angelos: & quoties hunc cultum quis Angelis voluit deferre, repulsam passus est. Sic S. Joan. Apocal. c. 22. v. 8. *Et postquam audiissem & vidissem, cecidi ut adorarem ante pedes Angeli, qui mihi hæc ostendebat; & dixit mihi, vide ne feceris: conseruus enim tuus sum, & fratrum tuorum Prophetarum, & eorum, qui servant verba Prophetia libri hujus: Deum adora.* Et Angelus ita monet Manue, *si vis holocaustum facere, offer illud Domino* Judic. 13. v. 16. Nomen etiam Dei tribuitur hominibus, *Ego dixi Dii estis* Psal. 81. v. 6. Et Moyses Exod. 7. v. 1. dicitur Deus Pharaonis; hæc enim tantum exprimunt singularem quamdam excellentiam à Deo acceptam, ut Psal. 81. Judicium potestatem, & Exod. 7. traditam Moysi in Pharaonem ipsum auctoritatem.

S. Aug. utitur argumento *ad hominem*, adversus Arianos: non quòd adorationem Angelis deberi censcat, sed Maximinum eò vult adducere, ut noscat, quam iniquè, quem honorem Angelis deferrent, Spiritui Sancto negarent.

Neque etià argumentum ex eo duci potest, quòd Reges aut alios

adorari Scriptura testetur, ut ab Abrahamo Gen. 23. v. 7. Filios Heth; à Jacobo. Gen. 33. v. 3. & 7. Esau; Josephus à fratribus adorandus prædicatur Gen. 37. v. 10. & 42. v. 6. & c. 43. v. 26. Idem à fratribus adoratur, & ejus virgæ aut sceptri fastigium à Jacobo Gen. 47. juxta 70. Interpretes, & Hebr. 11. v. 21. Idè ex S. Chrys. Hom. 46. in Gen. quòd futuros ex Josephi posteris Reges præviderit: adorationis enim vocabulo significabatur prostratio, quâ Reges & alii coli solerent; non verò Latriæ cultus, qui soli Deo servatur: sicut nec rebus creatis deferendus honos designatur his verbis Ps. 98. v. 5. *Adorate scabellum pedum ejus*, sed Deo earum rerum auctori, ut benè monet S. Aug. in hæc verba.

Præter rationem esset adducere Ethnicorum Religionis antiquitatem, Gentium in eâ fovendâ consensum, à parentibus acceptam institutionem, ad excusandos saltem, quos aut rudior animus, aut exercitia penitus aliena ab otio ad veritatis indagationem necessariò avocant: adversus enim naturalem legem, & omnibus ingentam unius Dei cognitionem nullâ ratione præscribi potest.

ARTICULUS ULTIMUS.

Confutantur hæretici, qui unitatem Dei impugnarunt.

VARIAM hæreticorum fuisse sententiam art. 1. observavimus, iisque Arianos adjungere potuimus; sed de iis dicetur, ubi de Sanctissimâ Trinitate. Alii porrò hæretici plurimos Deos, duos alii, unum bonum, alterum malum Deum agnoverunt.

Duplicem hunc errorem ab Ethnicis hæretici hauserunt, qui plures Deos invexerunt; ii ex receptâ plurimorum Deorum opinione ita censuerunt; qui verò unum bonum & alium malum inducere, dogma sum ex quorundam Philosophorum placitis hauserunt, de quibus agit Plutarchus lib. de Iside & Osiride: quæ etiam fuit Zoroastriis & Magorum doctrina, ut docent Laërtius, Aristoteles, Hermippus.

Huic duorum principiorum opinioni fundamentum & originem præbuit curiosior perscrutatio, unde malum oriretur, ut docet Tertull. lib. 1. contrà Marcion. c. 2. Cumque mali quædam origo videretur agnoscenda, nec ad Deum bonum ea referri posset, idè principium mali supremum admiserunt. Eadem quæstio ita Hermogenem torquebat, teste Tertull. lib. contrà cum c. 2. ut æternam materiam, quæ mali principium esset, excogitarit.

Refelluntur 1. hæretici quibus rationibus unitas divina superiùs fuit probata, simul & Deorum pluralitas omninò impossibilis demonstrata, ac præcipuè Veteris Testamenti: auctoritate Deut. 6. v. 4. & Novi, Matth. 11.

2. Non est potior ratio cur triginta à Valentino, &c. quàm quadraginta, aut cur ab aliis duo, aut tres, quàm quatuor, aut sex Dei

inducantur; Ergo fictitia sunt, quæ ab illis hæreticis proferuntur. Ita Tert. lib. 1. cont. Marc. c. 6.

3. Si esset supremus Deus mali artifex, & Deo summè bono contrarius, infinità is esse deberet potestate, & æquali cum Deo summè bono: sic neuter esset infinitè potens, cum neuter posset impedire, quominus plurima contra suam voluntatem evenirent. Nam ut bonus Deus præstaret invito malo Deo quidquid veller, ita & malus renitente bono efficeret quidquid liberet, & sic neutrius voluntas impleteretur. 1. Si illa duo principia se se invicem oppugnarent, sibi que invicem resisterent, & proindè se invicem impedirent, ex mutuâ imbecillitate accideret, quòd Deus unus alterum non destrueret, & proindè non forent Dii, cum & infirmi essent & impotentes. Ita Sanct. Athan. Orat. contrà Gentes.

4. Probat Tertull. contrà Hermog. c. 11. principium mali æternum esse non posse; nec enim superare penes homines & Deum esset: & consequenter inutile foret virtutis studium.

5. Non datur supremum malum: cum malum nihil sit, necquid æternum, sed affectio animæ virtuti contraria, cujus solus homo est author; S. Basil. Hom. 2. Hexam. *Quid igitur est dicendum, nempe malum non essentiam viventem, animæque præditam esse; sed affectionem animæ virtuti contrariam, desidiosam, ac inertibus, propterea quod à bono deciderunt, inditam: Noli itaque malum forinsecus circumspicere atque inquirere: neque quamdam naturam principem malignitatis imaginare, sed malitia quisque sua seipsum authorem agnoscat.*

Ultimò ex S. Aug. lib. de Moribus Manich. non potest supremum esse malum: cum nihil aliud sit malum quàm boni depravatio, quæ ex eodem S. Aug. c. 6. ad nihilum est via quædam; nihilum autem non existit; ergo malum non potest esse aliquid supremum; non enim existit, nec potest existere: ut enim esset aliquod summum malum, debuisset prius esse aliquod supremum bonum, cujus esset annihilatio & depravatio: Quandòquidem malum non est, nisi ubi fuit bonum quod est corruptum.

Objiebant 1. plurima esse à malo principio profecta mala, ut venenum, fera, serpentes.

R. Ibidem S. Aug. c. 8. substantias illas ex se non esse malas; licet enim quorundam temperamentum lædant, aliis non nocent, imò profunt: sic plurima sunt etiam venena, quæ profunt in medicamentis. Addi potest cicutam v. c. alicubi noxiam, alibi utilem: cum in Tauri montibus pro cibo delicato & salubri habeatur. Quæ herbæ noxiæ videntur, pro cibo sunt brutis animantibus, & nobis sæpè in alimentum & medicamentum cedunt. Quæ videntur mala, industriam excitant in secernendis salubribus à venenatis, patientiam nostram exercent, iram Dei & peccati odium manifestant, & ardentius Deum orare compellunt, ut prudentiâ nos instruat & per Angelos tueri dignetur.

INST. Illorum omnium extat supremum aliquod mali principium, quod Isaia 45. v. 7. dicitur creare malum: *Ego Dominus, & non est al-*

ter formans lucem & creans tenebras : faciens, & pacem & creans malum. Ego Dominus faciens omnia hæc. Matt. 7. v. 18. Arbor mala non potest fructus bonos facere. Ita Marcio apud Tert. lib. 1. c. 2. Nec quâ in malum ferimur propensio esse à bono Deo potest, seu concupiscentia inordinata.

R. Isaïæ 45. agi de pœnæ malis, quæ Deus justus peccatorum vindex peccatoribus infligit, non verò de malo Deo : Et idem Deus tùm boni, tùm pœnarum illarum & tenebrarum author laudatur, & malorum quæ reverà bonis sunt annumeranda, ut quæ in peccantium commoda cedant. Secundò Matth. 7. de Pseudo-propheta quæstio est, signa præbet Christus, quibus secerni possit, & de singulis peccatoribus universim sancit v. 18. *Non potest arbor bona malos fructus facere : omnis arbor quæ non facit fructum bonum excidetur, & in ignem mittetur. Igitur ex fructibus eorum cognoscetis eos.* 3. Propensio etiã in malum à malo Deo non proficiscitur, sed ab ipsâ naturâ liberâ; quæ cùm mutabilis sit, pro libito potest hoc vel illud amplecti.

INST. 2. Novi Testamenti Deus summè bonus Veteris Testamenti Deo non adversaretur, ejusque authoritatem destruendam non suscepisset, nisi malus esset, & malorum author.

R. Summam esse utriusque Testamenti concordiam, & novæ Legis Deum se missum à Deo Veteris Testamenti, & Filium ejus, & unum cum illo Deum esse profiteri Joan. 10. v. 30. *Ego & Pater unum sumus.* v. 36. *Quem Pater sanctificavit & misit in mundum, vos dicitis, quia blasphemus, quia dixi Filius Dei sum ; si non facio opera Patris mei nolite credere, &c.* Matth. 5. v. 17. *Nolite putare, quoniam veni solvere Legem, aut Prophetas ; non veni solvere, sed adimplere.*

INST. 3. Veteris Testamenti Deus occidit, Exod. capit. 32. v. 27. Levit. capit. 24. v. 10. & cap. 20. Num. 11. v. 33. & sæpiùs indurat cor hominis Exod. cap. 4. v. 21. præcepta dat non bona Ezech. cap. 20. v. 25. Novi verò Testamenti Deus nemini mortem infert, omnium miseretur, Leges ad sanctitatem utiles, puras, & admirabiles instituit.

R. Veteris Testamenti Deum vitam ademisse, & Deum Novi Testamenti pariter Ananiæ & Saphiræ mortem intulisse Act. 4. non quidem ita frequenter : quia Lex vetus, ut Israëlitas rudes in officio contineret, pœnis carnalibus sæpiùs utebatur. 2. Novi Testamenti Deum indurare pariter non impartiendo malitiam, sed subtrahendo gratiam in pœnam peccati quod præcessit : ita S. Aug. Ep. 105. Tertiò Legis Veteris præcepta dici non bona, non quòd ad malum vel minimùm impellant, sed quòd ex se sanctitatem non conferant, & ad concupiscentiam stimulandam sint incitamento. Rom. 7. v. 7. *Quid ergo dicemus ? Lex peccatum est ? Absit ; sed peccatum non cognovi nisi per Legem, nam concupiscentiam nesciebam, nisi Lex diceret : Non concupisces ; occasione autem accepta peccatum per mandatum operatum est in me omnem concupiscentiam.* Quia autem sanctitatem Lex vetus non conferebat, ideo

Rom. 8. v. 3. dicitur infirma. Et Heb. 7. v. 18. *Reprobatio fit præcedentis mandati propter infirmitatem ejus & inutilitatem, nihil enim ad perfectum adduxit Lex.*

QUÆSTIO TERTIA.

Quid sit Deus, seu in quo sita sit natura Dei.

PERICULOSAM & laboriosam esse quæstionem, quid sit Deus, docet S. Aug. lib. 1. de Trin. c. 3. *Neque periculosius alicubi erratur, nec laboriosius aliquid quaritur, nec infructuosius invenitur.* Et quia in investigatione simili difficillimum est homines cavere sibi omnino ab errore, si quid eis erga Deum amoris vel timoris est, ad initium fidei & ordinationem est redeundum.

ARTICULUS I.

Utrum in hac vitâ quid sit Deus nosse possit homo.

ERRORES.

AETIUS & Eunomius circa seculi quarti medium eò jemeritatis, aut potius ineptiæ prolapsi sunt, ut Dei naturam aut essentiam assererent se animo complecti & perspectam habere.

C O N C L U S I O. Non potest homo in hac vitâ nosse quid sit Deus.

Dei natura cognosci non potest; cùm nec Scriptura, nec ratio, nec res creatæ nobis Dei Essentiam manifestam faciant: imò Dei naturam ab homine cognosci non posse tradant Scripturæ: infirmior sit humana mens, quàm ut ad Dei cognitionem assurgere possit; hancque cognitionem Deus homini, ut meritum præmium, in cœlis duntaxat tradendam pollicitus fuerit. Hæ sunt rationes, quibus utuntur SS. Basilus, Greg. Naz. & Greg. Nyss. adversus Eunomium. In re, non difficili multas congerere probationes est superfluum; quas ab antiquis acceptas eruditissimi Patres attulerunt, paucis exscribemus.

Theoph. Antioch. l. 1. S. Iren. l. 4. c. 37. S. Clem. Alex. l. 5. Strom. Novatian. l. de Trin. c. 1. Arnob. lib. 1. nec Deum posse dici, nec cogitari quid sit, etiam quascumque perfectiones ei tribuendo, docent.

S. Basil. l. 1. contra Eunomium pedetentim hæreticum illum refellit. 1. ait majoris esse superbiæ asserere, perspectam sibi esse Dei substantiam, quàm solum suum super astra velle collocare, quod tentavit superbiæ spiritus, Isai. 14. v. 14. 2. nihil esse, quo in naturæ Dei notitiam adduci possit homo; non ratione hominibus communi; ea enim tantum docet, Deum existere, non verò quid sit Deus; non Scripturis, docent enim naturam Dei comprehendi non posse; non rebus creatis:

quibus tantum veluti gradibus utimur, ut ad sapientiae & Dei & bonitatis cognitionem assurgere possimus. 3. Si fidem obtinere velit Eunomius in iis quae superioris naturae sunt, rerum inferiorum naturam nos edoceat; cum autem nec quae sit terrae substantia, nec quae formicae natura, &c. noverit, quomodo sibi rerum sublimiorum cognitionem posset vindicare? 4. Deus Patriarcharum Deus dici voluit, quod eximiae virtutis essent: nomen autem suum eis exhibere noluit. At Eunomius non solum Dei nomen sibi perspectum asserit, sed & naturam Dei optime cognitam. 5. Si verum proferret Eunomius, falsum esset quod Lucæ 10. v. 22. & 1. Cor. 2. v. 11. traditur: nempe divinae naturae cognitionem soli Filio & Spiritui sancto competere. Idem argumentum urget Epist. 160. Novum addit Epist. 401. nempe si Dei re-
 titiam in hac vita possemus assequi, falso nobis polliceri Apostolum claram Dei notitiam in vitae innocentis praeium.

S. Greg. Naz. Or. 1. *Quantum percipitur Deus, tantumdem semper se subducit, amantesque sui ex eo quod fugit, ac velut jam comprehensus se proripit, ad superna illicit.* Et Or. 34. Si Dei notitiam assequi hinc possemus, summis & sanctissimis viris concederetur. Et quidem in nostram utilitatem cedit, quod quidditatem, ut vocant, Dei ignoremus: tum quia parvi a nobis fieret, si eam facile assequi possemus, ita enim sumus comparati, ut quae facile consequimur, eadem spernamus: tum etiam ut summo labore cognitionem illam tanquam alterius vitae mercedem conemur nobis comparare. 3. Addit corpus nostrum instar nubeculae cognitionem Dei nobis eripere: unde scriptum est, *posuit tenebras latibulum suum*, Psal. 16. v. 22. vixque a corporeis rebus avellimur, ut mentis aciem in res spirituales intendamus. Idem Orat. 38. fuse probat menti soli Deum se conspiciendum praebe, & quidem perexiguum, ac perobscurum: non ex his, quae in ipso sunt, sed quae circa ipsum, ad unum quoddam veritatis simulacrum priusquam teneatur deducens, & priusquam intellectu percipiatur, seipsum fugam proripiens, ut vel sic animum collustret, desideria nostra magis ac magis accendat, eaque ratione nos mundet.

Iisdem argumentis utitur in orationibus cont. Eunom. S. Greg. Nyss. & Orat. 12. observat doctrinae tradita inhaerendum esse, ne Dei naturae loco in mente idola substituamus; autores sacros quaedam nomina Dei tradere, non quae Dei naturam designent, sed quae Deum a creaturis secernant: & ita finitam esse hominum in hac vita scientiam, ut nec quid ipsi sint, noverint: *Quemadmodum surdis, signis & manuum gestibus quid agere debeant, indicamus: non quod propria ipsi voce careamus, sed quia minime audientibus inutilis futura est ea, quae sit verbis enarratio: sic cum humana natura quodammodo surda sit, neque quidquam paulo sublimius percipiat, Dei gratiam dicimus multipliciter ac variis modis in Prophetis loquentem pro capto nostro, & pro eo, quod familiare nobis est Sanctorum Prophetarum linguas conformantem, per hac nos ad sublimium cognitionem velut manu deducere: non ut secundum*

propriam munificentiam institutionem faciat; quomodo enim in exiguo magnum caperetur? sed quia ad parvitatem nostram se divina vis abjicit. Undè appositè addit, sicut Sol interjecto aëre temperatum lumen suum & radios & calorem effundit, ne vehementiori eorum, appulsu sensus nostri obtundantur; ita Deum, qui nobis, non sibi loquitur; ad intelligentiam nostram eloquii sui sermonem attemperasse: imò nostris sæpè usum verbis, ne humanus noster sensus læderetur. Quod etiam observat S. Hilar. lib. 8. de Trin. Undè sæpè humilia & concreta, imò & quæ Deum quodammodo dedeceant, ut ambulare, irasci, &c. de Deo efferuntur; ut etiam ex iis pateat, quæ de Deo dicuntur, non esse Deo digna.

O P P. 1. Eunomius, si homo non novit Dei substantiam, adorat quod nescit; at ex ipso Christo Joan. 4. v. 22. non decet Christianos adorare quod ignoratur.

R. S. Basil. Epist. 400. Satis esse ad veram Dei ad orationem, si Deum existere noverimus: non necesse verò à nobis ejus essentiam contineri animo.

I N S T. 1. Eunomius. non potest de Dei existentia constare, quin constet de ejus essentia: quia nihil potest dici de ente simplicissimo, quod ad illius essentiam non spectet.

R. Ibid. S. Basil. in Deo multa spectari posse, operationes nempe, proprietates, &c. quæ varios conceptus inferunt; undè licet sit simplicissima Dei entitas, quæ de Deo apprehenduntur, adæquatè non concipiuntur, nec perfectè omninò.

I N S T. 2. Ingenitum esse, Dei essentiam continere: nosse verò nos quid sit ingentum.

R. S. Basil. vocabulum illud, ingentum, Dei essentiam non designare, sed à Deo amovere tantum imperfectionem; cum denotet Deum esse à se, non ab alio, seu modum Dei existendi singularem significet. sed de hoc nomine aliàs fusiùs.

ARTICULUS SECUNDUS.

*Quæ de Deo noverimus, seu quæ sint attributa Dei,
& quis inter illa ordo.*

I N unaquaque re spectanda occurrunt duo. 1. ipsa rei natura, 2. proprietates quæ ex ipsa re emanant, & velut qualitates adhærere videntur, remque unam ab aliis secernunt; sic in Deo spectare duo licet, ipsam Dei naturam, & proprietates quæ ipsum Deum ab omni alio ente distinguunt; sed quia jam infirmam nostram naturam essentia Dei apprehendendæ imparem esse probavimus, idèd sola nobis supersunt expendenda attributa, quæ divinam naturam designare & afficere videntur, quæ S. Basil. lib. 1. contrà Eunomium vocat qualitates, & Tert. lib. 1. contr. Marc. naturales proprietates, Theologi vulgò **A T T R I B U T A**. Hic autem.

autem questio non est de proprietatibus relativis, seu personalibus.

Attributa vulgò dividuntur in affirmativa, seu positiva, quæ perfectiones Deo in-existentes designant, seu aliquid positivum, ut bonum esse, justum, &c. Et in negativa, quæ imperfectiones à Deo removere, ut esse ingenuum, immensum, &c.

Jamverò quaeritur, quæ ex attributis illis præstantiora sint: seu quæ præstantiorem ideam Dei menti ingerant.

C O N C L U S I O. Attributa negativa videntur positivis esse potiora, seu perfectior est Dei cognitio, quæ per negationem, quàm quæ per affirmationem habetur. Perfectiorem enim Dei cognitionem illa ingenerant, quæ Deum sub infinitâ ratione menti subjiciunt: quæ nec aliorum adminiculo habent opus: quæ SS. Patribus magis idonea videntur. Ejusmodi autem sunt attributa negativa.

1. Attributa negativa omne nomen transcendunt, & ad infinitum excogitandum nos evehunt; positiva verò aliquid definitum & circumscriptum designant: negationum enim vis est infinita, ut vocis, non homo; affirmativum verò est definita & circumscripta, ut vocis, homo; unde causam non definitam magis consentaneum est negationibus exprimere. Affirmationes rem velut in partes secant; negationes verò ab iis, quæ terminis inclusa sunt ad id quod nullis finibus coercetur, mentem extollunt & evehunt.

2. Illa præstat via, quæ juvat aliam, & ab eâ non juvatur. At via cognoscendi Deum per attributa negativa juvat eam quæ cognoscitur per attributa positiva; cum enim hæc ex quadam perfectionum, quæ in homine aut Angelis eminere videntur, comparatione durantur, concipi vix possunt, quin aliquid materiæ admixtum habeant, nec totam Dei potentiam & sapientiam delineant: at quod in tali conceptu imperfectum est, tollitur & amovetur per attributa negativa; designant enim perfectiones illas ratione perfectissimâ Deo inesse.

3. Tantum negationis via ad Deum cognoscendum affirmativum præstat, ut S. Greg. Nyss. constanter asserat, per sola attributa negativa Deum cognosci lib. de vita Moïsis: ut & S. Aug. enarr. 2. in Ps. 26. Immo S. Dionys. lib. 2. Hierarch. divinæ naturæ non congruere affirmationes docet; cum totum quod est in Deo, super substantialia sit, & omnem hominis captum excedat.

O P P. Cognoscere Deum per negationem, non est eum cognoscere: præstatque cognoscere rem per ea quæ rei insunt, quàm per ea quæ non insunt; privatio enim alicujus in ente perfectionis cognoscendæ non est principium. 2. Ipsum esse notius est, quàm non esse; nam per se cognoscitur esse: non esse verò per esse aliquo modo cognoscitur: nec dicetur quis hominem nosse, si sciret tantum eum non esse lapidem, lignum &c. si notum non haberet aliquo modo, quid esset hominibus super hominem naturâ suâ ad speculandum Deum ordinatur; sed circa Deum speculatio versari non potest, nisi quatenus mentis objectum est: Deus; objectum autem intellectus, non est aliud quàm quicquid in Deo est; quidditas igitur Dei ab homine cognosci potest; nec in votis esset

eius cognitio, nisi percipi posset. At negationes nec sunt in Deo, nec ejus quidditas.

R. 1. Attributa negativa non designare meras privationes, sed eminentiam quamdam & excessum; cum autem excessus illi intelligentiam nostram longè superent; hinc ad has negationes confugere compellimur. 2. Per privationem per se non patere viam ad rei cognitionem, sed per accidens; sic negatur aliquid de Deo, vel ratione rei significatæ; ut cum dicitur non esse lapis, &c. vel ratione imperfectionis adjunctæ, ut cum enuntiatur Deus non bonus; non quòd à Deo removeatur bonitas; sed quia eminentiâ quâdam bonus est, seu superbounus, seu ipsa bonitas. Ex priori negatione profecta cognitio ab errore avocatur, ne credatur Deus esse quod non est; sed non demonstrat quid sit Deus, quia meram negationem infert: posterior verò negatio hoc non tantum efficit, sed præterea ducit ad Dei quidditatis cognitionem; nam in Deo ponit perfectionem contrariam, & imperfectionem omnem repellit; sic v. c. dicitur Deus non esse bonus, ne credatur bonus per participationem & inhærentiam, & ut agnoscat ipsa bonitas per essentiam. 3. In homine quidem est appetitus Deum videndi, sed non in hac vitâ; expletur ille, modò in alterâ vitâ hanc cognitionem assequatur.

I N S T. Ab affirmativâ cognitione juvatur negativa, cum eam supponat: ut enim dicatur Deus non esse mortalis, prius necessariò Deus est cognoscendus, ut attributi illius (mortalis) ideâ Dei naturam destrui palàm fiat. Ergò est prius cognoscenda perfectio, quæ cum mortalitate consistere non potest.

R. Prius quidem necessariò esse cognoscendam imperfectè Dei naturam, v. c. Ens esse perfectissimum, & proinde non esse morti obnoxium; aliquod autem distinctum attributum mortalitati repugnans cognoscere non oportet: sic, ut hominem non esse hinnitivum in aperto habeam, est satis, si de rationali ejus naturâ mihi constiterit: nec ad perfectionem cum hinnitu rectè pugnantem investigandam compellor.

ARTICULUS TERTIUS.

Quæ sit distinctio inter attributa divina.

DISTINCTIO multiplex est, alia realis, rationis altera. Distinctio realis iterum duplex, major & minor; realis major est inter illa, quæ sine se invicem esse possunt, qualis distinctio personas inter divinas. Realis minor, vel modalis, est inter illa quorum unum existere quidem potest sine alio, sed non vicissim; qualis intercedit inter modos, & eorum subjecta.

Alterâ quidem distinctio cuilibet mentis operationi prævia supponitur à Scotistis, & formalis vocatur, seu actualis, inter entitates à parte rei distinctas, quæ unam eandemque existentiam habeant, & sine se invi-

cem existere non possint, nec subjectis, aut suppositis distinguantur.

Distinctio rationis, iterum duplex: alia rationis ratiocinantis: altera rationis ratiocinatae, seu virtualis, aut fundamentalis. Nullum habet sui fundamentum, prior, sic distinguitur Petrus à Petro, quando dicitur, Petrus est Petrus: vel cum distinguimus Paulum à Saulo, qui tamen idem est homo. Posterior verò distinctio in re supponit fundamentum: ut cum res in se simplicissima & præstantissima varios habet effectus. Sic anima rationalis in se una, multiplex videtur esse, vegetans scilicet, sensitiva, & rationalis: & idè, in varios conceptus dividitur: Tunc enim rei simplicis, quæ pluribus æquipollet præstantia, rem eandem in plura dividendi fundamentum menti subministrat.

Ætius & Eunomius, ut omnem personarum distinctionem à Deo excluderent, simulque suaderent sibi cognitam esse divinam naturam, distinctionem in personis divinis admitti volebant; totam quippe Dei naturam ingeniti nomine complectebantur: atque adèò divinam simplicitatem extollere & prædicare solebant, ut attributa relativa, putà Paternitatem, &c. Et positiva, veluti sapientiam, &c. mera duntaxat esse vocabula contenderent: nec proindè aliam à distinctione rationis ratiocinantis in Deo admittendam esse distinctionem, quæ tamen distinctio nulla est, ut patebit rem tantisper consideranti.

Gilbertus Porretanus circa ann. 1141. ex Canonico Pictaviensi ad ejusdem Ecclesiæ Episcopatum promotus, Philosophiæ & Theologiæ professione publicè clarissimus, Anno 1147. ab Eugenio III. ad Concilium Parisiense citatus fuit: quia, ut refert Gaufridus Clarevallis Monach. Epist. ad Cardinalem Albanensem, Ecclesiæ Pictaviensis Archidiaconi duo in Gallias adventanti Eugenio occurrerant de Episcopi sui doctrinâ conquesturi. Ad Concilium in solemnitate Paschali habendum quæstionem remisit Eugen. Huic Synodo adfuit S. Bernard. Porretani errores hi vulgabantur ex discipulorum scriptis excepti: scilicet divinitatem non esse Deum: seu formam esse in Deo, quæ non esset Deus. Archiep. Rothomag. & Episc. Ebroicensis consilio in hâc se fuisse sententiâ negavit Gilbertus. Quia autem res, seu quæstio valdè obscura videbatur, & plurimi Porretano favebant, ad Concilium Rhemis habendum quæstionem remisit Eugen. Otho Frisingens. Episcopus Friderici I. Patruus lib. 1. c. 50. & 51. ab erroribus vindicat Porretanum, tum autoritate S. Aug. tum quòd, ut habet c. 53. asserere solitus esset de Personis divinis sermonem se non habere, sed tantum de quâdam Personarum divinarum excellentiâ.

In Concilio Rhemenfi anno 1148. ex eodem Othone Gaufridus Archiep. Burdigalensis, Milo Morinens. Sugerius Abbas S. Dionys. Sanct. Bernard. Porretano adversabantur, & è Curia Romanâ multos, ipsosque Cardinales suspectos habuerunt, quòd ex iis complures expostularent truncata esse veterum Patrum testimonia contra Porretanum opposita. Undè S. Bernard. ut rem brevi conficeret, à Porretano quæsit, num divina sapientia, essentia, & magnitudo, esset Deus: an for-

ma distincta quā Deus esset, aut posterius quid? à Porretano probatz propositiones mox fuerunt exscriptæ. Exegit Porretanus, ut S. Bernardi confessio scriptis quoque mandaretur, divinitatem nempe esse Deum. Cum verò plurimum hinc & inde subsequētibz diebus disputatum esset, dixissentque Cardinales, à se proposita fuisse audita, & se iudicium luros esse, inquit Gaufridus. *Judicabimus*, inquebant Cardinales, qualiter debeant desiniri; quod verbum easemz movit corda multorum, ut sequenti die apud S. Bernardum convenirent Archiepiscopi decem, Episcoporum quoque, atque Abbatum ac Magistrorum plurima multitudo: & quia iudicium sibi solis reservasse videbantur, quos noverant ferè omnes errantis potius quam erroris fautores; providere oportere, cum capitulis illis Gilberti Episcopi, sua & fidei symbolum mitteri, ut scirent plenius undè judicarent: Scripserunt ergo capitula eodē quā expressius potuere, illis verbis suam confessionem contrariam in omnibus & per omnia proponentes; quā de communi omnium convenientiā non sine multā deliberatione dictatā judicaturis facerent exhiberi; nec tamen verebantur ne contrarium aliquid judicarent, sed credebant nonnullos eorum ad hoc tendere, ut sine aliquā definitione Concilium solveretur. Propter quod eidem Scriptura, quā vobis novissimā mittimus, inquit, scripta sunt nomina singulorum, qui aderant, Archiepiscoporum, Abbatum, & Magistrorum, de consensu & convenientiā universorum, & electi sunt tres persone, Episcopi duo reverendissimi Hugo Alissiodorensis, & Milo Morinensis, & Suggestus Abbas S. Dionysii, qui eandem scripturam D. Papa, & Cardinalibus presentarent & dicerent eis. Pro vestra reverentiā sustinimus minus dignos acceptione sermones, donec tandem audivimus, quod de eis judicare velletis. Offerimus ergo & nos nostram confessionem; ut non de parte, sed de partibus judicetis. Tenetis confessionem hominis illius scriptam, convenit ut & teneatis nostram. Verumtamen illo vobis sub hoc tenore tradidit suam, ut paratus esset corrigere, si quid aliud vobis videretur: nos ejusmodi conditionem penitus excludentes, sic vobis nostram offerimus, ut noveritis quod in hoc sumus, in hoc perseverabimus, nihil penitus mutaturi. Quibus sine cunctatione D. Papa respondit, & universis qui miserant eos, renuntiare precepit, quod ab eādē confessione eorum in nullo prorsus Romana Ecclesia dissentiret. Est stare visi fuerant aliqui pro personā, sed non stabant aliquatenus pro doctrinā: inde fuit, quod in insigni palatio cui nomen est *Thau*, universa Ecclesia conveniens, & interrogatus Episcopus Pictaviensis, capitulis singulis liberè renuntiavit, hæc eadē verba locutus, si vos aliter creditis, & ego: Si aliter dicitis, & ego: Si aliter scribitis, & ego. Ibīdem D. Papa auctoritate Apostolicā de assensu totius Ecclesie quā convenerat, capitula ipsa damnavit, districte precipiens ne eandē librum legere, vel transcribere etiam sic reprobatum quis auderet, nisi prius eum Romana Ecclesia correxisset. Cumque responderet Episcopus, ego corrigam ad arbitrium vestrum; non vobis, ait, hæc correctio committeretur.

Matthæus Parisiensis refert capitula quatuor in Concilio Remensi definita; & proinde hæc sunt quæ ab Episcopis Gallicanis oblata sunt, & quæ doctrinam continent Porretani capitulis contrariam. Primum est. *Credimus simplicem naturam divinitatis esse Deum, nec aliquo sensu Catholico posse negari, quin divinitas sit Deus, quin Deus sapiens sit sapientiâ quâ Deus est, &c.* Exegit autem, ut refert etiam Gaufridus in Epist., à Porretano Catholica fidei professionem Eugenius; ut superius fuit observatum.

Refert Otho eodem lib. apud Eugenium conquestos fuisse Cardinales, quòd à S. Bern. & ab Episcopis Gallicanis, qui capitula illa consecrarent, contemptui habiti viderentur; ab illisque monitum fuisse Summum Pontificem Romanæ Curia dignitati esse consulendum, solamque Romanam Sedem de fide iudicium ferre posse.

Quidam ab errore Gilbertum vindicabant, asserbantque non tantalem illum inter attributa & essentiam distinctionem admittente; sed solam rationis ratiocinatæ, quam Theologicam vocabant; sed ex superioribus constat, nullum esse excusationis illius fundamentum, & simul æquam fuisse Arnaldi & Calonis Archidiaconorum Pictaviensium ad Eugen. delationem. Ex duobus aliis capitibus idem repeti potest; nempe ex S. Bern. mox citandis contra Porreta scriptis, & ex Radevico, qui historiam Othonis, quæ deerant adiecit; & lib. 1. c. 11. Othonem scribit Doctorum virorum arbitrio scripta sua subjecisse, si quidquam scripsisse probaretur pro Porretani sententiâ, quod piorum aures laderet.

Abbas Joachimus ad ann. 1173. Petrum Lombard hæreseos incusavit, quòd asseruisset summam rem quamdam esse Patrem, & Filium, & Spiritum Sanctum; & illam non esse generantem. Et visus est idem Abbas, ut refert Matthæus Parisiensis, unitatem non veram & propriam, sed quasi collectivam in Trinitate admittere, qualis est quæ inter Fideles & Ecclesiam. Abbatis autem libellus an. 1215. in Concilio Lateran. sub Innocentio III. damnatus est.

CONCLUSIO I. Distinctio rationis ratiocinatæ, ac virtualis, inter attributa & essentiam divinam est admittenda.

1. Quia illa distinguuntur plusquam ratione ratiocinante, quorum unius notio non includitur in notione alterius, seu quorum unum absque altero cogitari potest; ejusmodi sunt attributa Dei. S. Basil. lib. 1. cont. Eunom. probat aliam simplicitatis, potentia alteram esse notionem. *Quid enim ridiculum non est, si quis procreandi vim ipsam dicat esse essentiam, aut providentiam rursus essentiam, idem præscientiam, ac denique efficientiam, omnem essentiam esse statuat? Quod si omnia ista ad unum significatum pertineant, necesse est ut idem inter se valeant nomina, ut in polyonymis evenit, cum Simonem & Petrum & Cepham eundem hominem dicimus.* Manifestæ insanix esse addit propriam unicuique nomini significationem negare.

Eam S. Greg. Nyss. lib. 1. & 12. cont. Eunom. S. Basilii sententiam ab Eunomii Alumnâ vindicans, idem in Deo contingere probat,

quod in plerisque aliis rebus : quæ cum reverâ unum quid sint simplicissimum, multiplicem tamen notionem ob multiplices proprietates invenientibus ingerunt : quod in grano tritici est cernere ; licet enim unum sit, variè tamen sub variis rationibus spectari potest : ergo res in se una non definit variis conceptibus dividi. Aliam esse rationem in Deo incorrupti, aliam ingeniti docet : ingenitum nempe, significare Deum nullam habere causam : incorruptibilem verò, à nullâ causâ posse destrui, nec notionem unius in altero contineri, seu incorruptibilis in conceptu ingeniti.

1. Personales proprietates ab essentiâ divinâ ratione etiam ratiocinatâ distinguuntur ; quia licet unum quid cum eâ sint, variè tamen concipiuntur. S. Greg. Nyss. in lib. de communi notionem. *Pater eatenus non est Deus, quatenus differentiam à Filio servat ; alioquin Filius non esset Deus ; nam si idè, quia Pater est, idem Pater Deus est : cum Filius non sit Pater, non erit Deus Filius ; Quod si Filius est Deus, non quia Filius est, similiter & Pater, non quia Pater, Deus est : sed quia talis est substantia, unus est Deus Pater & Filius. Quod S. Basil. tradiderat l. 1. adv. Eunom. Ergò si Pater, quâ intelligitur Pater, non est Deus, alia est reverâ notio Patris à divinâ naturâ. Idem lib. 2. Personarum proprietates, formas, characteres, notas vocavit : *Hæc est natura proprietatum in identitate substantiæ distinctionem ostendere.* Denique S. Aug. lib. 8. de Trin. c. 4. ait : *Aliud Deum esse, aliud Patrem esse ; sunt quidem unum in se paternitas & essentia : nefas tamen dictu Patrem paternitate esse Deum, paternitate sapientem, &c.**

Distinctio autem illa rationis, quæ essentiam inter & attributa occurrit, repetitur ex rei eminentiâ : aut ex variis affectibus, qui Deo tribuuntur & cum nostris componuntur : aut ex pluribus Dei operibus, quæ Deus in nobis efficit, aut quibus ad creaturarum administrationem uti concipiuntur : & sic hæc distinctio petitur ab extrinseco.

O P P. 1. Attributa Dei una & eadem res sunt ; nam, ut habet apud S. Greg. Nyss. Eunomius, ingenitum est idem attributum cum immortali : alioquin Deus, quâ ingenitus est, non esset immortalis, quod falsum est ; si enim quâ ingenitus, non esset immortalis, esset mortalis : at non potest dici mortalis ; simul enim esset mortalis & immortalis.

R. 1. Ingenitum, quâ ingenitum, seu explicite spectatum non esse immortale, quamvis ingenitum implicite spectatum sit immortale, prout implicita est ingeniti & immortalis notitia. Licet autem non concipiatur statim quid immortale, cum ingenitum in mentem venit : non inde sequitur ingenitum habendum esse mortale : aliud enim est unum ab altero, cui conjunctum est, separatim contemplari : aliud affirmare illud ab eo separatum esse : seu aliud est rem concipere præcissione abstractiva, aliud concipere præcissione negativâ ; qui concipit ingenitum v. c. præcissione abstractivâ, nec negat, nec affirmat illud esse mortale, aut immortale ; qui verò diceret ingenitum non esse, aut mortale, aut immortale, negativâ præci-

sione illud apprehenderet; & proinde necesse non est, ut qui concipit ingenitum, apprehendat illud, ut mortale, vel immortale.

Equidem attributa omnia sunt unum quid realiter: sed nihilominus variam habent intelligibilitatem, variasque definitiones: quæ quidem varia intelligibilitas nihil addit Deo intrinsecum: & idè extrinseca est, nisi intrinseca dicatur ratione fundamenti, seu eminentiæ divinæ, quæ nonnisi variis conceptibus à nobis apprehendi potest; licet autem Dei justitia v. c. virtute sit multiplex, seu variis præstet, puniat & remuneretur, non multiplex dicenda est: cum in promptu sit eandem virtutem apprehendere, quæ multa & diversa possit efficere.

Instari potest 1. ex S. Basil. Epist. 8. quæ de Deo dicuntur proprietates, esse tantum varia nomina, quæ idem significant. *Omnes Deo convenientes tam notiones, quam voces, ejusdem sunt inter se dignitatis: quòd nullum habent in subjecta rei significatione discrimen: non enim ad rem aliam subjectam velut manu deducit intelligentiam nostram appellatio boni, ad aliam item sapientis & potentis & justì; sed quæcumque dixeris nomina, unum idemque per omnia significatur; ac si Deum proferas, eundem ostendisti, quem & cæteris vocabulis intelligis.*

R. S. Basilium & alios Patres, qui eandem loquendi formam adhibuerunt, distinctionem virtutalem non exclusisse: cum eam adversus Eunomium tam constanter stabilierint, ut ex superioribus compertum est. Undè cum ita loquuntur, nihil aliud intendunt, quàm omnes Dei proprietates, seu attributa relativa, aut absoluta, cum seorsim sumuntur, unam divinam naturam designare, seu subjectum, cui adscribuntur; Deum esse. Indè inferunt, ut Epist. citatâ S. Basil. Spiritum Sanctum Deum esse: cum omnia vocabula, seu attributa quæ de Deo dicuntur, Spiritui Sancto in Scripturis tribuantur.

Inst. 2. Divinæ perfectiones non possunt sine se invicem agnosci: quia habent eandem intelligibilitatem, ut loquimur in scholis, seu veritatem: quæ quidem veritas non potest esse multiplex; alioquin non esset infinita in genere veritatis: non enim omnem veritatem includeret.

R. Veritatem esse duplicem in Deo: aliam transcendentem, seu entis proprietatem, quæ omnibus attributis competit, ut esse unum, &c. aliam quæ sit veracitas, ita ut habeat quodlibet attributum singularem suum conceptum. Veritas transcendens divina in veritatis genere infinita prorsus est; veracitas verò, cum ex nostrâ intelligendi ratione ducatur, mentis nostræ vires non excedit, nec attributorum rationes nisi divisas assequitur.

Inst. 3. Sequeretur inde, eandem entitatem simplicissimam cognosci posse & non cognosci: quod non minus implicat, quàm rem unam & eandem existere simul & non existere.

R. Unam & eandem entitatem virtute multiplicem cognosci posse, & non cognosci sub diversâ ratione, præsertim Dei attributa, ob divinam simplicitatis eminentiam, & intellectus nostri infirmitatem. Nec

eadem est ratio cognitionis saltem abstractivæ alicujus rei, ac ipsius rei existentia: nam existentia pertinet ad rem secundum se totam, & ut in se est; cognitio verò saltem abstractiva respicit objectum sub ratione diversâ consideratum.

O P P. Illa distinctio esset intrinseca, & proinde realis.

R. Intrinsecam esse fundamentaliter, extrinsecam autem formaliter; nec se tenere ex parte rei, sed nostri, ob summam Dei eminentiam, ut jam explicuimus.

Inst: Si hoc fundamentum valeret, eadem virtus distingueretur à seipsâ virtualiter, quia æquivaleret multis, v. c. Justitia, quia punit & remuneratur.

R. Non sequi: nam in promptu est apprehendere eam justitiam v. c. quæ modò pœnas infligit, præmia modò rependat; nostræ verò mentis tenuitatem arguit distinctio illa, quam ponit inter attributa Dei, quod rem numeris omnibus absolutissimam variis in conceptus partitur, institutâ cum rebus imperfectis comparatione, ut eam aliquatenus assequatur conceptu.

O P P. 3. Ab essentiâ divinâ non magis distinguuntur quæ sunt in Deo absoluta, quàm quæ relativa, quæ ne ratione distinguuntur ab essentiâ, ex Conc. Remensi Eug. III. præside: *In Theologiâ inter essentiam & personam, ratio non distinguit.*

R. Concilium Remense, verbis in objectione relatis errorem Gilberti Porretani proscribere, qui, ut ex variis S. Bernardi locis colligitur, assererat relationes divinas esse Deo veluti extrinsecus affixas; ac ideo ab essentiâ Dei ratione, non tantum Mathematicâ, sed etiam Theologicâ distinctas; hoc est admittebat, distinctionem quamdam realem inter essentiam & personas, quam rationis Theologicæ distinctionem dicebat; quod unum proscripsit Remense Concilium.

CONCLUSIO II. Attributa divina absoluta, seu relativa aut personalia non distinguuntur ab essentiâ divinâ distinctione reali majori, vel minori seu modali.

1. Ita definit Concilium Remense mox relatum in formulâ fidei, quam Gallicani Præsules obtulerunt, *Credimus simpliciter naturam divinitatis esse Deum, nec aliquo sensu Catholico posse negari, quin divinitas sit Deus & Deus divinitas.* Ac subinde nonnisi eâ divinitate quæ est Deum esse.

Sic postmodum Conc. Later. IV. c. 2. cont. Joach. Abb. juxta doctrinam à S. Aug. expositam de fide: *Quod una quedam summa res est incomprehensibilis quidem & inestimabilis divina essentia, quæ veraciter est Pater, & Filius, & Spiritus Sanctus, tres simul Personæ, ac singularem qualibet earumdem: & ideo inde Trinitas est solummodo, non quaternitas: quia qualibet trium Personarum est illa res, videlicet substantia, essentia, sive natura divina.* Quam doctrinam Catholicam exponit ita S. Bern. contra Porretan. Serm. 8. in Cantic. *Si divinitas non est reipsa Deus, erit aliquid quod non est Deus, aut nihil, Quod si aliquid est quod non est Deus: aut minor erit Deo, aut major, aut pars: At quomodo minor, quia Deus est? Restat ut aut majorem facias, aut parem: sed se major*

major, ipsa est summum bonum, non Deus; si par, duo sunt summa bona, non unum: quod utrumque Catholicus refugit sensus.

Deus ergò necessariò est sua justitia, &c. nam si non est justitia, differt à suâ justitiâ; si enim esset sua justitia, non differret ab eâ, nihil enim ab eo quod est, seu à seipso differt; si à justitiâ differret, non esset ex se justus, sed per justitiam à se distinctam, &c. Implicat igitur Deum concipere, quin justus sit à suâ justitiâ.

Ultimò in Deo omnis distinctio realis, vel ex relatione, vel ex aliquâ oppositione oritur. Inter autem essentiam & attributa relativa non est relatio, neque oppositio; nec etiam inter essentiam & attributa absoluta; quòd omnia in divinis sint unum, ubi non est relationis oppositio.

CONCLUSIO III. Non est admittenda distinctio formalis Scotistica inter attributa, & essentiam divinam.

1. Quæ rationes distinctionem realem ab essentiâ divinâ removeant, eadem formalem etiam distinctionem excludere videntur. Quia inter ea quæ sunt à parte rei sejuncta, seu inter duas entitates ante omnem mentis operationem à se invicem distinctas, distinctio realis esse videtur. Deinde si attributa distinguerentur formaliter & à parte rei ab essentiâ divinâ, aliquo sensu Catholico dicere liceret, Divinitas Deus non est: quod in Concilio Remensi reprobaturum est. Denique nec in Deo admitteretur simplicitas summa: nam longè major ea est quæ distinctionem virtualem solam agnoscit.

OPP. 1. Pro distinctione reali. Distinguuntur realiter ea quorum sunt diversa objecta, & diversæ operationes. At objectum intellectus divini v. c. est veritas, objectum voluntatis est bonum aut malum: intellectus intelligit, voluntas autem vult. Ergò, &c.

R. Hæc dici posse de potentiis finitis, quæ non contineant eminenter aliarum potentialium facultates, quales sunt visus, & auditus v. c. id verò esse falsum de potentiis infinitis, cujusmodi sunt intellectus & voluntas divina. Rationalis anima eadem animæ vegetativæ & sensitivæ operationes elicit, quòd eminenter contineat animæ sensitivæ & vegetantis virtutes: similiter Deus non variis actibus, sed unico actu vult, & intelligit. Porro licet non dicamus intellectum velle, & voluntatem intelligere, id non arguit in Deo intellectum inter & voluntatem distinctionem; sed intellectus nostri defectum, qui varios in conceptus partitur, quæ rebus variis æquivalent. Immò juxta opinionem eorum qui voluntatem inter & intellectum humanum reale non ponunt discrimen, eadem facultas diversos actus elicit. 2. Omnipotentia divina varia certè opera producit, & nihilominus à se ipsâ est indistincta.

INST 1. De quibus contradictoria dicuntur, realiter distinguuntur: essentia divina dicitur communicari posse: paternitas verò communicari non posse.

R. Virtualem distinctionem parem esse, ut quæ contradictoria videntur, de Deo dici possint; cum enim aliquid unum, est virtute mul-

tipler, multis æquivaler: sicut autem de multis diversa possunt efferti, ita possunt & de eo quod ipsis æquivaler; undè nunc contradictioni locus non est; nam contradictoria definunt esse talia, cum non sub uno & eodem sensu enuntiantur. Idem dicendum de illis, quæ varias definitiones habent, ut de actione & passione, licet sint una & eadem res.

INST. 2. Si paternitas realiter non distinguitur ab essentiâ divinâ, paternitas & filiatio erunt formaliter quid unum; sunt enim formaliter quid unum in uno tertio, nimirum in essentiâ divinâ.

R. Quæ sunt eadem uni tertio esse eadem inter se, si sint absoluta, & se invicem non excludant: non verò si sint relativa & se invicem excludant. Paternitas ergo & filiatio non sunt quid idem inter se, licet identificentur essentiæ divinæ; cum sint personalitates, seu relativæ subsistentiæ, & se invicem excludant. Pater enim nec esse, nec concipi potest Filius.

2. Responderi potest: Quæ sunt eadem uni tertio adæquatè sumpto, esse quoque eadem inter se; secus, si sint tantum eadem uni tertio inadæquatè sumpto. Porro attributa relativa sunt solum quid idem cum essentiâ divinâ inadæquatè spectatâ: non autem adæquatè; hoc est non sunt quid idem cum essentiâ divinâ pro omnibus suis significatis acceptâ v. c. Paternitas divinâ non est quid idem cum essentiâ, pro Filio vel Spiritu Sancto sumptâ. Quod & illustratur exemplo Petri, qui non est quid idem cum homine pro omnibus humanæ naturæ individuis accepto. Addi potest adhuc cum præstantissimis Theologis, præfatum axioma habere duntaxat locum in rebus creatis, non in Deo: in quo propter infinitatem, potest eadem numero natura in tribus personis realiter distinctis subsistere.

INST. 3. Quæcumque sunt æqualia uni tertio, sunt etiam æqualia inter se. Ergo similiter quæ sunt eadem uni tertio quomodocunque, sunt quoque eadem inter se.

R. Non esse eandem rationem axiomatis utriusque Philosophici: quia constat apud omnes æqualitatem consistere in indivisibili: quocirca necesse est ea quæ sunt æqualia uni tertio, esse necessario æqualia inter se; licet non oporteat inferre, illa quæ sunt eadem uni tertio, esse semper eadem inter se.

OPP. 2. Non sufficit distinctio virtualis ut possit essentia videri sine attributis intuitivè: igitur nec ut possit communicari non communicatâ Paternitate; quia istud est intrinsecum, aliud autem extrinsecum.

R. Non posse videri unum attributum sine alio, quia de ratione visionis est intuitivæ, ut adæquata sit, & perfectissima: alioquin videretur, & non videretur Deus intuitivè: de ratione verò personæ est, ut non possit communicari, quia relativè opponatur. Imò quæ relativè opponuntur, non possunt videri sine se invicem.

INST. Oppositio omnium summa debet constituere maximam distinctionem; posse communicari & non communicari, omnium oppo-

sitionum summa est, contradictoria scilicet: Ergo debet constituere maximam distinctionem, & proinde realem inter Paternitatem & essentiam divinam.

R. Licet ea oppositio sit omnium maxima, quia est inter ens & non ens, non proinde constituere realem distinctionem.

Q. Num essentia & existentia in Deo distinguantur vel ratione.

R. Non distingui, adæquatè saltem; quia essentia Dei non potest concipi indifferens ad existere & non existere; nam, ut probatum fuit 1. Quæstione, nemo concipit quid Deus sit, quin statim existere Deum apprehendat. Aliquantenus tamen distinguuntur inadæquatè: alius est enim conceptus essentia quatenus est essentia, seu prima radix operationum & proprietatum: alius est existentia conceptus, quo aliqua res extra causas intelligitur; eâ ratione fit ut habitualement essentiam secernat animus ab actuali essentia: non verò essentiam actualem ab existentia actuali, qualis est divina.

ARTICULUS QUARTUS.

Quid in Deo sit quod videatur primum habere locum differentie.

HIC non quærunt Theologi, quanam reverà sit perfectio, quæ Dei essentiam referat, cum profiteantur ignotam sibi eam esse; sed in hoc insistant disputando, ut, quid ad Dei essentiam nobis proponendam videatur magis conferre, doceant. alii autem stant pro actuali divinâ intellectione, alii pro aliis perfectionibus divinis. Nos verò pro Dei independentia:

CONCLUSIO Summum esse, seu esse à se & necessariò, aut omnimoda independentia locum differentia in Deo obtinere videtur.

1. Illa perfectio pro gradu essentia divinæ specificativo, ut loquuntur, est habenda, si quæ sit definienda, quam tradere videntur Scripturæ, & Sancti Patres Scripturarum Interpretes: nam ex S. Hil. lib. 3. de Trinit. *Nobis loquendum non aliter de Deo, quam ut ipse ad intelligentiam nostram de se locutus est.* Ita autem de se ipso Deus Exod 3. v. 14. interrogatus à Mose, quis esset? respondit: *Ego sum qui sum*, & ipse Moses ad Israëlitas: *Qui est, misit me*: Eadem vox repetitur, quæ existentiam significat, per modum videlicet prædicati, ut demonstretur in Dei substantiâ idem subjectum esse cum attributo; ita ut Deus existat per existentiam, quæ eadem sit cum ejus essentia. Verba ergo hæc: *qui est*, idem sunt ac qui est existens, seu necessariò existens, à se subsistens, & cujus beneficio cætera existunt; sic verè solus propriè existit. Ita S. Hier. in 3. c. Ep. ad Ephes. *In Exodo, inquit Dominus, Ego sum qui sum: Et hæc dices filiis Israël, qui est misit me ad vos: numquid solus Deus erat, & cætera non erant? utique Angeli, cælum, terra, & maria, & ipse*

Moses cui Dominus loquebatur, & Israël, & Aegyptii ad quos, & contra quos Princeps & adversarius mittebatur, erant; & quomodo nomen commune substantia sibi proprium vindicat Deus? illa, ut diximus, causa, quia cetera, ut sint, Dei sumpsere beneficio: Deus verò qui semper est, nec habet aliundè principium, & ipse sui origo est, suaeque causa substantia: nec potest intelligi aliundè habere, quòd subsistit.

Sic antea S. Clem. Alex. 1. Pedag. c. 8. docuerat nomen illud o *in* Deo maxime esse proprium. Quoniam illud exprimit qui revera solus est, qui erat, & est, & erit: quibus significandis temporibus unum nomen impositum est, qui est.

1. Illud esse à se est quid primum in Deo, & radix omnium Dei perfectionum, ut immutabilitatis, & ipsius intellectus actualis. Immutabilitatis quidem ex S. Aug. lib. de fide c. 4. Quod enim verè est, incommutabiliter manet: quoniam quod mutatur, fuit aliquid quod jam non est: & erit quod nondum est, Et Tract. in Psal. 121. in hæc verba: Cujus participatio ejus in idipsum. Quid est quod est? quod æternum est. Nam quod semper aliter atque aliter est, non est: quia non manet: non omnino non est, sed non summe est. Est etiam radix ipsius actualis intellectus, seu sapientiae divinae, & infinitatis & reliquarum perfectionum: Quod autem in Deo primum occurrit animo, undè cetera manant, debet à nobis concipi ut Essentia Dei. Intellectio verò actualis, & infinitas, menti nostrae non se se offerunt, ut quod est primum in Deo, sed ut quod emanat ex alio. S. Chrysost. Orat. 1. de incomprehens. Dei naturâ, non à Sapientiâ substantia est, sed ex substantiâ sapientia est. Et S. Dionys. lib. de divinis nominibus c. 5. Ante alias omnes ipsius participationes ipsum esse producit, estque ipsum per se esse antiquius, quam ipsissimam esse, & ipsissimam esse vitam similitudinem divinam, ac cetera, quae sic entia participant, ut ante omnia ista ipsum esse participant: imò verò illa per se omnia, quae entia participant, ipsum per se esse participant: neque ullum est ens, cujus non sit essentia & duratio, ipsum esse: quamobrem jure principalius omnibus aliis, tanquam ens Deus ex dono ceteris omnibus suis donis antiquiore predicatur. Hoc enim ipso quod est ante omnia & supra omnia, est omnibus antecellens atque ipse superans, totum ipsum per se esse prius, & ipsemet esse id omne, quod quoquomodo est produxit. Itaque principia rerum omnia esse participantia & sunt & primum sunt, deinde principia sunt. Et revera intellectio actualis, & infinitas nostro concipiendi modo supponunt aliud, ex quo dimanant: prius enim à nobis intelligitur esse quam operari; prius ergo Deus apprehenditur ut existens, quam actu intelligens, aut infinitis ornatus perfectionibus.

Tandem Essentiae divinae rationem non habet intellectio actualis. Nam 1. non distinguere videtur Deum à creatis rebus, cum aequalem intellectum communicari creaturis non implicet. 2. Nec est potior ratio, cur intellectio actualis dicatur Essentia Dei quam volitio? tam enim convenit Deo actu velle, quam actu intelligere. 3. Intellectio actualis

non est radix omnium Dei attributorum; quis enim dixerit Deum v. c. esse immensum, quia actu intelligit?

O P P. 1. Istud non potest differentiae rationem in Deo obtinere, quod non exprimit naturam Dei: nec quid dicit positivum, sed negationem & modum duntaxat quo Deus non est, seu amovet tantum imperfectionem à Deo, nempe quòd Deus à nullo sit factus: Esse à se, seu esse ingenuum tale est, ex SS. Basil. Greg. Naz. & Greg. Nyss. contra Eunomium.

R. Patres illos merito probare vocem, ingenuum, totam Dei naturam non exhibere: quod Eunomius existimabat. 2. Esse à se & non ab alio duo designare: nempe exclusionem principii à quo Deus sit: & perfectionem existentiae, quae ita Deo conveniat, ut alteri competere non possit. 3. Attributa negativa, non esse meras negationes, sed affirmationes, quae Dei perfectiones per excessum quendam significant.

I N S T. Illud attributum independentiae, seu esse à se, non distinguit Dei essentiam à cæteris attributis, & includitur in conceptu formali cæterorum attributorum; nam v. c. misericordia divina in conceptu suo formali est independens, seu non est ab alio: & sic non habet locum differentiae.

R. Misericordiam divinam esse independentem, seu non esse ab alio tanquam à principio & à causâ; sed concipi esse ab alio tanquam à fundamento; nam supponere videtur bonitatem summam, & bonitas summa supponit esse ens à se: non autem esse à se præsupponit principium, nec causam, nec fundamentum.

O P P. 2. Illa perfectio est differentia Dei, quae est omnium summa: talis est intellectio actualis; utpotè entis actualis summa & prima perfectio.

R. Eam non esse omnium divinarum primam perfectionem; cum non sit aliarum perfectionum principium: imò ens perfectissimum tanquam fundamentum supponat. Intelligit ergò Deus ratione perfectissimâ, utpotè perfectissimum ens.

I N S T. Pro viventis perfectissimi differentia haberi debet vitae ratio absolutissima: vivere autem in Deo, est intelligere perfectissime; è contra verò independentia nihil vitale, seu quod ad vitam pertineat menti subicit.

R. Intelligere actu esse quidem gradum perfectissimum: sed non primum, nec esse cæterorum radicem; independentiam, seu summum esse, existendi rationem præstantissimam significare, & proinde vitalem intellectu suo comprehendere. Addimus ex S. Hilar lib. 2. de Trin. in hæc verba, Ego sum qui sum: *Admiratus sum tam absolutam significationem quâ natura divina incomprehensibilem cognitionem, aptissimo ad intelligentiam humanam sermone loqueretur. Non enim aliquid magis proprium Deo, quàm, esse, intelligitur: quia idipsum quod est, neque desinentis est aliquando, neque cœpti.*

Moses cui Dominus loquebatur, & Israël, & Aegyptii ad quos, & contra quos Princeps & adversarius mittebatur, erant: & quomodo nomen commune substantia sibi proprium vindicat Deus? illâ, ut diximus, causâ, quia cetera, ut sint, Dei sumpsere beneficio: Deus verò qui semper est, nec habet aliundè principium, & ipse sui origo est, sueque causa substantia: nec potest intelligi aliundè habere, quòd subsistit.

Sic antea S. Clem. Alex. 1. Pedag. c. 8. docuerat nomen illud o in Deo maximè esse proprium. Quoniam illud exprimit qui reverà solus est, qui erat, & est, & eris, quibus significandis temporibus unum nomen impositum est, qui est.

1. Illud esse à se est quid primum in Deo, & radix omnium Dei perfectionum, ut immutabilitatis, & ipsius intellectiois actualis. Immutabilitatis quidem ex S. Aug. lib. de fide c. 4. Quod enim verè est, incommutabiliter manet: quoniam quod mutatur, fuit aliquid quod jam non est: & eris quod nondum est, Et Tract. in Psal. 121. in hæc verba: Cujus participatio ejus in idipsum. Quid est quod est? quod æternum est. Nam quod semper aliter atque aliter est, non est: quia non manet: non omnino non est, sed non summè est. Est etiam radix ipsius actualis intellectiois, seu sapientiæ divinæ, & infinitatis & reliquarum perfectionum: Quod autem in Deo primum occurrit animo, undè cetera manant, debet à nobis concipi ut Essentia Dei. Intellectio verò actualis, & infinitas, menti nostræ non se se offerunt, ut quod est primum in Deo, sed ut quod emanat ex alio. S. Chrysost. Orat. 1. de incomprehens. Dei naturâ, non à Sapientiâ substantia est, sed ex substantiâ sapientia est. Et S. Dionys. lib. de divinis nominibus c. 3. Ante alias omnes ipsius participationes ipsum esse producit, estque ipsum per se esse antiquius, quàm ipsissimam esse, & ipsissimam esse vitam similitudinem divinam, ac cetera, quæ sic entia participant, ut ante omnia ista ipsum esse participant: imò verò illa per se omnia, quæ entia participant, ipsum per se esse participant: neque ullum est ens, cujus non sit essentia & duratio, ipsum esse: quamobrem jure principalius omnibus aliis, tanquam ens Deus ex dono ceteris omnibus suis donis antiquiore predicatur. Hoc enim ipso quod est ante omnia & supra omnia, est omnibus antecellens atque ipse superans, totum ipsum per se esse prius, & ipsemet esse id omne, quod quoquomodo est produxit. Itaque principia rerum omnia esse participantia & sunt & primum sunt, deinde principia sunt. Et reverà intellectio actualis, & infinitas nostro concipiendi modo supponunt aliud, ex quo dimanant: prius enim à nobis intelligitur esse quàm operari; prius ergo Deus apprehenditur ut existens, quàm actu intelligens, aut infinitis ornatus perfectionibus.

Tandem Essentiæ divinæ rationem non habet intellectio actualis. Nam 1. non distinguere videtur Deum à creatis rebus, cum actualem intellectioem communicari creaturis non implicet. 2. Nec est potior ratio, cur intellectio actualis dicatur Essentia Dei quàm volitio? tam enim convenit Deo actu velle, quàm actu intelligere. 3. Intellectio actualis

non est radix omnium Dei attributorum; quis enim dixerit Deum v. c. esse immensum, quia actu intelligit?

O P P. 1. Istud non potest differentiae rationem in Deo obtinere, quod non exprimit naturam Dei: nec quid dicit positivum, sed negationem & modum duntaxat quo Deus non est, seu amover tantum imperfectionem à Deo, nempe quòd Deus à nullo sit factus: Esse à se, seu esse ingenuum tale est, ex SS. Basil. Greg. Naz. & Greg. Nysl. contra Eunomium.

R. Patres illos meritò probare vocem, ingenuum, totam Dei naturam non exhibere: quod Eunomius existimabat. 2. Esse à se & non ab alio duo designare: nempe exclusionem principii à quo Deus sit: & perfectionem existentiae, quae ita Deo conveniat, ut alteri competere non possit. 3. Attributa negativa, non esse meras negationes, sed affirmationes, quae Dei perfectiones per excessum quendam significant.

I N S T. Illud attributum independentiae, seu esse à se, non distinguit Dei essentiam à cæteris attributis, & includitur in conceptu formali cæterorum attributorum; nam v. c. misericordia divina in conceptu suo formali est independens, seu non est ab alio: & sic non habet locum differentiae.

R. Misericordiam divinam esse independentem, seu non esse ab alio tanquam à principio & à causâ; sed concipi esse ab alio tanquam à fundamento; nam supponere videtur bonitatem summam, & bonitas summa supponit esse ens à se: non autem esse à se præsupponit principium, nec causam, nec fundamentum.

O P P. 2. Illa perfectio est differentia Dei, quæ est omnium summa: talis est intellectio actualis; utpotè entis actualis summa & prima perfectio.

R. Eam non esse omnium divinarum primam perfectionem; cum non sit aliarum perfectionum principium: imò ens perfectissimum tanquam fundamentum supponat. Intelligit ergò Deus ratione perfectissimâ, utpotè perfectissimum ens.

I N S T. Pro viventis perfectissimi differentia haberi debet vitæ ratio absolutissima: vivere autem in Deo, est intelligere perfectissimè; è contra verò independentia nihil vitale, seu quod ad vitam pertineat menti subijcit.

R. Intelligere actu esse quidem gradum perfectissimum: sed non primum, nec esse cæterorum radicem; independentiam, seu summum esse, existendi rationem præstantissimam significare, & proindè vitalem intellectu suo comprehendere. Addimus ex S. Hilar lib. 2. de Trin. in hæc verba, Ego sum qui sum: *Admiratus sum tam absolutam significationem quâ natura divina incomprehensibilem cognitionem, aptissimo ad intelligentiam humanam sermone loqueretur. Non enim aliquid magis proprium Deo, quàm, esse, intelligitur: quia idipsum quod est, neque desinentia est aliquando, neque cæpi.*

QUÆSTIO QUARTA.

De simplicitate Dei.

ARTICULUS PRIMUS.

Utrum Deus sit corporeus.

ERRORES.

IDOLOLATRÆ omnium primi sibi Deum corporeum finxere, & ut observatum à nobis fuit cum de Idololatriâ agebamus, ita additi sunt homines sensibus, ut vix ab iis divelli possint: Hinc corpus Deo affingere pronum est: quod ita explicat S. Aug. lib. 1. de utilitate credendi c. 1. *Nimis in hæc corporalia progressi atque lapsi nihil aliud putant, quàm quod istis quinque notissimis nuntiis corporis sentiunt: & quas ab iis plagas atque imagines acceperunt, eas secum volvunt, etiam cum conantur recedere à sensibus: & ex eorum mortiferâ & fallacissimâ regulâ, ineffabilia penetrabilia veritatis rectissimè se metiri putant.*

2. Ex Philosophis quidem Epicurei ex S. Greg. Naz. & Stoici Deum corporeum esse existimaverunt, ut habet Plutarch. de placitis Philosophorum c. 7. & Cic. lib. 1. de nat. Deor. Stoicos qui Deum ignem esse statuebant, refellit.

3. Ex Judæis Saducæi Deum esse corporeum credidere: Nam ex Actis c. 23. v. 8. Omnem eos spiritum negasse manifestum est. Arnob. lib. 3. objectionem solvit Ethnicorum petitam ex hac Judæorum sententiâ.

4. Inter Christianos non defuere qui sunt in eundem errorem lapsi, ut Melito Sardens. Episc. ann. 155. Ab Origene damnatur hic error Hom. 1. & 3. in Genes. Et ut refert Q. 20. in Exod. Theodoretus. Cæterum Melito Sardensis nec ab Euseb. lib. 4. Hist. cap. 26. nec à S. Hier. lib. de Scriptor. Eccles. nec ab aliis veteribus hujus accusatur erroris: quin imò & ab Euseb. & à S. Hieron. mirifice commendatur.

5. Manichæi in eadem fuere sententiâ, ex S. Aug. l. contra ep. Fundamenti c. 13. scilicet Deum esse corpus infinitum, & quadrum, superiori parte apertum, & hians inferiori, &c.

6. Ex Theodoro lib. 4. Hæretic. fabul. & lib. 4. Histor. c. 10. Audæus Syrus Deum esse corporeum docuit, his inductus verbis Gen. 1. v. 26. *Faciamus hominem ad imaginem, &c.* Ita quoque S. Aug. lib. de Hæres. c. 50. Audæi discipulos vocat Vadianos, Latinâ forsan S. Epiphaniï versione deceptus: observatque S. Epiphanius ab hæresi vindicasse Audianos, quod eorum ignorantiz parceret. Sed reverâ S. Epiph.

Hæref. 70. de Audæo & ejus discipulis differens, nullâ in re eos à Catholicâ Fide docet dissensisse; durius quidem hæc verba, *Faciamus hominem ad imaginem*, &c. esse interpretatos, utpotè qui imaginem Dei in corpore positam esse contenderent. Ibidem adhuc docet Audæum, & ejus discipulos de Trinitate præclare sentire: quod procul dubio non scriberet, si Deum esse corporeum Audiani asseruissent: Trinitatis enim mysterium stare non posset cum opinione quæ Deo corpus affingeret; coævus autem S. Epiphanio erat Audæus: undè ejus sententiam optimè noverat.

7. Antropomorphitas, seu qui Deum reverâ corporeum extitisse crederent, in Ægypto tempore Arcadii & Honorii, seu circa finem quartæ sæculi fuisse refert Socr. lib. 6. c. 7. hancque sententiam varios in Ægypto morus Episcopos inter & Monachos ejus opinionis fautores excitasse, Theophilumque Alex. à Monachis coactum fuisse eundem errorem, quem damnaverat, profiteri. Idem habet Sozom. l. 8. c. 11.

Priusquam definiamus quid sit sentiendum, operæ pretium est supponere illud simplex dici quod omni compositione caret, seu partibus inter se nexis: seu quod non habet diversas entitates, ut loquitur Novat. lib. de Trin. c. 6. Corpus verò sumi 1. pro quantitate, seu pro tribus dimensionibus, aut alterutrâ. 2. pro materiâ ad formam dispositâ. 3. pro toto aliquo quod ex partibus homogeneis, aut heterogeneis constat.

Compositio autem multiplex est. 1. Physica, constans materiâ & formâ; Logica, ex genere & differentiâ; Metaphysica, ex essentiâ & existentia, potentia & actu. Alia compositionis species est ex subjecto & accidente, vel ex multis accidentibus inter se distinctis, & eadem subjecto inhærentibus.

CONCLUSIO. I. Deus corporeus non est, quocumque sensu sumatur corpus.

1. Quia verè spiritus est, & ubique terrarum, immortalis, & invisibilis, infinitus, & re nullâ indiget; hac priori ratione utitur Christus, Joan. 4. v. 24. ut à cultu divino, qui certo loco additus esset, Samaritanos avocaret. 2. Quod corporeum est, finitum & indigens est; constat enim ex partibus: Pars partem finit, & apparatus partium totum indiget, & partes ipso toto: possuntque dissolvi, cum actu distinguantur. Quod etiam hujusmodi est, non omnium primum est; pars enim omnis naturâ saltem prior est toto: admitendum esset etiam quoddam ens prius, quod illas partes adunaret; & proindè Deus haberet causam sui priorem, &c. Hæc est ferè ratio, quam S. Greg. Naz. Orat. 34. & S. Ambr. Tract. in Symbolum c. 1. fusè prosequuntur.

3. Si compositus esset Deus constaret ex duobus, quorum unum non esset aliud, & quorum unum se haberet per modum potentia, alterum per modum actus: at nihil est hujusmodi in Deo; nihil est enim in Deo, quod non sit Deus; & si quid in Deo esset, quod haberet rationem potentia, Deus non esset perfectissimus, nec actu immutabilis, nam actu posset aliam perfectionem accipere.

Eadem veritas consensu celeberrimorum Philosophorum, ut Platoniorum, nititur ex S. Aug. lib. 8 de Civit. c. 6. qui & L. de moribus Eccles. Catholic. hunc errorem, ut omnium crassissimum, confutat; Origen. lib. 7. cont. Cels. se nolle immorari proficitur in refellendâ objectione, quam de corporeitate Dei Celsus ex quorundam Christianorum simplicitate hauserat, cum Scriptura sacra tam apertè Dei simplicitatem adstrueret. Hom. 1. in Genes. ut impiissimam damnat hanc sententiam. Addi possent, quæ contra Gentes urgebant Apologizæ Christiani, ut Arnob. lib. 3. & 4. Deos nempe qui colerentur non esse Deos: cum varii essent sexûs, & proindè corporci.

O P P. 1. In Scripturis dicitur Deus ex partibus constare, nempe oculis, Exod. 33. v. 13. Psal. 16. v. 2 manu, Psal. 8. v. 7. Psal. 10. juxta Hebr. Text. v. 12. pedibus, cum ambulare dicitur Genes. 3. v. 8. &c. Quæ singula solis rebus corporeis competunt.

R. Novatian. lib. de Trin. c. 5. cum corporis partes Deo tribuuntur, non exhiberi Deum sicuti est: sed plebis intelligentiæ modum loquendi attemperari. *Ut igitur hac sic de Deo dicantur: non Deo, sed populo potius imputetur. Sic etiam cum tabernaculum construi, aut templum adificari imperat Deus, in alterutro Deus includi non est censendus; non igitur mediocris est Deus, sed populi mediocris est sensus: Et infra; Efficacia divina per membra monstrantur, non habitus Dei, nec corporalia lineamenta ponuntur: nam & cum oculi describuntur, quòd omnia videat, exprimitur; & quando auris, quòd omnia audiat, proponitur; & cum digitus, significantia quadam voluntatis aperitur: ut cum nares, precum quasi odorum perceptio ostenditur: & cum manus, quod creatura omnis sit auctor probatur; & quando brachium, quod nulla natura contra robur ipsius repugnare possit edicitur: & quando pedes, quod impleat omnia, nec sit quidquam, ubi non sit Deus, explicatur. Neque enim sunt ei aut membra, aut membrorum officia necessaria, ad cuius solum, etiam tacitum, arbitrium, & adsunt, & serviunt omnia. Ergo Deus cā ratione repræsentatur, ut hominum imbecillitati consulatur: Quod etiam suprâ, & præsertim ex S. Greg. Nyss. fuit observatum; ne autem in errorem inducamur, quæ ad corpus pertinent, à Deo remove solent Scripturæ. Undè cum Deus sumptis variis rerum formis apparuisse dicitur, hanc speciem, non esse Dei naturam admoneant, ut nubem, ignem, &c. Sic lib. 3. Reg. c. 19. v. 11. dicitur; non in spiritu, non in commotione Dominus. & Job c. 10. v. 4. Numquid oculi carnei tibi sunt? &c. Sic monent David Psal. 49. & 86. Salomon lib. 3. Reg. c. 8. v. 27. Isai c. 66. v. 1. Deum nec templo, nec terrâ, nec cælis contineri. Samuel, Sacrificio sui destituta sacrificia qualibet Deo non esse grata lib. 1. Reg. c. 15. v. 29. Apost. Rom. 11. v. 29. Pœnitentiam non decere Deum, Neque enim homo est, ut agat Pœnitentiam. Et alibi immutabilem esse Deum, nec nomen proprium habere, ut Prov. 3.*

O P P. 2. Genes. 1. Ad similitudinem Dei factus est homo: Ergo cum homo sit corporeus, consequens est Deum esse quoque corporeum.

Resp.

Resp. S. Aug. lib. 1. de Doctr. Christ. & in Psal. 48. imaginem Dei non esse in homine, secundum corpus, sed secundum intellectum & rationem: vel, ut habet S. Chrys. Hom. 8. in Genes. imago Dei in homine, est ratione dominii, & principatus quem habet in cæteras creaturas; quamobrem ubi Deus dixit Genes. 1. *Faciamus hominem ad imaginem & similitudinem nostram*, statim addidit, *ut præsit piscibus maris, & volatilibus cæli.*

Dicunt quidam non idè corporis ideam à Deo esse amovendam, quod sit sine partibus; quia pariter materia prima non esset corporea, ut quæ non habeat partes: non attendunt autem, & materiam primam habere partes entitativas, & fieri partem componentem: proindèque in potentiâ esse, ut compositionem ingrediatur.

CONCLUSIO II. Non datur in Deo compositio ex genere & differentiâ.

Probat 1. Quæ compositio ex genere & differentiâ fit, necessariò infert potentiam & actum, speciei vel individui rationem & ideam: at hæc procul à Deo sunt removenda. Sic S. Cyrill. Alex. Dial. 2. de Trin. *Quandoquidem nulla res omninò cum ipso est, aut ante ipsum, sed neque differentia inesse potest aliqua Deo*: In 31. Theauri apud Euth. tit. 3. *Videmus, ait, id omne, quod differentiam recipit, esse compositum, non simplex: Quare cum simplex, minimèque compositus Deus omnium confessione sit, non potest in Deo vera occurrere differentia.*

2. Ubi est compositio ex genere & differentiâ, ibi est aliquid quod se habet per modum potentie, nempe genus; & aliud per modum actûs, nempe differentia: atqui hæc in Dei notione locum non possunt habere. Ita apud Socr. Evagrius Monach. lib. 3. c. 7. *Omnis propositio, aut genus habet quod prædicetur, aut speciem, aut differentiam, aut proprium, aut contingens, aut ex istis compositum: nihil autem jam dictorum de Sanctâ Triade accipiendum est, sed silentio arcanum illius adorandum.*

3. Si Deus constaret ex genere & differentiâ: vel esset species; vel individuum: non potest esse species; possent enim esse plures Dii, velut esse possunt plura speciei individua: Nec individuum esse potest; individuum enim cum aliis ejusdem speciei individuis convenit; quod nequit dici de Deo.

4. Genus aliorum generum, aut differentiarum perfectiones non continet: & differentie certis limitibus rem, quam afficiunt, coërcent. Quæ omnia longè amandanda sunt à Deo; cum Deus omnes omninò perfectiones contineat, & sit infinitus.

OPP. 1. Ex genere & differentiâ compositio simpliciter Dei non officit: ut enim se habet distinctio rationis inter attributa & essentiam respectu simplicitatis divinæ; ita se habet compositio ex genere & differentiâ; hæc enim compositio tantum rationis est.

R. Ex distinctione rationis, quam in Deo concipimus, nostram imbecillitatem argui, simul & divinam eminentiam illustrari: è contra verò

illâ ex genere & differentiâ compositione, aliquam in Deo imperfectionem induci, ut mox fuit probatum.

INST. 1. Ubi cumque est rationis distinctio, ibi quoque reperitur rationis compositio: quandoquidem compositio hæc ex eâ distinctione necessariò sequitur, non secus ac compositio realis ex distinctione reali sequitur.

R. Ad quamlibet compositionem, sive realem, sive virtuales, necessariò quidem exigi distinctionem: quoniam omnis compositio est plurium distinctorum unio: sed aliquid insuper requiritur ad compositionem, quod rationem habeat potentia. Porro nihil est in Deo tale: cum ipse Deus sit actus purissimus, atque simplicissimus: *Simplex esse*, inquit Boëtius in prosa de Trinitate, *simplex posse*, *simplex velle*, *simplex nosse*, *cuncta sunt simplicia*.

INST. 2. Ratio prioris & posterioris non officit Dei æternitati: ergo nec compositio rationis officere potest ipsius simplicitati.

R. Non reperiri in Deo rationem prioris & posterioris secundum naturam, & durationem; benè verò secundum originem. Hæc autem prioritas, quæ divinas inter Personas intercedit, omnium iudicio æternitati Dei non officit: sed est alia ratio de compositione rationis respectu simplicitatis; quia cum supponeret potentiam ex parte Dei, tolleretur in eo rationem actûs purissimi ac simplicissimi.

INST. 3. Non est potior ratio, cur genus & differentia quamdam in Deo inducant imperfectionem, quàm ex categoriis tres, nempe substantia categorica, actio, & relatio. At hæc conveniunt Deo, ex S. August. qui Serm. 38. de Temp. categoriis distinctis decem, addit tres ex illis, nempe substantiam, actionem, & relationem propriè convenire Deo. Nec ità detorqueri possunt ea verba, ut nihil aliud intendisse dicatur, quàm nomen substantiæ Deo propriè adaptari: nec enim asseruisset categorias tres Deo propriè convenire, si de nomine, non de re ipsâ per nomen significatâ agere voluisset; nomen enim qualitatis v. c. tam propriè Deo convenit, quàm nomen substantiæ; tam propriè Deus dicitur bonus, quàm dicitur substantia. Et idem S. Aug. lib. 5. de Trin. c. 10. ait, Deum esse bonum sine qualitate: non verò asserit cum esse substantiam sine substantiâ. In eadem verò sententiâ est S. Joan. Damasc. in c. 7. lib. Institutionis Dialecticæ, ubi substantiæ genere Deum contineri docet, & divinam naturam esse speciem, quæ divinas personas velut individua completatur.

R. S. Aug. lib. 5. de Trin. c. 10. asserere hæc nomina Deo competere analogicè solùm; *Non translate*, inquit, *ac per similitudinem: sed propriè, si tamen de illo propriè aliquid dici ore hominis potest*. Et lib. 7. de Trin. c. 5. concludit *Manifestum esse Deum abusive substantiam vocari*. Sic etiam S. Joan. Damasc. eodem modo est exponendus, ita ut ea nomina generis & speciei metaphoricè & abusive tantùm sumat, nec possit dici Deus contineri sub ente categorico: cum entia illa, seu prædicamenta ad certas perfectiones per differentias suas contrahantur. Adde Deum non posse esse speciem respectu trium per-

sonarum, quia species non est aliquid unum numero pluribus commune; substantia verò divina una numero est communis tribus personis.

CONCLUSIO III. Non datur in Deo compositio realis ex essentia, & existentia: aut ex essentia, & personalitatibus divinis.

Cum essentiam & existentiam, vel ipsa ratione indistinctas esse probaverimus; sequitur nullam fieri compositionem; cum compositio sit multorum, aut saltem duorum distinctorum conjunctio.

Nullam ex essentia & personalitatibus divinis compositionem exurgere probant, 1. S. Basil. Epist. 14. ad Cæsareenses: scribit enim Deum unum esse naturam & numero, & in eo essentiam & personalitates non esse realiter distinctas, ideoque compositionem non constituere. Ita etiam Gregorius Nazianz. Orat. 15.

2. Compositionem non faciunt quæ sunt una & eadem res. At ejusmodi sunt Essentia divina & personalitates, quæ tantum ratione differunt. S. Bern. lib. 5. de consid. ad Eugen. c. 8. sic habet, *Personarum proprietates non aliud quam personas: ipsasque non aliud quam unum Deum, unam divinam substantiam, unam divinam naturam, unam divinam & summam maiestatem, fides Catholica confitetur. Numera ergo, si potes, aut sine substantia personas, quæ ipsa sunt: aut sine personis proprietates, quæ ipsa sunt: aut si dividere quis conetur vel personas à substantia, vel proprietates à personis, nescio quomodo Trinitatis se profiteri cultorem possit, qui in tantam rerum numerositatem excesserit.*

Naturam divinam nihil differre à tribus personis probavimus, & iterum probamus ex S. Athan. lib. de Syn. & de Decr. Nicænæ Synod. *Etenim siquidem Deum aliquis putat esse compositum, ut in substantia accidens aliquod, aut extrinsecus circumfusum velut amictum habere, quæ regitur; vel esse quadam circa ipsum ejus complementa substantia; adeo ut cum nos Deum dicimus, aut nominamus Patrem, non ipsam significemus invisibilem & incomprehensam illius substantiam; sed quippiam eorum, quæ circum ipsam sint: reprehendant Synodum, quæ ex Dei substantia esse Filium scripsit, &c. sed si Deus aliquid est simplex, ut est revera: manifestum est, cum dicimus Deum, & nominamus Patrem, non aliquid appellare, quod circa ipsum sit; sed ipsam ejus designare substantiam. Nullum igitur reale discrimen intercedit, naturam divinam inter, & proprietates personales.*

3. Personalitates divinæ, ut inter se conveniunt, in unius compositionem venire non possunt; cum sint una res, nempe unus Deus: Prout verò à se invicem differunt, non possunt etiam in unum coalescere; sunt enim relativa opposita.

O P P. Ex S. Basil. lib. 2. contra Eunom. complexionem esse in divinitate ex substantia & proprietatibus; *Proprietates, seu notæ quadam & formæ in substantia consideratæ dividunt quidem id, quod commune est propriis characteribus: eandem tamen substantiam non dividunt: exempli causâ, communis est quidem divinitas, proprietates verò quadam sunt, Paternitas & Filietas: ex utriusque porro complexione, videlicet commu-*

nis & proprii, veritatis in nobis comprehensio nascitur. Eadem habet S. Cyrill. Dial. 2. de Trin. nempe Patris naturam simplicem geminatum esse, utpotè compositam ex Patre & ingenito.

R. S. Basil. non admittere complexionem, quæ ex duobus realiter distinctis, communi scilicet & proprio exurgat: sed cum distinctionem rationis, quæ inter divinitatem & proprietates personales intercedat, adversus Eunom. exponere. Ingeniti namque proprietatem & substantiam in unum confundeat Eunomius; & geniti ingenitique discrimen in rationem substantiæ transferre studebat: ut non solum diversas, sed etiam contrarias substantias in Patre & Filio induceret. Porro complexionis vocabulum non adhibuit S. Basil., ut compositionem quamdam innueret, quæ potentiam & actum comites haberet; sed explicuit: unum scilicet in Deo occurrere, quod esset proprium personis, & quod eis esset commune: quod enim neget in Deo esse admittendam compositionem, licet occurrant in eo personæ tres, quia una est in tribus essentia, patet ex his verbis lib. 2. contra Eunom. *Quod si tanquam substantia partem, ingenitum caperemus; haberet locum ea ratio, quæ dicitur compositum esse, quod ex diversis constat. Et postea Habet autem vita consequens, & annexum ingenitum nomen. Compositionis expers is est, qui simplex substantia: non enim proprietatis ipsius indices modi, simplicitatis rationem impediunt.*

INST. Quod ex communi constat & ex proprio, compositum est: in Deo aliquid commune est, scilicet essentia, & aliquid proprium, nempe personalitas. Imò est potentia, & actus; seu quod perficitur, nempe essentia; & quod perficit, scilicet proprietates personales; quia de ratione personalitatis est complete, & ipsæ personalitates divinæ essentiam divinam complent: sic essentiam Dei v. c. determinat Filiatio ad esse Filii.

R. Id verum esse, cum illud commune & illud proprium non sunt quid idem realiter; at in Deo relationes & essentia divina sunt quid unum realiter. Essentia divina utpotè simplicissimus actus, potentix instar spectari non potest, cum & perfectionem quamlibet etiam relativam eminenter contineat. Unde nova illi per personalitates divinas perfectio non advenit: Et idcirco nullâ ex parte cum essentiâ compositionem constituunt divinæ personæ; non ex parte essentix, cum non sit distinctio realis; nec ex parte correlativorum, cum simul nequeant conjungi.

CONCLUSIO IV. Deus non componitur ex substantiâ & accidente.

1. Accidens dicitur, quod de novo substantiæ accedit, & proinde quod substantiâ posterius est, & à substantiâ distinctum: in Deo nihil prius, nihil posterius, nihilque ab eo distinctum; quidquid in Deo est, substantia Dei est; Deus est ipsa bonitas, sapientia; non est per bonitatem à se distinctam bonus; alioquin esset ex parte bonus, & ex parte non esset; substantia Dei non esset ex se bona: sed diceretur bona, quatenus afficeretur qualitate: quod implicat in Deo; quod enim

ita bonum est, per participationem assequitur bonitatem. S. Aug. lib. 5. de Trin. c. 10. & alibi sæpius: in rebus qua participatione magnitudinis magna sunt, quibus & aliud esse, aliud magnas esse, sicut magna domus, &c. In his ergo rebus aliud est magnitudo, aliud quod ab eâ magnitudine magnum est, & prorsus non hoc est magnitudo, quod est magna domus: sed illa est vera magnitudo, quâ non solum magna est domus, qua magna est; & quâ magnus est mons quisquis magnus est, sed etiam quâ magnum est quidquid aliud magnum dicitur, ut aliud sit ipsa magnitudo, aliud ea qua ab illâ magna dicuntur. Qua magnitudo utique primitus magna est, multoque excellentius, quàm ea, qua participatione ejus magna sunt. Deus autem, quia non eâ magnitudine magnus est, qua non est quod est ipse, ut quasi particeps sit ejus Deus, cum magnus est; alioquin illa erit major magnitudo, quàm Deus; Deo autem non est aliquid majus. Eâ igitur magnitudine magnus est, quâ est ipse eadem magnitudo.

2. Quod est in Deo, est idem cum ipso: aut certè vel est substantia, aut accidens ab eo distinctum. Non potest in Deo esse aliqua substantia distincta; Deus enim ex pluribus substantiis constitueretur; & proinde plures essent Dii, quod implicat. Nec accidens est distinctum: Deus enim esset mutationi obnoxius, & posset perfici novo adveniente accidente.

3. In Deo si sit accidens: vel illud ab extrinseco accepit, vel à se; vel illud posset amittere, vel non. At hæc omnia arguerent in Deo, & dependentiam à causâ, & imperfectionem, & mutabilitatem.

Ultimò. Quod perfectissimum est & immutabile, non potest esse subjectum accidentis; nam non potest esse in potentiâ, nec perfectionem novam suscipere: Deus autem perfectissimus est, & immutabilis. Ita S. Aug. lib. 5. de Trin. c. 4.

O B J. Multa de novo Deo accidunt: nam ex Tert. lib. contra Hermog. c. 3. Deus Domini titulum ab æterno non habuit; cum enim inferret Hermog. materiam ab æterno esse admittendam, alioquin Deum mutationi obnoxium futurum fuisse; quippè qui tunc solum Dominus esse cœpisset, cum materia fuisset producta: hac consequentiâ admittens, Tertullian. addit Deum dictum fuisse Dominum, ex quo subditos, in quos dominium suum exerceret, habuit; Nam ex quo esse cœperunt in qua potestas domini ageret, ex illo per accessionem potestatis & factus & dictus est Dominus. Idem libro de Resurrect. carnis cap. 14. ait Justitiam advenisse Deo. Accipe igitur & causam, qui apud Deum discis tam optimum quam & justum, de suo optimum, de nostro justum; nisi enim homo deliquisset, optimum solummodo Deum nosset ex natura proprietate: at nunc etiam justum cum patitur ex causa necessitate, tamen & hoc ipso optimum Deum & justum.

R. Attributiona illa, Dominus, Judex, posse spectari, vel per ordinem ad potentiam divinam, & eo sensu æterna esse; vel per ordinem ad res creatas, & sic esse temporalia; neque ideo mutationem, seu perfe-

tionem recentem advenire Deo : nam recens adveniunt relationes , & tamen mutationem non arguunt in re , quæ referri incipit ; sed in eâ , quæ incipit esse talis : sic v. c. non mutatur paries albus , cum incipiunt plures parietes dealbari , sed mutantur illi parietes , qui dealbationem illam consequuntur. Ita mutata sunt res creatæ , ubi creatæ sunt , & Dei imperio subjici cœperunt , sed non mutatus ipse Deus , qui eas creavit , ex S. Aug. lib. 5. de Trin. c. 16.

CONCLUSIO ultima. Non datur in Deo compositio virtualis , nec formalis.

1. Quia omnis compositio infert necessariò rationem potentia & actûs : quæ in Deo admitti non potest ullatenus , quandoquidem imperfectionem in Deum induceret : & sicut in Deo admitti non potest dependentia , contingentia , & mutabilitas virtualis ; ita etiam nec compositio virtualis.

2. Dicit compositio omnis participationem , & quidquid est compositum , id essentialiter non est tale , v. c. non potest admitti compositio in Deo ex æternitate & essentiâ ; sequeretur enim Deum non esse actû & essentialiter æternum ; ipsaque æternitas prior esset Deo , quem æternum constitueret.

Deinde si in Deo occurrerent quædam actû distincta , ex quibus compositio constitueretur , constaret Deus ex iis , quæ possent separari , quod implicat.

Denique S. Aug. lib. 6. de Trin. c. 6. & 7. *Tandem Deus est suum esse , & omnium maxima Deo tribuenda est unitas.* Major est autem unitas negans compositionem omnem.

O B J. Est in Deo ratio principii & principiat.

R. Esse inter personas , non inter essentiam & attributa , per conceptum saltem fundatum in Deo : alioquin attributum non æquivaleret essentiæ.

ARTICULUS ULTIMUS.

Quid de simplicitate Dei censuerit Tertullianus ?

DE Dei simplicitate non rectam fuisse Tertull. sententiam censuerunt quidam , ex S. Aug. de Hæres. Hanc autem suspensionem à viro de Ecclesiâ tam benè merito procul amovendam censemus.

CONCLUSIO. Tertullianus , Deum esse corporeum , seu ex materiâ & formâ constitutum non existimavit.

Probatur. Qui Deos Gentium pro Diis non esse habendos censuit , præsertim quòd essent homines corporei : qui naturam Dei ita describit , ut cum dicat spiritum , & simplicitatem omnium summam Deo tribuat : qui Trinitatis Sanctissimæ dogma , quod cum Dei corpore nullatenus potest consistere , contra hæreticos constanter propugnavit , ille à sententiâ , quæ Deo corpus affingit , alienus longè fuit. At Tertull. adversus Gentium Deos pugnavit felicissimè in Apol. c. 10. ostenditque 1. pro Diis homines non posse coli , qui proindè corpore constarent.

2. Idem Tert. Apol. cap. 17. ait Deum unum à Christianis coli, corporum & spirituum creatorem ex nihilo; invisibilem, incomprehensibilem, immensum, & proinde sine corpore: quod enim corpore constat, in loco contineri necesse est: Deum autem in loco esse, negat ipse in libro contra Praxeam c. 5. *Ante omnia Deus erat, solus ipse sibi & mundus, & locus, & omnia.* Et c. 14. dicit Patrem esse invisibilem pro plenitudine majestatis.

3. Simpliciter omnium summam Deo tribuit lib. de Bapt. c. 2. Nam opponit simplicitatem operum divinorum, seu sacramentorum sine sumptu, eorum magnificentiam in effectu; demitti scilicet docens in Baptismo hominem in aquam, & inde aternitatem consequi; Idolorum verò solemniam de apparatu auctoritatem sibi conciliare; hincque fidem nostram quæ Deo simplicitatem tribuit, Ethnorum errori opponit: *Proh! misera incredulitas, quæ denegas Deo proprietates suas, simplicitatem & potestatem.* Simplicitas igitur sicut & omnipotentia pertinent ad essentiam Dei. Cum Dei naturam exprimit, ut lib. 1. contra Marcio. ita definit lib. 1. cap. 3. *Deum summum esse magnum, & formam, & rationem, & vim, & potestatem:* Deum negare qui illi hæc aufert. Quomodo autem Deus erit quid summum, & formam, & rationem, nisi corporis expertus fuerit? Longè enim præstantior est simplicitas corpore.

4. Nec potest consistere dogma de Trinitate, prout ab eo exponitur, cum doctrinam de Dei corpore: hinc ubi de eo agit mysterio, non modò Deum spiritum vocat, sed ea profert, quæ cum corporearum naturarum ideam consistere non possent: ut quòd Pater, & Filius, & Spiritus Sanctus sint spiritus, unus Deus, unius substantiæ & naturæ. In Apol. cap. 21. ita de Christo disserit. *Hunc ex Deo prolatum didicimus, & prolatione generatum: & idcirco Filium Dei, & Deum dictum ex unitate substantiæ; nam & Deus spiritus: & cum radius ex Sole porrigitur, portio ex summa; sed Sol erit in radio; quia Solis est radius; nec separatur substantia, sed extenditur; ita de spiritu, spiritus; & de Deo, Deus, ut lumen de lumine accensum.* Deus ergo ex ipso procedens, Deus de Deo est, ita spiritus de spiritu est. Idem cap. 11. lib. de pudicitia sic habet, *Nam & Ecclesia propriè, & principaliter ipse est spiritus, in quo est Trinitas, unius divinitatis Pater, & Filius, & Spiritus Sanctus.* Denique in lib. contra Praxeam totus est, ut probet unius & ejusdem substantiæ esse Patrem, & Filium, & Spiritum Sanctum c. 2. *Unius autem substantiæ, & unius status, & unius potestatis, quia unus Deus ex quo, & gradus isti, & forma, & species in nomine Patris, & Filii, & Spiritus Sancti deputantur.* Quam ratione autem fieret, ut tria corpora unum corpus essent, & unus Deus; & quo pacto idem Deus esset spiritus, & esset alius à Gentium Diis, quos corporis non expertes venerabantur Ethnici, & quos idèd ut crassiores arguit Tertull. & irridet?

OPP. 1. Tert. Deum dicit corpus, licet sit spiritus: Deum ergò reverà corporum existimat. Id patet ex lib. contra Prax. c. 7. ubi de Dei Filio

agit, in effigie Dei constituto. *In quâ effigie Dei? utique in aliâ, non tamen in nullâ. Quis enim negabit Deum corpus esse, etsi Deus spiritus est? Spiritus enim corpus sui generis in suâ effigie. Sed & invisibilia illa quæcumque sunt, habent apud Deum, & suum corpus & suam formam, per quæ soli Deo visibilia sunt.*

R. Tertull. nomine corporis intelligere substantiam veram & realem, prout inani opponitur, ut refellat Praxeam hæreticum, qui Dei Verbum à Patre non distinguebat, ac rem inanem esse contendebat: ut ergo Dei Filium esse solidum quid probaret, & sui generis effigiem quamdam habere, Deum corpus vocavit: per corpus autem nihil aliud intelligere se significat, quam substantiam: statim enim subjicit: *quantò magis quod ex ipsius substantiâ missum est, sine substantiâ non erit? quæcumque ergò substantia sermonis fuit, illam dico personam, & illi nomen Filii vindico.* Per corpus innuere solebat substantiam realem: undè lib. de Carne Christi c. 11. Hæreticos, qui mortalem esse animam asseriebant, simulque invisibilem, eique corpus detrahebant, confutans, docet nihil posse invisibile esse, nisi non sit: nihil verò posse existere, nisi habeat sui generis corpus. *Nihil enim habens invisibile, quomodo potest invisibile dici? sed ne esse quidem potest, nisi habens per quod sit: cum autem sit, habeat necesse est aliquid per quod est: si habet aliquid per quod est, hoc erit corpus ejus; omne quod est, corpus est sui generis: nihil est incorporale, nisi quod non est.* Undè per corporeum, nihil aliud intellexit, quàm quod reale dicimus.

INST. 1. Nomine corporis intelligit verum corpus, quod Deo tribuit; Spiritum enim Sanctum instar corporis aquis Baptismini superfusum, lib. de Bapt. c. 4. describit; & c. 10. ait portionem Sancti Spiritus à S. Joanne ad Christum convolasse; & ideo S. Joannem ab eo tempore de Christo dubitasse.

R. Tertull. ibi per Spiritum Sanctum aquis baptismatis superfusum, & à Joanne in Christum translatum, nihil aliud intellexisse, quàm virtutem à Spiritu Sancto aquis fuisse inditam, & Sancto Joanni primò infusam, & à S. Joanne in Christum transisse. Illam loquendi rationem acceperat ex Num. 11. v. 17. ubi de 70. Senibus electis ad sustinendum cum Moyse regiminis onus. Ita Deus ad Moysen: *Auferam de spiritu tuo, tradamque eis.* Et v. 25. Ita pariter cum Spiritum qui dicitur aquis in creatione superfusus, seu aquis incubasse, ipse Tertullianus lib. contra Hermog. cap. 32. ait non fuisse Dei Spiritum, sed Spiritus Dei efficaciam: *Non ut quidam putant, ipsum Deum significari Spiritum, quia Deus Spiritus; neque enim aquæ Dominum sustinere sufficerent: sed eum Spiritum dicit, de quo etiam venti constiterunt, ut ait per Isaiam.*

INST. 2. Tertull. vera membra Deo tribuit, distincta quidem à membris humanis, quòd ista sint corruptioni obnoxia; & indè infert lib. 2. cont. Marc. c. 16. Justitiam & alios affectus, quos à Deo removebat Marcio, ne Deus corruptioni obnoxius diceretur, in Deo occurrere,
non.

non quidem corruptorios, ut vocat; quia Deus, hominum instar, membra corruptioni obnoxia non habet. Impugnans autem Marcionem, qui Deum ad Epicureorum mentem sibi fingeat, quasi nullam rerum terrenarum curam haberet, & sibi sufficiens bonis aut malis nostris actionibus minimè moveretur. *Stupidissimus ergò*, inquit lib. 1. cont. cum, *qui non offenditur facto, quod non amat fieri: quando offensa comes sit frustrata voluntatis; aut si offenditur, debet irasci: si irascitur, debet ulcisci: nam & ultio fructus est ira, & ira, debitum offensa; & offensa, ut dixi, comes frustrata voluntatis.* Et lib. 2. cap. 16. *Perindè est enim cum Deum quidem judicem admittis, eos verò motus & sensus, per quos judicat, destruis.* Itaque objicienti Marcioni: *Si Deus irascitur, & amulatur, & extollitur, & exacerbatur: ergò & corrumpitur:* sic respondet. *Stultissimi, qui de humanis divina præjudicant: ut quoniam in homine corruptoria conditionis habentur hujusmodi passiones, idcirco & in Deo ejusdem statûs existimentur.* Discerne substantias, & suos eis distribue sensus, tam diversos, quàm substantia exigunt; licet vocabulis communicare videantur: nam & dexteram, & oculos, & pedes Dei legimus; nec idèò tamen humanis comparabuntur; quia de appellatione sociantur. *Quanta erit diversitas divini corporis & humani sub eisdem nominibus membrorum, tanta erit & animi divini, & humani differentia sub eisdem his vocabulis sensuum, quos tam corruptorios efficit in homine corruptibilitas substantia humana, quam incorruptorios in Deo efficit incorruptibilitas substantia divina.* Mox verò: *& hæc ergò*, inquit, *imago censenda est Dei in homine, quòd eisdem sensus, ac motus habeat humanus animus, quos & Deus; licet non tales, quales Deus: pro substantiâ enim, & status eorum & exitus distant.* Ex supposito constanti Tertullianus colligit, Deo esse artus ab humanis distinctos, corruptionis scilicet immunes.

R. Figuratè tantùm Deo membra tribuisse Tertull. nec in hoc instituisse comparationem, quòd, sicut Deus partes habet, ità etiam affectus: sed solùm, quòd eadem nomina variis sapiùs communicentur: & proindè sicut ex eo quòd partium vocabula Deo tribuantur, non sequitur Deum habere partes; ità, licet Deo & homini affectus tribuantur, non hinc sequitur Deum habere affectus humanis similes, ut ex his verbis, quæ objiciuntur, sit apertum, *Stultissimi*, &c.

I N S T. 3. Animam corpoream esse existimavit Tertull. lib. de Animâ c. 6. 7. & 8. & lib. de Resurr. carnis c. 17. non aliâ de causâ, quam quòd p sionibus sit subdita: Deum autem passibilem facit Tertull. Ita enim lib. 2. contra Marc. c. 6. *Quæ omnia patitur & suo more quo eum pati condecet, propter quem homo eadem patitur æque suo more.*

R. Quidquid Tertull. de Animâ sensuit, de Deo non ità cogitavit. S. Aug. lib. 10. de Gen. ad litt. c. 25. Tertullianum non censuisse Deum esse corporeum indè colligit, quòd omne corporeum passibile fecerit. Pati Deum suo more quidem Tertullianus scripsit, ratione scilicet affectuum spirituum, non verò corporum.

INST. 4. Tertull. Nihil quod spiritale esset, seu materiæ expertæ admisit.

R. neg. Nam lib. contra Hermog. qui materiam æternam esse contendebat, eamque neque spirituales esse, neque corpoream; c. 35. sic cum refellit. *Quæ est ista ratio recta, quæ nihil recti renuntiat, id est nihil certi? nisi fallor enim, omnis res aut corporalis, aut incorporalis sit necesse est (ut concedam interim esse aliquid incorporale de substantiis duratæ, cum ipsa substantia corpus sit rei cuiuscumque) certè post corporale & incorporale nihil est tertium. Mox probatum est spiritales substantias admisisse Tertullianum.*

INST. ult. Ex S. Aug. Hunc in errorem lapsus est reverà Tertull. Sic enim Ep. 157. ad Optatum, habet, *Neque hoc Tertullianum somniasse mirandum est, qui etiam ipsum creatorem Deum, non esse nisi corpus, opinatur: quod dementiam vocat S. August. repellendam ab ore Christiani.*

R. S. Aug. lib 10. de Gen. ad Litt. c. 25. ubi asseruit rei spiritualis existentiam sibi in animum non potuisse inducere Tertullianum, observare cum non constare sibi; cum lib. de Anima c. 7. dicat omne corporale esse passibile. *Neque enim arbitror, inquit S. August. Eum ita desipuisse, ut etiam Dei naturam passibilem crederet. Et lib. de Hær. cap. 86. ait Tertullianum dixisse Deum corpus: Nec tamen hinc, inquit, creditur hæreticus factus; posset enim quoquo modo putari ipsam naturam substantiamque corpus vocare; non tale corpus, cuius partes alia majores, alia minores valeant, aut debeant cogitari, qualia sunt omnia, quæ propriè dicimus corpora: quamvis ille de animâ aliquid sentiat: sed posuit, ut dixi, propterea putari corpus Deum dicere, quia non est nihil, non est inanitas, non est corporis, vel animæ qualitas, sed ubique totus. Cum autem S. Aug. Sententiam hanc in Manichæis, ut hæreticam damnaverit, & confutarit; non aliâ de causâ ab hæresi Tertullianum vindicat, quàm quòd Deum corpus dixerit, ut ipsum inani opponeret.*

QUÆSTIO QUINTA.

De Dei immutabilitate.

ARTICULUS.

Utrum Deus sit immutabilis, & quidem solus?

STOICI, ex Orig. lib. 1. contra Cels. mutationi obnoxium esse Deum asserbant; ejus verò felicitatem hinc oriri, quòd non esset, qui eum immutare posset.

CONCLUSIO. Deus est immutabilis, & quidem solus.

Probatur 1^a pars, quia quæcumque immutari possunt, vel ab alio, vel

à se immutantur, secundum esse, formam, vel accidens; secundum esse, si educantur ex nihilo; secundum substantialem formam, ut materia; si secundum accidens, vel secundum locum, quantitatem, vel qualitatem, vel in pejus, vel in melius, vel in æquale, vel etiam secundum electionem; quæ omnia ferè mutationum genera lib. 3. contra Maximinum complectitur S. August. Harum nulli mutationum Deus obnoxius est. Primo Scripturæ omnem omninò à Deo mutationem excludunt: volunt enim eodem in statu permanere semper, eademque in unitate, & in se ipso; nec mutari posse ullatenùs. Num. cap. 23. v. 19. *Non est Deus quasi homo, ut mentiat, nec ut filius hominis, ut mutetur.* Psalm. 101. v. 28. *Tu autem idem ipse es, & anni tui non deficient.* Malach. 3. v. 6. *Ego dominus, & non mutor.* Sap. c. 7. v. 17. *Et cum sit una, omnia potest: & in se permanens omnia innovat.* Jac. 1. *Apud quem non est transmutatio, nec vicissitudinis obumbratio.*

Secundò Deus nec ab alio, nec à se ipso mutari potest: non ab alio; quia nec habet contrarium, nec est aliquid illo potentius, aut majus, aut melius; nec à se ipso; nam vel in melius, vel in deterius, vel in æquale mutaretur: non potest in deterius se ipsum mutare; hoc enim ex boni infirmità necessariò oriretur: nec etiam in melius; nam bonum quoddam ei defuisset, quo scilicet indignisset: Deus autem est omnipotens, & omni perfectione major: nec in æquale; si enim ab uno statu in alium æqualem transiret, deficeret ab aliquo, quod priùs habuisset; adeò ut ejus defectùs compensandi causâ novum quid assequeretur: at illud Deo competere non potest; Deus enim à nullo deficere, nec alicujus boni jacturam facere potest. Ita fermè S. August. Ep. 202. cap. 2.

Tertiò mutatio quælibet fit propter quendam finem; omnium autem finis est Deus, seu summum bonum, proindèque non mutatur: sed omnia moventur, ut ipsum consequantur, aut ad ipsum accedant.

Nec mutari potest Deus secundum electionem: nam, ut probat S. Aug. lib. 11. de civit. Dei c. 14. æterno & immutabili consilio Deus omnia vult: licet ergo incipiat aliquid de novo producere; nova quidem actio est, sed æterna & antiqua voluntas. Unde novus quidem effectus est, qui incipit relationem habere ad Deum: sed nihil novi hæc relatio ponit in Deo. Aliter sentiunt plerumque homines, dum naturam divinam inquirunt; sed graviter hallucinantur, quòd de suâ humanâ, mutabili, & angustâ, divinam naturam metiantur: . . . quia quidquid novi faciendum venit in mentem, novo consilio faciunt; mutabiles quippè mentes gerunt; profectò non Deum, quem cogitare non possunt, sed semetipsos pro illo cogitantes; non illum, sed se ipsos; nec illi, sed sibi comparant: nobis autem non est fas credere aliter Deum affici, cum vacat; aliter, cum operatur. Dein mutatio profecta ex electione non potest, quin imperfectionem inferat semper; cum ex novo lumine, seu ex mutatâ cognitione ducat originem; remanet enim electio eadem, eodem remanente rationis judicio.

Ult. duplex tantùm excogitari potest immutabilitas; una physica, moralis altera. Prior ex parte substantiæ; altera verò ex parte actuum & decreto-

rum: Deus autem primò immutabilis est physicè; nam nec mutari potest ratione additionis, nec detractiois, nec ratione loci, aut temporis. Non ratione loci, quia immensus est: *Magnus enim est, & non habens finem, excelsus, & immensus.* Baruch. 3. Non ratione temporis, quia æternus est: nam semper *idem est, & anni ejus non deficient.* Ps. 101.

Immutabilis est etiam moraliter, ex parte scilicet actuum & decretorum: etenim nisi res ita esset, forent in Deo defectus scientiæ, simul & sapientiæ; scientiæ quidem; adverteret enim aliquid in suis actibus & decretis, quod antea non advertisset: sapientiæ quoque; quia prudenter non ageret, nec sapienter decerneret: at Deus infinitus est in scientiâ, & admirabilis in sapientiâ; infiniti quippe sunt thesauri scientiæ, & sapientiæ Dei. Hinc exclamat Apostolus Rom. 11. *ô altitudo divitiarum scientiæ & sapientiæ Dei:* res autem creata, cum non sit summum ens, aliquam ex his, quas attulimus, habeat mutationem necesse est. Quâ ratione utitur S. August. lib. de verâ Relig. cap. 18. & lib. de moribus Manich. c. 11. ubi probat hominum animas non esse Dei substantiæ partes, alioquin, inquit, essent immutabiles: immutari autem eas constat, tum à se, tum ab aliis, præsertim quòd, & à Deo creantur, & annihilari possint; quòd crescant & decrescant; & mutantur quoad locum. Quod & expressit Tertull. lib. de Pall. cap. 2.

Secunda pars Conclus. facilè colligitur ex laudatis Verbi Divini locis, & rationibus adductis: solus enim Deus est ens supremum & summum; unde 1. ad Tim. 6. v. 10. dicitur solus immortalis.

O P P. 1. Deus variis affectibus est obnoxius: ex Scripturis enim irascitur, pœnitentiâ movetur; diligit modò, modò odio habet; ab otio transit in actum, ut in rerum creatione.

R. 1. Orig. lib. 4. contra Cels. in Deo varios animi affectus non currere, quos Scriptura adscribere illi videtur; idèò autem eâ dicendi ratione uti, quia nos ut infantes suscipit instituendos, ita videtur divina sapientia contexisse scripturas ad auditorum modulum, id sibi decorum existimans, quod illis sit utile: de quo more Dei alloquentis homines hæc leguntur in Deut. *Accommodavi se tuis moribus Dominus Deus tuus, haud secus quàm homo pater accommodat se suo filio: nimirum more hominum Scriptura loquitur ad utilitatem hominum:* Non enim erat in rem plebeiæ multitudinis; si Dei persona induceretur loquens pro majestate suâ. Ita Novat. suprâ quæst. 4. art. 1. Conclus. I. ad obj. 1.

Secundò cum dicitur Deus, mox diligere, mox odio habere; hæc mutationem in Deo non arguunt, sed in ipsis hominibus, aut creaturis, ut docet S. Aug. lib. 22. de Civit. cap. 1. & in Ps. 72. in hæc verba; *Quàm bonus Israël &c. non quòd ullo modo pervertatur Deus: absit; quod est, est: sed quemadmodum Sol oculos puros, sanos, vegetos, fortes habenti tranquilluss est & sanus; in oculos lippos, quasi tela aspera jaculatur: intuentem illum vegetas, hunc excruciat, non mutatus, sed mutatum; sic cum caperis esse perversus, & tibi Deus perversus esse videtur; tu mutatus es, non ille: ergò erit tibi pœna, quod bonis est gau-*

dium. Idem lib. 12. de Civit. c. 1. alio exemplo utitur, nempe legis: nam ut Lex immota manens justis præmia, reis verò supplicia decernit; ita & Deus semper bonos remunerat, & punit improbos.

3. Nec Deus cessasse aut otiosus quandoque fuisse dicendus est; cum ante mundum conditum tempus non extiterit; nec Deus in tempore sit constituendus, sed extra tempus; nihil enim in Deo prius, aut posterius esse potest: Actio quippe Dei spectari potest dupliciter: vel ut est in Deo; & æterna est; nam ipsa Dei voluntas est: vel quoad effectum; & temporaria quidem est, quòd res creatæ in sui constitutione temporis sint obnoxie; at nunquam operans mutatur, nisi cum immanens operatio est nova; si verò nova sit tantum actio externa, non idèò mutatio quædam operanti advenit. Hinc si Sol in Hemisphærio, eodem in situ semper manens, lunâ inter eum & nos interpositâ, tertam illustrare desineret; & recedente lunâ, rursus eam illustrare inciperet; nullam in se mutationem pateretur.

Quare cum Deus indicatur, aliquandò amore, aliquandò odio eandem prosequi creaturam; nulla est propterea ex parte Dei mutatio, sed tota se tenet ex parte rei creatæ. Proindè amor, & odium non sunt in Deo per successionem; nec sibi nutuò adversantur ratione sui: sed tantum ratione terminorum quos respiciunt; sicque Deus omnia mutando, remanet immutabilis omninò. *Immutabilis, mutans omnia*, inquit Sanct. August. lib. 1. Confess. c. 4. *Nunquam novus, nunquam vetus, innovans omnia; & in vetustate deducens superbos, & nesciunt. Semper agens, semper quietus; colligens, & non agens, portans, & implens, & protegens: creans, & nutriens, & perficiens. Quæris, cum nihil desit tibi; amas, nec astuas; zelus, & securus es: pœnitet te, & non doles; irasceris, & tranquillus es: opera mutas, nec mutas consilium: recipis quod invenis, & nunquam amittis; nunquam inops, & gaudes lucris. Nunquam avarus, & usuras exigit: redditus debita, nulli debens; donas debita, nihil perdens.*

INST. 1. Saltem mutatus est Deus cum factus est homo.

R. S. Ambr. lib. 1. de Fide; & lib. de Filii Divinitate contra Arianos cap. 8. Immutatum remansisse Verbum, suâque immortalitate hominem donasse, velut cum Sol nube obtegatur, tunc obvelatur quidem splendor Solis, sed non tollitur. S. Aug. lib. 83. q. 73. docet non magis mutatum esse Dei Filium, cum factus est homo, quàm mutantur membra, cum vestimentis induuntur. Sed de his, ubi de Incarnatione.

INST. 2. Deus alio modo se gessit in Veteri Testamento, alio in Novo: nonnulla in Veteri, ut ceremonias, sacrificia, iudiciorum formam constituit; quæ omnia in Novo penitus abrogavit.

R. S. Aug. Epist. 5. Marcellino, Deum sic moderari universum orbem, quasi unicum hominem regeret; hominemque quemlibet esse velut orbis compendium; & necessariò aliâ ratione erga perfectos, aut adultos; aliâ erga infantes, aut infirmos utendum fuisse; alia præscribi infanti à præceptore; adolescenti alia: quæ ergo varietas inter duo

Testamenta occurrūt, non Dei, sed hominum varios status & mutabilitatem arguit: in Lege naturæ, infantiam: in Mosaicâ, adolescentiam: in Novâ, adultam ætatem: sed de his fusiùs, q. 2. de Legibus. Aliæ probationes, objectiones, & responsiones occurrunt q. 4. art. 1. concl. 4. ubi quæritur utrū sint in Deo accidentia.

INST. 3. Cognitio divina modò eundem hominem justum, modò peccatorem repræsentat: & proindè intrinsecè mutatur, non tantùm extrinsecè; quia imago vitalis est repræsentans objecta cognita: Instar ergò tabellæ mutatis objectis mutatur.

R. Mutari tantùm extrinsecè cognitionem divinam, prout illius objecta mutationem patiuntur. Ideò autem tabella alia sit, dum Regem, modò sedentem, modò stantem oculis subjicit, aut alium Principem; quia res varias simul, & quæ sibi succedunt, seu eodem tempore & loco continere simul non potest. Deus autem omnia simul & ab æterno perspecta habuit, & habet.

INST. ultimò. Deus suis in decretis est liberrimus: Ergo saltem in actibus liberis est mutationi obnoxius.

R. Deum esse liberrimum suis in decretis ponendis vel non ponendis; ea tamen semel posita revocare nequit, cum sit immutabilis in suis consiliis; nec unquam revocat, ut fusiùs exponetur, ubi de voluntate Dei, q. 12. erit agendum. Extra dubitationem est à productione personarum divinarum procul esse amandandam mutationem omnem: quia Verbi generatio, Spiritusque Sancti spiratio non sunt transitus de non esse ad esse; nec ad existendum ulla præcedit indifferentia: nec, vel minima, occurrīt dependentia.

Q U Æ S T I O S E X T A.

De æternitate Dei.

A R T I C U L U S U N I C U S.

Utrū Deus sit æternus, & quidem solus?

ÆTERNITAS durationem infinitam, seu quæ nullis terminis claudatur, suo intellectu complectitur; hæc autem interminabilitas, ut ita loquar, spectari potest tripliciter. 1. ratione totius, cum illius duratio non est finita, quocumque modo consideretur, seu, ut loquuntur, à parte antè, seu à parte post; cum autem ut definita concipitur, secundum aliquam sui partem consideratur. 2. Interminabilitas potest occurrere in eo, quod terminis non definitur, sed definiti potest; qualis est duratio Angeli, qui ab æterno creatus esset. 3. Interminabilitas dicitur non solum possibilitas carenti terminis, sed impossibilitas habendi terminos; quæ creaturis competere non potest, cum illæ è ni-

hilo educi, & in nihilum reduci possint. Hæc autem æternitas propriè dicta est, quam ità definit Boëtius lib. 6. de Consol. Prof. 6. *Æternitas est interminabilis vitæ tota simul & perfecta possessio.* In quâ definitione, tùm durationis principium, tùm finis excluduntur, tùm omnis, quoad durationis partes, successio.

Æternitas autem illa differt ab ævo, & tempore; quòd tempus sit mensura rei difformiter se habentis per successionem partium secundum prius & posterius; est enim mensura motûs, per quem res semper se habet aliter & aliter; ævum verò est mensura rei se habentis uniformiter in se, quæ tamen mutationem patiatur, vel secundum locum, vel secundum electionem: quæ etiam res destrui possit, cujusmodi sunt Angeli.

S. Aug. lib. 11. c. 13. ita æternitatem Dei delineat. *Anni tui dies unus: & dies tuus, non quotidie, sed hodie: quia hodiernus tuus non cedit crastino; neque enim succedit hesterno: hodiernus tuus æternitas: idcò coæternum genuisti, cui dixisti; Ego hodie genui te: omnia tempora tu fecisti, & ante omnia tempora tu es.*

CONCLUSIO. Deus est æternus: & quidem solus.

1. Quia duratio Dei in Scripturis eâ ratione exprimitur, quâ designari solet duratio infinita, nunquam desitura, nullis terminis circumscripta. Deut. 31. v. 40. *Vivo ego in æternum.* Psal. 9. v. 8. *A sæculo, & usque in sæculum tu es Deus:* Psal. 101. v. 8. *Tu idem ipse es, & anni tui non deficient.* Quod his expressit verbis Tertull. lib. 1. contra Marcio. *Deus, si est vetus, non erit; si est novus, non fuit: novitas initium testificatur; vetustas finem comminatur: Deus autem tam alienus est ab initio & fine, quàm à tempore arbitro, & metatore.*

2. Si ratio consulatur, dubitari non potest, quin Deus ut æternus à nobis apprehendatur: æternitas enim nihil aliud est, quàm interminabilis vitæ tota simul & perfecta possessio, quæ soli Deo potest competere; quia solus est, qui nec desinere possit, nec incipere; quique sit quoad essentiam, locum, & operationem, solus immutabilis; ab alio enim esse nequit; & omnia, simul, & non successivè, & à se ipso possidet; nihilque ut futurum spectat. Ita fermè S. Aug. lib. de naturâ boni cont. Manich. Atque, ut habet Tertull. lib. 1. contra Marcion. c. 3. naturaliter cognoscimus Deum esse æternum: naturaliter enim novimus Deum esse ens præstantissimum: si autem Deus non esset æternus, posset esse aliquod ens Deo præstantius; utpotè quod æternitatem, perfectionem illam summam, haberet.

Præterea cum æternitas sit vita tota simul perfecta & interminabilis: & nihil magis sit totum simul, quàm unitas; nihil magis infinitum, quàm id cui nihil addi potest; nihil perfectius, quàm quod summum est, seu summum bonum; Deus procul dubio non potest, quin æternus, & solus æternus concipiatur; quia in eo solo est unitas, infinitudo, & summum bonum.

Denique licet creaturæ aliquæ ab æterno possibiles supponerentur, divinâ æternitate nunquam æternæ essent; mutationi enim, & quoad operari, & quoad esse, semper essent obnoxia.

Æternitas spectata prout includit duplicis negationem termini, scilicet à quo; & ad quem; seu quorum terminorum alter sit initium, alter rei finis, ea, inquam; attributum est negativum: si verò consideretur, ut est interminabilis vitæ possessio perfecta, attributum est positivum.

Potest etiam dici aliquo sensu mensura Dei: sicut enim tempus, rerum in tempore constitutarum mensura dicitur; eò quòd durationem earum in fluxu & successione continuâ metiatur; ita æternitas dici potest quodammodo mensura Dei, quòd includat durationem ejus in modo essendi: sic autem accepta, est permanentia rei in suo esse: nec ullatenùs dicit successionem: nec Dei mensura est, realis aut formalis; sed virtualis tantùm; utpotè cum non sit dependentia mensurati à mensurâ.

QUÆSTIO SEPTIMA.

De Dei immensitate.

ARTICULUS PRIMUS.

Utrum Deus sit substantialiter immensus, & solus?

ERRORES.

EXISTIMASSE videntur Judæi certo loco contineri Deum, & urbe Hierosolymitanâ, aut templo circumscribi. Undè S. Cyrill. Alex. lib. 2. contra Julian. observat Isaiam cap. 41. hunc impagnasse errorem.

Alii censere dicuntur Deum ratione substantiæ rebus omnibus non inexistere; sed per solam potentiam illis adesse, instar solis, qui radiorum suorum beneficio omnia pervadit, licet à terris ratione substantiæ longè sit distans.

Deus in omnibus rebus existere potest: per potentiam; quòd ejus potestati sint omnia subdita: per præsentiam; quòd omnium curam providentiâ suâ gerat: & per essentiam; cum nulla creatura sit, cui non immediatè adhæreat.

CONCLUSIO. Deus est in omnibus rebus ratione substantiæ, & solus.

1. Quia qui cælum & terram implet: in inferis, & in cælis existit: ultra cælos extenditur, ut & à quibus capi non possit: & ultra inferos, terram & mare; is omnibus rebus per substantiam inexistit. Ità autem Scripturæ de Deo differunt.

Jobi c. 11. v. 8. Ità Sophar Naamathites. *Excelsior cælo est; & quid facies? profundior inferno, & unde cognosces? longior terrâ mensura ejus, & latior mari? Psal. 138. c. 8. Quò ibo à spiritu tuo, & quò à facie tuâ fugiam? Si ascendero in cælum, tu illic es; si descendero in infer-*
num

num, ades. Lib. 3. Reg. c. 8. Si enim cælum & cæli cælorum te capere non possunt, quæto magis domus hac, quam edificavi? Jeremix 23. & 24. Numquid non cælum & terram ego impleo, dicit Dominus? Hinc S. Ambr. lib. 1. de Fide c. 4. & 7. Et lib. de dignit. Animæ cap. 2. S. Chrysost. in Ps. 112. S. Hieron. in c. 66. Isaïæ. S. Aug. Epist. 3. 17. & 57. Ergo est Deus per cuncta diffusus; ipse quippè ait per Prophet. cælum & terram ego impleo, &c. Undè fatendum est ubique esse Deum per divinitatis præsentiam, sed non ubique per inhabitationis gratiam. Item. Ideò enim ubique esse dicitur, quia nulli parti rerum absens est; ideò totus, quia non parti rerum partem suam præsentem præbet, & alteri parti, alteram partem, æquales æqualibus, minori verò minorem, majorique majorem: sed non solum universitati creatura, verum etiam cuilibet parti ejus totus pariter adest.

Deindè si Deus non esset ubique substantialiter præsens, Dei substantia alicubi esset, & non alibi: quibusdam terminis esset circumscripta: motui esset obnoxia: ut quæ aliquandò inciperet in loco esse, in quo prius non erat.

Deniquè Deus agit ubique: & proindè, cum ejus actio non distinguatur ab ejus substantiâ, ubique adest per substantiam.

Deus ita est in loco, ex Sanct. August. Epist. 3. ut loco non contineatur; quia Deus, inquit, Sapiencia est: Sapiencia autem latitudine caret: & quia novit venire non recedendo, novit abire non deserendo quò venerat. Equidem, ut subjungit, dicitur tamen fieri præsens, cum præsentia suæ signa nobis præbet; & abesse, cum auxilia sua videtur subtrahere: sic lux videntibus adesse dicitur, & à cæcis abesse.

Deus autem solus est immensus; quia solius naturæ infinitæ & omnipotentis proprium esse potest esse ubique; quia sola ubique operari potest.

Solent antiqui, adducto animæ, solis, & vocis exemplo, divinam immensitatem exponere; sol enim orbem universum illustrat, & ejus lux ubique licet diffusa remanet indivisa. Pariter, à plurimis indivisim idem sonus auditur: & anima in quâlibet corporis parte tota subsistit & indivisa.

O P P. Deus non est ubique; cum non sit in peccatoribus: dedecoret enim eum esse in locis tam obscuris, præsertim in Diabolis.

R. Deum in peccatoribus esse, & in Diabolis, ut opera ejus sunt: non quatenus ab eo per scelus deficiunt; inde quidem non magis læditur majestas ejus, quàm solis splendor, cum loca maximè obscuræ perlustrat. S. Aug. Ep. 57. l. 7. ait Deum quidem esse in omnibus æqualiter ratione substantiæ; sed non ubique æqualiter per inhabitationis gratiam, aut ratione donorum: imò etiam inæqualiter in Ipsiis justis, quia eorum alii plus eum capiunt, alii minus.

I N S T. 1. Ex S. Clem. Alex. l. 5. Strom. Deus non permeat rerum substantiam: sed tantum earum effector dici potest.

R. Deum non permeare rerum substantiam juxta sententiam Stoicorum, qui Deum corporeum faciebant, & rerum substantiis permixtum; hanc autem Stoicorum opinionem ibi confutabat S. Clem. Alex.

INST. 2. Si Deus necessario rebus inexistet, rerum creatarum perfectio illi denegaretur: non paucæ enim sunt creaturæ, quæ in subiecta à se longè distita possunt agere: sic Rex, sic Sol.

R. Modum illum operandi non esse perfectionis loco habendum; imò ex imperfectione oriri, nempe ex limitatione naturæ; Rex quidem eo potentior, & præstantior habetur, quò in remotiores regiones auctoritatem suam extendit & propagat: longè autem præstantior foret, si substantiam suam, & non solam virtutem in omnibus imperii partibus præsentem exhiberet; cum autem circumscriptæ naturæ sit, idèò uno tantùm in loco adesse potest. 2. Res creatæ virtutem suam in remota à se loca possunt immittere, quòd eorum agendi vis distincta sit ab eorum substantiâ; in Deo verò indistinctæ sunt actio, & substantia.

OPP. Deus in cælis est substantialiter, & totus: igitur extra cælos non est ratione substantiæ, sed virtutis.

R. S. Chrysost. in Psalm. 112. hâc loquendi ratione sacros uti aucthores, ut Judæorum animos, Deorum, qui certis locis erant constituti, cultui assuetos, ad veri Dei notitiam sensim exigerent; & idèò se ad eorum captum attemperasse, & in certâ, sed celsissimâ sede Deum collocasse. 2. Idèò cælum Deo, tanquàm præcipuus & singularis locus, adscribitur; quòd ibi amplior, & longè sit manifestior Dei cognitio; & clarissimi præstantissimique divinæ gratiæ effectus ibi percipiantur: non quòd intra cæli ambitum Dei substantia contingatur.

Q. An Deus sit ubique, tanquàm in loco.

R. Deum non esse ubique tanquàm in loco: sed & solum sibi locum esse. Ita S. Theoph. Antioch. lib. 2. *Nihil enim cum Deo floruit, aut vixit; sed ipse sibi locus erat, nullius indigens, & ante secula subsistens.* Tertull. c. 5. contra Prax. Minut. Fel. S. Aug. Epist. 57. Deus non aliter est in mundo, quàm fuerat ante illum conditum constitutus, cum immutabilis sit, & à se ipso non discesserit, idemque permanferit; nec alius à Deo locus sit Deo dignus.

2. Si mundus Dei locus esset, ex S. Aug. in Psal. 121. in hæc verba, *Qui habitas in cælis*, aliquandò periura esset ejus sedes, cum cælum & terra sint transiura.

Deniquè quod loci vices gerit respectu alicujus rei, eam continet, conservat, & circumscribit; mundus autem nihil hujusmodi præstare potest respectu Dei.

ARTICULUS SECUNDUS.

Utrum Deus sit formaliter in mundo per actionem?

CUM Deus sit ubique, non tanquàm in loco propriè dicto; quia nec exigit ibi existere, nec à re creatâ continetur; quæstio est quomodò fiat formaliter præsens; seu quâ ratione potissimum in re,

cui inexistit, seu in loco constitui videatur.

Orta indè videtur quæstio, quòd non satis sit apud Philosophos rem adesse, item & locum, ut & res in loco collocetur; sed adhuc requiri à quibusdam ubi per quod res formaliter in loco constitui dicatur: Ratio autem formalis ea est, quâ solet responderi quærentibus præsentia rei in loco causam magis propinquam & conjunctam.

CONCLUSIO. Deus formaliter in loco est per actionem.

1. Non alia ratio præsentia Dei est asserenda, quàm quæ in Scripturis traditur. At ex Psal. 138. v. 8. *Quò ibo à spiritu tuo, & quò à facie tua fugiam? Si ascendero in cælum, tu illic es; si descendero in infernum, ades; si sumpsero pennas meas diluculo, & habitavero in extremis maris: etenim illuc manus tua deducet me, & tenebit me dextera tua.* Ergò Deus in loco est, quia ducit incedentem, & morantem in loco servat, hoc est quia ibi operatur. Et certè quæ ratio est formalis diversæ Dei præsentia, ea est ipsius Dei præsentia: ratio verò formalis diversæ Dei in rebus præsentia eruitur ex variâ ejus actione; Ergò ratio formalis ipsius præsentia in rebus eruitur ex ejus actione in rebus. Discrimen enim quod occurrit inter varias actiones, quibus Deus est in creaturis, ex aliis capitibus repeti non potest, quàm ex vario operandi modo: Si enim quæratur, cur Deus aliter sit in Angelis, Dæmonibus, Viatoribus, & in Beatis; alia reddi non potest ratio, quàm quæ ducitur ex variâ actione quam in illis elicit.

2. Ut probent antiqui Patres divinitatem Gentium Diis non competere, hoc utuntur argumento: Dii isti non operantur in locis: ergò non sunt; ubi enim Deus est, ibi operatur. Item asserunt Deum verum alium esse à Deo Stoicorum; quia non corporaliter omnia continet; sed in omnibus existit operando, seu providendo: Aiunt abusivè rem spiritualement dici in loco; cum propriè dicenda esset operari in loco: & Deum esse in mundo instar substantia creatantis & moderantis, servantis, & juvantis. Nullam aliam præsentia Dei rationem præter ejus operationem sibi in animum induxerunt. Sic autem ratiocinantur.

1. Argumentum tradit Athenag. in Apol. *Itaque efficitur ut, si nihil faciat, neque providet; neque locus ei superest ullus; nusquam & omninò non extet: unus verò ille à principio & solus mundi opifex Deus relinquatur.*

2. Argumento utitur Orig. l. 2. cont. Cels. c. 6. *Penetrat quidem aspectus Dei ac providentia per omnia: sed non sicut ille Stoicorum spiritus: & continet omnia, quibus per suam providentiam prospicit; ac non corporaliter complectitur: cum corpus ambiatur à divinâ potentiâ.*

3. Exponit Sanct. Gregor. Nyss. lib. de Animâ, *Cum natura intelligibilis fuerit in habitudine ad locum, vel ad rem in loco sitam; abusivè dicimus illam ibi esse, præter operationem ejus quod ibi est, locum pro habitudine & operatione sumentes: cum enim dicendum esset, ibi operatur, dicimus ibi est.*

4. Utitur S. Aug. Epist. 57. *Est in mundo Deus, ut substantia creatrix mundi, sine labore regens; & sine onere continens mundum.* Et

INST. 2. Si Deus necessariò rebus inexistet, rerum creatarum perfectio illi denegaretur: non pauca enim sunt creaturae, quae in subiecta à se longè dissita possunt agere: sic Rex, sic Sol.

R. Modum illum operandi non esse perfectionis loco habendum; imò ex imperfectione oriri, nempe ex limitatione naturae; Rex quidem eo potentior, & praestantior habetur, quò in remotiores regiones auctoritatem suam extendit & propagat: longè autem praestantior foret, si substantiam suam, & non solam virtutem in omnibus imperii partibus praesentem exhiberet; cum autem circumscripcae naturae sit, idèò uno tantùm in loco adesse potest. 1. Res creata virtutem suam in remota à se loca possunt immittere, quò eorum agendi vis distincta sit ab eorum substantiâ; in Deo verò indistinctae sunt actio, & substantia.

OPP. Deus in caelis est substantialiter, & totus: igitur extra caelos non est ratione substantiae, sed virtutis.

R. S. Chrysost. in Psalm. 112. hâc loquendi ratione sacros uti aucthores, ut Judaeorum animos, Deorum, qui certis locis erant constituti, cultui assuetos, ad veri Dei notitiam sensim erigerent; & idèò se ad eorum captum attemperasse, & in certâ, sed celsissimâ sede Deum collocasse. 2. Idèò cælum Deo, tanquàm præcipuus & singularis locus, adscribitur; quò ibi amplior, & longè sit manifestior Dei cognitio; & clarissimi præstantissimique divinae gratiae effectus ibi percipiuntur: non quò intra cæli ambitum Dei substantia contingatur.

Q. An Deus sit ubique, tanquàm in loco.

R. Deum non esse ubique tanquàm in loco: sed & solum sibi locum esse. Ita S. Theoph. Antioch. lib. 2. *Nihil enim cum Deo floruit, aut vixit; sed ipse sibi locus erat, nullius indigens, & ante saecula subsistens.* Tertull. c. 5. contra Prax. Minut. Fel. S. Aug. Epist. 57. Deus non aliter est in mundo, quàm fuerat ante illum conditum constitutus, cum immutabilis sit, & à se ipso non discesserit, idemque permanferit; nec aliud à Deo locus sit Deo dignus.

2. Si mundus Dei locus esset, ex S. Aug. in Psalm. 112. in hæc verba, *Qui habitas in caelis*, aliquandò peritura esset ejus sedes, cum cælum & terra sint transitura.

Deniquè quod loci vices gerit respectu alicujus rei, eam continet, conservat, & circumscribit; mundus autem nihil hujusmodi præstare potest respectu Dei.

ARTICULUS SECUNDUS.

Utrum Deus sit formaliter in mundo per actionem?

CUM Deus sit ubique, non tanquàm in loco propriè dicto; quia nec exigit ibi existere, nec à re creatâ continetur; quaestio est quomodò fiat formaliter praesens; seu quâ ratione potissimum in re,

cui inexistit, seu in loco constitui videatur.

Orta indè videtur quæstio, quòd non satis sit apud Philosophos rem adesse, item & locum, ut & res in loco collocetur; sed adhuc requiri à quibusdam ubi per quod res formaliter in loco constitui dicatur: Ratio autem formalis ea est, quâ solet responderi quærentibus præsentia rei in loco causam magis propinquam & conjunctam.

CONCLUSIO. Deus formaliter in loco est per actionem.

1. Non alia ratio præsentia Dei est asserenda, quàm quæ in Scripturis traditur. At ex Psal. 138. v. 8. *Quò ibo à spiritu tuo, & quò à facie tua fugiam? Si ascendero in cælum, tu illic es; si descendero in infernum, ades; si sumpsero pennas meas diluculo, & habitavero in extremis maris: etenim illuc manus tua deducet me, & tenebit me dextera tua.* Ergò Deus in loco est, quia ducit incedentem, & morantem in loco servat, hoc est quia ibi operatur. Et certè quæ ratio est formalis diversæ Dei præsentia, ea est ipsius Dei præsentia: ratio verò formalis diversæ Dei in rebus præsentia eruitur ex variâ ejus actione; Ergò ratio formalis ipsius præsentia in rebus eruitur ex ejus actione in rebus. Discrimen enim quod occurrit inter varias actiones, quibus Deus est in creaturis, ex aliis capitibus repeti non potest, quàm ex vario operandi modo: Si enim quæretur, cur Deus aliter sit in Angelis, Dæmonibus, Viatoribus, & in Beatis; alia reddi non potest ratio, quàm quæ ducitur ex variâ actione quam in illis elicit.

2. Ut probent antiqui Patres divinitatem Gentium Diis non competere, hoc utuntur argumento: Dii isti non operantur in locis: ergò non sunt; ubi enim Deus est, ibi operatur. Item asserunt Deum verum alium esse à Deo Stoicorum; quia non corporaliter omnia continet; sed in omnibus existit operando, seu providendo. Aiunt abusivè rem spiritualement dici in loco; cum propriè dicenda esset operari in loco: & Deum esse in mundo instar substantia creantis & moderantis, servantis, & juvantis. Nullam aliam præsentia Dei rationem præter ejus operationem sibi in animum induxerunt. Sic autem ratiocinantur.

1. Argumentum tradit Athenag. in Apol. Itaque efficitur ut, si nihil faciat, neque providet; neque locus ei superest ullus; nusquam & omnino non extet: unus verò ille à principio & solus mundi opifex Deus relinquatur.

2. Argumento utitur Orig. l. 2. cont. Cels. c. 6. Penetrat quidem aspectus Dei ac providentia per omnia; sed non sicut ille Stoicorum spiritus: & continet omnia, quibus per suam providentiam prospicit; ac non corporaliter completitur; cum corpus ambiatur à divinâ potentia.

3. Exponit Sanct. Gregor. Nyss. lib. de Animâ, Cum natura intelligibilis fuerit in habitudine ad locum, vel ad rem in loco sitam; abusivè dicimus illam ibi esse, præter operationem ejus quod ibi est, locum pro habitudine & operatione sumentes: cum enim dicendum esset, ibi operatur, dicimus ibi est.

4. Utitur S. Aug. Epist. 57. Est in mundo Deus, ut substantia creatrix mundi, sine labore regens; & sine onere continens mundum. Et

Tract. 2. in Joan. *Deus est in mundo, quomodo artifex regens quod facit præsentia majestatis facit, præsentia suâ gubernat quod facit.*

3. Alia est existendi ratio in loco naturæ corporeæ, alia naturæ spiritualis: Natura corporea est in loco formaliter; quia coextenditur loco: natura verò spiritualis non est in loco per coextensionem; nec enim in longum & latum extenditur. Quâ ergo ratione censetur in loco, nisi per operationem? Undè S. Joan. Damasc. lib. 1. Orthodox. Fid. c. 16. *Deus igitur, ut materia atque circumscriptionis expers, haudquam in loco est: Ipse enim sibi ipsi locus est, omnia implens, ac supra omnia consistens: Et tamen in loco esse dicitur, ibique Dei locus esse asseritur, ubi perspicua ejus operatio existit.*

Ultimò. Per id censetur aliquid esse formaliter in loco, per quod tangit rem, cui est præsens, seu ab illâ indistans est. At indistantia rei spiritualis à corporeâ, seu contactus rei spiritualis cum corporeâ necessariò est repetendus ab operatione: Nam 1. duci non potest à formâ modali: vel enim ille modus à Deo realiter distingueretur; vel virtualiter: primum dici non potest, nihil enim in Deo est realiter distinctum: nec posterius etiam in Deo admitti posset; se haberet enim ille modus instar accidentis, quod à Deo separari posset. At de Deo cogitari non possunt ejusmodi commenta: conciperetur enim Deus ut mutationi obnoxius. 2. Nec etiam potest repeti formalis causa præsentia Dei in loco ex ipsius substantiâ: non enim datur conjunctio & indistantia rei ab alterâ, nisi ubi datur aliquis contactus: Ergò non satis est, quod adsit ipsa substantia Dei, nisi aliquo mediante rebus creatis conjungi concipiatur. 3. Nec etiam potest repeti causa formalis præsentia divinæ, ex quantitatis continuæ contactu, ut compertum est: Deus enim non est corporeus: Superest ergò ut causa formalis præsentia Dei in Angelis, aut cæteris creaturis, ex contactu virtutis, seu ex operatione Dei oriatur: sicut enim inter duo corpora non nisi quantitate continuâ mediante fit contactus; ita nec inter res spirituales, vel inter spiritum & corpus nonnisi virtute, seu operatione datur contactus; nam contactus virtutis in rebus spiritualibus contactui quantitativo rerum corporearum responderet, & res spiritualis tangit rem spiritualement aut corpoream contactu opposito contactui rei corporeæ seu molis, contactu nempe virtutis. Præterea id per quod Deus censetur in loco, id ipsum & à creaturâ & à Deo est distinctum; quia contingens Deo est; nam ab æterno Deus non erat præsens mundo, cum mundus non extaret; quod autem ut contingens in Deo concipimus, est ipsa actio Dei; non prout est in Deo, sed prout creaturas spectat; quæ actio sic spectata ejusdem est rationis & conditionis cujus est creatura, ut suprâ ostensum est, ubi de Dei immutabilitate disseruimus.

Discrimen illud contactum quantitativum inter & spiritualement, seu virtutis, intercedit, quòd prior contactus agentia quidem corporea rebus corporeis præsentia, sed non intra ipsas constituat; unius enim corporis

quantitas non est intra quantitatem alterius : per contactum verò virtutis, agentia spiritualia ita præsentia sistuntur subjecto, in quod agunt, ut sint intra ipsum; quia nempe contactus virtutis ibi est, ubi est effectus: cumque virtus Dei sit illius substantia, ubicumque est talis virtus, ibi est Dei substantia.

O P P. 1. Illud non constituit formaliter Deum in loco, quo non posito, Deus concipitur formaliter in loco. Atqui non posito influxu Dei, imò etiam per impossibile sublato; Deus conciperetur immensus, seu formaliter in loco.

R. Tunc Deum fore immensum in actu primo, seu in se: non in actu secundo; seu non præsentem fore rebus creatis.

Urg. 1. Si ratio formalis existentiae Dei in rebus esset Dei operatio, idem esset conceptus influxus Dei in creaturas, & Dei præsentiae in creaturis.

R. Futurum esse eundem conceptum, si per conceptum præsentiae Dei in creaturis, formalis ratio per quam Deus fit à creaturis indistans, concipiatur; non verò si attendatur relatio præsentiae, quae fundatur in huiusmodi conjunctione & indistantia. Qui ergo Deum operari concipit, simul rationem formalem præsentiae Dei intelligit; sed non statim apprehendit relationem, quae ex huiusmodi exurgit præsentiâ: Unde duo conceptus necessariò sunt distinguendi. Sic etiam in rebus corporeis quantitativum contactum ab eo conceptu secernimus, quo unum corpus alteri velut loco suo præsens habetur; nihilominus quantitativus contactus est ratio formalis, per quam corpus quantum constituitur formaliter in loco. Tria nempe sunt distinguenda: substantia, quae præsens est in loco: ratio formalis, quâ fit præsens: & relatio præsentiae inde exurgens.

Urg. 2. Inde sequeretur immensitatem & omnipotentiam divinam non esse attributa distincta.

R. Esse attributa distincta: prius enim omnipotentia concipitur, quàm immensitas; quia, cum Deus contineatur in loco per operationem, debet operationis illius principium præcognosci; cum ante operationem principium concipiatur. Nostro ergo concipiendi modo omnipotentia Dei immensitate prior est; & proinde immensitas & omnipotentia diversa attributa constituere videntur: omnipotentia concipitur, ut omnis operationis principium: immensitas verò, licet quid unum sit realiter cum omnipotentia, concipitur tamen ut principium præsentiae Dei in loco, & relationis, quam res ad Deum dicit. Nihil etiam implicat eandem actionem à pluribus principiis, à quinque scilicet causis, finali, efficiente, &c. proficisci. Actio ergo, quatenus actio est, erit ab omnipotentia: ut est autem contactus, per quem Deus fit præsens rebus, erit ab immensitate.

Urg. 3. Aeternitas, per quam Deus omni tempore coextenditur, non est operatio: ergò, nec immensitas, per quam omni loco extenditur.

R. Disparem in eo esse rationem, quòd aeternitas instar mensurae durationis concipiatur; immensitas verò per modum contactus: inter

Deum autem & rem creatam, nonnisi contactus virtutis intercedit.

Urg. 4. Corpus quantitate suâ spoliatum, in loco formaliter esse potest; quale est corpus Christi in Eucharistiâ: ergo à pari spiritus citra contactum virtutis, in loco formaliter esse potest.

R. Corpus Christi in Eucharistiâ non esse localiter; sed tantum per habitudinem ad species sacramentales. Qui modus existendi singularis est, & admirandus: dicitur autem esse in loco corpus Christi; quia nempe præsentibus speciebus præsens est Christus; desinentibus verò, desinit præsentia corporis Christi. Vel etiam dici posset corpus exutum quantitate esse in loco radicaliter; quia quantitas poterit fundare contactum continuum: non autem formaliter.

OPP. 2. Per illud Deus non est formaliter in loco, quod supponit Deum formaliter in loco: At operatio Dei est ejusmodi, quia operatio sequitur esse; Ergo prius est Deum esse in loco formaliter, quàm operari in loco formaliter; ita enim se habet esse secundum quid ad operari secundum quid, quomodo esse simpliciter ad operari simpliciter.

R. Operationem sequi esse simpliciter, non verò quoad hoc; sicut enim corpus absolutè prius est contactu quantitativo, & tamen est in loco, non per se, sed per illum contactum quantitativum; ita licet Deus prius esse, quàm operari ad extra concipiatur, non censetur tamen prius esse in rebus, quàm in illis operetur. Quod verò subjungitur verum est, quoad aliqua; non quoad omnia, ut est manifestum.

Inst. Prius concipitur Deus operari, quàm esse in loco: sic prius creare videtur, quàm esse in rebus creatis; actio enim via est ad terminum.

R. Non posse concipi Deum agere in tempore, quin constituatur in loco: nec Dei actionem concipi naturâ priorem loco; quia actio, nec naturâ prior est termino, nec relatio prior relato.

ARTICULUS TERTIUS.

*Utrum Deus sit extra cælos, seu in spatiis imaginariis,
& quomodo?*

CONCLUSIO. Deus non est in spatiis imaginariis, seu extra cælos.

1. Deus non est in nihilo, seu in eo quod non datur: at ejusmodi sunt spatia imaginaria, quæ non dari, seu inane quoddam esse probant S. Gregor. Nyss. lib. 12. contra Eunom. S. Aug. lib. 2. Soliloq. c. 17. *Omnino ipsum quod inane dicitur, ex quo nihil fit, dicitur.*

2. Deus non aliter est extra cælos, ac erat ante mundum conditum: at nullibi erat; quia tunc nihil erat; sed sibi ipse locus erat: ergo nunc extra mundum non est, sed in se ipso est.

3. Non potior est ratio, cur dicatur Deus in spatiis illis esse, quàm dicatur in temporibus imaginariis extitisse ante mundum conditum. At S. Aug. lib. 1. de Gen. contra Manich. c. 2. ait immeritò quærere Manichæos, quid Deus præstaret ante mundum conditum; cum nulla spacia temporum tunc exarent.

4. Deus non est in creaturis possibilibus: ergò nec in spatiis imaginariis: hæc enim vel supponuntur esse aliquid, vel nihil: non primum, realia enim spacia fierent. Et vel essent quid increatum, vel quid creatum, non primum, solus enim Deus increatus; non secundum, nihil enim est creatum, quod mundi limitibus non coerceatur: superest ergò ea nihil esse: at quod reale est, in nihilo, tanquàm in loco, esse non potest.

CONCLUSIO II. Deus dici potest extra cœlos omnipotentia suâ, itaut designetur potentia Dei orbis circumferentia non circumscribi, & posse alios mundos creare. Undè Jobi 11. v. 8. excelsior cœlo dicitur. Ita S. Bern. lib. 5. de Consid. c. 13. *Deus eternitas, Deus charitas est, longitudo sine protensione, latitudo sine distensione. In utroque pariter locales quidem excedit temporalesque angustias: sed libertate natura, non enormitate substantia: tali modo immensus est, qui omnia fecit in mensurâ; & quamvis immensus, hic tamen modus & ipsius immensitatis.*

OPP. 1. Isa. 40. v. 12. dicitur Deus metiri pugillo aquas, & cœlos palmo ponderare. Quæ verba, ex S. Hieron. in c. 66. Isaia, *Deum forinsecus & intrinsecus, & infusum, & circumfusum* demonstrant. S. Hilar. lib. 1. de Trin. *Deus est ultra omnia, & omnia continet.* Et certè, ut Deus actu immensus intelligatur, non satis est omnia loca ab eo occupari posse: quemadmodum, ut actu intelligens perfectissimum esse censeatur, satis non esset omnia ab eo posse intelligi; sed necesse est præterea ut omnia actu complectatur animo.

R. Dei potentiam orbis ambitu non circumscribi; nec proinde actu extra cœlos esse. 2. Deum cœlos palmo ponderare: id est sine labore cœlos continere, non autem exteriori loco circumdari. S. verò Hieron. mentem suam sic interpretatur, ut pugillum vocet & palmum, humano scilicet more locutus: utitur quoque & mensuris, ut summa Dei potentia verbis nostris utcumque nobis insinuetur. Cum etiam à S. Hilar. dicitur Deus, non modò replere omnia; sed esse extra omnia, de Dei omnipotentia loquitur, quæ nullis finibus continetur. Porro inter intelligendi facultatem & præsentiam Dei in locis, discrimen illud intercedit, quòd quæcumque animo teneri possunt, reverà divinæ menti obversantur; aut quia sunt, aut futura sunt, aut possunt existere: ut autem Deus rei sit præsens, seu ut illam aliquo contactu contingat, necesse est, ut res illa existat. Et sanè corpus, ut possit existere, suam extensionem, sine quâ non esset, omnino postulat. Idem dicendum de re ex nihilo ductâ, ut ei sit Deus præsens; prius enim est rem existere, quam ei Deum fieri præsentem.

OPP. 2. Alterum mundum huic non contiguum creare potest Deus;

quâ hypothefi pofitâ , aut intra fpatia utrumque mundum dicimentia erit Deus , aut non ; fi primum ; ergò in fpatiis erit imaginariis : fi pofterius , ergò erit à fe ipfo divifus , quod implicat.

R. Negando 1. Hypothefim ; fi enim mundus alteri non contiguus cenferetur , effet fpatium aliquod inter utrumque mundum , & non effet : effet ex hypothefi : non effet autem ; cum nihil effet ; & proinde nec fpatium. 2. Hæc forfan de Deo concipi poffent , fi , inftar corporum , per fubftantiæ diffusionem loca occuparet , & per varias fui partes variis locorum partibus refponderet. Deus ergò non effet in illo fpatio , quod intermedium fupponitur ; cum nullum effet : fed in feipfo , & infinite diffufus refpectu fui effet ; quia poteft infinita occupare fpatia , ficut & creare.

Inf. 1. Nifi Deus effet in fpatiis imaginariis , de novo inciperet effe in illo novo mundo , & fic mutaretur.

R. Non inciperet effe per aliquid intrinsecum ; fed per aliquid extrinsecum , nempe per operationem : & fic mutatio effet in termino. Ita cum creavit , non mutatus eft.

Inf. 2. Nihil feipfum continere poteft , ficut nec creare : ergò Deus in feipfo non eft.

R. Equidem non poteft quid à feipfo pofitivè contineri , aut creari ; fed poteft negativè ; quia non eft , aut non continetur ab alio.

Inf. 3. Deus hunc mundum poteft movere extra fpatium , quod nunc occupat ; & fic Deus prius fpatium deferet , vel non : fi primum , mutabitur : fi fecundum , ergò extra mundum erit.

R. 1. Hypothefim non effe admittendam , nifi Deus novum producat fpatium intra quod mundus motu locali moveatur. 2. Fpatium intra quod Deus effet , à Deo non deferendum fore : nam vel illud reale eft , vel imaginarium ; fi primum , ergò à Deo confervatur ; fi fecundum , ergò Deus illum non deferet ; quia in illo nunquam erit ; cum fit merum figmentum.

O P P. 3. Aternitas Dei omnia tempora etiam fictitia complectitur : ergò à pari immenfitas omne fpatium etiam imaginarium implet.

R. Deum omnia tempora imaginaria ita complecti , ut in illis non fit , fed in fuâ aternitate : ita immenfitatem omnia fpatia complere , fic tamen , ut Deus non fit in fpatiis imaginariis , fed in feipfo.

Inf. Ut Deus fit infinite bonus , debet effe id , quo nihil melius ; ergò , ut fit immenfus , debet effe in illo fpatio , quo majus cogitari non poteft.

R. neg. paritatem ; ficut enim , ut dicatur omnipotens , non necesse eft ut producat omnia poffibilia ; fed fatis eft , quod poffit producere : ita , ut fit immenfus , fatis eft , quod poffit occupare omnia loca poffibilia.

O P P. ult. ex S. Aug. lib. 11. de Civit. c. 5. vaniloquium eft dicere Deum abfentem ab infinitis locorum fpatiis extra mundum.

R. 1. S. Aug. non in eâ fententiâ fuiſſe , ut fpatia imaginaria effe admittenda cenſuerit : quinimò hanc opinionem lib. 7. Confell. c. 1. 10.

& 14. rejecit; ibi enim fatetur in apprehendendâ essentiâ divinâ aberrasse se admodum, quod existimarit Deum esse substantiam infinitè diffusam, & in infinitis spatiis, & ultra cœlos, & instar substantiæ cujusdam corporeæ; quia pro nihilo tunc temporis habebat, quidquid spatio non continebatur. Porro c. 10. docet non æquam hanc esse de Deo existimationem; nec Deum esse existimandum ut substantiam diffusam, sed ut lumen immotum, quod omnia superet. Idem lib. de verâ Relig. c. 20. ait: Spatia imaginaria fingi; cum nihil nisi corporeum animo revolvitur. Et c. 43. censet veritatem supremam quantitate corporeâ non esse diffusam; sed ultra omnia loca extendi potestate infinitâ. Item Ep. 57. ad Dardanum ait: *Quasi speciosâ magnitudine opinemur Deum per cuncta diffundi sed ita potius sicut est magna sapientia, etiam in homine cujus corpus est parvum.* Et infra, quâ ratione Deus sit in loco exponit; ut substantia creatrix ubique scilicet; quia nusquam est absens: in se ipso autem; quia non continetur ab eis, quibus est præsens, tanquam sine eis esse non possit Sicut autem nec ab illo abest, in quo non habitat, & totus adest, quamvis cum ille non habeat; ita & illi, in quo habitat: totus est præsens; quamvis cum non ex toto capiat. Unde cum lib. 11. de Civit. cap. 5. asserit vaniloquium esse Deum absentem ab infinitis spatiis sibi fingere, supposito nempe quod Deus infinitis temporis spatiis ab opere abstinere non potuerit; quosdam Philosophos impugnât, qui fuisse à Deo mundum ab æterno creatum contendebant; & ideo infinita temporum spatia fingeant, quibus Deus non operari non potuisset. Quos Philosophos argumento ad hominem S. Aug. refellit. Si infinita, inquit, fingunt temporum spatia, quibus Deus operi incubuerit necessariò: infinita etiam extra mundum spatia cogitent, in quibus Deus necessariò operetur; & sic mundos innumeros cum Epicuro admittant necesse est: *Non enim opinor in hac vaniloquia esse progressuros, ut substantiam Dei incorpoream à tantis locorum spatiis absentem dicturi sint; posito nempe, quod talia spatia, qualia tenerentur admittere, excogitarent: Si verò unum agnoscerent mundum, ut agnoscebant; quaerit ab eis, cur Deus in temporum spatiis illis desinat esse. Quod si dicant inanes esse hominum cogitationes, quibus infinita imaginantur loca; cum locus nullus sit præter mundum: respondetur eis isto modo homines inaniter cogitare præterita tempora vacationis Dei; cum nullum sit tempus ante mundum.*

QUÆSTIO OCTAVA.

De invisibilitate, aut visibilitate Dei.

DEUM esse invisibilem docet Apost. 1. Tim. 6. v. 16. *Quem nullus hominum vidit; sed nec vi lere potest.* Ex aliis Scripturæ locis patet Deum esse invisibilem. Ex Matth. 5. v. 8. *Beati mundo corde; quoniam ipsi*

Deum videbunt. 1. Joan. 3. v. 2. *Cum apparuerit, similes ei erimus; quoniam videbimus eum sicuti est.* Expendendum itaque quâ ratione Dei essentia videri possit, & non possit. De intuitivâ visione, non de abstractivâ, quæstio instituitur; seu de eâ visione Dei, prout in se est, non prout ex rebus creatis intelligitur.

ARTICULUS PRIMUS.

Num Deus oculis corporeis videatur, aut videri possit.

CONCLUSIO. Oculis corporeis nec videtur Deus, nec videri potest.

1. Quia si aliquo sensu est Deus invisibilis, ut reverâ est ex 1. Tim. 6. v. 16. Maxime quia oculis corporeis impervius est. Deinde 1. Corinth. 2. v. 9. *Oculus non vidit, nec auris audivit, nec in cor hominis ascendit, quæ preparavit Deus iis, qui diligunt illum.* Quod autem Deus præparavit, sui visio est: ergo nec oculis, nec sensibus potest Deus percipi. Præterea 1. Joan. 3. v. 2. *Scimus quoniam cum apparuerit, similes ei erimus; quoniam videbimus eum sicuti est.* In tantum ergo, inquit S. Aug. Epist. 6. *Italica videtur videbimus; in quantum similes ei erimus; quia & nunc in tantum non videmus, in quantum dissimiles sumus.* Inde igitur videbimus, unde similes erimus. Quis autem dementissimus dixerit, corpore nos, vel esse, vel futuros esse similes Deo? In interiore igitur homine ista similitudo est, qui renovatur in agnitionem Dei secundum imaginem ejus qui creavit illum.

2. Ea est sententia SS. Patrum, S. Justini in Dial. Theop. Antioch. lib. 1. cap. 71. Orig. Hom. 3. in Cantic. lib. 7. contra Cels. ubi oculis corporeis Deum videri posse, ut calumniam Christianis falso impositam depellit. Falso igitur nobis Celsus imponit dicens nos sperare oculis corporeis Deum esse visuros, & auribus vocem ejus audituros, ac manibus sensibilibus ipsum esse contacturos; verum scimus equivocè cum corporis oculis appellatos esse à Scripturis sanctis oculos alios. S. Aug. Ep. 6. mox citatâ plures rationes congerit, ut idem confirmet. 1. *Quod oculis corporeis conspici potest, in loco aliquo sit necesse est; nec ubique sit totum; sed minore sui parte minorem locum occupet, & majore, majorem. Deus non est ejus naturæ.* 2. *Si Deus oculo corporis videri posset, aliis quoque sensibus perciperetur: Sonus ergo Deus erit, ut possit etiam auribus percipi? & halitus erit ut sentiri possit olfactu? & liquor aliquis erit, ut possit & bibi? & moles erit, ut possit & tangi.* 3. *Si quæ caro hâc dignitate donari posset, maxime quæ Christi fuit; at non potuit Christi carni præstari, ut oculis corporeis videret Patrem: & qui id asserbant, magis desipere ait, quàm qui carnem assorunt conversum iri in substantiam Dei. Et hoc futurum esse, quod Deus est, ut sic eam*

falem videndo Deo faciant idoneam, non tantâ diversitate dissimilem. Epist. III. Fortunatiano Siccensi Episcopo, istam, quæ Episcopum quemdam moverat, doctrinam, Sanctorum Patrum Athanasii, Gregorii Nazianzeni, Ambrosii, & Hieronymi autoritate confirmat; & sic se nihil novi docuisse; additque Deum futurum esse corporeum, & divisioni obnoxium, si oculis corporis objici possit. Quod verò corporis naturam immutandam fore assererent adversarii, ut ad Dei conspectum evehi posset; de sententiâ illâ pro viribus conatur deducere, probatque primo Deum soli mundo cordi esse aspectabilem, & proinde nec in loco, nec oculis corporeis percipi posse. Tum c. 17. Deum charitatem esse, veritatem, & sapientiam, quæ corporis oculis non subiacentur. *A conspectu corporeo longe alienior erit, & remotior ipse fons charitatis.* Et cap. 22. Si Dei videndi facultas corpori tribui posset, fieret corpus omnino spirituale; sicque resurrectionis nostræ fides tota rueret; ut observat ibidem. Corpus quidem spirituale fiet in resurrectione, non transeundo in spiritum, ita ut totus homo sit spiritus; sed propter ineffabilem facilitatem dicetur spiritale. Addit Epist. III. *Cum legis: videmus nunc per speculum & in enigmate, tunc autem facie ad faciem; intellige inde nos tunc visuros facie ad faciem, unde videmus nunc per speculum & in enigmate: hoc autem utrumque interioris hominis munus est; sive cum in istâ peregrinatione adhuc per fidem ambulatur, in quâ utimur speculo & enigmate; sive in illâ patriâ, cum per speciem contemplabitur. Pro quâ visione positum est facie ad faciem.*

Probatur tertio ratione. Quod videtur ab oculo corporeo, ab ipso necessario distare debet. At Deus substantialiter à Beatis distare non potest; cum ubique necessario sit præsens.

Præterea potentia vitalis extra fines objecti sui specificativi ferri non potest; intra autem oculi corporei objectum Deus non continetur: objectum enim specificativum oculi est visibile corporeum, seu coloratum, aut lucidum; Deus hujusmodi non est.

Insuper non potest oculuselicere actiones auditûs: ergo nec circa Deum versari potest; cum plus distet Deus ab oculo corporeo, quàm auditus.

O P P. 1. Potest elevari facultas extra objectum sui specificativum; ita ignis infernus ad torquendos spiritus, Dæmones scilicet, elevatur: cum igitur determinatio naturæ non impediat, quominus per potentiam obedientialem ignis in spirituales substantias agat; cur oculus corporeus non poterit elevari ad Dei visionem?

R. negando paritatem; discrimen enim hoc intercedit inter ignem, & oculum, quod oculus sit potentia vitalis, & vitali agat modo: vitalium autem facultatum est ad objectum singulare determinari, ad quod essentiali habitudinem & ordinem dicunt, & extra quod etiam per potentiam obedientialem ferri non possunt: at potentia non vitales ejus naturæ non sunt; non enim ad tale in particulari determinantur objectum; undè ignis determinatur tantum ad ea adurenda & torquenda, quæ calore illius aduri & torqueri possunt: cum verò spirituales substantiæ huic

tormento subiacere possint, ille ignis, qui corporea sola naturaliter adureret, habet à potentiâ obedientiali, ut in res incorporeas agat. Ratio autem à priori, cur potentia vitalis extra objecti sui adequati & specificativi limites ferri non potest; indè petitur, quòd essentia rerum mutationi non sint obnoxia: si autem potentia vitalis extra objectum suum ferretur, ejus essentia penitus convelleretur. Quodlibet ens non vitale omnipotentia Dei in ratione entis subjicitur, & sic potentiam Dei ad hanc, aut ad illam operandi rationem non determinat: sed facultas vitalis determinat Deum ad eliciendas operationes vitales, & circa objectum ad quod facultas dicit ordinem essentialem: sic quia homo per rationale specificatur; fieri non potest, quin non sit rationalis.

Respondent non pauci, ignem tartareum non agere physicè in Dæmones, sed duntaxat moraliter; sicque penitus exploditur paritas adducta.

INST. 1. Tàm objectum spiritale intra limites objecti specificativi materialis potentia continetur, quàm objectum supernaturale intra limites objecti specificativi potentia naturalis: ergò sicut Deus, licet sit objectum supernaturale, videri tamen potest ab intellectu creato; ità & ab oculo corporeo possunt Deus & Angelus videri.

R. Potentiam materialem nonnisi circa materiale versari; potentiam verò spiritualem attingere quidquid continetur intra objecti sui fines; intellectus autem humani objectum, est omne intelligibile: quod est verò naturale, solis naturæ viribus comparatur: at si sit supernaturale, intellectus sit par ad illud consequendum, modò accedat ejusdem ordinis auxilium.

INST. 2. Deus potest se oculis visibilem facere obedientialiter.

R. non posse, quia se faceret corporeum; nec potest Deus etiam, ut objectum infinitum, supplere defectum proportionis inter objectum & facultatem, quin mutet naturam oculi; esset enim oculus corporeus, & non esset.

INST. 3. Minus distant materiale & spiritale, quàm finitum & infinitum: ergò cum creatura finita possit videre Deum infinitum, potest materialis facultas objectum spiritale assequi.

R. minus distare in ratione entis; sed non in ratione habitudinis: ex ratione autem habitudinis, quam habet potentia ad objectum, petitur illius attingendi facultas; non ex diversâ entium naturâ.

OPP. 2. Ex S. Aug. lib. 22. de Civit. Dei c. 29. *Corporei oculi, post resurrectionem, ita spirituales fient, ut Deum ipsum visuri sint.* Invocato Dei auxilio quæstionem hanc tractandam suscipit S. Aug., statuitque 1. quæstionem gravis esse momenti & arduam, num scilicet Beati Deum visuri sint, non solum in corpore; sed etiam per corpus, sicut nunc videmus solem? 2. ait, si hâc visione donentur oculi, alterius futuros esse virtutis Beatorum oculos. *Longè itaque alterius erunt potentia, si per eos videbitur incorporea illa natura, quæ non continetur loco, sed ubique tota est.* 3. Oculorum virtutem non in acutiori videndi facultate sitam fore, quæ ad aquilarum acumen accedat; quòd hæc animalia, nihil aliud

quàm corpora spectare possint, sed ut videant & incorporalia. 4. Inexpertam nobis esse corporis spiritualis naturam; nec Scripturarum auctoritatem occurrere hâc in parte, sed succurrere tantùm; idè timendas esse cogitationes humanas. 5. Addit quod Philosophorum ratiocinatio, quâ disputant, ita mentis aspectu intelligibilia videri, & sensu corporis sensibilia, idest corporalia; ut nec intelligibilia per corpus, nec corporalia per seipsam mens valeat intueri: si posset esse certissima, proficèto certum esset per oculos corporis etiam spiritualis, nullomodo posse videri Deum: sed istam ratiocinationem, & vera, inquit, ratio, & prophetica irrides auctoritas. Et intrâ, Sicut ergo constat videri corpora spiritu; quid, si tanta erit potentia spiritualis corporis, ut corpore videatur & spiritus? Spiritus enim est Deus. . . . Quamobrem fieri potest, valdèque credibile est, sic nos esse visuros mundana tunc corpora cæli novi, & terra nova, ut Deum ubique præsentem, & universa etiam corporalia gubernantem per corpora, quæ gestabimus, & quæ conspiciemus, quaquà versum oculos duxerimus, clarissimâ perspicuitate videamus; non sicut nunc invisibilia Dei per ea, quæ facta sunt, intellecta conspiciuntur, per speculum in enigmate, & ex parte; ubi plus in nobis valet fides, quâ credimus, quàm rerum corporalium species, quàm per oculos cernimus corporales. 6. Sicut modò cum videmus homines viventes, non credimus eos vivere, sed videmus, cum eorum vitam sine corporibus videre nequeamus, quàm tamen in eis per corpora remotâ omni ambiguitate conspiciamus; ita quacunque spiritualia illa lumina corporum nostrorum circumferemus, incorporeum Deum omnia regentem etiam per corpora contuebitur; aut ergò per illos oculos sic videbitur Deus, ut aliquid habeant in tantâ excellentiâ menti simile, quo incorporea natura cernatur: quod ullis exemplis, sive Scripturarum testimoniis divinarum, vel difficile, vel impossibile est ostendere: aut quod est ad intelligendum facilius; ità Deus nobis erit notus atque conspicuus, ut videatur spiritus à singulis nobis in singulis nobis; videatur ab altero in altero; videatur in seipso; videatur in cælo novo, & in terrâ novâ, atque in omni, quæ tunc fuerit, creaturâ; videatur & per corpora, & in omni corpore, quocunque fuerint spiritualis corporis oculi acie perveniente directi. Ergò ex S. August. 1. per oculos corporeos videri possunt spiritualia, & ipse Deus. 2. Philosophorum rationes, quæ hanc sententiam impugnant, & quibus ipse usus est Epist. 6. Epist. III. & 112. nullius sunt momenti. 3. Quod addit Sanctus Augustin. de illius visionis ratione, emolliendæ illius sententiæ conducere non potest: constat enim in eâ fuisse sententiâ S. Aug. nempe per oculos corporeos videri Deum posse: apud ipsum verò non constitit, quâ ratione visio illa fieret; sic illius verba visionis modum, non ipsam substantiam spectant. Quod autem hæc vera fuerit S. August. mens, indè etiam colligitur, quòd Epist. 112. quæstionem hanc se alibi tractaturum, cum sponderet lib. 2. Retract. cap. 41. in hunc lib. 12. de Civit. cap. 29. quæstionem hanc se rejecturum asserit. Idem etiam habet serm. 101. de diversis cap. 14. Poterunt

forte corporales oculi, cum fuerit corpus spiritale, videre essentiam divinam aliquâ vi occultâ, inexperiâ, & prorsus incognitâ, nec ullâ estimatione perceptâ. Et cap. 19. Si autem caro illa tantam acceperit immutationem, ut possit per eam videri, quod non videtur in loco, omninò ita sit: sed est quarendum undè doceatur: celsi non docetur, nondum negetur; sed certò vel dubitetur; ita tamen, ut carnem resurrectionem non dubitetur.

R. 1. S. August. locis suprâ citatis fidem Ecclesiæ certò tradidisse. 2. visibilitatem Dei per oculos corporeos, tanquàm aliquid & fidei, & rationi contrarium impugnasse; undè, si de mente ejus agatur, certis illis potiùs standum erit momentis, cum solidissima sint; quàm iis sit insistendum locis, in quibus dubitanter, & de iis, quæ contingere possunt, sermonem habet. In locis porrò quæ obijciuntur, nihil certò asserit; & proindè ex illis mens ejus erui non potest, in quibus Philosophicè tantùm inquirat. In aliis autem locis Theologum agit; ex Scripturis, & Patribus sententiam suam acceptam confirmat: imò eodem in capite 29. libro 22. de Civitat. quæ possunt adversus sententiam nostram proponi, solvit ipse; & multa addit, ex quibus novum robur accedat; v. c. solvit istud ex Job. 19. v. 26. *In carne meâ videbo Deum.* Et 42. v. 5. *Nunc autem oculus meus videt te.* Et 1. per oculos, cordis oculos intelligi posse tradit. 2. non dixisse Jobum, per carnem, se visurum Deum; sed, in carne; & si dixisset, posse Christum intelligi, qui per carnem in carne videbitur: posse ergò sic accipi, *In carne meâ ero, cum videbo Deum*, quod est resurrectionis Prophetia. 3. probat corporis ministerio non egere Sanctos, ut videant corpora, sicuti nec indiget ipse Deus: nihil igitur concedit corporeis oculis, quod corporis vires excedat; nam scripsit demonstrari posse Beatorum oculis aliquid posse concedi, cujus beneficio incorporea cernatur natura; quâ ratione indulgeretur oculis, quod eorum naturam immutaret, nec integra servaretur natura? Si consequerentur, ut ait, quoddam ad animi naturam & dotes accederet. Undè sententiam, ut rationi magis consonam amplectitur, visum iri scilicet Deum à corporeis oculis in corporibus; & hanc rationem, ut faciliorem probatam habet: hoc autem nihil aliud est, quàm oculos corporeos impares asserere, qui Deum ipsum videre possint, & quæ ipsis concedenda sit visio, aliquo modo delineare, per quam videbuntur, quæ in corporibus magnifica conspiciuntur, undè mens Deum intelliget.



ARTICULUS SECUNDUS.

Utrum Deus ab intellectu creato, solis naturæ viribus instructo videri possit.

INTER veteres hæreticos non defuere, qui dixerint intellectum creatum nullo egere auxilio ad videndum Deum. Sic Anomæi, quorum Principes fuere Eunomius, & Aëtius. Errorem illum posterioribus sæculis renouarunt Beguardi, & Beguina; quos damnavit Concilium Viennense, Præside Clemente V.

CONCLUSIO. Solis naturæ viribus instructus homo Deum intueri non potest.

1. Quia visio Dei tota gratiæ opus est Rom. 6. v. 23. *Gratia Dei vita æterna.* Bonorum operum præmium est Joan. 14. v. 21. *Qui diligit me, manifestabo ei me ipsum.* Nullum autem bonum opus ex nobis possumus elicere, nec nisi supernaturali accedente auxilio; nec proinde bonorum operum mercedem consequi; nam ut habet Apostol. nec de Deo piè cogitare & sentire, nostris solis permitti viribus possumus, 1. Corinth. 3. v. 5. *Non quod sufficientes simus aliquid cogitare ex nobis quasi ex nobis, sed sufficientia nostra ex Deo est.* Joan. 15. v. 5. *Sine me nihil potestis facere,* inquit Christus; quod si ergo necquidquam boni hîc præstare possumus auxilio divino destituti, neque actum fidei, neque charitatis elicere; potiori jure credendi locus non est, posse nos videre Deum; cum omnium operationum perfectissima sit visio illa, nisi divinum auxilium concessum fuerit.

2. Hanc Ecclesiæ fidem ita exponit secundo sæculo S. Iren. lib. 4. c. 35. *Visus est per Filium adoptivè: videbitur autem & in regno cælorum paternaliter: spiritu quidem preparante hominem in Filium Dei; Filio autem adducente ad Patrem; Patre autem incorruptelam donante in eternam vitam, qua unicuique evenit, ex eo quod videat Deum; quemadmodum enim videntes lumen, intra lumen sunt, & claritatem ejus perspiciunt; sic & qui vident Deum, intra Deum sunt, & percipientes ejus claritatem.* Idem docent S. Ambr. 4. sæculo Lib. 1. in Luc. c. 1. S. Epiph. Hæres. num. 7. *Pro suâ benignitate, ac sapientia & potentia imbecillitatem nostram corroborare ad conspiciendum dignatus est, ut quod invisibile est, & infinitum non sic videt, quâ infinitum est; sed quatenus natura fert ejus, quod assequi non potest; à Deo valens reddita, ut extensis viribus id facere possit.* Fuit æquissima Concilii Viennensis definitio.

OPP. 1. Ex S. Aug. lib. 4. de Civit. c. 27. solam nostram, quæ ex peccato oritur, infirmitatem impedimento esse, ne Deus videatur: ubi ergo sublata est hæc infirmitas, menti statim se intelligendum & videndum objicit Deus.

R. Sublatâ quidem infirmitate, quæ ex peccato oritur, removeri cau-

sam remotam, quæ auxilii privationem meretur, aut quæ peccati effectus est; sed non ideò causam proximam accedere, seu auxilium divinum, quod nisi accedat, visionem Dei nunquam assequetur res creata intellectualis: Illud autem auxilium creaturæ innocenti nunquam post obitum negatur, aut deest. Unde asseruit S. Aug. creaturæ innocentis intellectum visione divinâ continuò illustrari.

O P P. 2. Si quæ ratio auxilii supernaturalis necessitatem adstruit, maximè quòd cognitum in cognoscente sit secundum modum cognoscentis; undè secundum modum naturæ est cujuslibet rei cognitio; & proindè, si rei cognitæ excellentia cognoscentis naturam superet, ab eâ non potest attingi: hæc autem ratio nulla est; nam oculus corporeus cælum prospicit; superiorem Angelum novit Angelus inferior, & tamen minùs perfectæ naturæ sunt. Aliundè intellectus licet supernaturali illustretur auxilio, ad divinam perfectionem non accedit; & proindè, si ratio superior valeret, intellectus quilibet, quocumque etiam donatus auxilio, ad Dei visionem semper esset ineptus, minimèque sufficiens; cum ad idem cum Deo immaterialitatis genus evehi nunquam possit.

R. 1. Objectionem hanc non impetere conclusionis nostræ fundamenta; cum rationem hanc non adduxerimus, sed momenta alia, quæ videntur certiora: Non enim nobis constat, an eâ ratione fiat cognitio. 1. Licet obscura penitus esset & incognita intellectualis cognitionis ratio, incertumque esset, num ea in cognoscente requiratur materialitas, quæ in objecto cognito occurrit; certum nihilominùs foret creatum intellectum supernaturali auxilio destitutum imparem esse Deo videndo, quod nobis sufficit.

ARTICULUS TERTIUS.

Utrum Deus sit incomprehensibilis, seu num ab intellectu Angelico, aut humano, quocumque auxilio juvetur, comprehendi possit?

R ET ULTIMUS 3. art. 1. hanc impiam fuisse simul & stolidam Aëtii & Eunomii sententiam, qui cujusmodi sit Deus, percipere se perfectè; imò corporeas quidem res se non ita clarè perspectas habere profitebantur. Hæc de Aëtio refert S. Epiph. Hæres. 76. *Hic enim cum suis in eam vanitatis amentiam incidit, ut supra mortales omnes Deum se non solâ fide, sed naturâ secundum scientiam nosse jactaret, quemadmodum alicubi supra memini, dicere illos non simpliciter fidei aliquâ notitiâ Deum sibi esse perspectum, sed perindè ac quispiam cognoscit quidquid oculis cernitur, aut manibus atrectatur, velut si in manus assumit aliquis lapidem aut, lignum, aut materiae alterius instrumentum: ita audacissimus dicebat, tam Deum novi quam me ipsum, imò non tam novi me ipsum, quam Deum.* Hic non quaeritur an in hac vitâ perspectam

etiam Dei cognitionem assequamur; absurdam enim hanc opinionem q. 3. art. 1. confutavimus. Sed num hinc, & in cœlis eâ gratiâ donari possimus, ut non modò Deum ut in se est intueamur, sed ut animis nostris quidquid ad ejus naturam pertinet complectamur. Equidem hinc alter fuit error Eunomianorum. Non enim modò censuerunt ex S. Epiph. se Dei essentiam habere perspectam; sed & animo se assequi quidquid ad eam comprehensionis nomine designatam cognitionem pertinet: comprehensionis autem nomine subintelligimus adæquatam rei noticiam, quæ ex S. Aug. lib. 83. q. 14. Est cognitio in claritate ac representandi ratione æqualis, vel superior objecto suo.

CONCLUSIO. Deus absolutè comprehendi non potest. In hac questione probandâ non immorabimur. Præterquam quod enim Eunomiana hæresis 4. sæculo stoliditatis & impietatis unanimi omnium consensu fuit damnata; Scripturæ etiam autoritas, antiquorumque expositiones ita perspectæ sunt, ut vel expositione non egeant. Accedunt adhuc vel ipsis attendentibus rationes, quæ menti, vel omnem scrupuli locum eximant. Job. c. 11. *Forſitan veſtigia Dei comprehendes, & uſque ad perfectum, omnipotentem reperiſ* c. 36. v. 16. *Ecce Deus magnus vincens ſcientiam noſtram.* Jerem. 32. v. 1. *Magnus conſilio & incomprehenſibilis cogitatu.* Rom. 11. v. 39. *Quam incomprehenſibilia ſunt judicia ejus, & inveſtigabiles viæ ejus,* 1. Tim. 6. v. 16. *Lucem habitat inacceſſibilem.* Si igitur nec capto comprehendi, nec reperiri uſque ad perfectum, nec vel ejus viæ inveſtigari poſſint, & nullus ad ejus lucem accēſſus pateat; non eſt qui de perfectâ ejus cognitione obtinendâ, quis poſſit cogitare. Unde SS. Patres, etiam ante Hæreſim Eunomii exortam, hanc docuere fidem, probationibusque firmarunt. Sanctus Irenæus libro quarto, capite 37. *Igitur ſecundum magnitudinem non eſt cognoscere Deum; impoſſibile eſt enim menſurari Patrem.* Sanct. Epiphani. Hæreſ. 70. *Inſinitum Deum ait videri, non ut ſe habet inſinitum, ſed quomodo capere natura poteſt.* Videre nos poſſe Deum, non verò comprehendere duplici ſimilitudine ſic explicat. Veluti ſi quis per anguſtum foramen cælum aſpiciat, ac dicat, *video cælum; non utique mentietur; videt enim reverâ cælum.* Ac ſi quis dicat, *non vides cælum; nec iſte mentietur: tam enim qui ait vidiſſe non mentitur, quam qui eò dicit non ipſum vidiſſe, vera loquitur; quippè non vidit illius exporrectionem, neque latitudinem;* ſubjicit aliud exemplum. *Sanè accidit, ut ex alto montis vertice mare proſpiciamus, quod ſi nos illud vidiſſe dicamus, non mentimur; neque ſi contradixerit aliquis, ac vidiſſe nos negaveris, non ille verum dicit; propterea quòd, cum homo ſit, quò illius latitudo, aut longitudo, quò altitudo pertingat, quamque alti ſint voraginis illius reſceſſus, ſed nec & illius effecta, pervidere poteſt.* S. Aug. ait Deum à nobis non poſſe comprehendere, quia inſinitus eſt; & ſeiſpſum ſolum comprehendere, quia ſeiſpſum complectitur; hominem autem non poſſe ſic Deum attingere, quia finitæ virtutis eſt. Ita lib. 12. de Civit. c. 18. *Quapropter ſi quidquid ſcientiâ comprehenditur, ſcientiis comprehensione*

finitur: profectò & omnis infinitas quodam ineffabili modo Deo finita est, quia scientia ipsius incomprehensibilis non est. Et lib. 83. q. 14. Omne, inquit, quod se intelligit, comprehendit se; quod autem se comprehendit, finitum est sibi: & intellectus intelligit se: ergo finitus est sibi; nec infinitus esse vult, quamvis possit; quia norus sibi esse vult, Scrm. 38. de Verb. Domini c. 3. sic habet, *Attingere aliquantulum mente Deum, magna beatitudo est: comprehendere omnino impossibile*; Deus ergò comprehendendi non potest; quia mensurari non potest; utpotè infinitus: sed videntium captu videtur, seu non videtur quoad latitudinem, nec totus circumspicitur penitus, nec scientis cognitione finitur: hæ sunt etiam aliorum SS. Patrum rationes, ut SS. Basili, Greg. Naz. Greg. Nyss. & cæterorum, qui veritatem Catholicam adversus Eunomianos propugnaverunt.

Nec potest intellectus creatus ad eum cognitionis modum evahi, qui essentia divinæ infinitam potentiam, aut perfectionem adæquare possit; Deus enim esset: Ergò Deum comprehendere non potest; cum comprehensio sit potentia cum objecto adæquatio; utpotè omnium cognitionum nobilissima; & proinde ex omni parte absolutissima; Deus ergò solus sibi æqualis seipsum potest comprehendere, seu sibi ipsi in cognitione adæquari.

O P P. Quod est simplicissimum, qualis est Deus; & visione clarâ, seu intellectivâ videtur, comprehendendi necesse est: quidquid enim non videretur, aut Deus esset, aut quid Deo adventitium. Si primum; ergò clara non esset Dei visio; cum quod Deus est, non videretur: secundum autem dici non potest; quia nihil in Deo est, quod non sit Deus: Ergò Deus videtur totus; quia est simplicissimus; videturque totaliter intuitivè, seu sicuti est.

R. Videri Deum totum; quia est simplicissimus, seu nihil esse formaliter in Deo, quod à Beato intuitivè non videatur; non verò ita videri perfectè, seu totaliter à Beato, ut cognitionis perfectio essentia Dei adæquetur; & itaur, tam perfectè cognoscat, quam possit cognosci: aliquid autem videri potest, licet cognitio totum perfectioni ejus non respondeat; sic eadem stellæ oculis & menti aratoris, astronomi, & navis gubernatoris objiciuntur; aliter tamen à rustico, aliter tamen ab astronomo; aliter à navis gubernatore perspiciuntur.

I N S T. 1. Ideò Deus intuitivè potest conspici; quia intelligibilis est: igitur comprehendendi quoque potest; quia comprehensibilis est.

R. comprehendendi quidem posse, sed à seipso solo.

I N S T. 2. Vident Beati comprehensionem, quâ seipsum Deus comprehendit.

R. Videre intuitivè; sed non omnibus modis, quibus videri potest, seu comprehensivè; seu ratione câ infinitâ, quâ Deus seipsum novit. Esto enim homo sit comprehensivus, ut est intellectivus; potest alia animo assequi, non Deum; quia is est Deus, ut à seipso solo comprehendendi possit.

I N S T. 3. Deus infinitâ ratione conspicitur; quia modi omnes,

quibus Deus visibilis est, & communicari potest, imò & ratio illa infinita, quâ seipsum novit, perspecta sunt Beato: ergò Deus comprehenditur.

R. Videri quidem Deum; sed non infinitè, seu in genere visionis æque perfectò, ac seipsum videt: nec conspici, nisi in communi, omnes & singulares modos, quibus Deus communicari potest.

INSTR. 4. Ad comprehensionem non requiritur, ut res videatur perfectissimo cognitionis genere, quo videri potest; alioquin Angelus mutam non comprehenderet; quia longè perfectiori ratione eam Deus habet cognitam.

R. Ad comprehensionem satis esse, si rem cognitio, aut æqualis, aut superior attingat: muscam autem cognitione æquali, & superiori assequitur Angelus: per accidens est ad illam agnoscendi rationem, quòd Deus perfectiori modo cognoscat: cum verò Deus animo obversatur, quolibet, & cujuslibet cognitio Deum æquate non potest, nedum superare.

INSTR. 5. Non est potior ratio, cur tota divinitas naturæ humanæ hypostaticè unita sit, quàm quòd ipsa natura divina uniatur tota objectivè intellectui creato.

R. Naturam divinam humanæ naturæ fuisse unitam; non quidem secundum omnem modum, quo uniri potest; sed secundum humanam capacitatem, quæ finita est; & proindè non infinità ratione: ad rationem verò comprehensionis requireretur conjunctio infinita Essentiæ Divinæ in ratione objecti cum intellectu creato; quod implicat.

INSTR. 6. Cognitio divina, & proindè comprehensiva menti humanæ potest conjungi, sicut Verbi personalitas humanitati; sicque Deus comprehendi potest ab intellectu creato.

R. Non posse fieri conjunctionem illam cognitionis divinæ cum humano intellectu: cognitio enim non potest non proficisci à principio interno quod cognoscit; quid enim cognitio est? mentis scilicet cognoscentis actio: conjunctio autem personæ divinæ cum hominis naturâ nihil ejusmodi exigit: sed uniri solummodò in ratione termini; & naturam complere perfectiùs longè, quàm per propriam subsistentiam terminaretur: sed & cognitio increata menti creatæ non posset inesse, seu conjungi aliâ ratione, quàm inadæquatè: sic nec Verbi persona unius naturæ humanæ infinito modo; sed duntaxat finito: undè posirà etiam hypothesi non possibili, nec comprehenderetur Deus: ejus enim naturæ cognitione illâ non posset circumscribi, vel adæquari. Addo, si daretur lumen gloriæ infinitum (quod meritò negatur possibile) creatus intellectus eo adjutus Deum non comprehenderet; quia lumen illud aliquid esset creatum, ac infinitum duntaxat per participationem, & in aliquo genere.

ARTICULUS QUARTUS.

Utrum intuitiva Dei visio possibilis sit, & utrum illius visionis possibilitas demonstrari possit?

JAM exposuimus quid non possit assequi humana natura circa Dei visionem: superest modò expendendum, an assequendæ intuitivæ Dei visionis spes nobis superesse possit; seu an eam consequi possimus; & quibus argumentis, an Theologicis, an merè naturalibus, illam visionem esse possibilem liceat demonstrare.

Circa primam hanc quæstionem observat S. Gregor. lib. 18. Mor. c. 28. aliquos eo in errore fuisse, ut existimarent Sanctos non intueri ipsam Dei naturam, sed tantum excellentem quamdam claritatem à Deo manantem. Idem Armenos sensisse testatur Guido Carmel in suâ Summâ de Hæresib. Eundem etiam professus est errorem Petrus Abailardus, ex S. Bernard. Epist. 190.

C O N C L U S I O I. Possibilem esse Dei visionem intuitivam fides docet. Probatur: dari posse aliquid, maximè inde constat, cum jam concessum fuit: cum promittitur ab eo, qui non potest fallere, & qui est omnipotens: sine quo deniquè infelix homo esset. Visio autem intuitiva jam Angelis fuit concessa: filiis Dei promittitur: & sine eâ homo infelix esset, cum sit ejus unica beatitudo.

Angelis fuit jam concessa, Mat. 18. v. 11. *Angeli eorum in cælis semper vident faciem Patris mei.*

2. Hominibus in virtutis præmium promittitur, Math. 5. v. 8. *Beati mundo corde, quoniam ipsi Deum videbunt.* Joan. 14. v. 21. *Qui diligit me, diligitur à Patre meo, & ego diligam eum, & manifestabo ei meipsum.* Hæc autem visio proculdubio intuitiva est, & distincta ab abstractivâ, seu obscurâ, quam hîc consequimur, ex 1. ad Cor. cap. 13. v. 12. *Videmus nunc per speculum in enigmate; tunc autem facie ad faciem.* 1. Joan. 3. v. 2. *Cum apparuerit, similes ei erimus; quoniam videbimus eum sicuti est.* Apoc. 21. v. 4. *Videbunt faciem ejus.* Cum ergò verba Scripturæ proprio sensu & obvio sint exponenda; & visio futura non sit ænigmatica; proculdubio est intuitiva, seu Dei conspectus ut in se est. Authoritates SS. Patrum recensere supervacaneum esset: res enim apud ipsos indubitata est; & art. 6. præterea referre tenebimur. De solis illis Patribus agendum nunc erit in objectionum solutione, de quorum sententiâ dubium movetur.

3. Visio Dei intuitiva unica est hominis beatitudo; hæc enim in alio, quàm in Deo intuitivè viso non potest consistere: nisi igitur possibilis sit Dei visio intuitiva, finem suum anima rationalis non poterit consequi: at benignitati divinæ consentanea non cogitaret, qui de Deo ita sentiret; præsertim cum hominem ad imaginem suam effinxerit, tamque præstantibus beneficiis illum exornarit. Et certè, vel naturam divinam Bea-

ti viderent, vel claritatem aliquam: at in Deo nihil est aliud ejus claritatem videre, aliud illius naturam; ut probat S. Greg. lib. 18. Moral. in Job. cap. 18.

OPPON. 1. Math. 5. & 1. Cor. 13. Non magis tradi visionem Dei intuitivam ut possibilem, & in cœlis concedendam, quàm Gen. 32. v. 30. & Num. 12. v. 8. ubi dicuntur Jacob, & Moyses vidisse Deum facie ad faciem, seu visione oppositâ ænigmatica; nec sufficeret dicere loca illa Gen. 32. & Num. 12. restringi per verba, quæ habentur Exod. 33. v. 20. *Non videbit me homo, & vivet* &c. Eâdem enim ratione Math. 5. & 1. Corinth. 13. verborum sensus, coercerentur. Sicut enim in veteri Testamento docemur Deum videri facie ad faciem, & aliquatenus non videri, nec conspici posse: ita in novo proponitur Deus aliquandò visibilis in cœlis, scilicet facie ad faciem; & quandòque invisibilis, ut 1. Tim. 1. v. 17. & cap. 6. v. 16. dicitur *Lucem habitare inaccessibilem, quem nullus hominum vidit, sed nec videre potest.*

R. Loca Gen. 32. & Num. 12. facilè explicari; cum tam apertè Ex. 33. proponantur, ibique tradatur, quæ visio Moyfi fuerit concessa, ut art. 1. fiet compertum: loca verò Math. 5. 1. Cor. 13. & alia non coarctantur verbis 1. Tim. 1. & 6. ita enim apertè intuitiva Dei visio promittitur, ut nec dubitationi ulli locus sit; hæc autem loca 1. Tim. 1. & 6. intelligenda sunt de visione naturali, aut de illâ quæ in hâc vitâ conceditur; itaut Deus videri non possit ab intellectu creato, qui solis naturæ viribus instructus erit; nec etiam intuitivè in hâc vitâ, posito nempè decreto divino, de non concedendâ viatori hujusmodi visione: aliundè quæ in veteri Testamento referuntur, figurativè sunt intelligenda ex Apost.

OPP. 2. Visionem Dei intuitivam impossibilem esse docent S. Basil. lib. 1. cont. Eunom. *Non solum homines, sed etiam ratione præditam naturam omnem arbitror superare comprehensionem illius; ratione porro præditam dico naturam, quæ quidem creata sit: nam soli Filio cognitus est Pater, necnon Spiritui Sancto.* S. Greg. Naz. orat. 34. S. Greg. Niss. lib. 12. cont. Eunom. S. Cyrill. Hieros. Catech. 6. docent Angelos videre Deum, non sicuti est, sed quantum capere possunt; & Catech. 7. vident Angeli faciem Dei *pro mensurâ quisque ordinis sui; ceterum pura & liquida Patris visio, propriè Filio, & Spiritui Sancto reservatur.*

R. Patres illos de perfectâ seu comprehensivâ Dei visione loqui, ut ex eorum verbis fit compertum, & ex eorum adversus Anomæos proposito, seu de eâ cognitione, quæ personis divinis competit: qui etiam loquendi modus frequenter occurrit in aliorum Patrum scriptis, ut S. Epiphan. S. Hieron. S. Cyrill. Alex. Euth. & aliorum, quos ideo qui arguit erroris, hallucinatur graviter.

INST. 1. Patres non solam divinæ naturæ comprehendendæ potestatem Angelis, Prophetis, & cæteris Sanctis denegant; sed etiam omnem penitus Essentiæ divinæ visionem intuitivam: imò etiam probationes

omnes, quæ visionem divinam possibilem inducere videntur, confutant, ut S. Chrysost. hom. 14. in Joan. in hæc enim verba, *Deum nemo vidit unquam, unigenitus Filius, qui est in sinu Patris, ipse enarravit; Deum, inquit, cujusmodi est in se, non solum Propheta, sed nec Angeli viderunt, nec Archangeli; sed, si ipsos interroges, audies nihil tibi quidem de substantiâ ipsâ respondentes; verum gloriam in excelsis tribuentes Deo, & in terrâ pacem hominibus bona voluntatis &c.* Solus ipsum videt Filius, & Spiritus Sanctus: etenim natura creata omnis, qui tandem increatum illum potest videre? nam si qualiscumque virtutis corporis expertis, tametsi facta sit, claram contemplationem capere non possumus, idque sæpe in Angelis ostensum est, multo magis illius ferre non poterimus, quæ & corpore caret, & est increata. Et postea Quod autem videri ipse nequeat, non solum ab hominibus, sed neque à cælestibus virtutibus, Paulus ostendit: cum enim dixisset 1. Tim. 3. manifestum esse illum in carne; subjecit statim, visum esse Angelis: itaque Angelis etiam ipsis tunc visus est, quando carnem induebat; antea verò non sic illum videbant; quoniam ipsis etiam non erat aspectabilis substantia. Verum subinde objicit sibi Matth. 18. verba Christi, Angeli eorum semper vident faciem Patris mei, qui in cælis est, ac respondet non sequi videti ab illis essentiam ipsam, sed perinde intelligendum illud esse, atque hæc Math. 5. Beati mundo corde, quoniam ipsi Deum videbunt; nempe mentis intuitum, qui ad captum nostrum temperatus est, & notionem Dei, prout eam habere possumus: sic etiam in Angelis ait illud accipiendum esse, scilicet propter puram ipsorum naturam, nihil ipsos aliud præterquam Deum animo unquam videndum sibi proponere: quò etiam pertinere ait illud Math. 11. Nemo novit Patrem nisi Filius. Quorsum istud, inquit, an omnes in ignorantia versamur? absit, sed nimirum nemo novit, ut Filius: Quemadmodum ergo multi illum viderunt, pro eo ac videndi capaces erant; ejus verò essentiam nemo vidit illorum; sic multi Deum novimus: hujus autem essentiam nemo scit, hoc est, quid tandem ea sit, præter illum solum, qui ab ipso genitus est. Et in Orat. 3. cont. Anom. de incomp. Dei naturâ, ait Angelos nec investigare Deum, nec videre, nec percipere posse; solumque Filium, & Spiritum Sanctum cognoscere: neque Angelos ipsam Dei substantiam intueri; sed Deum se se demittere, & eorum infirmitati & captui attemperare; sicque videre Angelos non Dei essentiam, sed aliquid tibi attemperatum.

R. S. Chrys. solam comprehensionem excludere. Cum enim Anomæos impugnaret, qui, ut observatum est, se tam perfectè Deum nosse, ac Deus ipse semetipsum cognosceret, jactitabant; idè pro viribus infanam illam opinionem impugnaturus, duo aut tria protulit, quæ difficultatem non parerent, si disputationis scopus spectaretur. Nam 1. probandum suscipit Dei visionem, quæ nobis & Angelis conceditur, cum visione, quâ Filius Patrem cognovit, non esse comparandam; cum hæc Dei comprehensio sit; nec talem dignitatem assequi possit nostra cognitio, nemo Patrem novit ut Filius, Matth. 11. Nemo cognovit ipsam Dei

Substantiam, qualis est, nisi solus unigenitus, qui certam notionem & comprehensionem habet, qualem de Patre habere Filium par est. Rationemque addit: Nam in sinu Patris esse, majus quiddam est, quam videre: qui enim tantum videt, non certam habet rei vise cognitionem: qui verò sinu immoratur, omnia ei perspicua sunt, & certa. 2. Deum ait aspectabilem Angelis fuisse factum, ubi naturam humanam induit; quòd nempe naturæ Angelicæ vires natura humana non excederet: non ita autem se habere naturam divinam respectu Angelorum; incomprehensibilemque illis esse, sicut mare incomprehensibile est urinatoribus, & Sol invisibilis viatoribus: ubi tria distinguit, videre, penetrare, & comprehendere. Idem Hom. 3. de Incompreh. sic habet, Nemo propius accedere potest ad inaccessible: exempli gratiâ (incomprehensibile dicimus) quod subeuntes urinatores, multumque altitudinis transmittentes, fundam attingere nequeunt: inaccessible, quod nemo urinari tenet, & metiri. Ergo ex S. Chrysost. accedere quidem possunt ad mare urinatores; illud tamen totum pervadere aut comprehendere nequeunt: ita licet Deus videri possit; quia tamen totaliter videri nequit, idè nec potest comprehendi. Alia duplici comparatione illustravit S. Epiph. discrimen inter visionem intuitivam, & comprehensionem; nempe ex mari, quod ex editâ speculâ, & ex cælo, quod per angustum foramen conspiceretur. Cæterum quòd solam comprehensionem excludat, patet ex S. Chryl. Hom. 3. de Incomp. Non ignoro adversarios nostros verbis meis insolentiam summam objecturos, quòd no supremis quidem virtutibus Deum esse comprehensibilem judicem. Et infra, Non pari modo nos atque virtutes Deum incomprehensibilem agnovimus, perfectius perfectiores noverunt. Hom. 4. Postquam nuper ostendimus Deum incomprehensibilem esse, etiam Cherubim ipsis & Seraphim Quid restat ut ostendamus Dei exquisitam comprehensionem habere non posse Angelos, aut ullam rem creatam, quoties Deum audio nullum vidisse; illud intellige, nullum esse, qui substantiam exquisitâ ratione perciperit: quod repetit Homiliâ quintâ, ubi ait Deum à solo Filio, & Spiritu Sancto exquisitâ ratione cognosci: substantia namque superiorem substantiam nunquam perfectè intelligere potest. Nec mirum esse; cum nec noverimus quid sint Angeli, & quid sumus. Idem Homiliâ 34. in c. 13. 1. ad Cor. ait neminem habere manifestissimam Dei cognitionem. Sic unicam Dei comprehensionem Angelis & hominibus negat, quæ Filio & Spiritui Sancto competit, quam vocat exquisitam Dei cognitionem: non verò negat visionem intuitivam Sanctis: imò illâ frui Sanctos etiam tunc temporis agnoscit, Hom. 3. in Ep. ad Philip. Justî, sive hic, sive ibi; cum Rege sunt, atque ibi quidem multò magis propius, non quasi quodam interjecto vestibulo, non per fidem; sed facie ad faciem. Eadem prorsus verba repetit Hom. 69. ad pop. Antioch. Et Hom. 10. in 2. Epist. ad Cor. Si cogitatio eorum, qui adhuc vivunt, quamvis obscura sit; tantam suppeditat voluptatem; cogita quantam lætitiâ nobis allatura sit manifesta ipsa visio. In Orat. de S. Philog. Hic quidem nemo Deum vidit; illic autem qui adsunt, perpetuò vident, quatenus illum vi-

dere licet, non solum presentem, verum etiam gloriæ splendore condecorantem universum cœtum.

INST. 1. Sanct. Chrylost. visionem illam vocat condescensum & attemperatorem.

R. Ita vocasse, ut opponeret eam comprehensioni, non visioni intuitivæ; ita condescensum illum ipsemet explicat Hom. 3. de incomprehens. Cum Deus, non, ut est, se ostendit; sed quoad videre is potest, quæ aspectum ejusmodi meruit, eatenus firmitate videntis suam representationem metitur ac temperat, condescendere illum dicimus. Et infra: Deum namque incomprehensibilem esse, non pari modo nos, atque virtutes cognovimus; quia perfectiores perfectius norunt. Quod argumenti genus adversus Anomæos sæpius repetit. Ex quibus colligeret quis, quàm iniquè proferre non dubitarint quidam, à S. Chrylost. intuitivam cognitionem à comprehensivâ non fuisse distinctam. Theologis illis hæc excidunt, qui levem, aut nullam in Verbi divini, & Patrum lectione collocarunt operam.

OPP. 3. Theodoret., S. Chrylost. discipulus, attemperatam quidem Dei speciem Sanctorum oculis objici fatetur: Eam autem negat esse divinæ essentiae conspectum, in Dial. 1. *immutabilis*. Cum enim ageret contra Eutychianos, qui nihil corporeum in Christo post resurrectionem superesse contendebant; Christum habere adhuc corpus ex eo probat, quòd se aspectabilem & videndum præbuit, ratione scilicet corporis; cum substantia Dei sit penitus invisibilis.

Ut autem ab illo argumento se se expediat Eranistes, seu Eutychianus, qui cum Orthodoxo pugnat, objicit Patriarchas in Antiquo Testamento vidisse Deum; & proindè non esse admittendum corpus in Christo, ut posset videri. Orthodox. reponit, nec visam fuisse à Patriarchis Dei substantiam; nec etiam videri ab Angelis; sed aliquid aliud accommodatum eorum viribus, & naturæ. Eran. ait, *Et tamen dictum est quod viderent*. Orthodox. *dictum est; nos verò, & piis cogitationibus utentes, & divinis asseverationibus credentes, qua disertè affirmant, quod Deum nemo vidit unquam, dicimus ipsos non divinam naturam vidiſſe, sed visiones quasdam ipsorum captivi accommodatas*. Eran. Ita dicimus. Orth. Sic ergò de Angelis intelligamus; audientes, quod semper vident faciem Patris vestri; non enim vident divinam substantiam, qua nec circumscribi, nec comprehendi, nec mente percipi potest, & qua universa comprehendit; sed speciem quamdam ipsorum naturæ accommodatam. Eran. Hæc ita se habere, in confesso est. Orthodox. Post Incarnationem verò, visus est etiam Angelis, secundum divinum Apostolum, non in similitudine gloria, sed vero ac vivo utens quasi velamine carnis integumento; manifestatus est enim, inquit, Deus in carne justificatus est, in spiritu ejus Angelis. Ergò tùm ex Catholicorum, tùm Hæreticorum consensu, divina substantia videri non posse credebatur.

R. Vel Theodoretum, per speciem illam, quam vident Angeli, intelligere aliquid creatum, vel aliquid increatum; non prius, alioquin in
re creatâ

re creatâ summum hominis bonum constitueret: si posterius; ergo Deus illud erit.

2. Dum dicit Angelos non videre Dei substantiam, nihil aliud excludit, quàm comprehensionem; addit enim, *Ideo non videre, quia nec circumscribi, nec intelligentiâ comprehendî potest: non circumscribi, ἀμερίοντες*, quæ universâ comprehendit: sed speciem quamdam ipsorum naturæ accommodatam præberi. Idem in Ep. 1. ad Tim. in hæc verba c. 6. lumen habitat inaccessible; *habet enim, inquit, naturam, quæ nec circumscribi potest: si autem habitas lucem, ab eâ circumscribisur: si autem ad lucem, quæ est circa ipsum, accedi non potest quomodo potest; ipse conspici*; Unde subjungit, quem nullus hominum vidit, sed nec videre potest; eâ scilicet visione, quâ circumscribatur, seu quâ comprehendatur: visionem verò intuitivam non excludit, quam justis in alterâ vitâ concedit in Epist. ad Ephesios hæc verba exponens, ut ostenderet in sæculis supervenientibus abundantes divitias gratia sua. Nunc enim, inquit, bonorum, quæ sperantur, magnitudo est quidem omnino ignota fidelibus; *fideles autem vident tanquam in speculo & in enigmate; per fidem enim ambulant, non per speciem: tunc autem videbunt facie ad faciem*. Vel inde compertum fit Theodoretum de substantiæ Dei conspectu loqui, cum humanæ Christi naturæ visionem fidelibus & infidelibus concedit; *Tunc, inquit, fideles & infideles videbunt naturam ex nobis sumptam ab omni creaturâ adoratam, & sanctos unâ regnantes*. Dei autem visionem justis solis concedi, ut dogma ubique receptum supponit. In L. de vitâ S. Euseb. ait Eusebium videre in cursû metâ agonothesiam, qui labores magnificâ mercede remuneratur. Is alius à Deo non est. *Ad cursus metam pervenit, & agonothesiam cernens, & coronas desiderans: agonothesia remunerationum magnificentiâ labores superat: ego verò visione illâ frui cupio*. Idem in vitâ S. Jacobi Anachoretæ. *Reliquius Martyrium, inquit, undique sibi comparare studuit, cum Sanctorum populo habitare cupiens, & cum eis resurgere, divinoque conspectu potiri ducebat ἀγῶνισται μάρτυρες*.

INST. Ex Theod. in 13. ad Cor. *Videmus facie ad faciem; non videmus Dei naturam, quæ cerni non potest; sed eam, quæ de nobis sumpta est: hîc videmus symbola Domini; illîc ipsum Dominum*.

R. Theodoretum de ratione naturali cognoscendæ Christi humanitatis, non de beatitudine agere; nam eam visionem concedit fidelibus & infidelibus, in Ep. ad Eph. quæ proinde non est visio beatifica.

Et quidem fatendum est non fuisse quæstionem motam cum Eraniste de Deo incomprehensibili; sed adversus Eunomianos: inter disputandum autem adversus Eutychianos, hæc addidisse Theodoretum, quod eo tempore hæresis illa foret quoque convellenda; hoc autem Patribus est familiare, ut subindè adversus hæreses grassantes adjungant plurima.

Si de S. Chrysost. & Theod. doctrinâ judicium etiam ferre liceat ex receptâ tunc temporis, & antea in Oriente sententiâ; eorum scripta illustrare in promptu esset, ex infra art. 6. adducendis, ubi de visione

Dei actu Sanctis concessâ agendum erit: ex SS. enim Basilio, Gregorio Naz. & Nyss. constabit, eam actu illis concedi, creditum tunc fuisse.

OP P. 4. Facultas finita nequit attingere objectum infinitum: at intellectus creatus finitus est; Deus verò infinitus.

R. Facultatem finitam attingere objectum infinitum, non quatenus infinitum est; sed ut est in se visibile, seu intelligibile: cum ergo Deus sit visibilis, licet infinitus; cum attingere valet Beatorum intellectus.

INST. 1. Objectum infinitum nequit attingi, nisi modo infinito; quemadmodum objectum supernaturale non potest percipi, nisi modo supernaturali; & objectum spiritale, nisi modo spiritali.

R. necesse non esse, ut objectum infinitum, Deus videlicet, percipiat modo infinito, nisi à potentiâ infinitâ, qualis est mens increata; quia non attingitur Deus sub eâ ratione, quâ infinitus est; sed quâ visibilis; & attingitur ratione finitâ, & supernaturali, à facultate finitâ supernaturali auxilio adjutâ: objectum verò spiritale non est sensibile, ut attingatur à potentiâ corporali; nec potest percipi, nisi modo spiritali.

INST. 2. Visio objecti infiniti necessariò debet esse infinita; quandoquidem pro perfectionum objecti incremento, major est cognitionis perfectio; ideòque objectum infinitum necessariò percipitur modo infinito.

R. Visionem objecti infiniti debere esse infinitam extrinsecè (ut loquuntur) terminativè, seu objectivè; non verò entitativè formaliter & extrinsecè; nec cognitio ad objecti majestatem debet accedere; fieret enim inde, ut existentiz Dei cognitio censeretur infinita.

INST. 3. Non magis facultas finita potest attingere objectum infinitum, quàm locus finitus continere corpus extensum infinitè.

R. Equari locum corpori quod continet; non facultatem objecto: licet enim oculus v. c. montem videat, illum non proinde continet.

OP P. 5. Facultas comprehensiva ordinis creati, nequit elicere comprehensionem objecti increati: Ergò similiter potentia intellectivâ ordinis finiti absolutè non potest elicere visionem objecti infiniti, scilicet Dei.

R. Comprehensionem esse potentiz cum objecto adæquationem; non autem simpliciter objecti conspectum. Hinc S. Aug. Serm. 38. de Verb. Domini. *De Deo, quid mirum, si non comprehendis? si enim comprehendis, non est Deus. Sic pia confessio ignorantia, magis quàm temeraria professio scientia. Attingere aliquantum mente Deum, magna beatitudo est; comprehendere autem, omnino impossibile.*

CONCLUSIO II. Possibilem absolutè intuitivam Dei visionem ratio suadet, & demonstrat, saltem negativè: quia non implicat eam dari; Non enim repugnat, neque ex parte Dei; quia Deus omnipotens tam eximium bonum concedere potest; nec ex parte hominis; potest enim ad hanc visionem creatura intellectualis extolli.

CONCLUSIO. III. Possibilem Dei visionem ratio non demonstrat positivè.

Non enim demonstrat ratio positivè, quod solius naturæ viribus adjuta

non novit: visionem autem intuitivam non novit ratio solis naturæ viribus innixa 1. Cor. 2. v. 9. *Oculus non vidit, nec auris audivit, nec in cor hominis ascendit qua Deus preparavit iis, qui diligunt illum.* Si ergo naturaliter homo non novit visionem Dei intuitivam, quæ est bonum diligentibus Deum preparatum, nedum potest illam possibilem naturaliter demonstrare. Unde S. Aug. Ep. 112. Paulinæ c. 3. *Scimus Deum posse videri: non debui dicere, scimus, sed credimus: quia scriptum est in eâ scripturâ per quam fideles sumus, quod verum sit minimè dubitamus.* Et c. 1. *Cur credimus eum videri, nisi quia scriptura accommodamus fidem?* Idem lib. 13. de Trin. c. 7. *Non potest inveniri unde aliquis sit beatus, nisi à Deo.* Et c. 9. *Fides hominem verè beatum futurum, non argumentatione humanâ, sed divinâ auctoritate promittit: si ex solâ fide, & non ex ratione humanâ, veræ beatitudinis cognitionem acceptam habeamus, nihil est in naturâ, quo vel illius beatitudinis cognitionem acceptam habeamus; nihil est in naturâ, quod vel illius beatitudinis possibilitatem indicare, nedum demonstrare possit. Nec mirum; cum ea sit entitativè, seu absolute supernaturalis: quæ verò sunt ejusmodi, ut sanctæ Trinitatis, & Incarnationis mysteria, demonstrari nequeunt.*

Deindè quæ potest afferri demonstratio, vel à priori, vel à posteriori colligitur: visionis intuitivæ possibilitas à priori non potest demonstrari; nulla enim occurrit causa, ex quâ necessariò possit inferri: omnipotentiam enim Dei licet noverimus, hunc aut illum effectum esse possibilem definire non subit.

Non etiam demonstratur à posteriori; nullus est enim effectus, qui cum intuitivâ visione necessariam connexionem habeat; non appetitus naturalis, nihil enim natura nobis frustrâ ingeneravit, nec natura duce impossibilia penitus appetimus: igitur appetitus naturalis, qui illi veritati probandæ posset intervire; tam naturalis quoad intentionem, quàm quoad assecutionem necessariò futurus esset; talis porrò appetitus visionis beatificæ si daretur, naturalis tantùm esset quoad intentionem, non quoad assecutionem; indigeret enim anima rationalis auxilio supernaturali, ut ad hanc Dei visionem elevaretur: appetitus etiam naturalis, rem possibilem non semper demonstrat; naturali enim desiderio in perennem & perpetuam corporis & animæ conjunctionem ferimur: animæ separata corporibus suis iterum adunari desiderant: & in omnes formas posibles inclinatur materia: Indè tamen qui & mortis, seu corporis dissolutionis impossibilitatem, simul & resurrectionem possibilem, & omnia futura esse corpora, quæ possunt esse, demonstranda susciperet, nihil penitus promoveret; sic licet illius visionis daretur appetitus naturalis, qui tamen non datur, inde nihilominus non demonstraretur ejus possibilitas. Nec ideo hic, sicut & ejusmodi alii appetitus inefficaces, dicendi essent frustranei, quia multos ob fines alios incognitos nobis sunt indici.

Addimus appetitum beatitudinis illius nullum inesse homini, sive innatum, sive elicatum: Primus enim est ad id, quod appetitur, naturale pondus, aut inclinatio. 2. ex finis, & eorum, quæ ad finem comparantur.

dum conferunt, notitiâ emanat. Innatum esse homini beatitudinis in communi appetitum certò constat; nemo enim est qui felicitatis consequendæ desiderio non teneatur, qui non amore bonum, & odio malum prosequatur. Undè S. August. Enchirid. c. 105. *Aut voluntas non est, aut libera dicenda non est, quâ beati sic esse volumus, ut esse miseri non solum nolimus, sed nequaquàm prorsus velle possimus.* Et lib. 13. de Trin. c. 1. & 5. Mimum irridet, qui cum se omnibus indicaturum quidquid animo conceptum quisquis haberet, fuisset pollicitus, ideòque concio convenisset amplissima; astantes quoslibet sic affectos esse protulit, ut eorum nemo esset, qui non vellet vili emere, & summo pretio vendere. Si dixisset, inquit, *omnes Beati esse vultis, dixisset, quod nullus in suâ non agnosceret voluntate.* Sic in omnibus propensio est ad bonum quidem in communi. At non dari in omnibus summi boni, seu visionis Dei in particulari appetitum innatum, vel inde elucescit, quòd quæ expetuntur appetitu innato, ab omnibus expetantur: undè nemo est qui calamitates & mortem non refugiat. Porro visio Dei intuitiva non ab omnibus expetitur: siquidem varii varia appetunt; & alii in voluptatibus; isti in divitiis; hi in aliis beatitudinem reponunt. Palàm ergo est visionem beatificam omnes non consecrari. Nec certè natura ad id quod vires excedit, inclinationem aut pondus inserit; in impossibilia enim moveret, quod non deceret naturæ authorem sapientissimum.

Ex superioribus facilè conficitur, in hominibus non dari elicitum visionis beatificæ appetitum. 1. Quia non datur visionis beatificæ cognitio naturalis ex Apost. 1. Cor. 2. At ex S. Aug. lib. 13. de Trinit. c. 15. *Nemo amat, quod omninò nescit.* Si ergo nulla sit visionis beatificæ cognitio naturalis, non datur consequenter appetitus elicitus naturalis, qui ex cognitione naturali debet proficisci. 2. Si illius appetitum naturalem quendam, vel elicitum haberent homines; non tam altum apud Philosophos Gentiles de illâ Dei visione silentium occurreret: Et qui suam naturam consuleret, saltem aliquod ad visionem hanc pondus in se experiretur: sed in seipsis periculum licet faciant homines; summo etiam licet studio beatitudinis humanæ naturam inquisierint, visionis tamen illius appetitum, nec fuerunt experti; nec illius, vel ullum vestigium deprehenderunt.

OPP. 1. S. Aug. lib. 12. de Civ. c. 1. *Si cum quaritur, quare illi beati sint, rectè responderetur, quia adherent Deo; & cum quaritur, cur isti miseri sint, rectè responderetur, quia non adherent Deo; non est creatura rationalis, vel intellectualis bonum quo beata sit, nisi Deus. Itaque quamvis non omnis beata possit esse creatura (nequè enim hæc manus adipiscuntur, aut capiunt fera, ligna, saxa, & siquid ejusmodi est) ea tamen quæ potest, non ex seipsâ potest; quia ex nihilo creata est; hoc enim adepto beata est, quo amisso misera est.* Ex eodem autem S. Aug. omnia appetunt beatitudinem naturaliter. Epist. 119, & lib. 13. de Trinit. cap. 4. 5. 6. & 8. Certa est scientia, quòd beati omnes homines esse velint, in Enchirid. c. 105. In naturâ nostrâ superest beati-

tudinis perditæ appetitus lib. 1. de peccat. merit. c. 2. Hujus beatitudinis ab Apost. admonemur in nobis esse appetitum. Visionis igitur beatificæ naturalis appetitus est; cum sit in nobis appetitus beatitudinis, & beatitudo in solo Deo sit sita; cumque supersit desiderium beatitudinis in Adamo perditæ; & proindè illius quæ ab Apostolo proponitur.

R. Teneri omnes ex S. Aug. desiderio beatitudinis in communi, ut mox exposuimus fuit; non verò visionis beatificæ; cum ea naturaliter sit incognita, ut ipse docet. Cum autem cuique ingenitum sit velle sibi bonum, & declinare calamitates; ex quo tempore revelatio accessit divina, quæ in intuitivo Dei conspectu beatitudinem constituit, in visione illâ constituendam esse colligimus. Ex naturâ autem desideria illa non emanant; sed solam cognitionem supernaturalem sequuntur; & proindè nullus est innatus, aut elicitus, talis intuitivæ Dei visionis appetitus, qui ex naturali cognitione oriatur; sed ex revelatione suppositâ: quod unum indicat S. Aug. simulque ostendit naturam humanam ex se ad illam visionem posse elevari; quod ad imaginem Dei creata sit; cæterisque rebus eam occupari; sed satiari non posse. Ita etiam lib. de Prædest. Sanct. cap. 5. distinguit inter posse habere fidem, & charitatem; & actu habere: priusque dicit esse naturæ hominum; posterius verò gratiæ: sicque docet naturam humanam idoneam esse, quæ elevetur ad ipsos actus supernaturales; non verò quandam habere ad istos actus propensionem, aut appetitum. Et lib. 12. cap. 11. de Civit. Dei, solum hominem vult à Deo fuisse institutum, qui eum videre possit; non autem in homine esse ad illam visionem naturale pondus. Addit felicitatis in Adamo perditæ superesse appetitum, & ab Apost. beatitudinis admoneri nos, seu definiri in quibus sita sit illa beatitudo, quam appetere operæ pretium est. Docet præterea Philosophorum discipulos hæc, vel alia bona appetivisse, quippe qui essent ita à magistris instituti, aut comparati, ut in illis beatitudinem esse positam existimarent. His igitur suppositis, quis in illud singulare bonum naturali propensione ferri hominem dixerit? Quis Christianos visionem Dei intuitivam naturaliter appetere contendat? cum ut eam solam summum esse bonum existiment, à Religione sint instituti.

INST. 1. Ex cognitione naturali proficiscitur Dei possidendi appetitus; naturaliter enim, ut q. 1. probatum est, Dei existentiam novimus, & Deum scimus summum esse bonum.

R. Innatam quidem nos habere existentia Dei notitiam, sed non nosse nos Deum intuitivè, seu, ut in se est, videri posse. Prior enim cognitio naturæ debetur, si scriptura & antiqui audiantur: posterior autem soli revelationi divinæ.

INST. 2. Inest homini cognoscendæ causæ naturale desiderium, ubi effectum intuetur. Ex Dei igitur operum aspectu, videndi Dei desiderium exurgit: & quis bonum quod solum animum explere potest, scilicet Deum, non querat?

R. Viso effectu, appeti intuitivam causæ visionem, si visio illa cognoscatur possibilis. Verum visionem Dei intuitivam esse possibilem ratio non admonet. 2. Nec necesse est appetitum omni ex parte expleri, ut prius traditum est. Et certè, quis ex Philosophis antiquis, conspectis divinæ omnipotentis operibus, visionis Dei intuitivæ votum habere se professus est? Nullum sanè novi, qui solo lumine naturali usus, in hunc affectum venerit. Equidem naturâ duce movemur in bonum, quo Beati efficiamur; sed quibus in bonis sita sit illa beatitudo, ignotum est; undè de beatitudine tot & tam varix sunt sententiæ.

INST. 3. Appetitus naturalis circa perfectionem universalem non versatur; sed circa singularem & intrinsecam, quâ perfici possit homo; nam intellectus solus circa universale versari potest. Ergò beatitudinis in communi desiderium neminem incescit.

R. Appetitum versari circa perfectionem in communi appetendo, & in particulari assequendo; quia nonnisi boni alicujus singularis assecutione perfici potest: quia verò bonum singulare, quo ultimò possit perfici, notum ipsi non est, hinc bonum quidem summum appetit, sed quoddam illud sit, inscius inquirat. Hæc instituendæ vitæ ratio, à non intelligentibus, intelligentes creaturas distinguit: illæ enim à naturâ determinatum finem necessariò appetunt; simulque ad illum consequendum necessaria media accipiunt à naturâ: creatura verò intelligens rationis suæ arbitrio relinquitur, ut in quo libuerit finem suum constituat: & sicut ad finem comparandum nec necessitatem, ita nec determinationem accipit. Undè totum est gratiæ divinæ munus, & quod veræ beatitudinis naturam homo edoceatur, simulque donetur gratiâ, cujus auxilio beatitudinem possit mereri, & consequi. Et certè, quâ ratione visionem intuitivam appeteret? cum naturaliter conspici Deum posse non novit. Homo in incognitum non fertur; nec in illud, quod ejus vires superat.

INST. 4. Appetuntur, quæ supra naturam sunt, & fiunt: sic animæ productionem corpus organicum appetit; & animæ separata corporibus iterum conjungi desiderant.

R. Animæ productionem ordinis naturalis esse; quia Deus sibi legem constituit de animâ creandâ, cum corpus ritè affectum fuerit. Ergò corpus organicum animæ infusionem desiderando, nihil, quod naturæ leges excedat, appetit. Porro etiamsi anima separata desiderio sui corporis iterum sumendi teneatur, appetitus ille naturalis dici quodammodo potest, licet naturaliter non expleatur, quòd fortasse Deus constituerit conjunctionem istam iterum non esse faciendam, ut individuorum varietate & successione orbem illustraret: quidquid sit, appetitus hic inefficax est; nec posse hanc conjunctionem fieri anima cognoscit.

OPP. 2. Aliquis, suppositâ saltè revelatione divinâ, credere poterit humanâ fide visionis beatificæ possibilitatem. Igitur, & positâ ipsa revelatione divinâ, poterit aliquis eam lumine naturali cognoscere; sicque ipsam demonstrare.

R. Hac in re disparem esse rationem; quia fides humana nititur extrin-

feco testimonio ; ac proinde , cum adsit testimonium extrinsecum positâ revelatione divinâ , inde consequens est fide humanâ credi possibilitatem visionis beatificæ. Demonstratio autem naturalis non sic se habet ; nititur enim principiis cum objecto cognoscendo ab intrinseco connexis. Unde cum revelatio , non præbeat ejusmodi connexionem ; ex eo fit , ut, etsi post revelationem visionis beatificæ possibilitas possit credi , non possit tamen eâdem revelatione positâ naturali ratione cognosci , atque demonstrari.

ARTICULUS QUINTUS.

Utrum in hac vitâ constituto homini visionem sui intuitivam possit Deus concedere ? Et utrum eam concesserit ?

CONCLUSIO I. Viatori visionem sui intuitivam potest Deus absolute concedere. 1. Quia non implicat Deum à viatore videri intuitivè. 2. Quia potest homo agere independenter à phantasmatis. 3. Etiam quia resumpto corpore Deum visuri sunt Beati. *Et potest humana mens*, inquit S. Aug. Epist. 112. cap. 13. *divinitus rapi ex hac vitâ ad Angelicam , antequam per istam communem mortem carne solvatur , & Dei visionem perfectissimam obtinere.* Item l. 5. de Gen. ad Litt. c. 14. *Mentes quippe rationales purgata gratiâ Dei possunt pervenire ad ejusmodi visionem , quâ nec superius quicquam sit , nec beatius.*

CONCLUSIO II. De non concedendâ viatori visione sui intuitivâ , legem Deus sancivit Exod. 33. v. 20. *Non videbit me homo & vivet.*

CONCLUSIO III. Sui visionem nunquam Deus concessit , nec Moyse , nec S. Paulo , &c.

Probat. Hanc visionem non indulsit Dominus , quam ipse negare se profiteretur ; quam negatam fuisse sentiunt PP. sacre Scripturæ Interpretes , quæ si fuisset concessa , nunquam fuisset ablata. Atqui hæc ita se habent.

1. Quidem ob vituli adorationem iratus Deus Exod. 33. v. 2. tenuit in posterum Israëliticæ plebi adesse comitem , & Angelum se daturum pollicetur. *Mittam præcursorem tui Angelum , ut ejiciam Chananeum , &c. non enim ascendam tecum.* Deponit vestimenta plebs in pœnitentiæ significationem jubente Domino v. 13. *Moyse faciei divinæ conspectum sibi concedi tunc postulans , nihil aliud rogat , quàm ut Deus populo suo adsit dux itineris , & ne auxilio suo destituat , Si ergo inveni gratiam , &c. ostende mihi faciem tuam ,* v. 14. *Ejus votis Deus annuit , facies mea præcedet te.* Addit Moyse misericordiæ concessæ aliud signum non esse , nisi , inquit , *ambulaveris nobiscum ,* v. 17. *concedit Deus . Et verbum istud , quod locutus est faciam* v. 18. *Hac obtentâ gratiâ , petit aliam , nempe omnis boni ostensionem* v. 19. *Assentitur Deus , Ostendam tibi omne bonum , & miserebor*

cui voluero. Aliud postulat Moyses, Dei scilicet intuitivam visionem *ψ. 20.* hæc negatur, ut quæ non possit concedi. *Non poteris videre faciem meam; non enim videbit me homo & vivet.* Aliquod gloriæ suæ externum signum illi aspectabile facit *ψ. 22.* *Cumque transibit gloria mea, ponam te in foramine petra, & protegam dexterâ meâ, donec transeam; tollamque manum meam, & videbis posteriora mea; faciem autem meam videre non poteris.* Ibi non modo suæ divinitatis conspectum Deus negat; sed non posse concedi asserit. Apostoli Joannes, & Paulus hanc visionem nemini unquam fuisse concessam, testificantur. Joannes se à Christo hanc veritatem accepisse docet *Joan. 1. ψ. 18.* *Deum nemo vidit unquam: unigenitus Filius, qui est in sinu Patris, ipse enarravit.* Hæc autem profert de Moyse locutus: *Lex per Moysen data est: gratia, & veritas per J-um Christum.* 1. ad Tim. 6. *ψ. 16.* *Lucem habuit inaccessibilem, quem nullus vidit, sed nec videre potest.* Hæc veteris Testamenti locis aperte respondent.

2. Negatam visionem Dei intuitivam sentiunt SS. PP. Scripturæ interpretes. S. Iren. 1. 4. c. 37. invisibilitate Dei demonstratâ, Deum docet assumptâ carne visibilem fuisse factum, & se manifestum præbuisse Prophetis, nempe per spiritum Prophetiæ; ab illis verò non fuisse visum, ne fieret homo Dei contemptor, & ut semper haberet ad quod proficeret: adductis autem verbis Ex. 33. *Videbis posteriora mea, faciem autem meam videre non poteris; utraque, inquit, significans; quoniam & impossibile est homini videre Deum; & quoniam per sapientiam Dei in novissimis temporibus videbit Deum homo in altitudine petra, hoc est in eo, qui est secundum hominem ejus advenit.* Non igitur manifestè ipsam faciem Dei videbant Prophetæ, sed dispositiones, & mysteria, per quæ inciperet homo videre Deum. S. Amb. lib. 1. de Fide c. 8. Arianos refellens qui ex invisibili substantiâ Patrem, & ex visibili Filium constituebant, quòd Patriarchis antiquis se videndum Filius præbuisset, & indè mutationi obnoxium, quod varias figuras induisse referretur: Docet 1. non qualis esset, se videndum obtulisse Filium; sed hominum viribus conspectum attemperasse; varias formas induisse, aut pro meritis hominum, quibus se præbebat conspiciendum, vel ut potestatem divinam, simulque mysteria futura designaret. Deum Moyses oraret, ut faciem Dei purè videret, quid ad illum continuò Deus? Non poteris, inquit, videre faciem meam; non enim videbit homo faciem meam & vivet: hoc ipso, quod negatur aspectus claritas assignatur, quæ scilicet tanta est, quanta credenda est, quæ invisibilis indicatur. Omnium dignissimus erat Moyses, qui Deum videret; sed impar erat, qui Deum videre posset. Es tamen sic visus accipitur, ut alicujus conspicabilis, ut dixi, materia dispositione assumptâ, videretur, salvâ scilicet invisibilitate ejus, quam a conspectu omnium majestas interfusa seposuit: non enim sic humanis aspectibus revelatus est, ut tota in illo Deitas appareret; sed ad vicem speculi, cum conceptos intra lucem suam vultus quasi ad plenam effigiem hominis includis: ita majestas ejus præcuncte fulgore intra id visum esset, quod imaginem
veritatis

veritatē non ipsum Deum propriè demonstrāret.

Ab eo statu nunquā excidissent, si visio illa, seu beatitudo fuisset illis concessa: non enim ex beato in statum viatoris iterum homo fuisset dejectus: quomodo enim id esset factum, conjici non potest. An beatitudinem illam Deus subtraxisset? At sic pœnam inflexisset, etiamsi culpa non præcessisset, cum omnium gravissima pœna esset beatitudinis illius subtractio. An voluisset homo ex illo statu excidere, seu illum statum deferere, quo omnia desideria sua explerentur, quo omnis molestia expers fieret, præter quem demum nihil boni optandum superesset? Certè Apostolus 1. ad Cor. 13. v. 10. visionem intuitivam, quæ in præmium est concedenda, visioni istius vitæ opponit, istamque tantum concedendam ait, cum quod perfectum est, advenerit. Cum ergo aperto scripturarum sensui sit standum, nisi aliquid magis perspicuum ex illis elici possit, aut aliquid adveniat, nihil autem sit manifestius quàm quæ supra allata sunt, non est cur à tam manifesto scripturarum sensu in alienum transferamur. S. Greg. Naz. Orat. 16. Moysen quæ in votis erant, non vidisse docet, ideò fuisse scriptum sola Dei posteriora ab eo fuisse inspecta, *Quod, inquit, perspicendum superat, longè majus & præstantius erat posterioribus, quæ coram ejus oculis obversabantur.* Orat. 34. eandem veritatem confirmat, & ait per posteriora, quæ Moyses intuitus est, intelligendam esse Dei magnificentiam, quæ in rebus creatis, & in mirabili providentiæ ordine sit, conspicua est. S. Gregor. Nyss. lib. de vitâ Moysi, eandem Dei visionem fuisse negatam Moysi probat. In eadem sunt sententiâ SS. Hilar. in Psal. 118. Hieron. Dial. 3. contra Pelag. Chrysost. Hom. 14. in Joan. Epiphan. in hæresi Audianorum.

S. Aug. lib. 2. de Trinit. cap. 16. à Mose Dei substantiæ visionem fuisse postulatam, & negatam à Deo scribit: *Cum verò hic apertissimè demonstraretur, nec desideranti hoc fuisse concessum, quis audeat dicere per similes formas, quæ huic quoque visibiliter apparuerunt, non creaturam Deo servientem, sed hoc ipsum quod Deus est, cujusquam oculis apparuisse mortalium?* Per posteriora, quæ conspicienda Deus præbuit, docet non incongruenter intelligi Christi humanitatem. Idem Epist. 112. c. 11. ad Paulinam: *Deum nemo vidit unquā, vel in hac vitâ, sicut ipse est, vel etiam in Angelorum vitâ, sicut visibilia ista, quæ de corporali visione cernuntur.* Undè si alibi concedere videatur S. Aug. visionem Dei intuitivam quibusdam viatoribus, intelligendus est de clariori Dei intellectione eis concessâ; cum intellectus verè videat quæ intelligit, ut habet c. 12. Solet autem S. Aug. magis perspicuam Dei intellectionem, Dei visionem vocare: Ita lib. 8 de Civit. c. 3. Qui bonum intelligit, Deum verè intelligit, *Tolle hoc, & illud, & vide ipsum bonum, si potes, & ita ipsum Deum videbis.* Lib. 12. c. 25. ait animam sæpius in visione corporeâ falli, cum nempe in ipsis corporibus fieri putat, quod sit in corporis sensibus, quinetiam in spiritali visione decipi, cum similitudines corporum esse corpora arbitrat; in intellectuali verò nunquā decipi. Item Ep. 6. ad

Italicam viduam docet, nunquàm nos visuros esse Deum, nisi cum ad ejus similitudinem accesserimus; quæ similitudo in hac vitâ non concedetur. Et Ep. III. autoritate S. P. P. & præsertim S. Greg. Naz. & Ambr. Deum non intuitivè visum à Moysè probat, sed conspicabilis tantùm alicujus materiæ dispositionem. Et lib. 10. de Civ. c. 13. *Deus*, inquit, *num sit invisibilis sæpè visibiliter Patribus apparuisse memoratur*: sicut enim sonus, quo auditur sententia in silentio intelligentiæ constituta, non hoc quod ipsa: ita & species, quâ visus est Deus in naturâ invisibili constitutus, non erat quod ipse. Lib. contra Adimantum cap. 9. ait: *Deum visam ab antiquis in assumptâ aliquâ creaturâ*; & cum Deus dicitur visus, intelligendum esse Angelum, ut Gen. 12. Exod. 3. & tamen rectè dicitur apparuisse Dominus, cum in Angelo apparuerit. Lib. contra Manich. c. 25. asserit filii substantiam ejusdem esse invisibilitatis, cujus est Patris & Spiritus Sancti substantia, & per subjectam creaturam se visibilem fecisse. Tract. 3. in Joan. Deum nemo vidit unquam; nec ipse Deus, sed Angelus loquebatur cum Moysè.

O P. P. I. Intuitiva Dei visio Moysi fuit concessa: nam aliâ penitus Deum intuitus est, quàm cæteri Prophetæ, & visione ænigmatica oppositâ. Num. 12. v. 6. Sic Aaron & Mariam Deus alloquitur: *Si quis fuerit inter vos Propheta Domini in visione apparebo ei, vel per somnium loquar ad illum*: at non talis servus meus Moyses, qui in omni domo meâ fidelissimus est; ore enim ad os loquor ei, & palàm, & non per ænigmata, & figuræ Dominum vider. Exod. 33. v. 19. *Ego ostendam omne bonum tibi*. Apost. quoque Deum vidit, cum fuerit cum in locum raptus, ubi audiuntur quæ ab homine proferri nequeunt. 2. Cor. 12. v. 2. *Scio hominem in Christo ante annos 14. raptum usque ad tertium cælum...* Et *audivit arcana verba, quæ non licet homini loqui*.

R. Præferri cæteris Prophetis Moysen; non quòd visione ænigmatica oppositâ fuerit donatus; sed quòd longè perfectiori ratione cum illo, quàm cum cæteris ageret; non enim in visione mutâ, aut in somniis, sed præsens cum præsentē colloquebatur: ab Angelo quoque legem accepit. Hebr. 1. v. 2. *Si enim qui per Angelos dictus est sermo, fallus est firmus*. Ab Angelo etiam audivit quæ erant agenda. Num. 7. v. 8. 9. *Quonque ingrederetur Moyses tabernaculum fœderis, ut consuleret oraculum, audiebat vocem loquentis ad se de propitiatorio, quod erat super arcam testimonii inter duos Cherubim*; undè & loquebatur ei. Porro Exod. 33. v. 19. per hæc verba: *Ostendam omne bonum tibi*, non sui visionem pollicetur Deus, quam ei negabat ibidem, & non posse concedi docet, solaque sua posteriora ejus oculis fore objicienda. Significat ergò phrasi illâ Hebraicâ, se ei ostensurum quicquid præstantius, aut excellentius ejus oculi possent in vitâ sustinere; & se misericordiæ suæ beneficia non negaturum esse; ut mox ex serie capitis ostensum est.

Ubi de S. Pauli rapto agitur, nihil occurrit, quod intuitivum divinæ essentiae conspectum innuat. Nam 1. ne verbum quidem extat de illâ visione, sed de solâ à sensibus abalienatione, quâ ad sublimiorum

myſteriorum cognitionem pervenit. 2. Si de viſione intuitivâ ſermonem habuiſſet S. Paulus, metaphorâ ab auditu deductâ non uſus fuiſſet; cum multò minus audire ſit, quàm videre. 3. Nec adderet: *ſive in corpore, ſive extra corpus nescio*, Deus ſciit. Ubi enim viſio intuitiva eſt, perſpecta omnia ſunt: nec etiam doceret 1. Tim. 6. v. 16. Deum neminem vidiffe, nec videri poſſe.

Sed, inquires, Chriſtus ad S. Paulum ſic ait Act. 26. v. 16. *Ad hoc apparui tibi, ut conſtituam te miniſtrum, & teſtem eorum quæ vididiſti.* Non ſolùm autem Chriſti humanitatis fuit teſtes Paulus, verùm & Deitatis. Quid inde? An non Apoſtolicæteri fuerunt teſtes inſtituti, tùm humanitatis, tùm divinitatis Chriſti? An proindè Dei viſionem intuitivam ſunt conſecuti? An non eam ſibi cæteriſque hominibus negavit S. Paulus?

OPP. 1. S. Aug. Epift. 112. cap. 13. & 19. lib. 12. de Gen. ad Lit. c. 27. duplicem mortem diſtinguit; priorem, veram; alteram non veram, quæ ſit alienatione à ſenſibus, & à rebus terrenis: per hanc contendit Moyſi, & S. Paulo Dei viſionem fuiſſe conceſſam.

R. S. Aug. hæc iſtis in locis tantùm dubitanter protuliſſe Epift. 112. Et quantum ad Moyſem, & Apoſtolos, quibus hanc viſionem forſan conceſſam fuiſſe aſſerit, velle eorum animas per illud temporis interval- lum à corpore fuiſſe ſejunctas, non quidem penitus avulſas; quod eſt non niſi poſt mortem, aut ad tempus, aut in perpetuum: *Poteſt movere*, inquit cap. 13. *quomodo jam ipſa Dei ſubſtantia videri potuerit à quibusdam in hac vitâ poſitis, propter illud quod dictum eſt ad Moyſem, nemo poteſt faciem meam videre, & vivere; niſi quia poteſt humana mens divinitus rapi ex hac vitâ ad Angelicam vitam, antequam per iſtam communem mortem carne ſolvatur.* Undè addit Apoſtolum de ſua viſione teſtari nescire ſe, utrùm ea in corpore, aut extra corpus conſtituto ſibi contigerit; ſeu an per extaſim vehementiorem mens à corpore alienata fuerit; an omnimoda fuerit reſolutio; qualis in plenâ morte contingit: *quia*, inquit, *neceſſe eſt abſtrahi ab hac vitâ mentem, quando in illius ineffabilitatem viſionis aſumitur; ut non ſit incredibile, quibusdam ſanctis non ita defunctis, ut ſepelienda cadavera remanerent, etiam iſtam excellentiam revelationis ejus conceſſam fuiſſe.* Et ait fortè Moyſi hanc fuiſſe conceſſam. Quid ergò eſt, inquit, *quod eum ſic fecit exceptum? niſi fortè quia illâ contemplatione dignum etiam tunc habuit populi ſui talem reſtorem, & miniſtrum in totâ domo ſua fidelem; ut quemadmodum concupiverat, videret Deum ſicuti eſt; quæ contemplatio cunctis Filiis in fine promittitur.* Quid igitur ex illis inferre licet? Id nempè non eſſe incredibile, ſeu præter fidem, aut forſan, hanc viſionem concedi potuiſſe. Quid eſt autem novam mortis ſpeciem excogitare? niſi velle quodammodo aliter ſentientibus gratulari, ſimulque negare vitam hîc mortalem agenubus. negatum omnindè Dei conſpectum.

Cæterùm in eâdem Ep. ſententiam ſibi conſtantem exponit, & hanc viſionem nemini conceſſam fuiſſe certò diſputat, tùm authoritate S. Ambroſij; tùm variis rationibus adductis, ut c. 6. ubi ait Deum apparuiſſe antiquis ſpecie

electâ, latente naturâ; visum iri postea sicuti est. Et lib. 12. de Gest. ad Litt. c. 17. easdem rationes, & illam mortis speciem pariter explicat; item & in locis supra citatis, quibus addi possunt quæ habet quæst. 144. in Exod. & libro quarto de Symb. ad Cathecumenos cap. 3. Unde inferendum superest pro conclusione nostrâ stetit S. Aug. quando suam certò, & non dubitanter, sententiam exposuit.

ARTICULUS SEXTUS.

Utrum justis statim atque decesserunt, visio Dei intuitiva concedatur?

EX antiquis non pauci senserunt, justis, quibus post hanc vitam nihil superest eluendum, non statim post mortem Dei visionem concedi, sed ad generale iudicium differri. Inter eos Papias Hierapolitanus Episcopus, quem nonnulli Patres sunt secuti, asseruit, uti fidem facit Eusebius lib. 3. hist. c. 39. ipsos justos post resurrectionem annis mille cum Christo his in terris regnatos esse: illos verò mille annos in voluptatibus carnis atque libidinibus quidam hæretici cum infami Cerintho; alii autem, ut nonnulli Patres antiqui, licitis, vel etiam spiritualibus esse infumendos dixerunt; futurumque postea transitum ad Dei conspectum. Sic sentientes, Græcè vocati sunt Chiliastæ; Latine verò Millenarii.

Ut recta sit hoc in argumento disserendi ratio, non modò operæ pretium est probare Sanctos nunc temporis felicitate quâdam potiri, ac Christi conspectu donari; sed & Deum, & Sanctissimam Trinitatem conspicere; eosque, qui senserunt aliter, cum Papiâ falsis & supposititiis Christi operibus, & sermonibus fuisse deceptos, variisque allegoriis.

Eò gravioris indè momenti sit quæstionis illius dilucidatio, quò declinari non potest arduum sanè onus expendendi, quid hac in quæstione pertineat ad Traditionem Apostolicam: quod examen non levis est adjumenti futurum in aliis certò definiendis quæstionibus.

CONCLUSIO. I. Justi statim atque è vivis excesserunt, si nihil impium superest exurgandum, visione beatificâ donantur.

Prob. 1. quia post hanc vitam alia Dei visio est, quàm quæ in hac vitâ conceditur, & fuit concessa: ideoque justî vitæ alterius desiderio tenentur, & non aliâ de causâ. Utrumque docent Scripturæ, & Traditio continua Apostolica. 1. quidem extat 1. Cor. 13. v. 12. *Videmus nunc per speculum in ænigmate; tunc autem facie ad faciem. Nunc cognosco ex parte; tunc autem cognoscam, sicut & cognitus sum.* Visio igitur, quæ conceditur in alterâ vitâ ab eâ, quæ hic habetur, diversa est, eritque intuitiva, seu facie ad faciem, & tam clara, ac ea per quam sumus cogniti. Opponit enim Apostolus illius vitæ statim futuro beneficio, v. 13. *Nunc manent fides,*

Spes, charitas: tria hæc: major autem horum est charitas v. 8. Charitatem nunquam excidis. Viatoribus conceditur Dei visio ænigmatica, fides simul, spes, & charitas: visio autem illa cum fide & spe evacuatur, & destruitur, v. 10. cum autem veneris quod perfectum est, evacuabitur quod ex parte est. Sola charitas tunc remanet, & illi adjungitur clara Dei visio, ut sibi invicem cognitio, & amor respondeant: quod & docet Apost. iterum 1. Cor. 5. v. 8. Per fidem ambulamus, & non per speciem; audemus autem, & bonam voluntatem habemus, magis peregrinari à corpore, & presentes esse ad Dominum. v. 9. Es ideo contendimus sive absentes, sive presentes placere illi. v. 10. Omnes enim nos manifestari oportet ante tribunal Christi, ut referat unusquisque propria corporis, prout gessis sive bonum, sive malum.

1. Pars altera palàm est, scilicet alterius vitæ studio ideò teneri justos, quia hîc per fidem, seu obscurè Deum vident; corpore verò soluri Deum clarè sunt intuituri: & in hoc sita est merces, quam à Domino judice relaturi sunt, & ad quam obtinendam indefinenter conituntur. Hæc S. Joan. tradit c. 3. Ep. 1. v. 2. *Charissimi, nunc filii Dei sumus; & nondum apparuit quid erimus: scimus, quia cum apparuerit, similes ei erimus; quoniam videbimus eum sicuti est. v. 3. Et omnis qui habet hanc spem in eo, sanctificat se, sicut & ille sanctus est. Nondum beatitudinis nostræ cognitionem sumus assecuti; & cum Deus post obitum se nobis exhibebit, cum sicuti est conspiciemus, similes illi facti; beatitudinis illius desiderio ducti sanctitatem sectamur; non enim, nisi qui ei similes sunt, seu sanctitatis ipsius participes, ejus conspectu sunt fruituri, seu cum intuituri, sicuti est.*

Verbis apertioribus delineari non potest visio clara, & intuitiva Dei, quàm his, non videre per speculum & ænigma; sicut coram Domino; videre sicuti est, & sicut cogniti sumus. Justorum, necnon & ipsius S. Pauli, inutile penitus alterius vitæ esset desiderium, nisi Deum essent conspiciaturi; neque mercedem, propter quam Dei mandata exequuntur, qui sanctitatis divinæ ita studiosi sunt, essent consecuturi; illius voti ratio, quam adducit Apost. Phil. 3. v. 23. *Desiderium habens dissolvi, & esse cum Christo*, vana penitus esset. Nam undè mortis desiderium eum urgeret? nisi ut coronam sibi promissam assequeretur, videlicet, ut facie ad faciem Deum videret. Si statim atque è vivis excedit, hoc beneficio non est donandus, frustra mortem ambiret. Denique aut nulla Dei visio concederetur; quod fidei & scripturis art. 4. & locis mox adductis repugnat: ut nunc justis est concessa. Nam quæcumque loca, quæ ad Dei conspectum post hanc vitam pertinent, aperte significant, justis pro mercede conspectum Dei conferri: nec vel unicus est apertus scripturæ locus, qui donum illud vel negari, vel differri tantisper innuat, modò omnium sordium expertes sint animæ.

Equidem cum Christo regnare exoptat Apostolus: sed nunquid non constat Christum cælos conscendisse testibus Apostolis Luc. 24. v. 51. Act. 1. vers. 10. & 11. ? Ipsum stare à dextris Dei ait Stephanus Act.

Septim. vers. 56. *Ecce video cœlos apertos, & Jesum stantem à dextris Dei.* Videbat igitur in cœlis à dextris Patris stantem Christum, & pro nominis sui gloriâ decedentes susipientem. Undè v. 58. *Domine Jesus, inquit, suscipe spiritum meum.* Quid igitur est regni Christi participem fieri, nisi in cœlis constitui, conspectu Dei Patris, & Filii ad ejus dexteram sedentis potiri? Aliis verbis proponi felicitatem ultimam in scripturis quis dixerit? Undè, seu audiamus Apostolos de participatâ cum Christo, utpotè capite, supremâ felicitate; seu SS. Patres, qui non modò Apostolicam doctrinam, sed & Apostolicam loquendi rationem amplexi sunt, nihil aliud intelligere subit, quàm promissam justis beatitudinem in divinæ substantiæ conspectu repositam.

2. Illa fuit antiquorum fides, ex Scripturis accepta, & ad nos per Traditionem continuam transmissa. Hanc profitebatur Sanctus Ignatius Ecclesiæ Antiochenæ Episcopus. In eadem etiam primò versabatur S. Justinus, ut patet tùm ex orat. ad Græcos, tùm ex Apol. ad Anton. Sed contrarium postea sensit in dial. cum Tryph. fabulosis, quæ Christo tribuebantur, operibus delusus. Fidem Catholicam sequebantur, quos postmodum ipse S. Justinus Dial. cum Triphone, S. Iren. lib. 5. c. 34. Tertull. lib. de Animâ c. 55. & alii confutare conantur. Transiit Catholica hæc doctrina ad S. Cyprianum, & ad subsequentes Patres. Jam verò laudanda sunt traditionis istius monumenta, quibus Catholica sententia illustretur, & alterius falsitas ostendatur.

1. igitur scripturæ non favent. 2. supposititiis operibus originem suam debet, & Papiæ mediocris ingenii & eruditionis viro. 3. Hos inter aucthores dissonantia, hanc sententiam nec à Christo, nec ab Apostolis acceptam fuisse certo est argumento: doctrina enim à Christo tradita singulis temporibus, & ubique eadem est; cujuscemodi est, quam profitetur Ecclesia Catholica: opinionis verò Papiæ non ea fuit sors; nec à Christo tradita est; nec ab Apostolis ad nos fuit transmissa: qui fuerunt eam professi, non unanimis fuerunt dogmatis, seu iisdem temporibus, seu diversis vitam egerint: quod mox sumus probaturi.

Doctrina igitur, quam profitetur Ecclesia de visione Sanctis concessâ, inter Apostolorum dogmata necessariò est referenda. Eam profitetur S. Petri discip. & post Evodium successor in Sede Antiochenâ Sanct. Ignatius Epist. ad Rom. *Aqua viva manens in me intrinsecus nihil dicit, veni ad Patrem: miserabilis sum donec ἀγαθέωται ἡ ψυχή μου ὅπως μὴ μερῶν Deum adipisci.* Patris igitur, & Dei adipiscendi affectu impulsus, & movente Spiritu Sancto ad martyrium properabat: nisi autem Deum post mortem fuisset conspicaturus, spes ejus hæc non fuisset: contrarium enim à S. Petro didicisset, cujus fuerat discipulus, atque successor. Fidem & expectationem illam visionibus Deus tunc firmabat, ostensâ martyris sui Ignatii in cœlis constituti gloriâ. Id patet ex Actis martyrii SS. Ignat. & Polycarpi apud D. Cottelerium, Vossium, & alios. Cum enim ii qui S. Ignat. martyrio interfuerunt, Deum rogarunt, ut sibi animæ S. Ignatii statum apertè declarare dignaretur; cum stantem viderunt coram Deo summâ

gloriâ exornatum, summâque cum fiduciâ rogantem, &c.

Hæc erat omnium fides 2. sæculo, Deo potiri Sanctos: erat Ecclesiæ Smyrnenſis, ex Actis mox laudatis: erat S. Clem. Alex. qui justos non quidem hîc visione Dei clarâ donari, ex Exod. 33. sed in alterâ vitâ hanc gratiam quemlibet consequi palâm scribit lib. 5. Strom. Relatis enim Ex. 33. v. 26. verbis: *Nemo videbit faciem meam, & vivet: Perſpicuum est enim*, inquit, *nullum unquam vitæ suæ tempore posse Deum perſpicuè comprehendere.* Math. 5. *Qui autem sunt mundo corde, Deum videbunt, postquam extremam perfectionem attigerint.*

Hæc fuit etiam 3. sæculo aperta S. Cyprian. professio, Epist. 15. ad Moysen, & Maximum Martyres, ubi dicit eos qui decesserant, ad Domini complexum venisse, confecto fidei ac virtutis itinere; & Confessores etiam inter Angelos, & Dominationes cœlestes esse constitutos. Sic etiam Libel. ad Fortunatum de exhortatione ad martyrium, in Præfatione. Ibi Baptismum sanguinis Baptismo aquæ præcellere probat; & inter alias rationes quas adducit: *Baptisma*, inquit, *quod nos de mundo recedentes statim Deo copulat. In aquæ Baptismo percipitur peccatorum remissio; in sanguinis, corona virtutum.* Item c. 12. docet eam mercedem martyres non solos, sed & justos quoslibet consequi. Et in fine quidem c. 12. *Clandere in momento oculos quibus homines videbantur, & mundus; & aperire eosdem statim ut Deus videatur & Christus.* Deo copulari; coronam cum martyribus accipere; ad Domini complexum admitti; inter Angelos constitui; quid aliud est, quàm Dei conspectu potiri, qui & Dominus est, & Angelis sui copiam facit?

S. Martinus 4. sæculo Martyres visione beatificâ donari cum cæteris palâm profitebatur; imò& ea sententia confirmatur lib. de ejus vitâ: cum enim gravi scrupulo moveretur, ne superstîtio convalesceret, si non verè martyr esset is, cujus super tumulum altare à superioribus Episcopis constitutum habebatur, & fidelium venerationi proponebatur; quodam die, paucis secum adhibitis fratribus, ad locum perrexit; ibique cum diù orasset, qui sepultus jacebat, velut horrendum aliquod spectrum se obtulit, & nomen, & crimina confessus est, *sibi que nihil cum Martyribus esse commune; cum illos gloria, se pœna retineret.* Post S. Martini obitum, ea fides Gallorum fuit, cum in cœlis eo beneficio frui. Sulpitius Severus Epist. 2. refert conspectum fuisse S. Martinum, qui in cœlos properaret.

Sanctus Basilii in Oriente, sæculo eodem, Homiliâ de Gratiarum actione, Julitam Martyrem in cœlesti gloriâ constituit, & de igne in quem fuit conjecta, sic, habet: *Animam quidem in cœlestem illam destinavit regionem (ignis scilicet) qua illius congruebat meritis.* Item Hom. in 40. Mart. & Orat. in Gordium Mart. S. Greg. Naz. Orat. 18. S. Cypr. rogat, ut orantem è cœlo respiciat, & gregem, sermones, & vitam gubernet, ut qui S. Trinitati adistat. Justos quoslibet, non solos Martyres hac beatitudine post mortem donari, 3. sæculo proficitur etiam S. Cyprianus Serm. de Mortalitate. Is adhortans omnes

fideles, ut laborantibus peste fratribus auxilio essent, rationibusque utitur: scilicet beneficium ejusmodi præstantes, præmium, & salutis æternæ gaudium brevi consecuturos eos esse: ejus esse mortem timere, qui ad Christum nolit ire: illum autem ad Christum nolle ire: qui se non credat cum Christo incipere regnare. Unde & decedentes omnes fideles Martyribus, & Prophetis adjungit, & Apostolis, & Virginibus: *Ad hos, fratres dilectissimi, avidâ cupiditate properemus, ut cum his citò esse possimus, ut citò ad Christum venire contingat, optemus.* Cum Christo esse, non est constitui in loco, in quo Christus ratione solius humanitatis videndum se præbeat; sed ubi Christus homo regnat ad dexteram Patris sedens, ubi ut habetur initio libri, *Præmium vitæ, & gaudium salutis æternæ, & perpetua lætitia percipiatur.* Christo judicante, inquit, præmium vitæ fidei conceditur: & inde concludit non lugendos esse justos, qui decedunt. Eusebius libro primo de vitâ Constantini, scribit Constantini animam cum ipso Deo versari circumdatam splendidissimæ lucis stolâ. Sanctus Athanasius in vitâ Sancti Antonii, Ammonis animam visam ab Antonio in cælum deferri. Eodem sæculo S. Gregorius Nazianz. Orat. funebri de S. Basilio, cum ita compellat: *Tu obiter è cælo nos respice, & datam mihi renum debilitatem, & articulorum dolorem, vel jube discedere, vel adjuva, vel hortare ita me aquo animo ferre, ut hinc demùm discedentem me in æterna tabernacula recipias, & Beatam Trinitatem, eo quo est modo tecum contemplari valeam.* Ita Orat. funebri de Gorgoniâ sorore, quam ait cum Angelis esse, & totam Trinitatem se ei tenendam & contemplandam præbere: *Equidem non dubito, inquit, quin iis, quæ oculis cernuntur, multò præstantiora sint ea, quibus nunc frueris, nempe sonus epulantium, Angelorum chorea, cælestis ordo, gloria contemplatio, tum divinitatis, tum supremæ Trinitatis purior & perfectior illuminatio, non jam vinculam mentem, ac per sensus diffusam suffugientis, sed totam sese toti menti contemplandam & tenendam præbentis, totoque divinitatis lumine animis nostris affulgentis; omnino, inquam, his frueris, quorum etiam, dum adhuc in terrâ es, ob sinceram ad eam mentis erectionem, rivulos habebas.* Orat. 19. in laudem Patris sui, ait propè Deum esse constitutum, cum versari nudum, & vinculis liberatum cum purissimâ illâ mente Angelici ordinis dignitatem, & fiduciam consecutum. In carminibus de vitâ S. Basil. inter Angelos illum vivere docet; & S. Meletium in Angelorum cœtum raptum fuisse, ejusque corpus, ut thesaurum ingentem, ad Ecclesiam Antiochenam transvectum.

S. Greg. Niss. S. Bas. frater, orat. in S. Ephrem, & in orat. funebri de Pulcheriâ, eam Deum videre docet. Sic in oratione funebri de Sancto Meletio, & orat. 2. in 40. Martyres, & orat. de S. Theodoro Martyre. S. Amb. orat. funebri de Theodosio, asserit cum Constantino esse Theodosium in magni meriti loco. Priùs tamen Theodosio optaverat requiem, quam Deus Sanctis paravit; testaturque se cum nunquam deserturum, donec fletu & precibus illum induceret, quò merita vocarent

rent, seu in montem Domini sanctum, ubi perennis vita, ubi corruptelæ nulla contagio; felicitatem æternam continuam describit, ubi vera perfectio, & ubi jam culpa cessavit; & Constantinum ait in loco constitui, quem vocat magni meriti locum; gratulatur Urbi Constantinopolitanae, quò Theodosius deducebatur. *Nunc illuc & Theodosius potentior, nunc gloriosior redit, quem Angelorum caterva deducit, quem Sanctorum turba prosequitur: beata sanè, quæ Paradisi incolam suscipis, & habitatorem supernæ illius civitatis Augusto sepulchri corporis tenebris hospitio.* Paradisi incolam, & supernæ civitatis vocat Theodosium: quæ omnia beatitudinem, seu Dei conspectum certò delineant. Idem in orat. funebri de Valentiniano, *Vitâ, inquit, jam fruitor æternâ.* Vitæ æternæ nomine quid aliud intelligi potest, quàm Dei visio clara? Esse in Cælo cum Sanctis: ibi vivere, ubi tantum vivitur? Et Ep. 59. ad Thessalonicenses de morte Acolii Episcopi Thessal. *Est igitur Acolius superiorum incola, possessor civitatis æternæ illius Jerusalem, quæ in Cælo est; videt illic urbis ejus mensuram immensam, purum aurum, lapidem preciosum, lumen sine Sole perpetuum: & hæc omnia jamdudum quidem sibi comperta; sed nunc facie ad faciem.* Perennis vita, & requies, non nisi in Dei conspectu posita est; non aliud præter Deum est mensura immensa, & lumen sine Sole perpetuum, quod qui facie ad faciem intuetur, Deum proculdubio conspiciat.

Sub finem quarti, & initio quinti seculi, S. Chrysost. Hom. 10. in posterior. ad Cor. de Beatitudine differens, sic habet: *Si cogitatio illorum mysteriorum, de quibus Apost. quamvis obscura sit, tantam suppeditat voluptatem; cogita quantam letitiam vobis allatura sit manifesta ipsa visio. Beati, qui illis bonis fruuntur; sicut miserabiles, & miserrimi, qui hisce contraria sustinent.* Hom. tertiâ in Epist. ad Philipenses: *Peccatores ubicumque fuerint, procul à Rege sunt; atque adeò digni, qui steantur: justi verò, sive hic, sive in futuro seculo fuerint, cum Rege sunt; illic tamen magis & propius, non per fidem; sed facie ad faciem, &c.* Nec in Textu Græco hic locus aliter se habet: *οἱ δὲ διατρίβοντες ἐν τῇ αὐτῇ τι ἐκείνῃ, κατὰ τὴν βασιλείαν ἐστὶν, ὡς καὶ πολλοὶ καὶ ἡγούμενοι ἢ διὰ πίστεως, ἀλλὰ πρόσωπον πρὸς πρόσωπον.* Eadem verba repetit Hom. in illud. Sap. *Iustorum animæ in manu Dei sunt:* Hom. 4. in Ep. ad Philipp. Hom. 32. in Ep. ad Rom. ait nunc Pauli animam in cælo versari juxta Regis solum, ubi Cherubim & Seraphim volitant. Lib. 6. de Sacerdotio c. 3. docet in cælos ab Angelis rectè adduci eos, qui corporis Dominici communione sanctâ muniuntur. Ex supradictis plura citavimus art. 4. Hæc autem expositione opus non habent; quid enim aliud præter Dei visionem intuitivam designare potest manifesta Dei visio cognitioni obscuræ opposita; ingressus ad Deum facie ad faciem oppositus cuique ingressui per fidem; in cælis versari, ubi est Dei Thronus, & illuc ab Angelis & Archangelis rectè duci? Denique Orat. in S. Philogon. ait hic Deum non videri; illic, seu in alterâ vitâ, perpetuò videri.

S. Aug. iisdem temporibus, l. 12. de Gen. c. 34. ait Sanctorum animas in
Tom. I.

tertio esse cœlo, quò S. Paulus raptus fuit, & tertium illud cœlum esse in quo Sancti ipsam Dei substantiam, Verbumque Deum, per quod facta sunt omnia in charitate Spiritus Sancti ineffabiliter valeant videre & audire. Omittenda videtur subito hæc probatio ex S. Aug. petita; quia superius observavimus dubitanter ibi locutum fuisse S. Patrem, de visione scilicet S. Paulo collatâ; non verò de visione nunc justis in cœlo concessâ. Nec ei venisset in mentem, vel levis de S. Pauli raptu in cœlum nisi constitisset apud ipsum justos hoc beneficio post mortem donari; & ita certò censebat, ut lib. 9. Confess. c. 3. asserat Nebridium amicum suum *sine fine felicem, & pro aviditate spiritali os admovere ad fontem, qui Deus est; videre Dei substantiam; ex fonte, qui Deus est, haurire; in patriâ facie ad faciem contemplari: non verò per fidem ambulare, ut habetur Epist. 112. quæ refertur art. 1. prob. 3. Quid aliud hæc innuunt, quàm Dei visionem intuitivam?*

Sanctus Bernardus hanc sententiam, ut ab antiquis acceptam, nemine reluctante profitetur, Epistolâ 311. ad Fratres de Hiberniâ: *Absit autem ut tua nunc, ô anima sancta (Malachiam alloquitur) minus efficax astimetur oratio, quando presenti vividius supplicare est majestati, nec jam in fide ambulas, sed in specie regnas. Absit ut imminuta, nedum exinanita tua illa tam operosa charitas reputetur, cum ad fontem ipsum charitatis æterna procumbis, pleno hauriens oro, cujus & ipsa prius stillicidia siccabas.* In Serm. de S. Malach. *Pari cum Angelis gloria, & felicitate latatur.* Et Epist. 226. ad Sugerium Abbatem, qui agebat animam: *Quid tibi, & terrenis exuviis, qui ad cœlum iturus, stolâ gloria mox indui habes?* Et infra: *Te expectat pax illa, quæ exuperat omnem sensum; te expectant justî, donec retribuatur tibi; te expectat gaudium Domini tui.* Ipse verò idem Serm. 4. de Festo Omnium Sanctorum, pacem quæ exuperat omnem sensum consistere in visione Dei, ut est in seipso, docet; ut & in Serm. de Humberti obitu. Porro in specie regnare; procumbere ad fontem, qui Deus est; lætitiâ Angelorum perfrui; stolam gloriæ accipere; pacem, quæ omnem sensum exuperat, consequi, & gaudium Domini, nihil est, quàm beatitudine laudatâ toties perfrui.

Ultimò. Vitis coinquinati homines inferni pœnis statim post mortem addicuntur. Job. 21. v. 13. *Ducunt in bonis dies suos, & in puncto ad inferna descendunt.* Luc. 16. v. 12. *Mortuus est autem dives, & sepultus est in inferno.* Potiori igitur jure præmio suo donantur viri justî, statim atque è vivis excesserunt, cum ad misericordiam pronus ita sit Deus. Nec est ratio, cur in futurum tempus Justorum præmium differri diceretur, cum Levit. 19. v. 13. nolit Deus opus mercenarii, vel in diem servari; seu mercedem, vel usque manè retineri; cumque de agendâ pœnitentiâ moneamur, quòd scilicet appropinquet regnum cœlorum: cur enim Christus tam citò venisset, si visionem beatificam justis post mortem non obtinuisset?

Hinc meritò pro sententiâ nostrâ definierunt Concilia, Viennense,

Florentinum, & Tridentinum Sess. 25. ubi de invocatione SS. agitur.

OPP. 1. Math. 20. v. 8. Denarius à patre-familias simul, & sub vespere tantum fuit solutus in diurni laboris mercedem; & proinde post resurrectionem, quæ per vespere designatur, visione beatificâ, aut præmio promisso donabuntur tantum Beati. Heb. 11. v. 39. *Hi omnes testimonio fidei probati non acceperunt re promissiones, Deo pro nobis aliquid melius providente, ut non sine nobis consummarentur.* Apocal. 6. v. 9. *Vidi subtus altare animas interfectorum propter verbum Dei.* Sub altari abscondio nihil aliud est, ex communi Sanctorum Patrum interpretatione, quam receptaculum aliquod, in quo quietæ versantur Beatorum animæ, promissam fidelibus Salvatoris adventu gloriam expectantes, ut eâ omnes simul donentur.

R. 1. ex S. Chrysost. in illud Math. omni ex parte non respondere parabolas designatæ rei; idèoque parabolarum scopum esse præcipue spectandum: nam si quæcumque in hac parabolâ occurrunt, futuro statui adaptarentur; & murmur in cælo, & invidia, seu oculus nequam occurrerent: nihil ergo aliud ex hac parabolâ est eliciendum, quàm nullo istius vitæ tempore de salute desperandum esse; cum quæcumque horâ vocari fuerint homines, modò dominicis præceptis obtemperarint, æternam consecuturi sint gloriam. Colligendum est quoque iustis omnibus in præmium eandem gloriam essentiali concedi, sed non eandem accidenalem, ut infra videbitur. S. Paulus Heb. 11. Sanctos simul animæ & corporis beatitudine donandos designat. Undè non addit, non sine nobis præmia esse consecuturos, sed sine nobis non esse consummandos. Ita S. Aug. Tract. 49. in Joan. Denique per altare, Apoc. 6. intelligi non potest locus extra cælos; cum ex cap. 7. v. 9. Sanctorum animæ albis stolis amictæ ante Dei thronum stent. Ergo, ut docet S. Gregor. Mag. lib. 35. Moral. cap. 9. ibi sub altari sunt animæ Beatorum; idest, qui iusti stolam unam, nempe beatitudinem completam expectant.

INST. Iusti nonnisi postquam iudicium subierint, visione beatificâ fruuntur; non iudicabuntur autem ante iudicium universale. Item à reprobis iusti discernentur; quæ secretio tantum fiet in iudicio generali, cum congregati electi separabuntur ab improbis. Math. 24. v. 31. *Et mitter Angelos suos cum tubâ & voce magnâ; & congregabunt electos à quatuor ventis.* Et cap. 25. v. 32. *Congregabuntur ante eum omnes gentes, & separabit eos ab invicem, sicut pastor segregat oves ab hædis; statuet oves quidem à dextris suis, hædos autem à sinistris &c.*

R. separationem quidem futuram esse publicam, & iudicio generali definiendam; sed jam præcessisse separationem, quæ iudicio particulari, seu die obitus facta fuit. Ex Scripturis enim constat tum ex Job 11. v. 13. tum ex historâ Lazari, reprobos pœnis æternis fieri obnoxios, statim atque obierunt.

INST. Nullum fieri iudicium privatum de his, qui moriuntur, ex Ecclesiæ precibus constat: nam si Ecclesia censeat animas omnes adhuc de suâ sorte incertas esse; nec ipsis constare, num beatæ futuræ sint,

aut damnanda; certè non datur iudicium particulare. Hæc autem fides est Ecclesiæ; rogat enim Deum, ut morte æternâ eas eximat in die iudicii, ne tunc patiatur eas à Dæmone absorberi. Quæ orationes de igne purgatorio non æquè exponerentur; nam ignis ille nunquam mors æterna dictus est; nec timetur eorum saluti, qui sunt in purgatorium ignem coniecti; nec quicquam illis à Dæmone timendum relinquitur. Pro animis etiam, quibus nihil luendum superest, rogabat olim Ecclesia Hispanica, ut ex Missæ Mosarabice canone patet; rogat etiam Ecclesia Orientalis, ut videre est ex Liturgiis; & ipsa Latina Ecclesia in precibus pro defunctis. *Domine Jesu-Christe Rex gloria libera animas omnium Fidelium defunctorum de pœnis Inferni, & de profundo lacu; libera eas de ore leonis, ne absorbeat eas Tartarus, ne cadant in obscurum; sed signifer Sanctus Michael representet eas in lucem sanctam, quam olim Abrahe promissisti &c. Libera me Domine de morte æternâ in die illâ tremendâ, quando cæli movendi sunt & terra, dum veneris iudicare sæculum per ignem, & quando cæli movendi sunt.* Preces fiebant pro Apostolis, Martyribus, & Confessoribus, Episcopis; Justis in Liturgiâ S. Marci, quâ utitur Ecclesia Alexandrina, *Animabus patrum, & fratrum nostrorum, qui antea in fide dormierunt, dona requiem, Domine Deus noster, memor majorum nostrorum, qui à sæculo sunt, Patrum, Patriarcharum, Prophetarum, Martyrum, Confessorum, Episcoporum, Sanctorum, Justorum, omnis spiritus in Christi fide defunctorum, necnon eorum, quorum hodie memoriam agimus, & S. Patris nostri Marci Evangelista, qui demonstravit nobis viam salutis, & horum omnium animabus dona requiem.* Ergo sententia Ecclesiæ est, Justos etiam, Evangelistas, Apostolos, & Martyres non potiri requie æternâ, seu gloriâ, & alios de quorum sanctitate non ita constat, adhuc in periculo versari, nec ipsos certò scire, quo in statu futuri sint.

R. 1. iudicium particulare novisse semper Ecclesiam, cum semper creditum fuerit Martyres, & Justos frui visione beatificâ, statim atque decesserunt; sicut & peccatores cruciatibus affici: Ecclesiam verò ita orare solitam; quia non tantum ad tempus, quod mortem subsequitur, refert orationes suas; sed & ad diem obitus, cum precatur, ut animas à morte æternâ Deus eximat. Sic ex S. Aug. Ep. 23. ad Bonifacium, Paschatis die dicitur Christus resurgere, quòd ad resurrectionis diem dies ille relationem habeat; ita etiam die Nativitatis dicitur Christus nasci; & tempore adventus postulat Ecclesia, ut veniat qui venturus est, & qui promissus fuit, licet venerit: *Veni Domine, & noli tardare &c.* In more ergo Ecclesiæ est res præteritas, ut futuras, spectare, & plerumquè significare. Nec mirum, si Ecclesia orationes, quas Deo in gratiam occumbentium offert die mortis, etiam postea iterum reperat; quia Deus ex S. Aug. lib. 12. de Civitat. cap. 12. *Nec aliter invocantes exaudis, quàm invocatuos vider.* Cum ergo Ecclesiæ constet omnia Deo esse præsentia, nihil Deo futurum; & proinde illum preces pro morientibus sibi aliquando offerendas, acceptas habere quasi jam oblatas, & in gratiam

ejusmodi precum morienti adesse, & peccata condonare. Hinc Ecclesia orationes has, & sequentibus sæculis postmodum fundit, quæ constituto in extremis, & in purgatorio igne degeni profuerunt, licet videatur tantum pro defuncto orare: & quidem orationum præcipua pars ad defunctos ab igne purgatorio eximendos pertinet.

Difficultatem non parit oratio pro Apostolis & Martyribus: nam pro beneficiis gratiarum actiones sunt; nihil enim aliud postulat Ecclesia, quàm ut illis requies concedatur, seu beatitudo consummata, aut gloria corporis: cum enim habendi corporis desiderio teneatur anima, requies perfecta concedetur, cum corpus animæ iterum conjungetur. S. Amb. in orat. funebri Valentiniani II. cum & Gratianum fratrem censeret Beatis annumerari, & vitâ æternâ frui; & tamen pro illis se per vitæ tempus deprecaturum testatur, variasque precum rationes inducit. 1. de Valentiniano. *Et huic adhuc intercessionem adscisco, cui remunerationem præsumo. Date manibus sancta mysteria, pio requiem ejus poscimus affectu; date sacramenta cælestia mysteria, animam piam, matris oblationibus prosequamur. Extollite populi mecum manus in sancta, ut eo saltem munere vicem ejus meritis rependamus. Non ego floribus tumulum ejus aspergam; sed spiritum ejus Christi odore perfundam: spargant alii plenis lilia calathis, nobis lilium est Christus: hoc reliquias ejus sacrobo; hoc ejus gratiam commendabo.*

OPP. 2. Trium priorum sæculorum Patres cum Cerintho convenisse de negatâ justis post mortem Dei visione. Censebat ita Cerinthus ex Eusèb. lib. 3. Hist. c. 28. Et nisi approbetur dogma illud, inter hæreticos referentur illi Patres, ut qui contra doctrinæ Catholicæ caput gravissimum cum hæretico conspirarint: damnata porro Patrum illorum sententiâ, corruet omnino traditionis Apostolicæ auctoritas; non enim proferri potest dogma, quod ab antiquis temporibus Apostolico proximis majori consensu fuerit ad nos transmissum. Sic S. Justin. Dial. cum Triphon. Neque sunt Christiani, neque Judæi qui animas post mortem in cælis constituunt, quique dicunt non esse mortuorum resurrectionem, verum, simulatque moriuntur, animas ipsorum in cælum recipi. Ne tamen existimetis esse Christianos, perinde ut neque Judæos. Addit mille annis cum Christo post Judicium ultimum in urbe Jerusalem regnatos esse justos. Ex auctoritate autem Isaïæ probat cælum novum, & terram novam futura esse, omniaque immutanda fore, quod scriptum sit: *secundum dies ligni vitæ, dies populi mei erunt*, & quod dies Domini sit sicut mille anni, & quod in Apoc. quam Joannis esse opus asserit, per annos mille Jerosolymis justos esse commoratos tradatur, simulque hoc annorum regnum postremi judicii diem esse subsequendum, tuncque universam omnium resurrectionem esse futuram.

S. Irenæus lib. 5. c. 31. Sanctos statim post mortem visionem Dei non esse consecuturos probat, ne quid præstantius Christo assequi & obtinere videantur. *In invisibilem*, inquit, *locum abibunt, & ibi ad resurrectionem usque commorabuntur, & postea recepto corpore, velut Dominus resurrexit, ad conspectum Dei venient; nemo enim discipulus supra*

magistram ; sustinuit autem Christus desinicum à Patre resurrectionis tempus. Quinque capitula Fevardentius ex manuscripto veteri addit lib. 5. Sancti Irenæi. In altero ex iis, quod est 33 mille annorum regnum probatur. 1. quia scriptum est Matth. 6. Vinum novum cum Sanctis Christum esse potaturum : quod promissum frustraneum esset ; cum in cælis impleri non posset. 2. quod centuplum bona sua deferentibus, nuptias etiam non amplectentibus, Christus pollicitus sit : quod etiam non fieret, nisi mille annorum regni spes affulgeret : in quo quidem regno, ut à S. Joanne discipuli audierant, omnia fecunditate centenâ essent ornanda ; ita ut nulla futura esset vitis sepes, quæ centenos ramos non produceret ; nullus ramus, qui non centena grana haberet ; & hæc erat, inquit, doctrina Papæ discipuli S. Joannis, & familiaris S. Polycarpi. Alias autoridades adducit, Isaïæ 11. & c. 34. & Apocal. 20. ut hanc sententiam confirmet : eos autem qui contextus superiores spirituali interpretatione Ecclesiæ adaptarent, refellit, ac singulari expositione varias beatitudinis mansiones exponit.

Eadem docuit Tertull. lib. de Anima c. 55. ubi animas fidelium in receptaculo, quod sinum Abrahamæ appellat, usque ad Judicium generale recludit : quod nempe receptaculum, & locum refrigerii à damnatorum inferis longè diversum esse probat lib. 4. contra Marcion. c. 34. *Eam itaque regionem, sinum dico Abrahæ, etsi non cælestem sublimiorem, tamen inferis superiorem, interim refrigerium præbituram animabus justorum, donec consummatio rerum resurrectionem omnium plenitudine mercedis expungat.* In hoc autem receptaculo delineari, & prospici innuit futuri judicii imaginem : & addit lib. de Anima c. 55. mox adducto, & c. 58. non rectè opinari qui ad generalem usque Judicii diem justorum præmium & improborum pœnam penitus rejici, & differri censebant ; ne quid judicio divino detraheretur. Docet interim animas justorum foveri, & peccatorum animas in inferis torqueri ; quod anima, sejuncta licet à corpore, & pœnis & dolori sit obnoxia ; simulque gaudia, in quorum partem corpus non veniat, soleat percipere. Lib. verò 3. contra Marcionem c. 23. Millenariorum regnum, ut dogma apud omnes constans probat. *Nam & confitemur in terrâ nobis regnum repromissum, sed ante cælum ; sed alio statu, utpotè post resurrectionem in mille annos, in civitate divini operis Jerusalem in cælo delata, quam & Apostolus matrem nostram sursum designat, & politeuma nostrum, id est municipium in cælis esse pronuntians, alicui utique cælesti civitati eum deputat.*

R. 1. Arguere S. Justin. simul, & eos qui Sanctis visionem Dei concedi disputarent, & qui carnis resurrectionem negarent, ut ex ejus verbis compertum est. Qui futuram resurrectionem negarent, Christianos non esse scribit ; non verò ita esse qui Sanctos frui visione Dei censerent. Non enim unquam eos à communione suâ repulit, sicut nec qui eum subsecuti sunt, S. Iren. & Tert. hi enim eos aut ignorantia, aut superbia tantum insimulant. Quis recens ex Ethnicis conversus, ut S. Justin. pro

Apostolicis scriptis, aut quæ eorum nomine circumferebantur, non stetit? Si attendantur quæ ad opinionis confirmationem affert, levioris non solum momenti deprehenduntur; sed & ad illustrandam, quam Apostolicam esse sententiam existimabat, non parum conferre: imò his momentis adductus, à priori sententiâ videtur discessisse: in Orat. enim ad Græcos sub finem, verbo Dei se à pravis affectibus solutum fuisse testatur; & tandem concludit post exitum Deo animum consociatum iri: cupiditate igitur extinctâ, tranquillitatem, ac serenitatem perfectam anima consequitur; *soluta autem malis, quæ cervicem ejus circumfluebant, ad eum abir, qui ipsam condidit.* Et in Apologiâ ad Antoninum ait penes Christianos esse diffiteri se esse Christianos; *sed, inquit, vivere nolumus mendaciter quidquam loquentes. Sempiternam namque, & puram vitam concupiscentes, ad consuetudinem cum Deo parente & universorum opifice vivendi aspiramus, & ad confessionem Christianam festinamus, persuasum habentes, atque credentes: consequi hanc eos posse, qui factis ipsis Deo probant se illum consecrari, & vitæ ejus consuetudinem adamare, in quâ nullam adversariam persentire est pravitatem.* Censebat animam corporis vinculis liberatam ad Deum proficisci, cum Deo parente consuetudinem habere, Deum sectari, hancque esse vitam sempiternam & puram, cujus desiderio Christiani ad martyrium properarent. Vita ergò sempiterna non alia apud eum erat ab eâ felicitate, quam justî post mortem à Deo accipiebant.

R. 2. ad S. Iren. quæ jam ad sententiam S. Justinî reposuimus, scilicet Papiam ipsum illius opinionis authorem à S. Irenæo laudari; simulque rationes adjungi, quæ novitatem sententiæ, & illius levitatem satis innuant. Vellem non tribui viro tam eximio, quæ Fevardentius addidit capitula, utpote fabulosa penitus. Et sanè qui Patres Sancti Irenæum subsecuti sunt, corpoream illam felicitatem longè ab illo statu removerunt.

R. 3. ad Tertull. veneratione ductum illum erga superiorum auctoritatem, in hanc sententiam descendisse; sed correctione in plurimis adhibitâ: non enim omnibus visionem ad resurrectionis tempora negandam esse censuit; nec voluit eodem in loco justos cum impiis inclusos detineri; nec per mille annos deliciis corporalibus justos diffluere. Bonorum spiritualium possessionem & copiam, in eorum, quæ hîc vel amissa, vel despecta sunt, mercedem concedi docet; ex promissis autem postea factis Abrahæ bona etiam quædam temporalia justis probat aliquando conferenda: imò nec sibi omninò constat: improbos enim post exitum Inferni pœnis statim censet subjici: quo, quæso, jure justis præmium negare potest statim atque decesserunt? Hinc ergò videre est Tertul. ita fuisse opinatum, aut quia in ejus manus venerant Apostolorum nomine inscripta falsò opera; aut quia Sanctorum Justinî, & Irenæi libros evolverat; aut quia cum eorum discipulis sermonem conferuerat: cum autem ab eorum placitis secesserit in plurimis, ut notatum est; hinc cum Millenariorum numero propriè ac-

consensum non esse dici potest. Ab hac doctrinâ penitus dissenserunt antiqui, quos in probationibus retulimus, ubi scilicet fabulosa esse, & suppositicia illius sententiæ principia animadverterunt.

Origenes in prologo commentarii in Cantica, mille annorum regni opinionem inde natam docet, quod simplices quidam nescientes distinguere, ac discernere quæ sint in Scripturis divinis interiori homini, quæ verò exteriori deputanda; vocabulorum similitudinibus decepti, ad ineptias quasdam fabulas, & fragmenta inania se contulerint; ut etiam post resurrectionem cibis corporalibus utendum crederent, posumque sumendum, non solum ex illâ vite verâ, & vivente in sæcula; verum & ex his vitibus ligni. Similia habet lib. 2. de Princip. cap. 12. Dionysius Alex. opinionem hanc duobus libris, ut fabulam confutat; eam verò, ut impiam, insectatur, quæ turpium bonorum possessionem tribuit iustis.

S. Aug. lib. 10. de Civit. c. 7. ex discrimine suprâ notato, duplicem Millenariorum sententiam fuisse docet. Primam eorum qui spiritale penitus illud regnum futurum esse contenderent, quam tolerabilem utcumque dicit sententiam, sequi aliquandò idem opinatum fatetur. Alteram proversus ridiculam eorum, qui regnum illud sædissimis deliciis diffuens sperarent aliquandò constituendum.

R. tandem de illis authoribus, & de Cerintho disparem esse rationem; non enim, ut puto, iis narrationibus, quæ Christo, & Apostolis tribuebantur, in hanc sententiam fuit adductus Cerinthus; sed hæretico animo, ut qui à Legis Novæ præceptis abhorreret, has Christi nomine, & Apostolorum Parabolas & enarrationes confixit, & spargi curavit, quibus Papias primò, deinde Joannes Theologus, & alii decepti sunt: sum igitur opinionem, cum aliis pravis dogmatibus, factâ secessione ab Ecclesiâ, propugnavit Cerinthus, & Millenarium regnum impuris voluptatibus totum turpe, & probrosum fecit. Econtrâ verò eo animo fuerunt SS. Patres, & authores antiqui, quo illi, quibus pravè licet sentientibus, hæresim S. Aug. non imputat Epist. 112. *Qui sententiam suam, quamvis falsam, atque perversam nullâ pertinaci animositate defendunt, præsertim quam non audaciâ præsumptionis suæ pepererunt; sed à seductis, atque in errorem lapsis parentibus acceperunt; quarunt autem cautâ sollicitudine veritatem, corrigi parati cum invenerint; non sunt inter hæreticos deputandi.* Non præsumptionis audaciâ hanc opinionem pepererant SS. Justin. Iren. Tertull. Novat. Lactant. & alii; sed hanc in sententiam supposititiis Christi, & Apostolorum sermonibus fuerant inducti; & idè nec pertinaciter pro eâ steterunt; nec esse deferendam censuerunt communionem fratrum, qui Sanctos in cælis constituebant, eisque visionem beatificam concedi pugnabant.

Nec inde ullatenus Traditionis Apostolicæ autoritas periclitatur: aliud enim est ex antiquis quosdam in quâdam versari opinione; aliud est antiquos de dogmate Apostolico secum invicem convenire. Equidem S. Justin. in Dial. S. Theoph. Antioch. lib. 1. S. Iren. lib. 5. c. 32. Tertull.

Tertull. lib. de Anima c. 55. & 64. lib. 3. contra Marcion. c. 34. Novatian. lib. de Trin. c. 24. Lact. lib. 7. cap. 2. & 14. censere videntur animis Justorum visionem beatificam ad resurrectionis diem negari. Sed dogma illud nullatenus refert dogmatis Catholici rationem. 1. quia originis illius tempus notatur: Cerinthus enim & Papias dubio procul illius auctores fuerunt: decepit Papiam Cerinchi figmentum: Papiæ decepti autoritas alios in errorem induxit, & hi eò facilius in eum inciderunt, quò in Traditionis Apostolicæ venerationem erant propensiores, & sermonibus Christi debere se obsequium jure censebant, nec eos falsò confictos noverant. Nihil igitur, quod dogma Catholicum sciperet, referebat hæc opinio. Non scripturæ verbis nitebatur, & nonnisi Parabolicis, & proinde ad fidem faciendam non idoneis. 2. omnium prima non erat hæc Papiæ sententia: longè prior erat illa quam Apostolus docuerat, quam tenuerat S. Ignatius, & Ecclesia Smyrnenlis, ipseque S. Justin. in Orat. ad Græcos, & Apol. ad Anton. fuerat primò professus. 3. ea ratio est traditionis Apostolicæ, ut eandem doctrinam ubique, & semper, & immobiliter proponat: hæc sunt dogmatis Catholici Leges, quas inter alios uberiùs exponunt Tertull. l. de Præscript. & Vincentius Lirin. in Common. Ea verò doctrina, quam S. Justin. & alii post Papiam fuerunt professi, talis non est varias ob rationes non levis momenti. Illi enim idem dogma non docebant, nec eadem ratione. 1. negabant alii Sanctis omnibus visionem beatificam, ut S. Justin. in Dial. & S. Iren. alii verò Martyribus eam tribuebant, necnon Prophetis & Patriarchis, ut Tert. lib. de Animâ c. 55. *In Paradiso, quo jam nunc Patriarchæ & Prophete appendices Dominica Resurrectionis migraverant ab inferis.* Addit solos ibi Martyres constitui à S. Joanne in Apoc. ac vivos fuisse à Perpetuâ martyre die Passionis. Martyres porrò docet eo privilegio potiri, quia in Christo, non in Adam decellerunt. *Agnosce, inquit, differentiam Ethnicis, & Fidelis in morte: si pro Deo occumbas, ut Paracletus monet, non in mollibus febribus & in lectulis, sed in martyriis: si crucem tuam tollas, & sequaris Dominum, ut ipse precipit, tota Paradisi clavis tuus sanguis est.* Quod iterum probat lib. de Resurrect. carnis c. 43. *Nemo, inquit, peregrinatus à corpore statim immoratur penes Dominum, nisi ex martyrii prerogativâ: Paradiso scilicet, non inferis diversurus.* Igitur hoc in capite præcipuo cum Sancto Ignatio, & aliis conveniebat Tertullianus: à Sancto autem Justino, Sancto Irenæo, & aliis dissentiebat. 2. Justos cum impiis eodem in receptaculo distineri ad ultimi Judicii diem censebant S. Justin. in Dial. S. Iren. lib. 5. cap. 32. Novat. lib. de Trin. cap. 1. Lact. lib. 7. c. 21. quo autem fundamento ita senserint, reclamantibus sacris Codicibus, non est facile dictu: aliud verò docuit Tertullianus, & quidem sacris Scripturis consentaneum, scilicet lib. de Anima c. 58. nempe justos ab impiis secerni, & sceleratos debitis suppliciis subijci. 3. quod caput non mediocris est ponderis, justos cum Christo mille post resurrectionem annis corporis deliciis esse fruituros contendunt S. Iren. Lact. & alii: reluctatur Tertull. & carnales has voluptates ut indignas removere lib. 3. cont. Marcion. c. 23. ubi spirituales admittit. Ratione singulari exponit

S. Iren. quid ibidem agant iusti; aliter Orig. lib. 12. de Princip. Quis igitur Apostolicâ Traditione firmari dixerit dogma tam parùm sibi constans, & cuius originem & initium novimus? Notat Euseb. libro tertio Hist. capite ultimo, Papiam à Domini Discipulis non fuisse institutum: *Idem*, inquit, *præterea alia nonnulla nuda vocis traditione ad se pervenisse testatur*, novas quasdam scilicet Servatoris parabolas, & predicationes, aliaque fabulis propiora, inter quæ mille annorum spatium post corporum resurrectionem fore dicit, per quæ regnum Christi corporaliter stet in orbe terrarum; quæ quidem ita opinatus esse videtur Papias ex malè intellectis Apostolorum narrationibus; cum omnia, quæ arcano quodam sensu & exempli causa ab illis dicebantur, non satis pervidisset: Fuit enim mediocri admodum ingenio præditus, ut ex scriptis illis conicere licet; plerisque tamen post ipsum Ecclesiasticis Scriptoribus ejusdem erroris occasionem præbuit, hominis vetustate suam sententiam tuentibus, puta Irenæo, celsi quis alius ejusdem opinionis fautor exstitit. Instituitur modò comparatio cum dogmate quod profiteamur: illius aliud initium non est, quàm quod notant Scripturæ, profitentur Apostolorum Discipuli, S. Ignatius, Ecclesia Antiochena, & Smyrnenfis, nec non viri illi quos impugnant SS. Justinus, Irenæus, & alii: item Sanctus Cyprianus, Ecclesia Orientalis universa 4. sæculo cum SS. Athanasio. Basil. Gregor. Naz. & Nyss. &c. atque etiam Occidentalis universa cum SS. Hilar. Hieron. Aug. &c.

O P P. 3. Non modo trium primorum sæculorum Patres hanc doctrinam propugnaverunt, sed & quarti, & quinti sæculi, & subsequenter, ut S. Hilarius in Psal. 138. *Hæc humana lex necessitatis est, ut sepulchris corporibus animæ ad inferos descendant, quam legem Dominus ad consumptionem veri hominis non recusavit.*

R. Voluisse forsàn S. Hilar. per quasdam temporis morulas in inferna loca omnes animas instar Christi descendere, sed non proinde justis modò Dei visionem claram negare; hæc enim habet in Psal. 24. de Apostolis, aliisque Sanctis: *Quomodò possumus montes non eos significatos esse intelligere, qui super terrenam naturam gloriosi, jam in rebus Dei exultant.* Et docet in Psal. 60. & 64. Sanctos cum Deo esse: & in lib. contra Constant. ait sibi formidini non fuisse futura tormenta, quæ martyribus parabantur; cum sibi compertum esset Latronem in Paradiso esse constitutum.

O P P. 4. S. Ambrosius lib. de bono mortis c. 11. Animas in quodam loco à cœlis dissito esse constitutas supponit, novæque ratione earum habitudinem illustrat: 1. quòd corpus suum domuerint: 2. quòd sanctitati suæ nihil timeant: 3. quòd Judicii futuri exitum non formident: 4. quòd futuram gloriam possidendam prævideant: quæ se consolatione sustentantes cum magnâ tranquillitate requiescunt stipatæ præsidii Angelorum. Et l. 2. de Cain. cap. 2. *Solvitur à corpore anima, & post finem vite hujus adhuc futuri ambiguo suspenditur.*

R. S. Ambros. lib. de bono mortis nihil innuere, quod veritati, quam

docuit, advesetur: in eo enim totus tantum est, ut ex quorum bonorum memoriâ possint iusti delectationem percipere, exponat: ut enim in objectione continetur, prævident gloriæ futuræ splendorem, qui ex corporis resurrectione accedet, sed magnâ tranquillitate: potiuntur luce, libertate, & repromissâ hæreditate: quomodo autem hæc fieri possent, nisi illis in receptaculis Dei conspectu potirentur? 4. inquit, *quia incipiunt intelligere requiem suam & futuram sui gloriam prævidere; cæque se consolatione mulcentes in habitaculis suis, cum magnâ tranquillitate requiescent, stipate præsidiis Angelorum.* Quintus autem ordo exultationis uberrima habet suavitatem, quod ex hoc corruptibilis corporis carcere in lucem libertatemque pervenerint, & repromissam sibi possideant hereditatem. Sic de beatitudine perfectâ loquitur: ibique Apocryphis etiam Scripturis, 4. scilicet Esdræ, utitur. Idem lib. 2. de Cain. c. 2. innuit hoc unum animis incognitum esse post mortem, nempe Judicii diem: hæc enim verba inserit, ut quietem absolutam nullatenus turbari confirmet: non enim de suo statu dubitationem quamdam sustinent: omnem porro hæc de re scrupulum ipse exemit lib. de bono mortis cap. 11. mox adducto, & cap. 3. ubi ait iustos domino astare, & illi seipsos in victimam absolutissimam offerre; nec esse nisi tunc, post mortem scilicet, perfectam laudationem.

O P P. 5. ex S. Chryf. Hom. 39. in 1. ad Cor. *Nam si corpus non resurgat, anima nostra incoronata manebit, & extra cælestem beatitudinem manebit.* Item Hom. 24. in Ep. ad Hebr. *Ne aliquid præ nobis habere viderentur, si primi ante nos coronarentur, unum definivit tempus omnium coronatum, & qui ante tam multos annos vixit, tecum accipiet coronam.*

R. S. Chryf. velle tantum animam beatitudine completâ non donari, nisi cum in ejus beatitudinis consortium corpus venerit; cum sit æquum utrique mercedem deferre; quandoquidem corpus laborum fuit particeps. Nec ullatenus adversantur ista ex mox adductis.

O P P. 6. S. Aug. ait Epist. 299. Patriarchas antiquos in Paradiso quodam, seu sinu Abrahæ Deum vidisse, & illum secundum beatificam præsentiam suæ divinitatis nunquam ab eis recessisse: *profectò in Paradiso, atque sinu Abrahæ etiam ante jam erat beatificante sapientiâ, & apud inferos judicante potentia.* Idem l. 1. Retract. c. 14. meritò quæri docet, utrum sancti homines jam defuncti dicendi sint in illâ possessione consistere. Et in Enchirid. c. 109. *Tempus quod inter hominis mortem, & ultimam resurrectionem interpositum est, animas in abditis receptaculis continet.* Item lib. 20. de Civit. Dei c. 9. *Pars civitatis Dei, quæ conjungenda immortalibus Angelis, ex mortalibus hominibus congregatur, nunc mortaliter peregrinatur in terris, vel in eis qui mortem obierunt, secretis animarum receptaculis sedibusque requiescit.* Denique in Psalm. 36. in hæc verba: *Et adhuc pusillum, & non eris peccator: Post vitam istam parvam nondum eris, ubi erunt Sancti, quibus dicetur, Venite benedicti Patris mei, percipite regnum, quod vobis paratum est ab initio mundi; Undum ibi eris, Quis nescit? Sed jam poteris ibi esse, ubi illum quondam ul-*

cerosum pauperem, dives ille superbus, & sterilis, in mediis suis tormentis vidis à longè requiescentem: in illâ requie positus, certè securus expectabis Judicii diem.

R. 1. De loco beatitudinis, aut ubinam essent defunctorum animæ dubitasse S. Aug. ex 1. lib. de Immortalitate animæ sub initium, & lib. 12. de Gen. ad Litt. c. 34. Nam ibi ait animam latronis justî migrasse, aut in sinum Abrahæ, aut in Paradisum, aut in tertium cælum; si tamen non aliquid unum est diversis nominibus appellatum, ubi sunt animæ Beatorum. Lib. etiam 2. Quæst. Evang. c. 38. dicit sinum Abrahæ esse secretum Patris, quò Christus ante resurrectionem abierit, & in quo sint justorum animæ.

R. 2. cum dubium etiam fuisse circa intensiorem visionis intuitivæ; seu num Sancti æquè beati forent ante, ac post resurrectionem. Sic enim habet l. 12. de Gen. ad Litt. c. 35. *Minimè dubitandum est animam post mortem ipsâ carne depositâ, & transcendens etiam similitudinibus corporalium non sic videre posse incommutabilem substantiam, ut Sancti Angeli vident: sive alia latente causa: sive idè quia inest ei quidam naturalis appetitus corporis administrandi, quo appetitu retardatur quodammodo, ne totâ intentione pergat in illud bonum.*

R. 3. De visione intuitivâ Sanctis nunc concessâ non dubitasse S. Aug. ex adductis superiùs locis. Lib. 1. de Civit. c. 13. & l. 12. c. 9. ait justos in occultis sedibus quietos esse: & lib. 20. c. 9. animas justorum cum Christo regnare, & clarè perspecta habere mysteria. Undè l. de Catechizandis rudibus c. 25. felicitatem, quæ hanc vitam sequitur, ità describit. *Omnes delicia Deus eris & societas sancta civitatis, in illo, & de illo sapienter beatèque viventis: efficiemur enim, sicut ab illo promissum speramus & expectamus, aequales Angelis Dei; & cum eis pariter illâ Trinitate perfruemur: jam per speciem, in quâ nunc per fidem ambulamus; credimus enim quod non videmus, ut ipsis meritis fidei etiam videre quod credimus, & inherere mereamur; ut aequalitatem Patris, & Filii, & Spiritus Sancti, & ipsius Trinitatis unitatem, quomodo sunt hac tria unus Deus, non jam verbis fidei, & strepentibus syllabis personemus, sed contemplatione purissimâ, & ardentissimâ in illo silentio forbeamus. Si ea sit felicitatis natura, eâque potiantur justî; ita ut Trinitatem clarè conspiciant; palàm est non de beatitudine moveri dubium, sed de solo beatitudinis loco; quem ad beatitudinem parùm conferre, aut indifferentem esse censebat S. Aug. ut habetur Serm. Domini in monte; cum Deus qui justitia, & vita est, & veritas, non plus in cælo sit quàm in terrâ; anima verò, quocumque in loco sit, justitiæ & veritatis sit subjectum. Non ergò de beatitudine, quam obtinent Sancti, dubitavit S. Aug. sed de solo loco beatitudinis; aut de intensiōe ejusdem: imò videtur illud aliquandò deposuisse dubium. Unde lib. 1. Retract. cap. 14. ubi quærit, num Sancti eâdem cum Angelis beatitudine fruantur: sed urriam inquit, ad contemplandam cordis oculis veritatem, dictum est facie ad faciem, nihil ex hoc minùs habeant, non est hic locus disputando inqui-*

vere. Quamobrem constat, non de beatitudine, sed de intensione ejusdem egisse: imò in Epistolâ ad Evodium ait, sinum Abrahæ, in quo Lazarus quiescebat, non posse concipi: ideò censeat deliciarum locum fuisse, in quo Patriarchæ Deum videbant, & à quibus Deum secundum beatificam presentiam suæ divinitatis nunquam video recessisse. Et infra: Profectò in Paradiso, atque sinu Abrahæ, etiam ante jam erat, beatificante sapientiâ. Et Epist. 119. Januarii, scribit Sabbato Christianorum, seu die Dominico significari quietem, quæ hanc vitam securura est, quam c. 9. vocat ineffabilem tranquillitatem actionis otiosæ, quæ in Dei laude agitur, quæ sempiterna futura est, seu beatitudo æterna. C. autem 13. docet animas Sanctorum ante resurrectionem corporis esse in requie, sed non eâ in actione, quæ corpora recepta vegetet. Et c. 14. optare ait Apostolum Epist. ad Philipp. dissolvi, & esse cum Christo, undè incipit requies, qua non interruptitur resurrectione, sed clarificatur. Nova igitur quies non accedit ex corpore, sed clarificatio; & idem est post, ac ante resurrectionem, beatorum status. Denique in Ep. 12. c. 13. & lib. 12. de Gen. ad Litt. c. 29. ubi videtur Moyse, & S. Paulo concessam fuisse Dei visionem asserere, in eo unico difficultatem sitam esse supponit, videlicet non posse ab homine, dum vivit, Deum videri: quia scriptum est: *Non videbit me homo & vivet*: & ideò mortem ad tempus aut alienationem à corpore excogitandam esse scribit. Si igitur ad Deum videndum nihil aliud postulandum esset ex S. Augustino, quàm à corpore separatio; undenam clarum illum Dei conspectum sanctis post exitum negasset?

OPP. 6. S. Bernard. Serm. de Omnibus Sanctis, tres sanctarum animarum status distinguit, *Primum in corpore corruptibili, secundum sine corpore, tertium verò in beatitudine consummatâ*; primum in tabernaculis, secundum in atriis, tertium in domo Dei. Et infra: *In illam, inquit, beatissimam Dei domum, anime nec sine nobis intrabunt, nec sine corporibus suis, id est, nec Sancti sine plebe, nec spiritus sine carne.* Et Serm. 4. per altare de quo S. Joannes, *vidi sub altare*, &c. dicit intelligendam esse Christi humanitatem, cujus conspectu fruatur jam anima, quæ post resurrectionem ad videndam essentiam Dei, seu Christi, non in formâ servi, sed in formâ Dei elevandæ sunt: imò addit à Filio ostendendos esse Patrem, & Spiritum Sanctum, & percepturos tunc justos inexpertas delicias: *Quonam igitur modo super altare dixerim exaltandos eos, qui nunc sub altari quiescunt? visione usque, & contemplatione, non pralatione: ostendet enim tunc nobis Filius, ut pollicitus est, semetipsum, non in formâ servi, sed in formâ Dei ostendet: etiam nobis Patrem, & Spiritum Sanctum, sine quâ nimirum visione nihil sufficeret nobis transiens quippe ministrabit nobis novas utique, & usque ad illud tempus penitus inexpertas delicias manifeste sue contemplationis; undè & S. Joannes in Epistolâ suâ. Nunc, inquit, Filii Dei sumus, sed nondum apparuit quid erimus. Et addit, scimus autem, quoniam cum apparueris, similes ei erimus, quia videbimus eum sicuti est.*

R. S. Bernard. visionem statim post obitum concedi existimavisse, ut probavimus. Undè nihil aliud voluit, quàm quòd S. August. voluisse ostendimus, consummatam nempe beatitudinem futuram, cum corpus animæ adunatum fuerit. Nam ait serm. 3. de Festo Sanctorum: *Acceperunt primas singulas stolus; sed non vestientur duplicibus, donec vestiamur & nos. . . . Stola enim prima, ipsa est, quam diximus, felicitas, & requies animarum: secunda verò, immortalitas & gloria corporum.* Et infra: *Anime sanctæ, quas propriâ Deus insignivit imagine, te, caro, desiderant; quas redemit proprio sanguine, te expectant; & ipsarum sine te compleri letitia, perfici gloria, consummari beatitudo non potest: adcò siquidem viger in eis desiderium hoc naturale, ut necdùm tota earum affectio liberè pergat in Deum; sed contrahatur quodammodo, & rugam faciat, dum inclinantur desiderio tui.* Undè nihil aliud voluit, quàm animas Beatorum non tam clarè videre Deum, quàm post resurrectionem visuræ sint: inexpertas autem illas delicias vocavit; non quòd ex visione Dei delectationem Sancti non perceperint; sed quòd ratione corporis illas delicias non sunt experti, nec etiam intuiti sunt divinitatem, seu Christum super altare, ut habet, seu effecta illa miranda divinitatis Christi futura nondùm conspexerunt in illis corporibus, quæ sunt sub altari: quippè conspicua tantùm eâ ratione post resurrectionem fiet Christi divinitas; tunc enim maximè illucescet, cum, ex Apost. 1. Col. 15. v. 28. *Deus erit omnia in omnibus.*

Si quæ alia loca in aliis Patribus occurrant, pertinent vel ad completam beatitudinem, vel ad intuitivam visionem omnibus concedendam publicè, vel ad incrementum quoddam beatitudinis. Mirabitur forsàn quis, undè implicatæ videantur ita antiquorum sententiæ: si probationes consulantur, in aperto est plerorumque doctrinæ; si verò argumenta ex illis accepta perpendere in animo sit, ambigua eorum disserendi ratio animis occurrer. Adversus antiquiores, quos à Papiâ, & fabulosis operibus deceptos fuisse non ignorabant, veneratione ducti, qui subsequuti sunt Sancti Patres, vel authores antiqui, mentem suam quandòque subobscuriùs exponere, quandòque antiquorum illorum placitis non adversari videntur: nam in illis quæ Religionis capita palàm non lædebant, quia nondùm juxta sibi traditam doctrinam decreto solemnî Ecclesiæ definitærat, antiquorum illorum memoriam noluerunt proscindere; posterisque hanc æconomiâ documento sunt insigni, ne Patrum, laboribus suis, aut martyrii coronâ de Ecclesiâ benè meritum, famæ, vel levis macula vehementiori zelo inuratur. Quæ æconomia fiet evidentior, si Sanct. Gregor. Naz. doctrina excutiat: nihil enim apertius his quæ exscripsimus; & tamen ubi Orat. 10. Casarii fratris laudes prosequitur, licet cum Sanctis annumeret, eo modesto loquendi genere utitur: *Tu divinum, & sacrum caput, usinam cælos peneres, atque in Abraha sinu, quicumque tandem ille est, conquiescas, & Angelorum choream, ac Beatorum virorum gloriam, & splendorem speâtes, vel potius unâ tripudies & exultes.* Et in eadem Orat. *Sapientum verbis adducor, ut credam pulchram omnem*

animam, & Deo charam, posteaquam corporis vinculis soluta hinc excesseris, protinus bonum, quod eam manet, persentientem, & contemplantem (utporè eo, quod tenebras offundebat, vel purgato, vel deposito, vel, quo verbo ea res appellanda sit nescio) mirabili quâdam voluptate affici, & exultare; atque hâc vitâ, tanquam gravi ergastulo, liberatam, compedibusque illis, quibus mentis ala deprimebantur, solutam, summa cum hilaritate ad dominum suum tendere, ac reconditam beatitudinem jam velut per imaginem & simulachrum percipere: post etiam aliquantò cum cognatam carnem à terrâ, qua & dederat, & in fidem acceperat, receperit (quod quomodo fiet, is novit, qui ea inter se conjunxit, atque dissolvit) iam demum eam quoque ad gloriæ cœlestis hereditatem secum admissuram. Quasi verò Sapientum solâ autoritate in eam fidem adduceretur S. Greg. Naz. eumque lateret, quæ esset illius beatitudinis amplitudo, & natura. In orat. verò 52. aut Epist. 2. Cledonio, ubi se ab Apollinaristarum doctrinâ abhorruisse semper testatur, alterum Judaïsmum vocare non dubitat, crassiorum Millenariorum de deliciis carnalibus cum Christo per mille annos sententiam: hanc scilicet Ecclesia rejecerat ab antiquo; aliam verò de loco, ubi animæ requiescerent ad judicii diem postremum, intactam dimiserat: undè ea fuit modesta antiquorum definiendi ratio.

O P P. 7. Ex SS. Justino, Irenæo, & aliis antiquis, si in locis quibusdam à cœlo diffitis non detineantur justorum animæ, melius cum iis agetur, quàm cum ipso earum domino, qui tres in tumulto dies in Infernis, aut in sinu Abrahæ commoratus est.

R. hanc, & cæteras rationes, quas proponere solent antiqui, nullius esse ponderis, ut ipsi attendenti statim sit in aperto; neque Sanctos quidquam ipso Christo præstantius consequi ullo modo dici possè. Ejus mors, ut & resurrectio, resurrectionis nostræ aliquandò futuræ exemplar semper erit perfectissimum. Sicut enim Christus exemplar nostrum mortuus est, quievit in tumulto, resurrexit, & in cœlum ascendit; sic & nos morimur, deindè jacemus in sepulchro, postea resurgemus, & tandem in cœlum corporaliter ascendemus. Sicut etiam anima Christi ante resurrectionem corporis sui beata fuit, atque gloriosa; sic & hæc pariter justis gratia concedetur. Quod autem anima ipsius Christi ad Inferos descenderit, priusquam in cœlum ascenderet, ad exemplar minimè pertinet; nec enim Christus ad Inferos descendit, ut viam ad Inferos nobis ostenderet, vel ut ibi pararet nobis locum; sed ut animas ibi detentas liberaret, ac Infernum locum illum destrueret, ne Sanctorum animæ posthàc eò deducerentur.

O P P. ultimò. Beatitudo corporis differtur ad ultimum usque judicii diem: ergò & animæ felicitas.

R. maximum esse discrimen; tùm quòd anima scorsim à corpore sit capax beatitudinis; non ita corpus: tùm quòd anima concurret principaliter ad meritum; corpus autem solum ut instrumentum.

I N S T. Dæmones nondùm cruciantur; sed eorum pœna ad ultimum

usque judicium differtur : undè Mathæi 8. dicunt Christo , *Venisti hic ante tempus torquere nos ?* Et Lucæ 8. deprecantur eum , *ne imperaree illis , ut in abyssum irent.* Ergò de hominibus idem continget. Si autem improbi non sint ante generale judicium puniendi ; nec etiam ante tempus illud iusti sunt remunerandi.

R. quosdam è Sanctis Patribus in eâ opinione fuisse versatos , ut existimarent Dæmones ante iudicii diem gehennæ pœnâ non esse torquendos. S. Justinus Martyr in utrâque Apologiâ , non semel docet Dæmones igni sempiterno esse addicendos ; nondùm tamen addictos. S. Iren. lib. 5. advers. hæreses , ait Diabolum ante Christi adventum nunquam blasphemias evomuisse in Deum , quòd ignoraret adhuc suam damnationem ; sed à Christo , & ab Apostolis tandem didicisse , ignem æternum sibi esse paratum : quam opinionem ipse à Sancto Justino se accepisse significat S. Irenæus. S. etiam Epiphanius in hæresi Sethianorum asserit Dæmones non solum suam ignorasse damnationem ; sed & per adventum Christi suam sperasse salutem : verùm cum viderent nihil à Christo in sui gratiam fieri , tùm tandem de salute suâ desperasse , & per hæreticos Deum blasphemare cœpisse. Idem adhuc cum S. Justino censet Oecumen. in c. ult. 1. Pet. Verùm constat Dæmones pœnam damni simul & sensus perferre , & quòcumque volitent , ut loquitur Beda in Comm. cap. 3. Ep. S. Jacobi , eos ubique suam gehennam circumferre : quod & expresse runt , S. Aug. lib. 10. de corr. & grat. cap. 10. & S. Prosper lib. 1. de vitâ contemplativâ , ubi docent Dæmones jam esse condemnatos , ac infelices effectos. Interim fatemur multos Dæmones nondùm esse demersos in abyssum , sed in hoc aëre caliginoso versari , ad hominum exercitationem ; undè Apost. Ephes. 2. illos vocat hujus aëris principes : attamen illi omnes spiritus nequitiæ luunt jam gravissimas pœnas gehennæ. Cur autem tantoperè illam in abyssum detrusione averseantur , ratio est , quòd fraudes suas , simulque vires infirmas intelligent cognitum iri ; timeantque ne , ut à viris , foeminis , ac pueris superati , spectentur : vel etiam quòd ab ipsis hominibus sint judicandi , 1. Cor. 6.

Q. num Joannes XXII. Justos decedentes , quibus nihil purgandum superest , visione beatificâ frui statim post mortem censuerit ?

R. 1. illum Pontificatûs initio non recessisse à doctrinâ Clementis VI. an. 1276. quæ extat in Professione Fidei Cath. ad Paleologum Imperatorem , quam refert Raynaldus ad an. 1341. num. 43. his verbis : *Et prædicat sacrosancta Ecclesia &c.* Et infra : *illorum animas , qui post sacrum baptismum susceptum nullam omninò peccati maculam incurrerunt ; illas etiam , quæ post peccati contractam maculam , vel in suis manentes corporibus , vel iisdem exuta , sunt purgate , in cælum mox recipi.* Nam ipse Joannes XXII. an. 1318. in Profess. Fidei ad Assinium Regem Armenorum ; an. 1321. ad Episcopos Armenos , qui in Tartariâ versabantur ; an. 1323. ad Oroslum Regem Sarvir ; an. 1329. ad Tartarorum Imperatorem ; & an. 1330. ad Christianos , & incolas montium Dealbos , eadem verba transcripsit.

R. 2. Joan. 21. visionem intuitivam postmodum Sanctis negasse, solâ eis quâdam beatitudinis specie in cœlis concessâ; nec nisi post resurrectionem visione faciali, ut vocat, fore donandos censuisse. Ita in concionibus, quas refert Raynaldus ex Biblioth. Vaticanâ ad ann. 1331. quo quæstio hæc moveri cepit, num. 44. *Dominus Joannes*, inquit, ann. 1331. *in Festo omnium Sanctorum*, in sermone quem publicè fecit, qui incipit, *Memento operum Patrum, quæ fecerunt in generationibus suis, &c.* & in alio Serm. quem publicè fecit eodem ann. in *Dominicâ terciâ de Adventu*, qui incipit, *Gaudete in Domino semper, &c.* & in alio Serm. quem publicè fecit ann. Domini 1332. in *Vigiliâ Epiphaniæ*, qui incipit, *Surge tolle puerum, & matrem ejus.* Et infra, *Dogmatizatus est, quòd Sancti in cœlo non vident usque ad diem generalis Judicii & futuram corporum resurrectionem, faciem Dei, sive divinam essentiam; sed tantummodo vident, & videbunt usque ad futurum universale Judicium, humanitatem Christi.*

2. Qui ejus partibus adhærebant, pro eâ sententiâ stabant æcerimè, ut Gerardus Minoritarum Præfectus generalis, qui ad dissidia Regum Angliæ & Scotiæ componenda internuntius missus palàm sententiam, quæ nunc justis visionem beatificam negaret, Parisiis propugnavit; hincque rumor sparsus fuit Gerardum illum Parisios missum fuisse, qui hanc doctrinam doceret.

3. Qui justis mox visionem Dei concedi asseriebant, pessimè à Joanne, & ab illis, qui ei adhærebant, excipiebantur, ex Raynaldo ad eundem an. num. 48. inter eos fuit Durandus Meldensis Episcopus, celeberrimus, & antiquus Theologiæ Magister, qui opere scripto ab illâ sententiâ tanquam erroneâ Joannem avocare conatus fuit. Argumenta illius erant, quod juxta Zachar. c. 9. Christus in inferos descendisset, ut exinde, seu ex lacu victos in cœlum adduceret; idque præstitisset visionem divinam præbendo, quâ gratiâ solâ privabantur: unde inferebat, cum qui negaret Sanctis Dei visionem, Christi quoque ad inferos descensum negare. Addebat locum Zachariæ de amplificatâ tantum lætitiâ non posse intelligi; sic enim non ex vinculis, non ex laqueis fuissent liberati. Probabat 2. ex Christi verbis, Lucæ 23. ad Latronem, *Hodie mecum eris in Paradiso*, hæc scilicet de Christi corpore, quod in sepulchro per triduum fuit detentum, explicari non posse; proindeque de Divinitate, quam anima Latronis conspiceretur, esse intelligenda. Superiùs adducta loca urgebat etiam Durandus, & præsertim hæc Apostoli verba, *cupio dissolvi, &c.* quæ ad gratiæ certitudinem, quasi hîc de salute periclitaretur, detorqueretur iniquè; cum ex revelatione, gratiâ se privatum non iri, sciret Rom. 6. *Certus sum enim, quia neque mors, neque vita, &c.* Præcipuè verò generalem ritum urgebat, & auctoritatem Ecclesiæ, quæ de Apostolis palàm cantaret: *Dedit illi gloriam sempiternam*: non gloriam corporis, quam non habent; sed gloriam animæ, quæ in visione Dei posita est: cantaret quoque Martyres vitam beatam possidere, quæ in solâ eadem visione consistit; & concludit Durandus periculosum esse errorem, justorum animis gloriam post mortem negare.

Librum illum exceperunt pessimè Pontificii Aulici Avenione : igitur contrariæ sententiæ adhærebant. Imò & refert Raynald. ad eundem annum. 58. à Fidei Censore in jus vocatum fuisse Durandum , cui Regis Philippi autoritas nisi fuisset propugnaculo , à Joannis autoritate sibi timendum habuisset. Sic ex eâ Theologorum Pontificiorum adversus Durandum Meldensem , & alios ejusdem sententiæ viros contentione , palàm est , quo animo fuerit Joannes XXII.

4. idem constat ex ejus successore Benedicto XI. qui ann. 1335. ex Prothomæo Lucensi l. 24. c. 43. die Purificationis in concione publicâ dixit , *quod Sancti viderunt clarè essentiam Dei*, contra opinionem decessoris sui, qui de hoc dubium fecerat. Porro pridie nonas Februarii eos qui sui decessoris opinionem prædicaverant , advocavit , ut ea , quibus niterentur fundamenta , exponerent. De eâ quæstione Cardinalis librum examinandum eis tradidit.

R. 3. Non tamen definivisse Joannem XXII. justis post mortem Dei visionem ad resurrectionis tempus differri , & si quid doctrinæ Catholicæ contrarium illi exciderit , cum ante exitum hanc sententiam deposuisse.

Prob. quia ex Tom. 1. Actuum Sacræ Facultatis Theologiæ Parisiensis apud Seminarium Parisiense S. Sulpitii fol. 232. ad ann. 332. Rex Philippus coram Episcopis , Abbatibus , Regiæ stirpis Principibus , & aliis regni proceribus , sacram Facultatem Theologicam de quæstione propositâ , circa Dei visionem sententiam dicere in Castro Vincennatum , jussit. Inter Doctores autem sedebant Paludanus Patriarcha Hieros. & Petrus Rogerus Archiepisc. Rothomag. ejusdem Facultatis Magistri. Omnes i. unanimi consensu , significatâ suâ erga Sedem Apostolicam , & Joannem XXII. reverentiâ , Joannem XXII. circa hanc quæstionem nihil definivisse testificantur. 1. Justorum animas nunc visione beatificâ , seu post mortem , frui constituunt. 3. Alterâ Congregatione apud Mathurinenses , qui absuerant Magistri , statutum idem confirmant. *Placuit*, inquiunt , *vestra Regia Majestati nos Dominicâ quartâ Adventûs Domini , in vestro manerio in nemore de Vicennis ad sui præsentiam convocare ; nosque requirere , quod vellemus corporale juramentum præstare , quod super petendâ à vobis de statu animarum Beatarum corporibus exutarum , veritatem , quam sentiebamus , fideliter & absque palliationis cujuscumque velamine diceremus , assistentibus vestra Regia magnitudini excell. Principibus , & iisdem Archiepiscopis , Episcopis , & Abbatibus , duæ nobis propositæ fuerunt quæstiones. Prima , utrùm anima Sanctorum , in cælo existentes , videant divinam essentiam facie ad faciem , ante resurrectionem corporum , & ante Judicium generale. Secunda est , utrùm visio , quam de essentiâ divinâ nunc habent , evacuabitur in die Judicii , aliâ succedente.*

Attendentes specialiter id quod ore vestro ibidem audivimus , scilicet quòd nihil in hac materiâ quærebatis , quod tangere possit sanctissimum Patrem , ac Dominum nostrum , Dominum Joannem , divinâ providentiâ sacrosancta Ecclesia Romana & universalis Ecclesia Summum Pontificem , cujus devoti servi & filii sumus : quin imò , quod sicut filius ejus devotissimus , honorem suum in his & aliis concedebatis advertentes : quod

multorum fide dignorum relatione audivimus, quod quidquid in hac materia sanctitas sua dixit, non asserendo, seu opinando protulerit: sed solummodo recitando: considerantesque, quod, juxta Principis Apostolorum doctrinam, de eâ qua in nobis est fide & spe, parati esse debemus omni poscenti nos reddere rationem: sigillatim quod sentiebamus super petitis respondimus.

Sed omnes in hanc sententiam convenimus, quod à tempore mortis Domini nostri Jesu-Christi, per quam pretium redemptionis humani generis exitit persolutum, omnes anime Sanctorum Patrum, quas ibidem Salvator noster ad Inferos descendens eduxit de Limbo, ceterorumque Fidelium anime, quæ de corporibus exierunt, nihil habentes purgabile: vel quæ jam in Purgatorio sunt purgate, ad visionem nudam & claram, beatificam, intuitivam, & immediatam divina essentia, & benedictissima Trinitatis, Patris, & Filii, & Spiritûs sancti, quam Apostolus 1. ad Corinth. 15. nominat, visionem facie ad faciem, sunt assumpta, ipsæque Deitate beatâ perfectè fruuntur, & jam; quod crediderunt, videntes; quod speraverunt, tenentes; non in spe, sed in re sunt beata; quodque dicta visio, quam nunc habent, reumptis corporibus minimè evacuabitur, succedente aliâ; sed ipsa in eis, cum sit earum vita eterna, perpetuò remanebit.

Et quia Princeps inclite nos fecisti Parisiis congregari, ut illud, quod dixeramus, redigeremus in scriptis, nostris ibidem sigillis appensis: nolentes vestris jussionibus contrariare, presentes litteras sub appensione sigillorum nostrorum vestra excellentia duximus concedendas.

Predicta definitio à cæteris Magistris fuit approbata apud Mathurinenses, & eorundem subscriptione ac sigillo munita, ut à Rege ad Summum Pontificem mitteretur.

An. 1333. Rex transmisit decretum Sacre Facultatis ad Summum Pontificem cum litteris acerbis: nempe, nisi de tardâ visione, quam vulgaverat, opinionem revocaret, se eum igni traditurum: quæ verba in Concilio Ecclesia Gallicana an. 1406. super schismate Benedicti congregato non timuit repetere Petrus de Alliaco. Ita in iisdem Actis.

Acceptis his litteris Pontifex, agnitoque Regis animo, & Magistrorum Parisiensium decreto, rescripsit prædictam opinionem non eo se animo vulgasse, ut tanquam veram proponeret; sed ut quæstionem tantummodo Theologis agitandam: neque se ulli parti immobiliter, & determinatè adhæsisse.

Idem confirmat ad an. 1333. Raynaldus, asseritque Joannem, hortatum fuisse Cardinales, Episcopos, & Theologos, hanc quæstionem juxta Scripturas, & antiquos expendere, & ad Regem Philippum, & Reginam litteras scripsisse, in quibus negat se Geraldum Minoritarum Præfectum Generalem Parisios misisse, qui sententiam, quæ justis visionem Dei negat, doceret; sed ad Reges Angliæ & Scotiæ nuntium pro pace componendâ deputasse: perperam vulgari ipsum non esse in Theologiâ magistrum: non esse autem attendendum ad hominem, qui diceret;

sed ad dicta, quæ proferrentur: se nihil, nisi quod traditum erat pro utrâque sententiâ scripsisse. Rogat Regem, ne affirmantem sententiam jubeat tanquam solam veram prædicari; aliam verò ut hæreticam rejici: patiaturque per Magistros Theologiæ Parisiensis utramque sententiam agitari, donec Sedes Apostolica definiisset. Joannis opinio Theologis Parisiensibus videbatur hæretica: Eorum sententiæ Rex Christianissimus adhæsit.

Pontificem etiam movebant non leviter, data Ludovico Bavaro Imperatori, quem ut Imperii invasorem excommunicaverat, consilia de Synodo in Germaniæ partibus, contra ipsum, ut recentis hæresis reum, convocandâ. Periculum eò gravius imminabat, quòd Cardinales, & Episcopi non pauci has in partes Imperatoris autoritate incitarentur, & Joanni Papæ non mediocriter infensi; & quod Michael Casenas Minoritarum Præfectus Generalis, Ochamus, & Bonagràtia Minoritæ, ob quæstionem de bonorum, post emissum votum, proprietate, Ludovicum Imperatorem impellerent adversus Pontificem. Undè sibi timens Joannes, non modò fuit contestatus se nihil in sermonibus suis definiendo protulisse; sed quæstionem à Theologis movendam, ut magnâ sollicitudine indagaretur quid esset definiendum, proposuisse: & si quid fidei adversum excidisset, se illud revocare; imò & se pro sententiâ Parisiensium Theologorum stare.

An. 1334. dum morti esset proximus, ad eundem an. ex Raynaldo num. 28. in publico Cardinalium Consistorio, & adductis publicis Notariis, se nihil à fide devium unquam sensisse significavit: *Dicimus*, inquit, *& protestamur expresse, quod quidquid in quæstione, seu materiâ visionis animarum, videlicet, an anima à peccatis, & pænis peccatorum purgata videant divinam essentiam illâ visione, quam Apostolus vocat facialem; seu quâcumque aliâ materiâ in sermonibus, & collationibus nostris diximus, allegavimus, seu proposuimus, non intendentes aliquid determinare, vel decidere, seu credere, quod esset quovis modo Scriptura sacra obvium, vel contrarium fidei orthodoxæ.* Et addit revocate se quidquid excidere potuisset fidei contrarium. *Etsi forsan in prædictis sermonibus, vel collationibus aliqua, quæ vel Scriptura sacra, seu fidei orthodoxæ quovis modo essent, aut viderentur obvia, ipsa præter intentionem à nobis fuisse prolata dicimus, & asserimus, eaque revocamus expresse; non intendentes illis adherere, nec ea in præsentis defendere, nec etiam in futurum.*

Quod refert Bonagràtia Minorita in Bibliothecæ Vaticanæ manuscripto, scribit & Ptolomæus Lucens. lib. 24. c. 41. & addit curasse Joannem, ut in illo consistorio per quinque dies, quæ in utramque partem ex scripturis, & antiquis monumentis collecta fuerant, legerentur. Nec distitunt Nicolaus Minorita, & Ochamus in Dial. Tr. 2. c. 19. Idem quoque refert Joannes Villanus lib. 11. c. 19.

Hanc quæstionem ejus successor Benedictus II. definiit an. 1336. & quæ mox retulimus omnia confirmavit. Ad Philippum Franciæ Regem scribit se in Pontisfœgiæ Avenionensis castrum secessisse, ut de visione Dei

post mortem definiret, quid esset sentiendum. Tandem eodem an. in Decretali quæ incipit, *Benedictus Deus*, definiit animas sanctas, quibus nihil purgandum superesset, statim atque decessissent, Dei faciem videre & contrariam sententiam esse hæreticam constituit. Id patet ex Ptolomæo Lucensi, & ex manuscripto Vaticano apud Raynaldum ad ann. 1336. & ex Bullâ quæ extat in Bullario, in quâ testatur Benedictus Joannem decessorem suum ad illius quæstionis decisionem parasse se, & Cardinalibus, & Theologis injunxisse, ut ad sententiam suam dicendam se accingerent; ac morte præventum absolvere non potuisse quod in votis erat. Benedictus etiam ad confirmandam istam sententiam opus scripsit Egregium, ut habet Raynaldus.

OPP. ex Ochamo Joannem XXII. pertinaciter, etiam scripto, opinionem suam propugnasse.

R. Aliud constare ex superioribus: Ochamo verò Ludovici Baviaræ partibus addicto, & Papæ ita infenso, ut nihil non tentarit, quo Joannis famam proscinderet, fides potest non adhiberi; & eo potiori jure, quòd tot extant monumenta, ex quibus certò evincitur nihil à Joanne XXII. fuisse definitum. Addimus ex Ulrico Doctore Germano lib. 4. *Si sermo Papalis, Joannis XXII. piè & sanè intelligitur; non propriè sermo, nec definitio, nec determinatio, sed quedam Scholastica disputatio aptius esse perpenditur.* Libellum quidem ad Petrum Rothomag. Archiepisc. transmittit Joannes XXII. sed in eo nihil nisi plura Scripturæ & Patrum loca referuntur collecta, & scribit Raynaldus ad ann. 1333. num. 45. Joannem in Epist. ad Regem Philippum eâ ratione mentem suam exposuisse.

ARTICULUS SEPTIMUS.

Cujus naturæ & virtutis sit auxilium, seu gloriæ lumen eliciendæ beatificæ visioni necessarium.

NON diu immorabimur quæstioni isti, ut nec iis, quæ in scholis vulgò proponuntur; cum juxta Theologiæ principia tractari nequeant: eas solùm perstringemus.

CONCLUSIO I. Auxilium visioni beatificæ necessarium, à Theologis meritò gloriæ lumen nuncupatur.

1. Quia scriptura, Concilia, & ipsa ratio, sic appellandi fundamenta præbent Isa. 60. *Non erit tibi amplius sol ad lucendum per diem, nec splendor lune illuminabit te; sed erit tibi Dominus in lucem sempiternam.* Apoc. 22. v. 45. *Videbunt faciem ejus, & non egebunt lumine lucernæ, neque lumine solis; quia Dominus illuminabit eos, & regnabunt in sæcula sæculorum.*

2. Beguardos, & Beguinas, quòd illius luminis necessitatem negarent damnat Concilium Viennense.

3. Quod juvat ad eliciendam visionem, luminis nomine meritò insignitur: sicut enim Sol nonnisi mediante suo lumine oculis nostris sese videndum objicit, & præbet; ita cum à Beatis conspicitur Deus, lumine suo mentem perlustrat.

His Pl. 35. v. 10. verbis. *Quoniam apud te est fons vite, & in lumine tuo videbimus lumen.* Non utimur in luminis istius gratiam, quòd SS. Patres, quorum interpretationibus est inhærendum, procul dubio verba illa, non de illo auxilio, sed de ipso Dei verbo interpretentur, in quo videndus sit Pater. Sic Origen. lib. 1. de Princip. c. 1. SS. Aug. frequenter, & Cyrill. lib. 1. in Joan.

CONCLUSIO. II. Lumen illud ad suscipiendam visionem, instar dispositionis se habere, non videtur dicendum.

Prob. Quia dispositionis munia obiret, vel ut visionem beati reciperent, quæ à solo Deo produceretur, quod non admitti potest; sequeretur enim beatos non elicere visionem; de fide autem est, tam visionem intellectivam elici in cælis, quàm in terris visionem ænigmaticam 1. Cor. 13. v. 12. *Videmus nunc per speculum, & in ænigmate; tunc autem videbimus facie ad faciem.*

2. Vel dispositionis vices gereret, ut essentia divina beatorum intellectui sisteretur præsens; quod non præstat; nam essentia Dei ex se maximè præsens est: Vel ut Dei essentiam in se reciperent beati: non magis autem ad id qualitate disponente opus est, quàm cum ad fidei, spei, & charitatis actus gratiâ homo donatur; si enim cooperatio illa dispositionem quandam supernaturalem exigeret, illa pariter dispositio novam postularet, & sic in infinitum fieret processus.

Sed, inquires, necessaria sunt quædam accidentia, quæ ad formas naturales subjecta præparent: ergò à pari forma & actus supernaturales præexigunt quasdam dispositiones.

R. Substantiales formas prærequirere quidem dispositiones; non ita autem se habere formas accidentales, daretur enim in infinitum progressus; nec etiam accidentales formas supernaturales, v. c. fidem, charitatem, alias dispositiones supponere.

CONCLUSIO III. Intellectus virtutem essentialem non intendit lumen gloriæ; quia intensionis & remissionis incapax est intellectus, utpotè facultas substantialis & spiritalis.

CONCLUSIO IV. Gloriæ lumen intellectum juvat per modum qualitatis intrinsecæ, & habitus.

1. Quia, ut actus sit connaturalis, & constans, & suavis, cujusmodi est Dei visio, à principio intrinseco, & intrinsecè proportionato, facultatem per modum habitus juvante, proficisci debet.

2. Eiusdem naturæ est principium juvans beatorum facultates ad Deum assequendum, cujus principia, quæ viatoribus ad promerendam illam assecutionem sunt auxilio; hæc autem principia sunt qualitates, quæ per modum habitus viatorem juvant 1. Cor. 13. Charitas enim viæ, in pa-

triâ remanere dicitur. Equidem habitus naturalis & naturæ viribus comparatus, nonnisi agendi facilitatem dat facultati; dat autem insuper habitus supernaturalis ipsam agendi facultatem.

CONCLUSIO V. Non potest esse creaturæ intellectuâli connaturale lumen gloriæ, seu dari non potest creatura, quæ per se ipsam Deum videat, seu cui Dei visio intuitiva sit debita.

Prob. Non potest intellectuâli creaturæ concedi, quod creaturæ naturam destrueret, eamque divinitatis participem faceret, ut quam in eo statu constitueret, in quo peccare non posset, & in bono immobilis fieret: de ratione enim est intellectualis creaturæ, ut peccare possit ex S. Aug. lib. 4. de Trinitate capite 4. sic; *Quamquam magna natura est, vitiari tamen potuit; quia summa non est.* Enchir. c. 12. *Natura igitur omnes, quoniam naturarum prorsus omnium Conditor bonus est, bonæ sunt: idè in eis, & minui bonum, & augeri potest.* Igitur res creata peccare potest; quia summa esse non potest, nec est summè, aut immutabiliter bona. Si autem res quædam creata naturaliter Deum intuitivè videret, peccato non esset obnoxia: visio enim hæc peccatum omne excludit. Deindè quo pacto fieri posset, ut quis intuitivè Deum videat, & ullâ peccati oblectatione moveatur? quid enim suavius & præstantius summo bono? Nec enim in beatis superest liberum arbitrium, cujus usu peccare possint. Undè visio beatifica cum peccandi potestate nequit consistere. Quam doctrinam sic exponit S. Aug. l. 22. de Civit. cap. 30. ubi quærens cur indifferentiam primo homini Deus contulisset: *Servandi gradus erant divini muneris,* inquit, *ut primum daretur liberum arbitrium, quo peccare posset homo: novissimum, quo peccare non posset; atque illud ad comparandum meritum; hoc ad recipiendum præmium pertineret.* Sic visio beatifica, seu alterius vitæ status, qui justitiæ præmium est, in peccabilitatem infert. Sic & S. Ansel. lib. 20. *Cur Deus homo* c. 2. discipulo interroganti, cur Deus Angelos tales non fecerit, ut peccare non possent; respondet, quia non potuit, nec debuit facere, ut Deus essent. Ergò de naturâ solius Dei est, ut peccare non possit; ac proindè essentiam & naturam assequeretur divinam res creata, si ex se peccare non posset; cujusmodi esset, quæ connaturalem, & sibi debitam haberet Dei visionem. Aliundè benignitatem divinam dedeceret omnimodè, summo bono, seu visione beatificâ viros insones privare aliquandò.

O P P. Quâ ratione potest Deus creare accidens supernaturale, ut fidem, spem, charitatem; potest etiam creare supernaturalem, seu superioris ordinis substantiam, ex quâ supernaturalia emanabunt accidentia, quæ tunc illi creaturæ naturaliter inerunt.

R. Non exigere accidens supernaturale ejusdem cum Deo esse rationis; sed habere ordinem ad aliud, & pendere à subjectis quibus inest & in naturali esse subjecto: substantiam verò supernaturalem ejusdem cum Deo ordinis futuram esse, in quantum peccare omnino non posset; cum autem existendi rationem sequatur agendi ratio, si ita Deum creatura prospiceret, divinæ naturæ particeps esset.

INSTR. I. Accidentia supernaturalia, ut charitas, &c. Christo connaturalia erant; imò & visio Dei absolutissima. Ergò subjecto creato connaturalia esse possunt.

R. Ea connaturalia fuisse supposito quod Christus est; non verò humana, quam verbum assumpserat, naturæ, cui nec unio hypostatica, nec ulla debebantur supernaturalia accidentia.

INSTR. II. Intellectus, & luminis gloriæ virtus est finita; nec proinde redderet naturam peccati expertem, aut divinæ naturæ participem; quidquid autem finitum est, Deus potest creare.

R. Non posse Deum creare quidquid finitum est, si occurrat contradictio: nam licet creaturæ divino concursu adjunctæ operandi modus sit finitus, non potest tamen res creata concursu divino non egere. 2. Gloriæ lumen creaturam ad essentiæ divinæ participationem, indirectè saltem, eveheret, licet nec esset Deus formaliter, aut virtualiter, aut eminenter; quia nempe in hac entis ratione constitueret creaturam, quæ necessariam essentiæ divinæ participationem exigeret.

INSTR. III. Intellectus in infinitum in perfectione essentiali augeri potest: ergò eam perfectionem potest assequi, quâ fiat ipsi connaturale gloriæ lumen.

R. Argumentum illud fieri non posse, nisi in ordine naturæ debito: sic licet in infinitum animantium perfectiones augerentur, hominis perfectione nunquam donarentur.

ARTICULUS OCTAVUS.

An æqualis sit in Beatis visio intuitiva Dei?

JOVINIANUS, ex S. Hieron. lib. 2. contra eum, duos tantum ordines asseruit; ovium, & hircorum; seu justorum, & peccatorum; & nullam distantiam S. Joan. inter, & ultimum pœnitentem esse docuit. Ex Stoicorum dogmate, æqualia videlicet esse hominum merita, seu nullum occurrere discrimen inter hominum virtutes, ducebat originem hæc hæresis; cujus etiam incusatur Lutherus.

CONCLUSIO. Inæqualis est visio beatifica.

Prob. 1. Quod in ratione præmii, pro meritorum varietate rependitur, & à Deo promittitur eâ ratione conferendum, cum sint inæqualia hominum merita, datur inæqualiter. Ejusmodi est æterna gloria, Joan. 14. v. 2. *In domo Patris mei mansiones multe sunt.* 1. Cor. c. 8. *Unusquisque propriam, inquit Apostolus, mercedem accipiet, secundum suum laborem.* Et cap. 15. v. 31. *Alia claritas solis, alia claritas lune, & alia claritas stellarum: stella enim à stellâ differt in claritate, sic & resurrectio mortuorum.* Et in 2. Epist. ad Cor. c. 9. v. 6. *Qui parçet seminas, parçet & metet: & qui seminas in benedictionibus, id est abundè, de benedictionibus & metet.* Ergo si mansionum cœlestium sit varietas; si cuique pro laboris diversitate, diversa merces sit rependenda; si resurrectio

Quo mortuorum ad diversitatis, quæ in stellis occurrit, similitudinem accedat; si etiam pro varietate seminis jacti varius colligendus sit fructus, procul dubio varia futura est æterna merces.

2. Si pro variis criminibus varia damnatis infliguntur supplicia. Sap. 6. v. 7. *Potentes potenter tormenta patientur*, & v. 9. *Fortioribus fortior instat cruciatio*. Apoc. 18. v. 7. *Quantum glorificavit se, & in deliciis fuit, tantum date illi tormentum, & luctum*. Potiori jure, ampliori præmio donabuntur, qui præstantioribus virtutibus præditi fuerint.

Eadem veritas perpetuo traditionis consensu nititur. Ecclesiæ Smyrnenſis Episcopus S. Polycarpus gravissima tormenta minitanti Tyranno dixisse refertur: *Merita mea doloris æstimatione pensabo, quantum graviora pertulero, tanto premia majora percipiam*: Hæcque veritas ita fidelibus erat persuasa, ut sibi congratularentur, cum graviora perferenda sibi imminerent supplicia.

S. Justinus, Josue, Christi figuram fuisse in Dialogo probans, ipsum Josue omnibus æquas partes non tribuisse dicit, sic nec à Christo partem aut eandem bonorum divisionem esse expectandam.

S. Irenæus lib. 1. c. 72. *Quantò autem honorabilius, tantò magis diligimus illud: & si plus illud dilexerimus, clariores erimus apud Deum*; & lib. 3. eodem fundamento nixus gloriæ mensuram ex charitate repetit. Sic S. Clemens Alex. lib. 4. Strom.

Tertullianus in Scorpiaco, veritatem hanc in Scripturis fundatam supponit c. 6. *Aut quomodo, inquit, multe mansiones apud Patrem, si non pro varietate meritorum? quomodo & stella à stellâ distabit in gloriâ, nisi pro diversitate radiorum*. Porro & si fidei propterea congruebat sublimitatis & claritatis aliqua prolatio, tale quid esse oportuerat illud emolumenti, quod magno constaret labore, cruciatu, tormento, morte.

Origenes Hom. 1. in Num. Apostoli autoritate idem confirmat, & S. Hilar. in Pl. 64. S. Ambr. lib. 1. de Offic. c. 48. S. Chrysostom. Hom. 41. in 1. ad Cor. S. etiam Hieron. lib. 20. contra Jovinian. hanc sententiam autoritatibus Scripturæ suprâ citatis probat; & veritatem, quæ ab antiquo in Ecclesiâ vigeat, contra hunc hæreticum pluribus asserit. S. Aug. in libro de Sanctâ Virginitate c. 14. Tract. 67. in Joann. & lib. 22. de Civit. cap. 30. de hac veritate nec ambigendum esse docet, & alibi sæpius.

Ecclesia Occidentalis 4. sæculo contra Jovinianum; Concilium Florentinum ex consensu utriusque Ecclesiæ in litteris unionis; & Tridentinum Sess. 6. Can. 32. dogma quod propugnamus, constituunt.

O P P. Math. 20. v. 9. Idem denarius, quo felicitas æterna designatur, operariis rependitur, inæqualis licet fuerit eorum labor. Et certè status illius tranquillitatem perturbaret hæc inæqualitas; hinc enim invidia oriretur.

R. Denario illo significari quidem eandem beatitudinem objectivam, seu Deum possidendum in æternum: Non verò exprimi felicitatem futuram secundum gradum & intensiorem. In eo est scopus para-

bolæ, ut demonstretur non haberi rationem in felicitate æternâ Justis retribuendâ, eorum qui prius, aut posterius ad fidem vocati sunt; cum futurum sit, ut primi sint novissimi, & novissimi primi.

Addi etiam potest ex sensu parabolico argumentum firmum etui non posse: nec parabolæ istius partes omnes statui Beatorum adaptandas esse, quales sunt expostulationes istæ v. 10. *Venientes autem & primi, arbitrati sunt quod plus essent accepturi; acceperunt autem & ipsi singulos denarios; & accipientes murmurabant adversus Patrem-familias, dicentes: Hi novissimi unâ horâ fecerunt, & pares illos nobis fecisti, qui portavimus pondus diei & æstus.* Litteralis sensus parabolæ est, iniquo animo Judæos ferre, quod sibi gentes æquarentur, & vocationis divinæ fierent participes: de benignitate Patris supremi aliud esse sentiendum, quosunque cujuslibet Gentis in donorum partem quolibet tempore, etiam ultimo, vocare. Unde respondet pater-familias se non facere injuriam dando quod fuerat pollicitus v. 15. *Aut non licet mihi quod volo facere? an oculus tuus nequam est, quia ego bonus sum? sic erunt novissimi primi, & primi novissimi. Multi enim sunt vocati, pauci verò electi.* Seu non modo Judæis qui legis jugum ab initio sustinuerant, seu dici pondus portaverant, sed & gentilibus horâ undecimâ vocatis denarium eundem, seu vitam æternam concessum iri.

Nec proinde colligendum est, mercedem eandem inæquali merito concedi: desertur enim merces, non juxta temporis, sed juxta laboris mensuram, quæ ducitur ex charitatis amplitudine. Ea verò in vocatis etiam sub vitæ finem adæquat, vel superat quandoque longè antea vocatorum charitatem: cujusmodi fuit latronis, cui datum fuit à Christo pœnitentiæ sinceræ donum, & æternæ vitæ desiderium: cujusmodi fuerunt alii martyrio repentino donati: undè Sap. 4. dicitur, *consummatus in brevi explevit tempora multa.*

Ad confirmationem R. statûs illius tranquillitati nullomodo hanc inæqualitatem officere, ut exponit S. Aug. lib. 22. de Civit. c. 30. *Qui futuri sine premiorum etiam gradus, honorum, atque gloriarum, quis est idoneus cogitare, quantum magis dicere? quod tamen futuri sint, non est ambigendum: atque id etiam beata civitas illa magnum in se videbit, quod nulli superiori ullus inferior invidet: sicut nunc non invidet Archangelis, Angeli ceteri: nollet esse unusquisque quod non accepit, quamvis sit peccatissimo concordie vinculo ei, qui accepit, obstrictus: sicut nec in corpore vult oculus esse, qui est digitus; cum membrum utrumque contineat totius carnis pacata compago.* S. etiam Greg. Magn. l. 35. Moral. c. 25. *Æqualis est; nec major appetitur; quia tantum quis capit, quantum cupiat; quantum quisque sitit, tantum bibit: inæqualis, quia, qui plus bibit, plus sitit: æqualis tamen plenitudo, quia æqualis est omnium saturitas: corporeis cibis æquè distenti, saturati sunt; quia, etsi plus alii aliis comederint, omnes tamen æquè exsaturati fuerint.* Hæc utrâque comparatione illustratur penitus visionis beatificæ æqualitas, & inæqualitas.

IN S T. Ubi æqualia sunt merita, æqualis est etiam merces; Justorum

merita sunt æqualia; cum merita Christi ipsis applicentur æqualiter, utpote quæ sint indivisibilia, & spiritualia.

R. Non applicari merita Christi formaliter, seu justitiam Christi non esse justorum justitiam; sed tantum applicari moraliter; seu meritis Christi fieri, ut infundatur nobis gratia, per quam justi sumus: hæc autem gratia ex beneplacito Dei & inæqualis est, & ei non continuo & æqualiter cooperamur, etiamsi æqualis quandoque sit.

CONCLUSIO II. Ex gloriæ luminis majori aut minori participatione, visionis beatificæ æqualitas, aut inæqualitas oritur.

Prob. Ut enim se habet circa viatorem concessa charitas respectu actus charitatis elicit; ita se habet lumen gloriæ, quod ex ampliori, aut minori charitate oritur, respectu intellectus videntis. Atqui actus charitatis amplitudo ex majori, aut minori infusâ charitate oritur: actus enim supernaturalis perfectio ex principio naturali originem non ducit. 2. Si ex alio capite, quàm ex lumine gloriæ repeti posset visionis beatificæ inæqualitas, maximè ex variâ intellectus videntis perfectione: sed ad visionis æqualitatem, aut inæqualitatem nihil confert ex se intellectus, prout est potentia naturalis; utpote naturalis ordinis; nec prout est potentia obedientialis; cum potentia illa in Angelis & hominibus sit æqualis: nihil enim aliud est quàm facultas quædam, quæ est ejus naturæ, ut Dei auxilio ad actus supernaturales reddi possit idonea.

Denique nisi hinc oriretur visionis inæqualitas, non esset ratio æqualitatis, quæ inter Angelorum & hominum beatitudinem occurrit; aut cur etiam longè amplior sit, & magis intensa visio beatifica quorundam hominum, ut B. Virginis, câ visione, quâ donantur Angeli.

O P P. Viatoris intellectus perspicacior æquali fidei habitu instructus, magis intensum fidei actum elicit, quàm obtusior: sic licet intellectus sit mera obedientialis potentia respectu luminis gloriæ, præstantiorem nihilominus visionem eliciet, si sit perfectior.

R. Hæc esse certa de veritatis propositæ apprehensione naturali; non verò de assensu supernaturali: imò idiotarum longè major sæpius fides est, seu assensus supernaturalis; licet quæ ad fidem proponuntur, non, ut viri eruditi, & perspicacis ingenii, apprehendant.

I N S T. Intellectus acutior videt clariùs, si lumen gloriæ non modò juvet intellectum, sed etiam ipsum acumen intellectus: at lumen gloriæ juvat acumen intellectus; quia perfectionem naturalem perficit.

R. Acumen intellectus, licet juvetur, non confertur ad intensionem visionis; utpote quòd visio sit supra naturam: sed nec augetur acumen intellectus; quia id pertinet tantum ad actiones naturales, non ad supernaturales.

CONCLUSIO III. Visio beatifica mutationi, aut successioni obnoxia non est.

1. quia Beatorum facultas eodem semper modo afficitur, nempe lumine gloriæ; & medium semper idem est, in quo vident, scilicet essentia Dei, quæ eorum menti immotam se sistit: aliundè beatitudo nec variari,

nec mutari potest, cujusmodi est visio beatifica. S. Aug. lib. 25. de Trin. c. 16. *Fortassis, inquit, volubiles non erunt nostra cogitationes, ab aliis in aliis euntes, atque redeuntes; sed omnem scientiam nostram uno simul conspectu videbimus.* Lib. 12. Confess. c. 13. ait intellectum beatum *nosse simul, non ex parte, non in enigmate, non per speculum; sed ex toto in manifestatâ facie ad faciem; non modò hoc, modò illud; sed quod dictum est, nosse simul sine ullâ vicissitudine temporum.* Et proinde semper eodem modo, & sine mutatione.

O P P. Eadem non est semper visio beatifica; novâ enim visione vident Beati, quæ antea perspecta sibi non erant; sic recens productos homines, & ad se directas orationes novo intuitu intuentur.

R. Videre quidem eos de novo pluriâ in verbo causaliter, aut per revelationes recentes; non verò novâ visione formaliter, & quæ ad beatitudinis statum pertineat.

CONCLUSIO IV. Eiusdem speciei sunt visiones beatificæ, tum Angelorum, tum hominum.

1. Quia occurrit idem objectum, nempe Deus: & principia formalia ejusdem speciei, lumen nempe gloriæ; & intellectus, prout elevatus, seu potentia obedientialis. Deinde nili Angelorum & hominum visiones beatificæ ejusdem speciei essent, Angelicæ visionis perfectionem non possent assequi homines: Angelicæ autem visioni humana non modò æquatur, sed aliquandò etiam præstat, ut mox notatum est de Beatæ Virginis visione.

O P P. Specie distinguuntur ii vitales actus, quorum principia vitalia specie distinguuntur; inde enim visionem corpoream inter, & spiritalem oritur discrimen: Intellectus autem Angelicus, & humanus specie distinguuntur. Ergò, &c.

Responderi posset intellectum Angelicum, & humanum specie non distingui; intellectus enim animæ separata agit independentè à sensibus instar Angelici: sed aliundè intellectus illi spectati, ut potentia obedientialis, nullatenus specie distinguuntur; non enim differunt inter se potentia obedientiales, licet naturales potentia distinguantur; quia potentia obedientialis nihil aliud est, quam res ipsa, prout omnipotentia subjiciuntur, quæ illis utitur, cum eas pro arbitrio agit.

ARTICULUS NONUS.

Visionis beatificæ latitudo.

CONCLUSIO I. Fidei mysteria, quorum fidem in terris habuerunt, clarè intuentur beati: non tamen res omnes supernaturales, saltem quoad adjuncta singula.

1. Ex scripturâ locis art. 1. & 2. relatis Math. 5. *Beati mundo corde, &c.* Joan. 14. 2. 1. Joan. 3. *Cum apparueris, &c.* Undè S. Aug.

lib. 10. de Civit. cap. 21. *Quid videbimus? quid nisi Deum, ut impleatur in nobis promissum Evangelicum, beati mundo corde, quoniam ipsi Deum videbunt; & omnia illa, quæ nunc non videmus, credentes autem pro modulo capacitatis humana, longè minus quàm sunt, atque incomprehensibiliter cogitamus; & videbitis, inquit, & gaudebit cor vestrum: hæc creditis, ibi videbitis.* Quòd autem non cognoscant omnia, & quoad omnia adjuncta, patet ex eo quòd quærant Angeli Isai. 61. *Quis est iste qui ascendit de Bosra?* à semetipsis quærebant quæ ad Incarnationis mysterium spectarent; nec noverunt Sancti, quo die iudicium postremum futurum sit, licet futurum esse crediderint.

CONCLUSIO II. Dei attributa absoluta omnia, & notionalia, seu quæ sunt in Deo formaliter, vident beati.

Prob. 1. Ex iisdem Scripturæ locis, præsertim 1. Joan. 3. v. 2. *Videbimus eum sicuti est*: qui autem non videret quæ sunt in Deo formaliter, non videret Deum sicuti est; eum enim aliquid lateret; non videret, quid Deus est; quia non videret quæcumque in Deo sunt.

2. Ex 1. Cor. 3. *Fidei succedit visio. Videmus nunc per speculum, & in enigmate; tunc autem facie ad faciem.* Nunc quæ essentiam & attributa tum absoluta, tum notionalia spectant, credimus: Ergò clarè tunc ea intuebimur.

3. Ex Joan. 14. v. 9. *Qui videt me, videt & Patrem.* Qui videt ergò unam personam, videt & aliam: & ut habet S. Aug. lib. 1. de Trin. c. 8. *Sive ergò audiamus, ostende nobis Filium: sive audiamus, ostende nobis Patrem, tantum valet; quia neuter sine altero potest ostendi; unum quippe sunt.*

S. Greg. Magn. lib. 4. Dial. cap. 34. *Quid est quod non videns, qui videntem omnia vident.* Undè Concilium Florentinum, in decreto unionis sub finem, à beatis clarè conspici Deum unum & trinum definit. 2. cum videtur clarè aliqua natura, videntur ea quæ ipsi naturaliter inexistunt; personæ autem divinæ, tum attributa absoluta, Deo realiter inexistunt, & identificantur. 3. imperfectissima foret Dei cognitio, nisi sub ratione absolutâ, & relativâ spectaretur; seu sub omni ratione, quâ videri potest, & quâ est.

CONCLUSIO III. Naturalem rerum ordinem, & quæ in terris geruntur simulque facta sunt, vident beati, & videre possunt.

Prob. quia hinc Basil. lib. de verâ Virginitate, Virginem hortatur, ut Dei & Angelorum timeat conspectum, & Sanctorum. *Ipsas Angelorum infinitas multitudines, & unâ Sanctorum Patrum beatissimos, Spiritus: nullus enim ex iis est, qui non singula ubique consideret; etsi autem oculis carneis minime conspiciuntur, incorporeis tamen obtutibus ad cognitionem complectuntur omnia, & comprehendunt.* S. August. lib. 4. de Gen. ad Litt. c. 24. *Angeli procul dubio universam creaturam in quâ ipsi sunt principaliter conditi, in ipso Verbo Dei prius noverunt, in quo sunt; omnium etiam, quæ temporaliter facta sunt, æterna rationes, tanquam in eo per quod facta sunt omnia, ac deinde in ipsâ creaturâ.* Sanct.

Greg. Magn. in Hom. 40. in Evang. *Qui creatoris sui claritatem vident, nihil in creaturâ agitur, quod videre non possint.*

2. Fieri non potest, quin naturæ ordinem perspectum habere Sancti desiderent, prout divinæ potentia res creatæ subjacent, non prout voluntati subsunt divinæ: & eorum votis annuit Deus procul dubio; alioquin felicitati eorum aliquid deesset, nec eis fieret satis.

CONCLUSIO IV. Vident quoque beati præterita, & quæ ad sui, & suorum statum pertinent.

Sanctus Ambrosius in Oratione funebri de Theodosio, docet Theodosium Arcadii & Honorii Filiorum tutelam in cælis esse suscepturum. *Theodosius plenus timoris Dei, plenus misericordia, speramus, quod liberis suis apud Christum presul assistat, si Dominus propitius sit rebus humanis.* Et Oratione funebri de Valentiniano, ita de Gratiano fratrem suum complectente disserit. *Quas ille nunc manus ad te Pater erigit? quas pro fratre preces fundit? quo ei inhæres amplexu? quemadmodum sibi eum non patitur avelli? adest etiam Pater, qui militiam sub Juliano, & tribunatus honores fidei amore contempsit.*

S. August. Epist. 125. Cornelio, ut eum scortis deditum ad meliorem frugem adducat, mortuos esse viventium memores exemplo divitis damnati confirmat; *Quantiò magis tua conjux te recordatur? quantiò magis te casta non vult ad pœnas venire mæchorum?* Et lib. de curâ pro mortuis, eandem veritatem constantem supponit cap. 16. expendens quibus rationibus negotia nostra mortuis sanctis innotescant, ipsis perspecta esse nostra probat, quod invocantibus beneficia conferant. Sic S. Felix, cum obsidione cingeretur Nola, Nolanis se conspiciendum præbuit; fatetur autem naturali cognitione res nostras ipsis non esse cognitæ, sed tantum supernaturali; quæ vel in verbo, vel per revelationem, vel per Angelos internuncios, vel aliâ occultâ ratione perspiciuntur.

S. Gregor. Mag. lib. 12. Moral. cap. 17. *An aliquid nesciant, qui scientem omnia sciunt? an fratres suos periclitantes non videant, non curent? an qui Deum toti, & totum sapiant, cum Deus charitas sit, charitatis exortes sint? an nostra non satagant, cum Deus sataget? nostri obliviam non bibunt, quamvis Deum bibant; bibunt enim charitatem, & misericordiam.* Hinc Concilium Senonense in decretis Fidei cap. 13. *Beatis pervium est omniforme illud divinitatis speculum, in quo quidquid illorum intersit, illucescit.*

Videntur opponi posse, quæ Job c. 14. v. 21. habentur de mortuis: *Sive, inquit, nobiles fuerint filii ejus, sive ignobiles, non intelliget.* Ecclef. 9. v. 5. *Viventes sciunt se morituros; mortui autem nihil noverrunt amplius.* Isaiæ 64. v. 16. *Abraham nescivit nos.* 4. Reg. cap. 22. v. 20. *Præmatura mors, ut summum beneficium, piissimo Regi Josiæ promittitur, ne imminetium malorum spectator esset.* S. August. lib. de curâ pro mortuis c. 13. ait, ignorate mortuos quæ in terris fiunt; & idè ad se non accessisse matrem suam sanctam Monicam.

Sed hæc, vel pertinent ad singula omnia quæ hîc geruntur, quæ

quidem non norunt mortui; vel ad naturalem notitiã hæc sunt referenda: & S. Greg. lib. 12. Moral. cap. 14. de Sanctis ait loqui Jobum; & sic ea non spectant ad eam supernaturalem cognoscendi rationem, quam eis tribuimus. S. August. dubitanter primò scribit: undè præmittit, *ut voles accipias quisquis quod diceret*: sed cap. 16. de curâ pro mortuis, ut observatum est, hanc in beatis cognitionem, ut certam, supponit, & quâ ratione illam assequantur, inquit.

CONCLUSIO V. Se invicem, & suos noscunt Beati.

Tertul. lib. de Monogamiâ cap. 10. ita de futuro statu scribit: *In eo magis tenebimur, reddere scilicet amicis rationem, quia in meliorem statum destinamur, resurrecturi in spiritale consortium, agniture tam nosmetipsos, quam & nostros.*

S. Cyprian. lib. de mortalitate in fine, his rationibus utitur, ut à mortis timore avocet, horteturque ad impendenda fratribus, dum grassaretur pestis, auxilia. *Magnus illic nos charorum numerus expectat, parentum, fratrum, filiorum, frequens nos, & copiosa turba desiderat, jam de suâ immortalitate secura, & adhuc de nostrâ salute sollicita, ad horum conspectum & complexum venire, quanta & illis, & nobis in commune letitia est?*

S. Amb. in orat. funebri de Valentiniano, obviam venisse Valentiniano Gratianum fratrem asserit, eumque esse complexum, & in destinatam mansionem adduxisse. *Tunc nihil latebit proximum in proximo, nec eris quod suis quisque aperiat, abscondat alienis, ubi nullus erit alienus; lux ipsa, qua illuminabit hominem, Deus ipse est.*

CONCLUSIO VI. Damnatorum quoque pœnas Beati vident, ex Isaïæ 66. v. 24. *Egredientur, & videbunt cadavera virorum, qui prevaricati sunt in me; vermis eorum non exstinguetur.* Ad Beatorum lætitiã amplificandam conferet, & ad novos in Deum amoris stimulos excitandos improborum ordinationis, & misericordiæ sibi concessæ conspectus.

CONCLUSIO VII. Non perspectam habent Sancti divinarum perfectionum infinitatem; seu totaliter Deum non intuentur; nec rationi, quâ Deus cognosci potest, saltem à seipso, Beatorum cognitio adæquatur; licet quæ sunt in Deo formaliter, intuitivè videant: Deum enim comprehenderent, quod suprà confutatum est; & sic videtur quidem infinitas Dei, sed non infinitâ ratione.

CONCLUSIO VIII. Nec vident Beati futura omnia, nec omnia singularia determinatè; quia, ut docet S. August. Deus est speculum voluntarium; & proinde, cum res creatæ in Deo velut in speculo voluntario videantur, Beatorum menti, ut omnium causa, sistitur divina essentia, & in eâ necessariò vident Beati, quæ hæc necessariò exhibet; liberè verò, quæ liberè repræsentat: nihil autem necessarium in Deo menti objicitur, quàm quod sit omnipotens; non quod determinatè hæc aut illa producat; cum hæc ex liberâ penitus voluntate pendeant.

CONCLUSIO IX. Possibilia videre omnia non possunt Beati.

1. Quia alioquin Dei omnipotentiam comprehenderent, & proindè essentiam divinam; cum omnipotentia Dei Deus sit. 2. Creatori composita quælibet creatura, licet perfectionis magnæ sit, ad divinam perfectionem nunquam accedere potest; & proindè, cum non totum illud sit, quod Deus est, nec etiam totum Deum videt, aut totaliter. 3. Infinitum sibi soli patet, & quod totum videtur, à vidente finitur, ut jam probatum est ex S. August. Epist. 112. cap. 9. *Aliud est videre, aliud est totum videndo comprehendere; quandoquidem id videtur, quod præsens utcumque sentitur; totum autem comprehenditur videndo, quod ita videtur, ut nihil ejus lateat videntem.* Hinc non posse videri omnipotentiam Dei totaliter palàm est; quia comprehenderetur. Et ex Epist. 118. *Cum autem, inquit, & nos in tantum Deum visuri sumus, in quantum ei similes fuerimus; cumque ad perfectam cum Deo similitudinem nunquam evehi possimus; nec etiam ad perfectum illius, seu attributorum ejus conspectum, seu comprehensionem.*

Nec optant Beati possibilem, aut singularium notitiam, nec illius cognitionis defectu aliquid eorum beatitudini deest: solus enim Dei conspectus beatitudinem constituit. Undè S. August. lib. 5. Confess. c. 4. *Infelix homo, qui scit illa omnia (scilicet creaturas) se autem nescit; Beatus autem, qui se scit, etiamsi illa nesciat; qui verò & te, & illa novit, non propter illa beatior est: sed propter te solum beatus.*

O P P. Licet Beati omnia futura, & possiblem viderent, essentiam tamen divinam non comprehenderent; quia visio hæc non tam perfecta foret, quàm sit ea, quæ Deus visibilis est: res enim à variis secundum varias sui habitudines dignosci potest: sic stellæ aliter à navis gubernatore, aliter à rustico, aliter ab astronomo spectantur.

R. Si Beati hæc omnia perspecta haberent, Deum comprehenderent; quia non potest res videri tota & totaliter, quin à vidente terminis circumscribatur, & velut exhaustiatur ejus visibilitas; nec enim ad comprehensionem necesse est absolute, ut tam perfecte res videatur, quàm visibilis sit: nihil enim homo, aut Angelus comprehendere possent; cum quæ ab ipsis cognoscuntur longè perfectiori ratione divinæ menti comperta sint: sufficit ergò ad comprehensionem ita rem videri, ut rem visam videntis cognitio saltem adæquet; exempla verò quæ adducuntur, comprehensivam cognitionem non inducunt.

I N S T. Deus solus plus habet entitatis, & dignitatis, & intelligibilitatis, quàm possiblem omnia. Ad videnda ergò possiblem, non major requiritur virtus, quàm ad Deum videndum.

R. Omnia possiblem extra essentiam divinam spectata, seu extrinsecè sumpta & terminativè, minoris quidem entitatis esse, quàm Deum ipsum; non verò entitativè considerata, & prout sunt in Deo; quia & ipsum Deum dicunt, & omnia quæ Deus complectitur; seu Dei omnipotentiam, quæ ab essentiâ divinâ indistincta est.

I N S T. 2. Licet viderentur res omnes creatæ possiblem; non tamen viderentur omnes respectus distincti, quos dicit omnipotentia ad eas omnes

omnes; quia res creatæ sunt quid Deo extrinsecum: potest autem, quod est extrinsecum videri, non viso intrinseco.

R. Non posse videri creaturas possibiles distinctè, quin cognoscantur omnes respectus, quos dicunt ad Deum; non potest enim cognosci unum relatum, quin cognoscatur & aliud; cum relata sint simul naturæ, & cognitione; inter creaturam autem, & creatorem est relatio. Porro cum videtur omnipotentia intuitivè, videntur illi respectus in communi, non verò determinatè, & distinctè: comprehenderetur enim Dei omnipotentia; videretur enim tota, & totaliter, & eâ perfectione, quâ visibilis est.

I N S T. 3. Posset quis videre omnia possibilia determinatè, nec tamen comprehenderet eorum perfectionem intensivè; sicut nunc videmus quædam determinatè, nec tamen comprehendimus eorum essentias.

R. Non posse quemquam videre creaturas omnes possibiles determinatè, quin eorum perfectionem intensivè comprehendat; quia creaturam possibilem omnium perfectissimam cognosceret: illa autem erit intelligens, & proinde posset habere cognitionem omnium perfectissimam, quæ creata esset & possibilis; cognitio autem ejusmodi esset perfectio summa creaturarum possibilium. Ergo si creaturæ possibiles viderentur intuitivè, viderentur & extensivè, & intensivè.

C O N C L. U L T. Essentia divina sine attributis; attributa sine se invicem videri non possunt, vel per absolutam Dei potentiam.

Prob. 1. Joan. 14. v. 19. *Philippe, qui videt me, videt & Patrem, non creditis quia ego in Patre, & Pater in me est?* Christus hanc consequentiam innuit: ego sum in Patre, & Pater in me est: ergo qui videt me, videt & Patrem; quæ illatio non esset æqua, si posset Filius sicut est in se videri, non viso Patre. Hinc S. August. lib. 1. de Trin. cap. 8. *Sive audiamus, ostende nobis Filium; sive audiamus, ostende nobis Patrem, tantumdem valet: quia neuter sine altero potest ostendi: unum quippe sunt, sicut & ipse ait, ego & Pater unum sumus: denique propter ipsam inseparabilitatem sufficienter aliquando nominatur vel Pater solus, vel Filius solus adimpletur nos lætitiâ cum vultu suo; nec inde separatur utriusque spiritus, id est Pater, & Filii spiritus. . . aliquando ita loquitur (Christus) de Spiritu Sancto, tanquam solus ipse sufficiat ad beatitudinem nostram: & ideo solus sufficit; quia separari à Filio non potest: sicut Pater solus sufficit; quia separari à Filio, & Spiritu Sancto non potest; & Filius ideo sufficit solus, quia separari à Patre, & Spiritu Sancto non potest. Et in Psal. 85. in hæc Joan. Nescitis quia ego in Patre, & Pater in me est: id est, inquit, & me viso videtur & Pater, & Patre viso videtur & Filius; Patri & Filii separari non potest visio: ubi non unius separatur natura & substantia, viso separari non potest.*

2. Quod est simplicissimum, nec realem distinctionem involvit, intuitivè videri non potest, seu ut est in se, quin totum videatur: hujusmodi autem est essentia divina. Si quid ergo essentia divinæ perfectum non esset, intuitivè videretur Deus ex hypothesi; & non videretur; quia

quod lateret, Deus esset; quidquid enim est in Deo, Deus est; aut certè abstractivè, seu confusè aspiceretur; cum hoc sit inter abstractivam, seu confusam aut obscuram visionem, & intuitivam discrimen, quod res tota per priorem non videatur, sed tantùm secundùm aliquid sui.

O P P. Quæ possunt communicari sine se invicem, potiori jure videri possunt sine se invicem: communicatur autem Filio essentia Patris, non communicatà Paternitate: communicatur naturæ humanæ Filii Persona, non communicatis Personalitatibus aliis. Ergò, &c.

R. Longè aliam rationem esse communicationis in divinis, aliam visionis; una enim Persona communicare potest alteri essentiam, Personalitate non communicatà; quia de ratione Personæ est, ut sit alteri Personæ incommunicabilis; cum ei relativè opponatur: suo enim opposito relativa communicari non possunt, & in quantum opponuntur, distincta remanere debent. In visione verò intuitivâ est necesse, si unum ex relativè oppositis cognoscatur ut est in se, alterum etiam cognosci. Ea enim est natura relativè oppositorum, ut unum non possit distinctè cognosci sine alio. Quod etiam certius constabit, si, quæ relativè opponuntur, eidem essentix identificantur, sicut Personæ divinæ identificantur essentix divinæ: ideo potuit una Persona humanam induere carnem, alterâ illam non induente; non verò potest videri una Persona, alterâ non visâ. Nam de ratione conjunctionis non est, ut quod unitur, conjungatur adæquatè, seu secundum omnem modum; de ratione verò intuitivæ visionis est, ut tota objecti natura videatur.

I N S T. 1. Ideò potest communicari natura divina Filio, non communicatà Paternitate, quia natura divina, & Paternitas distinguuntur virtualiter. Igitur à fortiori poterit natura divina videri absque Paternitate; quia scilicet, si distinctio virtualis sufficiat ad attributa contradictionis intrinsecæ, cujusmodi sunt communicari & non communicari; sufficiet ad prædicata extrinsecæ, videri & non videri.

R. Aliundè implicare essentiam divinam videri intuitivè absque Paternitate; videretur enim intuitivè, & non videretur: hinc reperenda est disparitas.

I N S T. 2. De ratione cognitionis intuitivæ non est, ut objecti nihil lateat; satis enim est, quod videatur objectum præsens. Sic intuitivè videt colorem oculus, nec tamen videt attributa essentialia coloris, seu relationes, quas dicit color ad varia objecta.

R. Et illud excedere vires oculi; cum enim oculus nonnisi in visibile feratur, non videt rationes, quæ visibiles non sunt: attributa autem notionalia sunt intra limites objecti intellectûs, sicut & essentia Dei.

I N S T. 3. Quod est absolutum, non intellecto relativo intelligi potest. At essentia divina absoluta est. Ergò videri potest absque personis, quæ essentialia ei non sunt; cum non conceptis Personis divinis Dei existentiam animo complectamur.

R. Esto, id verum sit in creatis, in quibus absolutum forsàn non est idem cum relativo, & absolutum, & relativum se invicem non inclu-

dunt : At non ita in divinis ; cum absolutum, & relativum sint una & simplicissima entitas.

I N S T. ultimò : ubi est diversa ratio visibilitatis , unum videri potest absque alio ; sed attributa inter , & essentiam , diversa ratio visibilitatis est ; cum sit etiam distinctio virtualis, & diversa intelligibilitas essentiae , alia Personarum divinarum , alia misericordiae , alia iustitiae.

R. Distinctionem, & variam intelligibilitatem , quae inter attributa & essentiam occurrit , non ex essentia divinâ repetendam esse , sed ex humanae mentis infirmitate , ut superius fuit probatum. Unde fit, ut cum imperfectâ cognitione Deum assequimur , varias has intelligibilitates & visibilitates deprehendamus ; non verò cum intuitivè divinam essentiam intueri datum fuerit.

Q. Quotuplex sit Beatorum visio ?

R. 1. Beatitudinis statu naturalem cognitionem non excludi : quae enim beatis advenit perfectio , naturalem facultatem non destruit , sed perficit.

R. 2. Beatorum visionem aliam esse essentialem , accidentalem alteram : per primam , quae in Deo sunt formaliter intuentur , & constituuntur beati ; per alteram plurima de novo cognoscunt , velut preces ad se directas , quae cognitio non ad intrinsecam beatitudinis rationem , sed ejus tantum excellentiam pertinet.

R. 3. cum S. Aug. lib. 5. de Gen. ad Litt. c. 18. esse cognitiones duas ; unam scilicet matutinam , quâ in verbo spectantur creaturae ; & aliam vespertinam , per quam res creatae in seipsis perspiciuntur : hanc autem notitiam alterâ esse imperfectiorem docet ipse S. Aug. l. 11. de Civit. c. 7. his verbis : *Cognitio creaturae in seipsâ decoloratio est , ut ita dicam , quàm cum in Dei sapientiâ cognoscitur , velut in arte quâ facta est.*

ARTICULUS ULTIMUS.

In quo quae vident Beati intueantur ?

V A R I A S quæstiones proponunt Theologi 1. num quae conspiciunt Beati , per speciem quamdam impressam inspiciant ? 2. Num speciem quamdam expressam , ubi visionis actus elicitus est , in intellectu suo forment. Ex illis alii species illas rejiciunt , distinguuntque visionem duplicem ; essentialem nempe , & accidentalem : quae ad beatitudinem spectant essentialem , in essentia Dei : quae verò beatitudini sunt accidentaria , in creaturis , aut per revelationem , aut per hominum , aut Angelorum relationem percipi contendunt.

Ut autem variarum illarum opinionum origo , & fundamenta intelligantur , supponendum 1. cum Philosophis , & Theologis , visionem non fieri , nisi cum res in vidente constituitur ; rem autem corpoream in vidente per seipsam esse non posse , sed tantum per sui similitudinem ; & proinde non dari corporeae rei conspectum , quin ejusdem rei simili-

tudo in vidente reponatur, Necessitatem similitudinis ducunt, quòd nulla rem corpoream inter, & spiritalem sit proportio: & proinde non possit asserunt inter utramque conjunctionem fieri, nisi per medium aliquo modo spirituale; & proinde cum objectum corporeum per semetipsum spirituali facultati non possit adherere, aut coniungi; similitudinem ejus, seu speciem asserunt esse necessariam, quæ ab eo ad facultatem transeat, aut aliundè proficiscatur. Hinc inferunt ad visionem beatificam emanare necessariò à Deo similitudinem, quâ intellectus ad videndum Deum fiat idoneus. Nulla, inquit, inter Deum, & creaturam intelligentem est proportio; cum Deus sit suum esse, creatura verò natura participata; proindeque necesse est, ut quædam similitudo à Deo profecta ipsum clarè exhibeat facultati: hanc autem similitudinem vocant speciem impressam intelligibilem, aut medium quo. Duo addunt alia, scilicet medium sub quo, seu lumen quo juvatur intellectus, ac medium illustratur, ut visio fiat; & speciem expressam; quia supponunt omnis actionis dari aliquem terminum, volitionis v. g. terminum, seu pondus, quo voluntas in suum objectum fertur; intellectus verò terminum, seu speciem expressam, quæ rem intellectam intellectui sistit & objicit. Cum enim nihil aliud, inquit, intellectio sit, quàm rei intellectæ representatio; hinc illius actionis terminus, nihil aliud censerì potest, quàm rei ejusdem imago permanens, seu medium, quo res quæ fuit aliquandò conspecta, iterùm menti exhibeatur. De medio sub quo, quod lumen est gloriæ, nulla hic movetur quæstio.

Ex Philosophorum principiis ad Theologium translata videtur quæstio. Cum enim ex Philosophis plurimi hanc de visione, & intellectione ideam, quâ ratione mox exposuimus, sibi in mentem induxerint, illis Philosophiæ principiis imbuti Theologi, quæ de naturali cognitione & intellectione à Philosophis hauserant, supernaturali intellectioni esse tribuenda censuerunt. Qui ergò principia illa Philosophica negaret, rem citò conficeret; nec solida forsàn deessent argumenta, quibus penitus utramque speciem rejiceret. Licet enim cognitionis rationem seu modum, quo fiat, assequi non posset, quam assequi profectò difficillimum est, satis esset, si illius sententiæ fundamenta convelleret: sed etiam si de principiis illis conveniret, nihil inde ad definiendum supernaturalis intellectioneis modum inferri posse jure meritò disputaret. Quid enim est simile inter ordinis naturalis & supernaturalis actiones? Ab hujusmodi ergò quæstionibus, qui abstinere, solidis rationibus inniteretur. Non abstinēbimus tamen; quia in scholis moveri illa solent. Titubare licet videri possint principia, ex quibus ducuntur; constantia tamen, & vera à nobis hic supponentur, & illis positjs, quid hæc in parte probabilius statui possit, expendemus.

CONCLUSIO I. Ut inutiles prorsus, imò & impossibiles à visione beatificâ species impressas, & expressas mox explicatas removeri oportet.

Prob. I. Tunc enim inutilis species impressa habetur, cum objectum

ita præsens est, ut præstet, & conficiat quidquid species illa intelligibilis præstaret respectu intellectûs beatifici. At huiusmodi est divina essentia; constituit enim intellectum intelligentem, ipsum quodammodo informat, & ad hanc actûs speciem determinat, scilicet ad sui conspectum.

Inutilis est quoque species expressa; non enim alius in visione beatificâ datur terminus ab ipso Deo; vident quippè Beati Deum immediate.

Non modò utraque species inutilis videtur; sed etiam impossibilis; quia ex S. August. lib. 5. de Trin. cap. 9. Similitudo creata Dei speculum est, & ænigma; & ex S. Dionys. cap. 1. de divinis nominibus; Per similitudines inferioris ordinis non potest cognosci res superioris ordinis; species autem impressa, & expressa Dei, quælibet sit, creata, & inferioris ordinis erit.

2. Si per speciem impressam, aut expressam Deus intuitivè videri supponatur, necesse est ut quælibet Deum in se repræsentet; sicque rationes Dei objectivas formaliter, aut eminenter contineat; nihil enim aliquid, ut est in se, repræsentare potest, nisi huiusmodi sit: nihil autem creatum est, quod rationes Dei objectivas formaliter, aut eminenter in se contineat; quia ejusdem naturæ cum Deo, & perfectionis esse nequit: Deus enim est suum esse, & infinitè perfectus; creatura autem nec suum esse potest, necnon determinatur ad aliquod esse; & proinde non potest continere formaliter perfectiones Dei, nec etiam eminenter; quia esset Deo perfectior.

3. Quæ cognitio per speciem paritur, immaterialis quodammodò habetur: undè sensus dicitur specierum sine materiâ perceptivus, instar coræ, quæ figuram ferri sine ferro recipit. Et ex Aristotele, sensus supra sensibile positus non facit sensationem, quòd talis conjunctio nimis materialis sit; & quò perfectior est sensus, eò perfectiores species suscipit. Dari autem non possunt rerum spiritualium species: cujusnam enim naturæ essent? vel enim immateriales essent, vel materiales: posterius in mentem venire non potest: nec etiam prius; ad quid enim rei immaterialis esset immaterialis species? Quæ igitur sunt spiritualia, facultati per semetipsa conjunguntur. Et certè quomodo Dei infinitè immaterialis daretur species quædam immaterialis, seu ejusdem immaterialitatis? Per seipsum ergò Deus intellectui conjungitur.

Deindè cum objecta sensibilia per species percipi dicuntur, supra sensum eminet ratio de speciebus judicium ferens; proinde si rerum spiritualium intelligibiles imagines darentur, supra rationem admittenda esset facultas quædam, quæ de illis judicaret: nulla autem esse potest ejusmodi: igitur fictitiæ illæ penitus sunt species intelligibiles. Ad quid enim conferrent? An ut intelligibilia intima sint menti? An ut semper adsint? At illis speciebus intermediis non opus est, ut id præstetur.

Ult. Tanta Dei majestas est, & infinitas, ut nulla præter ipsum ejus similitudo esse possit, nisi valdè deformis: Deum ergò exhibere species creata non poterit. Quis enim visâ umbrâ lucem videre poterit? species quippè rem tantum oculis subjicit, in quibus similis est. Sic Re-

gis imago lineamenta sola Regis vultûs, & corporis figuram exhibet; nec nos in essentia ejus cognitionem, & animi affectum adducit. Unde si ad perfectam Dei similitudinem non accedat Dei, ut in se est, species, Deum nunquam repræsentabit. Sanè autem solum Dei verbum id præstare potest; quia solum est perfecta Dei similitudo: nec fieri potest, quin species quælibet creata longè inferioris sit ordinis, ac essentia divina: ab inferioribus autem quæ sunt superiora imperfectè tantummodò continentur: hinc in ænigmate videntur, quæ superiora oculis subjiciuntur. E contrario quæ sunt inferioris ordinis in superioribus perfectiori modo conspiciuntur. Insuper si Deus per speciem creatam videretur, creatura esse posset hominis beatitudo, scilicet species illa: quod propugnari non potest.

O P P. 1. ex S. August. lib. 9. de Trin. cap. 11. *Habet animus nonnullam speciei notæ similitudinem, sive cum ea placet, sive cum ejus privatio displicet. Quocirca in quantum Deum novimus, similes sumus: sed non ad æqualitatem similes; quia nec tantum eum novimus, quantum ipse se. Et quemadmodum cum per sensum corporis discimus corpora, fit eorum aliqua similitudo in animo nostro, qua phantasia memoria est: ita cum Deum novimus fitque aliqua Dei similitudo illa notitia: tamen inferior est; quia in inferiore naturâ est. Ergo cum Deum novimus, fit aliqua in nobis Dei similitudo, seu species expressa. Item lib. 14. cap. 17. Hinc apparet tunc in istâ imagine Dei fieri ejus plenam similitudinem, quando ejus plenam perceperit visionem. Et lib. 11. cap. 16. Quando videbimus eum sicuti est tunc quidem verbum nostrum non erit falsum.*

R. S. August. cap. 11. lib. 9. de Trin. similitudinem illam à cognitione non distinguere, & per similitudinem nihil aliud intelligere, quàm ipsam cognitionem, prout conformis est objecto. *Habet notitia similitudinem ad eam rem, quam novit. Et cap. sequenti: Omnis res, quancumque cognoscimus, congenerat in nobis notitiam sui; & per speciem, quam in Dei visione occurrere ostendit, nihil aliud intelligit, quam ipsum Deum visum. Item lib. 2. de Trin. cap. 17. Ipsa est species, cui contemplanda suspirat omnis, qui affectat Deum diligere ex toto corde, &c. Illa est ergo species, qua rapit omnem animam rationalem desiderio sui tantò ardentior, tantò mundior; & tantò mundior, tantò ad spiritualia resurgentem; tantò autem ad spiritualia resurgentem, quanto à carnalibus morientem. Hinc cognitio Dei dicitur in nobis aliqua similitudo Dei; non quòd quædam sit in nobis species, seu qualitas, quæ Deum nobis repræsentet; sed quòd mens nostra Deum intuens ipsi Deo futura sit quodammodo similis: videbit enim Deum sicuti est. 1. Joan. 3. v. 2. Et illius similitudinis causam, non verbi, aut speciei productionem, sed immediatam visionem affert. Cum apparuerit, videbimus eum sicuti est. Erit quædam etiam similitudo inter Deum, & hominem beatum; quòd futura sit similitudinis relatio Deum inter, & hominem beatum, seu inter beatitudinem hominis, & huma-*

nitatem Christi: erit ergò relatio extrinseca, quâ Deo denominabimur similes; sed non erit qualitas Deum repræsentans. Cum etiam S. Aug. de Verbo loquitur, nihil aliud per Verbum intelligit, quàm intellectiōnem universim sumptam, quæ tunc futura non est falsa, nec errori obnoxia; cum Deus, ut in se est, videndus sit.

O P P. 2. Omnis actio debet habere aliquem terminum; & proinde visio Dei intuitiva: illius autem terminus est species expressa, sicut datur terminus amoris beatifici.

R. actionem producere terminum, si terminus possit produci; sed non producere, cum terminum dari implicat: speciem autem illam impossibilem demonstravimus. Præterea actio vel terminum producit, vel productum supponit: nam intellectio in Verbo, & Spiritu Sancto est actio, quæ tamen terminum non producit, sed productum supponit. Amor verò beatificus terminum producit; quia amoris impulsus ejusdem naturæ, & perfectionis cum re amatâ esse non exigit: intellectiōnis autem terminus objecto assimilari postulat.

I N S T. 1. Datur Dei similitudo creata, scilicet actio, quâ Deus attingitur, quæque Deum repræsentat.

R. actionem, quâ Deus attingitur, non esse Dei repræsentativam in se; sed terminativè tantum, quatenus scilicet in objectum, seu Deum terminatur.

I N S T. 2. Non est necesse ut species, quæ repræsentat objectum, sit ejusdem ordinis cum objecto. Sic Angelus inferior cognoscit superiorem Angelum, non per speciem ejusdem ordinis.

R. Si per speciem illum cognosceret ut est in se, species illa esset ejusdem ordinis cum Angelo; Angelus enim inferior secundum aliquid per speciem videret superiorem; quia Angelus superior, & inferior sunt in eodem materiæ metaphysicæ ordine, seu pariter compositi ex genere, & differentiâ.

I N S T. 3. Conjunctum ex intellectu, & lumine gloriæ repræsentat Deum; & tamen non est ejusdem perfectionis cum Deo.

R. tale conjunctum repræsentare Deum efficienter, non formaliter; seu conjungere intellectum hominis cum Deo: nec enim causa, præsertim instrumentalis, continet perfectionem effectûs, quem producit.

I N S T. 4. Quod determinatur extrinsecè ab aliquo, non est ejusdem perfectionis cum illo. Sic v. c. potentiæ non sunt ejusdem ordinis cum suis objectis; quia extrinsecè determinantur ab illis. Species pariter extrinsecus determinantur ab illis objectis, quæ repræsentant: ergò non exigunt esse ejusdem ordinis cum objecto.

R. non eam esse rationem potentiarum, quæ specierum; quia potentiæ versantur circa objecta agendo; species verò repræsentando. Licet etiam causæ determinantur extrinsecè ab effectibus, qui sunt extra causam; non tamen desinunt causæ suos effectus continere aut formaliter, aut efficienter.

C O N C L U S I O II. Quæ ad beatitudinem spectant, vident formaliter Beati in Deo, seu in Verbo; quæ verò ad beatitudinem non spe-

stant, vident in ipsis creaturis, vel per revelationem, aut per Angelorum, & hominum relationem, aut in ipsâ essentiâ divinâ, ut in causâ.

Utraque pars sit perspecta ex art. 9. & ex S. Aug. lib. 13. Confess. cap. 15. ubi de beatis Angelis ita disserit: *Qui non opus habent suscipere firmamentum hoc, & legendo cognoscere verbum tuum: vident enim faciem tuam semper, & ibi legunt sine sillabis temporum, quid velie aeterna voluntas tua.* Et postea: *Non clauditur codex eorum, nec plucatur liber eorum, quia tu ipse illis hoc es, & es in aeternum.* Lib. 9. de Civit. cap. 22. ait errare Dæmones sæpius, non verò Angelos; quia hi rerum mutabilium & temporalium principales causas in verbo Dei conspiciunt, per quod factus est mundus; & omnia divini Spiritûs ejus participatione cognoscunt.

2. S. Bernard. lib. 5. de Confid. cap. 1. *Videt beatus Verbum, & in Verbo facta per Verbum; nec opus habet ex his, quæ facta sunt, factoris notitiam mendicare; neque enim, ut vel ipsa (quæ scilicet facta sunt) noverit, ad ipsa descendit, quæ ibi (in Verbo nimirum) illa videt, ubi longè melius sunt, quàm in seipsis.* Et sic essentia divina medium est, in quo quæ ad sui statum spectant, conspiciunt Beati: cætera verò etiam per media designata in ipsorum notitiam veniant.

QUÆSTIO NONA.

De Dei ineffabilitate.

ARTICULUS UNICUS.

Utrum Deus sit ineffabilis? quibus potissimum delineandæ Dei nature nominibus uti sit conveniens?

DIVINAM Dei naturam proprio designari posse nomine proprium gnabant Eunomius, ejusque sectatores; cum divinam naturam à viatore comprehendere posse contenderent, ut observatum est. Imò aiebant ingeniti nomen totam Dei naturam complecti: illudque à naturâ hominum animis esse insertum, ut videre est apud SS. Basil. lib. 1. contra Eunom. Greg. Naz. Orat. 34. & Greg. Nyss. Orat. 12.

CONCLUSIO I. Deus est ineffabilis, nec verba illa Deo digna proferuntur, seu quæ ejus naturam exprimant.

Prob. 1. ex rationibus quæst. 3. art. 1. adductis; ibi enim demonstratum est imperviam penitus esse hominum animis naturæ divinæ essentiam, & quidditatem; seu impares penitus esse homines, qui dignoscant, quid sit Deus. Undè forsàn quæstioni huic immorandum non esset: Si enim constat ab hominibus non posse cognosci quid sit Deus; inferendum necessariò superest, nec ab iis dici posse, quid sit Deus.

Addemus

Addemus pauca, ut ab antiquis discamus quâ ratione de Deo à nobis sermo haberi possit.

Primò, igitur Minutius Felix in Octav. docet omnia nomina Deo indita esse figurata, eaque ex rebus creatis petita. Nec, inquit, *nomen Dei quæras, Deus nomen est: Illic vocabulis opus est, cum per singulos propriis appellationum insignibus multitudo dirimenda est. Deo, qui solus est, Dei vocabulum totum est, quem si Patrem dixeris, terrenum opineris; si Regem, carnalem suspiceris; si Dominum, intelligesque mortalem.* Similia reperies apud S. Cyprianum Tract. de Idolorum vanitate.

Secundò, S. Clem. Alex. libro 5. Strom. ita loquitur: *Et si aliquando cum nominemus, non propriè vocantes, ut unum, aut bonum, aut mentem, aut ipsum id quod est, aut Patrem, aut Deum, aut Creatorem, aut Dominum; non id dicimus tanquam nomen ejus proferentes; sed propter ipsius potestatem pulchris utimur nominibus, ut in aliis non aberrans, his inniti possit cogitatio; non enim unumquodque ex his Deum significat; sed omnia simul omnipotentis indicant potentiam.* Eandem rationem affert Novat. lib. de Trin. c. 2. & Arnob. lib. 3. contra Gentes..

3. S. Greg. Nyss. l. 9. & 12. c. Eunom. fusè probat ex beneficiis, quibus nos Deus cumulatur, seu ex Dei operibus, Dei nomina repeteri; sicque hæc, non divinæ naturæ designationes esse, sed cogitationum nostrarum imagines; nec, quæ effectui solent nomina, Deo competere ab æterno posse: & ità ex peccatorum hypothese illum misericordem dici. Addit insuper Deum, ut se attemperet infirmitati, matris instar balbutire, necnon humana verba mutuari, ut quæ ad naturam suam spectant, nos edoceat. Quibus & aliis rationibus Eunomium confutat, qui Dei nomina nobis concreata fuisse dicebat.

Quartò, Sanctus Gregorius Naz. Orat. 1. & S. Greg. Nyss. lib. 12. in Eunom. allèverant non docere Scripturas quid sit Deus, sed vocabula quædam tradere velut notas, quibus à creaturis Deus secernatur.

Aliud etiam monet S. Aug. lib. 2. ad Simplic. quæst. 2. Indigna scilicet Deo esse, sed infirmitati nostræ accommodata pleraque, quæ in Scripturis de Deo habentur. Hinc, inquit, dicitur pœnitere, irasci: quæ licet ipsis hominibus vitio dentur, tamen cum Deo tribuuntur, ab iis imperfectio quolibet amoveatur. Sic cum dicitur pœnitere, perpetuum & tranquillum quoddam æquitatis iudicium, quo Deus cuncta mutabilia incommutabili voluntate disponit, intelligendum est; ne illa quæ placent, sic intelligantur in Deo, quomodo consueverunt in hominibus intelligi: per hæc enim quæ displicent, cum ea non audeamus sic intelligere in Deo, ut inveniuntur in homine, discimus etiam illa sic quærere, quæ apta esse, & convenientia putabamus. Lib. quoque 15. de Civit. c. 25. ait, hæc verba, licet imperfectiōnem includant, adhibere Scripturam, ut se familiarius insinuet omni generi hominum, quibus vult esse consultum, ut, & perterreat superbientes, & excitet negligentes, & exerceat quærentes, & aliat intelligentes: quod non faceret, si non se prius inclinaret, & quo tammodo descenderet ad jacentes. Addit lib. 1. de Doctr. Christ. cap. 6. nihil Deo dignum usurpari; nec etiam cum ineffabilis

dicitur : *Ac per hoc*, inquit, *ne ineffabilis quidem dicendus est Deus ; quia & hoc cum dicitur, aliquid dicitur.* Monet idè lib. 1. de Trin. cap. 1. parè de Deo esse loquendum, ne in errorem pluribus communem incidamus. Cum & videri volunt scire quod nesciunt, & quod volunt scire non possunt, præsumptiones opinionum suarum audacius affirmando, intercludunt sibi intelligentiæ vias, magis eligentes sententiam suam non corrigere perversam, quàm mutare defensam. Docuerat prius Orig. Hom. 1. in Ezech. acceptam à quodam sapiente sententiam, loqui nimirum de Deo periculosum esse. *Confiteor libenter à sapiente, & fideli viro dictam sententiam, quam sapè suscipio: De Deo & verè dicere periculum est.* Neque enim ea tantùm periculosa sunt, quæ falsa de Deo dicuntur : Sed etiam quæ vera sunt, & non oportune proferuntur, dicenti periculum generant. Vox ergò nulla est, quæ essentia divinae amplitudinem adæquet, & eminentissimi principii naturam menti subiciat. Quare summâ cautione adhibitâ, de Deo sermo est habendus.

CONCLUSIO II. Deus appellari nihilominus potest nominibus, quæ imperfectè ejus naturam, & substantiam designent, ut quæ in Scripturis continentur.

1. Quia probatum habet Deus humanæ vocis obsequium. Undè Orig. lib. 6. contra Cels. qui Christianis vitio vertebat, quòd nomina propria Deo tribui posse contenderent, sic scribit : *Si enim eo sensu intelligitur, nihil ut in dictionibus, aut rebus significatis positum, Dei proprietates exprimere possit, verè illud est dictum, &c. sin ita nominari posse accipis, quatenus possimus nominibus quidpiam, quod ad Deum pertinet, exhibere, ut auditorem velut manu deducat, & de Deo nonnulla cogitare faciat, qualia potest natura hominis consequi nihil absurdi est, si nominabilem esse illum dicamus.* Deo tributa vocabula Deum denotant; seu ejus ad opera habitudinem; seu quamdam Dei perfectionem, ut omnipotentiam; seu ejus in creaturas influxum, ut cum dicitur creator, justificans, &c.

2. Nomina illa imperfectiones à Deo remouent. Sic dicitur invisibilis, immensus, infinitus, incorporeus, &c. Quinetiam perfectiones eminentiori longè ratione in Deo esse, quàm in hominibus, significant, ut cum dicitur bonus, &c.

Nomen, *Deus*, designat non tantùm operationes Dei, sed ipsum Deum has operationes elicientem, ut docent S. Justin. & S. Athanas. qui ait nomen, *Deus*, non significare aliquid, quod sit circa Dei substantiam; sed ipsam Dei substantiam: alioqui, cum Filius Dei ex Deo dicitur, diceretur ex aliquo, quod non esset Deus. S. etiam Aug. lib. 1. de Doctrinâ Christ. c. 6. sic habet. *Omnes, inquit, Latina lingua scios, cum aurem eorum sonus iste, Deus, retigeris, movet ad cogitandam excellentissimam quamdam, immortalemque naturam.*

Nomen *אֱלֹהִים יְהוָה*, qui est, ipsam Dei substantiam significat; illud enim ens denotat, quod semper est, & quod solum est semper existens. Ex S. Aug. lib. 2. de Trin. c. 1. & lib. 7. cap. 4. & 5. nomen essentia Deo propriè tribuitur, non verò nomen substantia, quòd à substando

substantia dicta sit, seu à sustentandis accidentibus. Undè si Deus aliquo nomine possit appellari, illo maximè donandus, quod sibi ipsi imposuit: Nullum autem aptius videtur vocabulum eo, *qui est*; quod tamen, quâ ratione Deo perfectiones insint, non delineat.

Cum nomina Deo imposita Dei substantiam designare diximus, nihil aliud indicare volumus, quàm nomina illa Dei substantiam significare ratione subjecti, aut ratione modi cuiusdam, ut cum dicitur omnipotens, æternus; sed non ratione modi totalis.

Plures sunt qui nomen Dei, substantiæ nomen esse negant, ut inter alios S. Chrysost. Hom. 2. in Epist. ad Hebr. sed illi nihil aliud volunt quàm nomen, *Deus*, divinam substantiam non ita significare, ut omnem Dei naturam menti nostræ exhibeat.

Nec nomina, *ingenitus*, *Dominus*, Dei substantiam exprimunt ex SS. Basil. lib. 1. & 4. contra Eunom. Greg. Naz. Orat. 34. & Greg. Nyss. lib. 12. contra Eunom. 1. Nomen quippè illud, *Ingenitus*, negativum est; & se habet respectu Dei, ut *Invisibilis*, *immortalis*, &c. quæ non dicunt quid sit Deus, sed quid non sit; nomen enim, *Ingenitus*, Deum non esse à causâ significat. 2. Si quid positivum denotet, non substantiam indicat, sed existendi modum; nec enim, qui istius vocabuli, *Ingenitus*, amplitudinem comprehenderet, divinam essentiam proindè cogitatione suâ assequeretur; neque nomen illud à naturâ insertum est, cum in omnium animis non occurrat. Utrumque autem disputabat Eunom.

Quæres quod nomen illud sit, quod Deus antiquos celarat, & Moyse Exod. 3. revelare dignatus est.

R. S. Greg. Naz. Orat. 36. nomen Tetragrammaton esse, seu *Jehova*, quod Hebræi singulatibus scribere solebant litteris; cum enim ab omni creaturarum commercio alienus longè sit Deus, hinc characteribus, quos in aliis nominibus exscribendis adhibebant, non utebantur. Idè ineffabile dicebatur nomen illud: vel etiam quod propter reverentiam à vulgo non legeretur: vel quod ejus loco nomen Adonai substitui sole-ret, ut à 70. vel quod propria ejus pronuntiatio ignoraretur: vel quod significaretur nomine quatuor litterarum. Nomen autem illud censent Rabbini Deo ita esse proprium, ut ejus substantiam citra ambiguitatem exprimat: Nomen verò Adonai, dicere Dominum, ut interpretantur Septuaginta.

Sed quia nomen illud *Jehova* quod Exod. 3. occurrit, etiam Gen. 2. c. 14. & 22. reperitur, oritur difficultas, quomodò nempe verum sit antiquis non indicasse Deum, quod nomen Moyse declaravit. Respondet Theodor. quæst. 5. in Exod. nomen quidem illud *Jehova* antiquis non indicatum fuisse, sed illud à Moyse Gen. Scriptore insertum fuisse, quod idem est cum nomine illo, *qui est*, Exod. 3. Sic censuerat antea Clem. Alex. lib. 5. Strom. Nomen, *qui est*, dicitur Exod. 3. Eheuch, quod infrequentissimum est, & ter aut quater dicitur tantum occurrere. S. Hieronym. Epist. ad Marcellam decem Dei nomina refert, & ait nomen Tetragrammaton pro ineffabili haberi: Et Euseb. lib. 11. de Prep. c. 4.

& 8. scribit Dei nomen esse ineffabile; sed quodnam sit illud, non definit; addit verò & Deum vocabulo Elohim ab Hebræis nuncupari.

His autem legibus seu terminis coercenda est imponendorum Deo nominum libertas. 1. ne à terminis, quos scriptura præscribit, recedamus, ut monuit S. August. lib. 1. de Doctr. Christ. 2. verbis abstractis sæpiùs utamur, sic Deus dicendus potiùs justitia, veritas, quàm justus; & verus: aptiora enim longè magis abstracta sunt, quàm concreta, quod rem à seipsâ indistinctam significant, & concreta semper innuant compositum ex subjecto, & perfectione.

QUÆSTIO DECIMA.

De bonitate Dei.

ARTICULUS UNICUS.

Utrum Deus sit infinite, & essentialiter bonus, solus simul, & omnes omnino perfectiones contineat?

POTEST aliquid duplici ratione perfectum dici. 1. Quoad se, seu absolutè, ita ut eorum, quæ ad ejus perfectionem requiri possunt, nihil desideretur. 2. Ad alia, seu relativè, ita ut in aliorum perfectionem & bonum plurimùm conferat.

CONCLUSIO I. Deus est infinite & essentialiter bonus in se, & solus, & eâ ratione summè bonus.

Prob. 1. Quia solum bonum, & perfectum esse Deum Christus docet Math. 5. v. 48. *Estote vos perfecti, sicut & Pater vester cælestis perfectus est.* Luc. 18. v. 19. *Nemo bonus, nisi solus Deus.* Porro nec Deus esset, nisi summè bonus esset, & perfectissimus ex S. Aug. lib. de verâ Rel. c. 18. Et verò Deus mutationi non est obnoxius, & proindè nullum ei bonum detrahi, neque de novo accedere potest: ejus autem naturæ non sunt creaturæ, cum & perfectiones novas acquirere, & priores amittere possint. Item lib. de Morib. Ecclesiæ cap. 11. infinitam Dei perfectionem infert, quod nullum bonum detur superius Deo.

2. Quod est suum esse subsistens, non potest quin sit per essentiam bonum, eique omnia bona essentialiter conveniant. Deus autem solus suum est esse, ut quæst. 4. probavimus: hinc intensivè perfectissimus dicitur, quòd amplioris perfectionis bona non possit assequi: perfectissimus etiam est extensivè, quòd nulla in creaturis perfectio occurrat, quæ Deo non insit. Alia ejus idea esse non potest, ut ostendimus quæst. 1. art. 1. & 2.

Quia ergò hæc veritas aperta est, subjiciemus quæ in Deo indè sequuntur; ut quòd nec nobis, nec nostris facultatibus, nec ipsis hominibus

egat ullo modo; Psal. quippè 15. v. 2. *Dixi Domino, Deus meus es tu, quoniam meorum bonorum non egas.* Et ex S. Iren. lib. 4. c. 24. Quia omne est bonum, & semper idem, nobis bona largitur, nihil sibi à nobis postulat, & nihil injungit, quod nostris commodis non prosit; Deus quidem perfectus in omnibus, ipsi sibi equalis, & similis, totus cum sit lumen, & totus mens, & totus substantia, & fons omnium bonorum, homo verè perfectum percipiens, & augmentum à Deo. Quemadmodum enim Deus semper idem est, sic & homo in Deo intentus semper proficiet ad Deum. Neque enim Deus cessat aliquandò in benefaciendo, & locupletando hominem; neque homo cessat beneficium accipere, & ditari à Deo. Exceptorium enim bonitatis, & organum clarificationis ejus homo, gratus ei qui se fecit. Idem cap. 28. nihil ait à creaturis Deum postulare tanquàm sibi utile, seu sacrificia, seu eleemosynas, seu obsequium exigit; & nihil præcipere, quod non in utilitatem & commodum hominis cedat; sequi enim Salvatorem, participare est salutem; & sequi lumen, participare est lumen: qui autem in lumine sunt, non ipsi lumen illuminant, sed illuminantur, & illustrantur ab eo. Ipsi quidem ei nihil præstant; beneficium autem percipientes illuminantur à lumine. Sic & servitus erga Deum, Deo quidem nihil præstat, nec opus est Deo humano obsequio: ipse autem sequentibus, & servantibus ei, vitam & incorruptelam, & gloriam aternam attribuit, beneficium præstans servantibus sibi, ob id quod servant, & sequentibus, ob id quod sequuntur; sed non beneficium ipso ab eis percipiente. Et infra: In quantum enim Deus nullius eget, in tantum homo indiget Dei communione. Hæc enim gloria hominis, perseverare, ac permanere in Dei servitute: & propter hoc dicebat discipulis Dominus; non vos me elegistis; sed ego elegi vos: significans quoniam non ipsi glorificabant eum, sequentes eum; sed in eo quod sequerentur Filium Dei, glorificabantur ab eo. Idem pariter habet Clem. Alex. Admon. ad Græcos.

O P P. Quod alicujus perfectionis accessione compleri creditur, & perfectius fieri; secundum se perfectissimum non est dicendum: trium autem personalitatum accessione divina natura perfectior videtur fieri.

R. tres personalitates divinam naturam perficere, ut quæ naturam divinam subsistentem faciant; non quòd novam perfectionem & divinam naturam distinctam conferant, & adjiciant. Porro autem perficendi ratio duplex est; altera, quæ fit accessione quâdam de novo factâ, ut cum virtus animæ de novo infunditur; altera, cum terminando perficit, ut punctum lineam: sicut autem punctum nihil de novo addit lineæ; ita nec naturæ divinæ majorem perfectionem personalitates adjiciunt. Hinc S. Aug. lib. 6. de Trin. cap. 8. *Tantus est, inquit, solus Pater, vel solus Filius, vel solus Spiritus sanctus; quantus est simul Pater, & Filius, & Spiritus Sanctus.* Si quid autem perfectionis communi naturæ tres adderent personalitates, singulari quâque personalitate videri aliquid posset melius. In iis enim, inquit S. August. *que non mole magna sunt, hoc est majus esse, quod est melius esse.* Et lib. 7. cap. 6. *Dein-*

dè in his rebus, inquit, de creatis loquens, non tantum est unus homo; quantum tres homines simul; & plus sunt aliquid homines duo, quàm unus homo: & in statuis aequalibus plus auri est tres simul, quàm singule; & minus est auri una, quàm dua. At in Deo non ita est: non enim major essentia est Pater, & Filius, & Spiritus sanctus simul, quàm solus Pater, aut solus Filius; sed tres simul illa substantia, sive persona, si ita dicende sunt, aequales sunt singulis: quod animalis homo non percipit.

O P P. 2. Deus non est summè bonus extrinsecè, aut ratione terminì; quia non efficit optima, quæ potest: si enim res ita esset, homines singuli consequerentur finem suum, scilicet gloriæ cumulum; & Deus quæque perfectissima crearet. Imò nec Deus est summè bonus ratione sui, seu intrinsecùs: summè enim esset communicativus; & proinde infinitis communicaretur personis, & non tribus tantum.

R. Deum summè bonum extrinsecè, non propriè dici; nullam enim perfectionem ex operibus suis accipit; nec creaturæ sunt finis Dei, sed ipsemet Deus: omnia enim propter seipsum operatus est.

2. Licet Deus sit entitative summè bonus; non potest tamen infinitis personis communicari; à tribus enim personis, quibus communicatur, exhaustitur tota ejus communicabilitas, ut fides docet.

CONCLUSIO II. Deus est creaturis summè bonus. Psalm. 72. v. 1. *Quàm bonus Israël Deus.* Psalm. 105. v. 1. *Confitemini Domino, quoniam bonus.* Idem habent Psalm. 134. v. 3. & Psalm. 135. v. 1. Et sanè Dei summam erga nos bonitatem passim prædicant Scripturæ; prædicant pariter & omnes res creatæ, quæ coram oculis nostris obversantur, & ex nihiloeductæ fuerunt. A nobis verò nihil commodi Deus percipit, ut ex S. Iren. lib. 4. cap. 28. & 32. accepimus. Addit S. August. lib. de verâ Relig. cap. 14. & Ep. 5. obsequia, quæ Deus tanquam sibi præstita accepta habet, non in Dei, sed in nostram utilitatem cedere: ipsam etiam Dei vindicem justitiam tantum commendari, ut ad virtutem excitemur: quod & antea docuit Tertull. lib. 2. cont. Marcion. cap. 13. his verbis: *Ita omne hoc justitiæ opus procuratio bonitatis est, quod judicando damnat, quod damnando punit: quod, ut dicitis, servit, utique bono, non malo proficit. Denique timor judicii ad bonum, non ad malum convertit; non enim sufficiebat bonum per semetipsum commendari, jam sub adversario laborans: nam, etsi commendabile per seipsum, non tamen & conservabile; quia expugnabile jam per adversarium, nisi vis aliqua præset timendi, quæ bonum etiam nolentes appetere, & custodire compelleret. Ceterum tot illecebris mali expugnantibus bonum, quis illud appeteret, quod impunè contemneret? Nihil unquam injunxille Deum, nisi quod animæ foret utilissimum, docet idem in Scorpiaco cap. 5. & 6. ut & Arnob. lib. 1. contra Gentes; Lactant. lib. 7. Institut. cap. 5. S. Greg. Naz. orat. 32. Hinc etiam fit, ut Deus præceptorum suorum neglectum, quo verè sibi nocent homines, suæ veluti majestati illatam injuriam reputet; licet ne levissimum quid in-*

dè detrahatur, aut detrahi possit ipsius dignitati. Ex S. Clemente Alex. admonit. ad Græc. & lib. 7. Strom. Deus ea sibi assumere non designatur, quæ ut propriam ipsius majestatem minus decent, ita maximè nobis profunt ad salutem. Sic jurare in Scripturis, affectibus moveri, irasci, pœnitere, Deus zelotes dicitur; quibus omnibus justorum judiciorum suorum timorem incutere, & à vitiis nos avocare intendit. Ex Orig. Hom. 9. in Gen. Hom. 8. in Exod. & Hom. 8 in Num. Cum peccatores, aut peccata Deus punit, se erga nos maximè benignum declarat. Ex Tert. lib. 1. cont. Marcion. cap. 26. *Malo autem, inquit, parcere Deum, indignius sit, quàm animadvertere: & quidem Deo optimo, qui non aliàs plenè bonus sit, nisi mali amulus, uti boni amorem odio mali exerceat, & boni tutelam expugnatione mali impleat.* Idem lib. 2. cont. Marcion. c. 27. ait, *Deum non potuisse humanos congressus inire, nisi humanos & sensus, & affectus suscepisset, per quos vim majestatis sue intolerabilem utique humane mediocritati humilitate temperaret, sibi quidem indigna, homini autem necessaria, & ita jam Deo digna; quia nihil tam dignum Deo, quàm salus hominis.* Præterea S. Greg. Naz. orat. 15. Adamo inflictam fuisse mortem, ne immortale peccatum evaderet, pluribus probat: *Persuasumque, inquit, mihi est Deum nonnisi misericorditer punire.* Ita etiam S. Greg. Nyss. Epist. ad Ablavium cap. 8. & alii, quibus apertè suffragatur ipse Origenes tùm Hom. 8. in Exod. tùm Homil. 2. in Num. tùm etiam Homil. 1. in Ezech. Deus ergò summè in nos benignus est.

Quæ. 1. Utrùm Deus omnes perfectiones contineat, à Theologis dictas simpliciter simplices, & simplices secundum quid?

Primi generis perfectio ea est, quæ in unoquoque melior est ipsa, quàm non ipsa. Undè longè melius sit eam in quolibet individuo reperiri, quàm non inesse. Exigitur insuper, ut in suâ formali ratione nullam imperfectionem involvat, nec majorem aliquam, vel æqualem perfectionem excludat; sed simul cum eâ etiam formaliter stare possit.

Perfectio verò secundum quid ea dicitur, quæ in uno quoque non est melior ipsa, quàm non ipsa; aut propter imperfectionem, & limitationem; aut oppositionem, quam cum aliâ, vel æquali, vel majori habet.

Inesse possunt, vel formaliter, cum secundum omnem suam rationem formalem, aut naturam competunt; ita ut nihil earum perfectionis sit, quod non congruat; vel eminenter, cum conveniunt ratione causalitatis. Sic Soli calor competit, ratione eminentiæ cujusdam. His positis,

R. 1. Deo competere formaliter prioris generis perfectiones absolutas; quia summo enti nulla deneganda perfectio est; cum ei nulla deesse possit, & ab omni imperfectionis vel levissimâ specie sit alienissimum.

R. 2. Perfectiones simplices secundum quid, non esse formaliter in Deo, sed tantùm eminenter; quòd scilicet imperfectionem includant in conceptu formali, perfectionemque simul excludant. Undè Deus formaliter non potest dici corpus, & spiritus.

Q. 2. utrùm Deus sit aliquid melius, aut perfectius cum rebus creatis, quàm si solus spectetur?

R. 1. Non esse quid melius; quia nulla in creaturis est perfectio, quæ in Deo excellentiori longè modo non existat. Tanta enim est Dei perfectio, ut neque accessione augeri, neque detractioe possit imminui: alioquin indè sequeretur Christum fore quid melius æterno Patre, quod naturam humanam conjunctam cum divinitate haberet. Ex Joann. autem 14. v. 28. compertum est cum minorem Patre esse, quàm homo est. *Pater major me est.*

R. 2. Creaturas simul cum Deo, aliquid extensivè perfectius dici posse, seu plura perfectionem habentia. Cæterùm penitus impropria illa loquendi forma est; cum ex perfectionis intensione major perfectionis amplitudo repetatur: licet enim v. c. plures infirmis oculis aliquid respiciant; adsit verò. alter visu perspicax, qui oculos in idem objectum conjiciat, plures quidem videntes erunt, sed non perfectior visio futura est: non enim plures illi plura vident, quàm ille visu perspicaci præditus.

Q. 3. utrùm Deus sit veritas?

R. Deum esse veritatem summam; sive veritas sumatur pro rei, ut in se est, apprehensione; sive pro rei cum suis principiis conformitate. Deus enim suum est intelligere, Joan. 14. v. 6. *Ego sum via, veritas & vita.* Et 1. Joan. 5. v. 6. *Christus est veritas.* Deus igitur est veritas prima, & summa; cum omnium omninò rerum, & omnium intellectuum sit mensura.

Q. ultimò utrùm in Deo vita sit.

Vitæ acceptio varia est. 1. usurpatur pro principio motus secundum locum, aut alimentum. Undè sapius Dii Gentium vitâ destinati dicuntur, quòd hujusmodi operationes non eliciant: ubi motuum illorum signa in animantibus non percipimus, pro mortuis reputamus. 2. Vita sumitur pro ipsius vitæ actibus, præsertim si voluptatem aliquam habeant; undè vivere vitam vulgò feruntur, qui beatam, aut immunem à miseriis vitam ducunt. 3. vivere habetur pro operandi modo perfectissimo, seu possessione eorum, quæ ad viventium rationem accedere videntur. Sicut enim in plantis, & in animantibus vitam esse dicimus, quòd nutriantur, & crescant: & sicut perfectioris vitæ gradus in animantibus deprehendimus, quòd variorum motuum capaces sint, & non tantùm à loco in locum progrediantur; sed & à variis objectis ad varia moveantur: ità etiam perfectiorem vitæ rationem habere homines dicuntur, quòd non ex impulsu extrinseco, aut à naturâ sibi indito ad hunc, aut illam finem impellantur; sed quòd seipsos liberè ad hoc, aut ad illud agant. Undè quò eminentior erit agendi ratio, perfectior quoque erit vitæ ratio; & proinde in Deo vita est agnoscenda, eaque perfectissima. Deus enim de se ait Deuter. 32. v. 40. *Vivo ego in æternum.* Quod & sapius repetunt Prophetæ, dum aiunt: *Vivit Dominus.* Cum ergò perfectissima operatio, sit perfectissimæ vitæ ratio, fieri non potest.

potest quin perfectissima vita in Deo sit. Vita autem ejus indistincta est ab ejus essentia, sicut & cætera attributa.

QUÆSTIO UNDECIMA.

De scientia Dei.

ARTICULUS PRIMUS.

Utrum in Deo sit scientia ; & qualis sit ; & circa quæ versetur ?

ERRANT impii circa Dei scientiam ; ita enim aiunt apud Job. 22. v. 13. *Quid enim novit Deus ? & quasi per caliginem judicat.* Pl. 93. v. 7. de iniquis qui viduas opprimunt sic dicitur : *Et dixerunt , non videbit Dominus , nec intelliget Deus Jacob.* 2. Averroës lib. 2. Metaph. Deum alia à se nonnisi in universali intelligere propugnat , prout nempe entia universim sunt , non prout ad hanc , vel illam speciem rediguntur ; nec proinde , inquit , inscius dicendus est Deus , quòd Dei scientia , alterius , & superioris longè ordinis à nostrâ sit.

Præscientiam in Deo negavit Cicero , ut docet S. August. lib. 5. de Civit. Dei c. 9. quòd cā hominum libertatem destrui existimaret ; *Atque ita , inquit , dum vult homines facere liberos , facit sacrilegos.*

Marcio eandem Dei præscientiam negavit , quòd imaginem suam , nempe hominem statu felicitatis dejici , & Dæmonis imperio subdi passus esset ; ut omnipotens , & ut summè bonus illi malo , inquiebat , occurrisset , à quo liberasset ; neque bonus , neque omnipotens , neque demum præscius esset dicendus. Ita Marcio disseribat ex Tertull. lib. 2. contra hunc hæreticum.

Albanenses etiam , teste Guidone Carmelicâ in suâ Summâ de hæresib. dixerunt Deum non præscire ex se aliquod malum , sed per adversarium suum , nempe Dæmonem.

Ex illâ præscientiâ intulit Joannes Hus omnia necessariò contingere , ut liquet ex Sess. 25. Conc. Constantiensis.

CONCLUSIO. Datur in Deo scientia.

Probationibus opus non est ; quia cum Deus omnes omninè perfectiones complectitur , procul dubio scientiam habet omnibus modis absolutam. Hic nobilissimus est operandi modus , intellectualis scilicet , omniumque agendi rationum ea perfectissima est , quæ ex facultate sui dominâ elicitur. Deus quoque in agendo sibi finem præfinit , & constituit , quod non præstaret scientiâ destitutus. Addi possent quæ ad commendationem scientiæ Dei habentur , Job 9. v. 4. *Sapiens corde est , & fortis robore.* Et c. 12. v. 13. *Apud ipsum est sapientia , & fortitudo ;*

ipse habet consilium & intelligentiam. 1. Reg. 2. v. 3. *Deus scientiarum Dominus est.* Esther 14. v. 14. *Domine qui habes omnium scientiam.* Rom 11. v. 33. *O altitudo divitiarum sapientia, & scientia Dei!* Pl. 94. *adversus iniquos scientiam Deo detrahentes variis rationibus Deus suam scientiam vindicat v. 7. Et dixerunt, non videbit Dominus, nec intelliget Deus Jacob. Intelligite insipientes. in populo, & stulti aliquando sapere. Qui plantavit aurem, non audiet? aut qui finxit oculum, non considerat? Qui corripit gentes, non arguet, qui docet hominem scientiam? Dominus scit cogitationes hominum, quoniam vana sunt.*

Hæc Dei scientia, & perfectissima, & una est, & immutabilis, nihil in eâ varium est, nihilque multiplex. Ità S. Aug. lib. 3. Confess. c. 16. *Nam sicut omnino tu es, tu scis solus, qui es incommutabiliter, & scis incommutabiliter, & vis incommutabiliter, & essentia tua scit, & vult incommutabiliter, & voluntas tua est, & scit incommutabiliter:* Cum autem scientia Dei immutabilis sit; perfectissima sit etiam necesse est: Undè licet, quæ futura erant, jam peracta sint, ut Christus, qui olim nasciturus, modò natus est; non est ideo mutata Dei circa hæc scientia.

Scientia Dei à nostræ scientiæ defectibus aliena est longè; unico enim intuitu, & absque discursu perspecta habet omnia, & in seipso, 1. Reg. 16. v. 7. Pl. 7. v. 10. Jerem. 11. v. 17. Undè S. Aug. 2. L. ad Simplic. q. 2. Nomen scientiæ à nobis petatum, ad Deum improprie, seu metaphoricè translatum esse docet: nos enim scire aliquid dicimur, cum memoriæ nostræ inhærere dicuntur, quæ per sensus, aut per intellectiorem concipimus: in tali autem scientiâ ordo, & mutabilitas occurrunt: quæ à Deo procul removenda sunt.

Deus scit ineffabili ratione, semetipsum novit perfectissimè, & quidem solus; quod non probatione, sed expositione solâ opus habet. Addeimus tantùm ex Apost. 1. Cor. 2. v. 11. *Quis enim hominum scit, quæ sunt hominis, nisi spiritus hominis, qui in ipso est? ita & quæ Dei sunt, nemo cognovit, nisi spiritus Dei.*

CONCLUSIO II. Deus quælibet etiam diversæ à se naturæ novit, & solus, & ab æternò.

Aperta quoque est ista conclusio, & prætermisissis plenisque Scripturæ locis, quibus probaretur, ut Job 28. Psal. 10. Psalm. 82. Prov. 15. satis sit asserere illud Apostoli Hebr. 4. v. 13. *Non est ulla creatura invisibilis in conspectu ejus: omnia autem nuda, & aperta sunt oculis ejus.* S. Aug. l. 5. de Gen. ad Litt. c. 18. sic habet: *Hæc igitur antequam fierent, utique non erant. Quomodo ergò Deo nota erant, quæ non erant? Et rursus quomodo ea faceret, quæ sibi nota non erant? Non enim quidquam fecit ignorans. Nota ergo fecit, non facta cognovit. Proinde antequam fierent, & erant, & non erant: erant in Dei scientiâ, non erant in suâ naturâ.*

Infinitam Dei scientiam lib. 6. Strom. delineat S. Clem. Alex. comparatione à Theatris petita: sicut enim ludorum spectator in arcnâ positus, quæ ante se gererentur tantùm, non quæ retrò, conspiceret; qui verò in superiori loco sederet, non modò spectatores, sed & totius undique thea-

tri ambitum uno comprehenderet aspectu : ita Deus , qui omnibus supereminet , omnia uno obtutu conspiciat . Aliter disserit S. Thom. libro 1. contra Gentes cap. 66. Sicut enim , inquit , puncta in uno circulo prioris , & posterioris rationem inter se secundum situm habent ; punctum verò , quod in centro est , omnibus & æquè præsens est , & æquè ab illis distans ; ita Deus extra omne tempus existens , omnibus temporum differentiis æquè præsens est , unus , & immotus manens . S. August. sic exponit lib. 15. de Trinit. cap. 7. *Ita Deus novit omnia , ut , nec ea quæ dicuntur præterita , ibi prætereant ; nec ea quæ dicuntur futura , quasi desint , expectentur ut veniant ; sed & præterita , & futura cum præsentibus sint cuncta præsentia .* Item lib. 10. de Civit. c. 12. *Temporalia movens , temporaliter non movetur ; nec aliter novit facienda , quàm facta ; nec aliter invocantes exaudis , quàm invocaturos vider.*

Quaslibet res non modò habet compertas Deus , sed & comprehendit ; nam ratione perfectissimâ suum objectum consequitur .

Deum autem omnia sigillatim nosse ex eo constar , quòd ipse omnia distinctè , & determinatè constituerit . Nam Matth. 6. & Luc. 12. cæli volatilia pascit , lilia vestibus exornat , singulis peccatis meritas pœnas infligit , & omnes actus bonos remuneratur . Job etiam 11. v. 11. *Ipse novit hominum vanitatem , & videns iniquitatem nonne considerat ?* Item Ps. 68. v. 6. *Deus , tu scis insipientiam meam , & delicta mea à te non sunt abscondita .*

Et si Deus res alias à se intelligat , non proindè inæqualis perfectionis in Deo sunt operationes : non enim ex variâ objectorum secundariorum naturâ cognitionum varia qualitas repetitur , sed ex primariis objectis ; primarium autem divinæ scientiæ objectum est Dei essentia , & Deus in se omnia cognoscit ex S. Aug. 49. quæst. ex 83.

Dum autem Abac. c. 1. v. 13. oculi Dei dicuntur mundi , ne videant malum . Matth. 7. v. 23. de peccatoribus dicitur . *Nunquam novi vos ;* non ideo censendum est peccatores , & peccata latere Deum ; nam , ut monet Orig. Hom. 4. in Gen. Deus nescire peccata , & peccatores dicitur , non quòd reverâ nesciat , sed quòd indigni sint peccatores , qui sciantur . Undè Apost. 1. Cor. 14. v. 33. *Si quis ignorat , ignorabitur .* Et ex S. Aug. in Psalm. 1. *Hoc est nesciri à Domino , quod est perire : & hoc sciri à Domino , quod est manere ; ut ad scientiam Dei , esse pertineat : ad ignorantiam , verò non esse : quia Dominus dixit , Ego sum , qui sum .*

CONCLUSIO III. Novit Deus futura , seu datur in Deo præscientia .

Quod ut intelligatur , observandum est , ex futuris alia esse necessaria , quæ pendunt à causis necessariis ; alia contingentia , quæ à causis contingentibus , seu non determinatis ad unum , oriuntur . Hæc iterùm , vel libera sunt , quæ à causâ rationali ad utrumlibet indifferente producuntur ; vel conditionata , quæ , posita videlicet hæc , vel illâ conditione sunt futura : hæc dividuntur in conditionata futura , & non futura ; priora certò erunt , ubi fuerit posita conditio , sub quâ futura dicuntur ; non futura , sunt quæ

pendent à non ponendâ conditione sub quâ dicuntur futura. His ita positis.

Prob. Concl. Deum nempe nosse cujuslibet generis futura, palàm est ex superioribus probationibus. Præterea Psalm. 32. v. 15. *Intelligit omnia opera eorum.* Psalm. 138. v. 5. *Ecce Domine tu cognovisti omnia, novissima, & antiqua.* Sap. 8. v. 8. *Scit præterita, & de futuris æstimat, . . . signa, & monstra scit antequam fiant, eventus temporum, & seculorum.* Hinc etiam ad Deorum falsitatem demonstrandam, divinitatis argumentum illud statuit apud Isaiam Dominus c. 41. v. 22. *Accedant, & nuncient nobis quaecumque ventura sunt, &c. Annunciate quæ ventura sunt in futurum, & sciemus quia Dii estis vos.* Et c. 44. v. 6. *Ego primus, & novissimus, & absque me non est Deus: quis similis mei? vocet, & annunciet, & ordinem exponat mihi, ex quo constitui populum antiquum; ventura, & quæ futura sunt annuncient eis.* Eccli c. 23. v. 29. *Domino Deo antequam crearentur, omnia sunt cognita: sic & post perfectum respicit omnia.*

Et certè Deus per Prophetas innumera prædixit, ut Judæorum infidelitatem, captivitatem, Templi excidium & restorationem, Gentium fidem. Inde Tertullian. lib. 2. contra Marcion. cap. 1. ita loquitur: *Præscientia Dei tantos habet testes, quantos fecit Prophetas.* Et in Apol. c. 20. *Ille unum testimonium divinitatis, veritas divinationis.* Quod & his expressit verbis S. Aug. lib. 5. de Civit. cap. 9. *Confiteri esse Deum, & negare præscium futurorum, apertissima insania est.* Eadem reperies, tum apud Origenem lib. 6. contra Cels. tum apud Eusebium lib. 6. de Præparat. Evang. tum & apud alios Patres istis vel anteriores, vel æquales, vel etiam posteriores.

O P P. S. Aug. lib. 11. de Civit. c. 21. probat non esse in Deo præscientiam, seu futurorum cognitionem. 1. Quia Deus non esset æternus; cum æternitatis respectu nihil sit futurum; variis enim temporum differentiis velut punctum responderet æternitas. 2. Quia non esset immutabilis; novam enim novi objecti notitiam acquireret; & sic ejus intellegendi aptitudo non esset integra, cum ipsi quid novi accederet. Idem probat lib. 2. quæst. ad Simplic. his verbis: *Quid est præscientia, nisi scientia futurorum? quid autem futurum est Deo, qui omnia supergreditur tempora? si enim scientia Dei res ipsas habes, non sunt ei futura, sed præsentia; ac per hoc non jam præscientia, sed tantum scientia dici potest.* Et quia, ut addit, nisi præsentia, & futura eodem modo intelligat, bis ea sentit: uno quidem modo secundum futurorum præscientiam; altero verò secundum præsentium scientiam. *Aliquid ergo temporaliter accedit scientia Dei: quod absurdissimum, atque falsissimum est; nec enim potest quæ ventura prænosci, nosse cum venerint, nisi his innotescant, & prænoscendo antequam sint, & cognoscendo cum jam sunt.*

R. de nomine quæstionem tantum moveri, si ad rationes, & verba S. Aug. attendatur: non enim futurorum notitiam Deo negat: sed vult eam nomine scientiæ potius esse insigniendam, quàm præscientiæ usurpa-

zione; cum nihil Dei respectu sit futurum. Sic ergò futurorum cognitio in Deo dicitur scientia respectu Dei, si convenienti, & apposito vocabulo uti velimus; respectu verò nostri vocabitur præscientia, si nomen adhibeamus, quod nostro intelligendi modo respondeat: rerum enim aliarum respectu nostri præsentia sunt, aliarum præterita, aliarum futura; Dei autem respectu non ita, sed omnes sunt præsentia.

CONCLUSIO ult. Novit Deus futura conditionata, quorum conditio nunquam est ponenda.

Prob. Nam ex lib. 1. Reg. c. 23. v. 11. querenti David, num à Ceilanis Saùli traderetur, respondet Deus ab iis esse tradendum: *Si tradent me*, inquit, *viri Ceila in manus ejus? & si descendet Saul, sicut audivit servus tuus? Domine Deus Israël indica servo tuo.* Et ait Dominus: *descendet.* Dixitque David: *Si tradent me viri Ceila, & viros qui sunt mecum, in manus Saul: Et dixit Dominus: Tradent.* Sap. quoque 4. v. 10. dicitur de Prædestinato: *Placens Deo factus est dilectus, & vivens inter peccatores, translatus est: raptus est, ne malitia mutaret intellectum ejus, aut ne filio deciperet animam illius.* Matth. etiam 11. v. 21. ita Christus increpando loquitur: *Va tibi Corozain, va tibi Betsaida: quia, si in Tyro, & Sydone facta essent virtutes, quæ factæ sunt in vobis, olim in cilicio, & cinere pœnitentiam egissent. Verumtamen dico vobis: Tyro & Sydoni remissius erit in die judicii, quàm vobis. Et tu Capharnaum, numquid usque in cælum exaltaberis? usque in infernum descendes. Quia, si in Sodomis facta fuissent virtutes, quæ factæ sunt in te, forè mansissent usque in hanc diem.*

Deus ergò noverat Ceilanos Davidem esse prodituros, si Ceila commoratus fuisset: item justum illum fuisse peccaturum, nisi præmaturâ morte præreptus fuisset. S. Aug. lib. de Corrept. & Grat. c. 8. ait de no Dei hominem finire hanc vitam, antequam ex bono mutetur in malum. Noverat etiam Deus Tyrios, Sydonios, & Sodomitas fuisse pœnitentiam acturos, si conditio, de quâ Christus locutus est, non defuisset. Quæ omnia sæpiùs contra Pelagianos urget S. Aug. ut quosdam præ aliis probet singulari Dei beneficio à Deo donis affici: Lib. quippè de Dono persever. c. 11. scribit Deum non illis subvenisse, quos prævidit credituros fuisse, si apud eos edita essent miracula; quia Deus in suâ prædestinatione, occultè quidem, sed justè aliud judicavit.

Præterea S. Greg. Nyss. Orat. de Infantibus præmaturâ morte abreptis, docet Deo perspectum esse, quid de illis futurum fuisset, si vitam longiùs produxissent. *Est enim consentaneum ab illo, qui peraquè futurum novit, ac præteritum, prohiberi parvuli progressionem ad perfectam ætatem; ne malum illud, quod præsciens illa vis, & facultas cognoverit in eo, qui ita victurus fuisset, perficiatur; atque ei, qui eâ voluntate, arbitrioque victurus fuisset, materia nequitia vita fiat.*

OPP. Futurorum hanc conditionatorum cognitionem in Deo sæpiùs impugnât S. Aug. nec vocari posse futura, quæ nunquam sunt exitura, contendit. Nam lib. 1. de Animâ, & ejus orig. cap. 11. animas parvu-

lorum præmaturâ morte non subtrahi, probat contra Pelagianos, quod libero arbitrio abufuri essent: *Quid quod, inquit, ipsa exinanitur omninò præscientia, si, quod præscitur, non erit. Quomodo enim rectè dicitur præsciri futurum, quod non est futurum? quomodo ergò puniuntur peccata quæ nulla sunt, id est, quæ nec vitâ istâ nondum incipiente commissa sunt ante carnem, nec morte præveniente post carnem?* Et Epist. 105. Xisto. *Quomodo futura dicuntur, quæ nulla erunt?* Et lib. quoque 15. de Civit. c. 13. non aliam scientiæ Dei causam novit, quàm quod scientia ipsa sit omnium causa; & proindè cum futurorum sub conditione, quæ nunquam futura sunt, causa futurus non sit Deus, hinc est quod ea nosse non videatur.

R. Nihil aliud velle S. Aug. quàm Deum nec pœnas infligere, nec præmium tribuere ob culpas, aut benefacta, quæ nunquam essent futura. Et verò S. Aug. istud adversariorum commentum refellens lib. de Prædest. Sanctior. c. 14. ubi attendit ad illud sapientis: *Raptus est, ne malitia mutaret intellectum ejus.* Sic habet: *dictum est enim secundum pericula vitæ hujus, non secundum præscientiam Dei, qui hoc præscivit quod futurum erat, non quod futurum non erat: id est quod ei mortem imminutam fuerat largiturus, ut tentationum subtraheretur incerto; non quod peccaturus esset, qui mansurus in tentatione non esset.* Impugnat ergò tantùm S. Aug. illam futurorum scientiam, quâ posita in peccata nunquàm futura decernerentur pœnæ.

Et sanè sæpiùs Sanctus Augustinus, & alii Patres hanc scientiam in Deo supponunt, cum quærunt, cur Deus Dæmones creavit, quos malos fore præciebat? item cur & alios homines creet, quos scit peccaturos, & pœnitentiam non amplexuros?

ARTICULUS SECUNDUS.

Quomodo, aut in quo seipsum, & cetera, seu præsentia, seu futura absoluta, aut conditionata Deus noverit.

CUM ex Apost. Rom. 11. v. 33. investigabiles sint viæ Dei, scientiæque ejus altitudo incomprehensibilis; ab investigandis scientiæ divinæ operationibus, & præcipuè internis, utpotè supra vires intellectus humani positis, abstinere, nisi in scholis invaluisse consuetudo tractandi, non solum de Dei operationibus, sed etiam quibus rationibus eliciantur: de illis igitur breviter, & quæ SS. Patres docuerint exscribemus.

CONCLUSIO I. Semetipsum novit Deus, & per seipsum; non enim ab alio sui cognitionem haurire potest; cum intelligere Dei sit esse Dei.

CONCLUSIO II. Deus in se, & per se novit omnia.

Prob. 1. ex S. August. lib. 15. de Trin. cap. 14. *Novit omnia Deus Pater in seipso ; novit in Filio ; sed in seipso , tanquam seipsum ; in Filio , tanquam verbum suum , quod est de his omnibus , quæ sunt in seipso . Omnia similiter novit & Filius , in seipso scilicet , tanquam ea , quæ nata sunt de his , quæ Pater novit in seipso ; in Patre autem , tanquam ea de quibus nata sunt , quæ ipse Filius novit in seipso .*

Et verò nisi in seipso omnia cognosceret Deus , potentiâ , non actu esset intelligens ; & creaturæ alibi essent , quàm in ipso ; & ab eo , per quod intelligeret creaturas , discreparet : quæ singula repugnant.

In se ergo , ut in causâ efficiente Deus res creatas omnes cognoscit , nihilque mutuatur ab ipsis creaturis . Quam doctrinam his tradidit verbis S. Amb. in Tract. in Symbolum cap. 1. *Ut licet omnia cœlestia , & terrestria , ac minima quæque perspiciat ; nihil tamen extra se intelligere , sed singula in se intueri dicatur .*

2. Omnium similitudinem continet in se Deus ; & proindè cum perfectissima ejus cognitionis sit ratio , in seipso intelligit , quæ intelligit : longè enim perfectior est creaturarum cognitio , quæ habetur in Deo , quàm quæ ab ipsis creaturis petitur . Hinc S. Aug. lib. 11. de Civ. c. 7. ità loquitur : *Cognitio quippè creature in seipsâ , decoloratior est , ut ità dicam , quàm cum in Dei sapientiâ cognoscitur , velut in arte , quâ facta est .* Item cap. 19. de Angelis loquens sic habet : *Ipsam quoque creaturam melius ibi , hoc est , in sapientiâ Dei , tanquam in arte , quâ facta est , quàm in eâ ipsâ sciunt : ac per hoc , & seipsos ibi melius , quàm in se-ipsis : omnia hæc aliter in verbo Dei cognoscuntur ab Angelis , ubi habent causas , rationesque suas , idest , secundum quas facta sunt , incommutabiliter permanentes ; aliter in seipsis ; illuc clariore , hic obscuriore cognitione , velut artis , atque operum ; & nihil extra se intuetur Deus .*

Ultimò , Si per propriam sui speciem in Dei cognitionem venirent creaturæ , immediatum essent divinæ cognitionis objectum ; quod fieri non potest : essentia enim divina divinæ cognitionis immediatum , & primum est objectum : & quod immediati objecti rationem obtinet , perfectionem cognitioni tribuit : creaturæ verò nihil tale respectu Dei præstare possunt ; nec potest fieri intelligens Deus per speciem extrinsecus advenientem : esset enim in potentiâ respectu illius speciei , quæ ipsum divinum intellectum determinaret ad actum .

CONCLUSIO III. *Novit Deus peccata objectivè tantùm , & ex obliquo .* •

Prob. Nam Deus non potest comperta habere peccata in se , tanquam in causâ ; nec in se , ut rerum omnium similitudinem referente : nihil enim secundum eam rationem in Deo est , nisi quod ab ipso ut causâ oritur ; non ergo subjektivè in Deo sunt peccata , ut aiunt , sed objectivè , & in obliquo ; in quantum nempe cognitis bonis , bonorum quoque privationes , quæ peccata sunt , Deus cognoscit .

CONCLUSIO IV. *Res futuras non novit Deus , quòd sibi coexistant ab æterno secundum illud esse reale , quod in tempore consequuntur .*

Prob. 1. quia res illæ essent Deo coæternæ ex hypothesi, & noti essent, utpote futuræ. Pariter successiva essent quædam entia, & non essent, ut quæ sibi coëxisterent, dies, purâ hodiernus, & hesternus. Deus ergo non novit res futuras, ut præsentia reali sibi ab æterno præsentibus, sed tantum præsentia rationis, seu objectivè; quia scilicet à Deo intelliguntur.

O P P. 1. Quæ coëxistunt indivisibili, quod æternum est, & nec principium, nec finem habet, sunt ab æterno. At coëxistunt creaturæ æternitati, quæ ejusmodi est; & proindè realem habent ab æterno existentiam; & sic in reali suâ ab æterno existente præsentia cognoscuntur.

R. rem, quando existit, coëxistere toti æternitati, cum æternitas sit indivisibilis; sed non coëxistere toti æternitati totaliter, nec adæquatè; cum æternitas sit duratio infinita, & finita sit creaturæ duratio: finitum autem infinito adæquari non potest; & proindè creaturis omnibus coëxistit æternitas, non solum creaturas adæquans, sed excedens: coëxistunt verò res creaturæ æternitati cum existunt, sed inadæquatè solum.

O P P. 2. Deus non cognoscit res futuras ut futuras: ergo eas cognoscit ut sibi coëxistentes: nam ex S. August. lib. 2. ad Simplicianum, quæst. 2. præscientia Dei nihil aliud est, nisi scientia futurorum, quæ non dicenda est præscientia, sed potius scientia; quia nihil futurum est respectu Dei; sed omnia sunt ipsi præsentia: alioquin bis ea sentiret.

R. futura illa Deo esse ab æterno præsentia objectivè; non verò realiter, quasi secundum illud esse reale, quod habent in tempore, ipsi Deo coëxistunt ab æterno: nec idè tamen cum creantur, nova accedit Deo scientia; quia Deus omnia in seipso novit, nec aliquid mutuatur à creaturâ. Quamobrem futurum nihil est Dei respectu, sed nostri tantum; quia Dei æternitas tempora omnia complectitur: sed indè non sequitur quæ Deus ut præsentia videt, existere realiter: videt quippè ea Deus in seipso, nec cum creantur alibi videt: undè ex S. Gregor. lib. 2. Moral. cap. 23. *Non ab æternitate ejus idè videntur, quia sunt: sed idè sunt, quia videntur.*

CONCLUSIO V. Non cognoscit Deus res futuras in voluntate suâ, ut in rerum futurarum causâ. Nam, si res ita esset, tolleretur rerum contingentia, tolleretur & liberum arbitrium: nullâ enim causarum proximarum ratione habitâ res futuras constitueret Deus; & proindè, quod esset futurum, necessariò esset futurum. Imò etiam in Deum peccata forent referenda; quia vellet Deus, ut prius fierent, quàm hominum affectus nosceret.

O P P. 1. Deus comprehendit causam liberam, quemadmodum & causam necessariam; & proindè videt in eâ, non tantum quod est possibile, sed etiam quod est futurum, non secus ac in principio videt conclusiones omnes.

R. Deum comprehendere causam liberam, & quò magis perspicuè cognoscit causam liberam, eò clariùs eam esse indeterminatam cognoscere. Si autem Deus in suâ voluntate, ut rerum causâ, quæ ab homine sunt

sunt peragenda, deprehenderet; hominem, non liberum, sed determinatum animadverteret. Ideo autem conclusiones in principio conspiciuntur, quia necessario in eo continentur, & ab ipso deducuntur: actiones verò causæ liberæ necessariam cum causâ connexionem non dicunt; esset enim causa libera, & non libera, ut quæ esset determinata.

INST. 1. Licet ex cognitione illâ suppositâ, esset certò actus hominis futurus, non proinde hominis libertas læderetur; sicut nec læditur gratiâ efficaci, licet ex eâ sequatur necessario res futura, & à Deo sic conspiciatur.

R. ex gratiæ positione non sequi actum esse futurum necessario; videri tamen à Deo ut infallibiliter futurum; alioquin gratia illa esset efficax, & non esset; quod implicat: undè gratia inclinat voluntatem, sed non cogit. Deus verò eam cogeret, in voluntate sua, si quid acturus esset homo, infallibiliter conspiceret: determinaretur enim hominis voluntas ad ponendum necessario actum.

INST. 2. Sicut gratia, licet voluntatis determinationem antecedit, & det velle, libertatem non destruit; ita hæc Dei cognitio libertati pariter non noceret.

R. discrimen in eo esse, quòd cognitio hæc divina certa & infallibilis ita determinationem voluntatis humanæ antecederet, ut ab ipsâ voluntate independens esset, & proinde ita determinaretur hominis voluntas, ut aliter omnino agere non posset; quia scilicet errori obnoxia esse non potest Dei cognitio: at verò gratia quælibet, seu excitans, seu præveniens, non antevertit determinationem voluntatis; sed ipsam voluntatem dependenter ab ipsâ voluntate determinat.

OPP. Res necessaria pendet à voluntate Dei; ergo & libera.

R. Pendere necessariâs res à Deo tanquam à causâ absolutâ; res liberas tanquam à concausâ: nam Deus ita determinat causas necessarias, ut non possint non agere; non verò ita res liberas; possunt enim agere, & non agere.

INST. 1. Tam pendentes res futuræ à voluntate Dei, quam possibiles ab omnipotentia.

R. Eas æquè in esse pendere; non verò in cognitione. Sicut enim res possibiles non possunt esse nisi ab omnipotentia; ita nec res futuræ, nisi à voluntate Dei; quia nihil existit nolente Deo: sed non, sicut in suâ omnipotentia videt res possibiles, videt ita in suâ voluntate res liberas futuras; alioquin liberæ res essent, & non essent.

INST. 2. Positis decretis divinis de futuritione rei cuiusdam, eam cognoscit Deus futuram; sublatis decretis eam non cognoscit Deus futuram. Igitur res liberas futuras in suâ voluntate cognovit. Et verò SS. August. Prosper, & Fulgentius, voluntatem divinam pro præscientiæ divinæ regulâ, contra Semipelagian. constituunt: quorumdam enim ab aliis secretionem divinæ præscientiæ tribuebant isti; seu hos Baptismum consequi existimabant, & salutem, quia eos, si superstites fuissent, gratiæ beneficiis benè usuros fuisse Deus præscierat; hos verò repellere, seu

beneficiis illis non donari, quia si vitam agere illis datum fuisset, peccatis se totos tradidissent. Hanc opinionem Patres illi confutant, & salutis beneficium divinæ voluntati tantummodò esse tribuendum contestantur: Illorum sententiam sic exponit S. Prosper Epist. ad S. Aug. Cumque inter hæc innumerabilium illis multitudo obijcitur parvulorum, qui ante discretionem boni & mali, de usu vite istius aufferendi; alii per regenerationem inter cælestis regni assumantur hæredes; alii sine Baptismo inter mortis perpetua transeant debitores; tales aiunt perdi, talesque salvari, quales futuros ille in annis majoribus, si ad activam servarentur ætatem, scientia divina præviderit. Et S. Aug. eam sententiam ita confutat lib. de Prædest. Sanct. c. 12. Quis enim audiat, quòd dicuntur parvuli pro suis futuris meritis in ipsâ infanti atate baptizati exire de hac vitâ, & idè alii non baptizati in eadem atate mori, quia & ipsorum præscita sunt merita futura, sed mala.

Item etiam habet cap. 14. ejusdem lib. in illud sapientie, Raptus est, ne malitia mutaret intellectum ejus.

R. S. Aug. idè Semipelagianorum præscientiam improbare, quod à Deo, ob demerita visa nunquam extitura, Baptismo infantes privari contestarentur; alios verò ob merita prævisa, si vixissent, Baptismi gratiâ donari: nam lib. de Dono persever. c. 9. sic habet: Quoniam nullus mortuus judicatur ex bonis seu malis, quæ fuerat, si non moreretur, acturus. Et paulò suprâ de Tyriis ita loquitur: Si secundum facta, quæ facturi essent, si viverent, mortui judicantur; profectò, quia fideles futuri erant isti, si eis cum tantis miraculis fuisset Evangelium prædicatum, non sunt utique puniendi: puniuntur autem. Non igitur ab illis SS. Patribus hominis actus liberi in Dei decreta, seu voluntatem divinam, ut eorum causam; referuntur; sed Dei æquitas vindicatur; non enim æquum esset propter merita, aut demerita nunquam extitura, alios tormentis æternis addicere, alios cælesti gloriâ donare.

I N S T. 3. Semipelagianos non idè tantùm ob id arguit S. Aug. sed quia in Deo præscientiam, cujus regula non esset divina voluntas, admittebant; nam l. de Dono persever. cap. 14. hæc habet: An quisquam dicere audebit, Deum non præscivisse, quibus esset daturus, ut crederent; aut quos daturus esset filio suo, ut ex iis non perderet quemquam? quæ utique si præscivit, profectò beneficia sua, quibus nos dignatur liberare præscivit. Et c. 18. Præscivit enim reliquias, quas secundum electionem gratiæ fuerat ipse factururus: hos ergò prædestinavit; sine dubio enim præscivit, si prædestinavit; sed prædestinasse, est hoc præscisse quod fuerat ipse factururus. Prædestinationem igitur cum præscientiâ conjungit; ita ut voluntatis actum pro prædestinationis regulâ stabilierit, & præscientiæ.

R. damnari à S. August. hanc à Semipelagianis excogitaram præscientiam, quâ positâ, hominum merita, seu opera laude digna in Dei gratiam non referrentur, sed in cognitionem, quâ præsciret Deus hos gratiâ benè usuros fuisse, non istos; nam lib. de Prædest. Sanct. c. 1. ita

scribit : *Hec est immobilis veritas predestinationis, & gratia; nam quid est, quod ait Apostolus, sicut elegit nos in ipso ante mundi constitutionem: quod, profecto, si propterea dictum est, quia præsciit Deus credituros, non quia facturus fuisset ipse credentes; contra istam præscientiam loquitur filius dicens, non vos me elegistis, sed ego vos elegi.*

INS T. 4. Idcirco confugiebant Semipelagiani ad præscientiam, quam improbat S. Aug. ne decretum seu propositum Dei efficax à meritorum prævisione independens admittere cogerentur: S. igitur Aug. præscentiam ex Dei decreto efficaci non petitam damnabat; si enim præscentiam ex decreto efficaci non ductam admitteret, non probaret quod intendit: nam probare intendebat dari quoddam decretum, seu propositum Dei efficax, quo sic secernerentur homines, ut quidam assumerentur ad gloriam, alii relinquerentur ad pœnam.

Jam verò si præscentia decretum Dei efficax supponat; propositæ opinionis ruent fundamenta: nam ideò negatur Deus præscire futura libera in suo decreto, ne decreto illo efficaci præsupposito, ut ad præscentiam divinam prærequisito, libertas lædatur; quia voluntatis determinationem præverteret illud decretum, everteretque, utpotè quod impleretur necessariò. Si autem decretum illud tanquam conditio ad visionem supponatur, perindè erit; res enim quæ sic prævidebuntur, necessariò erunt pariter futuræ; proindèque non minus libertati humanæ nocbitur, quàm si pro præscentiæ divinæ ratione formali decretum illud habeatur; posito enim decreto illo, ut conditione ad præscentiam divinam prærequisitâ, seu præscentiæ divinæ medio, erit ex æquo determinata res futura, & non minus à libertate humanâ independens, quàm admissio decreti ut divinæ præscentiæ formali ratione. Quolibet pacto de rebus futuris liberis Dei decretum intelligatur, res decretas in illo Deus conspiciet. Qui enim divinam voluntatem comprehendit, res decretas ad quas determinatur, videt necessariò; non secùs ac, qui omnipotentiam comprehenderet, res omnes possibiles necessariò haberet compertas.

Addunt vix posse concipi Deum suam comprehendere voluntatem, quin, quas vult res, conspiciat, propter formalem, & transcendentalem ad res illas decretas habitudinem. Voluntas igitur pro formali præscentiæ divinæ ratione videtur omninò statuenda; cum etiam ad res decretas habeat formalem habitudinem longè majorem, quàm essentia divina, cujus nulla est ad res decretas habitudo formalis.

R. 1. Deum res futuras in essentia, non videre antecedenter ad decretum liberum, quia nulla est res futura, nisi quam Deus futuram decrevit: sed non est indè colligendum cognitionis divinæ rationem formalem esse Dei decretum: nam licet aliquid, tanquam ad effectum conditio prærequiratur, non ideò ejus est ratio formalis. Sic licet ligni ad ignem adinotio sit conditio, sine quâ lignum non comburetur; non idcirco illius combustionis est causa formalis. Et sic posito decreto tanquam conditione ad visionem, hominis voluntas remanet indeterminata.

R. 2. S. Aug. non attendisse ad illam visionis futurorum rationem formalem tanto studio à Theologis nunc investigatam : nam in hoc uno sedulam suam collocabant operam antiqui Patres, videlicet in Catholico dogmate constituendo, nec ulteriùs progrediebantur : sic sibi satis esse censuit S. Aug. si adversus Semipelagianos donum fidei esse gratuitum, & nullatenùs in meritorum prævisionem demonstraret referendum.

R. 3. Comprehendi non posse Dei omnipotentiam, quin possibilia omnia cognoscantur ; quia necessariam dicunt ad omnipotentiam habitudinem : voluntas verò Dei libera non necessarium ad hunc potiùs, quàm ad illum actum dicit ordinem.

INSTR. 6. Ideò in omnipotentiâ fiunt nota quæ possunt esse, quod cum ea habeant connexionem ; sed futura necessariam cum essentiâ divinâ hanc non habent habitudinem : concipitur enim essentia, non conceptis rebus futuris ; dicunt autem ordinem necessarium ad voluntatem, quia nihil futurum est, nisi quod Deus vult. Hinc S. Hilar lib. 9. de Trin. Quod Deus facere decrevit in suâ voluntate, cognovit. Et S. Aug. lib. de Prædest. Sanctior. c. 10. *Ea præscivit, quæ fuerat ipse factururus.*

R. Futura, sicut & quæ existunt, necessariam dicere cum essentiâ divinâ connexionem ; ut potè quæ sit omnis entis origo, & principium. Quod spectat ad SS. Patres in objectione laudatos, dico eos de ratione formali visionis Dei, nequidem cogitasse ; sed ad summum voluntatem, ut conditionem ad visionem Dei, admisisse.

CONCLUSIO VI. Non ideò novit Deus futura libera, quia futura sunt.

Prob. 1. Non enim ideò præsciuntur à Deo res futuræ liberæ, quòd futuræ sint, & à causis inferioribus pendeant ; sed ideò, inquit S. August. res sunt futuræ, quia præsciuntur. Nam lib. 6. de Gen. ad Litt. cap. 17. sic habet : *Hoc necessario futurum est, quod ille vult, & ea verè futura sunt, quæ ille præscivit : nam multa secundum inferiores causas futura sunt, sed si ita sunt, & in præscientiâ Dei verè futura sunt ; si autem ibi aliter sunt, ita potius futura sunt, sicut ibi sunt, ubi quæ præscit, falli non potest. Nec enim Deus cognitionem, vel quidpiam à creaturis mutuatur.*

2. Scientia Dei, aut præscientia, ejus est essentia ; & proindè futuræ res illius causa esse non possunt : ut enim de voluntatibus nostris loquitur S. Aug. lib. 5. de Civit. c. 9. *Ideò quidquid valent, inquit, certissimè valent, & quod futura sunt ipsæ, omnino futura sunt, quia valituras atque facturas ille præscivit, cujus præscientia falli non potest.* Et Lib. 1. c. 10. *Occurrit animo quiddam mirum, sed tamen verum ; quòd iste mundus nobis notus esse non posset, nisi esset ; Deo autem nisi notus esset, esse non posset.*

OPP. Ex Orig. apud Euseb. lib. 6. de Præp. Evang. c. 11. *Atque ut liberè quod res est eloquamur, non Dei modò prenotationem, rerum causam non esse (nec enim, quem peccaturum Deus esse previdit, eum, dum reipsâ peccat, ad facinus quasi manu deducit) sed etiam, quod à com-*

inani sensu remotius quidem, sed verumtamen idipsum est quod futurum sit ejusdem prænotionis causam esse. Neque enim idcirco, sit quod futurum esse cognoscatur; sed quod futurum sit, idcirco futurum esse cognoscitur. Et proinde non ideo res futuræ sunt, quia eas novit Deus; sed ideo novit, quia futuræ sunt; alioquin rebus futuris necessitas imponeretur; cum non possent non esse, posita Dei præscientiâ.

R. Eandem stare difficultatem quocunque modo res futuras præscisse Deus dicatur; quam tamen consequentiam negat ibidem Origenes, & ait Judæ prodicionem non necessario contigisse, sed liberè, licet à Deo præcognitam. Plurimi ex SS. Patribus, ubi de peccatis futuris agunt, non aliter quàm Orig. locuti sunt. Dicendum ergò res futuras à Deo sciri antequam fiant, secundum consequentiæ, non essendi, causam; seu, non quòd illæ futuræ res scientiæ rationem Deo præstent, sed quia novit Deus homines, prout se ad peccatum sunt liberè determinaturi; quia autem nihil eum latere potest, suntque illi omnia præsentissima; ideo quod futurum est animo complectitur.

CONCLUSIO ult. Res futuras liberas in suâ essentiâ videtur Deus notas habere, non liberas verò in omnipotentia, ut earum causâ.

De singulis illis vellem silere posse: quid enim certi de illis potest constitui? cum nihil revelarit Deus, & exclamet David Psalm. 138. v. 6. *Mirabilis facta est scientia tua ex me*; seu mirabilior est scientia tua, quàm ut ad eam possim assurgere: hinc statim adjungit: *Confortata est, & non potero ad eam*: hoc est, tam humani vim ingenii supereminet, ut nullomodo eam possim assequi. Satis igitur mihi esset aut cum Davide, aut cum Apostolo exclamare Rom. 11. v. 33. *O altitudo divitiarum sapientiæ, & scientiæ Dei*. Si quid tamen probabilius ex iis, quæ vulgò proferuntur, est proponendum; dicam magis arridere mihi sententiam, quæ futuras res contingentes, & liberas à Deo in essentiâ divinâ, rerum omnium speculo, cognosci constituit. Neque enim repræsentari videntur res illæ, seu per causas necessarias, seu per Dei voluntatem; libertatis quippè integritati timeremus indè; nec ejusmodi periculum imminet ex essentiæ divinæ conspectu: Hæc enim res liberas illæ liberrate repræsentat; quia sunt infiniti essentiæ divinæ thesauri; nullaque res esse potest, quoquomodo intelligatur, quin ut est in se repræsentetur ab essentiâ divinâ. Scimus à Theologis vulgò essentiæ divinæ rerum omnium necessariam tribui repræsentationem, ita ut etiam divinitus fieri non possit, ut præsentia, præterita, & futura per Dei essentiam non repræsententur: sicut in Dei potestate non est, scire, vel nescire quæ fieri possunt. Hæc enim isti sententiæ non nocent, si essentia divina dicatur repræsentare res omnes necessario, liberas enim, ut liberas, referet instar speculi rerum naturam non immutantis.

Quoniam odò conditionata non futura, quæ quidem forent, si quædam poneretur conditio, Deus noverit, non ita constat: varias in partes recentiores Theologi abeunt. Ut plenius quæstio explicetur, articulo sequenti de eâ nobis est agendum.

ARTICULUS TERTIUS.

Utrum detur scientia media.

SCIENTIA media dicitur cognitio rerum, quarum veritas à decreto Dei libero non pendet; cum ipsa illud prævertat. In hujusmodi autem scientiâ, ante voluntatis suæ actum liberum, nosse Deus dicitur, quid libertas hominis præstaret, si in hoc, vel illo statu constitueretur. Unde fit ut illarum actionum, seu illius objecti veritas, à creaturæ libertate pendeat, & à decreto quodam Dei conditionato; quo statuit se creaturæ intelligenti non defuturum, si auxilio divino indigeat in hoc, vel illo statu constituta. Et sic libertas creaturæ prior est scientiâ Dei; simulque decretum Dei conditionatum prius decreto absoluto.

Recens inventam esse scientiam mediam docent, & probant viri eruditissimi, scribuntque ne verbum quidem de eâ extare apud veteres Ecclesiæ Doctores; imò nullam de eâ mentionem facere priores Scholasticos, qui divinam futurorum cognitionem ad simplicis intelligentiæ, aut visionis scientiam referunt. Et licet de decretis, & consiliis Dei hypotheticas proponant quæstiones, simulque conditionales responsiones adhibeant, ad illam tamen scientiam mediam non videntur attendisse.

A recentioribus idèò excogitata fuit illa scientia, ut commodius divinæ præscientiæ, prædestinationis, & reprobationis difficultates solverentur, simulque gratiæ efficacis cum libertate concordia facilius intelligeretur.

Qui Theologi recentiorum sententiæ adversantur, scientiam extrinsecè conditionatam in Deo non diffidentur, prout ad nostras enuntiationes conditionatas de futuris, & possibilibus non futuris relationem dicit; eas enim novit Deus, similiter & earum objecta. In removendâ igitur à Deo unicâ scientiâ conditionatâ intrinsecâ laborant.

CONCLUSIO. Scientia media, seu conditionata propriè & intrinsecè in Deo videtur non esse.

Prob. his rationibus, quibus nituntur illi Theologi quibuscum sentimus.

1. Apud antiquos in exponendis mysteriis tritas vias sequi, & ab omni circa Religionis doctrinam excogitatâ recens opinione recedere, debet Theologos Catholicos Catholicè institutos. De scientiâ mediâ silent antiqui, & recentem esse scientiæ mediæ excogitationem probant viri illi eruditissimi.

2. Summus animus incedere debet timor, ubi de maximè abstrusis, & altissimis Christianæ Religionis mysteriis est agendum; cum inscrutabilia sint Dei judicia, pronuntiaritque Apostolus Rom. 11. v. 33. *O altitudo divitiarum sapientiæ, & scientiæ Dei*: & idèò ab illis ulteriùs investigandis abstinere satius nobis esse semper duximus, & acceptè ab antiquis expositioni, & doctrinæ adherere. Ab aliorum tamen studio, &

labore improbando nobis esse temperandum censemus : nostrum enim non est in viros studiosos, ac magni nominis insurgere, cum ecclesia de dogmatibus propositis nihil pronuntiavit. Liberos homines esse scimus : gratiæ necessitatem & virtutem, præscientiæ infallibilitatem simul & rerum contingentiam novimus ; sed hæc quomodo concilientur, non nosse nos malumus fateri, quàm ultra præfinitos terminos, saltem quos cognoverimus, ulterius progredi. 4. consulere dicitur hæc scientia media libertatis, quam gratia movet & juvat, integritati : hanc autem, licet ageretur à gratiâ, nihilominus illatam esse antiqui propugnavit ; nec tamen de scientiâ mediâ reor cogitasse. Neque apparet quomodo creatura in hac, aut in illâ hypochosi constituta, hoc vel illud præstatura cognosceretur à Deo, quasi auxilio Dei, aut concursu destituta aliquid boni ex seipsâ producere posset, statimque necessaria videretur alia scientia, per quam etiam Deo fieret compertum, quid auxilii illi creaturæ, hæc aut illâ in occasione præbere vellet.

3. Cur sine necessitate multiplicarentur in Deo scientiæ ? cum enim ex omnium consensu Dei scientia in se una sit & simplex, imò & essentia ipsa Dei, sanè qualiscumque scientiæ Dei divisio ex nostro concipiendi modo est reperenda : hinc si scientiæ divinæ objectum omne absque illius scientiæ mediæ intermedio cognoscamus, nihil causæ erit, cui illam adhibeamus. Quæ autem conditionata futura pro scientiæ mediæ objectis constituuntur, ad scientiam simplicis intelligentiæ, aut visionis reduci facile possunt : nam vel illa futura reverâ sunt, vel non futura, sed possibilia tantum : si primum, erunt objecta scientiæ visionis : secus, simplicis intelligentiæ.

4. Si questionem hanc perpendamus, occurrit animo in hac scientiâ quid Deo indignum maximè videlicet intrinseca conceptum & terminorum multitudo, compositio, connexio, & illatio consequentis ex antecedente ; nisi enim illa Deo insint intrinsecè, aderunt tantum exterius, quod non diffitemur, nec enim magis perfectioni divinæ officeret scientia conditionata extrinsecè, quàm quòd Deus discursus nostros habeat manifestos ; nihil enim in Deo denotat imperfectum ejusmodi cognitio, sed tantum in hominibus : negari autem non potest, quin conditionatæ cognitionis veritas in solâ cognitione consequentis ab antecedente consistat ; quod proinde in Deo imperfectionem summam diceret.

Adde nullum esse decretum conditionatum, quod non in eo, cui inest imbecillitatem, aut imprudentiam videatur arguere : nam, vel in conditionatè volentis potestate sita est conditio, sub quâ res dicitur futura ; vel non est sita : si prius ; ergò non sapientis est velle sub conditione, quæ simpliciter velle potest, & efficere : si posterius ; ergò ex eâ parte non erit omnipotens : sicque hujuscemodi decretum conditionatum, semper inefficax, & inutile erit : positus enim quamplurimis hujuscemodi decretis conditionatis, nihil unquam præstabitur, nisi decretum quoddam absolutum accesserit.

5. Si mentis nostræ lumini obsequamur, non esse admittendam ejus-

modi scientiam existimabimus. Deus enim ante liberum suæ voluntatis actum, quid à creaturâ in hoc aut in illo statu, aut in hoc aut in illo rerum ordine sit agendum quomodo nosset? nihil enim agens creatum potest, nisi præcesserit Dei voluntas, quæ hoc aut illud auxilium esse concedendum decernat. Si statuerit Deus rem contingentem esse futuram, aut illam in seipso cognosceret, & idè per scientiam visionis; aut si non in se cognosceret, sanè in causâ contingentis; de hac proindè nonnisi conjecturalem habebit cognitionem; alia enim non datur effectûs contingentis cognitio, cum in contingentis causâ cognoscitur. Non potest autem in Deo talis cognitio admitti; dubia enim esset, & falsum ei subesse posset.

6. Quæ conditionata futura dicuntur, futura reverâ non sunt, sed possibilia; cum eorum conditio nunquam sit ponenda. S. August. lib. de Prædest. Sanctorum cap. 12. & 13. ea vocat futura non futura. Item lib. 16. cont. Faustum cap. 4. definit non futurum fuisse, quod Deus non fecit; sed futurum erat, quod fecit. Præterea quod futurum est, præsentis, aut præteriti cujusdam respectu dicitur futurum; nullius autem præsentis, aut præteriti respectu futura dici possunt futura conditionata: igitur non potius dicenda sunt futura, quàm præterita, aut præsentia. Deindè si ponatur quædam successio, & quidam ordo in actibus divinis nostrâ intelligendi ratione conceptus æternitatis destruitur; cum æternitas omnem penitus successionem excludat. Cum ergò nihil sit futurum Dei respectu, & ex creatis rebus ejus scientia non pendeat; cum omnia unico conceptu complectatur; cum etiam inter futurum, & non futurum non detur medium; sicut nec inter hominem, & non hominem; cumque demùm in Deo nihil sit prius, aut posterius; sed omnia sint æterna: hanc ob causam scientia media prior dici non posset scientiâ simplicis intelligentiæ, & scientiâ visionis: non enim censeretur potest prior prioritate temporis, aut successionis: quæ enim sunt in Deo, æterna sunt, & quid unum: neque etiam prioritate naturæ, aut causalitatis se tenente, vel ex parte Dei, cum nihil sit in Deo causatum, aut ab alio pendens; vel ex parte objecti, cum objectum conditionatum non sit causa absoluti.

Ult. Futura conditionata in decreto conditionato cognosci non possunt; quia inutile est tale decretum, nempe de objecto, & conditione nunquam ponendâ. Imò posito hujusmodi decreto, v. c. de reducendis ad meliorem frugem aliquibus hominibus, si hæc, vel illa præstent, non posset Deus à peccatis ad justitiam hujusmodi peccatores revocare; nam nonnisi absolutæ voluntatis decreto talis conversio fieri posset: at tale decretum nunquam esset futurum: decretum enim prius nunquam est mutandum; cum voluntas Dei mutationi obnoxia non sit. Deindè tale decretum conditionatum prius esset; vel posterius decreto absoluto, & efficaci; vel concomitans: non potest esse prius, seu duratione, quia utrumque æternum est; seu causalitate, quia hujusmodi conditionatum non est causa decreti absoluti, sive positivi, sive negativi; non est etiam conditionatum absoluto posterius eisdem ob rationes; cum unum decretum alterius

alterius respectu rationem futuri habere non possit ; nec ratio futuri in Deo locum habeat.

Non possum quin hîc inferam quod observat S. Aug. lib. 11. de Civ. cap. 17. ubi quosdam confutans Philosophos, qui infinitorum cognitionem Deo negabant, ita loquitur : *Hîc enim maxime isti errant quod mentem divinam omnino immutabilem, cujuslibet infinitatē capacem, & innumera omnia sine cogitationis alternatione numerantem, de suâ humanâ, mutabili, angustâque, metiuntur ; & fit illis quod ais Apostolus ; comparantes enim semetipsos sibi semetipsis, non intelligunt : nam quia illis quidquid novi faciendum venit in mentem, novo consilio faciunt ; mutabiles quippe mentes gerunt ; profectò non Deum, quem cogitare non possunt, sed semetipsos pro illo cogitantes, non illum, sed seipsos ; nec illi, sed sibi comparant.* Ex aliis enim principiis non videtur esse repetendum, quod de illius scientiæ ratione proferunt authores, licet singularis eruditionis viri.

OPP. I. Quæ allata sunt superiori conclus. ut probaretur conditionatorum futurorum, quæ nunquam erunt, cognitionem Deo competere, ostendunt dari scientiam mediam ; qualia sunt, quæ Matth. 11. v. 21. Christus de Tyrionum, & Sidoniorum conversione protulit ; quæ 1. Reg. 23. v. 11. Davidi de Saûle, & Ceilanis Deus respondit ; quæ 4. Reg. c. 13. v. 19. Eliseus Joam Regem affatus est. *Si percussisses quinquies, inquit, aut sexies, sive septies, percussisses Syriam usque ad consumptionem : nunc autem tribus vicibus percuties eam ;* quæ tandem Sap. 4. v. 11. de salvandi morte præmaturâ dicuntur : hæc, inquam, omnia dari scientiam mediam evincunt ; nec enim Deus ista novit alterius scientiæ beneficio.

R. I. hæc in simplicis intelligentiæ scientiâ à Deo cognosci absolutè, seu absque ullâ hypothesi, licet hypotheticè in Scripturis enuntientur. Neque enim Deus discurret, aut quandòque hæret dubius ; licet discursus Dei plurimos Scriptura referat. Eiusmodi alia multa dubitantis animi signa, quale est istud Gen. 4. v. 9. *Ubi est Abel frater tuus ?* in Scripturis occurrunt ; licet omnia certissimè Deus cognoscat. Quippè, ut aliàs fuit observatum, loquendi rationem infirmitati nostræ, aut modo concipiendi Deus attemperat. Nec potest aliter intelligi enuntiatio hypothetica, quæ propriè tantùm illatio est. Undè si connexio sit necessaria inter antecedens, & consequens, qualis est ista, si Sol lucet, dies est ; illatio manifesta fit vera : si verò non hujusmodi sit connexio, ut, si Christianus es, dilige Deum ; in dubio est animus : hinc cum in Deo nulla sit compositio, nec ulla proinde illatio est, nec scientia hypothetica. Quod ergò sub conditione futurum in Scripturis proponitur, licet reverâ futurum non sit, futurum tamen dicitur ; quod causæ quædam naturales, sive morales ad illum effectum ponendum magis propendeant. Et verò sæpè sæpiùs, cum Deus aliquid hypotheticè futurum proponit, si malum illud sit, comminatio quædam est, quâ ad pœnitentiam nos excitet, ut quæ habentur Joan. 3. vel periculi admonitio est, aut objur-

gatio; vel aliquid aliud intendit Deus, quàm rem futuram designares; quo fit ut ab ullâ mendacii suspitione alienum sit Dei Verbum, cum aliquid futurum dicit, quod non evenit.

R. ergò ad Matth. 11. nihil aliud Christum sibi proponere, quàm incolatum Corosaim, & Bethsàidæ pertinaciam perstringendam, eamque longè majorem, quàm quæ fuit Tyrionum, & Sydoniorum, licet Ethnicorum. *Tunc capis exprobrare civitatibus, in quibus facta sunt plurima virtutes ejus, quia non egissent pœnitentiam.* Gravis hæc est inceptatio, quâ indicatur, si miracula Corozaim, & Bethsàidæ edita Tyriis, & Sydoniis fuissent concessa, simulque gratiæ Corozaim, & Bethsàidæ incolis datæ, Tyriis & Sydoniis indultæ fuissent, Tyrios & Sydonios pœnitentiam fuisse amplexuros. Undè S. Aug. lib. de Dono persever. c. 14. ait: *Non erant ergò sic excæcati oculi, nec sic induratum cor Tyrionum, & Sydoniorum: quoniam credidissent, si, qualia viderunt isti signa, vidissent.* Quòd nempè flectendæ cordis duritiei Tyrionum, & Sydoniorum par fuisset gratia, quæ Bethsàidæ, & Corozaim incolis fuerat concessa.

Ad locum 1. Reg. 23. Respondeo nihil aliud ibi indicare Deum, quam quinam essent affectus, & consilia Saulis, & Celesitarum: quidquid enim futurum erat, jam decreverat Deus: nec tamen indè sequitur idem præstare potuisse dæmonem, aut virum prudentem; solus enim Deus cordium scrutator est, solusque infallibiliter respondere potest, quænam certò decernerent homines, si in hoc, vel illo statu constituerentur.

Ad locum ex 4. Regum 13. depromptum Resp. conditionalem quidem in Eliseo fuisse scientiam, quòd Deus Eliseo revelasset toties Joam Syriam esse vastaturum, quoties terram jaculo percussisset: sed non indè sequitur conditionatam fuisse in Deo omnium cognitionem, licet conditionatam Eliseo concesserit; quidquid enim futurum erat, in visionis scientiâ perspectum habebat Deus.

Ad locum tandem ex Sap. 4. desumptum Resp. nihil aliud per ipsum indicari, quàm quòd in periculo versentur justi, & sæpiùs præmaturam mortem divinæ gratiæ beneficium esse singulare, ut exponit S. Aug. loco mox laudato ex Lib. de Prædest. Sanct. c. 14.

Nec hujuscemodi Scripturarum expositiones de earum veritate quicquam detrahunt; cum in eas antiqui omnes consenserint, nondum excogitatâ scientiâ mediâ.

INST. 1. Hæc, & similia nec ad scientiam simplicis intelligentiæ, nec ad scientiam visionis possunt ullatenus referri. Quod enim v. c. Deus 1. Reg. c. 23. respondet Davidi, ipsum scilicet à Ceilanis traditum iri, & Saulem descensurum, nequit ad scientiam visionis revocari; quia non fuit traditus David à Ceilanis, nec Saul accessit: neque etiam ad scientiam simplicis intelligentiæ; illud enim non est ex merè possibilibus; de possibilibus enim non inquirebat David: & aliundè hæc propositio, Si David maneat Ceilæ, tradetur, &c. esset in materiâ necessariâ; quod non est ita, cum pendeat à conditione contingenti. Præterea illud etiam non

est merè possibile, quod est contingens, & pendet à decreto divino, quod est totius contingentie radix.

R. ut superius, traditionem scilicet illam fuisse merè possibilem; nam futura non erat: quod enim futurum est, respectu presentis, aut præteriti futurum est; & inter futurum, & non futurum non datur medium. Hinc illa traditio, sicut & cætera conditionata non futura, nonnisi ad possibilia reduci possunt. Nec idè in materiâ necessariâ sunt collocanda: duplicis enim generis possibilia sunt: alia in materiâ necessariâ: alia in materiâ contingenti, qualis fuit conversio Judæ; alioquin hæc non fuisset possibilis, &c. quod est contra fidem. Porro autem conditionata non desinunt esse possibilia, licet à conditione contingenti pendeant; quia conditio illa quoque merè possibilis est. Cæterum possibile idè necessarium dicitur, quia necessariò est possibile; non verò, quod in se necessarium sit: possibile enim duplex est, necessarium scilicet, & liberum; sicut & entia quorum alia possibilia sunt, alia libera.

INST. 2. Magis erat futurus descensus Sautis in urbem Ceilam, quàm alter mundus possibilis. Ergò sicut ex ratione discriminis, quod intercedit inter objectum futurum, & possibile, scientia duplex admittitur, nempe visionis, & intelligentie; ita alia scientia est, quâ Deus possibilem mundum spectat, alia quâ descensum Sautis. Nisi enim magis futurus fuisset descensus ille, quàm alter mundus, frustra Davidem timor incesisset. Pariter si conversio v. c. Tyrionum non magis futura fuisset, quàm alter mundus possibilis; non esset cur in judicio universali gravius essent puniendi Corozaitæ & Bethsaitidæ.

R. Non magis futurum fuisse descensum Sautis Ceilam, quàm alterum mundum possibilem, si descensus ille in seipso spectetur. Idè autem timore justo correptus fuit David, quod Deus descensum illum, ut erat in se, non revelaverit; sed Davidem monuerit tantùm de pravo Celeitarum, & Sautis affectu. Verum est etiam mitiorem meritò futuram esse Tyrionum damnationem, quàm Corozaitarum, & Bethsaitidarum; non quod magis futura fuerit illa conversio, quàm alter mundus possibilis; sed quod illorum animi non ita in peccatis obdurati fuerint, ac Bethsaitidarum, & Corozaitarum, qui Deo monenti, & adjuvanti restiterunt, quemadmodum docet S. August. lib. de Dono persever. cap. 14. suprâ laudato. Et proindè magis hæc ratione possibilis fuit conversio Tyrionum, & Sydoniorum, quàm Corozaitarum, & Bethsaitidarum, quod nimirum gratie Dei, & ejus miraculis non ita obstituri fuissent; cum non tam indurato, & obcæcato essent corde; & idè non est par conditio; sicque justa est objurgatio.

INST. 3. Conversio Tyrionum v. c. haberi non potest merè possibilis; non enim tantùm dicuntur posse converti; sed convertendi, si facta fuissent miracula: hæc autem admodum sunt diversa.

R. non differre ista in genere possibilem: & sicut per eandem scientiam visionis, & quæ libera sunt, & quæ necessaria conspiciuntur; quia quidquid creatum existit, scientie visionis est objectum; ita per

de eâ cognitione, cui conjuncta sit voluntas dandi auxilia, ut effectus quem Deus prævidet sequatur. Sic enim omnia Deus attemperat, ut nihil sit quod non ad finem conducatur: simul etiam adjungit donis externis beneficia interna, quibus in bonum animus inclinatur; sicque præscit Deus quid in illis, & cum illis sit præstiturus. Lib. quippè de Prædest. Sanctor. c. 9. hæc habet: *Quid enim est verius, quàm præscisse Christum, qui, & quando, & quibus locis in eum fuerant credituri? sed utrùm predicato sibi Christo à seipsis habituri essent fidem; an Deo donante sumpturi; idest, utrùm tantummodò eos præsciverit, an etiam prædestinaverit Deus? querere, ac differere tunc necessarium non putavi. Proindè quòd dixi tunc voluisse hominibus apparere Christum, & apud eos predicari doctrinam suam, quando sciebat, & ubi sciebat esse, qui in eum fuerant credituri: potest etiam sic dici, tunc voluisse hominibus apparere Christum, & apud eos predicari doctrinam suam, quando sciebat, & ubi sciebat esse, qui electi fuerant ante mundi constitutionem. Item lib. de Corrupt. & Grat. cap. 12. Tantùm quippè Spiritu Sancto accenditur voluntas eorum, ut ideò possint, quia sic volunt; ideò sic velint, quia Deus operatur ut velint. Et lib. etiam de Grat. & Lib. arbitr. c. 16. Certum est nos facere, bona, cum facimus; sed ille facit ut faciamus, præbendo vires efficacissimas voluntati, qui dixit, faciam ut in justificationibus meis ambuletis, &c. Et cap. adhuc 21. Quid mirum est, si per Spiritum Sanctum operatur in cordibus electorum suorum bona, qui operatus est, ut ipsa corda essent ex malis bona.*

ARTICULUS ULTIMUS.

*Quotuplex scientia Dei? Quis in illa ordo? Quid præstet?
Quævè sit Præscientia?*

MULTIPLEX dicitur scientia Dei, licet una sit; cum ejus essentia identificetur. Varias appellationes ipsa sortitur, quòd circa varia versari concipiatur.

1. Dividitur in scientiam visionis, & simplicis intelligentiæ; prior est, quâ Deus intuetur, quæ aliquandò in rerum naturâ existunt, sive præscientia, sive futura, sive præterita sint; posterior verò versatur circa merè possibilia, quæ nunquam futura sunt.

2. In necessariam & liberam; prior est de Deo, & creaturis merè possibilibus; posterior est de contingentibus, & actu futuris, quæ ex liberâ Dei voluntate pendent.

3. In practicam, seu approbationis; & speculativam, seu simplicis notitiæ, & improbationis; prior circa bona versatur; posterior circa mala. Quibus ita positis.

C O N C L U S I O I. Scientia Dei est rerum causa, non quidem solitarie sumpta, sed prout adjunctam habet voluntatem; ita ut in divinatorum

operum partem, & societatem venire dicantur, scientia, ut dirigens; voluntas, ut inclinans; potentia, ut exequens.

Prob. 1. ex Scripturis. Psal. 103. v. 24. *Omnia in sapientiâ fecisti.* Psalm. 135. v. 5. *Qui fecit cælos in intellectu.* Et Sap. 7. v. 21. *Omni-um enim artifex docuit me sapientia.*

Prob. 2. ex S. August. qui lib. 6. de Gen. ad Litt. c. 7. citato art. 3. Concl. 6. istius Quæst. docet res idè esse futuras, quia à Deo præsciuntur. Idem lib. 15. de Trin. cap. 13. scribit res existere, quia cognitz sunt à Deo; seu habere ab ejus cognitione, quòd existant. *Universas autem creaturas suas, & spirituales, & corporales, non quia sunt, idè novit; sed idè sunt, quia novit: non enim nescivit, quæ fuerat creaturus: quia ergo scivit, creavit; non quia creavit, scivit; nec aliter ea scivit creata, quàm creanda: non enim ejus sapientia aliquid accessit ex eis; sed illis existentibus, sicut oportebat, & quando oportebat, illa mansit ut erat.* Quod iterùm repetit lib. 11. de Civit. Dei cap. 10. *Porro si sciens fecit omnia, ea utique fecit, quæ noverat; ex quo occurrit animo quiddam mirum, sed tamen verum, quòd iste mundus nobis notus esse non posset, nisi esset: Deo autem nisi notus esset, esse non posset.*

Prob. 3. hâc ratione. In Deo est nobilissîma operandi ratio: hæc autem in intellectu, & voluntate sita est; quia & dominium in operationes designat, simulque operantem sibi ipsi finem præfinire.

Cæterum simplicis intelligentiæ scientia non est rerum causa; quia tantùm est speculativa, & versatur circa ea, quæ nec sunt, nec fuerunt, nec futura sunt; nec prior est suo objecto. Restat ergò ut scientia visionis causa sit rerum, prout adjunctum sibi habet voluntatis actum.

O P P. 1. Visionis scientia res factas supponit, Gen. 1. v. 31. *Viditque Deus cuncta quæ fecerat, & erant valdè bona.* Ergò scientia visionis non est causa rerum.

R. Visionis scientiam esse æternam, & suum in tempore objectum efficere; & proindè illud non supponere: nihil aliud autem Scripturæ indicant, quàm scire Dei, aut videre, idem esse ac facere: Deus enim operando scit, & sciendo operatur.

I N S T. 1. Si Dei scientia esset rerum causa, esset tantùm causa dirigens, & ad prælegendum ex possibilibus unum præ altero Deum moveret: nihil autem in rebus possibilibus occurrit, quod non ex æquo omnibus conveniat, possibilitas scilicet: & proindè nihil voluntati divinz objicit visionis scientia, quò voluntas Dei moveatur.

R. Licetabilia ut sic, æquè sese menti offerant; ubi tamen Deus finem aliquem sibi proposuit, ex illis mediis alia præ aliis assumit magis idonea, seu quæ magis conferunt ad finem, quem sibi proposuit consequendum: hæc autem præmonstrat scientia dirigens, & voluntas Dei exequitur; & cum ex multis possibilibus Deus sibi unum sumit, ita ut in eo nihil aliud sit præter possibilitatem, quam cum cæteris communem habet, libero suo arbitrio unum præ alio eligit.

I N S T. 2. Visionis scientia decretum aliquod de re futurâ supponit;

& proinde non dirigit, nec est rerum causa, sed decretum.

R. scientiam visionis non supponere decretum: non enim Deus hæc, aut illa cæco more producit; & proinde quid, & quando sit agendum, per scientiam visionis intelligit.

INST. 3. Si scientia hæc sit rerum causa, Deus est peccati author; quia illud per scientiam visionis cognoscit.

R. Deum non esse propterea peccati causam; quia non novit peccatum in recto, sed in obliquo; nec ut velit peccatum, hominis voluntatem dirigit.

CONCLUSIO II. Scientia Dei, aut præscientia non inducit necessitatem, nec officit libertati.

Conveniunt Philosophi libertatem perimi, cum vel naturalis, vel absoluta, vel antecedens occurrit necessitas; non verò si sit necessitas hypothetica, seu consequens, & modò hypothetis à libero arbitrio pendeat. Hoc posito,

Prob. Concl. 1. ex S. Aug. lib. 3. de lib. arb. c. 3. & 4. ubi his probat rationibus Dei præscientiam non officere libertati. 1. quia Deus ipse, quæ exequitur, prævidet; nec ideò sibi libertatem aufert. Etiam homo quid ipse sit acturus, præscit; nec ideò minus liberè statuto tempore illa præstat. Potest igitur Deus eadem ratione se erga nos gerere. 2. qui homicidium à quodam homine perpetrandum præscit; non ideò homicidæ illi necessitatem imponit: ergò à pari &c. 3. hominem beatitudine donandum esse præcognoscit Deus; nec ideò tamen ille vel invitus beatitudinem assequitur. 4. quæ gerenda sunt à nobis, non solum prævidet Deus, sed etiam actus nostri rationem, seu liberum agendi modum, quo usuri sumus: & proinde non lædit, vel minuit libertatem divina præscientia; imò eam potius adstruit, cum Deus decipi non possit. 5. quemlibet actum eliciat voluntas, non potest quin liberè eliciat: ibi enim libertas, ubi est agendi, & non agendi potestas; cum nihil magis penes nos sit, quàm quod ex voluntate nostrâ proficiscitur. Hæc sunt ipsius verba ex cap. 4. de promp. *Sicut enim tu memoriâ tuâ non cogis facta esse, quæ præterierunt; sic Deus præscientiâ suâ non cogit faciendâ quæ futura sunt.* Item lib. 5. de Civ. cap. 9. probat impios minùs esse fati defensores, quàm qui præscientiam negant: *Nam, inquit, & confiteri Deum esse, & negare præscium futurorum, apertissima insania est.* His argumentis confutat Ciceronis rationes, quibus ille libertatem præscientiâ destrui contendebat; *Atque ita, inquit, dum vult facere liberos, facit sacrilegos.* Idem S. August. cap. 10. ejusdem libri probat preces cum præscientiâ Dei benè convenire: *Et preces, inquit, valent ad ea impetranda, quæ se precantibus concessurum esse præseivit.* Addit ibidem necessitatem peccandi non indè nobis imponi, quòd nos peccaturos Deus præviderit: nam si nolumus, omninò non peccamus: *Sed si peccare, inquit, noluerimus, etiam hoc ille præseivit.* Lib. quoque de Prædest. & Grat. cap. 14. his, qui Pharaonem non potuisse mutari contendebant, quia Deus eum mutatum non iri præcognoverat, Dei

QUÆSTIO DUODECIMA.

De voluntate Dei.

ARTICULUS PRIMUS.

Utrum sit in Deo voluntas? quæ? & quotuplex?

CUM in Deo sit intellectus, & ad naturæ intelligentis integritatem voluntas sit necessaria, in eo certè est voluntas; cuilibet enim naturæ inest appetitus naturalis: si natura sit sensitiva, appetitus illi inest sensitivus &c. Cum ergò Deus sit summum intelligens, summum etiam est volens; non quod appetat sibi congruentia quasi ei defint, seu quod in ea, quæ non obtinet, feratur; sed quod semetipsum, ut summum bonum, infinito amore prosequatur, & de cæteris statuatur pro libito.

Voluntas in Deo non est facultas ejus naturæ adveniens, sed ipsa Dei essentia, cui nihil possit accidere; cum Deus ab æterno sit quidquid est.

Non solum ipsa voluntas à Deo est indistincta, sed etiam ipse à nobis conceptus voluntatis actus, quo, verbi causâ, creaturas creandas decrevit, ipsasque de facto è nihilo eduxit: si enim, ut modò notatum est, quid de novo voluntati accedere videretur, simplex esse desineret.

Illa Dei voluntas est immutabilis Num. 23. v. 19. *Non est Deus, quasi homo, ut mentiatur; nec, ut Filius hominis, ut mutetur: dixit ergò, & non faciet? locutus est, & non implebit?* 1. Reg. 16. v. 29. *Triumphator in Israël non parces, & pœnitundine non flectetur.* Isaia 46. v. 10. *Consilium meum stabit.* Malach. 3. v. 6. *Ego enim Dominus, & non mutor.* Et certè si quædam mutatio in Dei voluntate contingere posset, vel ex recenter comparatâ intellectione duceretur, vel ex novo affectu, qui ex cujusdam boni desiderio oriretur; quæ omnia à Deo longè aliena sunt. Nam, ut probat S. Aug. lib. 12. Confess. c. 15. Mutabilis esse voluntas Dei non potest; quia quod æternum est, mutationi obnoxium non est; Dei autem voluntas, ut ipse Deus, æterna est. Quæ q. 5. retulimus, huc congerenda essent, si suo loco non essent inserta.

Sæpè sæpiùs suæ voluntatis mutationem videtur polliceri Deus. Nam Jerem. 18. v. 7. *Loquar adversum gentem, inquit, & adversus regnum, ut eradicem, & destruiam, & disperdam illud; si pœnitentiam egerit gens illa à malo suo, quod locutus sum adversus eam, agam & ego pœnitentiam super malo, quod cogitavi ut facerem ei.* Ejusmodi locutio, ut & aliæ plures, quæ in Scripturis occurrunt, sunt metaphoricæ. Precum enim, & pœnitentiæ nostræ efficaciam hîc Deus commendat, utpotè quarum merito, & incolumitatem, & ab imminetibus malis immunitatem penes nos sit obtinere. Sic mutat Deus sententiam, sed

non voluntatis consilium, ut rectè observat Sanctus Gregorius libro 10. Moral. cap. 23.

Dei voluntas dividitur in beneplaciti, & signi voluntatem. Per priorem, quæ Deo interior est, Deus absolutè futura constituit. Signi voluntas est externum aliquod indicium, quo Deus se velle aliquid demonstrat. Undè voluntatis divinæ appellationem sortiuntur signa illa, quæ quinque numerari solent, præceptum, permissio, consilium, prohibitio, operatio Dei.

Iterùm dividitur Dei voluntas in antecedentem, & consequentem; seu in primam, & secundam. Ex re creatâ petitur hæc divisio, non ex Deo, in quo nihil prius, & posterius. Hanc duplicem voluntatem explicat S. Chrys. Hom. 1. in Epist. ad Ephes. in hunc locum: *Secundum propositum voluntatis suæ: hoc est, ut ita dicam, ejus desiderium. Ubique enim Eudoxia, hoc enim vocabulum hic usurpat Paulus, est voluntas princeps, & quæ præcedit. Est enim alia voluntas, ut puta, voluntas prima est, ut non pereant qui peccarunt. Voluntas secunda est, ut qui facti sunt mali, pereant. Non enim eos castigat necessitas, sed voluntas. Id etiam videre licet in Paulo, ut quando dicit, volo omnes homines esse sicut me ipsum. Volo rursus juniores nubere, filios procreare. Eudoxia ergò, prima inquit, voluntas, vehemens voluntas, voluntas quæ est cum desiderio, quæ est in nobis. Hanc in Deo voluntatem, cui Angeli, & homines obstant, S. Aug. exponit in Enchirid. c. 100. ubi sic de Angelis loquitur: Quantum ad ipsos attinet, quod Deus noluit, fecerunt. Non tamen ideo læditur omnipotentia, quia de Angelis facta est Dei voluntas, quod qui non servant in bonis ordinem, ordinentur in malis, seu pœnis subjaceant. Idem cap. 101. vario sensu exponit hæc Apostoli verba, Vult omnes homines salvos fieri, aliis sensibus non exclusis; modò Dei omnipotentiae officere non videantur. Lib. quoque 2. de Civit. cap. 2. eadem exponit verba de voluntate quam in justis operatur, qui omnium salutem exoptant. Ut idipsum dicamus velle, qui ut velint isti, facit.*

Ex S. Damasc. lib. 2. Orthod. fidei cap. 29. Voluntas antecedens ex Deo manat, quâ vult omnibus salutem, & bonum: consequens verò ex nostro vitio; quæ duplex, una scilicet dispensatoria, & erudiendi vim habens; altera à desperatione proficiscens, seu ad extremam pœnam tendens; quia res creatæ spectari possunt absolutè, & in se, aut prout in his, aut illis adjunctis constituuntur. Idè duplex illa voluntas statuitur: prior, quâ res in se, & absolutè considerantur; posterior verò, seu consequens, quâ res suis adjunctis circumvestitæ spectantur.

Distinguitur item voluntas in efficientem, & permissivam; quæ divisio ex terminis satis patet.

OPP. Vel illa voluntas antecedens est sincera, vel non: si primum; ergò suos sortitur effectus, & aliquid producit; si non sit sincera, Deum dedecere palàm est.

R. Voluntatem illam esse sinceram, ut S. Chrysost. exponit. Sicut enim sincera est voluntas judicis, qui neminem vellet supplicii affice-

re: ita Deus non vult mortem peccatoris, sed magis ut vivat: vultque omnes homines salvos fieri. Hæc voluntas non est otiosa; ex eâ enim beneficia, quibus possibilia fiunt Dei mandata, seu auxilia sufficientia proficiuntur: per aliam verò, seu consequentem, & cum homine operantem, gratiæ efficaces fiunt.

ARTICULUS SECUNDUS.

Circa quæ versatur Dei voluntas? & an circa peccata, & mala pœnæ?

DEUS vult seipsum, & alia à se: cum enim Deus velit omne bonum, sitque ipse, & respectu sui, & respectu nostri summè bonus; hinc ejus essentia, & simul quæ nobis confert bona, sunt ejus voluntatis objectum.

CONCLUSIO I. Deus non vult per se mala pœnæ; sed tantum per accidens.

Prob. 1. pars. Deus per se non vult, quod ratione sui non habet quo appetatur: at pœnæ mala sunt hujuscemodi: nam eo fine sunt, ut creaturis molestiam pariant.

Prob. 2. pars. Quod ad majus bonum conducere potest, & de facto conducit, suæ utilitatis causâ potest exoptari. Sed mala pœnæ plurimum conferunt, tum ad virtutem muniendam, tum ad homines magis ac magis ad virtutem excitandos: nec enim potest Deus mala impunita pati, aut velle. Hæc ergo ratione divinæ voluntatis objectum esse possunt, & proinde ea Deus per accidens vult. Amos quippe 3. v. 6. *Si eris malum in civitate, quod Dominus non feceris?* Isaia quoque 45. v. 7. *Ego Dominus faciens pacem, & creans malum.* Item Eccles. 11. v. 14. *Bona & mala, vita & mors, paupertas & honestas à Deo sunt.*

CONCLUSIO II. Nec Deus vult mala culpæ, seu peccata per se, nec per accidens; licet ea quidem permittat.

Aliud censebant Simon Magus ex Commonit. Vincentii Lirin. cap. 34. Florinus ex Euseb. lib. 5. Hist. c. 10. Marcion, Manichæi, Priscillianistæ, Albigenes, & alii, quorum hæreses, ubi de peccatis, fusiùs referentur, & exponentur.

Prob. 1. Quia nullomodo vult Deus, quod nolle se, imò & odio prosequi per prophetas testatur. At Ps. 5. v. 5. *Non Deus volens iniquitatem tu es.* Sap. 14. v. 9. *Odio sunt Deo impius, & impietas ejus.* Habac. 1. v. 13. *Mundi sunt oculi tui, ne videas malum.* 2. cum Deus sit summè bonus, malum nunquam velle potest; cumque malum nihil sit; & rectus ordo id exigit, ut Deus odio peccata prosequatur, odit illa. Denique cum rectæ rationi peccata semper repugnent, nec ex se ad majus bonum possint conferre; hinc nec ratione sui, nec ratione alterius, Deus ea velle potest.

Peccata permittit Deus ; quia ex S. August. in Enchirid. cap. 11. *Usque adeò est omnipotens & bonus , ut de malo etiam benefaciat.* Item c. 27. *Melius judicavit de malis benefacere , quàm nulla mala esse permittere.* Et c. 96. *Nec dubitandum est Deum facere benè , etiam sinendo fieri quacumque fiunt malè.* Non enim hoc , nisi justo judicio finit : & profecto bonum est , omne quod justum est Nam nisi esset hoc bonum , ut essent & mala ; nullo modo esse sinerentur ab omnipotente bono : cui procul dubio , quàm facile est quod vult facere , tam facile est , quod non vult esse , non sinere.

O P P. 1. Per accidens saltem Deus vult peccata : nam ex S. Aug. in Enchirid. cap. 11. conducunt maximè ad illustrandum virtutis meritum , imò & ad commendandas divinarum operum perfectiones ; quod contraria contrariis opposita longè amplius illustrentur. Addit autem permisisse Deum Judæorum infidelitatem , simul & Deicidium , ut inde ad ardentioris amoris in Deum stimulos accenderentur : sæpiùsque docet , ut ibi , & lib. 1. de Civit. c. 28. gravissimo quodam lapsu quarundam virginum superbiæ mederi. Adde peccatorum pœnas esse quandòque ipsa peccata : igitur eà saltem ratione per accidens peccata vult Deus.

R. Quæ nullam iniquitatem involvunt , & cuidam bono profunt , aut conducunt , voluntati divinæ placere quidem posse ; sed non quæ sunt absolutè , & in se mala ; quæque non possunt Dei vindictam declinare. Hæc enim est divinæ misericordiæ œconomia , ut quæ sibi vulnera justo Dei judicio viribus suis permitti homines infligere , gravioribus vulneribus sanandis tanquam remedia adhibeat : quod misericordiæ divinæ infinitam virtutem , & omnipotentiam commendat ; cum ex tam gravibus malis tanta eliciat bona : solus enim Deus omnipotens , & misericors id præstare potest.

I N S T. 1. Ex se vult Deus gratiæ subtractionem , & proindè peccat : nam qui ex se vult id ex quo aliud infallibiliter sequitur , censetur & illud velle quod sequitur : peccatum autem infallibiliter ex gratia negatâ sequitur ; nonnisi enim gratiæ beneficio peccata declinantur.

R. Velle Deum gratiæ subtractionem , ut peccatorum pœnam ; non verò peccata , quæ ex gratiâ negatâ sequuntur : namque constat homines è gratiæ statu sponte suâ excidere , & sic solum hominem sui casus esse autorem.

I N S T. 2. Deus absolutè vult , quod præcipit ; hujusmodi sunt ipsa scelera : nam lib. 2. Reg. c. 16. *1. ita David de Semei : Dominus precepit ei ut malediceret David : & quis est qui audeat dicere , quare sic feceris ?* Act. 4. *1. 27.* Apostoli dicunt : *Convenerunt adversus sanctum Puerum tuum Jesum Herodes , & Pontius Pilatus cum Gentibus & populis Israël , facere quæ manus tua , & consilium tuum decreverunt fieri.* Igitur Dei decreto à Judæis , Herode , Pilato , cruci affixus fuit Christus. Et verò electum idèò fuisse Judam , qui proderet , scribit S. Aug. lib. de Corrept. & Grat. c. 7. his verbis : *Electi autem sunt ad regnandum cum Christo ; non quomodò electus est Judas ad opus cui congruebat : ah*

illo quippè electus est, qui novit benè uti etiam malis, ut per ejus opus damnabile, illud propter quod ipse venerat, opus venerabile completeretur. Cum itaque audimus: nonne ego vos duodecim elegi, & unus ex vobis diabolus est: illos debemus intelligere electos per misericordiam, illum per judicium: illos ad obtinendum regnum suum, illum ad effundendum sanguinem suum. Igitur ad regnum fuerant undecim electi, & Judas ad Domini sui necem fuerat destinatus. Præterea hominum quorundam virtutibus, tanquam mediis ad finem, quem sibi proposuit obtinendum, Deus utitur; imò & aliorum vitiis; virtutibus scilicet, ad misericordię manifestationem; vitiis verò, ad justitię significationem. Porro quia Deus hominum voluntates in bonum inclinat, ipse meritò dicitur author virtutum: sic eadem ratione author est peccatorum. Undè S. Aug. lib. de Grat. & Lib. arb. c. 21. in illud 2. Paral. cap. 21. v. 16. *Et suscitavit Dominus super Joram Spiritum Philistiim, & Arabum, qui finitimi erant Æthiopibus, & ascenderunt in terram Juda, &c.* sic habet: *Hic ostenditur Deum suscitare hostes iis terris vastandis, quas tali pœnâ judicat dignas.* Et post pauca. *Agit enim omnipotens in cordibus hominum, etiam motum voluntatis eorum, ut per eos agat, quod per eos agere ipse voluerit, qui omninò injustè aliquid velle non novit.* Et sub finem: *His, inquit, & talibus testimoniis manifestatur operari Deum in cordibus hominum ad inclinandas eorum voluntates quocumque voluerit; sive ad bona, pro sua misericordiâ; sive ad mala, pro meritis eorum: judicio utique suo aliquandò aperto, aliquandò occulto, semper tamen justo.*

R. non posse à Deo præcipi malum: nam ex S. Aug. lib. de Grat. & Lib. arb. cap. 20. *Si Semei obtemperasset Deo, laudandus potius, quàm puniendus esset; sicut ex hoc peccato postea novimus esse punitum.* Hæc tamen maledicta dici potuerunt à Deo præcepta, non prout erant peccata, sed prout pœnæ erant peccatis Davidis meritò inflictæ. Quare David ipse pœnitenti animo maledictum illud tolerandum esse censuit, ut iram Dei à se averteret; quod vel patet ex istis verbis in eodem capite lib. 2. Reg. contentis: *Et ait Rex: Quid mihi, & vobis est, filii Sarvia? dimittite eum, ut maledicat; Dominus enim præcepit ei ut malediceret David: & quis est qui audeat dicere, quare sic fecerit? Et ait Rex Abisai, & universis servis suis: ecce filius meus, qui egressus est de utero meo, quarit animam meam: quantò magis nunc filius Gemini? dimittite eum, ut maledicat juxta præceptum Domini, si fortè respiciat Dominus afflictionem meam, & reddat mihi Dominus bonum pro maledictione hac hodiernâ.* Peccare graviter Semei Rex quidem noverat; novit postmodum & ipse Semei, qui c. 19. v. 16. redeunti Davidi post Absalonis cædem, cum viris mille ex Tribu Benjamin occurrit; & v. 18. veniam ab eo postulavit, se ad ejus pedes prostravit, & impunitatem ad tempus saltem obtinuit. Hunc, quo tempore regnum Israeliticum David reciperet, interim noluit: nam ex lib. 3. Reg. c. 1. v. 8. se juramento obstrinxerat, se illum gladio non interfeciturum, quia sibi in transitu Jordanis occurrerat: attamen filio suo Salomoni

præcipit ne innoxium illum patiatur, quod sibi pessimè maledixisset : *Habes, inquit, apud te Semei, qui maledixit mihi maledictione pessimâ, quando ibam ad castra ; sed quia descendit mihi in occursum, cum transirem Jordanem, & juravi ei per Dominum, dicens : non te interficiam gladio ; tu noli pati cum esse innoxium.*

Nec etiam Deus præcepit prodicionem Judæ, & alia scelera adversus Christum ; sed illis criminibus, quæ perpetranda præviderat, usus est, ut de procurandâ hominum salute decreta implerentur, & in hoc elucescit omnipotentia, ut loquitur S. Aug. lib. de Corrupt & Grat. cap. 9. Igitur Deus peccata futura non decernit, quasi ea velit ; sed pro infinitâ suâ bonitate, ac sapientiâ utilitatem ex illis peccatis vult decerpi : quare ipse S. Aug. lib. de Lib. arb. cap. 1. & alibi, sæpius probat contra Manichæos Deo non esse tribuenda peccata ; tùm quia Deus est summa bonitas ; tùm etiam quia, ut habet cap. 10. ejusdem lib. non esset justus Deus, qui homines in peccatum impelleret. Lib. quoque 1. de ordine c. 1. ait majoris esse impietatis asserere Deum peccatorum esse authorem, quàm inferiorum curam ipsi negare. Nihil igitur aliud vult c. illo 7. lib. de Corrupt. & Grat. nisi Deum Judæ peccato ad implendam hominum reparationem fuisse usum. Peccata quoque permittit Deus, & pravis hominum voluntatibus utitur ad hoc potius malum perpetrandum, quàm illud ; non quidem positivè impertiendo malitiam, sed denegando gratiam. Idem in Enchir. cap. 95. & alibi contra Pelag. docet peccata fieri ex Dei voluntate : *Non ergò, inquit, fit aliquid, nisi Omnipotens fieri velit, vel sinendo ut fiat, vel ipse faciendo ;* quia nihil omninò fieri potest, nisi quod Deus fieri aut velit, aut permittat : vellem autem fieri mala est prave voluntatis, quæ illis delectatur ; quod alienum est prorsus à Deo : mala verò permittit, ac patitur, utpotè summus rerum provisor, cujus est rerum naturalium integritati consulere, libertati non officere. Oeconomia illa ostenditur ex S. August. lib. de corrupt. & grat. cap. 13. ut intelligatur quid per se possit liberum arbitrium ; quæ sit gratiæ beneficii necessitas, vindicisque justitiæ utilitas. Igitur ex S. August. Deus mala permittit, non invitus ; illisque pro suâ summâ potestate, atque providentiâ utiliter admodum utitur.

CONCLUSIO III. Voluntas Dei est causa rerum.

Prob. ex iis quæ suprâ laudavimus, ubi de Dei scientiâ agentes diximus creaturas ex scientiâ, ex voluntate, & ex omnipotentia Dei originem suam ducere ; ex scientiâ, ut dirigente ; ex voluntate, ut imperante ; & ex omnipotentia, ut perficiente.

Voluntatem Dei liberis hominum voluntatibus necessitatem non imponere jam fuit probatum : siquidem causas liberas liberè agere voluit. Undè cum non modò fiant, quæ statuit, sed etiam eâ ratione quâ statuit ; necessarium est, ut causæ liberæ operationes suas eliciant liberè ; sicut necessariò agunt necessariæ. Nec S. August. docet aliud Enchir. c. 103. ubi nullum fieri salvum scribit, nisi quem Deus voluerit ; & ideo rogandum esse ut velit ; quia necesse est fieri, si vo-

luerit. Non enim de necessitate antecedente, & absolutâ, sed de conditionali, & hypotheticâ loquitur.

ARTICULUS TERTIUS.

Verum Deus sit liber? & quomodo?

CONCLUSIO. Non est liber Deus quoad actus, qui ad ejus essentiam pertinent; in ceteris verò est liberrimus.

Prima pars est in aperto; non enim Deus potest non se amare; non potest Pater Filium non generare &c.

Est etiam evidens pars altera; Deus enim rebus creatis bona largitur, & aufert, prout vult. Eccles. 39. v. 8. *Si Dominus magnus voluerit, spiritum intelligentia replebit illum.* Ephes. 1. v. 11. *Operatur omnia secundum consilium voluntatis suae.* 1. COR. 12. v. 11. *Hac omnia operatur unus atque idem spiritus, dividens singulis prout vult.* Igitur quidquid extra se operatur Deus; pro libera voluntatis arbitrio, non pro necessitatis obsequio illud operatur.

Confirmatur, quia ex S. August. lib. de Fide contra Manichæos c. 28. nullam necessitatem patitur Deus; neque necessitate facit, quæ facit: sed summâ, & ineffabili voluntate, ac potestate. *Decet enim,* inquit cap. 49. ejusdem libri, *Omnipotentem facere quæ voluerit.*

Præterea si Deus fatali quâdam necessitate adstrictus, mala immitteret, aut bona conferret; supervacaneæ forent nostræ ad Deum preces, ejus ad nos hortationes &c. quod quidem impium prorsus est excogitare.

Deniquè necessitas quâ ad unum determinaretur Dei voluntas, vel esset naturalis, vel externa. Non primum; quod enim necessitate agitur naturali, non diversâ; sed semper eâdem agit ratione; Dei autem operatio hujuscemodi non est: & si tali afficeretur necessitate, ad sui similis productionem impelleretur, potius quàm ad aliquid aliud; & proinde exurgeret infinita Deorum multitudo. Nec etiam secundum, seu non potest necessitate impelli externâ; quid enim Deo est superius, & in eum obtinet potestatem?

O P P. Velle Dei est esse Dei: ergò cum esse Dei sit necessarium; ejusdem naturæ est illius velle.

R. Dei velle secundum substantiam spectatum, esse necessarium, non verò prout ad objecta externa dicit ordinem; tunc enim maximè liberum est. Quam doctrinam sæpiùs exposuimus.

I N S T. Nec est in Deo indifferentia; nec Deus ex indeterminato determinatus evadit, nec discurrit, nec deliberat, nec etiam eligit.

R. indifferentiam esse duplicem, negativam unam, privativam alteram: prior est, quâ quis nec ex se, nec ex naturâ suâ est determinatus; privativa verò, quâ quis ita est indifferens, ut nondum determinatus possit determinari. Indifferentiæ prioris argumenta sunt effectus, qui necessarium ad causam suam non habent ordinem; oritur posterior ex

vincitur Deus, qui justè justos ordinare novit, rectè ordinans in pœnis, qui perversè se ordinaverint in peccatis. Lib. de agone Christiano cap. 7. *Boni sunt, qui totà voluntate Deo serviunt; mali autem necessitate serviunt: nemo enim Omnipotentis leges evadit. Sed aliud est facere quod lex jubet, aliud pati quod lex jubet. Quapropter boni secundum leges faciunt, mali secundum leges patiuntur.*

Prob. secunda pars, quòd nempè voluntas antecedens, & signi non semper impleatur; id enim patet ex Scripturæ locis, in quibus Deus voluisse se multa testatur, quibus obstiterunt homines, ut Ezech. 24. v. 13. Voluit mundare Jerusalem, & non est mundata: vult omnes homines salvos fieri; salutem tamen non consequuntur omnes: vocat omnes; Deo vocanti, & præcipienti non omnes volunt obsequi; ejus beneficiis multi reluctantur, maluntque affectibus suis servire, quàm interiùs, & exteriùs momenti, & adjuvanti Deo morem gerere; undè ex ipsis perditio est, non ex Deo, Osee 13. v. 9.

Nec semper impletur voluntas signi; cum & Dei præcepta infringant homines, consilia negligent, prohibitiones parvi faciant. Aliam etiam Dei voluntatem non impleri docet S. Aug. l. 12. de Civit. c. 1. & 2. his verbis: *Sicut orant, Sancti, pro quibusdam piè sanctèque, & quod orant non facit, cum ipse in eis hanc orandi voluntatem Sancto Spiritu suo fecerit.* Undè multa in votis habent Sancti, quæ non fiunt: in gratiam enim peccatorum multa precantur, quæ non consequuntur, licet Deus hanc ipsis precandi voluntatem infuderit. Undè voluntas Dei dicitur esse in Sanctis, quia divinæ gratiæ opus est.

ARTICULUS ULTIMUS.

Utrùm inter Dei decreta instituendus sit ordo?

QUÆSTIO non est, num reverà inter Dei actus internos quidam prioritatis, aut posterioritatis ordo intercedat; cùm quæ in Deo sunt realiter, unica res sint, essentia nempè Dei: occurrit quidem inter divinas Personas originis ordo, quo una persona est ex alterà; sed non is, quo una sit prior alterà. Nec etiam sit quæstio, num ex objectis, quæ nostro respectu priora, & posteriora sunt, possint denominari priora, & posteriora Dei decreta: hæc enim denominatio extrinseca ex solâ intellectûs hominum infirmitate reperitur, qui hunc ordinem in Dei actibus statuit, quem in suis operationibus deprehendit, & qui v. c. nihil eligit, nisi quod diligit, nihil etiam diligit, nisi quod bonum judicavit.

Alium quidem inter decreta Dei antiquis incognitum constituunt ordinem ex recentioribus quidam Theologi, quem ad abstrusissimas Theologiæ quæstiones, de gratiâ, de prædestinatione, & de concordia libertatis cum præscientiâ illustrandas aptissimum esse prædicant. Plurima nempè instantia supponunt; & in primo, hoc, vel illud decrevisse Deum; in secundo, novum aliquid, & sic de cæteris, constituunt.

CONCLUSIO. Videtur nobis inutilis, nec decere divinam maiestatem, hic divinorum decretorum ordo.

1. Inutilis videtur, quod absque tali ordine difficultates omnes solverint Patres antiqui; etsi quid eorum intelligentiæ viribus impervium esset, illud ut mysterium adoraverint; nec sibi fas esse, aut tutum existimaverint ulterius hæc mysteria perscrutari.

2. Deum non decere videtur ille ordo: nam si in decretis ideo admittendus est quidam ordo, quod nos hunc, vel illum ordinem in nostris deprehendamus consiliis: ergo Deus à pari discurret, in deliberationem multa vocabit, ut, quæ ad finem comparandum conducant, comperire possit; & proinde plurimorum inscius erit dicendus. Nos quidem mentis imbecillitate cogimur in multos partiri conceptus, quæ præ multitudine uno actu complecti non possumus; non ea autem est intelligendi ratio in Deo.

3. Quod sit quidam ordo naturæ, & causalitatis inter causam, & effectum; gloriam, & merita; non ideo inferitur duplicem esse in Deo voluntatem; alteram priorem, nempe causam; posteriorem alteram, nempe effectum. Vult enim quidem Deus causam priorem esse suo effectui; sed non ideo prius vult causam, quam effectum: uno enim & eodem actu utrumque vult: sic qui uno intuitu scalam intuetur, unum quidem gradum videt primum, alterum secundum; non tamen primo unum, deinde alterum aspicit; sed simul gradus omnes intuetur. Sic licet dicatur Christus prædestinatorum primus, non sequitur in Deo prius quoddam esse decretum de Christi prædestinatione; sed tantum prædestinationem Christi externam, æternæ hominum cæterorum prædestinationis causam esse finalem, & exemplarem.

4. Non solum istum ordinem arguit ejus adinventionis novitas, & inutilitas; sed & sententiarum de illo varietas: aliter enim sentit Scotus, aliter Suarez, aliter Vasquez, aliter Delugo, aliter Hurtadus, aliter Salazar, aliter alii. Vel hoc solo argumento satis apertum sit, recens inventa esse talia decreta.

Si quis igitur ordo inter Dei operationes esset instituendus, nullus foret intrinsecus, sed tantum extrinsecus. Parcent Theologi opinionum illarum authores, si timeam mihi, cum Patres Sanctos non sequor, videaturque gravissimum imminere periculum, ne, cum Deus aliquid prius, aliquid postea velle dicitur, præbeatur occasio existimandi prius, & posterius aliquid esse reale in Deo distinctum. In Codicibus sacris aliud nihil deprehenditur, quam, ubi Deus aliquid ante sæcula statuisse dicitur, significari Deum ab æterno hoc, vel illud decrevisse. Aliundè qui hunc decretorum constituunt ordinem, in Deo nihil esse successivum fatentur, sed omnia quid unum esse, & indistinctum. Nec quomodo hic decretorum ordo intellectum nostrum juvet, video. Addimus quod cum in Deo nullum sit decretum conditionale, nec etiam scientia media. Hinc illius inter decreta ordinis fundamenta penitus corruunt. Successio autem illa, & ordo repugnaret æternitati; quia hæc quidem variis tem-

poribus extra Deum respondet; non verò variis instantibus, quæ in Deo sint.

OPP. Qui ordinatè aliquid vult, vult priùs finem, deindè mediâ, & proindè mediâ viciniora. 2. remotiora: Deus autem ordinatè omnia vult. Rom. 13.

R. velle quidem Deum existere in rebus ordinem rerum, ut mediâ finem præcedant; sed uno & eodem actu. Ex imbecillitate autem nostrâ fit, ut priùs unum, quàm aliud velimus.

QUÆSTIO DECIMA-TERTIA.

De omnipotentiâ Dei.

ARTICULUS.

*An Deus sit omnipotens? & in quibus sita sit
omnipotentia?*

DE Dei omnipotentiâ dubitarunt Judæi, de quibus Ps. 77. v. 19. dicitur: *Numquid poterit Deus parare mensam in deserto?* Negavit Rabsaces 4. Reg. cap. 18. v. 35. Et cap. 19. v. 10. imparem dixit Judæorum Deum, qui Sennacheribi manibus Judæos, & Ezechiam eripere posset.

De omnipotentiâ quoque malè sensisse videntur Petrus Abailardus, & Joannes Vviclephus, sicuti post nonnullos tradit Alphonsus Castrensis lib. 7. adversus hæreses; dixerunt enim potentiam Dei, & actualem creationem ejusdem esse mensuræ; adeò ut non valeat Deus plures res creare, quàm creavit; nec aliter res facere, quàm fecit.

CONCLUSIO I. Deus est omnipotens.

Prob. 1. Res in aperto est, Gen. 8. v. 14. *Numquid Deo est quidquam difficile?* Num. 11. v. 23. *Numquid manus Domini invalida?* Jobi 42. v. 2. *Scio quia omnia potes.* Jerem. 31. 17. *Non erit tibi difficile omne verbum.* Math. 19. 26. *Apud homines hoc impossibile est: apud Deum autem omnia possibilia sunt.* Sic etiam Marci 10. v. 27. & Luc. 18. v. 27.

2. Antiquorum auctoritates adducere superfluum esset; hæc enim veritas ità comperta est, ut scribat antiquus doctor: *Non dico, da mihi Christianum, da mihi Judæum; sed da mihi pagani, Idolorum cultorem, Dæmonum servum, qui non dicat Deum esse omnipotentem: negare Christum potest; negare omnipotentem Deum non potest.*

3. Nulla Deo neganda est perfectio summa, cujusmodi est omnipotentia.

4. Si non esset Deus omnipotens, Deus non esset; intelligeret quod

non posset; & sic majus esset Dei intelligere, quàm posse; & posse Dei, non esset esse Dei; aut scilicet Deus major, aut minor foret: quæ omnia implicant. Ità autem omnipotens est, ut ne verbum quidem in ejus decretis mutare possit homo, ut constat ex Num. cap. 22. v. 18. cap. 23. v. 8. 20. cap. 24. v. 13.

5. Quia Deus est omnipotens, defectibus nostris obnoxius non est, peccare non potest, nec mentiri: nam ex S. Aug. magna Dei est omnipotentia non posse mentiri; nec ideo minus potens est Deus, quia peccare non potest; cum omnipotens esse non possit, qui hoc potest. Item lib. de nat. & grat. cap. 49. & aliis in locis docet esse quamdam divinæ illius potentie excellentiam, & virtutis exuberantiam, quòd Deus à defectibus immunis, & alienus sit.

CONCLUSIO II. Potest efficere Deus alia, eaque perfectiora, quàm quæ condidit.

Prob. 1. Potuit Deus, & potest omnes omnino homines gratiâ, & justitiâ donare. Potuit Sap. 11. v. 18. Ægyptiis immittere urforum multitudinem, leones audaces, vaporem igneum. Potuit è cælis Angelorum multitudinem evocare. Math. cap. 26. v. 53. *An putas*, inquit Christus, *quia non possum rogare patrem, & exhibebit mihi modo plus quàm duodecim legiones Angelorum?*

2. Si Deus alia non posset efficere, eaque meliora iis quæ condidit, potentia non esset infinita; operibus enim creatis coerceretur ejus potentia, nec fines præscriptos valeret transilire; & sic Dei omnipotentia illius essentia non identificaretur: infinita enim esset essentia Dei, & finita esset ejus omnipotentia: quæ omnia implicant.

3. Ex hæc veritate supposuerunt, plurimaque collegerunt antiqui, ut Tertul. lib. contra Prax. cap. 10. Hinc infert S. Athanas. orat. 3. cont. Arianos, non statim advenisse Christum. S. Aug. in Enchir. c. 95. & lib. de nat. & grat. cap. 7. sic habet: *Quia Dominus Lazarum suscitavit, sine dubio potuit: quia verò Judam non suscitavit, numquid dicendum est, non potuit? Potuit ergò, sed noluit: nam si voluisset, eadem etiam hoc potestate fecisset; quia & filius quos vult vivificat.* Et lib. de Spir. & Litt. conclusionem nostram probandam sibi sumit. Marcellinum scilicet moverat hæc S. Aug. propositio, posse hominem divinâ gratiâ adjectum ab omni peccato esse immunem; ex hominibus tamen nullum hanc gratiam, aut esse consecutum, aut esse consecuturum. Cap. autem 1. multa Deum posse probat quæ non contigerint, ut per foramen acus camelum traducere; duodecim Angelorum legiones immittere; item & nova moliri posse tormenta, quibus peccatores torqueantur. Lib. quoque de agone Christ. cap. 11. ait aliâ ratione in orbem prodire potuisse Christum, quàm ex muliere, nempe non assumpto corpore; sed aut ex cœlesti, aut ex aliâ materiâ; alia ipsi præstò fuisse media, quibus nos à calamitatibus, & peccatis liberaret; potuisse quoque aliam nascendi, & moriendi rationem sibi eligere.

Et verò si Deus nihil, nisi quod est optimum, constitueret; nec

melius quid valeret producere, certè nihil nisi Angelos, & homines crearet; nec etiam quàm homines, & Angelos libertate instruxit, instruxisset, & in quodam impeccabilitatis statu collocasset.

O P. 1. Abailardus lib. 3. Introductionis Theolog. c. 5. sic ratiocinatur: Nihil nisi bonum Deus facere potest, & rationi consentaneam habet actûs sui causam. Undè necessariò agit quæcumque agit; & proindè nec ab opere, nec ab operis ratione abstinere potest: alioquin impotentia esset inculandus, si, quod optimum judicavit, non efficeret; vel invidia esset infimulandus, si noller. Quàm ratione S. August. nritur lib. 83. quæst. q. 63. ut Filii Divini cum Patre æqualitatem inferat.

2. Nulla ratio occurrit, ex Abailardo, quàm Deus dicatur aliquod consultò bonum prætermisisse: nam si quædam occurrat ratio, bonum illud omittere non debuit. Ex quibus concludit Deum solum illud bonum facere posse, quod fecit; quam opinionem fatetur, & à Sanctorum dictis, & à ratione aliquantulum dissentire. In utramque partem quæstionem prius moverat; sed demùm concludit nihil posse Deum, nisi quod fecit.

R. 1. satis esse ab hâc sententiâ nos tùm invictarum suprâ rationum pondere, tùm opinionis, ex ipso Abailardi consensu, novitate deterreci.

R. 2. Verum quidem est Deum non posse, quin à peccato abhorreat, licet penes ipsum sit, aut illud permittere, aut prohibere; cum Deus solus boni supremi rationem obtineat: alia verò inter utilia, & media bona sunt referenda; hinc ex illis quamplurimis illud, vel aliud pro libertate suâ, & voluntate seligit, ut hunc, vel illum ad gloriam illustrandam aptiorem ordinem in creaturis instituat: quis autem consiliarius ejus fuit, sicut habet Apost. ut audeat, vel à Deo institutum opus carpere, vel proferre, cur ita fecerit, vel non fecerit Deus?

Ad rationem ex S. Aug. petitam dico, creaturarum, & Filii æterni conditionem esse variam: Filius enim in omnibus Patri æqualis esse debet, ut qui sit ejusdem cum eo substantiæ. In Arianorum confutatione solvetur argumentum ab illis hæreticis de voluntariâ Filii Divini generatione. Satis sit hâc statuisse non idem judicium de rebus creatis, ac de Dei Filio esse ferendum: ejus quippè perfectionis non est creatura, cui nihil addi possit; nam creaturæ rationem deponeret. Quàm ratione Deus rei creatæ invidere dici posset, non capio: cum à se invicem infinito discrimine distinguantur, nihilque in creaturâ emineat, quod ab illo fonte supremo non fuerit derivatum.

I N S T. 1. Optimi est semper optimum instituere; ac proindè Deus nihil nisi præstantissimum potest efficere; sicque nihil melius v. c. unione hypostaticâ, nihil præstantius beatâ Virgine.

R. 1. esse optimi optima efficere quoad modum; sed non quoad rem: cum autem Deus, ut observatum est, nihil non divinâ ratione operetur; hinc ejus opera omnia conficiuntur semper summa sapientiâ, & potentiâ: non verò quod est præstantissimum ille exequitur; nec est ne-

cesse divinam exhauriri potentiam, cui nullus commensurari potest effectus.

R. 2. Christi naturam consideratam, ut Verbo conjunctam, digniori hypostasi non posse conjungi, ut nobilius constituat suppositum, quàm quod Christus est; sed naturam Christi humanam, ut in creaturarum ordine spectatam, ceteras res creatas actu è nihilo educatas, aut quæ possint creari, perfectione non superare; cum Angeli præstantioris sint naturæ, & ex hominibus plures præstantioris fuerint formæ corporeæ ipso Christo, possitque Deus res creatas longè perfectiores efficere.

Idem de Beatâ Virgine dicendum; nulla quidem excogitari potest superior dignitas, quàm quæ est Deiparæ; sed non inde colligendum est B. Virginem res creatas omnes corporis dotibus, vel donis naturalibus superasse.

INST. 2. Sapientia Dei est media constituere, quæ magis ad gloriæ suæ significationem conducant; proindeque, semper quod est optimum efficere.

R. ad finem sibi propositum consequendum seligere Deum, & constituere media magis idonea: nam Sap. 8. v. 1. *Deus attingit à fine ad finem fortiter, & disponit omnia suaviter.* Nec proinde perfectissima quælibet efficit, ob rationes allatas. Dei gloria, non ex operis perfectione, sed ex operandi modo elucescit; nec minùs conferunt ad Dei gloriam manifestandam, quæ viliora nostris oculis obversantur; imò & minutissimis quandòque operibus longè ampliùs illustrari videtur: non enim mirum, si perfectissimus perfectissima possit; sed quòd se ad vilia deiciat: hinc illius magnitudo illustratur; cum præsertim ejus opera hominum commodis interviant. Qui gloriæ splendor è creaturis in Deum refertur, ex hujus, aut illius creatione non oritur; sed ex hominis beneficiis cumulati gratitudinis significatione: in procurandis enim suæ imagini, seu homini, commodis, gloriam suam Deus omnimodam, ex SS. Patribus, constituit.

O P P. 2. Peritissimi artificis est opus moliri perfectissimum; omnem enim suam industriam in opere collocat, & exhibet. Quis autem artifex Deo non inferior?

R. peritissimi esse artificis in operibus elaborandis perfectissimis operam collocare, quòd ex ejus operibus pendeat ipsius commendatio integra, & omnem opificis industriam postulet operis natura, & artificis conditio. At Deus nullâ lege ad opus conficiendum tenetur; nec ex operis præstantiâ, sed ex operandi ratione suam gloriam Deus excerpt, & ex proportionem operum ad fines, quos sibi proponit. Sic v. c. perfectior est Angelorum nunc beatorum conditio, quàm quæ fuit virtutum: suavius tamen fuit Angelos creare in statu, in quo peccare possent, quàm in statu impeccabilitatis, ut commendaretur Dei æquitas, sapientia &c. Non ergo unius tantùm attributi habenda est ratio, sed omnium Dei attributorum; cum de Dei gloriâ agitur.

CONCLUSIO III. Non potest Deus efficere, ne præterita sint non præterita; nec idèò minùs omnipotens est habendus.

Prob. 1. Ex S. Aug. lib. 26. contra Faust. c. 5. *Quisquis itaque dicit, si omnipotens est Deus, faciat, ut qua facta sunt, facta non fuerint; non videt hoc se dicere, si omnipotens est, faciat ut ea qua vera sunt, eò ipso quò vera sunt, falsa sint* Sententia quippè, quàm dicimus aliquid fuisse, idèò vera est, quia illud de quo dicimus, jam non est. Hanc sententiam Deus falsum facere non potest, quia non est contrarius veritati. Hinc non potest Deus, ut quod contigit, non contigerit; nec idèò minus potens; quia effici illa non possunt, nisi spectentur in se, seu in sensu diviso, ut dicitur; sensu enim illo præterita potest efficere Deus omnipotens. Undè vera est hæc propositio, Deus potest carnem induere, carnem nostram licet assumpserit; quia Dei voluntas, & potentia, quibus humanam naturam induere voluit, & induit, nec mutationi sunt obnoxia, aut variis temporis differentiis; nihilque præteritum est, aut futurum respectu Dei. Si verò in sensu composito consideretur omnipotentia, prout connotat, & habitudinem dicit æternam ad id, quod respectu nostri præteritum est; in omnipotentia situm non est quod ita gestum est: nec idèò quidquam omnipotentia detrahitur: non enim ex imbecillitate oritur, quod non possit, ne præterita sint non præterita; sed ex parte ipsorum præteritorum, quæ non possunt non esse præterita: & proindè cum Deus in errorem labi non possit; nec simul possit esse verum, res præteritas esse præteritas, & non præteritas: hinc non est in Deo imbecillitatis argumentum, quod efficere non possit, ut præterita non præterierint.

CONCLUSIO ult. Potentia Dei infinita est; & idèò omnipotens est Deus, quòd pati nihil possit, omniaque possibilia, seu quæ contradictionem non involvant, præstare & efficere.

Prob. 1. Potentia Dei est essentia Dei; quæ enim sunt in Deo, realiter ab ejus essentia sunt indistincta: alioquin Deus non esset simplex, & proindè cum nullis omnino limitibus coërceatur Dei essentia, ejusdem latitudinis est ejus omnipotentia, entium omnium fons, ut docet S. Aug. lib. 26. contra Faust. cap. 5. Entium nullum est possibile, quod à Deo non sit, aut esse possit, & debeat.

2. Si Deus omnia possibilia efficere non posset, ad certam entium speciem definita esset ejus potentia, & sic non esset omnipotens: at virtute suâ omnia valet exequi. Undè S. Aug. in Enchirid. c. 100. probat nihil esse quod divinæ voluntati non cedat; neque contrariis creaturæ conatibus posse Dei voluntatem retardari, aut impediri. Igitur nihil non potest Deus, quod fieri possit, seu quod contradictionem non involvat: censetur autem aliquid contradictionem involvere, cum subjecto prædicatum repugnat, ut hominem fieri animal irrationale: hæc autem non potest, quia sunt impossibilia.

Ultimò. Ex S. Aug. lib. 5. de Civit. cap. 10. *Dicitur omnipotens faciendo, quod vult; non patiando, quod non vult;* pati quippè non potest Deus; quia nihil Deo est superius, à quo lædi possit; nec inferius, à quo corrumpi.

QUÆSTIO DECIMA-QUARTA

De justitiâ, & misericordiâ Dei.

ARTICULUS UNICUS.

*Utrum in Deo sint misericordia & justitia ?
& quomodo ?*

DIVINAM justitiam exosam habebant Marcionitæ, & damnabant ut iniquam; idcirco à Deo suo, quem optimum prædicabant, longè amandandam esse arbitrabantur, ex Tertull. lib. 2. contra Marcionem cap. 11.

Adversabatur verò misericordiæ Basilides, adeò ut ne ipsa quidem ignorantix peccata condonari contenderet, ex Sancto Clemente Alexand. lib. 4. Strom.

CONCLUSIO 1. In Deo justitiâ est:

Prob. 1. tum ex Psal. 10. v. 8. *Justus Dominus, & justitias dilexit:* tum ex innumeris aliis scripturæ locis, quæ prætermittimus. Sic autem adversus Marc. lib. 2. cap. 11. citato Tertull. *Si non judicem agnoscat, certè perversum ac vanum discipline non vindicanda, id est, non judicanda constitutorem: Etsi grave malum injustitia est, boni loco habenda est justitia: Nec species solummodò, sed tutela reputanda bonitatis; quia nisi justitiâ regatur, ut justa sit, non erit bonitas, si injusta sit; nihil enim bonum, quod injustum: bonum autem omne, quod justum.* Etiam c. 12. & 13. ait justitiam Deo esse naturalem, & ex ordine esse, quòd meritis gratia conferatur: Itemque justitiæ opera, bonitati esse tribuenda. Ita omne hoc justitiæ opus procuratio bonitatis est: quod judicando damnat, quod damnando punit, quod, ut dicitis, servit; utique bono, non malo proficit. Denique timor judicii ad bonum, non ad malum confert: non enim sufficiebat bonum per semetipsum commendari, jam sub adversario laborans. Nam etsi commendabile per semetipsum, non tamen & conservabile; quia expugnabile jam per adversarium, nisi vis aliqua præset timendi, quæ bonum, etiam nolentes, appetere & custodire compelleret. A gravissimis, quibus creator nos percussit, minis abhorreamus licet; vix tamen à peccatis, aut averti, aut nos continere possumus. Quid ergò mali præteriremus, si nihil timendum occurreret? Sic cum bono soli faveat justitia, mali notam quomodò sustinere potest? Si verò impunitum, aut omni supplicio, authore Deo, eximeretur crimen; ut justitiæ inimicus nonne traducendus esset Deus? cùm ejus autoritate nixum scelus triumphum ageret. Additque: *Quis boni author, nisi qui & exaltor? proinde quis mali extraneus, nisi qui & inimicus; quis inimicus*

inimicus, nisi qui & expugnator? quis expugnator, nisi qui & puniret? Sic totus Deus bonus est, dum pro bono omnia est. Sic denique Omnipotens, quia & juvandi, & ledendi potens. Usque adeo justitia etiam plenitudo est divinitatis ipsius, exhibens Deum perfectum, & Patrem, & Dominum: Patrem, clementiâ; Dominum, disciplinâ; Patrem, potestate blandâ; Dominum, severâ; Patrem, diligendum piè; Dominum, timendum necessariè: diligendum, quia malis misericordiam, quàm sacrificium: & timendum, quia nolis peccatum. Sic & Lactant. lib. de irâ Dei cap. 18.

2. S. August. lib. 3. de lib. arb. cap. 15. addit justitiæ divinæ nihil subtrahi, & hominem, quod debet semper Deo præstare, aut obsequendo, aut patiendo. Si non reddit faciendo quod debet, reddet & patiendo quod debet. Et epist. 140. Honorato, cap. 2. Nec efficit animas perverse utens creaturis, ut ordinationem effugias creatoris; quoniam si illa malè utitur bonis, ille benè utitur etiam malis; ac per hoc illa perverse bonis utendo fit mala; ille ordinatè etiam malis utendo, permanet bonus. Qui enim injustè se ordinat in peccatis, justè ordinatur in pœnis. Non igitur potest Deus, quin æquam à peccatoribus vindictam sumat; alioquin & ordo inverteretur, peccata foverentur, opprimeretur justitia, in Deum referretur iniquitas &c.

O P P. 1. Non potest censerì justitia attributum, quod Deo naturaliter insit, ut quæ sit Deo extranea, & ex pravis hominum affectibus orta. Ex Tert. lib. de resurr. carn. cap. 14. Accipe igitur & causam, qui apud Deum meum discis tam optimum, quàm & justum: de suo optimum, de nostro justum. Nisi enim homo deliquisset, optimum solummodo Deum nosset, ex natura proprietate. At nunc etiam justum eum patitur ex causa sua necessitate: tamen & hoc ipso optimum, dum & justum. Et bono enim juvando, & malo puniendo, justitiam exhibens, utramque sententiam bono præstat; hinc vindicans istud, inde remunerans illud. Item l. cont. Hermog. c. 3. judicem non potuisse Deum esse probat ante delictum; nec eâdem ratione esse judicem, ac Deum; cum ab æterno Deus sit, non judex.

R. ex nostro justum esse Deum, exponente ipso Tertull. quod nimirum iniquitas nostra Deum in absolutam exercendæ justitiæ necessitatem inducat, ut qui malum non possit impunitum pati: pati autem nequit, quia optimus est, & bonum autoritate suâ tutatur; malum verò propulsat. Sic ex se pronus in bona conferenda; in mala verò infligenda impellitur tantum occasione datâ, videlicet positis hominum sceleribus.

O P P. 2. Marcionitæ volunt Deum injustum esse dicendum; cum peccata parentum in filiis esse mulctanda decernat in quartam generationem Exod. 34. v. 7.

R. cum Tert. c. 15. l. 2. c. Marc. pœnas illas benignitati Dei tribuendas esse, ut illas veriti parentes, posteris suis non nocerent admodum, & legi divinæ obedirent. Addit insuper Ezech. 18. decrevisse Deum pro propriis peccatis filios tantum mulctandos esse postmodum, ut post duritiem

populi, duritiâ legis edomitâ, justitia jam non genus, sed personae judicaret. Quamquam si Evangelium veritatis accipias, ad quos pertineas sententia reddentis in filios patrum delicta cognosces: ad illos scilicet qui hanc ulterò sibi sententiam fuerant irrogaturi, sanguis illius super capita nostra, & filiorum nostrorum.

CONCL. II. Propriè non est in Deo justitia commutativa, benè tamen distributiva.

Prima pars sic ostenditur; quia justitia commutativa in dati, & accepti qualitate posita est: nihil autem Deo contulimus, aut conferre possumus. Unde Rom. II. v. 35. *Quis prior dedit illi, & retribuetur ei?* Et Ecclesia Dominicâ 6. post Pentecosten: *Cujus est totum, quod est optimum.*

Est tamen in Deo quidam justitiæ commutativæ modus. Sicut enim patrem inter, & filium; licet non sit propriè dicta justitia commutativa; quòd à patre accepta beneficia nunquam referre possit filius: nihilominus justitiæ commutativæ nonnihil deprehenditur, cum officio suo erga patrem non modò non deest filius; sed & nihil non exequitur quo memorem suum animum possit testificari. Pariter si omnem operam in implendâ divina voluntate, ejusque servandis legibus homo collocet, justitiæ commutativæ modus quidam occurrit; præsertim cum vitæ æternæ præmium Deus polliceri sit dignatus: & proindè partim gratiæ, partim promissioni est tribuendum, quod hominum meritis Deus rependit. Undè S. Aug. l. 5. Conf. c. 9: Deum alloquens, sic habet: *Dignaris, quoniam in seculum misericordia tua, eis, quibus omnia debita dimittis, etiam promissionibus tuis debitor fieri.*

Altera pars ita probatur; quia justitia distributiva est in eo propriè qui rependit præmia pro meritis: at Deus sic se gerit: Nam ex S. Dionysio, seu autore libri de divinis nominibus cap. 8. *Omnibus tribuis propria secundum uniuscujusque existentium dignitatem.* Quam quidem doctrinam passim tradit S. Augustinus, tum lib. 4. cont. Julian. cap. 3. tum & lib. de nat. & grat. cap. 2. & alibi.

Et sanè justitia distributiva annexos non habet defectus, qui reperiuntur in justitiâ commutativâ. Nam justitia distributiva non arguit in distribuyente debitum aliquod simpliciter, ortum nempe ex acceptione rei quam alius dedit: siquidem potest Princeps justè bona communia distribuere, licet ab iis, quibus illa distribuit, nihil accipiat, aut expectet. Si quæ autem obligatio justè bona partiendi est in distributoribus, oritur à legibus quibus illi sunt subjecti: undè cum Deus nullis superioris legibus sit subjectus, sed ratio propriæ sapientiæ sit ipsi tanquam lex justitiæ, uti aptè admodum docet S. Thomas, certè sine ullâ obligatione potest justè præmia distribuere.

CONCL. III. Misericordia in Deo non est secundum affectum; cujusmodi laudatur in hominibus, qui calamitosum aliorum statum miserantur, seu quorum cor quasi miserum sit malorum aspectu; iis enim affectibus Deus non est obnoxius; sed est in Deo secundum effectum: nam misericordiâ suâ Deus vitis nos liberat, pœnas interminatus infligendas: nos

ab illis hac in vitâ eximit, cum ad meliorem vitæ frugem cedimus. Sic exponit S. Aug. in Pl. 135.

Prob. ex Pl. 102. v. 8. *Misericors, & Miserator Dominus.* Ubi de Deo ut summo bono actum est, plurimis argumentis hanc veritatem firmavimus, videlicet divinam maiestatem decere maximè misericordiam. Undè Clem. Alex. l. 2. Strom. soli Deo misericordiam convenire probat, quòd solus Deus supremam in nos potestatem obtineat; quòd utilitatem ex nobis nullam possit percipere; simulque malis, quæ undiquè imminant, nos valeat eripere: hinc, ut omnium malorum gravissimum, iniquum hominis de suâ misericordiâ iudicium mulctat pœnis omnium gravissimis; cum enim Ezech. 9. v. 8. imminentes Jerusalem calamitates videret Propheta, exclamat: *Ergò ne disperdes omnes reliquias Israël?* Et respondet Dominus: *Iniquitas domus Israël, & Judæ, est magna nimis valde. Dixerunt enim, dereliquit dominus terram, & dominus non videt. Igitur & meus non parces oculus, neque miserebor.*

CONCL. IV. In Deo sibi non adversantur justitia, & misericordia.

Prob. 1. Effectus oppositos licet elicere videantur, aut contraria præstare, justitia, & misericordia; non desunt tamen esse unum quid; cum quidquid in Deo est, Deus sit. Undè idem Deus immutatus manens, non merenti beneficium præstans, dicitur misericors; & sceleris reum meritis calligans, justus appellatur. Quamobrem adeò non sibi invicem reluctantur; quinimò, si quoad effectus spectentur, sibi invicem ut comites semper adhærent, simulque operationes suas eliciunt; hinc Pl. 24. v. 10. *Universa via domini, misericordia & veritas.* Et certè cum Deus impium ab impietate avocet, vel peccatorem damnationi æternæ addicit, aut impletur quod docet S. Jacobus c. 2. v. 13. *Judicium sine misericordiâ illi, qui non fecit misericordiâ:* Tunc & quæ opera misericordiæ tribuuntur, sine justitiâ non sunt; nec quæ justitiæ tribuuntur, sine misericordiâ. Undè Cassiodorus in Psal. 100. *Misericordiam, & iudicium cantabo tibi domine:* sic habet: *Potestas domini semper misereatur, aut judicat; sed nec ipsius misericordiâ sine iudicio, nec iudicium sine misericordiâ reperitur.* Neque enim Deus damnatos condignis mulctat suppliciis; & sic quædam misericordiæ ratio in damnatione ipsa occurrit: cum verò peccatori peccata condonat, & justitiâ infundit, licet misericordiæ solus opus justificatio videatur, suas etiam in eâ justitiâ partes obtinet, in quantum pœnitens in seipsum peccata vindicare tenetur; sicque ex S. Augustino aliquid iniustitiæ in Deo esset, si pœnitentem à peccatore non secerneret: ita enim scribit in expositione inchoatâ in Ep. ad Rom. *Sed hoc planè justum est apud Deum: quia verè justum est, ut ii, quos peccatorum suorum pœnitat, eo tempore, quo nondum pœnarum manifestus terror apparet, misericorditer separentur ab eis, qui diffensiones peccatorum suorum pertinaciter exquirentes, nullâ pœnitentiâ corrigi volunt.* Item Ep. 5. Marcellino. *Cum evertit subsidium vitiorum, & copiosas libidines inopes reddit, misericorditer adversatur.* Et antea. *Nihil est infelicius felicitate peccantium, quâ pœnalis nutritur impunitas, & mala voluntas velut hostis inte-*

rior roboratur. Proindè nunquam à se divelluntur justitia, & misericordia: Misericors enim Deus pœnas infligit Levit. 26. v. 16. 17. 18. 40. & 41. Deuter. 13. v. 12. 13. &c. Tobia 13. v. 4. 5. &c. Peccatores penitus non deserit Deuter. 4. v. 30. 31. Pl. 77. v. 38. &c. Et verò S. Clem. Alex. l. 1. Parad. c. 8. & 9. Nullum esse docet divinæ justitiæ opus, quod hominum saluti non conducatur; nec idè improbandum esse speculum, quod vultus deformitatem, aut rugas exhibeat; nec medici artem licet acerbam, quâ sanitati consulitur, esse damnum. *Quamobrem, inquit, Deus quidem bonus est per seipsum; justus autem propter nos; & idè quia bonus. Quod justum est autem, nobis per suum ipsius verbum ostendit, illinc è superis undè ipse fuit pater.* Hunc suppliciorum, quæ Deus infligit, usum esse notat l. 4. Strom. ut & à peccatis justî absterreantur, & ne in Dei contemptum veniant. Docuerat etiam S. Iren. l. 3. c. 35. pœnas Adamo, & Evæ infligtas, effectus esse misericordiæ, quæ eos, ut serpentem, maledicto non subjecit. *Ut neque maledicti à Deo in totum perirent, neque sine increpatione perseverantes Deum contemnerent.* Per misericordiam etiam è Paradiso expulsus Adamus, ut ad pœnitentiam excitaretur, docuit S. Theophilus Antioch. l. 2. ad Autol. Adamo quoque infligtam fuisse mortem, ne peccatum foret æternum, scripsit Proclus in Origenem apud S. Epiphanium l. 2. tom. 1.

2. Deuter. 28. dicitur Deus æquè justitiâ, & misericordiâ delectari. *Et sicut ante latatus est dominus super vos, bene vobis faciens, vosque multiplicans: sic latabitur disperdens vos, atque subvertens, ut auferamini de terrâ, ad quam ingredieris possidendam.*

Equidem misericordiæ beneficia longius latiusque nunc temporis proferruntur, quàm justitiæ opera: nam intra generationem quartam comprimatur hujus exercitium; in ultiores autem generationes extenduntur misericordiæ dona, Exod. 34. v. 7. Deut. 5. v. 9. & 10. Deuter. 7. v. 9. in aliâ verò vitâ amplior justitiæ locus dabitur, quàm misericordiæ; & proindè æqualitas quardam indè repetenda esset, aut compensatio, si quardam inæqualitas occurreret. Sed totum quod videtur, aut obicitur discrimen, ex hominibus est petendum, quibus hîc misericordiæ beneficiorum longè major est necessitas: in alterâ verò vitâ, cum locus merito non sit futurus, justitiæ pondus experientur homines.

Justitiæ non dantur efficientes causæ. Pro motivis alias non designat scriptura, præter Dei gloriam, & nominis ejus sanctitatem, Ex. 14. v. 17. 31. Levit. 10. v. 1. 2. 3. Deuter. 31. v. 43. Nec etiam misericordiæ alias designat, præter hominum calamitates, & Dei benignitatem, Gen. 8. v. 21. Pl. 24. v. 7. 8. Pl. 78. v. 8.

Alia sunt in Scripturis, & apud antiquos, tùm justitiæ, tùm misericordiæ, & aliorum attributorum effecta; sed in iis solis ferè immorandum esse censuimus, quæ ad difficultates solvendas conferre possent: Nam cætera expositione opus non habent: gravissimi tamen sunt momenti ad rectè componendos mores, & ad divinæ majestatis commendationem.

QUÆSTIO DECIMA-QUINTA

de Providentiâ Dei.

ERRORES.

AB Epicuro, & Aristotele providentiam fuisse negatam docet Orig. lib. 2. contra Cels. De Aristotele aliter sentiunt alii, ut S. Thom. lib. 3. contra gentes cap. 75. Negavit & Democritus, qui omnia casui ascribebat, mundumque fortuitò coaluisse assererat. Incorruptibilia sola providentiæ subdiderunt illi, de quibus Job cap. 22. v. 14. *Nubes latibulum ejus, nec nostra considerat, & circa cardines cæli perambulat.* Alii omnium irrationabilium curam Deo abstulerunt: alii Deo rerum maximarum, cæli scilicet & terræ; animantium verò & stirpium, Angelis; divitiarum, dæmonibus curam demandatam esse crediderunt.

Plerosque ejusmodi errores sic complectitur S. Greg. Naz. orat. 16. *Alii casum, atque fortunam, fortuitò sanè temerèque consistam, induxerunt; alii siderum principatum quemdam rationis expertem, atque indissolubilem, res humanas arbitrato suo, imò etiam necessariò contexitum; & errantium quarundam, atque fixarum stellarum congressus, & recessiones, ac motionem, qua mundo dominetur: Alii providentiam ad nos usque demittere gravati sunt; veriti nempe, ne benefactorem eò meliorem esse pronuntiarent, quò plures beneficiis afficeret; aut ne Deus benè de pluribus merendo defatigaretur.*

Ejusmodi errores indè repetit S. Ambr. lib. 1. de Officiis cap. 14. quòd nollent homines supra se constitui judicem, quem nihil lateret. Undè apud Ciceronem lib. de nat. Deorum, Velleius Epicureus, qui providentiam impugnat, ità disserit: *Imposuistis in cervicibus nostris sempiternum Dominum, quem dies, & noctes timeremus: quis enim non timeat omnia providentem, & cogitantem, & animadvertentem, & omnia ad se pertinere putantem, curiosum, & plenum negotii Deum?*

In eos errores viros illos proculdubio præcipites egit temeritas scrutandi mysteria, quæ mentis nostræ vites longè superant.

Ut autem hi errores propriis confutentur argumentis, impugnanda est primò illa fatalis necessitas, simul & fortuitus ille rerum ordo: deindè ostendendum rerum omnium procuracionem Deum maximè decere.



ARTICULUS PRIMUS.

Utrum fatalis sit quaedam necessitas? an fatum, & fors quomodocumque probari possint?

ERRORES.

QUI fatalem quamdam necessitatem propugnant, bifariam divisi sunt: voluerunt enim quidam hanc à Deo sideribus inditam esse virtutem, ut supremâ autoritate hominum fortunas, & statum definirent. Nihil aliud astris tribuerunt alii præter signorum necessariorum naturam, per quam, quæ futura essent, demonstrarentur. Et, sic ex utrisque, fatum est quod pro siderum dispositione, & astrorum concursu, in conceptione, aut hominis ortu constituitur, aut constitutum demonstratur. Huic autem necessitati quidam omnia subdiderunt: alii liberas voluntates factorum legi subduxerunt.

Inter hæreticos, qui multa fato tribuerunt, fuit Bardesanes, seu Bardesanius Syrus, teste S. August. lib. de hæres. cap. 35. hunc tamen errorem illi non vitio verunt, Euseb. lib. 4. hist. cap. ult. & S. Epiphani. hæres. 36.

Ex Conc. Braccar. 1. cap. 9. & 10. & ex S. Leone epist. ad Tutribium Astericensis Episc. cap. 13. & 14. homines fatales esse stellis subditos censuit Priscillianus, & corpus nostrum juxta cæli signa duodecim esse compositum.

CONCLUSIO I. Fatum non datur.

Prob. 1. quia ex S. Justino in Apol. ad Senatum, admissio fato, nulla superesset libertas, nulla virtus, nullum vitium. Quæ certe præter sanam sunt mentem: imò summa inde sequeretur impietas, & injustitia, ut addit in Apol. ad Antonin.

2. Quia ex Tert. in Apol. cap. 35. & lib. de Idololat. cap. 9. homines à Dei cultu penitus avocarentur.

3. Quia ex Origen. in Philocal. cap. 23. libertate hominibus sic creptâ, Deus omnium scelerum author diceretur. Iisdem rationibus à Minutio, & Lactantio pluribus in locis fatum rejicitur.

4. Quia ex Euseb. lib. 6. de Præpar. cap. 4. rueret omnis Divinitas, si fatum admitteretur: nec Christianæ Religionis institutio, aut propagatio, tribui fato posset, cum ea ab omni fatali necessitate abhorreat, & quamplurimorum constantia Martyrum homini datam libertatem probet simul & confirmet. S. verò Chrys. orat. 2. de Providentiâ, iisdem rationibus addit per fatum fidem Dæmonibus majorem, quàm Deo conciliari. Idem ait orat. 3. eò gravioris sceleris conscios fieri homines, quòd inductâ fati necessitate vitia singula Deo imputarent. Eas omnes rationes congerit S. August. epist. 243. & lib. 2. cap. 17. de Gen. ad Litt. additque nobis à sideribus imponi non posse necessitatem;

am corporum virtus in spiritus nequeat exeri; cumque Astrologi nosse non possint, quid inter gemellos distet; quod ex Esaii, & Jacob facile comprobatur.

Ult. Immutum non esse Astorum cursum; sed divinæ potestati subjici, & à Deo pro nutu moveri, satis superque demonstravit Deus, cum Solis, aut Lunæ cursum inhibuit, aut immutavit, Josue 10. v. 12. & 13. Lib. 4. Reg. cap. 20. v. 10. & 11. Isaiæ 38. v. 8. & 9.

CONCLUSIO II. Nihil sit fortitudo; idcirco casus, aut fortuna rejicienda sunt. Nam ex S. Aug. lib. 1. contra Academicos cap. 1. quæ casu contigisse videntur, à Deo intenduntur, & universo congruere comperiuntur, licet intendi non videantur: *Quæ vulgò fortuna nominatur*, inquit, *occulto quodam ordine regitur; nihilque aliud in rebus casum vocamus, nisi cujus ratio, & causa secreta est: nihilque, seu commodi, seu incommodi contingit in parte, quod non conveniat, & congruas universo.* Undè licet in plurima, quæ fortuita videntur, oculos conjiciamus; hæc quidem nostri respectu casu contingere, sed reverà à Deo decreta fuisse comperiemus. Sic v. g. lib. 1. Reg. cap. 9. v. 3. quæ Sauti asinas patris quærenti obvenerunt, fortè fortunâ obtigisse censerentur, nisi attenderetur Dei voluntas, quæ Samuèli fuerat prædicta. Undè respectu Dei sumus quidem nos instar servi, quem fodere terram jubet dominus, ut è terræ visceribus thesaurus eruatur; fortuita enim servo penitus est inventio thesauri; non verò domino, qui terræ fossionem imperavit. Sic duorum, quos in varias regiones misit dominus, servorum occursum est fortuitus; non respectu domini, qui eorum occursum intendebat. Plurima hinc in probatis authoribus, merè fortitudo haberentur, nisi quædam occurrerent adjuncta, quæ nos in aliam sententiam impellunt. Hujuscemodi est quod lib. 6. Hexamer. cap. 4. refert S. Ambros. de cane, qui Antiochiæ juxta corpus heri sui à milite interempti stetit, domini deslens casum; cumque admirabundus venisset cum cæteris interemptor, ut innocentiam fidem astrueret, sequestrato paululùm doloris questu, in illum canis irrupit, solum ex plurimis tenuit, nec dimisit: undè negandi criminis effugium illi militi fuit omninò ablatum. Inferendum ergò est nihil occurrere fortuitum; licet ità nobis videatur, quòd habitudinem, connexionem, & omnium inter se eventuum relationem non noverimus, vel ob breviorē vitæ nostræ cursum, vel ob mentis nostræ infirmitatem.

OPP. Non potest non admitti fatalis quædam necessitas, quæ cuique naturæ præsit, ex siderum concursu impressa, aut situ; cum tot & ab Astrologis, & Vatis prædicta sint, quæ certò evenerunt.

R. 1. cum Tatian. in orat. ad gentes, hæc à Dæmonibus, qui præstabant quod futurum prænuntiarent, fuisse prædicta; Dæmonesque sese gessisse non secus ac qui clam filios parentibus subripiunt, quos postea pretium accepturi palam restitunt.

S. August. lib. 2. de Doct. Christ. cap. 23. ait Dæmones potestate, quam in inferiora obtinuerunt, abuti in decipiendis hominibus: *Hinc*

fit, ut qui occultio quodam divino iudicio, cupidi malarum rerum eis tradantur illudendi, & decipiendi pro meritis voluntatum suarum. Et infra: Multa observantibus secundum observationes suas eveniant, quibus implicati curiosiores fiant, & sese magis magisque inferant multiplicibus laqueis perniciosissimi erroris. Et lib. 2. de Gen. ad Litt. cap. 17. Instinctu quodam occultissimo fit, quem nescientes humana mentes patiuntur; quod cum ad decipiendos homines fit, spirituum seductorum operatio est: quibus quadam vera, de temporalibus rebus nosse permittitur; partim quia subtilioris sensus acumine; partim quia corporibus subtilioribus vigent; partim experienciâ callidiorē propter tam magnam longitudinem vitæ; partim sanctis Angelis, quod ipsi ab omnipotente Deo discunt, etiam iussu ejus sibi revelantibus, qui merita humana occultissima justitie sinceritate distribuit. Aliquando autem iidem nefandi spiritus, etiam quæ ipsi facturi sunt, velut divinando predicunt. Istis adjicit lib. de Divinatione cap. 5. eos præmonere de illis quæ ipsos exequi jussit Deus, ut terræ motus, fames, pestes &c. aut quæ ex naturalibus signis futura prænoscent, instar medicorum, qui plurima prævident artis suæ peritiâ; aut quod affectus nostros compertios habeant. Addit adhuc cap. 7. & 8. eosdem nihil ausos proferre contra Deum, aut Religionem. Denique scribit lib. 2. quæst. ad Simpl. q. 3. Nihil nisi temporaneum à Damonibus prædici, & hoc eis concedi, ut malum, quod eis impendat, antequam veniat, prænoscendo patiantur. . . . & verum, quod nosse potuerint, non docendi magis, quam decipiendi sine prænuntiant.

CONCLUSIO III. Christiano sensu admitti potest fatum quoddam, si fati nomine intelligatur Dei voluntas, aut præscientia.

Prob. ex S. Justino in Apol. ad Antonin. ex Lact. lib. de irâ Dei c. 11. & ex Minut. in Octav. ubi per fatum Dei præscientiam intelligit. Quod enim, inquit, aliud est fatum, quam quod de unoquoque nostrum Deus factus est; qui cum possit præscire materiam, pro meritis, & qualitatibus singulorum etiam fata determinat: ita in nobis non genitura plectitur; sed ingenii natura punitur. Et ex S. August. lib. 5. de Civit. cap. 1. Si propterea quisquam res humanas fatis tribuit, quia ipsam Dei voluntatem, vel potestatem fati nomine appellat; sententiam teneat, & linguam corrigat.

CONCLUSIO IV. Licita dici potest aliquandò fors; nec inde tamen colligendum fortuitò aliquid fieri.

Prob. quia sic docet Origenes Hom. 23. in Josue, ubi ad hanc veritatem confirmandam quædam profert exempla ex sacris codicibus deprompta, ut de Jonâ, & Mathiâ &c.

S. etiam August. epist. 180. Honorato, fortis usum probat, cum inter Clericos dubium est, qui tempore persecutionis in Ecclesiâ sint remansuri. Si inter Dei ministros inde sit disceptatio, qui eorum maneat, ne fugâ omnium, & qui eorum fugiant, ne morte omnium deseratur Ecclesia. . . . Quæ disceptatio si aliter non potuerit terminari, quantùm

quantum mihi videtur, qui maneat, & qui fugiant sorte legendi sunt; ideo sicut scriptum est, contradictionem sedat sortitio, & inter potentes definit. . . . Res quidem fiet minus usitata, si fiat ista sortitio; sed si facta fuerit, quis eam reprehendere audebit? Non vult tamen meliori sententiam suam præferri. Item lib. 1. de Doct. Christ. c. 28. non improbat etiam sortis usum, cum duo occurrunt pauperes iisdem in angustiis constituti; nec, quod dandum præ manibus est, potest dividi. Cæterum quæ sorte obtingunt, non fortunæ aut casui, sed divinæ providentiæ sunt tribuenda.

ARTICULUS ULTIMUS.

Utrum Dei providentiæ omnia, etiam vel minima subjaceant?

PER Dei providentiam nihil aliud est intelligendum, quàm rerum omnium in suos fines ordinatio, ejusque ordinis executio; seu Dei voluntas, per quam res aptè administrantur; seu divina rerum omnium procuratio. Sic non nuda est rerum cognitio, sed certum rebus consulendi propositum: & proinde, quatenus ratio ordinis est, seu rerum administrandarum voluntas, proculdubio est æterna; quatenus verò est illius ordinis executio, est temporaria dicenda; utpotè quæ temporalem ad creaturas dicat relationem, aut habitudinem.

CONCLUSIO Dei providentiæ nihil est quod non subdatur, seu cujus administrationem Deus non sustineat.

Prob. 1. Sap. 6. v. 9. *Equaliter cura est illi de omnibus.* Sap. 8. v. 1. *Attingit à fine usque ad finem fortiter, & disponit omnia suaviter.* Sap. 14. v. 3. *Tua autem, Pater, providentia gubernat.* Judith. 9. v. 5. *Tua judicia in tuâ providentiâ posuisti.* 1. Petr. 5. v. 7. *Ipsi cura est de vobis.* Item Math. 6. & Lucæ 12. Christus ait vel minimorum curam Deum gerere, ut capitis capillorum, liliorum, volatilium; & indè argumento ducto confirmat se potiori jure, quæ ad homines pertinent, curare.

2. Essentialem omnino esse Deo hanc rerum omnium providentiam probant, S. Iren. l. 2. c. 45. S. Clem. Alex. lib. 6. Strom. Tertul. l. 2. cont. Marcio. c. 24. Orig. l. 4. & 6. cont. Cels. necnon S. Aug. l. de utilitate credendi c. 16. ubi sic habet. *Si Dei non præsidet providentia rebus humanis, nihil est de Religione satagendum.* Item l. de Ord. cap. 1. ejusdem impietatis damnat negare providentiam, & Deum peccati authorem facere. Lib. quoque 5. de Gen. ad Litt. c. 2. sic habet. *Quid ore suo Salvator, cum dicit, unum passerem non cadere in terram sine Dei voluntate, & quod fœnum agri post paululum mittendum in clibanum, ipse tamen vestiat? Nonnè confirmat non solum totam istam mundi partem rebus mortalibus & corruptibilibus deputatam, verùm etiam vilissimas ejus abjectissimasque particulas divinâ providentiâ regi?*

3. Lactantius l. de irâ Dei c. 10. quod seipsum orbis non creaverit ; seipsum quoque administrare non posse confirmat. S. Greg. Naz. orat. 16. ait, omnino esse necesse, ut quarum rerum Deus sit conditor, earum sit etiam moderator: alioquin si mundus casu ageretur, primo quoque tempore, velut navis ventorum turbine, propter materiæ perturbationem dissolveretur, & in vetus chaos relaberetur. Nostri autem præsertim rebus præest; sed administrationis ratio est incognita; ob id fortasse ut in admirationem rapiat: quidquid enim facile percipitur, facile quoque in contemptum venit: quo enim, quod supra nos est, difficilius percipitur, eò etiam mirabilius videtur. Undè quanta utilitas ex variâ rerum dispositione percipi possit, studiosâ inquirendum est sollicitudine. Sic disserunt S. Ambr. l. 1. de offic. c. 13. S. Aug. l. de animæ immort. c. 8. & l. 4. de gen. ad Litt. c. 12. ubi sic habet. *Creatoris potentia, & omnipotentis atque omnitenentis virtus, causa subsistendi est omni creaturæ: quæ virtus, ab eis, quæ creata sunt, regendis si aliquandò cessaret, simul & illorum cessaret species, omnisque natura concideret. Neque enim sicut structuram ædium cum fabricaverit abscedit, atque illo cessante atque abscedente stat opus ejus; ita mundus vel istu oculi stare poterit, si ei Deus regimen sui subtraxerit: proinde & quod Dominus ait, Pater meus usque nunc operatur, continuationem quamdam operis ejus, quâ universam creaturam continet atque administrat, ostendit. Idem etiam probat. S. Greg. mag. l. 24. Moral. c. 11. cum ait: per se mundum regit, quem ipse condidit; nec eget alienis adiutoriis ad regendum, qui non eguit ad faciendum.*

Et certè nulla occurrit ratio, cur Deus creaturis non provideat: non defectus potentia; cum longè minus sit existentibus providere, quàm è nihilo illas educere: non defectus voluntatis; quæ enim cum benignitas ad creandum movit, ad providendum quoque movet. Cum ergo bonitate solâ motus creaturas procreaverit, quomodò à se productas negligeret? Hinc Math. c. 7. v. 11. *Si vos cum sitis mali, nostis bona data dare filiis vestris: quando magis Pater vester, qui in cælis est? &c.* Paternæ igitur bonitatis est indefessam filiorum curam gerere.

Aliud quoque argumentum ad astruendam Dei providentiam, ex variis hominum affectibus desumitur: Alii enim in hanc, vel illam artem propendent; & quod quibusdam est molestissimum, aliis maximè attridet. Undè fit, ut ex variis illis hominum naturæ insitis affectibus, nihil sit in humanis quod non placeat, hominumque commodis simul & necessitatibus non conducatur.

Aliud argumentum est ipsa temporum successio, & cætera, quæ primæ quæst. probationibus, artic. 3. exscripsimus.

Ultimum tandem illud est, quod oculis nostris semper observatur; sol nempè, cujus virtute & effectibus quidquid ipse Deus præstat, delineare nobis voluisse videtur: Omnia enim ut maximè abdita sol penetrat; nihilque est, quod ejus virtuti acceptum non referatur. Hinc divinæ providentiæ universalitatis rectè dicitur imago.

Opp. 1. Si Deus providentiâ cuncta regeret, bonis & malis bona & mala non æquè obvenirent. Quod ita animos percellit, ut vel indè iusti commoveantur: hinc Job. 21. v. 7. *Quarè ergò impii vivunt, sublevati sunt?* Pl. 72. v. 2. *Mei autem penè moti sunt pedes &c.* v. 3. *pacem peccatorum videns.* v. 5. *in labore hominum non sunt, & cum hominibus non flagellabuntur.* v. 6. *ideò tenuit eos superbia &c.* v. 11. *Et dixerunt, quomodo scit Deus; etsi est scientia in excalfo?* v. 12. *Ecce ipsi peccatores, & abundantes obtinuerunt divitias &c.* v. 13. *Et dixi, ergò sine causâ iustificavi cor meum &c.* v. 14. *Et fui flagellatus totâ die &c.*

R. iniquorum felicitatem, aut bonorum quorundam operum esse mercedem, aut quandoque scelerum pœnam. Undè iustis abundè fit satis ibidem apud Jobum v. 13. *Ducunt, inquit, in bonis dies suos, & in puncto ad inferna descendunt, qui dixerunt Deo: recede à nobis, scientiam viarum tuarum nolumus: quis est omnipotens, ut serviamus ei? Et quid nobis prodest, si oraverimus illum? verumtamen quia non sunt in manu eorum bona sua, consilium impiorum longè sit à me. Quoties lucerna impiorum extinguetur, & superveniet eis inundatio, & dolores divides furoris sui. Erunt sicut palea ante faciem venti, & sicut fuvilla, quam turbo dispergit. Deus servabit filiis illius dolorem Patris; & cum reddideris, tunc sciet: videbunt oculi ejus interfectionem suam, & de furore omnipotentis biber.* Pl. etiam 36. v. 1. *Noli annulari in malignantibus; neque zelaveris facientes iniquitatem: quoniam tanquam fœnum velociter arescent, & quemadmodum olera herbarum citò decidens.* Item Pl. 72. 2. 18. &c.

S. August. lib. 1. de Civ. c. 8. bonis & malis bona & mala obveniunt, ut nec dolores vitentur, nec omnia peccata hîc mulctentur, nec mercede suâ omnia præclarè facta donentur; nihil enim divino servaretur iudicio. Hinc addit ex sceleribus quædam hîc meritis subijci pœnis, ut semper insigne quoddam extet providentiæ testimonium: interdum etiam bonos felicitate uti temporaneâ, ut jam ex hâc vita præmium aliquod virtutis habeant; idque à Deo profectum esse constare; si verò piis omnibus concederetur hæc felicitas, non ob aliud præstandum videretur Deo obsequium, quàm ut illa bona obtinerentur. Nec, inquit, *pios nos faceret talis servitus, sed potius cupidos, & avaros. Flagellantur enim simul, non quia agunt simul malam vitam, sed quia simul amant temporalem vitam; non quidem equaliter, sed tamen simul quam boni condemnare deberent, ut illi correpti atque correcti consequerentur æternam.* Aliam verò rationem affert Epist. 112. Solatio Victo. iano scilicet suas iustis esse pœnas, quæ meritorum materiam præbeant; impios autem criminandi providentiam hinc occasionem arripere. Item lib. 83. quæst. q. 82. dicit in bonis mala pœnæ, medicinæ locum habere. Et lib. quoque 22. contra Faustum cap. 21. scribit, pœnas iustis evenire propter perfectionem; peccantibus verò propter æquitatem. Nec certè sine causâ: quia si soli boni, bonis abundarent, putarent mali propterea Deo esse serviendum: rursus bona si solis malis darentur, timerent boni adhuc infirmi ad Deum converti, ne ista fortè illis decissent. Cum enim adhuc anima, ut ita dicam, infir-

Eeij

ma est, illam fovere, vel sustentare debet Deus, donec validior illa fiat. Sic agricola, teneris adhuc arbusculis fulcra adhibet, donec altius in terrâ radicibus actis vim tempestatum possint sustinere.

INSTR. Si provideret Deus, non pateretur justos opprimi à peccatoribus, & impiorum subjacere imperio. Sic, inquiebant Ethnici apud Minutium, nec Phalaris imperium obtineret; nec exilio Camillus, nec veneno Socrates fuissent sublati; nec subitis grandinibus jamjam maturæ segetes verberarentur.

R. 1. cum Orig. Hom. 4. in Ps. 36. bonis spiritualibus nunquam destitui justos, quæ veram felicitatem sola constituunt; nec etiam improborum manibus justos penitus permitti: sed Deum variis rationibus, occultis quidem, aut opem ferre, aut aliquandò apertè in ipsorum hostes insurgere, ut patet ex Gen. 32. de Jacobo, & ex quarto Regum de Eliseo, &c.

2. Lact. lib. 5. cap. 22. ait peccatorum imperio justos subjici necessario, ut eximie argumenta patientiæ præbere, simul & præmia possint consequi: *Patientia est enim malorum, qua aut inferuntur, aut accidunt, cum æquanimitate perlatis. Quam virtutem, ut omnium præstantissimam, Philosophi, & Oratores commendant.*

3. S. Aug. lib. de Agone Christ. cap. 7. scribit bonis detrimenti nihil improbos inferre posse: *Nam quod diligunt, & unde beati sunt, auferre illis nemo potest. Cruciatu vero corporis malas animas miserabiliter affligit, bonas autem fortiter purgat.*

Addit verò improbos æquè ac dæmones justitiæ divinæ decreta quidem exequi etiam infcios boni, quod eorum sit ministerio. *Non itaque, inquit ibidem, pro meritis officii, sed pro meritis malitia stipendiantur.* Et verò persecutione, quâ mali justos exercent, summa bona comparantur. Sic ex plurimorum Episcoporum exilio persecutionis Arianae tempore multarum nationum conversio contigit, & fidei Catholicae pluribus in Ecclesiis novum robur fuit additum.

Quamobrem colligi potest tribulatione reos compelli ad poenitentiam; infcios crudiri; firmari, purgarique justos; excitari torpentes; & deprimi superbos. Aliæ etiam & egregiæ rationes proferuntur à S. Hilar. lib. 10. de Trin. & S. Greg. Magn. Præf. in Job. cap. 2. & in suis Moral. libris.

INSTR. Adhuc si nostra curaret Deus, ex orbe terrarum jam mala, seu peccata sustulisset. Sic enim apud Lact. lib. de irâ Dei cap. 13. disserunt Philosophi: Deus aut vult tollere mala, & non potest; aut potest, & non vult; aut nec vult, nec potest; aut vult, & potest. Si velit & non possit, infirmus est, & proindè nec Deus; si possit & nolit, invidet homini; quod Deo indignum; si possit & velit, nulla ratio subest, cur irâ per orbem debacchari permittat mala.

R. Ibidem Lactant. *Deus potest quidquid velit, & imbecillitas vel invidia in Deo nulla est: potest igitur mala tollere, sed non vult; nec idèò tamen invidus est: idcirco enim non tollit, quia & sapientiam (sicut docui) simul tribuit, & plus boni ac jucunditatis in sapientiâ,*

quàm in malis molestia. Sapientia etiam facit, ut etiam Deum cognoscamus, & per eam cognitionem immortalitatem assequamur, quod est summum bonum. Additque nisi hâc Deus uteretur œconomiâ, justitiæ & sapientiæ vestigium nullum superfuturum fuisse. S. verò Chrysost. lib. 2. de Provid. c. 4. sed præcipuè, lib. 4. & 5. de eâdem Provid. scribit, si Deus omnibus pro merito pœnas hâc infligeret, in terris neminem superfuturum: nemo enim est, quem suppliciis obnoxium peccata non fecerint.

S. Greg. Naz. Orat. 16. ait ad justitiæ splendorem plurimùm peccata conferre; hæc sunt ejus verba: *Rerum autem hujus ævi alia forma est, aliaque gubernatio, tamen omnia eò ferant, atque apud Deum æquabile quiddam procul dubio habeat id quod nobis inæquale esse videtur: baud aliter atque in corporibus eminentes ac demissæ partes, magnitudines item & parvitates; atque in terrâ, tam ea, quæ altè se afferunt, quàm quæ subsidunt: ex quibus pulchritudo mutuâ inter se habitudine constatur, ac perspicitur. Quandoquidem opificis quoque materia, quæ prius inæqualis atque incondita erat, per quam tamen artificiosa esset, si ad operis cujusdam structuram accommodaretur: id quod tùm demùm intelligimus atque fatemur, cum operis eleganciam undiquè perfectam & absolutam intuemur.*

S. August. similia tradit in lib. imperfecto de Genes. ad Litt. cap. 5. ubi sic loquitur: *Et divisit Deus inter lucem & tenebras, ne vel ipse privationes non haberent ordinem suum, Deo cuncta regente atque administrante. Sicut in cantando interpositiones silentiorum certis moderatisque intervallis, quamvis vocum privationes sint, benè tamen ordinantur ab iis, qui cantare sciunt, & suavitati universa cantilena aliquid conferunt: & umbra in picturis eminentiora quæque distinguunt, ac non specie, sed ordinatione placent. Nam & vitiorum nostrorum non est author Deus: sed tamen ordinator est, cum eo loco peccatores constituit, & ea perpeti cogit, quæ merentur. Ad hoc valet quòd oves ponuntur ad dexteram, hedi autem ad sinistram. Quædam ergò & facit Deus, & ordinat: quædam verò tantùm ordinat. Lib. de Ordine cap. 7. Ita quasi ex antithetis quodammodo, quod nobis etiam in oratione jucundum est, id est ex contrariis omnium simul rerum pulchritudo figuratur. Sic ergò cum contrariorum oppositione pulchritudo commendetur, quælibet hinc peccata justitiæ opposita non levem addunt justitiæ splendorem. Undè Eccles. 33. v. 15. Contra malum, bonum est; & contra mortem, vita: sic & contra virum justum, peccator. Et sic intueri in omnia opera altissimi; duo & duo, & unum contra unum.*

OPP. 2. S. Hieron. in Cap. 1. Habac. docet absurdum esse ad hoc deducere Dei majestatem, ut sciat per momenta singula quor nascentur culices, quotve moriantur: quæ cimum, & pulicum, & muscarum sit in terrâ multitudo: quanti pisces in aquâ nati &c. Igitur noluit S. Hieron. cuncta Regi divinâ providentiâ, & eam ad minima quæque extendi.

R. S. Hieron. negare duntaxat alternatim Deum talia nosse, vel per
E c iij

diversa temporum momenta sic illa cognoscere, sicuti per diversa momenta desinunt, aut incipiunt.

Potest etiam responderi S. Hieronymum eò loci tantum velle, Deum non habere talem curam animalium illorum, qualem habet nostri. Quo quidem sensu intelligendus est pariter iste locus 1. Cor. 9. *Numquid de bobus cura Deo est?* Addunt adhuc nonnulli prædictum locum ex illis esse, quos ipse S. Hieron. in lib. 1. adversus Ruffin. ait se in Commentariis in Prophetas, non ex suâ, sed ex aliorum scripsisse sententiâ.

O P P. 3. Si cuncta quæ sunt hoc in mundo, Dei regantur providentiâ; unde proveniunt tot monstrorum horrendi partus? *Quid quod*, inquit S. Ambros. lib. 3. Hexam. cap. 9. *Cum utilibus etiam lethalia & pernicio-
sa generantur.*

R. Hæc omnia divinam commendare providentiam, ad quam attinet permittere defectus aliquos in particularibus naturis, ne perfectum universi bonum impediatur; quia si omnia mala impedirentur, multa deessent universo bona: nec enim esset vita leonum, nisi esset occisio animalium; neque esset patientia martyrum, nisi esset persecutio tyrannorum. Hinc ex S. August. in Enchir. cap. 33. *Deus omnipotens nullo modo sinneret malum aliquod in suis operibus esse, nisi usque ad eò bonus, & omnipotens esset, ut beneficeret etiam de malo.* Addo insuper monstra suo modo conducere ad universi decorem, atque pulchritudinem, necnon etiam inservire plurimum manifestandæ rerum aliarum perfectioni, ac integritati, quæ magis ex ipsorum elucescit deformitate. Nam inquit, citato loco S. Ambros. *Singula eorum, quæ generantur è terris, specialem quamdam rationem habent, quæ pro virili portione complent universa plenitudinem creature: alia ergò esui; alia alii nascuntur usui. Nihil vacat, nihil inane germinat terra. Quod tibi putas inusile, aliis utile est; imò ipsi tibi frequenter alio est usu utile. Quod escam non adjuvat, medicinam suggerit: & sæpè eadem quæ tibi noxia sunt, avibus aut feris innoxium ministrant pabulum. Deniquè sturni vescuntur conio, nec fraudi est eis, quoniam per qualitatem sui corporis venenum succi lethalis evadunt. Helleborum autem periti loquuntur escam esse & alimenta coturnicum, eo quòd naturali quodam temperamento sui corporis vim pabuli nocentis evitent.*

O P P. ult. cum Epicuro apud Cicer. lib. 1. de naturâ Deorum, amovenda est à Deo rerum sublunarium procuratio; si enim eâ implicatus esset; & laboriosissimus, & variis molestiis laboraret: nihil autem beatum est, nisi quietum.

R. natam esse hanc difficultatem ex non intellecto discrimine, inter nostram, & divinam agendi rationem: animalis enim homo non sapit ea quæ Dei sunt: Deus autem non, ut nos, multo rerum apparatu indiget; nec variis turbari potest molestiis ex insciâ & imbecillitate nostrâ profectis: solâ enim omnipotentis voluntate præstat quicquid voluerit.

Q. 1. An æqualem omnium curam Deus gerat.

R. Deum non æqualem omnium curam gerere: Nam Orig. Hom. 1. in Gen. terram ait dictam esse scabellum pedum Dei, quod circa homines deditos sensibus ultima providentiæ pars occupetur. Idem lib. 2. contra Celsum notat Nativitatis Christi tempore orbi universo pacem fuisse concessam, simulque præfuisse unicum Imperatorem; ne vel bellorum dissidiis, aut interrupto commercio, si varia viguissent imperia, Evangelii propagatio retardaretur. Lib. etiam 4. contra eundem Cels. ait pro hominum affectu varia esse providentiæ beneficia. Præterea in gratiam Justorum singularis providentiæ describitur: sal. 36. & 9. & ex Historiis Sacris compertum est quantâ sollicitudine suis Deus consulat. Unde S. Greg. Thaumaturgus. Orat. panegyricâ in Orig. singulari Dei providentiæ, & Angeli Custodis curæ tribuit, quod Origeni erudiendus fuisset traditus. Item S. Cypr. lib. de Orat. Domin. exemplis Danielis, Eliæ, &c. in angustiis Deum nunquam desisse suis probat. *Neque enim desse quotidianus eibus potest iusto, cum scriptum sit: non occidet Dominus fame animam iustam. . . . Cum Dei sint omnia, habenti Deum nihil deerit, si Deo ipse non desit. Sic Danieli in leonum lacu iussu Regis incluso, prandium divinitus procuratur, & inter feras esurientes & pascentes, homo Dei pascitur. Idem lib. de opere & eleemos. similia scribit. Metuis ne, inquit, patrimonium tuum fortè deficiat; si operari ex eo largiter cuperis? Quando enim factum est, ut iusto posset deesse subsidia vita? cum scriptum sit: non occidet fame Dominus animam iustam. . . . Nisi, si putas, quia qui Christum pascit, à Christo ipse non pascitur; aut eis terrena deerunt, quibus cœlestia, & divina tribuuntur.*

Q. Ultimò num providentiæ leges expendere possimus?

R. Tertull. lib. de carne Christi cap. 4. humano iudicio divina non esse metienda: *Sit planè stultum, inquit, de nostro sensu si iudicemus Deum; sed circumspice Marcion, si tamen non delesti, stulta mundi elegit Deus, ut confundat sapientiam. Quenam hac stulta sunt? conversio hominis ad cultum veri Dei, &c.*

S. Greg. Naz. Orat. 16. ait nostrum non esse definire, cur infligantur pœnæ; nec in pœnam peccati ea infligi certò esse statuendum; quia Dei iudicia sunt incognita, & ad virtutis probationem eas immittere potest Deus: observatque Deum nihil non sapienter agere, nosque temerè aut inconditè res gubernari existimare; quia exploratam earum rerum non habemus notitiam; aut quia absolutum opus non intuemur; undè conijcimus minus aptas, aut dispositas esse partes; *quin potius, inquit, non multum iis, qui nausæa & vertigine laborant, dissimile sumus, qui omnia sursum deorsumque verti putant, cum ipsi vertantur; idem enim his, de quibus loquimur, accidit. Neque enim Deum se sapientiore esse putant.* S. Aug. l. de ver. Rel. c. 22. ait, non posse quidem nos de providentiâ iudicium ferre, cum ipsius orbis partes, nos ipsi tantum simus, & inter eas constituti; proindeque impares, qui totius operis elegantiam conspiciamus.

QUÆSTIO DECIMA-SEXTA

De Prædestinatione Sanctorum.

HOC in Tractatu, sicut & in superioribus, meam in rebus non definitis ignorantiam non infrequenter profitebor : & istis in capitulis de Prædestinationis mysterio, eò continentioris animi sum futurus, quò sagaciùs sum meditatus Apostoli exclamationem Rom. 11. *O altitudo divitiarum sapientiæ, & scientiæ Dei: quàm incomprehensibilia sunt judicia ejus, & investigabiles viæ ejus!* Undè Tertull. contra Marcion. *O profundum, inquit, divitiarum sôphiæ Dei, ut investigabilia judicia ejus, utique Dei judicio: ita & investigabiles viæ ejus, utique intellectus, & scientiæ, quas ei nemo monstraverit, nisi fortè isti censores divinitatis dicentes: sic non debuit Deus, & sic magis debuit.* Ne verò ex recentibus de gratiâ controversiis præjudicati aliquid ad subsequentes de Prædestinatione quæstiones afferre videar, antiquorum temporum, quæ contentiones illas seculis pluribus anteverunt, dogmata simplici & sincerâ mente proponam. Cuique fontes illos venerandos adire liberum erit; & ex illis puris canalibus, quid & quo animo sit hac in materiâ sentiendum, deducere.

ARTICULUS PRIMUS.

De nomine, atque naturâ Prædestinationis.

PRÆDESTINATIONIS vocabulo quandòque intelligitur divinæ providentiæ ordo: sensu illo à S. Hieron. in 1. cap. Ephes. usurpatur, & à S. August. Tract. 68. in Joan. Aliquandò sumitur pro destinatione rationalis creaturæ, sive ad vitam, sive ad mortem; sive ad præmium, sive ad pœnam. Sic à S. August. cap. 100. Enchir. *Benè utens malis, inquit, tanquam summè bonus, ad eorum damnationem, quos justè prædestinavit ad pœnam; & ad eorum salutem, quos benignè prædestinavit ad gloriam.* Eodem quoque sensu usurpatur ab ipso S. August. Tract. 43. & 107. in Joan. à S. Prosp. in Resp. ad 10. & 11. object. Vincenti. à S. Fulg. lib. 1. ad Monimum cap. 13. 28. & 29. necnon tandem à Conc. Valentino an. 853. cap. 3. ubi sic habetur: *Fidenter fateamur prædestinationem electorum ad vitam, & prædestinationem impiorum ad mortem.* Aliter nuncupatur electio, discretio, Dei beneplacitum, dilectio, præordinatio, præscientia, atque præparatio: propriè verò creaturæ rationalis ad æternam beatitudinem destinatio.

Definitur à S. August. lib. de dono Persev. cap. 14. *Præscientia & præparatio beneficiorum Dei, quibus certissimè liberantur, quicumque liberantur.*

Liberantur. Præscientia dicitur ab Apost. Rom. 11. v. 2. *Non repulit Deus plebem suam, quam præscivit.* Non est autem meta rei futuræ præcognitio; sed cum aliquo voluntatis beneplacito conjuncta. Rom. 8. v. 29. *Quos præscivit & prædestinavit &c.* Hinc S. August. lib. de prædest. Sanct. cap. 10. sic habet: *Prædestinatio sine præscientiâ esse non potest; potest autem esse sine prædestinatione præscientiâ; prædestinatione quippè Deus ea præscivit, quæ fuerat ipse facturus. præscire autem potens est etiam quæ ipse non facit, sicut quacunque peccata.* Cum ideo in Sanct. Augustinum Massilienses insurgerent, & prædestinationem nihil esse aliud præter præscientiam contenderent; in respons. ad 14. objectiones S. Prosper eos confutat, ostenditque à Deo prædestinari quæ sit ipse facturus, gratiæ beneficiis homines adjuvando. Undè in definitione S. Aug. subiungitur: *Beneficiorum Dei, quibus certissimè liberantur quicunque liberantur: seu gratiæ vocationis, justificationis, meritum, perseverantiæ, & gloriæ præparatio; quibus beneficiis à peccati servitute homines certissimè liberati æternam felicitatem consequuntur: quod paucis expressit S. Fulgent. lib. 3. de veritate prædest. Prædestinavit ergo Deus Sanctos suos, & ad gratiam vite bonæ, & ad gratiam vite æternæ.* Vita æterna nuncupatur gratia Rom. 6. *Gratia Dei vita æterna.* Sepius exindè à S. Aug. gratia dicitur.

A Theologis vulgò, ut à S. Thomâ, definitur præparatio gratiæ in præsentem, & gloriæ in futuro: aut voluntas æterna Dei ex creaturis intellect. alibus quasdam ad vitam æternam, seu ad finem ultimum ordinantis. Quæ verò est prædestinationis ex S. Aug. mox allata notio ad solum hominem lapsum pertinet. Ex quibus prædestinationem esse duplicem superest colligendum, priorem ad gratiam, ad gloriam verò posteriorem.

ARTICULUS SECUNDUS.

An Prædestinatio detur? & qui sint ejus effectus?

ERRORES.

CIRCA prædestinationem non solum graviter errarunt viti prophani, de quibus Sap. 2. v. 21. *Et nescierunt sacramenta Dei, neque mercedem speraverunt justitiæ, nec judicaverunt honorem animarum sanctarum:* sed etiam errarunt secundi seculi heretici, qui cum Valentino & Basilide duas in classes homines particabantur, utroque naturâ salvandos, aut reprobos. Lib. 5. Strom. S. Clem. Alex. hanc ex duplicis divinitatis bonæ & malæ excogitatione natam oberrationem describit. Quem errorem Marcioni, Valentino, & Manichæo Ecclesia Lugd. in lib. cont. Joan. Hertum tribuit. Errarunt Pelagius, & Semipelagiani, qui prædestinationem Dei decreto sinceram removerunt, ut ex quâ sequeretur non nasci homines judicandos, sed jam judicatos; nec ex perverso libertatis usu, sed ex Dei arbitrio hominum damnationem esse

repetendam, & in corripiendis hominibus operam non esse collocandam. Sic Faust. Regien. lib. 1. de libero arbit. cap. 4. alique Pelagianⁱ atque Semipelagianⁱ, quos S. August. lib. de dono persever. cap. 9. novo^s prædestinationis hostes appellat.

Ex malè intellectis S. August. libris prodierunt alii, ut notat Sigebert. in chronico ad an. 415. qui colligebant indè nec piæ vitæ institutionem profuturam, nec è morum depravatione sibi esse utcunque timendum. Lucidus Presb. impositos sibi hos errores in libello ejuravit; nimirum ad mortem Dei præscientiâ homines impelli, primique hominis lapsu fuisse libertatem extinctam.

Ambrosius Catharinus magni nominis Theologus ordines duos inter prædestinatos constituit lib. de prædestinat: In altero eximia virtutis viros egregios reponit; cujusmodi fuerunt Virgo Deipara, Apostoli, Prophetæ, Patriarchæ: In alio collocat ceteros communibus prudentiæ legibus relictos, quorum fors nondum certa sit, aut definita.

Sententiam hanc ut novam proponit, & à S. August. doctrinâ prorsus alienam. Eadem placuerat statim Sixto Senensi; sed hanc postmodum deposuit, ut quam Theologis plurimis videret admodum exosam, quemadmodum ipse testatur lib. 6. Biblioth. sanctæ num. 848.

CONCLUSIO I. Prædestinatio est admittenda necessariò.

PROB. Tàm apertè prædestinationem docuit Christus; tàm apertè, tàmquo constanter exposuit Apostolus, ut nemini de illâ dubitationem movere liceat. Luc. 12. *Nolite timere pusillus grex, quia complacuit patri vestro dare vobis regnum.* Rom. 8. *Quos prædestinavit, hos & vocavit: & quos vocavit, hos & justificavit: quos autem justificavit, illos & glorificavit.* Ephes. 1. *Prædestinavit nos in adoptionem filiorum per Jesum Christum.* Undè S. Aug. lib. de dono persever. cap. 19. *Hoc scio, neminem contra istam prædestinationem, quam secundum Scripturas sanctas definimus, nisi errando, disputare potuisse.* Et cap. 21. *Nimia contentionis est prædestinationi contradicere, vel de prædestinatione dubitare.* Cap. etiam 23. *Prædestinationis hujus fidem, qua contra novos hæreticos novâ sollicitudine nunc defenditur, nunquam Ecclesia Christi non habuit.* Item Prosp. in respons. ad primam ex 15. object. Gallorum ità loquitur: *Prædestinationem Dei nullus Catholicus negat.* Similia habet S. Fulgent, in lib. de Incarn. & gratiâ Christi.

OPP. I. Ex SS. Prosp. & Hilario ad S. Aug. Semipelagianⁱ dicebant fatalem hæc sententiâ necessitatem induci, omnemque ad opera pia contentionem subverti, legis promissiones, & minas irritas fieri. Undè Faustus Regien. lib. 2. de Grat. & lib. arb. cap. 4. ità S. Aug. de prædestinatione sententiam perstringit. *Sub pietatis, inquit, fronte gentilitatis fatum; & inter gratia vocabulum, absconditum erit fatale decretum.*

R. prædestinatione nullam electis inferri necessitatem, quæ liberum arbitrium vel leviter offendant. Nam providentiæ non est (ait S. Dionys. lib. 4. de divinis nominibus) naturam violare; Deus enim, cujus est attingere à fine usque ad finem fortiter, & disponere omnia suaviter, ut hæ-

betur Sap. 8. rerum omnium, quas movet, integritati eâ ratione consulit, ut agentia naturalia necessariò, libera verò liberè operentur. Undè non est cur admittâ prædestinatione divinâ, legis promissiones dicantur inutiles item & irritæ minæ: Imò ex S. Greg. lib. 3. Dialog. cap. 13. quæ Sancti viri efficiunt, ita prædestinata sunt, ut ea precibus obtineant: nam ipsa quoque præmii prædestinatio ita est ab omnipotente disposita, ut ad hoc electi ex labore perveniant, quatenùs postulando mereantur accipere, quod eis omnipotens Deus disposuit donare.

INST. Positâ prædestinatione colligere possum: Si sum prædestinatus, salutem consequar: Si sum reprobus, damnationem non declinabo: Igitur ad quid Legibus servirem? Cur molestam admodum & laboriosam Evangelicam vivendi rationem amplecteter?

R. non attendisse Semipelagianos argumento simili præscientiam Deo eripi: Undè, ut ait S. Aug. lib. de bono persever. cap. 15. quemadmodum nos non deterremur à confitendâ Dei præscientiâ, si quis de illâ populo sic loquatur, ut dicat: sive nunc rectè vivatis, sive non rectè, tales eritis postea, quales vos Deus futuros esse præscivit; vel boni, si bonos; vel mali, si malos. Sic pariter argumentatione prædictâ fides prædestinationis non evertitur. Quærant indè Semipelagiani suæ dubitationi lucem & responsionem, Codices Sacros evoluant, & deprehendent nihil solemnius, nihil frequentius, nihil magis accommodatum, quàm electionis & prædestinationis doctrinam, simul & mandatorum fidæ observationis & accuratæ mercedem toties promissam in Scripturis. Satis sit ad hanc S. Petri admonitionem non levi studio attendere. *Satagite*, inquit epist. 2. cap. 1. *ut per bona opera certam vestram vocationem & electionem faciatis*. Igitur, ut infert S. Prosp. lib. 2. de vocat. Gent. cap. 36. *Studia non tolluntur orandi, nec per electionis propositum liberi arbitrii devotio relaxatur; cum... implenda voluntatis Dei ita sit prædestinatus effectus, ut per laborem operum, per instantiam supplicationum, per exercitia virtutum fiant incrementa meritorum; ut qui bona egissent, non solum secundum propositum Dei, sed etiam secundum sua merita coronentur*. Igitur ad virtutem incitamentis nec obest prædestinatio, nec reprobatio; cum nemo adultus non meritus fiat coronæ particeps; nec ullus damnatorum pœnis sit obnoxius, nisi violatæ legis conscius.

Conscientiæ suæ lumen Semipelagiani consulant; an in negotiorum procuratore; An in sanitate curandâ sic differunt? Si de valitudine prosperâ Deus decretum emisit; illâ proculdubio utar, & nihil mihi timendum occurrit: Si verò de morbo, aut morte inferendâ mihi legem tulit, recuperandæ, aut servandæ sanitati frustra studebo, & incassum ad medicos & ad remedia confugiam. At non ea est hominum differendi ratio; immò rebus suis summo studio consulunt, & salutis suæ non minori sedulitate provident.

CONCL. II. Prædestinatio non ad quosdam tantum, & eximios homines; sed ad singulos electos pertinet.

Prob. Discrimini, quod inter electos constituit Catharinus, reluctatur

quidquid in Scripturis refertur ; in quibus unica proponitur electorum species. Matth. enim 24. v. 31. Christus tempore iudicii *Mittet Angelos suos cum tubâ & voce magnâ ; & congregabunt electos ejus à quatuor ventis, à summis cælorum usque ad terminos eorum.* Matth. etiam 25. sic Christus die iudicii pariter ad electos est allocuturus. *Venite benedicti Patris mei, possidete paratum vobis regnum à constitutione mundi.* Ergo salvandis omnibus regnum à constitutione mundi fecit paratum. Igitur nec Apostolus Rom. 8. aut Eph. 2. ad quosdam tantum eximie prædestinatos sermonem habet, sed ad singulos electos : Rom. quippe 8. *Scimus quoniam diligentibus Deum omnia cooperantur in bonum, iis, qui secundum propositum vocati sunt sancti : nam quos præcivit & prædestinavit conformes fieri imaginis Filii sui ; quos autem prædestinavit hos & vocavit.* Item Eph. 1. *Elegit nos in ipso, ut essemus sancti & immaculati in conspectu ejus in charitate.* Unde S. Fulg. cap 35. lib. de fide ad Petrum : *Firmissimè tene & nullatenus dubites, omnes, quos vasa misericordiæ gratuita bonitate Deus fecit, ante constitutionem mundi in adoptionem Filiorum Dei prædestinatos à Deo ; neque perire posse aliquem eorum, quos Deus prædestinavit ad regnum cælorum ; nec quemquam eorum, quos non prædestinavit ad vitam, ullâ posse ratione salvari.* Et verò si à Deo non essent electi, qui regnum cælorum essent adepturi ; seipsos discernere, contra istud 1. Cor. 4. *quis te discernit ?* Equidem ex parabolâ de operariis, quæ Matth. 20. refertur, Catharinus suam colligit sententiam : At ex parabolæ illius expositione, de quâ quæst. 8. art. 9. de attrib. actum est, nullo pacto quidquam in ejus sententiæ confirmationem posse deduci, vel leviter attendenti fiet compertum. Nec Ecclesia in precibus ullum unquam discrimen interposuit in Canone Missæ. *Ab aternâ damnatione nos eripi, & in electorum tuorum jubeas grege numerari,*

ARTICULUS TERTIUS.

De Causis prædestinationis : & an ad primam gratiam electio sit gratuita ?

IL^IUS efficiens causa solus est Deus : claritas & splendor divinarum perfectionum, causa finalis : Dei benigna voluntas creaturam intellectuale in aternam beatitudinem transmittens, causa formalis : Intellectualis verò creatura, causa materialis. De causis illis non movetur quæstio, sed de rationibus Deum impellentibus tum ad gratiam primam, tum ad gloriam impertiendam.

ERRORES.

Animas ante mundum visibilem creatas ob varia vitæ prioris merita in corporibus sortes varias capere, prædestinationemque aut reprobationem sortiri censuit Origines,

Ex S. Aug. in æquum & laudabilem liberæ voluntatis usum justitiæ & gloriæ consecutionem Pelagius retulit.

Ad hunc Pelagii errorem utrunque accesserunt Massilienses, seu Semi-pelagiani; à nobis enim salutis ac fidei initium, & fidem reperebant. Refertur viri Theologi de Ecclesiâ benè meriti, quorum nomina reticere velim, in opiniones à veritate alienas prorsus abiisse; ut qui censuerint à Deo prædestinatos esse, quos gratiâ, necnon libero arbitrio rectè uluros, aut gratiæ non posituros obicem Deus præsensit.

Duplicem jam prædestinationem, ad gratiam primam, & ad gloriam distinximus; istam verò quoad intentionem, & quoad executionem esse spectandam addimus.

C O N C L. Hominis ad primam gratiam & vocationem Electio est omnino gratuita, nec ex meritorum præscientiâ, nec ex liberi arbitrii usu, aut ex alia causâ in homine positâ, est repetenda: gratiæ verò secundæ incrementum, operum bonorum, quæ divino beneficio eliciuntur, merito esttribuendum.

Prob. 1. Gratuita beneficentiæ suæ dona prima quælibet esse interprete Apostolo Rom. 9. Deus significavit Gen. 25. ubi Elau primogenito prælatu fuit Jacob: *Major serviet minori*. Item Gen. 48. v. 14. Præpositus quoque fuit Ephraim natu minor Manasse natu majori, obistente ipso Josepho Patre, Deut. 10. v. 15. Electi sunt similiter in Dei gentem Israël ita præ cæteris universi orbis nationibus, *elegitque semen eorum, post eos, id est vos, de cunctis gentibus sicut hodiè comprobatur*. Ejusmodi fuit Saulis in Regem electio; ut & Davidis præ fratribus. Tam munificam & gratuitam penitus liberalitatis divinæ largitionem, seu gratiæ & prædestinationis effusionem magnificam verbis expressis postmodum Deus voluit omnibus esse testificatam. Undè Pl. 58. *Misericordia ejus præveniet me*. Pl. 76. *Et dixi, nunc cæpi: hac mutatio dextera excelsi*. Pl. 78. *Cito anticipent nos misericordia tue*. Porro autem si misericordia prævertat actus: si mutatio, seu ad Deum conversio sit dextera excelsi opus; profectò in unicam Dei beneficentiam prædestinantem & prævenientem salutis negotium potest referri: Propterea nihil quidquam boni absque Christi gratiâ præstatum; nec ad ipsum acceditur, nisi Patre dante ac movente: Joan. quippè 15. v. 5. *Sine me nihil potestis facere*. Joan. 16. v. 44. *Nemo potest venire ad me, nisi Pater qui misit me, traxerit eum*, vel, ut aliquantò post habetur, *nisi fuerit ei datum à Patre meo*. Joan. 15. *Non vos me elegistis, sed ego elegi vos*. Primus ergò ad salutem gradus non libero arbitrio, non hominum meritis; sed soli misentis Dei clementiæ adscribatur necesse est: nec certè aliter ad primam gratiam prædestinatio esset gratuita; seu gratia non esset gratia, sed meriti præmium. Undè sit compertum, quantum Pelagius & discipuli à recto fidei tramite aberrarint.

Ubertiorem longè Pelagianæ hæreseos confutationem circa caput istud, & ex capite isto consecutiones quisque colligere poterit ex gratiæ Christi defensore nunquàm satis laudato, S. videlicet Aug. lib. de prædest. Sanct. cap. 8. lib. 1. adversus 2. epist. Pelag. cap. 3. & 19. lib. de grat.

& lib. arbit. cap. 5. & epist. 107. Item ex aliis SS. Patribus, nimirum S. Hieron. lib. 3. contra Pelag. S. Prosper epist. de lib. arbit. ad Rufinum, & lib. cont. Collatorem: qui doctrinam catholicam cont. Pelagianos his S. Pauli testimoniis præsertim confirmarunt. Rom. 11. v. 6. *Si autem gratia, jam non est gratia. v. 35. Quis prior dedit illi, & retribuetur ei?* 1. Cor. 4. v. 7. *Quis enim te discernit? quid autem habes quod non accepisti? Si autem accepisti, quid gloriaris quasi non acceperis?* 1. Cor. 1. v. 31. & 2. Cor. 17. *Qui gloriatur, in Domino gloriatur.* 2. Cor. 3. *Non quod sufficientes simus cogitare aliquid à nobis, quasi ex nobis: sed sufficientia nostra ex Deo est.* Ephes. 2. v. 8. *Gratiâ enim estis salvati per fidem, & hoc non ex vobis; Dei enim donum est: non ex operibus, ut ne quis gloriatur. Ipsius enim sumus factura, creati in Christo Jesu in operibus bonis, quæ præparavit Deus, ut in illis ambulemus.* Si prior dedit Deus; ad dandum rectus voluntatis humanæ affectus Deum non impulit; si nos ipsos non secernimus, & à Deo solo secretionem habemus acceptam; si ad piè cogitandum vires non suppetunt; si salus omnis ex gratiâ & ex fide, non verò ex nobis penderet; denique si in Christo divinitus sumus creati; cur ad liberi arbitrii laudes Pelagiani confugiunt, cum nihil recti possit voluntas sibi relicta? Totum igitur salutis beneficium in solâ Christi munificentia reponatur. Consecutiones tam apertæ uberiori explanatione non indigent: prioribus Apostolorum discipulis idè fuerunt in promptu.

S. Iren. lib. 4. cap. 16. asserit implevisse Christum S. Joannis verba, posse nempe ipsum ex lapidibus suscitare filios Abrahamæ: Patrem nemini notum esse, nisi cui voluerit Filius revelare: *Revelat enim omnibus Filius, à quibus velit agnosci Pater; & neque sine bonâ voluntate Patris, neque sine administratione Filii cognoscet quisquam Deum.* Et idè se vocavit viam, veritatem, & vitam; & neminem nisi per ipsum docuit accedere ad Patrem.

Tertull. lib. de præscript. cap. 3. gratuitam electionem probat ex his verbis: *Cognoscit Dominus qui sunt ejus, & plantam quam non plantavit Pater, eradicat.*

S. Hilar. can. 2. in Matth. ait mercedem deberi ex opere; *Sed gratuitam gratiam Deus omnibus ex fidei justificatione donavit.* Non igitur codices sacros utriusque fœderis, nec præsertim Gentium Apostolum Paulum, nec Apostolicam traditionem Pelagius consuluerat.

2. Hanc doctrinam à Deo traditam, & ab Apostolis explanatam, contra Pelagium firmarunt Concilia Carthagenensia, Hispal. Arausic. Valent. & tandem Trident.

Definit Synodus Arausic. 2. an. 529. à fide alienos esse, qui humanâ invocatione gratiam Dei conferri censent; non autem ipsam gratiam facere ut Deus à nobis invocetur. Decernit etiam Apostolicis dogmatibus illos adversari, qui dicunt, tum Deum expectare voluntatem nostram, ut à peccato purgemur; nec efficere per operationem & infusionem Spiritûs sancti, ut à peccato purgari velimus: tum initium fidei, ipsumque

credulitatis affectum, quo in Deum credimus, & ad regenerationem baptismatis adducimur, non per gratiæ donum, sed naturaliter inesse sine Dei gratiâ: tùm credentibus, volentibus, desiderantibus, conantibus, laborantibus, vigilantibus, studentibus, quærentibus, pulsantibus nobis misericordiam conferri; aut humilitati, vel obedientiæ humanæ subjungi adiutorium gratiæ: tùm demùm nos per naturæ vites aliquod bonum ad æternæ vitæ salutem pertinens cogitare, ut expedit, aut eligere posse. Can. 9. addit divini muneris esse cogitatione rectas, & falsitatis & injustitiæ odium: *Quoties enim bona agimus, Deus in nobis atque nobiscum, ut operemur, operatur.*

Constituerunt pariter Innocent. I. & Zozim. cont. Pelag. nihil absq; Dei gratiâ posse, sive inchoari, sive perfici: & Cœlest. in epist. ad Præsules Gallic. à gratiâ Dei omnia hominum merita præveniri, eoque auxilio & munere non aufertur liberum arbitrium, sed liberari, *Ut de tenebroso lucidum, de pravo rectum, de imprudente fiat providum. Tanta est enim erga omnes homines bonitas Dei, ut nostra velit esse merita, quæ sunt ipsius dona; & pro iis quæ largitus est, æterna premia sit donaturum: agit quippè in nobis, ut quod vult, & volumus, & agamus; nec otiosa esse in nobis patitur, quæ exercenda, non negligenda dedit; ut & nos cooperatores simus gratiæ Dei.* Ex Patribus antiquis, & ex coætaneis, ut divinam hanc ostendat fidem, plures laudat S. Aug. lib. de bono persever. Eandem quoque fidei veritatem edocet lib. de prædest. Sanct. lib. de corrept. & grat. epist. 105. ad Sixtum, & Enchir. 32. ubi sic habet: *Si nullus dicere Christianus audebit: non misericors est Dei, sed volentis est hominis, ne Apostolo apertissimè contradicat: restat ut propterea rectè dictum intelligatur: neque volentis, neque currentis, sed misericors est Dei, ut totum Deo detur, qui hominis voluntatem bonam, & preparat adjuvandam, & adjuvat preparatam.*

3. Veritatem hanc quandòque singularibus misericordiæ suæ operibus facit Deus conspicuam, & inexpectatis mediis, gratiæ suæ, quos vult, facit participes. Palàm est Act. 9. S. Pauli conversio. In S. Aug. vitâ Possidius aliud refert exemplum eximium, Firmum scilicet mercatorem Manichæum ad S. Augustinum accessisse, & ad ejus pedes procubuisse; sed cum à suis Clericis inquireret S. August. an observassent ipsum à proposito in concione discessisse, & adversus Manichæos petorasse; Firmi auditoris cognitâ conversione, gratias Deo egisse: *Qui cum voluerit, & undè voluerit, & quomodò voluerit, & per scientes, & per nescientes salutem operatur animarum.*

Præclara prorsus ejusdem benignitatis divinæ monumenta referunt Historici Ecclesiastici, ut Rufinus lib. 1. cap. 9. ubi dicit citeriorem Indiam semina fidei à Frumentio accepisse, qui à Præceptore Meropio Philosopho regiones perlustraturus fuerat adductus. Et lib. 2. c. 4. refert Lucii Ecclesiæ Alex. invasoris autoritate in Insulam quamdam Paludum Egypti transvectos esse Maccarios duos; quam cum totam idololatriæ deditamprehendissent, doctrinâ & exemplis ad fidem advocarunt.

Qui subsecuti sunt, ut S. Prosper lib. 2. de vocat. gent. cap. 1. & ultimo lib. contra Collat. in respons. ad Capit. Gallorum, S. Fulgent. de Incarnat. cap. 20. S. Greg. Mag. lib. 1. dial. cap. 8. & Hom. 3. in Ezechiel, Beda, Primasius, & alii Catholici Doctores in epist. ad Rom. eam doctrinam explanarunt.

Ultimò Pelagianorum cavillationibus locum omnem præcipit hominum status miserandus: quia enim ratione gratiâ digni forent, qui nascuntur iuxta filii? an merito? prævisio illam Dei munificentiâ utcumque promeretur? At ex infantibus non pauci percepto baptismo; alii etiam fidelium filii eâ gratiâ non donati occumbunt, sicuti docet S. August. lib. de prædest. Sanct. c. 12. Si autem de adultis sit quæstio; quodnam fuit Pauli persecutoris meritum? Quamobrem ex his omnibus compertum prorsus est, electionem hominis ad primam gratiam, & vocationem, esse omninò gratuitam, seu à meritorum præscientiâ independentem.

O P P. 1. Proverb. 16. v. 1. *Hominis est animam præparare, & Domini gubernare linguam.* 5. 9. *Cor hominis disponit viam suam; sed Domini est dirigere gressus ejus.* Zachar. 1. *Convertimini ad me, & ego convertar ad vos.* Matth. 25. *Tribuit unicuique talenta secundum propriam virtutem.* Rom. 7. *Velle adjacet mihi; perficere autem bonum non invenio.* Igitur fidei & operum principium petitur ex homine seipsum parante, disponente, convertente ad Deum, juxta vires accipiente à Deo talenta &c.

Rt. S. Aug. lib. 2. ad Bonif. cap. 8. & lib. de grat. & lib. arbitr. 6. cap. 5. his in locis commendari liberum arbitrium: sed non excludi gratiæ prævenientis adjumentum; quemadmodum in istis: *Converte nos Deus salutaris noster: & præparatur voluntas à Domino.* Commendari gratiæ prævenientis beneficium; sed non excludi liberæ voluntatis cooperationem. Quam responsionem ut Ecclesiæ Catholicæ doctrinam proponit ad fidem Conc. Trid. sess. 6. cap. 5. *Cum dicitur, inquit, convertimini ad me, & ego convertar ad vos; libertatis nostra admonemur: cum respondemus converte nos Domine ad te, & convertemur; Dei gratiâ nos præveniri consuevit.* Quæ nisi essent iâ; sine Christo exequi multa & summi momenti penes nos esset. Matth. 25. tribuitur quidem talentorum varietas secundum propriam virtutem; sed nomine propriæ virtutis non significatur dispositio naturæ, sed gratia unicuique collata, ut talento sibi credito benè uti possit. Undè Eph. 4. *Unicuique autem nostrum data est gratia secundum mensuram donationis Christi.* Cæterùm nomine talentorum intelligendæ sunt gratiæ gratis datæ, ut sunt v. c. gratia sanitarum, genera linguarum, interpretatio sermonum, & alia id genus. Quid ex Rom. 7. gratiæ Christi hostes velint inferre, non est in propatulo. An contendunt rectum voluntatis propositum ex naturæ viribus haberi? cum ex nobis, teste Apostolo, tanquam ex nobis non sumus sufficientes, qui piè vel aliquid cogitemus. Idèd condelectabatur Apostolus legi *Dei secundum interiorem hominem*; nec tamen, quæ in votis erant, perficere inveniebat; quia sentiebat, *aliam legem in membris suis repugnantem legi mentis, & captivantem in lege peccati.*

peccari. Neque cum datur voluntas bona, illicò fit exequendi facultas, nisi querentibus, petentibus, ac pulsantibus; ut, qui dedit desiderium, præstet effectum. Undè Abel iusto, inquit Arausic. Syn. 2. cap. 25. & Noë, & Abraham, & Isaac, & Jacob, omnique sanctorum antiquorum multitudini illam præclaram fidem, quam in ipsorum laudem prædicat Apostolus Heb. 11. non per naturæ bonum prius in Adam datam; sed per gratiam Dei, credimus fuisse collatam: Quam gratiam, etiam post adventum Domini, omnibus, qui baptisari desiderant, non in libero arbitrio habere, sed in Christi novimus simul & credimus largitate conferri, juxta illud S. Pauli Philip. 1. v. 29. *Vobis donatum est pro Christo, non solum ut in eum credatis, sed etiam ut pro illo patiamini.* Et v. 6. *Qui cæpit in vobis opus bonum, perficiet usque in diem Christi Jesu.* Quamobrem manifestissimè credendum est, ait ista Synod. Latronis ad paradisi Patriam vocati, & Cornelii Centurionis Angelicâ visitatione cohonestati, & Zachari Christum domo excipientis fidem mirabilem, non fuisse naturæ donum; sed divinæ largitatis beneficium. Sic S. Aug. de Cornelio lib. de prædest. Sanct. cap. 7. *Nec tamen sine aliquâ fide donabas & orabas; nam quomodo invocabas, in quem non crediderat? Sed si posset sine fide Christi salvus esse, non ad eum edificandum mitteretur architectus Apostolus Petrus.*

O P P. 2. Clemens Alex. lib. 5. Stromat. sub finem docet naturalem in omnibus esse iustitiam: hoc etiam addit: *Est autem unusquisque nostrum benevolentia particeps ad id, quod vult; differentiam enim fecit electionis anima, que evasit digna, voluntariumque institutum, & exercitatio.*

Orig. lib. 7. in cap. 8. ad Rom. electionem in affectum, quem Deus in vocato deprehendit, refert; ita ut, quos salutis suæ desiderio teneri videt, ad fidem Deus vocet.

S. Hil. in Psal. 11. S. Greg. Nazianzenus orat. 13. & Sanctus Chrysostomus in eandem descendunt sententiam. Hic Homiliâ. 42. in Generat. de Abraham docet Abrahamum magna dona gratiæ à Deo accepisse, sed antea se ad illa per bona opera disposuisse: *Verum, inquit, nisi primum & ipse, quod suum erat, fecisset; non tanta à Domino obstinisset.* Et paulò post. *Attende quomodo primum in omnibus virtutis suæ indicium exhibuerit, atque sic divinum merueris præsidium.* Item Hom. 17. in Joan. ait Deum suis in nos beneficiis nostras non prævenire voluntates; sed à nobis esse incipiendum: cum autem nos prompto paratoque animo ad gratiam suscipiendam exhibemus; tunc multa nobis offerre salutis media. Lib. quoque de con. punctione cordis hæc habet: *Ad eos qui nec initium faciunt convertenti ad Dominum, omninò non venit; rectas enim diligit mentes, & sine suco propositum: quod etiam in Paulo prospiciens, licet alio a thur itinere videretur incedere; tamen quia proposito recto & zelo Dei hoc agebat, dicit de eo Dominus, quia vas electionis est mihi iste: hæc autem testatus est de eo, priusquam ei gratia daretur.* Ita Hom. 12. in epist. ad Heb. & Hom. 41. ad pop. Antioch. S. Hieronymus lib. 3. cont. Pelg. nostrum esse rogere scribit, Dei verò tribuere, quod rogatur; nostrum incipere, illius perficere; nostrum offerre quod possumus, illius implere:

quod non possumus. Quod argumentum ex SS. Patrum consensione eò est validius, quòd Patres isti factorum codicum fuisse interpretes commendati maxime. Et ideò recens habita est, & à S. Aug. excogitata mox allata expositio. Et certè S. ipsi Augustino ità constabat sententiæ novitas, ut ab antiquorum doctrinâ recedere se non diffiteatur; ideò lib. de prædest. Sanct. cap. 19. *Opus non est, inquit, ut eorum scrutemur opusculum, qui, antequam ista oriretur hæresis, in hac difficili questione versari non fuerunt coacti.*

R. SS. Patrum monumentis evolvendis à Theologis quibusdam non fuisse datam operam, saltem eam, quæ par erat, ne tam illustribus Ecclesiæ magistris vel levissima erroris labes inureretur: SS. enim Patres illos, aut ex illis quosdam, Semipelagianorum auctores fecerunt; & S. August. novæ doctrinæ dedisse locum protulerunt. Tarcant si dicam à S. Aug. propugnatam adversus excitatas suo tempore hæreses doctrinam istis in Patribus illos fuisse deprehensuros, si Pelagianis & Semipelagianis nondum exortis expendissent, quid vel ipsi felicibus illis temporibus, quibus florebant SS. Patres, in scriptis, aut ad plebem sermonibus habitis protulissent: collegissent subito, non aliam futuram fuisse suam differendi rationem, si tunc vitam egissent, quàm quæ fuit Sanctorum illorum Patrum, qui aliam damnatis illis hæresibus viam dubio procul iniissent, non absumilem ab accuratâ Theologorum nunc scribendi ratione. Primæ gratiæ causam antecedentem in homine positam nunquam ii professi fuerunt. Equidem Deum ut benignum; sed prudentem bonorum largitorem verbis suis expresserunt, qui tempus, locum, opportunitates & alia adjuncta in vocati commodum attemperet; nec continuò efficacissimæ gratiæ virtutem quibuscunque impertiat: imò & ea tunc, ut habet S. August. tract. 9. in epist. primam S. Joan. non secùs ac faber lignarius non dolatum lignum adamat, quid inde velit efficere apud se reputans: *Sic adamat quod inde facturus est, non illud quod est.* Non igitur naturæ quidquam tribuerunt antiqui, quod à Deo non esset acceptum; nec libero arbitrio adscribunt obsequii meritum. Similes enim dicendi rationes plerumquæ in Scripturis occurrunt, quæ universam salutis æconomiam in Dei misericordis beneficentiam referunt.

Quid igitur contra Christi gratiam peccavit S. Justinus, qui non de fidei initio disserit, sed de donis gratuitis; addit enim, *Atque hic quidem accepit intelligentiæ spiritum; ille autem consilii, alius fortitudinis, alius sanationis, alius doctrine, timoris Dei quispiam.*

S. Clem. Alex. & alii nihil aliud conficiebant, quàm ut libertatis integritatem commendarent: nec ante perceptam Christi doctrinam liberum arbitrium, si quid boni præstitit, volunt gratiæ beneficiis fuisse destitutum.

Origenis sententia mox relata de animarum lapsu ante infusionem in corpora, sequelas habet gratiæ Christi adversas admodum. S. verò Hilarius in Psal. 117. *Inclina cor meum*, ait esse à nobis, cum oramus, exordium; ita ut munus à Deo sit. S. Greg. Naz. orat. 13. ad illud Math.

19. *Non omnes capiunt verbum hoc, sed quibus datum est; docet singula Dei benignitate in nobis inchoari; & velle, non ex nobis, sed ex Dei misericordiâ & bonitate haberi. Et addit naturæ vim ad virtutem excitari cogitatione instar filicis, ex quo ignis excutitur: hæc autem cogitatio excitans est gratia Dei.*

S. Chrysost. Deo tribuit, quæ Deus solus operatur; nobis verò, quæ nos cum Deo exequimur: & eo sensu loquitur de Abrahamo, cui Deus solus præstantia illa dona contulit, ut multarum gentium esset pater, & ut in ejus semine gentes omnes benedicerentur. Hæc autem Deus non præstitit, nisi postquam Abrahamus credidit: fides enim ei reputata est ad justitiam, Rom. 4. sed non credidisset, nisi datum ipsi fuisset à Deo. Quod verò nonnunquam dicat nos à Deo non preveniri; id tantum intelligit per modum determinantis ad unum, & vim & necessitatem inferentis; ita ut libertatis indifferentia tollatur: quod & sæpius repetit, tum ob Manicheos, qui liberum arbitrium negabant; tum ad depellendam hominum vecordiam, ne scilicet crederent à Deo in omnibus se ita esse præviis auxiliis movendos, ut nihil sibi relinqueretur exequendum. Equidem hortatur ipse S. Chrysost. ad initium salutis; sed instar Apostoli Ephes. 5. scribens: *Surge qui dormis, exurge à mortuis, & illuminabit te Christus*: non quod vi naturæ possimus à peccati somno surgere, antequàm Christus nos illuminet; sed quia per Christi gratiam debemus à peccati veterino surgere, priusquam perfectà Christi gratiæ luce repleamur.

S. Hieron. nostrum esse velle, Dei verò quod volumus implere scripsit; non quod nostrum sit velle absque ipsius Dei ope; sed quod aliqua velle gratiâ excitante adjuti possimus, quæ absque Dei adjumento non valeamus implere. A peccato quolibet vellemus quidem esse immunes, nec ullos inferioris partis motus experiri: sed hæc non consequemur, & cum S. Paulo profitebimur semper: *Velle adjacet mihi, perficere autem bonum non invenio*. Deus solus facit, ut quæ cum ipso volumus, impleamus; quandò scilicet omnes nostros sanat languores. Porro noluisse unquam S. Hieron. nostrum esse velle sine Dei ope, palàm est ex epist. ad Ctesiphont. *Velle & currere, inquit meum est: sed ipsum meum, sine Dei auxilio semper non erit meum: dicit enim idem Apostolus: Deus est qui operatur in nobis & velle, & perficere*. Idem ex ejus contra Pelagianos operibus est compertum.

Adeò non constitit S. Augustino de doctrinæ suæ novitate, ut qui antiquæ fidei fuerit studiosissimus, & in dogmate de Christi gratiâ antiquos sæpius laudavit Patres. Lib. enim de dono persever. cap. 19. SS. Cyprian. Greg. Naz. & Ambr. tanquam suæ doctrinæ defensores in medium adducit. Ideò autem opus esse negat aliorum scrutari opera, quod necesse iis non fuisset huic immorari quæstioni. Cæterùm fidem eorum innotescere certò, ex continuis eorum & Ecclesiæ precibus supposebat; non enim postulassent à Deo, quæ præcepit fieri; nisi ab ipso donarentur, ut fierent. Simile aliquid S. August. protulerat epist. 49.

ad Deo gratias : quærentibus enim Ethnicis cur Christus tandiù incarnationem distulisset ? Respondet, tempus quo credituri erant, cum expectasse. Cum autem illam ei doctrinam postmodùm opponerent Peligiani : reponebat lib. de prædest. Sanct. cap. 9. de illis, quos æternæ prædestinationis suæ decreto gratiæ motui obsecuturos Deus cognoverat, se fuisse locutum.

O P P. 3. Facienti quod in se est, Deus non denegat gratiam : quod vetus effatum admittere videtur S. Thom. tùm in 2. sent. distinct. 28. quæst. 1. art. 4. in corp. ubi docet ad gratiam gratum facientem habendam, ex solo libero arbitrio posse hominem se præparare ; faciendo enim quod in se est, gratiam à Deo consequitur : tùm etiam quæst. 14. de verit. art. 11. ad 1. ubi scribit homini in sylvis inter feras nutrito procul ab aliorum hominum societate, & rationis naturalis lumen in boni prosecutione, & mali fugâ sequenti, Deum, vel per internam inspirationem certò revelaturum quæ sunt fidei ; vel aliquem fidei prædicatorem, Angelum, aut hominem ad eum directurum, sicut & Act. 10. Cornelium Petri ministerio edocuit. Igitur naturæ viribus elicita opera electioni ad primam gratiam præeunt & inserviunt.

R. homini facienti quod in se est ex gratiæ sibi à Deo merè gratis collatæ beneficio, Deum gratiam alteram vel habitualement, vel actualem impetiri. Ità S. Thom. 1. 2. q. 109. art. 6. ad 2. & 3. & quæst. 112 art. 3. ad 1. & S. Bonaventur in 2. sent. distinct. 28. art. 2. quæst. 1. neque enim illi, qui facit quod in se est ex solis naturæ viribus, debetur gratia ; alioquin gratia non esset gratia ; nec Deus Rom. 9. miseretur cujus vult, ut qui ad miserendum humanâ virtute moveatur ; nec homo gloriari deberet in Domino, 2. Cor. 10. sed in seipso ; sicque immeritò diceret S. Aug. tract. 26. in Joan. *Quare illum trahas, & illum non trahas, noli velle dijudicare, si non vis errare.* Theologi quidam divinæ gratiæ donum ejusmodi homini ineffabiliter concessum iri censent, quòd in hominum gratiam pactum illud cum Patre Christum iniisse supponant, & consequenter pollicitum facienti quod in se est, nullatenus gratiam esse defuturam. Sed undè fædus illud fuerit acceptum, mihi omninò non constat ; nihil enim in sacris codicibus, nec in apostolicâ traditione occurrit, quod sententiæ illi faveat. Addo propositionem istam ex 14. undecimam (conanti ex naturâ datur gratia) coram Clem. VIII. in congreg. de auxiliis congreg. 11. 12. 24. 26. & 31. consultoribus à mente Cassiani doctrinæ Semipelagianorum addicti visam fuisse non omninò alienam.

Insuper S. Thom. lib. 2. ad Hannib. Card. distinct. 29. art. 11. & 12. q. 109. art. 6. & alibi, sine gratiæ auxilio ad gratiam parare se posse neminem probat. Ad priorem S. Thomæ locum respondet Sylvius aliud nihil velle Sanct. Thomam, quàm ad gratiam habitualement habendam alterâ gratiâ habituali homines non indigere ; nequaquam verò ab agente quod in se est, gratiam actualem excludere. In alio autem loco S. Doctor non loquitur de homine, qui solius naturæ beneficio, sed cujusdam actualis gratiæ auxilio naturæ legem servet : undè in

exemplum Cornelium adducit, cujus orationes & eleemosynæ ad Deum ascenderant. Et reverà S. August. lib. de prædest. sanct. cap. 7. docet Cornelium non sine aliquâ fide pauperibus fuisse subsidio: quod & expressit ipsè S. Thomas, 2. 2. quæst. 10. art. 4. ad 3. his verbis: *De Cornelio sciendum est, quòd infidelis non erat: alioquin ejus operatio accepta non fuisset Deo, cui sine fide nullus potest placere.*

INSTANT alii. Deus fieret personarum acceptor, nisi gratiæ beneficium facienti quod in se est, largiretur.

R. Deum primam gratiam ex justitiâ non impertire, sed ex misericordiâ; quandoquidem peccati originalis rei homines singuli jure ad primam gratiam exciderunt. Nec inde sequitur libertatem lædî; cum eî vim non inferat gratia; sed illustret, & ad consensum moveat, reluctandi integrâ facultate relicta. Undè S. Bernard. lib. de grat. & lib. arbit. cap. 1. *Tolle liberum arbitrium, inquit, & non erit quod salvetur: Tolle gratiam, non erit undè salvetur. Opus hoc sine duobus effici non potest, consensu accipientis, & gratiâ dantis.*

Si nobis ipsis morem gessissemus, res citius longè fuisset confecta: ubi enim constitisset nobis, nec in Scripturâ, nec in Apostolicâ Traditione contineri verba illa, facienti quod in se est, Deum non denegare gratiam; nullius ea esse debere apud Catholicos ponderis fuisset certum.

ARTICULUS QUARTUS.

*An ad gloriam prædestinatio sit ex meritis prævisis?
an merè gratuita?*

DE prædestinatione ad primam gratiam inter catholicos nulla fermè controversia superest. Circa prædestinationem ad gloriam non ea est animorum consensio; cum prædestinationem isti ex meritis prævisis, alii ex Dei beneplacito repetant. In re abstrusissimâ S. Augustini doctrinam tum ab antiquis Pontificibus ut Hosrmodâ in epist. ad Possessorem, & aliis; tum à Patribus coarctans & sequentibus servatam, præferendam esse censi. De tanti doctoris mente moveri controversiam non ignoro; sed hanc non esse æquam probat eruditissimus Petavius, cui assentior simul, & asseveranti ad fidem non pertinere quæstionem istam, & cuique liberum esse alterutram seligere opinionem, præsertim cum Cælestin. Pontifex epist. 1. ad Episc. Gall. Pelagianæ hæreseos capitibus præcipuis damnatis, sic constituat: *Profundiores verò, difficiliorefque partes occurrentium quæstionum, quæ latius pertractarunt, qui hæreticis restiterunt, sicut non audent con-temnere, ita non necesse habemus adstruere.* Ad has autem profundiores quæstiones controversia de prædestinatione ad gloriam videtur referenda.

Ideò in S. Aug. sententiam descendo, ut dixi, quòd in altissimo de gratiâ mysterio fuerit versatissimus; quòd illius doctrinam tantoperè Pon-

tifices & Synodi commendarint ; quoddam sanctissimi viri eruditione sacrâ commendabiles admodum , eam fuerint amplexi.

Statim , Fateor , reluctatur animus , nec facile intelligit , quomodo vita æterna in operum mercedem nobis promittatur , nemini non offeratur , peccatoris mortem nolit Deus ; & tamen ab æterno in peccati originalis pœnam plures Dei decreto ab illâ vitâ removeantur , seu ad eam assequendam non destinentur. Sed ubi , quæ alteri sententiæ adversari videntur , attentâ mente pondero : non levioris momenti difficultates in illius opinionis defensione mihi occurrunt : cum enim non nisi ex Dei beneplacito gratia prima gratis concedatur ; beneficio illo non concesso , nulla æternæ vitæ consequendæ sit ratio ; infantibus istis baptismi gratia , aliis verò non imperiatur ; perseverantiæ donum nemini sit debitum , sed singulare Dei donum habeatur ; ab æterno Deus , quidquid singulis foret obventurum recto aut pravo beneficiorum ipsorum usu , præstiterit ; non in leviores angustias me conjectum fui expertus. Undè cum de questione istâ silere non possem , mihi tunc iri consultum existimavi , si tanti nominis magistro cum tam eximiis viris mox laudatis , semotâ omni æstuosâ contentione adhærerem.

CONCL. Ad gloriam electio , seu prædestinatio , positâ peccati originalis labe , non ex meritis prævisis , sed ex gratuitâ Dei benignitate oritur.

Prob. 1. Quod ex prævio Dei beneplacito pendet , & nullum , aut actuale , aut futurum , aut prævisum meritum exigit ; ad unicam Dei benignitatem est referendum. At prædestinatio ad gloriam est ejusmodi. Ex unico Dei beneplacito pendet : nam Luc. 12. *Nolite timere pusillus grex* , inquit , Christus ad discipulos , *quia complacuit Patri vestro dare vobis regnum*. Pusillus autem ille grex , est electorum cætus , quem in personâ discipulorum alloquitur , & cui pater ex puro voluntatis beneplacito regnum largitur , non meritum actualium , futurorum , vel prævisorum ratione habitâ. Joan. 15. *Non vos me elegistis : sed ego elegi vos & posui vos , ut catis . & fructum offeratis , & fructus vestri maneat*. Rom. 8. *Quos prædestinavit , hos & vocavit . . . justificavit . . . glorificavit*. Rom. 9. *Cum nondum nati fuissent , aut aliquid boni egissent aut mali (Jacob & Esau) ut secundum electionem propositum Dei maneret , non ex operibus , sed ex vocante dictum est ei ; quia major serviet minori ; sicut scriptum est : Jacob dilexi ; Esau autem odio habui*. Jacobum Esau prætulit Deus , non ob præstantia Jacobi opera , vel præstita , vel præstanda ; sed antequam quidquam boni confecisset ; & ut propositum Dei maneret secundum electionem non ex operibus , sed ex Dei voluntate factam ; & ut manifestaretur quod dictum est Moyse i xod. 33. *Miserebar cuius voluero ; & clemens ero in quem mihi placuerit*. Undè infert S. Paulus , Rom. 9. *Igitur non volentis , neque currentis ; sed misereantis est Dei*.

Porrò si dilectio Jacobi fuisset ex meritis prævisis ; non esset Dei misereantis munus , sed Jacobi meritum merces ; nec tantum esset vocantis Dei beneficium , sed præcognitorum Jacobi operum præmium ; quod

utrumque negat Apostolus. Sed quia indè poterant inferre nonnulli, Deum de hominibus injustè conqueri, si totum humanæ salutis opus ex ejus voluntate pendeat: hunc ut animis eximat scrupulum Apostolus, non ad opera prævisa, sed ad figuli confugit exemplum, Rom. 9. *O homo tu quis es qui respondeas Deo? nunquid dicit figmentum ei qui se finxit, quid me finxisti sic? an non habet potestatem figulus luti ex eadem massâ facere aliud quidem vas in honorem, aliud verò in contumeliam? Sic. Jerem. 18. Sicut lutum in manu figuli; ita in manu meâ vos domus Israël.*

Qui S. Apostolum, aut de solis naturæ operibus intelligunt; aut de unicâ Jacobi felicitate temporali, ut qui Elati in posteris fuerit præpositus; aut de solâ prædestinatione ad gratiam sermonem habere contendunt; ad ejusdem Apostoli mentem & propositum non videntur attendere: quod apertè prorsus indicat S. Aug. tum epist. 103. ad Sixt. tum Enchir. cap. 98. tum etiam lib. 1. cont. duas epist. Pelag. cap. 7. ubi hæc habet: *propter quod profecto desipitis, qui, dicente veritate: non ex operibus, sed ex vocante dictum est; vos dicitis ex futuris operibus, quæ Deus illum facturum esse præsciebat, Jacob fuisse dilectum; atque ita contradicitur Apostolo dicenti, non ex operibus; quasi non posset dicere, non ex presentibus, sed ex futuris operibus.* Adeo non de temporali prælatione S. Paulus loquitur; quin imò de solis animorum calamitatibus & remediis disserit: nec aliud sibi proponit, quàm in animi demissione adducere Judæos & gentiles; quod ut conficiat, peccato nullum non teneri hominum, & nemini gratiæ Christi beneficium deberi docet, atque probat. Hæc emulatione non levi ex gentibus & ex Synagogâ conversi à se invicem dissidebant: jactitabant quippè Judæi gentibus se verè antepositos, ut potè Abrahæ posteros, quibus legis prærogativa fuerat concessa, Messias promissus, & ad quos hereditatio jure promissiones prophetica pertinerent. Repulso verò, & repellendos fuisse à Dei beneficiis Judæos, in æquissimam tot scelerum & Deicidii perpetrati penam gentiles conversi disputabant. Erant autem utrique comprimendi & suam omnem in eo efficiendo operam collocat Apostolus. Igitur non in terrenis beneficiis, aut commendandis, aut elevandis laborat; sed in solius gratiæ per mediatorem donis illustrandis; quod totius est epist. propositum. Undè Rom. 8. v. 21. *Reliqui mihi septem millia virorum qui non curvavere genua ante Baal: sic ergo in hoc tempore reliquia secundum electionem gratiæ salvæ facta sunt: si autem ex gratiâ, jam non ex operibus; alioquin jam gratia non est gratia.* Nec ait S. Paulus relicta sunt, aut remanserunt septem millia virorum, ne propter opera viderentur relicta; sed ego reliqui mihi, ut gratiæ munus elucisceret. & ideo reliquias dicit salvari secundum electionem gratiæ. Hinc exclamabat cap. 9. *O altitudo! quis cognovit sensum Domini? aut quis consiliarius ejus fuit? aut quis dedit illi prior, & retribuetur ei?* Hæc est expositio S. Aug. cap. 98. Enchir.

Eadem doctrina in singulis fermè S. Pauli epistolis est conspicua. Ephes. quippè 1. *Elegit nos in ipso (scilicet Christo) ante constitutionem mundi, ut essemus sancti & immaculati in conspectu ejus in cha-*

ritate. Non ait: elegit nos ob bonum liberi arbitrii, vel gratiæ usum; sed secundum propositum voluntatis suæ, idque in laudem gloriæ gratiæ suæ. Subdit enim Sanct. Paulus: *Prædestinavit nos in adoptionem filiorum per Jesum Christum in ipsum, secundum propositum voluntatis suæ in laudem gloriæ gratia suæ.* Non solum de electis ad gratiam, sed & ad gloriam ibi dislerit: prius enim scripserat, *Qui benedixit nos in omni benedictione spirituali in cælestibus.* Hæc est consecutio & expositio S. August. lib. de prædest. Sanct. cap. 18. & S. Hieron. in hunc locum. Hoc & addit in eodem capite S. Paulus: *In quo etiam & nos sorte vocati sumus prædestinati secundum propositum ejus, qui operatur omnia secundum consilium voluntatis suæ.* At ubi sors est, ibi nulli meritorum ratio. Igitur ex Scripturis, juxta SS. Patrum contra grassantes suis temporibus hæreses interpretationem, merè gratuita est ad gloriam prædestinatio.

1. S. August. lib. de corrept. & grat. cap. 7. de prædestinatis ad gloriam sic definit: *Electi sunt ad regnandum cum Christo; seu Christus eos elegit, ut obtineant regnum.* Et ibidem: *Quicumque ab illâ originali damnatione istâ divine gratiæ lagitate discreti sunt, non est dubium quod & procuratur eis audiendum Evangelium, & cum audiunt credunt, & in fide quæ per dilectionem operatur, usque in finem perseverant.... & nonnulli acceptâ gratiâ in quâlibet ætate, periculis hujus vite mortis celeritate subtrahuntur.* Hac enim operatur in eis, qui *vasa misericordiæ operatus est eos, qui & elegit eos in filios suos ante constitutionem mundi per electionem gratiæ.* Si autem gratia, jam non ex operibus: alioquin gratia jam non est gratia. Ergò quæcumque prædestinatis à Deo conferuntur beneficia, ad prædestinationis decretum oportet referre, ut fidem, & in fide firmitatem, & in charitate constantiam. Quæ doctrina penitus Pelagianæ reluctabatur, quæ hominum ad gloriam electionem ex prævisis meritis repetebat. Et cap. 8. ejusdem libri, cum inquit S. Aug. cur Deus uni, & non alteri perseverantiam concedat? cur justum de præsentis vitæ periculis non rapiat? cur filios quosdam fidelium absque baptismo decedere patiat, & à regno repellat; gentilium verò filiis quandoque baptismo donatis regni gloriam impertit? An ad meritorum præscientiam, ut has explicet difficultates, configit? nullatenus, sed exclamat cum Apostolo: *O homo tu quis es, qui respondeas Deo? & alitudo &c.* Eandem doctrinam adhuc expressit ipse Sanctus Augustinus epist. 103. lib. de bono perseverantiæ, cap. 9. & in Enchir. c. 98. ubi hæc scribit: *Si futura opera, vel bona hujus, vel mala illius, quæ Deus utique præsciebat, vellet intelligi; nequaquam diceret, non ex operibus; sed diceret, ex futuris operibus; eoque modo istam solveret questionem; imò nullam, quam solvi opus esset, faceret questionem.* Et proinde negat fieri electionem ad gloriam intuitu meritorum. Item lib. de bono perlev. cap. 13. Unde satis dilucidè ostenditur, & inchoandi, & usque in finem perseverandi gratiam Dei non secundum merita nostra dari, sed dari secundum ipsius secretissimum, eandemque justis-

simam.

simam, beneficentissimam, sapientissimam voluntatem; quoniam quos predestinavit, ipsos & vocavit vocatione illâ, de quâ dictum est: sine pœnitentiâ dona sunt & vocatio Dei. Igitur si gratia perseverandi usque in finem ex meritis non sit, nec etiam erit ex operibus ad gloriam prædestinatio. S. Augustini loca innumera forent exscribenda, si congerere singula in votis esset. Qui alia exoptarit legat lib. de prædest. Sanct. lib. cont. Julian. &c.

Hanc S. Augustini doctrinam ejus discipuli summæ pietatis & eruditionis viri SS. Prosper, Fulgent. & alii propugnarunt. S. Prosper lib. 1. de vocat. cap. 17. ita scribit: *Sunt qui longam agentes in flagitiis vitam in ipsis sine baptismo renovantur, & sine ullo bonorum operum consortio transferuntur in regni cœlestis consortium. Et carmine de ingratis cap. 18.*

*Per stupra, per cedes vitam duxêre nefandam;
Et tamen incumbente obitu, jam limite in ipso
Extremi statûs, miserantem nocte remosâ
Cognovêre Deum: purgatorisque lavacri
Munere, nulla mali linquentis signa prioris
Exempti mundo, mutarunt tartara cœlo.
Quæ merita hîc numeras? &c.*

S. Fulgent. cap. 3. lib. de fide ad Petrum: *Illi cum Christo regnabunt, quos Deus gratuita bonitate suâ predestinavit ad regnum..... quos Deus gratis nullo bona voluntatis, vel boni operis merito procedente salvavit. Et lib. 1. de veritate prædest. cap. 4. Non ergo quos eligeret, aut sanctos, aut immaculatos invenit, aut inveniendos esse præscivit. Ex ipsis, quos voluerit, dignos facit. Hâc misericordiâ prævenitur Jacob, non secundum meritum præteriti, vel futuri cujusdam humani operis; sed secundum propositum Dei prædestinantis, priusquàm nasceretur, electus est. Et postea: Ex istis duobus fratribus quos ex Isaac unus conceptus accepit, unus in lucem partus effudit; sola, quem voluit, à massâ damnationis misericordia divina discrevit: cui patrocinata est divinorum discretio munerum, non futurorum præscientiæ meritorum. Discretio illa est ad gloriam electio: at non sit ex meritis præteritis, vel futuris; sed ex Dei benignitate. Idem quoque docet lib. 3. de veritate prædestinationis, cap. 2. in illud Rom. 8. Quos predestinavit &c. omnes isti predestinati, inquit, sic vocantur, ut justificentur; sic justificantur, ut glorificentur; ac per hoc predestinavit quos voluit, & ad opera bona, & ad præmia sempiterna: predestinavit ad vitam bonam; predestinavit ad vitam æternam; predestinavit ad fidem.*

Ea fuit S. Greg. Mag. sententia, subsequenitumque Pontificum, & Patrum, necnon nominis amplissimi Theologorum, ut Magistri Sentent. S. Thomæ, Scoti, Durandi, Ægidii Rom. Dionysii Carthus. Cajet. Bannezii, Majoris, Antonini, Toftati, Soti, Bellarm. Estii, & Sylvi, qui duo posteriores addunt decretum Scholæ Paris. an. 1247. &c.

Proferuntur ab illis Theologis rationes momenti gravissimi ex Scripturis sacris, & ex sanctis Patribus deductæ.

1. Electorum ad gloriam secretio inter judicia Dei incomprehensibilia refertur ab Apost. idè exclamat, *ô altitudo divitiarum* &c. Si verò ex præviliis meritis ad gloriam repeteretur, non suppeteret exclamandi ratio: non esset cur Concil. Trident. sess. 6. hanc electionem arcanum vocaret mysterium: non esset cur prædestinatio sortis nomine designaretur; ut Ephes. 1. *Sorte vocati sumus, prædestinati secundum propositum ejus, qui operatur omnia secundum consilium voluntatis suæ*: Coloss. 1. *Dignos nos fecit in partem sortis Sanctorum*: Item Dan. 2. Sap. 3. Pl. 124. & Act. 26. Non enim aliâ ratione sortis nomine potest nuncupari, quàm quia nullam habet à nobis causam; quinimò soli Dei proposito tota debetur, juxta illud Psalm. 17. *Salvum me fecit, quoniam voluit me.*

2. Alia non est ratio prædestinationis Christi, ut capitis, quàm membrorum; alia non est parvulorum, quàm adultorum. Natura autem humana nullis meritis, nec præviliis, nec futuris, sibi comparavit, ut Verbo Dei hypostaticè conjungeretur: ità S. Aug. lib. de prædest. Sanct. cap. 15. Infantes pariter, qui decedunt baptisati, non ex præviliis meritis nunquàm futuris prædestinantur; ut habet idem S. Aug. lib. de bono persever. cap. 11. igitur nec adulti. Nec ob parentum merita parvuli à reprobis secernuntur, cum ex fidelibus justis oriundi baptismate sæpius priventur; ex infidelibus verò nati non rarò abluantur. Quod exemplum ægrè ferebant Semipelagiani, sicuti patet ex epist. S. Hilarii Arelat. ad S. Augustinum, cujus hæc sunt verba ex libro de bono persever. cap. 3. de prompta: *Ex duobus parvulis peccato originali pariter obstrictis, cur iste assumatur, ille relinquatur? Et ex duobus ætate jam grandibus impiis, cur iste ità vocetur, aut non ità vocetur? inscrutabilia sunt judicia Dei. Ex duobus autem piis, cur huic donetur perseverantia usque in finem; illi autem non donetur? inscrutabiliora sunt judicia Dei. Illud tamen fidelibus debet esse certissimum, hunc esse ex prædestinatis, illum non esse: nam si fuissent ex nobis, ait unus prædestinatorum, qui de pectore Domini biberat hoc secretum, mansissent utique nobiscum. Cum autem ad opera prævisa confugerent Semipelagiani, eos adhuc ità repellebat S. August. lib. 2. ad Bonifac. cap. 7. *Ut vobis auferretur omnis vestra caliginis latebra; propterea geminos tales proposui, qui neque parentum meritis juvarentur, & ambo infantia primordio unus baptisatus, alter sine baptismo morerentur, ne diceretis Deum (sicut de Jacob & Esau contra Apostolum dicitis) opera eorum futura præsciisse. Et paulò post: Quid prodest eis, qui rapiuntur ex hac vitâ, ne malitia mutet intellectum eorum, aut ne felio decipias animam eorum; si peccatum etiam quod non est factum, dictum, cogitatum, tanquam commissum fueris, sic punitur. Nec infantium secretio, parentum negligentia, aut diligentia tribuenda est; quia ex S. Aug. lib. de bono persever. cap. 12. Plerumquè enim festinantibus parentibus, & paratis ministris, ut baptismus parvulo detur;**

Deo tamen nolente non datur, qui eum paululum in hac vitâ non tenuit, ut daretur.

Addunt Theologi agens sapientissimum finem sibi prius proponere, quam media; præsertim cum penes illum sit pro arbitrio de illis sancire. Porro finis ultimus est æterna gloria; media verò sunt hominum merita: proindeque gloriæ largitio à Deo primum intenditur, 1. loco merita. Sententiam suam S. Aug. autoritate confirmant: non enim aliter de finali perseverantiâ, & de utrâque ad gratiam & gloriam prædestinatione differit: Unde lib. de grat. & lib. arb. cap. 6. *Dona sua coronat Deus, non merita tua. Si tibi à teipso, non ab illo sunt merita tua; hæc enim, si talia sunt, mala sunt, quæ non coronat Deus; si autem bona sunt, Dei dona sunt.*

OPP. 1. Hominum ad gloriam electio in merita refertur ex Scripturis: nam Matth. 25. *Venite benedicti Patris mei, possidete paratum vobis regnum à constitutione mundi: esurivi enim, & dedistis mihi manducare, &c.* Rom. 8. *Quos præscivit, & prædestinavit conformes fieri imaginis filii sui.* 1. Cor. 2. *Oculus non vidit, nec auris audivit, quæ Deus præparavit iis, qui diligunt illum.* 2. Timoth. 2. *In magnâ domo non solum sunt vasa aurea, & argentea; sed & lignea, & fictilia; & quedam quidem in honorem, quedam autem in contumeliam. Siquis ergo emundaverit se ab istis, erit vas in honorem sanctificatum.* Jacob. 2. *Deus elegit pauperes in hoc mundo, divites in fide, & heredes regni, quod repromisit Deus diligentibus se.* Igitur eleemosynæ, Christi accuratæ imitationi, dilectioni, penitentix sinceræ, fidei amplitudini, æterna gloria in mercedem rependitur.

R. Matth. 15. de gloriâ sermonem haberi, non ut paratâ, seu de destinatione ad eam; sed ut possidendâ, seu de ipsius consecutione: non enim ad *paratum regnum* refertur particula *enim*, sed ad *esurivi*; sicut & ubi de reprobis eadem particula refertur ad verbum *discedite*, non verò ad dictionem *paratum*; quia ignis solis demonibus ibi dicitur paratus. Igitur, inquit Christus, regnum ab æterno prædestinationis gratiâ vobis paratum, accipite in præmium mihi erogatæ eleemosynæ; non enim gratis, seu non nisi operum merito comparatum adultis conceditur. Unde dicitur, *esurivi*, non *esuriens* eram; item *dedistis mihi manducare*, non *daturi* eratis &c. Sic meritorum prævisionem nullatenus agnoscit Apostolus, tanquam prædestinationis causam.

Ad locum ex Romanorum octavo desumptum respondeo, verborum illorum sensum non esse, Deum illos prædestinasse, quos præscivit conformes futuros imaginis filii sui; aded ut præscientia futuræ conformitatis cum Christo fuerit causa prædestinationis; sed sensum eorum esse Deum illos prædestinando, ipsorum merita in suâ prædestinatione præscivisse. Unde ista cum Christo conformitas non est prædestinationis ratio seu causa, sed terminus illius vel effectus; quemadmodum ex hoc Apostoli loco rectè colligit Sanctus Thomas ibidem lectione sextâ. Vocabulo autem *præscivit*, hæc ut & alibi, vel approbationis scientia, vel Dei prædestinantis decretum intelligitur, ut Rom. 11. *Non repulit Deus*

plebem suam, quam præscivit, id est prædestinavit, sicut docet S. Aug. lib. de lib. de bono persev. cap. 18. his verbis, Quando apud aliquos verbi Dei tractatores legimus præscientiam Dei, & agitur de vocatione electorum, eandem prædestinationem intelligere oportet.

Ad 1. Corinth. 2. respond. bona parata alia non esse cogitanda, præter salutem & gloriam mirabili ordinatione procurandam; quod beneficium non nisi per revelationem ipsis Angelis voluit esse cognitum: Ita enim cap. 64. *Isaias, quem laudat Apostolus: Oculus non vidit, Deus absque te.* Et juxta textum Hebræicum, *præter te*: quæ verba, si de dilectione gratiam antevertente intelligerentur, blasphemia esset expositio. Igitur illa decet referre ad dilectionis mercedem, quæ Dei est visio juxta illud Christi Joan. 14. *Qui diligit me, diligetur à Patre meo, & ego diligam eum, & manifestabo ei meipsum.* Gratuita ergo est ad gloriam destinatio, & soli dilectioni rependitur.

In 2. Timothæi 2. ut & alibi, prædestinationis signum & effectus pro ipsâ prædestinatione sumuntur: non ait quippè Paulus; *Si quis emundaverit se ab istis, fiet vas in honorem*; sed erit *vas in honorem*, quia sincerum emendationis consequendæ studium, verus est prædestinationis effectus. De subversâ quorundam fide, ut Hymenæi, dolorem suum ubi fuit testificatus, non omnium fidem periclitari asserit v. 19. *Sed firmum fundamentum Dei stat habens signaculum hoc: cognovit Dominus qui sunt ejus; & discedat ab iniquitate omnis, qui nominat nomen Domini.* Signaculum illud, *cognovit Dominus qui sunt ejus*, quo vasa in honorem discernuntur, esse hominibus incognitum dicit Apostolus, & idè de quorundam fidelium casu non esse mirandum, quòd in magna domo quædam sint vasa in honorem, alia in contumeliam: nec rebus nostris propterea desperandum; imò divinæ misericordiæ confidendum eò magis, quòd nos ab errorum & peccatorum sordibus puros cautiùs servaverimus. Nam indè fieri compertum, electionis beneficia in nobis perfici; quippè, *elegit, nos, ut essemus immaculati*, non quia eramus immaculati; aut tales eramus futuri.

Ad locum ex Jacobi 2. depromptum respondeo cum S. Aug. lib. de prædest. sanct. cap. 17. à Deo eligi homines, ut sint fideles, non quia erant: *Eligendo*, inquit, *ficis divites in fide, sicut hæredes regni.* Intelligere igitur oportet vocationem, quâ fiunt electi: non enim eliguntur, quia crediderunt: sed eliguntur, ut credant. Undè electio in nobis dilectionem antevertit; in Deo verò electio dilectionem sequitur.

O p p. 2. Semipelag. asserere, uti testatur S. Prosper epist. ad S. Aug. unanimi antiquiorum Patrum sententiæ, ut S. Iren. S. Clem. Alex. Orig. S. Hil. S. Amb. S. Chrysost. inconsultò & irreverenter S. Aug. refragari. S. enim Iren. ait lib. 4. adv. hæres. cap. 38. ex futurorum præscientiâ dictum esse: *Jacob dilexi, Esau odio habui*: & cap. 48. Deum ex operum prævisione infidelitati tradere, quos scit non esse credituros.

Origen. in epist. ad Rom. dicit, futuris hominum operibus inspectis, de sortibus nostris Deum decernere,

S. Hil. in illud Pl. 64. *Beatus quem elegisti*: Scribit electionem non esse rem discreti iudicii, sed ex meriti defectu factam discretionem.

S. Amb. lib. 3. de fide ad Gratianum Imper. cap. 2. docet Deum non prius prædestinasse, quàm præsciret: sed eorum præmia prædestinasse, quorum merita præsciverat.

S. Chrysost. Hom. 8. in Matth. asserit hæc Verba, *Percipite regnum quod vobis paratum est*, idem significare, ac si diceretur, *antequam natus sit; quia sciebam vos huiusmodi futuros, hæc vobis à me preparata fuere*. Item Hom. 31. in Matth. affirmat à Christo tunc fuisse vocatum Matthæum, cum affectus sic erat, ut vocanti morem esset gesturus.

S. Hier. tradit in epist. ad Hedibiam quæst. 10. Deum non salvare sine ratione, & absque iudicii veritate; sed causis præcedentibus: nec Gentes eligi, sed hominum voluntates. Et in cap. 1. Malach. scribit, nasci ex futurorum præscientiâ Dei dilectionem.

R. Cum S. Aug. lib. de prædest. Sanctorum cap. 14. opus non esse, ut eorum saltem scrutemur opuscula, qui, priusquam ista oriretur hæresis, non habuerunt necessitatem in hac difficili ad solvendum quæstione versari: Quod proculdubio fecissent, inquit, si de talibus quæstionibus respondendi necessitas ulli incubuisset. Attamen de gratiâ Dei quæ fides esset tenenda, quandoquæ docuerunt, licet obiter; cum in confutandis Ecclesiæ inimicis omnem adhiberent diligentiam. Addit lib. de bono persequ. c. 20. singulas quasque hæreses intulisse Ecclesiæ proprias quæstiones, contra quas longè diligentius Scriptura Sacra defenderetur, quàm si nulla talis necessitas cogeret. Neque talis responsio videri debet omninò singularis; cum S. Hieronymus lib. 1. Apol. adversus Rufin. moneat, nondum Alexandriæ exorto Ario, quædam à scriptoribus Ecclesiasticis innocenter & minùs cautè prolata non potuisse hominum perversorum calumniam declinare, & in partes suas eos adducere ausum fuisse Arium in epist. ad Eusebium Nicom. à Theod. lib. 1. Hist. cap. 4. relatâ: quæ singula erunt in aperto, si Patrum dicta expendantur.

S. Iren. in hoc est totus, ut Deo nihil esse ignotum probet; quod, quâ ratione prædestinationi officiat, sanè non video.

Orig. inaniter opponitur, cum ex S. Hier. epist. ad Cæsiph. Pelagii doctrina sit Origenis ramusculus: Nec mirum perfectò; cum prædestinationis causam in prioris vitæ merita referendam esse putaverit, existimans animas ante mandî fabricam fuisse à Deo conditas.

Arnobius adducitur à quibusdam in Psalm. non-gef. & 91. sed hic alius est longè ab illo famoso Rhetore, Lactantii præceptore, & acerrimo Christianæ Religionis vindice, ex quo si quid nobis objiceretur, tantæ id nobis esset reverentiæ, quantæ contempti ac despicientiæ, quod in medium adducitur ex pravo illo Psalmorum explanatore, utpotè qui de peccato originali cum Pelagio idem omninò senserit. Quam ob causam inter Scriptores Apocryphos cum suo in decreto retulit Celsius S. Pont.

S. Hilar. de electione in ordine executionis consideratâ loquitur; cum nempè gloria mercedis instar rependitur.

S. Amb. pariter de prædestinationis executione differit; aut Deum nihil facere fortuito contendit; aut præscientiæ nomine Dei prædestinantis decretum intelligit: nam ex S. Aug. lib. de bono persev. cap. 18. *Quando apud aliquos verbi Dei tractatores legimus Dei præscientiam, & agitur de vocatione electorum, nihil nos prohibet illam præscientiam intelligere prædestinationem.*

Si quid opponatur ex Comment. in beatum Paulum dictis Ambrosianis, nulla fides iis habenda est: opus enim illud nequaquam est S. Ambrosii; tum quia illius author in pluribus à S. Amb. doctrinâ recedit; tum quia Pelagius S. Augustino ex his commentariis nihil opposuit, licet in ipsis sine permulta, quæ Pelagianum redolent errorem.

S. Chrysost. gratuitam docuit prædestinationem ad æternam salutem: Nam Homil. 1. in epist. ad Coloss. in hæc Apostoli verba, *in partem sortis Sanctorum*, ait S. Paulum ostendisse neminem propriis operibus bonis cæleste regnum assequi, sed hoc totum Dei beneficio esse tribuendum. Idem colligit Hom. 12. & 24. in 1. ad Cor. & Hom. 3. in 2. ad Thess. Unde verisimile prorsus est, ipsum S. Chrysostomum non aliter sensisse in locis in objectione laudatis: non quidem in Homil. 80. in S. Matth. ad hæc Christi verba, *percipite regnum quod vobis paratum est*: Nam ibi vult dumtaxat Deum electis gratiam præordinasse, ut gloriam mereantur; non verò Deum electis ob merita gloriam decrevisse. Non etiam in Hom. 31. in eundem, ubi scribit, ipsum à Christo tunc fuisse vocatum, cum vocanti obsecuturum esse vidit: etenim loquitur de prædestinationis executione, non de ipsâ prædestinatione: effectus ergo prædestinationis fuit, ut Matthæus à Christo vocante ita dispositus esset, ut voci Christi & lumini Spiritus Sancti non obstitere.

Similia S. Chrysostomi, Theodreti, Theophylacti, & aliorum, tum Græcorum, tum Latinorum Patrum loca expositione simili, seu de prædestinationis executione sunt exponenda; ita ut opera justa vitam æternam in efficientis causæ aut meritorie genere prævertant: nec enim media intenduntur, nisi finis consequendi desiderium sit incitamento.

S. Hieron. priori loco ad salutem eligi homines tradit ratione bonarum voluntatum; sed quas electione suâ Deus ipse in illis operetur, ut gloriam suis consequantur meritis. In cap. 1. Malach. de approbationis præscientiâ loquitur; seu quos prius dilexit, ut iusti fierent, iustos præscit esse futuros. Quod spectat ad breves in omnes S. Pauli epistolas commentarios, ii sunt Pelagiani cujusdam scriptoris, & forsitan ipsius Pelagii: S. enim August. lib. 3. de peccat. merit. & remiss. cap. 1. Pelagii commentarios breves in omnes S. Pauli epistolas se legisse narrat: Et cap. 12. quædam ex comment. in cap. 7. 1. ad Corint. exhibet, in quibus passim occurrunt Pelagianæ oberrationes, ut in cap. 5. 6. 7. 8. & 11. ad Rom. in c. 4. 1. ad Cor. in cap. 1. & 3. ad Philipp. & alibi.

Op. 3. S. Aug. de prædest. & grat. cap. 15. iustorum ab injustis secretionem in liberam eorum voluntatem, ut causam refert: *Nabuchodonosor*; inquit, *pœnitentiam meruit fructuosam: post innumeras impietates*

tes flagellatum pœnituit, & regnum, quod perdiderat, rursum accepit. Pharaô ipsis flagellis durior est effectus, & periit. Quantum ad naturam, ambo homines erant; quantum ad dignitatem, ambo Reges; quantum ad causam, ambo captivum populum Dei possidentes; quantum ad pœnam, ambo flagellis clementer admoniti. Quid ergo fines eorum fecit esse diversos? nisi quod unus manum Dei sentiens in recordatione propria iniquitatis ingemuit; alter libero contra Dei misericordissimam veritatem arbitrio pugnavit. Lib. de prædestinat. Dei cap. 5. docet hos Deum ad gloriam prædestinasse, quos ipse suos fide & opere prænovit esse futuros. Lib. 83. quæst. 68. ita loquitur: Cujus vult miseretur, & quem vult indurat; sed hæc voluntas injusta esse non potest; venit enim de occultissimis meritis. Lib. de spir. & litt. cap. 5. ait Deum præscivisse, ut prædestinaret. Tract. 76. in Joan. dicit Deum propter delectionem aliquos elegisse. Serm. 7. de verbis Domini secundum Math. scribit Deum quosdam secundum suam gratiam, & secundum illorum justitiam elegisse. Tandem lib. 1. ad Simplic. q. 2. hæc habet: Quia manet Dei propositum, ut justificet credentes, ideo invenit opera quæ jam eligat ad regnum cælorum: nam nisi esset electio, non essent electi, nec rectè diceretur, quis accusabit adversus electa Dei? non enim electio præcedit justificationem, sed electionem justificatio; nemo enim eligitur, nisi jam distans ab eo, qui rejicitur. Unde quod dictum est, quia elegit nos Deus ante mundi constitutionem; non video quomodo sic dictum, nisi per præscientiam.

R. 1. lib. de prædest. & grat. non esse S. August. cum nec in retractationum libris, nec à Possidio, nec ab ullo veteri auctore laudetur, nec S. August. stylum sapiat. Insuper ille liber penitus discrepat à doctrinâ S. Augustini, utpotè cum asserat potuisse hominem innocentem justè damnari, quamvis non peccasset; cujus tamen contrarium docet S. August. epist. 105. & 106. & lib. 2. de peccatorum merit. & remiss. cap. 16. & in lib. adversus Julian. Adhæc adde libri istius auctorem nostræ non adversari sententiæ; cum justorum secretionem ab injustis liberæ eorum voluntati, tanquam causæ proximæ exequenti, non verò tanquam ultimæ seu primæ tribuat: mox enim adjungit ultimam resolutionem fieri in Dei voluntatem, qui unum misericorditer adjuvit, alterum justè deseruit. Quod & apertius confirmat cap. 16. ejusdem libri, ubi addit divinam hanc electionem non meritis reddi; sed solâ voluntatis munificentia hominibus donari. Eadem de lib. de Dei prædestinatione sunt dicenda; non enim est S. Augustini.

2. S. Augustinus lib. 81. quæst. q. 68. de reprobatione sermonem non habet, quæ nullatenus esset justa, nisi ex peccatis proficeretur: Justificatio autem aliam causam præter Dei voluntatem non habet.

3. lib. de Spir. & litt. præscientiæ vocabulo, approbationis scientiam, ut & aliis in locis intelligit. Et tract. 76. in Joan. de electione quoad executionem; non verò quoad intentionem, aut destinationem loquitur. Addo S. Austini sententiam de grat. & prædest. non esse ducendam ex libris quos ad fidem recens adductus, aut Presbyter, aut junior Episco-

pus consecratus scripsit, cuiusmodi est expositio quarundam propositionum epist. ad Rom. quam Carthagine Presbyter addiderat; quales sunt etiam libri ad Simplicianum, quos in sui Episcopatus exordio scripsit: fatetur enim, dum prædictam quarundam propositionum epistolæ ad Rom. expositionem scriberet, eo in errore, qui postmodum fuit Semipelagianorum, tunc temporis versatum se fuisse. Ad hoc, inquit lib. 1. retract. cap. 23. *Perdixi ratiocinationem, ut dicam: non ergo elegit Deus opera cuiuspiam in præscientiâ, ut quem crediturum esse præcivis, eum eligeret, cui Spiritum sanctum daret; ut bona operando, etiam vitam æternam consequeretur. Nondum diligentius quasiveram, nec adhuc inveneram, qualis sit electio gratia, de quâ idem dicit Apostolus, reliquæ per electionem gratia salva factæ sunt, quæ utique non est gratia, si eam merita ulla præcedant &c.* Idem adhuc expressit lib. de prædest. Sanct. cap. 3. ubi adducto hoc Apostoli loco, quid autem habes quod non accepisti &c. sic loquitur: *Quo præcipuè testimonio etiam ipse convictus sum; cum similiter cum Massiliensibus errarem, putans fidem, quâ in Deum credimus, non esse donum Dei; sed à nobis esse in nobis, & per illam nos impetrare Dei dona. . . . neque enim fidem putabam gratiâ Dei præveniri, ut per illam nobis daretur, quod posceremus utiliter, nisi quia credere non possemus, si non crederet præconium veritatis. Ut autem prædicatio nobis Evangelio consentiremus, nostrum esse proprium & ex nobis esse arbitrabar; quem meum errorem nonnulla opuscula satis indicant, ante Episcopatum meum scripta, in quibus est illud quod, commemorastis in litteris vestris (alloquitur SS. Prosperum, & Hilar. Arelat.) ubi est expositio quarundam propositionum ex epistolâ, quæ est ad Rom. Licet etiam lib. de bono persev. cap. 20. innuat à se debellatum fuisse dogma Pelagianum, antequam prodiret in lucem Pelagius; addit nihilominus se non satis accuratè & diligenter egisse de prædestinatione, priusquam expugnandus fuisset hæreticus iste: *Hæc est prædestinatio manifesta & certa Sanctorum, quàm postea diligentius & operosius; cum jam contra Pelagium disputarem, defendere necessitas compulsi: didicimus enim singulas quasque hæreses intulisse Ecclesiæ proprias quæstiones, contra quas diligentius defenderetur Scriptura Divina, quàm si nulla talis cogeret necessitas.* Undè cum lib. ad Simplic. fuerint conscripti, priusquam motus excitaret hæresis Pelagii, ut monet ipsemet lib. 1. Retract. cap. 1. ex iis germanus ejusdem doctoris sensus non est desumendus. Superest ergò, ut in prædestinationis negotio accuratam quæstionum explanationem ex lib. de prædest. Sanct. de bono persev. &c. decerpamus.*

I N S T. Meminit S. Augustinus lib. 2. Tract. cap. 1. quæstionis illius ad Simplic. nec quidquam eorum retractat, quæ in eâ scripserat; quin imò quidquid ibi de gratiâ disserit, ita probat in lib. de Sanct. prædest. ut illuc remittat Massilienses Presbyteros, si veram ipsius de gratiâ sententiam velint habere.

R. S. Augustinum ad eam quæstionem remittere Massilienses, ut intelligant salutis initium, seu credendi voluntatem à Dei gratiâ proficisci; cum

cum enim scribebat ad Simplicianum, jam intelligebat fidem esse Dei donum. Non indicat tamen cuncta, quæ scripsit ibi de electione & mente Apostoli, sibi fuisse certa: nam postea contra Pelagianos pugnans electionis rationem aliter exposuit. Unde licet in libro ad Simplic. error nullus reperiat, circa fidei initium; attamen S. Aug. tunc temporis gratiæ beneficia non ita perfectè noverat, ut cum ad hæresim Pelagianam maturior accessit.

OPP. 4. S. Prosper in resp. ad 12. object. Vincent. ita scribit: *Quia præsciti sunt casuri, non sunt prædestinati: essent autem, si essent reversuri, & in sanctitate & veritate mansuri.* Idem habet in resp. ad 7. Gallorum capitulum. S. Fulgent. lib. 1. ad Monim. cap. 24. *Prædestinavit ad regnum, quos ad se præscivit misericordia prævenientis auxilio redituros, & in se misericordie subsequenti auxilio esse mansuros.* S. Joan. Damasc. lib. 4. fidei orthodoxæ cap. 20. ad illud Apostoli: *Annon habet potestatem figulus luti? &c. Hac & illa efficit Deus, quia non est alius omnium opifex: non tamen ipse, vel nobilia, vel ignobilia efficit; verum electio cujusque.* Item in dial. contra Manich. *Prævidens Deus ea, quæ nos sponte facturi eramus, ea scilicet quæ sunt in nostrâ potestate, hoc est premia & supplicia prædestinavit.*

R. S. Prosperum in utroque loco agere de reprobatione pœnas sensus includente; quâ quidem ratione constar eam ex peccatis prævisis pendere. Addit autem futuros fuisse prædestinatos, si essent reversuri, & in bono reditu mansuri; quia perseverantiæ donum, & gloriam illis Deus parasset. Cur verò Deus eos ex hac mortali vitâ non eripiat, cum sunt boni; vel quare post casum illos non liberet, inquit S. Prosper, *nec nostrum querere, nec possibile invenire.* Non igitur ipsorum discretionem meritis tribuit, licet requirat merita, ut æternam beatitudinem actu consequantur; quemadmodum liquet ex lib. de vocat. Gent. cap. 35.

S. Fulgent. præscientiam à prædestinatione distinguit tantummodò, & docet adeò nonnulla præsciri simul & prædestinari, cujusmodi sunt opera bona; alia solùm præsciri, non prædestinari, qualia sunt peccata. S. Damasc. in priori loco agit de merito humanorum operum, per quæ quisque seipsum honore vel ignominia dignum efficit. In posteriori verò indicat Deum non imprudenter & incautè operari. Insuper an dialogus iste contra Manich. inscriptus, sit ipsius S. Joannis Damasc. inter eruditos non constar.

Opp. 5. ex Apostolo, vita æterna tanquam justitiæ corona, bravium, & victoriæ præmium conceditur. Idem constar ex Conc. Trid. sess. 6. Igitur non gratis d. fertur, sed meritis per'olvitur: quemadmodum supplicia æterna nonnisi reis in demeritorum pœnam infliguntur. Et verò, si bonis ope ibus non prævisis gloriam Deus destinasset, reprobos superaret longè prædestinatorum numerus; cum Dei misericordia sit super omnia ipsius opera. At ex Math. 22. *Multi sunt vocati, pauci v. r. electi.* Quo etiam pacto 1. Tim. 2. vellet Deus omnes homines salvos fieri, & ad agnitionem veritatis venire? Præterea hæc de prædestinatione sententia

prorsus divinæ benignitati & justitiæ adversatur: Deus enim nullâ libertatis habitâ ratione, quosdam ineluctabiliter ad gloriam eligeret; & alios à conspectu suo & felicitate repelleret. Quis porro auditâ tali doctrinâ non in desperationem, non in legis & salutis contemptum impelleretur? An non si nota fieret, graviter peccaretur?

R. vitam æternam habere rationem coronæ, bravii, & mercedis, si spectetur in ordine executionis; secus verò, si consideretur in ordine intentionis: nam ex S. Prospero lib. 2. de vocat. Gentium cap. 35. *Deus his, quos eligit sine meritis, dat unde ornantur ex meritis.* Quamobrem licet gloria concedatur propter merita; non tamen decernitur ex meritorum præscientiâ: nec enim idem est modus in intentione vel ordinatione Dei, qui reperitur in executione temporali; quia quæ priora sunt in intentione, posteriora sunt in executione. Neque eadem est ratio destinationis aliquorum ad pœnam æternam: nam, ut rectè docet S. August. lib. 3. contra Julianum cap. 18. *Bonus est Deus, justus est Deus, potest aliquos sine bonis meritis liberare, quia bonus est; non potest sine malis meritis damnare, quia justus est.*

Ad secundam rationem in objectione adductam respondeo, justitiæ divinæ supereminere misericordiam; posito enim originali peccato, nihil quippiam homini orto ex illâ massâ corruptâ debetur, nisi damnatio. Ergo quibus gratia conceditur, gratis & absque meritis conceditur. Minorem massæ vitiatæ partem Deus liberavit ex S. Augustino epist. 157. ut intelligeremus quid omnibus deberetur.

Ad tertiam rationem dico, hanc de prædestinatione sententiam rectè coherere cum illâ generali voluntate Dei omnes salvos faciendi. Quid enim prohibet quominus universalis provisor antecedente voluntate, & inefficaci singulis ad salutem procurandam sufficientia media parare voluerit; quibusdam verò voluntate consequenti & efficaci efficacia providere.

Ad quartam resp. licet ista de gratuitâ prædestinatione doctrinâ Pelagianis atque Semipelagianis visa fuerit aspera; non idè ab eâ S. Aug. S. Prosp. & S. Fulgent. fuere deterriti; quin potiùs eam passim tradiderunt, & sæpiùs indicarunt plurimùm conducere ad gratiæ divinæ commendationem; ad superbiam retundendam; & ut cum timore ac tremore suam homines operentur salutem; Domino penitus confidant; & in eo solo glorientur. Nec in eâ quæstione plus est difficultatis, quàm in reddendâ ratione, cur ex duobus infantibus originali peccato pariter obstrictis unus baptismate donetur, alter sine baptismo decedat? cur ex duobus jam græte grandibus, iisque justis uni donum perseverantiæ concedatur, alteri non concedatur? Quemadmodùm ergò in his ad altitudinem secretorum Dei recurrimus, ita & in istis: *ô altitudo &c.* Undè prædestinationis mysterium à Prophetâ secretum horroris merito nuncupatur. Præstat igitur cum Apostolo, & S. Augustino hâc in re obstupescere, quàm cum aliis philosophari.

E pulchro sacro amandanda dicebatur à Massiliensibus hæc doctrina,

Sicuti constat ex litt. S. Prosperi & Hilarii Arlat. ad S. August. & ex eodem Aug. lib. de dono persever. cap. 14. his verbis: *Aiunt predestinationis definitionem utilitati predicationis adversari, quasi verò ad evasata sit Apostolo predicanti. Nonne ille Doctor Gentium in fide & veritate predestinationem toties commendavit, & verbum Dei predicare non destitit? Cur ergo predicationi, præceptioni, exhortationi, quæ omnia frequentat Scriptura divina, existimamus inutilem definitionem predestinationis, quam commendat eadem divina Scriptura? Cur non à nobis predicabitur predestinatio, quæ ab Ecclesia Doctoribus publicè predicata est? Hanc predicavit Cyprianus; hanc Ambr. dicatur ergo verum, maxime ubi aliqua questio, ut dicatur, impellit: & capiamus qui possum, ne forte, cum tacetur propter eos, qui capere non possunt, non solum veritate fraudentur; verum etiam falsitate capiantur, qui verum capere, quo caveatur falsitas, possunt: quod ferme repetit cap. 17. Equidem, sicut ipse monet, summa est adhibenda cautio, ut auditorum, quibus prædestinationis mysterium prædicatur, infirmitati consulatur. Quantum verè Augustini sententia à Calvinianâ hæresi, quæ decreto absoluto quoslibet vel ad gloriam, vel ad pœnam nullo supposito peccato destinari constituit, diserepet; ex Cone. sequenti patebit.*

CONCL. II. Ad gloriam quorundam prædestinatio gratuita peccatum originale supponit.

Prob. Rem sæpius confectam agimus, cum ex superiorum S. Aug. locorum relatione sic hæc doctrina sæpius deducta: nec Semipelagianorum objectionibus aliter occurrebat. Igitur, inquiebant illi, personarum acceptio esset apud Deum. Respondet S. August. ex Apostolo: *Numquid iniquitas est apud Deum?* Ergo reponit in eo non esse iniquitatem, quia sub peccato continentur omnia. Cum ergo hominibus peccati reis nihil præter pœnam deberet Deus; misericordiam commendat suam, cum quibusdam indulget; justitiam verò suam in his, quos in massâ corruptionis deserit. S. Aug. epist. 46. contra Pelagianos, qui gloriam inde capebant, quòd mereri se gratiam existimarent, utitur his Apostoli verbis: *Quis te discernit? quod ideo dicit, quia de massâ perditionis illius, quæ facta est ex Adam, non discernit hominem, ut eum faciat vas in honorem, nisi Deus: quid habes quod non accepisti?* &c. Item epist. 105. dicit acceptionem nullam fieri personarum, ubi una est eademque massa damnationis & offensionis; quia universa ista massa meritò damnata est. Undè contumeliàm debitam reddit justitia; honorem donat indebitum gratia, non meriti prærogativa. Docet pariter epist. 157. Deum creasse, quos damnandos ipse prævidit, ut suam justitiam & misericordiam demonstraret: *Meritò videretur injustum, quòd reprobi fiant vasa ira in perditionem, si non esset universa massa ex Adam damnata; quòd ergo fiunt inde nascendo vasa ira, pertinet ad debitam pœnam.* Et Enchir. cap. 99. Sola enim gratia redemptos discernit à perditis, quos in unam perditionis massam coacervaverat ab origine ducta causa communis.

Aliam autem responsionem adjungit lib. 8. de Gen. ad Litt. cap. 8. & 7. ubi querenti cur Deus homines, quos damnandos præsciebat, crearet, sic reponit: *Cur non crearet, quos scivit bonis esse profuturos, & justè pro suâ voluntate puniendos?* Doctrina hæc ex Rom. 9. est excerpta: respondens enim Paulus his, qui dicerent, *Voluntari ejus quis resistit?* Si nos reprobet, aut prædestinet, hæc effectum infallibiliter sortientur: *ô homo, inquit, tu quis es, qui respondeas Deo, numquid dicis figmentum ei, qui se finxit: quid me fecisti sic?* Igi-ur gratuita quorundam prædestinatio ad gloriam peccatum originale supponit. Quod S. August. his adhuc expressit verbis lib. de corrept. & grat. cap. 7. *Ac per hoc & qui non audierunt Evangelium, & qui eo audito in melius commutari perseverantiam non acceperunt, non sunt ab illâ conspersione discreti, quam constat esse damnatam, euntibus omnibus ex uno in condemnationem. Discernuntur autem non meritis suis, sed per gratiam mediatoris, hoc est in sanguine secundi Adam, justificati gratis. Itaque cum audimus quis te discernit? quid autem habes quod non accepisti? Ab illâ perditionis malsâ, quæ facta est per primum Adam, debemus intelligere neminem posse discerni, nisi qui hoc donum habet, quisquis habet, quod gratiâ Salvatoris accepit.* Quæ blasphemæ consecutiones ex Calvini placito, à S. Augustini doctrinâ penitus alienæ sequantur, non hîc exscribimus; cum & ipsi Calvinistæ ab illis modò nobiscum abhorreant.

Queritur utrum eadem sit ratio Angelicæ prædestinationis?

R. S. Augustinum aliâ ratione de Angelorum prædestinatione differere, quàm hominum in præsentî statu naturæ ipsæ positorum: assignat enim prævisa Angelorum merita pro eorum prædestinationis causâ, atque ipsos steterisse per liberum arbitrium: nâ quippè loquitur lib. de corrept. & grat. cap. 10. *Deus sic ordinavit Angelorum & hominum vitam, ut in eâ prius ostenderet quid possit eorum liberum arbitrium: deinde quid possit sua gratia beneficium.* Et cap. 11. *Sed quia permanere noluit (Adam) profecto ejus culpa est, cujus meritum fuisset, si permanere voluisset, sicut fecerunt Angeli sancti, qui cadentibus aliis per liberum arbitrium, per idem liberum arbitrium steterunt ipsi.* Igitur perseverantiam in bono debent libero arbitrio Angeli, adjuti quidem, sed non eo adiutorio, quod fuit post primi hominis lapsum necessarium.

O P P. ex S. Aug. lib. 12. de civit. Dei cap. 9. Aut minorem acceperunt (Angeli mali) divini amoris gratiam, quàm illi, qui in eadem persistenterunt; aut si utrique boni æqualiter creati sunt, istis malâ voluntate cadentibus; illi amplius adjuti ad eam beatitudinis plenitudinem, undè se nunquàm casuros certissimi fierent, pervenerunt,

R. Angelos bonos amplius adjutos fuisse gratiâ cooperante; non verò ad perseverandum gratiâ determinante. Quare cum ait idem S. Aug. lib. 13. Confess. cap. 3. spirituales creaturas, id est Angelicas, Dei gratiâ debere, quòd beatè vivat: id intelligit de gratiâ Dei, sine quâ non poterant Angeli ad gloriam tendere; non verò de gratiâ, quâ tenderent certò & indeclinabiliter ex efficaci ipsorum ad gloriam electione,

ARTICULUS QUINTUS.

De Prædestinationis effectibus.

EX prædestinationis effectibus aliqui, ut vocatio &c. ad electos & reprobos pertinent; alii verò ad solos prædestinatos, ut perseverantiæ donum &c. Jam relati prædestinationis effectus sunt vocatio, justificatio, & glorificatio, juxta illud Rom. 8. *Quos prædestinavit, hos & vocavit; & quos vocavit, hos & justificavit; quos autem justificavit, illos & glorificavit.* Hinc S. Aug. lib. de corrept. & grat. cap. 9. *In Dei providentissimâ dispositione præsciti, prædestinati, vocati, justificati glorificati sunt.* Et lib. de prædest. Sanct. cap. 17. *Quos prædestinavit, ipsos & vocavit; eâ scilicet ratione secundum propositum: non ergò alios; sed quos prædestinavit, ipsos & vocavit; nec alios, sed quos ita vocavit, ipsos & justificavit; nec alios, sed quos prædestinavit, vocavit, justificavit, ipsos & glorificavit.* Admirabili suâ æconomiâ in prædestinatorum commodum quoscunque casus, etiam peccata, Deus vertit: nam Rom. 8. *Diligentibus Deum omnia cooperantur in bonum iis, qui secundum propositum vocati sunt sancti.* Quod etiam aptè admodum his expressit verbis S. Basilii in regulis brevioribus quæst. 81. *Atque illud etiam scire convenit, peccata religiosorum virorum plerumquè etiam evenire ex consilio Dei ad ipsorum utilitatem; cum Deus interdum eos labi permittat ad sanandam aliquam animi illorum elationem, que præceperit; cujusmodi est quod Petro dictum est, & in ipso etiam contigit.* Similia quoque docet S. August. lib. de corrept. & grat. cap. 9. *Quia, inquit, humiliores redeunt, atque doctiores: discunt enim in ipsâ viâ justâ cum tremore se exultare debere, non sibi arrogando tanquam de suâ virtute fiduciam permanendi.* Et paulò post id probat ex verbis Davidis, & exemplo S. Petri. Idem adhuc docent S. Gregor. lib. 2. Moral. cap. 16. lib. 33 cap. 11. S. Joan. Damasc. lib. 2. fidei orthod. cap. 19. & Sanct. Bern. serm. 2. in enarrat. Psal. 90. his verbis: *Nonne cooperatur nobis ille casus in bonum, undè & humiliores efficimur, & cautiores?* Hinc persecutorum furor in Martyrum gloriam; impudicorum petulantia in Virginum coronam; Judæorum incredulitas in misericordiæ Dei erga Gentiles illustrationem contulêre. *Vos Ethnici, Rom. 11. consecuti estis propter incredulitatem illorum.* Hinc quoque prædestinatio tempora, loca, & vitæ adjuncta cetera complectitur.



ARTICULUS SEXTUS.

*De prædestinationis proprietatibus, certitudine
scilicet, ac necessitate.*

ERRORES.

CIRCA prædestinationis certitudinem exitit gravis aliquorum error, qui eò temeritatis devenere; ut asseruerint, se non tantum de præfenti iustitiâ, sed etiam de suâ ad gloriam prædestinatione certitudinem fidei habere. Ex eorum numero fuerunt Lutherani in Colloq. Ratisbon. Item Petrus Martyr. in comment. in cap. 8. Epist. ad Rom. Calvi. lib. 3. instit. cap. 2. & Kemnit. in examine Conc. Trin.

Quod spectat ad prædestinationis necessitatem, fertur nonnullos olim eo in errore fuisse versatos, ut existimarent prædestinationem in Electis inferre necessitatem; itâ ut liqerum hominis arbitrium perimeret. Isti vulgò dicti sunt Prædestinati. Hanc autem prædestinationem hæresim s. seculo in monasterio Adrumet. prodiiisse volunt quidam ex malè intellectâ S. Aug. ad Sixtum epist. Equidem Felix, & Cresconius duo illius congregationis Adrumetinæ juvenes retulerunt S. Augustino quosdam illius monasterii sic prædicare Dei gratiam, ut liberum negarent arbitrium, ut patet ex ipso S. Aug. epist. 46. ad Valent. Adrumet. Cænobii præpositum; sed ex epist. Valentini ad S. Aug. Felicis & Cresconii relationem fuisse infidam constat: *Flori hæc fides est Pater* (sic Valent. ad S. Aug.) *non sicut fratres isti sunt locuti, impresentiarum audierunt ab illo dictam, non juxta merita nostra dari pietatis donum, sed per Redemptoris gratiam.* Ejusdem cum Floro sententia, (cujus occasione commotum fuerat monasterium) se esse confiteatur Valentinus, eamque doctrinam S. Aug. quem Florus convenerat, probat lib. de corrept. & grat. cap. 10. his verbis. *Hanc fidem, quæ sine dubio vera, & Prophetica, & Apostolica, & Catholica fides est; etiam in fratre nostro Floro invenisse me gaudeo.* Undè quamvis S. Aug. cum scripsit librum de grat. & lib. arb. crederet in monasterio Adrumetino quosdam esse liberos arb. infensos; nihilominus idem opus revolvens lib. 2. tract. cap. 66. vult id itâ sumi, quasi in illos scriptum qui liberum arbitrium plus æquo extollunt ipsius gratiæ dispendio: *Propter eos*, inquit, *qui, cum defenditur Dei gratia, putantes negari liberum arbitrium, sic ipsi defendunt liberum arbit. ut negent Dei gratiam, asserentes eam secundum merita nostra dari, scripsi librum, cujus titulus est de grat. & lib. arb. &c.*

CONCL. I. Prædestinatio est secundum se certissima.

Prob. 1. Quia prædestinatorum nullus ex illo statu depellitur. 2. quia prædestinati cum Deo conjunctione summâ donantur. 3. Quia Deus continuò illos tueretur & constanter. 4. Quia qui ab Ecclesiâ deficiunt, nec ad ejus

gremium redeunt, ex eo non sunt numero. 5. Quia nec amplificari, nec minui potest eorum numerus.

1. Ex prædestinatis nullus in reproborum calamitatem incidit, seu nullus eorum perit. Ex Joan. quippè 10. *Oves meæ vocem meam audiunt, & ego cognosco eas, & sequuntur me, & ego vitam æternam do eis, & non peribunt in æternum, & non rapies eas quisquam de manu meâ.* At si æternam det Deus ovibus suis vitam, hæc est, si prædestinatis largiatur beatitudinem; si ex illis nullus perit, eorum salus est in tuto, quod etiam expressit ipse Christus Joan. 6. &c.

2. Non pereunt prædestinati, quia sunt unum quid cum Christo Joan. enim 17. *Non pro mundo rogo, sed pro his, quos dedisti mihi; quia tui sunt; & mea omnia tua sunt, & tua mea sunt. . . . Pater sancte, serva eos in nomine tuo, quos dedisti mihi, ut sint unum sicut & nos.* Rom. 8. *Quis accusabit adversus electos Dei? Deus qui justificat. Quis est qui condemnet? &c.*

3. Divinâ & continuâ Dei beneficentiâ & defensione donantur electi: nam Apostolus Rom. 11. Deum plebem, quam præscivit, seu prædestinavit, non reprobasse probat ex hoc Dei responso Eliæ dato 3. Reg. 19. *Reliqui mihi septem millia virorum qui non curvaverunt genua ante Baal.* Sic ergo & in hoc tempore reliquæ secundum electionem gratia salvæ factæ sunt. Item 1. Timoth. 2. *Firmum fundamentum Dei stat habens signaculum hoc, cognovit Dominus qui sunt ejus.* In electis igitur est standi firmitas, & illius firmitatis signaculum est Dei cognitio benevola.

4. Qui à veritate recedunt & ab Ecclesiâ, ex prædestinatorum numero non sunt: 1. enim Joan. 2. *Ex nobis exierunt, sed non erant ex nobis; nam si fuissent ex nobis, permansissent utique nobiscum.* Igitur si ex electis fuissent, in Ecclesiâ remansissent: quam doctrinam ex illis capitibus ita collegit S. Aug. ut è Catholicorum numero repellat, qui aliter senserit; sic enim loquitur lib. de corrept. & grat. cap. 7. *Horum si quisquam perit, fallitur Deus: sed nemo eorum perit; quia non fallitur Deus. Horum si quisquam perit, vitio humano vincitur Deus: sed nemo eorum perit; quia nullâ re vincitur Deus. Et cap. 9. sunt quidam qui filii Dei propter susceptam vel temporaliter gratiam dicuntur à nobis, nec sunt tamen Deo, de quibus ait idem Joannes: à nobis exierunt, sed non erant ex nobis. Et tanquam ei diceretur, undè id ostendis? Quod si, inquit, fuissent ex nobis, permansissent utique nobiscum; Filiorum Dei vox est, Joannes loquitur in Filiis Dei loco præcipuo constitutus. Cum ergo Filii Dei dicunt de his, qui perseverantiam non habuerunt; ex nobis exierunt, sed non erant ex nobis; & addunt, quòd si fuissent ex nobis, permansissent utique nobiscum; quid aliud dicunt? nisi non erant Filii, etiam quando erant in professione & nomine Filiorum: non quia justitiam simulaverunt; sed quia in eâ non permanserunt.* Ita pariter epist. 106. & alibi. S. Aug. sequuntur SS. Prosper, & Fulgentius: hic in lib. 3. de veritate prædest. & grat. cap. 4. sic scribit: *adestinationis ita manet firmitas æterna, & firma æternitas, non solum dispositione operum; rerum etiam in numero personarum; ut nec de il-*

lius numeri plenitudine quispiam salutis aeterna gratiam perdat; nec extra illius numeri quantitatem ad donum salutis aeternae perveniat. Ille in respons. ad 12. object. Vincentianam hæc habet. *Predestinatio Dei est apud nos, dum in vita presentis periculis versamur, incerta est; apud illum tamen, qui fecit, quæ futura sunt, immutabilis permanet.*

§ Nec augeri nec imminui potest electorum numerus; nam præterquam quod istud prorsus constat ex testimoniis tam Scripturæ, quam Patrum mox adductis; idem adhuc expressè declarat S. Aug. lib. de corrept. & grat. cap. 13. ubi dicit prædestinatorum ita certum esse numerum, ut nec eis addi quisquam, nec adimi possit. Item lib. de dono persév. cap. 14. *An quisquam dicere audebit Deum non præcivisse, quibus esset daturus, ut crederent; aut quos daturus esset Filio suo, ut ex eis non perderet quemquam?* Aliud opinabantur Semipelagiani ex S. Prosp. epist. ad S. Aug. videlicet prædestinatorum numerum & augeri & minui posse.

O P P. 1. Deut. 1. Moyses ita Deum precatur: *Dominus Deus Patrum vestrorum addas ad hunc numerum multa millia.* Igitur &c.

R. Moysen in votis nihil aliud habuisse, quam ut Israëliticus populus amplificaretur; non verò de prædestinatione fuisse locutum.

O P P. 2. è libro viventium, seu prædestinatorum eradi possunt quidam: nam Exod. 32. ita Moyses ad Deum: *Aut dimitte eis hanc noxam; aut si non facis, dele me de libro tuo, quem scripsisti?* Psal. 68. *Deleantur de libro viventium?* Joan. decimo septimo *Quos dedisti mihi custodiri, & nemo periret ex iis, nisi Filius perditionis.* 2. Petri 1. *Satagite, ut per bona opera certam vestram vocationem & electionem faciat.* Apoc. 3. Angelus ad Episcopum Philadel. *Tene quod habes, ut nemo accipiat coronam tuam.* Igitur certus non est prædestinatorum numerus; nec ideo certa dici debet prædestinatio.

R. ad singula hæc momenta:

Ad Exodi locum resp. non ibi loqui Moysen de prædest. libro; sed de vitâ istâ: seu mortem sibi postulat, nisi Deus plebi veniam velit indulgere: ita S. Hier. ad Algasim. Unde hicerit Moyses sensus, qui & Num. 11. obsecro, ut interficias me. Responderi quoque posset ibi esse hyperbolem, quâ significatur vehemens desiderium Moysis, quemadmodum & alibi S. Pauli cupientis esse anathema pro fratribus.

Ad locum ex Psal. 68. desumptum resp. Davidem per hæc verba: *deleantur de libro viventium*, Prophetice significare deletum in Prophetæ persecutores: Non enim in votis est Prophetis persecutorum damnatio, sed salus: futuram hanc calamitatem prænuntiant, nisi penitentia merito illam avertant peccatores. Vel etiam dici potest, Prophetæ verba de illis esse intelligenda, qui putantur ab hominibus esse ex prædestinatorum numero, licet reverà non sint in eo collocati.

Ad locum ex Joan. 17. deproptum resp. hunc esse verborum Christi sensum: Ex iis, quos dedisti mihi, nullus perit: Ex meis quidem discipulis perit unus Judas; sed eum mihi non dederas. Quare Joan. 18. ubi repetuntur absolute ea Christi verba, nulla prorsus sit exceptio: *Ut imple-*
retur,

retur, inquit Joannes, *sermo, quem dixit: quia quos dedisti mihi; non peridi ex iis quemquam.* Unde perditus est Judas Filius perditionis, quia datus tantum fuerat ad tempus.

Ad locum ex cap. 1. posterioris epist. S. Petri resp. ibi solum monete principem Apostolorum, ut per bona opera ratam nobis ac firmam vocationem & electionem faciamus: Nam cum Deus nos elegerit, inquit paulus Ephes. 1. *Ut effemus sancti & immaculati in conspectu ejus in charitate;* illi suam confirmant electionem, eamque sibi certam certitudine morali reddunt, qui sancti & immaculati fieri student, ut in charitate magis ac magis adjuvante Dei gratia proficiant.

Tandem in loco Apocalyps. pramonet Angelus Episcopum, ut cum timore & tremore salutem operetur; nemo enim scit, an odio, an amore sit dignus, ut mox probamus.

CONCL. II. Nemini præter revelationem à Deo acceptam certus est prædestinatorum numerus. Nec ullus sine eâ certò scit, an ex illo sit numero.

Prob. Qui concitantur ad timorem, ne pereant; qui non noverunt, an amore vel odio digni sint; an perseverantiæ donum sibi certò sit concedendum; hos sanè latet penitus, an sint prædestinati, & quis sit prædestinatorum numerus, & quis ex illo sit numero, nisi beneficio singulari Deus aliter significarit.

1. Singulos ad illam, ne pereamus, formidinem utrumque testamentum impellit: Psal. quippè 2. *Servite Domino in timore & exultate ei cum tremore. Apprehendite disciplinam, ne quando irascatur Dominus, & pereatis de via justâ.* Rom. 11. *Tu fide stas, noli altum sapere; sed time. Si enim Deus naturalibus ramis non pepercit, ne fortè nec tibi parcat.* 1. Cor. 10. *Qui se existimat stare, videat ne cadat.* Philipp. 2. *Cum metu & tremore vestram salutem operamini.* 1. Cor. 4. *Nihil enim mihi conscius sum, sed non in hoc justificatus sum.*

2. Eccles. 9. *Nescis homo, utrum amore, an odio dignus sit; sed omnia in futurum servantur incerta.* Unde vigilare jubemur, ne futis instar adveniens Dominus incautos deprehendat. Hinc ità colligunt S. Hier. lib. 2. contra Pelag. *Ne beatum dixeris quempiam ante mortem: quandiu enim vivimus, in certamine sumus; & quandiu in certamine, nulla certa est victoria.* S. Aug. lib. de corrept. & grati cap. 13. *Quis enim ex multitudine fidelium, quandiu in hac mortalitate vivitur, in numero prædestinatorum se esse presumat?* Lib. de bono persev. c. 13. *Ad quam vocationem pertinere nullus est homo ab hominibus certâ aßeclaratione dicendus; nisi cum de hoc seculo exierit.* In hac autem vitâ humanâ . . . qui videtur stare, videat ne cadat. Idem habet lib. 11. de civit. Dei cap. 12. & alibi. Similia quoque reperies apud S. Prosperum lib. 2. de vocat. Gent. cap. ult. Greg. Mag. lib. 6. Moral. Bernard. serm. 11. de Septuages. ubi sic habet: *Quis potest dicere, ego de electis sum? ego de prædestinatis ad vitam? ego de numero filiorum? quis hac, inquam, dicere potest? Reclamante nimirum Scripturâ; nescit homo, si sit dignus*

amore, an odio. Certitudinem utique non habemus, sed spei fiducia consolatur nos, ne dubitationis anxietate cruciemur. Et epist. 107. Datur aliquid præsentire de suâ ipsius futurâ beatitudine . . . Interim gloriatur in spe, nondum tamen in securitate. Ex his ita definit Concilium Trid. sess. 6. de justificat. cap. 12. Nemo quoque quantulum in hac mortalitate vivitur, de arcano divina prædestinationis mysterio usque adeo presumere debet, ut certò statuat se omnino esse in numero prædestinatorum: quasi verum esset quod justificatus, aut amplius peccare non possit; aut, si peccaverit, certam sibi resipiscenciam promittere debeat; cum, nisi ex speciali revelatione, sciri non potest, quos Deus sibi elegerit. Et can. 15. Si quis dixerit hominem renatum, & justificatum teneri ex fide ad credendum, se certò esse in numero prædestinatorum, anathema sit.

3. Absque perseverantiæ finalis certitudine non potest de prædestinatione constare; cum perseverantia sit verus & proprius prædestinationis effectus. At ex S. Augustino lib. 11. de civit. Dei cap. 10. Quis nisi malè sibi conscius, non dubitet asseverare sibi perspectum, quod Apostolus clamat inferniabile; nempe prædestinationis mysterium. Idem scribit lib. de corrept. & grat. cap. 13. Idem etiam scribunt S. Prosp. lib. 1. & 2. de vocat. Gent. & alii Patres. Undè Concilium Trid. sess. 6. can. 16. cum anathemate ferit, qui dixerit perseverantiæ donum in finem usque se certò habiturum. Si quis magnum illud usque in finem perseverantiæ donum se certò habiturum, absolutâ & infallibili certitudine dixerit; nisi hoc ex speciali revelatione didicerit, anathema sit. Igitur nemini constat de illo dono, ut habet eadem Syn. cap. 12. ejusdem sess. his verbis superius jam laudatis: Quasi verum esset quod justificatus aut amplius peccare non possit; aut si peccaverit, certam sibi resipiscenciam promittere debeat. Et cap. 13. Similiter de perseverantiæ munere, de quo scriptum est: Qui perseveraverit usque in finem, hic salvus erit: quod quidem aliundè haberi non potest, nisi ab eo, qui potens est cum, qui stat, statuere, ut perseveranter stet & cum, qui cadit, restituere; nemo sibi certi aliquid absolutâ certitudine polliceatur; tamen in Dei auxilio firmissimam spem collocare & reponere omnes debent. Deus enim, nisi ipsi illius gratiæ defuerint, sicut capis opus bonum, ita perficiet operans velle, & perficere. Veruntamen qui se existimant stare, videant ne cadant; & cum timore ac tremore salutem suam operentur in laboribus, in vigiliis, in elemosynis, in orationibus & oblationibus, in jejuniis & castitate: formidare enim debent scientes, quòd in spem gloriæ & nondum in gloriam renati sunt, de pugna qua superest cum carne, cum mundo, cum diabolo; in quâ victores esse non possunt, nisi cum Dei gratiâ Apostolo obtemperans dicenti: Debitores non sumus carni &c.

1. Igitur nulli iusto de perseverantiæ dono infallibiliter constat, nisi dono speciali, ac revelatione. 2. Perseverantiæ donum divinæ benignitati debetur. 3. in Deo firmissima est collocanda expectatio; nec decrit Deus, nisi prius ab officio iustus difecerit. 4. Pericula hinc & inde perpetuò quibuscumque imminet, & quidem gravissima. Quin etiam in

ipsis bonis operibus timendum, ne defectus aliquis eorum sinceram puritatem depraver; cum vereatur sibi Apostolus, licet nihil sibi sit conscius. Igitur nullus potest certò scire, seclusâ revelatione divinâ, se in finem usque perseveraturum; ideòque se esse ex numero prædestinatorum.

O P P. postulantibus promitti infallibiliter quæ saluti conducunt; neminem autem prædestinationis beneficium non postulare: Marc. quippè 11. v. 24. *Omnia quacumque orantes petitis, credite, quia accipietis, & evenient vobis.* Rom. 8. *Spiritus testimonium reddit spiritui nostro, quod sumus filii Dei. Si autem filii & heredes; heredes quidem Dei, coheredes autem Christi.* 1. Thessal. 1. v. 4. *Scientes fratres dilecti à Deo electionem vestram.* 2. Timoth. 4. *Bonum certamen certavi..... repocita est mihi corona iustitiae, quam reddet mihi in illâ die iustus iudex.* 1. Joan. 2. *Unctio eius docet vos de omnibus.* 1. Joan. 5. *Hac scribo vobis, ut sciatis quoniam vitam habetis aeternam, qui creditis in nomine Filii Dei.*

R. 1. accipere nos à Deo, quæ, ut oportet, postulantur; non verò quæ simpliciter & absolutè petuntur. Quis verò scit, an petat, sicut oportet, an motu scilicet gratiæ, vel cupiditatis? Nam Rom. 8 *Quid oremus, sicut oportet, nescimus: sed ipse spiritus postulat pro nobis gemitibus inenarrabilibus. Qui autem scrutatur corda, scit quid desideret spiritus.* Undè fides est, perseverantiam non donatum iri, nisi cominuò illam, & ut oportet, postulaverimus, & Christi visceribus inhaerimus.

R. 2. Spiritum sanctum reddere testimonium spiritui nostro, nos esse Dei filios non absolutè, sed conditionatè: *Si tamen compatimur, ut & conglorificemur.* Sic legitur græcè: *Spiritus sanctus testatur cum spiritu nostro: quod testimonium ex interpretibus Græcis nihil aliud est, quàm ipsa, oratio quâ clamamus, Abba Pater.* At utrum sit Dei Spiritus, qui nos movet & excitat, cum clamamus, *Abba Pater*, non constat ex fide divinâ; sed tantùm ex conjecturis, quæ interdum sunt falsæ. Hinc S. Greg. lib. 22. Moral. cap. 5. aptè admodum observat S. Paulum, tùm se, tùm & eos, ad quos scribit in electorum numero recensere per spem & fiduciam, non verò per securitatem atque certitudinem.

R. 3. ex 1. Thessal. 1. nihil aliud colligi posse, quàm Apostolum spem optimam habuisse de Thessalonicensium electione.

R. 4. 2. ad Tim. 4. S. Paulum ex spei confidentiâ, non ex fidei certitudine fuisse locutum. Undè S. Chrysost. Hom. 11. in epist. ad Philipp. *Si qui tanta perpessus erat, qui vexabatur qui mortificationem habebat, nondum de resurrectione illa fidenti & securo animo erat. Quid tandem dicemus? Idem quoque testatur S. August. serm. 19. de verbis Apost. Dum autem ait Apostolus, inquit, castigo corpus meum, ne forè cum aliis predicavero, ipse reprobis inveniar, suo timore nos terruit. Quid enim faciet agnus, ubi aries tremuit? Præterea si S. Paulo de suæ prædestinationis certitudine constitit, peculiari Spiritus sancti revelationi illud debuit beneficium.*

R. 5. S. Joannem cap. 2. suæ prioris epist. velle unctionem Spiritus

tus sancti nos docere de omnibus, quæ sunt ad salutem necessaria, cuiusmodi non est prædestinationis cognitio: quin imò ad animi demissionem confert admodum ejus ignorantia, sicuti docet S. Aug. lib. de corrept. & grat. cap. 13. Timendum enim esset plurimum, ne torpescerent, aut efferrentur electi; aut ne, ut indicat S. Prosper lib. 2. de vocat. Gent. de divinâ misericordiâ diffiderent atque desperarent reprobi. Et licet Deus aliâ ratione, quàm occultando suam cuique sortem, mederi posset huic electionis ac negligentiae morbo: tamen ita placuit magno illi medico, qui sanandi modum & ordinem non accipit ab ægroto.

R. tandem ex cap. 5. 1. S. Joan. epist. nihil inferri posse, quod tantulum faveat adversæ sententiæ. Nam S. Joannes ibi solum docet eos, qui credunt, habere vitam æternam in spe, non in re, juxta illud Apost. Rom. 5. *Spe enim salvi facti sumus*. Unde scribit ipse S. Joannes epist. 2. v. 8. *Videte vosmetipsos, ne perdati, quæ operati estis*. Addimus voces istas, *scire & cognoscere*, in Scripturis non necessariò indicare fidei divinæ certitudinem, ut falsò contendunt heretici: nam dicimur etiam scire & cognoscere quæ ex signis tantum habemus atque conjecturis. Quare cum S. Joan. cap. 3. epist. jam citatæ ait: *In hoc scimus, quoniam manet in nobis de spiritu, quem dedit nobis*; non ipse loquitur de cognitione includente certitudinem fidei, sed de solâ notiâ morali.

O p p. 2. S. August. conc. 2. in Psal. 58. ait *Andi ad securitatem tuam, si te in membris Christi esse cognoscis*. Item S. Gregor. Hom. 3. in Evang. docet eum, qui de suâ spe & operatione securus est, *latum judicem sustinere*; & cum tempus propinqua mortis advenit, *de gloriâ retributionis hilarescere*. S. quoque Bern. serm. 2. de Pen. ec. dicit Spiritum sanctum imprimere, & ostendere cordi nostro certissima signa prædestinationis.

R. Sanctos illos Patres nonnisi de fide in Dei benignitatem disserere, cuiusmodi est vitorum, qui continuum in divinæ legis observantiâ studium collocantes, divinæ pollicitationi & misericordiæ paternæ confisi, cum Apostolo non dubitant proferre: *In reliquo reposta est mihi corona justitiæ, quam reddet mihi justus Judex*. Sed ipse Apostolus aded non indè mercedis æternæ certam confectionem sibi pollicebatur, cum ipsemet scripserit: *Castigo corpus meum . . . ne, cum aliis prædicaverim, ipse reprobus efficiar*. Hanc doctrinam S. Bern. qui hîc opponitur, sic explicat serm. 1. de Septuages. *Certitudinem utique non habemus; sed spei fiducia consolatur nos, ne dubitationis hujus anxietate penitus cruciemur . . . Quales sumus, nosse possumus vel ex parte: quales autem futuri simus, id nosse penitus nobis est impossibile*.

Quær. an hoc revelationis beneficium aliquibus fuerit concessum?

R. quibusdam indultum fuisse, ut latroni, Luc. 23. *Hodie mecum eris in Paradiso*. S. Stephano Act. 7. *Intendens in cælum Stephanus vi lis gloriam Dei, & Jesus stantem à dextris Dei: & ait: Ecce vides cælos apertos*. Hinc canit Ecclesia: *Vidit, & introivit beatus homo, cui cæli patebant*. Virgini quoque Deiparæ hanc singulari privilegio concessam fuisse gratiam videtur extra dubium. Utrum autem hoc idem beneficium

Abrahæ, Moyfi, & Sanct. Apost. fuerit collatum, non ità constat; quia Deus absolute non promiserat illis gloriam; sed ex hypothesi quòd in fide & charitate perseverarent. Christus autem non spondit Apostolis omnibus sigillatim gloriam; imò Joan. 13. gloriæ privationem interminatus fuit Petro, nisi pedes præberet ablucendos: *Si non laveris te, non habebis partem mecum*; & ad omnes ait: *Beati eritis, si feceritis ea.*

S. Paulus scribit quidem Rom. 8. *Certus sum, quia neque mors, neque vita. . . poterit nos separare à charitate Dei* sed quid inde? Etenim Apost. de prædestinatis in genere habet sermonem, ut observat S. August. lib. de corrept. & grat. cap. 17. ità ut sensus sit, prædestinatos omnes in charitate Dei perseveraturos. Si verò de seipso in particulari loquatur, aut de aliis similibus, non est intelligendus de fidei certitudine, sed de spei confidentiâ: neque enim notum erat ipsi S. Paulo, qui ex fidelibus Romanis essent electi, & qui non essent. Hâc igitur confidentiâ ductus, fideles, quos alloquebatur, ex prædestinatorum esse numero ità consolabatur. Quæ quidem expositio non solum textui Græco est consentanea; sed etiam sanctis Patribus: nam S. Greg. lib. 6. epist. 22. laudatis illis verbis S. Pauli, scribit ex revelatione non habuisse de suâ salute certitudinem. Item S. Hieron. in epist. ad Algasium quæst. 9. ità legit: *Confido, quia neque mors, neque vita &c.* Quin etiam Apost. ipse cap. 15. ejusdem epistolæ eodem utitur verbo: *Certus sum, fratres mei, & ego ipse de vobis; quoniam & ipsi pleni estis dilectione, repleti omni scientiâ &c.* An autem S. Paulo nullum non esse Romæ, qui certò non esset prædestinatus. fuit in aperto? Quidquid sit, si S. Paulus, & insignes electi de suâ prædestinatione fuerint securi, nonnisi ex peculiari Spiritûs sancti revelatione acceperunt. An in electis probabilia prædestinationis signa dentur, nemini est dubium; cujusmodi sunt pœnitentia vera, erga proximum sincera charitas, pure conscientie testimonium. Addit adhuc S. Bern. serm. 1. & 2. in octavâ Paschæ, spiritualium operum exercitia, lacrymarum fontem, & sanguinolentum pœnitentiæ martyrium,

CONCL. III. Agendi necessitatem non imponit prædestinatio, licet certissima; quidquid contra reclamet Calvinus.

Prob. 1. Prædestinationis certitudinem ex Dei verbo mox laudato, & libertatis humanæ integritatem ex eodem Dei verbo, & antiquorum unanimi consensu habemus: Eccl. quippè 13. *Deus reliquit hominem in manu consilii sui: ante hominem vita & mors, bonum & malum: quod placuerit ei, dabitur illi.* Cap. 31. *Qui potuit transgredi, & non est transgressus; facere mala, & non fecit.* Matth. 19. *Si vis ad vitam ingredi, serva mandata.*

Deindè Ecclesiæ consensus unanimis de libertate, ut de fidei dogmate, refertur à SS. August. lib. de grat. & lib. arbit. Innoc. I. epist. ad Conc. Carthag. Prosp. in resp. ad 6. Gallorum object. & à Synodo Arclat. 4. an. 476. quæ illum à Calvino propugnatum errorem tunc temporis damnavit. Et certè Dei voluntas, aut providentiâ res creatas sic administrat ex S. August. lib. 7. de civit. ut liberam agendi rationem servet illisam.

O P P. Prædestinationi neminem reluctari posse; ex Rom. enim 9. *Voluntati ejus quis resistit?*

R. argumento simili Dei præscientiam, providentiam, & voluntatem impugnari: quodque reposuerint adversarii; nos quoque reponere pro hominis libertate defendendâ. Quod tamen alibi scripsimus, paucis hîc repetimus; nempe quoad fines universales ordinationem non declinari divinam: nam qui non ordinatur in bonis, ut habet S. August. justo judicio Dei ordinatur in malis. Dicimus adhuc neminem ordinationi divinæ seipsum subtrahere, quoad fines particulares, in sensu, ut loquuntur, composito; seu divinæ voluntatis ordine posito: posse verò hanc ordinationem declinari simpliciter & absolute, sive in sensu diviso: possent enim electi Deo monenti morem non gerere, licet obsequantur. Undè vel ipsi Apostoli postulare quotidie jubentur, sicut & homines cæteri: *Adveniat regnum tuum: Dimitte nobis debita nostra* &c. Et sibi timens Apostolus ait 1. Corinth. 9. v. 27. *Castigo corpus meum, & in servitutem redigo, ne fortè, cum aliis predicaverim, reprobus efficiar.* Nec enim in electis ex Dei motu terrores & orationes ejuscemodi occurrerent, nisi ad oppositum potentia remaneret, aut activa indifferentia; quamvis electis auxilia conferantur potentissima.

Quæritur an electorum numerus, reproborum numerum superet?

R. longè superiorem esse improborum numerum, si de omnibus omnino hominibus, tam infidelibus, quàm Christianis; tam apostatis, hæreticis, & schismaticis, quàm de Catholicis sit quæstio. Id enim innuit Eccles. dum ait cap. 1. *Stultorum infinitus est numerus.* Istud etiam indicat Propheta Rex, quandò dicit Psalm. 39. *Multiplicati sunt super numerum;* hoc est, ex S. August. lib. de corrept. & grat. cap. 13. *Reprobi supra numerum electorum.* Idem testatur ipse Christus, tum Matth. 7. his verbis: *Lata porta & spatiosa via est, quæ ducit ad perditionem; & multi sunt, qui intrant per eam. Quàm angusta porta, & arcta via est, quæ ducit ad vitam; & pauci sunt, qui intrant per eam:* tum & Matth. 20. ubi dicit: *Multi sunt vocati; pauci verò electi.* Quæ verba de ipsis etiam fidelibus intelligunt SS. Patres, ut Chrysostomus Hom. 24 in Act. Apost. Augustinus lib. 3. contra Crescon. & Gregorius Hom. 19. in Evang.

Et verò ante Christi nativitatem extra posteros Abrahamæ sincero cultu Deum pauci venerabantur: inter Israelitas quot idololatæ? quot divinarum legum infractorum protervi? quot ex Christianis in schismata, in hæreses defecerunt? quot inter Catholicos peccatis serviunt? imò, testante Christo Luc. 18. circa judicii postremi tempora pauci futuri sunt, qui fidem habeant: *Peruntamen Filius hominis veniens, putas, inveniet fidem in terrâ?* & si deesset autoritas divina, infelici experimento fieret palàm, criminum voraginem infestare universum orbem; nec pastoribus superesse solatii locum alium, præter columbæ gemitus. De Patribus silemus, qui sua calamitosa tempora continuò ferè desseverunt.

O P P. ex Matth. 8. *Multi ab Oriente & Occidente venient & ream-bent cum Abraham, & Isaac, & Jacob in regno cælorum.* Et Apo-

calyp. 7. 9. *Vidi turbam magnam, quam dinumerare nemo poterat, ex omnibus gentibus, & tribubus, & populis, & linguis, stantes ante thronum.* Igitur amplissimus est numerus prædestinatorum.

R. cum S. Augustino lib. contra Cresc. cap. 66. prædestinatos, licet absolutè, & nullâ comparatione factâ, sint multi; tamen respectu multitudinis reproborum esse paucissimos: *Boni, inquit, verique Christiani, qui per seipsos sunt multi, in comparatione malorum sunt pauci:* sicut multa grana, quibus horrea magna complentur, paleis collata, pauca sunt.

S. Aug. lib. 22. de Civit. docet prædestinatorum numerum, Angelorum de perditorum numero æqualem, ac fortassis uberiores esse. Et lib. 21. dixerat ampliorem esse reproborum numerum, ut vel sic ostendatur, hominibus non nisi damnationem deberi.

QUÆSTIO DECIMA-SEPTIMA.

De Reprobatione.

ARTICULUS PRIMUS.

De nomine & reprobationis essentiâ.

VOX reprobationis extat Jerem. 6. v. 30. & 1. Corinth. 9. v. 27. ad eos significandos, qui non continentur in electorum numero. Reprobi dicuntur etiam repulsi Ps. 87. v. 5. Despecti Eccles. 7. v. 14. Facti in diem malum Prover. 16. v. 4. Hædi & maledicti Matth. 23. v. 35. & 41. Præscripti in iudicium & damnationem epist. Jude v. 4. Vasa iræ Rom. 9. v. 22. Vasa contumeliæ 2. Timot. 2. v. 20. Mundus. Joan. 1. Filii perditionis Joan. 17. v. 12. &c.

Definitur à Mag. sent. lib. 1. dist. 40. præscientia iniquitatis quorundam, & præparatio damnationis eorundem: seu præscientia malitiæ in quibusdam non finiendæ, & præparatio pœnæ nunquam terminandæ. Ex quâ definitione colligitur, Deum non præparare, sed præscire ac prævidere peccatum, quod ad æternam damnationem conducit.

ARTICULUS SECUNDUS.

An detur reprobatio?

REPROBATIONEM dari constat adeo in Scripturis, ut ulteriori probatione non sit opus. Unicum est consulendum caput 9. Rom.

Ibi enim ex SS. Aug. & aliis, Jacob instar prædestinatorum exemplaris & Esau reprobatorum typi proponuntur.

Reprobatio est duplex: altera positiva, seu decretum infligendæ pœnæ: altera negativa, quæ est hominum in peccato originali desertio.

Altissima de reprobatione quæstio hominum mentem longè superat, ut probat & docet Orig. Hom. 4. in cap. 7. Exod. variis istis loquendi formulis: *Induratum est cor Pharaonis: induravit Dominus cor Pharaonis: ego Dominus induro cor Pharaonis.* Et sanè quàm difficilis, sit reprobationis conceptus vel sola S. Amb. expositio manifestum facit, sic enim habet lib. 2. de Cain. cap. 9. *Nihil gravius quàm errantem à Deo deferi, ut se vocare non possit. Mors peccatoris finem peccandi adfert; vita autem divino gubernaculo destituta præcipitatur, & in graviora prolabitur; ut si gregem pastor relinquat, incursent bestia: Ità cum Deus deferis hominem ingruit Diabolus. Grave est, præsertim insipientibus, non habere rectorem; serpit malitia: vultus augetur, ubi medicina defuerit.*

O P P. Positâ reprobationis existentia, sequitur Deum perditionis reprobatorum esse causam; quod est contra illud Osee. 13. *Perditio tua Israel: tantummodo in me auxilium tuum.*

R. Reprobationem Deo ut causâ non esse tribuendam: Omnes enim homines in perditionis massâ continentur; adeo ut qui prædestinantur, ex eâ massâ, ut exponit S. Aug. epist. 106. misericordiæ beneficio educantur: qui verò reprobantur, iusto iudicio in eadem perditionis massâ relinquuntur. Quod & adhuc expr. ssit idem S. August. lib. 3. cont. Julian. cap. 18. his verbis: *Bonus est Deus, justus est Deus: potest sine bonis meritis liberare, quia bonus est: non potest quemquam sine malis meritis damnare quia justus est.* Hæc autem demerita sunt, aut actualia peccata, vel originalis macula.

Religio sit proferre Deum ità res sibi subjectas in suum finem dirigere, ut tamen eas non impediat, ne ab officio deflectant. Provisoris enim est universalis, libertati eam non inferre, & defectus aliquos in particularibus permittere, ne universalis naturæ bonum lædatur. Si enim omnia impedirentur mala, decessent universo multa bona: non esset quippe generatio, nisi esset corruptio: non esset vita hominum, nisi esset occisio animalium: non esset patientia Martyrum, nisi esset persecutio tyrannorum: tandem non esset, tum divinæ justitiæ ostensio, tum defectibilitas liberi arbitri, tum & necessitatis gratiæ manifestatio, nisi esset ipsa peccati permissio.

Hinc ex S. Greg. lib. 32. Mor. cap. 13. sicut ex nigro colore in pariete albedo elucescit, sic hominum improborum iustâ ordinatione virtutis amplitudo fit magis conspicua.

ARTICULUS TERTIUS.

De causis reprobationis. De unicâ causâ motivâ instituitur questio.

ERRORES.

ERRAVIT Orig. reprobationem ad prioris cujusdam vitæ scelera ratus esse referendam. Erravit & Calvinus asserens absque cujuscumque peccati, sive actualis, sive originalis intuitu ad damnationem quosdam creati, & idè ad peccandum impelli.

Sunt & alii, qui reprobationem tam positivam, ut vocant, quam negativam à peccatorum etiam actualium præsentia, tanquam à causâ motivâ & meritoria pendere arbitrantur. Docent alii reprobationem quidem positivam, seu infligendæ pænæ decretum, peccatorum prævisionem supponere; negativam verò, quæ dicit voluntatem aliquos excludendi à gloriâ tanquam à beneficio indebito, ex solo Dei beneplacito proficisci. Alii cum S. Aug. reprobationem omnem in præcognitum Adami peccatum, tanquam in causam primariam, referunt.

Reprobatio (ut jam suprà monuimus) alia statuitur à Theologis negativa, seu quorundam in perditionis misâ derelictio; alia ab illis dicitur positiva; hæcque divinum est decretum, quo pœnis debitis peccatorum rei addicuntur. Quam fateor distinctionem apud Antiquos non omninò deprehendi: illam tamen, ut jam in scholis receptam, nos quoque supponemus.

CONCL. I. Deus non reprobât positivè; seu pœnam non decernit infligendam, nisi prævisò seu originali, seu actuali peccato.

Prob. Qui mortis peccatorum non est author, nec ex peccatorum calamitate gaudium percipit; qui infanti pœnam non infligere lux æquitatis esse proficitur; qui ad peccandum neminem constituit, ut nec deserit, nisi deseratur; is certè reprobationis positivæ, seu quam nulla iniquitas prævertat & mereatur, non est author.

1. Deus mortis non est author, nec eam ex se vult, & ex nobis est calamitas meritò nobis inferenda. Sap. quippè 1. *Deus mortem non fecit, nec latatur in perditione vivorum.* Ezech. 33. *Nolo mortem impij, sed ut convertatur impius à viâ suâ & vivat.* Osee. 13. *Perditio tua Israël; tua, seu ex te. Corruptioni tuæ Israël quis auxiliabitur?* Ità 70. *Cum vos depravatis opera vestra, o domus Israel, dominantur in vos populi.* Sic Chald. *reddidisti te ipsum Israël;* Ità ex Heb. Verunt alii, seu iniquitatem tuam, ut Munster. Idè reprobatio vocatur ab Apost. odium, ira, & indignatio Dei; quæ non nisi peccatum requirit, ut infert S. Aug. lib. 1. ad simpl. quest. 2. undè lib. de bono pecc. cap. 8. sic loquitur *Qui liberatur, gratiam diligat; qui non, liberatur debitum agnoscat.* Et lib. 2. ad Rom. cap. 7. *Bonum quidem immeritò & gratis datur malum*

verò & debitum redditur; quia in massa perditionis malum malo non malè redditur; & ei, cui redditur, malum est; quia supplicium ejus est: ei verò, à quo redditur, bonum est; quia rectè factum ejus est. Ità etiam SS. Prosper, Fulgent. & alii Patres. Undè pariter sic profitemur Ecclesia Gallicana in Concilio Valent. 3. cap. 3. *In electione salvandorum, Dei misericordia meritum bonum; in damnatione verò peccatorum, meritum malum præcedit justum Dei judicium.*

2. Divinæ esse justitiæ & æquitatis pœnis non subicere insontem profitemur Sapiens cap. 12. v. 15. *Cum ergò sis justus, justè omnia disponis: ipsum quoque, qui non debet puniri, condemnare exterum estimas à tuâ virtute: Virtus enim tua justitiæ initium est.* Hinc S. Aug. lib. de grat. & lib. arbit. cap. 23. *Deus reddit mala pro malis; quia justus est: bona pro malis; quia bonus est: bona pro bonis; quia injustus non est.*

3. Positâ reprobatione positivâ in sensu Calvini, consecutio blasphemæ sequitur, quosdam videlicet ad peccandum è nihilo educi; ex quâ illatione priorum sæculorum hæretici malum Deum peccati authorem esse agnoscendum colligebant: quam impiam doctrinam confutarunt S. Iren. lib. 4. cap. 48. & alii.

Ex Antiquis Deus non deserit; nec unquam justum divinæ legi obsequentem suâ tutelâ destituit. Ex Tert. quippè lib. de præscript. *Judai retrò penes Deum fuerant; dehinc ejecti ob delicta, extra Deum esse cœperunt.* Ex Orig. in cap. 2. Judic. *Hoc ergò modo intelligendum, Deum tradere quos tradis: non quia ipse tradat aliquem; sed derelinquat, qui se non à vitiis expurgant, ut libenter in eis habitet Deus.* Ex S. Basîl. in Regul. brevior. *Nunquam deserit, neque auxilio divino destituit, qui à Deo exoptat se juvari.* Item Hom. in Psalm. 37. *Ne arguas me in furore tuo; id est, non tradas me Damoni; nec vindictam in judicii diem differas. Non movebor in æternum, inquit, movente Damone: & quia magnum de seipso sentire cœperat; ità ut arrogantius loqueretur; huius rei gratiâ meritò traditus tentatori est, qui ubi animam ejus ostendit, graviore dissidio affecit eum, quàm Job.* Ex S. Chrysost. lib. 1. de provid. cap. 6. *Si ex dilectione correptio, ex odio derelictio est: neque ejusdem quempiam simul & amare, & odisse; neque corripere quidem, & derelinquere.* Quomodo ergò, inquirunt, multi corruerunt; se ipsos illi Deo privaverunt; non autem à Deo derelicti sunt: *Ecce enim, inquit, qui elongant se à te, peribunt: elongant se à Deo, qui correptiones ab eo respuant, & irascuntur, ut filii perversi.* Ex S. Aug. epist. 157. Optato: *Meritò videretur injustum, quod fiunt vasa ira ad perditionem, si non esset ipsa universa massa ex Adam damnata.* Lib. quoque 13. de Civit. cap. 15. *Ad malum quippe creatura prior est voluntas creatura; ad bonum verò ejus prior est voluntas creatoris.* Lib. etiam de nat. & grat. cap. 26. *Deus non deserit nisi deferatur, ut piè justèque semper vivatur.* Et cap. 28. *Deserit aliquando Deus, undè superbis? ut sciam non tuum, sed ejus esse; ut discas superbus non esse, qui ex castitatis merito, & gloria contemptu gloriam capessunt, permittente Deo cadunt, ut in posterum de donis gratias referant, & non pluri quàm fratres se facere*

edocentur. Ex S. Athan. in vitâ S. Antonii, ipse S. Antonius à Dæmonibus malè habitus, variisque tentationibus admodum vexatus, cum se aspectabilem fecisset Deus, sic Deum alloquitur: *Ubi eras? cur non initio apparuisti? Aderam hic Ansoni; sed morabar, tuum spectaturus certamen.* Undè Conc. Trid. sess. 6. cap. 11. *Deus suâ graciâ semel justificatos non deserit, nisi prius ab eis deferatur.*

O P P. ex Rom. 9. Esau nullius peccati reum, Deo exosum fuisse; nec minùs esse penes Deum, quàm penes luti figulum, ex eadem massâ in honorem vas unum componere; aliud verò in contumeliam. Hinc S. August. tract. 26. in Joan. *Quare hunc trahat, illum non trahat, noli velle judicare, si non vis errare.* Et lib. de prædest. & grat. cap. 19. *Si genus humanum, quod primitus ex nihilo à Deo extractum est, non cum debito mortis, & peccati origine nasceretur; posset Deus utique omnipotens, si vellet, damnare absque eo, quòd quis illi dicere posset; quid me fecisti sic?* Idèò Prov. 16. *Omnia propter semetipsum operatus est Dominus; impium quoque ad diem malum.* Quod etiam patet ex istis Exod. 9. verbis: *Idcirco autem posui te, ut ostendam in te fortitudinem meam, & narretur nomen meum in omni terrâ.* Et Rom. 9. *In hoc ipsum excitavi te, ut ostendam in te virtutem meam, & annuntiatur nomen meum in universâ terrâ.*

R. Esau non fuisse reprobatum ante prævisum originale peccatum: nam ex S. Augustino epist. 106. Jacob & Esau, qui nondum propria vel bona, vel mala operabantur; rei tamen ex origine nascebantur. Originalis ergò macula fuit causa, cur Esau fuerit reprobatus & exclusus à gloriâ. Undè S. Paulus naturam humanam luto comparavit; sed prout erat peccato originali contaminata atque corrupta: quippè contagio peccati degeneravit in luti vilitatem, ratione cujus Deus ipse pro suâ misericordiâ vasa quædam in honorem efficit; alia pro suâ justitiâ in æternam contumeliam dimittit. *An non habet,* inquit S. Aug. epist. 105. ad Sixtum, *potestatem figulus luti ex eadem massâ utique merito justique damnatâ, facere aliud vas in honorem, aliud in contumeliam; in honorem indebitum, propter misericordiæ gratiam; in contumeliam debitum, propter ire justitiæ.* Et ibidem: *Quamvis Deus faciat vasa ira in perditionem, ut ostendat iram, & demonstret penitentiam suam, quâ benè etiam malis uritur; & ut notus faciat semitas gloriæ suæ in vasa misericordiæ, quæ fecit in honorem non damnabili massâ debitum, sed suæ gratiæ largitate donatum: tamen iisdem ira vasis propter meritum massæ in contumeliam debitam factis, id est, in hominibus propter naturam bonum creatis, sed propter vitia supplicio destinatis, iniquitatem, quam rectissimè veritas improbat, damnare novit ipse, non facere.*

Quod autem ipse S. Aug. tract. 26. in Joan. dixerit, non esse quærendam rationem, cur Deus hunc trahat, illum non trahat; id nequaquam nobis adversatur: nam reprobationem non ibi sumit absolutè, ac secundum se, sed comparatè; quia non est potior ratio, cur è pluribus debitoribus unus absolvetur, quàm alius; cur è multis communis exitio pari-

ter obstrictis aliqui liberentur potius, quàm alii; nisi voluntas creditoris atque liberatoris.

Ad id, quod desumptum est ex cap. 19. libri de prædest. & grat. respondeo nullius esse ponderis ac momenti: nam liber ille, quemadmodum observavimus antea, non est S. Augustini factus; cum nec à Possidio, nec à Bedâ, nec ab alio veteri testimonium habeat. Aliundè etiam liber iste discrepat omninò à doctrinâ S. Augustini, ut patet ex his verbis ex ep. 106. depromptis: *Hæc massa, si esset ita media, ut quemadmodum nihil boni, ita nec mali aliquid mereretur, non frustra videretur iniquitas, ut ex eâ fierent vasa in contumeliam; cum verò per liberum arbitrium primi hominis in condemnationem universa defluerit, proculdubio quod ex eâ fiunt vasa in honorem, non ipsius justitia, quæ gratiam non præcessit; sed Dei misericordia: quod verò in contumeliam non iniquitati Dei, quæ longè à Deo aliena est; sed ejus judicio deputandum est.*

Removendum igitur decretum, quo nullius peccati prævisâ labe suam justitiam vindicem velit Deus ostendere: nam quâ ratione repeteretur ultio, nisi prævia esset injuria? cum iræ reprobationem ascribat Apostolus, & offensam ira supponat, & à Dei benignitate alienum sit prorsus criminis expertes vindici justitiæ subicere: Tob. enim 3. *Non delectaris in perditionibus nostris.* Deum autem, qui omnia propter se operatur, à creandis hominibus, quos impios esse futuros præcognoscit, non abstinere, ut vindicis justitiæ æquitas manifestetur, & in Pharaone & Ægyptiis palàm significatur ex quæst. 32. in Exod. inter opera S. August. relatâ, ubi sic habetur: *Et propter hoc ipsum conservatus es, ut ostendam in te potentiam, & ut annuntietur nomen meum in universâ terrâ. Hæc Scriptura verba & Apostolus posuit, cum in eodem loco perdifficili versaretur: ibi autem & hoc ait: Si autem volens Deus ostendere iram, & demonstrare potentiam suam, attulit in multâ patientiâ vasa iræ; parcendo utique iis, quos malos futuros esse præscierat: quæ vasa dicit perfecta in perditionem. Et infra: Novit ergò Dominus bene uti malis, in quibus tamen humanam naturam non ad malitiam creat; sed perfert eos patienter, quousque scit oportere, non inaniter, sed utendo iis in admonitionem vel exercitationem bonorum. Ecce enim, ut annuntiaretur nomen Dei in universâ terrâ, vasis misericordiæ utique prodest. Ad eorum itaque utilitatem Pharaon servatus est; sicut & Scriptura testatur, & exitus docet.*

CONCL. II. Reprobatio negativa, seu decretum, quo reprobi à gloriâ repelluntur, actualia eorum peccata prævertit.

Prob. Nam ex Apostolo Rom. 9. *Cum nondum nati fuissent, aut aliquid boni vel mali egissent: non ex operibus; sed ex Deo vocante dictum est: Jacob dilexi, & Esau odio habui.* Igitur reprobatus fuit Esau, priusquam de peccato vel potuisset cogitare, vel à Deo prævideretur peccaturus. Esto velint aliqui, ut odium illud Dei temporalis hereditatis privatione contineretur, juxta istud Malach. cap. 1. *Posui montes ejus in salitudinem, & hereditatem ejus in dracones deferri:* extra dubium est, Jacob & Esau in typum omnium electorum ac reprobatorum ab Apost. pro-

poni, & ipsa Prophetæ verba mystico & spiritali sensu usurpari. Quod ab Apost. acceptum confirmat S. Aug. epist. 105. *Quid, inquit, oderat in Esau Deus, antequàm fecisset aliquid mali, nisi originale peccatum?* Quod autem Deus in Esau oderat, est reprobationis causa. Igitur reprobatio, à Theologis dicta vulgò negativa, peccatorum actualium pravisionem antecedit. Lib. quoque 8. ad Bonifac. cap. 7. *Cum secundum propositum Dei vocatur alius, & alius non vocatur; vocato datur gratuitum donum, cuius boni est vocatio ipsa principium; non vocato redditur malum, reprobationis nempe; quia omnes rei sunt, ex eo quòd per unum hominem peccatum intravit in mundum, quod est originale peccatum.* Et postea: *Nec ulla est acceptio personarum in duobus debitoribus equaliter reis, si alteri dimittitur, ab altero exigitur, quod ab utroque pariter debetur.*

OP P. 1. Hâc doctrinâ positâ, hominem prius deserit Deus, quàm ab ipso deseratur. Item non omnes vult salvos fieri, eos scilicet, quos non pravisis eorum peccatis à cælesti regno repellit. Quod quidem, quâ possit æquitate decerni, mens humana non percipit.

R. 1. nemini gratiam habitualement subtrahi, nisi peccatum præcesserit. Undè S. August. ait: *Diabolus suggerit, homo consentit, Deus deserit.*

R. 2. antecedenti voluntate velle Deum omnes homines salvos fieri; voluntate verò consequenti nolle: potius autem peccato originali aut actuali, Deus nos æquo iudicio punit.

CONCL. III. Reprobationis causa prima, est originalis macula.

Prob. Nam ex S. August. Enchir. cap. 98. *Ambo itaque gemini (Esau & Jacob) naturâ filii iræ nascebantur, nullis quidem operibus propriis, sed originaliter ex Adam vinculo obstricti; sed qui dixit, miserebor, cui misertus ero; & misericordiam præstabo, cui misericors ero: Jacob dilexit per misericordiam gratuitam; Esau autem odio habuit per iudicium debitum.* Idem Doctor variis in locis nomine dilectionis & odii Dei, prædestinationem & reprobationem intelligit; sed juxta ipsum causa odii Dei adversus Esau, & consequenter adversus omnes reprobos, quos per illum designari censuit, originale fuit peccatum: nam lib. 1. ad Simplic. quæst. 2. *Non igitur odit Deus Esau hominem; sed odit Deus Esau peccatorem.* Et addit: *Cur ergò Jacob dilexit? numquid peccator non erat? sed dilexit in eo, non culpam, quam debebat; sed gratiam, quam donabat.* Similia colligi possunt ex lib. 4. contra Jul. cap. 8. lib. 2. ad Bonifac. cap. 6. & 7. lib. de bono persever. cap. 8. 9. 11. & 12. Ergò prima causa reprobationis est labes originalis.

OP P. 1. In baptisatis saltem, reprobationis causa non potest esse originalis macula. Nam Rom. 8. *Nihil damnationis est iis, qui sunt in Christo Jesu.* Undè Conc. Trid. sess. 5. cap. 5. *In renatis nihil odit Deus; quia nihil est damnationis iis, qui verè conscripti sunt cum Christo per baptismum in mortem.* Igitur &c.

Rt. S. Aug. à perditionis massâ baptismo liberatos esse quosdam; sed temporales sunt, inquit lib. de correptione & gratia cap. 13. *nec perseverant; deserunt, & deseruntur: dimissi enim sunt libero arbitrio, non acceptio per-*

severantia dono, iudicio Dei iusto & occulto. Et antea cap. 7. Qui perseveraturi non sunt, nec illo tempore, quo bene pieque vivunt, discreti sunt à massa perditionis. Baptismo quidem peccatum originis fuit deletum; sed pœna non sunt sublata, ignorantia scilicet, & concupiscentia inordinatio, peccatorum radices. Hinc S. Gregor. Mag. in Psalm. 101. Et cum juxta Apostoli sententiam, neque volentis, neque currentis; sed miserentis est Dei. Sic qui corruerunt, eos misericorditer erigit; alios, qui stare videbantur, cadere justè permittit. Ex peccato namque primi parentis accepimus, ut nec in ipsa justitia stabiles esse possimus. Concilium autem Trid. in Calvinistarum sententiâ proscribendâ versabatur. Hi verò peccatum originale non deleri reipsâ, sed extrinsecè tantum, & per meram non imputationem remitti contendebant: quod jure damnarunt Patres Tridentini.

CONCL. ultima. Idem de lapsorum Angelorum reprobatione iudicium est ferendum, fuisse scilicet propter prævisam defectionem reprobatos. Eos omnes Deus crearat in gratiâ: *Fuit simul in illis, inquit S. Aug. largiens gratiam, & condens naturam. Æquitatis est nonnisi pœnam infligendam decernere, ut mox fuit probatum. Deus igitur non constituit Angelos quosdam à gloriâ repellere, nisi ubi eorum casum futurum prævidit.*

ARTICULUS QUARTUS.

De Reprobationis effectibus.

P R I M U S reprobationis effectus est pœna æterna, & gloriæ privatio: Matth. quippè 25. ignis æternus dicitur paratus Diabolo & Angelis ejus. Alius est, nempe derelictio & obduratio in pœnam peccati præcedentis; Psalm. enim 80. *Dimisi eos secundum desideria cordis eorum, ibunt in adinventionibus suis. Act. 14. Dimisi omnes Gentes ingredi vias suas. Rom. 1. Cum cognovissent Deum, non sicut Deum glorificaverunt, sed evanuerunt in cogitationibus suis, & obscuratum est insipiens cor eorum.... propter quod tradidit illos Deus in passionem ignominia.... Tradidit illos Deus in reprobum sensum, ut faciant ea, quæ non conveniunt. Rom. 11. Ceteri verò excæcati sunt, sicut scriptum est: Isaiæ 29. Dedit illis Deus spiritum compunctionis; seu, ut in Hebræo Textu habetur, spiritum soporis, quo fit, ut nihil sentiant; oculos habeant, & non videant; aures habeant, & non audiant. David. Psalm. 68. Fias mensa eorum in laqueum, in captionem, & in scandalum, & in retributionem illis: seu Scripturæ, quæ sunt animi cibus, in perniciem illis vertantur: quod infelicitè contingit illis, qui, neglectâ matris Ecclesiæ doctrinâ, ad proprios sensus confugiunt. Sic in scandalum incidunt; nec veritatem percipiunt, aut affectibus suis oppositam non sequuntur, aut Dei verbo in aliorum perniciem abutuntur. Undè S. Augustinus Enchir.*

cap. 100. *Propterea magna opera Domini exquisita in omnes voluntates ejus, ut miro & ineffabili modo non fiat præter ejus voluntatem; quia non fieret, si non sueretur: neque utique nolens finit, sed volens.*

Indè non est inferendum, peccata esse reprobationis effectus, ut disputant hæretici: Nam Eccli. cap. 15. *Deus nemini mandavit impiè agere: quod jam suprà docuimus ex S. Fulgent. lib. 1. ad Monim. cap. 26.* ubi ait Deum non prædestinare reprobos ad culpam, sed ad pœnam; non ad transgressionem, sed ad punitionem.

Hinc excœcatio, & obduratio à malitiâ, ut à causâ meritoriâ profiscuntur; à Diabolo, ut à pravitate suafore; à Deo quoque, tanquàm justo vindice, qui ob mala merita non largitur impiis gratiarum subsidia.

Ceterùm mentis cœcitas, aut durities non sic ordinantur ad damnationem eorum, qui excœcantur; quin etiam ex divinâ misericordiâ aliquorum saluti prosint; ita ut in peccatum ipsi pœnitentiam humiliter agant, & ad Deum convertantur.

ARTICULUS QUINTUS.

De Reprobationis proprietatibus.

QUÆRITUR I. an reprobatio sit certa?

R. esse certissimam, non modò ratione cognitionis divinæ, ac præscientiæ; sed & ratione destinationis, ac providentiæ. Deus enim hos, vel illos, Core, Dathan, Abiron, Judam proditorem, & alios in peccatis decessuros novit, & in æternum esse puniendos, æterno suæ voluntatis decreto constituit; & eò gravius, quò illis majori fuit ad virtutem incitamento, & adjumento.

Quær. 2. an reprobatio in reprobis sit culpæ causa?

R. non esse. Sess. enim 6. Concilii Trident. can. 6. anathemate percellitur, qui Deum esse causam mali non permissivè tantum, sed etiam propriè & per se dixerit; nec minùs Judæ perditionem, quàm Pauli vocationem esse Dei opus proprium. Undè can. 9. qui reprobos esse divinâ potestate ad malum prædestinatos dixerit, damnatur.

Quis autem & quantus sit reproborum numerus, certò novit solus Deus; cum id nec in Scripturâ, nec in Traditione fuerit revelatum.

Quæritur 3. an reprobatio peccandi necessitatem imponat?

R. reprobationem, licet certa sit & infallibilis, non tamen imponere peccandi necessitatem ipsis reprobis. Nam reprobatio est pars providentiæ: Porrò autem Providentia peccandi necessitatem haud imponit. Sic enim administrat omnia, inquit S. August. lib. 7. de civit. cap. 3. ut etiam ipsa proprios exercere & agere motus sinat. Undè salutem consequi simpliciter & in sensu diviso, ut loquuntur, possunt reprobi. Neminem enim, ut habet S. August. immeritum, seu sine malis meritis Deus plectere potest; quia justus est. Et ex S. Prosp. lib. de vocatione

Gent. *Æterna & semper tranquilla Dei cognitio nullâ nos urget necessitate peccandi; nec inde manat iniquitas, unde justitia.*

Hæc circa prædestinationis mysterium summa capita, ex Scripturis & Antiquorum monumentis censuimus colligenda; quæ compendiosiori stylo Theologiæ Candidatis proposuissimus; nisi de gravibus hæreticorum hallucinationibus fuissent præmonendi, & de Theologorum Catholicorum concertationibus. Si S. Petro fidem adhibere velint in asseverandâ suâ sanctis operibus prædestinatione, & in excitandis ad eandem sibi procurandam securitatem fidelibus, operam omnem indefinenter collocabunt.

FINIS.

TRACTATUS



TRACTATUS DE SANCTISSIMA TRINITATE.

IN PERLEGENDIS SCHOLÆ DOCTORUM scriptis operam non mediocrem qui collocaverit, quæstiones in Scholis uberius tractatas, breviori stylo hic expositas; à Scholæ verò Doctõribus breviter explanata dogmata, hic prolixiâ tradi oratione deprehendet. Nihil tamen à nobis fuit prætermissum quod Theologos distinxere soleant: quinimò multa fuerunt à nobis addite quæstiones ad mysterii, explanationem non parùm utiles, quæ singula in SS. Patrum operibus occurrunt, tum de mysterii cognitione Judeis concessâ, tum de vocibus in mysterii expositione usurpatis olim, aut usurpandis. Non placebunt forsàn quibusdam de Verbi divini generationis, & Spiritus Sancti processionis ratione paulò temperata disquisitiones nostræ. Patrum doctrina assuesciti eas penitus removissimus, nisi fuisset consuetudini utcumque serviendum. In stabilicndo adversùs renovatam posteriori saculo Arianam hæresim, nunc Socinianam dictam, dogmate Catholico præsertim laborandum esse cœnimus: Scriptura Sacra loca plurima fuerunt idcò expendenda; vindicandi quoque Patres Nicæni ab innovatione, quam illis Sociniani vitio dare non reformidant. Illam an-

Gent. *Æterna & semper tranquilla Dei cognitio nullâ nos urget necessitate peccandi; nec inde manat iniquitas, undè justitia.*

Hæc circa prædestinationis mysterium summa capita, ex Scripturis & Antiquorum monumentis censuimus colligenda; quæ compendiosiori stylo Theologiæ Candidatis propoluissimus; nisi de gravibus hæreticorum hallucinationibus fuissent præmonendi, & de Theologorum Catholicorum concertationibus. Si S. Petro fidem adhibere velint in asseverandâ suâ sanctis operibus prædestinatione, & in excitandis ad eandem sibi procurandam securitatem fidelibus, operam omnem indefinenter collocabunt.

FINIS.

TRACTATUS



TRACTATUS DE SANCTISSIMA TRINITATE.

IN PERLEGENDIS SCHOLÆ DOCTORUM scriptis operam non mediocrem qui collocaverit, quæstiones in Scholis uberius tractatas, breviori stylo hic expositas; à Schola verò Doctõribus breviter explanata dogmata, hic proluxâ tradi oratione deprehendet. Nihil tamen à nobis fuit prætermissum quod Theologos distingere soleat: quinimò multa fuerunt à nobis additæ quæstiones ad mysterii, explanationem non parùm utiles, quæ singula in SS. Patrum operibus occurrunt, tum de mysterii cognitione Judæis concessâ, tum de vocibus in mysterii expositione usurpatis olim, aut usurpandis. Non placebunt forsàn quibusdam de Verbi divini generationis, & Spiritus Sancti processionis ratione paulò temperata disquisitiones nostræ. Patrum doctrina assuefacti eas penitus removissemus, nisi fuisset consuetudini utcunque serviendum. In stabiliendo adversùs renovatam posteriori sæculo Arianam hæresim, nunc Socinianam dictam, dogmate Catholico præsertim laborandum esse cœnimus: Scriptura Sacra loca plurima fuerunt idcò expendenda; vindicandi quoque Patres Nicæni ab innovatione, quam illis Sociniani vitio dare non reformidant. Illam an-
Tom. I.

tiquæ Fidei defensionem aggredi non potuimus, quin singula trium priorum sæculorum monumenta exquisitè sedulâ excuteremus. Adversus Socinianos argumenta, tam ex Scripturis, quàm ex SS. Patribus excerpta revocauimus ad certa capita, tum ut Theologia candidatis esset adjumento, tum maximè ut illâ ratione adeò conspicua fieret Catholica Fidei veritas, ut non modò Arianâ subtilitate animis injecta qualibet dubitatio facillimè removeretur; sed & ad Socinianorum retundendas cavillationes fierent admodum idonei Theologi, & paratissimi.



QUÆSTIO PRIMA.

De hujus Mysterii cognitione.

ARTICULUS PRIMUS.

Quâ ratione, quibusve gradibus ad Trinitatis cognitionem ascendere possimus?



TRINITATIS mysterio intelliguntur Personæ tres in unâ naturâ consistentes, & tribus in Personis una natura subsistens.

Quæstio non movetur de ratione aliquâ conjecturali; nam, positâ semel revelatione, facillimum erit cuilibet in rebus creatis quædam hujus mysterii vestigia deprehendere: sed quæstio est utrùm ratione probari possit mysterium istud, vel supposito, vel non dato revelationis præsidio.

CONCLUSIO I. Naturali ratione demonstrari non potest Trinitatis mysterium.

Prob. 1. Quod demonstrare possumus, id naturali ratione, seu cognitione assequimur; eloquimur ejus causam; vel effectus novimus; illudque legibus naturæ videtur statim consentaneum. Trinitatis verò adorandæ mysterium rationi humanæ penitus est impervium; humano sermone idcirco non potest exponi; nullo effectû, nullâ causâ naturali significatur evidenter; naturæ legibus notis non statim videtur congruere: igitur quâ viâ demonstraretur naturaliter? 1. Naturæ viribus mens humana nullatenus istius mysterii cognitionem assequitur, sed solius Dei revelationis beneficio singulari. Matth. 11. v. 27. *Nemo novit Filium, nisi Pater,*

DE SS. TRINITATE.

neque Patrem quis novit, nisi Filius, & cui voluerit Filius revelare. Et cap. 16. cum Petrus hanc Fidei confessionem edidisset, *Ÿ. 16. Tu es Christus Filius Dei vivi; Christus continuo subiecit, Beatus es Simon Barjona, quia caro, & sanguis non revelavit tibi, sed Pater meus, qui in cælis est. 2. Quæ de Deo argumenta quæst. 1. de Attributis, vel ex insitâ perceptione, vel ex rebus creatis collecta retulimus, nec Personarum pluralitatem in Deo vel leviter subindicant; & si quæ suppeteret ex naturâ ratio valida, dubio procul in Philosophis occurreret antiquis, & à SS. Patribus in re philosophicâ versatissimis fuisset laudata; ut quæ retundendis Philosophis, imò & hæreticis confutandis fuisset aptissima: nihil autem ejusmodi apud Philosophos Sancti Patresprehenderunt; quinimò rationis usum omnem ab isto mysterio remotum esse voluerunt, ut Sanctus Athanasius Epist. 2. ad Serap. *Qui autem plura istis queris, stultique investigare, malè obtemperat dicenti, ne nimium sis sapiens, ne percellaris; quæ enim Fide tradita sunt, eâ non humanâ sapientiâ, sed auditione Fidei decet comprehendere.* Professi sunt alii mysterium istud sermone nullo exprimi posse, vel intelligi, ut S. Hilar. lib. 1. & 3. de Trin. S. Ambr. lib. 1. de Fide, & S. Aug. lib. 3. de Lib. arb. c. 21. ubi sic habet: *Multa de Trinitatis ineffabilitate dicuntur, non ut ipsa dicatur; alioquin non est ineffabilis; sed ut illis dictis illam dici non posse intelligatur.* Et lib. 15. de Trin. c. 6. *Quis disputandi modus, quem tandem vis intelligendi, atque potentia, quæ vivacitas rationis, quæ acies cogitationis attenderes? . . . hoc unum quod sapientia dicitur Deus, quomodo sit Trinitas? Idèdo doctrinam Evangelicam gentibus videri creditu impossibilem docent alii, ut Orig. Hom. 15. in Exod. Cum confitearis unum Deum, inquit, eademque confessione, Patrem, & Filium, & Spiritum Sanctum asseris unum Deum; quàm tortuosum, quàm difficile, quàm inextricabile videtur hoc esse infidelibus? tum deindè, cum dicis Dominum majestatis crucifixum. Plerisque fuisse occasionem exitii scribunt alii, ut Lact. lib. 4. Instit. cap. 29. ubi ait professionem Fidei in unum Deum, simul & in Patrem, & Filium, multos qui cætera Religionis Christianæ dogmata probabant, in errorem egisse præcipites. Addunt alii Fidei certitudini quodammodo detrahi, cum argumenta quærentur ex ratione; quia Fides nonnisi de invisibilibus datur, seu est argumentum non apparentium Hebr. 11. v. 1. & 1. Cor. 2. v. 6. *Sapientiam loquimur inter perfectos, sapientiam verò non hujus sæculi.* Et proindè non est, quòd in istius mysterii gratiam ex ratione argumenta colligamus.**

2. Quo pacto naturalis ratio hoc mysterium demonstraret? An à priori? At Trinitatis causa excogitari nulla potest, sicut nec Dei. An à posteriori duceretur argumentum? At nulli Personæ divinæ competit effectus proprius, qui cum personis divinis, prout relativè distinctis, necessariò sit conjunctus; nullus enim à Deo oritur effectus ad extra, ut loquuntur, qui non per scientiam, voluntatem, & potentiam producat: acque adeò nihil est in rerum naturâ quod non respiciat Deum, quâ intelligens est, volens, & omnipotens, & proindè quâ unus est Deus.

Ultimò. Myſterium hoc naturæ legibus ſtatim non occurrit conſentaneum, & proinde ex naturâ non eſt repetendum. 1. Naturæ Lex eſt, ut unius rei una ſit eſſentia; nec eadem eſſentia pluribus conveniat: in Trinitate verò trium Perſonarum una eſt eſſentia. Lex altera eſt, ut quæ ſunt uni tertio eadem, ſint quoque eadem inter ſe: in Trinitate verò Perſonæ tres quid unum ſunt uni tertio, nempe eſſentiæ divinæ; & tamen inter ſe diſtinguuntur.

O P P. 1. Myſterium iſtud naturali ratione manifeſtum eſſe, cum ipſis Philoſophis non fuerit incognitum, ex Juſt. in Apol. ad Senat. S. Clem. Alex. lib. 5. Strom. & Orig. lib. 1. de Principiis c. 3. ubi ait à quibuſdam Philoſophis Græcis, & Barbaris cognitum fuiſſe Patrem, & Filium; & lib. 6. contra Celſ. cognitum fuiſſe à Platone Verbum Dei, epiſtolaſque duas in quibus ſuam de Verbo opinionem tradit Plato, prætermiſiſſe Celſum. Sanct. Auguſtinus libro 7. Conf. cap. 9. teſtatur ſe in libris Platoniconum legiſſe, non quidem iſdem verbis, quibus uteretur Eccleſia; ſed hoc idem omnino multis, & multiplicibus ſuaderi rationibus, quòd in principio erat Verbum, & Verbum erat apud Deum. Et lib. 10. de Civit. cap. 23. ex Porphyrio, & Plotino alia refert in gratiam Fidei de Patre, & Filio, & aliquo intermedio. Et lib. 18. c. 23. Vaticinium Sybillæ Erythræ narrat, ſive, inquit, ut credunt alii Cumana, quo vaticinio Chriſti divinitas clarè ſtatuitur. Mercurium Triſmegiſtum Moſe antiquiorem etiam myſterium iſtud docuiſſe quidam contendunt; dum ait Dial. 4. *Monas genuit Monadem, & in ſe ſuum reflexit ardorem.* Et in Serm. ad Aſclepium alia habet huiuscemodi, ex S. Cyr. Alex. lib. 1. c. Julian. Non prætermittam quod argumentum urgent ex præconcep̃tâ de numeri ternarii dignitate ſententiâ, cum apud Ariſtoſt. lib. 1. de cælo, qui, ex Pythagorâ, ternario illo numero contineri omnia definit.

R. 1. cum Orig. lib. 1. de Princip. c. 3. Spiritum Sanctum in Philoſophorum notiâ nunquam veniſſe; nec niſi Scripturarum miniſterio poſſe nos ad illius myſterii fidem adduci.

Reſpondeo ſecundò, Myſterium iſtud à Philoſophis non fuiſſe cognitum; quæ enim protulerunt, attributa quidem ſunt, quæ perſonis tribuuntur, ut potentia Patri, ſapientia Filio, & bonitas Spiritui Sancto; ſed nunquam ſubodorati ſunt trium Perſonarum in unâ naturâ exiſtentium unitatem. Nihil aliud voluerunt Platonici in illis, quæ cap. 1. Evang. Joan congrua dixit Sanct. Auguſt. quàm ideas quaſdam fuiſſe adhibitas à Deo, ut ad earum exemplar omnia formaret: vel ſi quid aliud ſibi voluerunt illi Philoſophi, dicendi ſunt tres Deos conſtituiſſe, quorum alter eſſet ſummus, & ſupremus, & unicus omnium conditor: ſecundus inferior, omnium rerum artifex, & principium: tertius verò adhuc inferioris naturæ, & eſſet mundi anima. Hæc erui poſſunt ex Timæo Platonis, & illius Epiſt. ad Dion. Hermiam, Eraſtum, & Coriſcum; & ita Platonis mentem exponit Euſeb. lib. 11. de Præp. Evang. ex Platonis interpretum ſententiâ. Ita etiam Alcinoi, Plotinus, quem

citat S. Cyrill. lib. 8. contra Julian. & Proclus, qui Comm. in Timæum sententiam Numenii ad Platonis mentem accedere confirmat. Hinc etiam esse Platonis sententiam pluribus probat S. Cyrill. lib. 3. contra Julian. S. August. lib. 12. de Civit. cap. 16. & 17. tres divinitatis gradus ex Platoniorum doctrinâ institui scribit; quæ quidem Platonis, & Platoniorum sententia, varii licet fuerint in suâ Triade exponendâ, Arianismo fundamentum, & materiam præbuit.

3. R. cum S. Justin. in Apol. ad Senat. ex Mose, & ex Scripturis accepisse Platonem, quæ protulit de Verbo, si quid veri dixit; ita quoque Euseb. lib. 11. de Præp. Evang. c. 10. & S. Aug. lib. 2. de Doct. Christ. c. 28. Eandem refert. S. Ambr. sententiam. Non mirum autem, quodd ex Platonis discipulis quidam propius ad Christianorum mentem accedere videantur; cum propagatæ Religionis tempore floruerint, & magnâ cum Christianis Doctoribus familiaritate usi fuerint; ac proinde sua dogmata ad mentem Christianorum explicarint.

R. ad vaticinium Sybillæ cum S. Hieron. lib. 1. contra Jovin. Revelationis donum ob Virginitatis præstantiam Sybillis fuisse concessum, si quid veri tradiderint; sed, ut ut sit, constat acceptum esse divinitus, quidquid de Trinitatis mysterio senserunt, aut scripserunt: ne modò, an Sybillæ revera extiterint, expendamus.

R. ad Trismegistum, nihil aliud velle, quàm unicum à Deo mundum fuisse conditum; nec est magna libri hujus autoritas, cujus author etiamnum incertus est, videturque 2^o nascentis Ecclesiæ sæculo floruisse; idque cum ex multis, tum quodd author iste plurima referat ante illud tempus inaudita, & in usu posita solum apud Christianos istius ævi.

R. ult. eam antiquorum Philosophorum de ternarii numeri excellentiâ sententiam, non ex Sanctissimæ Trinitatis ideâ fuisse repetitam, sed ex istius numeri perfectione, mihi, fateor, omnino incognitâ; nec sanè unquam vel lectione, vel viris in illâ numerorum scientiâ commendabilibus consultis, quæ numerorum esset perfectio toties apud SS. Patres laudata compertum habere potui; vel quæ possent esse perfectionum, aut mysteriorum in numeris secum invicem comparatis fundamenta. Interim cum S. Dion. lib. de divinis Nominibus concludo nullo numero, divinitatis, quæ rationem omnem superat, arcanum aperiri.

INSTR. Illud naturaliter cognitum fuit à Philosophis, cujus à naturâ plurimæ traduntur quasi delineationes; ex imaginibus enim in exemplaris cognitionem facile deducimur: quod autem plurima Trinitatis naturalia dentur vestigia satis constat. S. Athan. naturæ unitatem in tribus Personis, fluvii, & fontis similitudine ostendi credidit. Eandem comparisonem adhuc S. Dion. Alex. ut in Epist. de illius sententia refert S. Athan. Lact. lib. 4. cap. 29. luce, & splendore Solis etiam exhiberi Trinitatem tradit, ut & S. Athan. Orat. 4. contra Arianos, & alibi. Item & calore, & splendore ignis, aut tribus lucernis, quæ revera inter se differunt; lumen tamen idem fundunt, & conficiunt. S. Greg. Naz. Orat. 5. de Theol. Trinitatem similem esse ait catenæ,

quæ una esset, & ex tribus annulis distinctis componeretur; aut Solis radio, qui prout pluribus in locis variè repercutitur, tres varios colores efficit; aut arbori, in qua radix, truncus, & rami differunt, & sunt ejusdem naturæ; aut triangulo, in quo tres anguli sunt à se invicem distincti, & sunt una figura & una species; aut intellectui, voluntati, & memoriæ, quæ eidem insunt animæ; aut quodd in creaturis tria semper occurrant, unitas, æqualitas, & ordo; aut mensura, numerus, & ordo: quæ exempla apud S. Dionys. Alexand. Lactant. SS. Athan. Hilar. Basil Greg. Naz. & Aug. occurrunt.

R. 1. delineationes, aut vestigia rem quidem jam cognitam, aut revocare in memoriam, aut explicare clariùs; modò tamen rei natura cognoscatur aliundè: sed si rei cognitio accepta non fuerit, nihil ad rem cognoscendam conferre. Licet enim v. c. imagini Regis exhibendæ idoneum sit speculum; non idèò tamen Regem exhibebit, nisi Rex coràm obversetur: item si occurrant leonis vestigia, nisi priùs leonem quis noverit, leonem indè non noscet.

2. Si qua vel imago, vel statua proponeretur tam affabrè facta, ut non solum extetnam rei speciem, colores, ac lineamenta nobis adumbraret, sed ipsam ejus naturam exprimeret; vel unico sanè istius imaginis intuitu in archetypi cognitionem sæpè adduceremur. At quæcumque Trinitatis species, & imagines quantumvis perfectæ, nonnisi rudi penicillo eam repræsentabunt. Ità S. Hilar lib. 1. de Trin. *Quibus utimur*, inquit, *comparationes, intelligentia quidem nostra sunt monumenta: sed Deo minus congrua, quæ magis significant, quàm explent intelligendi desiderium.* S. Gregor. Naz. orat. 37. ubi ex sole, & ejus radius ad Trinitatem explicandam comparisonem adduxit, quid à Trinitate alienum sit in illâ comparisonem observat, simulque subjicit rem esse nullam, quæ Deum referre, aut repræsentare possit: *Nisi*, inquit, *forè quispiam eà animi aqutate sit, ut cum unum aliquid ex propria imagine acceperit, reliqua projiciat. Postremò itaque hoc mihi consultissimum visum est, ut missis factis imaginibus illius, atque umbris, ut fallacibus, plurimùmque à veritate remotis, piam ipse cogitationem, fidemque mordicè retineam, &c.*

I N S T. Deus infinitè bonus cognoscitur naturaliter; & proindè perfectissimè communicare se potest: at nulla perfectior est se communicandi ratio, quàm ea quâ Pater Filium, & uterque Spiritum Sanctum producit.

R. ex naturali ratione non habere nos summum bonum necessariò communicare suam naturam totam, nec tribus potius quàm quatuor, & ità ut ratione naturæ non distinguantur illa tria: imò si solâ rationis lance summi boni naturam expendamus; quia non est ex illis, quæ necessariò agunt, liberè tantùm præstare videretur, quæ præstat.

I N S T. Deus est summum bonum: ergò maximè sui diffusivus, non solum ad extrà, sed etiam ad intrà; quia perfectius est posse communicari ad intrà, & ad extrà, quàm ad extrà solum. 2. cum cognoscitur

aliquod principium naturale, cognosci etiam possunt naturaliter, quæ habent necessariam connexionem cum illo principio: communicatio autem ad intrâ maximam habet connexionem cum bonitate divinâ.

R. naturaliter quidem cognosci, Deum posse communicari ad extrâ, non verò ad intrâ. Cum cognoscitur principium naturale, cognoscuntur quidem quæ dicunt habitudinem ad illud principium; quia ejusdem ordinis sunt & principium, & illa habitudo; & cognoscitur principium ut in se est: at verò communicatio interna in Deo ordinis est supernaturalis, nec Deus in hâc vitâ cognoscitur, ut est in se.

INS T. Naturaliter cognoscitur Deus ut infinitè beatus; & sic egere consortio: beatitudo enim sine consortio stare non potest.

R. scire nos Deum esse summè beatum, & proindè nullo egere, quo beatitudo ejus cumuletur; nec tamen nos nosse naturaliter Dei beatitudinem in consortio trium personarum consistere.

OPP. 2. Naturaliter novimus Deum vivere vitâ perfectissimâ, & proindè intellectuali: simul & habere voluntatem perfectissimam: sed qui perfectissimâ intellectione intelligit, & perfectissimâ voluntate vult, tum voluntatis, tum intellectûs producit terminos perfectissimos, & proindè substantiales, utpotè immanentes; nullum enim inest Deo accidens: hi verò termini distinctarum substantiarum rationem habere non possunt; plures alioquin essent Dii: solam igitur personarum rationem obtinent, & proindè personarum pluralitas ratione naturali demonstratur. Hâc aliâ ratione Ethnicis, ne in Judaïsmum labantur, Trinitatem probandam censet in Orat. Catecheticâ S. Greg. Niss. Deum scilicet neque sine ratione esse, neque sine verbo; & quia hominis mortalis mortale verbum est, Dei immortalis immortale est verbum; & quia nonnisi attracto spiritu, aère scilicet, sermonem efficit homo; in Deo spiritus est, non exterior, sed interior, quo verbum firmetur.

R. rationem quidem naturalem demonstrare in Deo voluntatem simul & perfectissimum intellectum; nullatenùs tamen persuadere utriusque potentie terminos produci substantiales: nam præterquamquòd ipsa ratio nihil in Deo relativum suspicatur, nihil in eo detegit, aut videt, nisi quod est absolutum. Neque consentiunt Philosophi omnes tum intellectûs humani, tum voluntatis terminos ab utrâque potentiâ reipsâ distinguere; cum multi ex illis, & gravissimi Philosophi terminum ab actione non sejungant; & nemini unquam in mentem veniret, non multiplicatâ essentiâ terminos substantiales multiplicari: nec etiam quis sibi suadere posset, undè repeteretur discrimen, quod inter illos substantiales terminos incederet. Quàm autem infirma sit ratio à S. Greg. Niss. proposita, satis apertum est: sed uberius de his, quæst. 3. art. 3. ubi de ratione processionum divinarum, & de ratione intellectionis, & volitionis divinæ, differetur.

CONCLUSIO II. Probari potest Trinitatis Mysterium negativè, ut loquuntur, seu ostendi potest non esse impossibile.

Prob. 1. Quod à Deo nobis injungitur credendum; pro impossibili haberi

non debet; Deus enim fallere non potest: & gravissimæ licet opponantur difficultates, quæ mentem concutiant, obsequi debet animus, & rei non solum ut possibili; sed etiam ut existenti assentiri: iniquum enim penitus esset, si iudicii nostri tenuitate, & modulo divina vellemus admetiri.

2. Non difficulter adversariorum argumentis respondetur; probari verò negativè dicitur, quod evincitur non esse impossibile.

Obj. Impossibile censendum, quod naturæ leges conclusione priori relatas penitus evertit, & rationi nostræ omninò adversatur: Trinitatis autem mysterium est hujuscemodi.

R. 1. cum S. Ambros. lib. de Initiand. c. 9. in Christianâ Religione occurrere multa, quæ contra naturam pugnare videntur; quia ordinarias naturæ leges longè superant. S. August. lib. de Utilit. credendi cap. 2. ait res fidei posse facilè *accusari populariter, non autem ita facilè defendi populariter, propter mysteria quæ his continentur, &c.* Cæterum meminisse debemus quantum supra nos emineat omnipotens & arcana Dei virtus, & quàm stultum sit ejus naturam intellectu assequi velle.

2. Impossibile non esse Trinitatis mysterium, seu contradictionem non involvere planum fiet, si naturæ leges mox relatas, quæ perfringi videntur, percurramus. Contra naturæ consuetudinem quidem, sed non contra naturam in tribus Personis unam esse essentiam contendimus: nam præterquamquòd unam naturam, & eandem ideam omnibus hominibus inexistere dixerunt Platonici, licet singuli homines inter se sint distincti: unum etiam numero intellectum in omnibus esse hominibus docuisse fertur Averroës. Econtrà verò à pluribus propugnatur plures esse formas substantiales, ut tres animas in eadem re; & proinde naturæ lumini qui adhærent, & unam naturam in pluribus, & plures naturas in eadem re profiteri non dubitant: sicque non ità à naturæ legibus, aut humanis opinionibus abducitur humana mens, cum ad Trinitatis confessionem excitatur.

3. Qui contendunt hoc mysterium repugnare principio naturaliter cognito, quæ sunt eadem uni tertio, sunt eadem inter se; non advertunt valere tantum principium illud; cum, quæ identificantur alicui tertio, identificantur ei adæquatè sumpto, nec opponuntur relativè: Pater autem divinus identificatur quidem naturæ divinæ; sed non adæquatè sumptæ, seu prout natura divina identificatur Filio; alioquin Pater esset Filius: Pater autem non potest esse Filius, quia relativè opponuntur. Accedit etiam quòd quæ sunt eadem uni tertio, sunt eadem secundum illud tertium: cum ergò dicitur, Pater & Filius sunt idem cum essentiâ divina; igitur sunt idem inter se, absolucè negari potest consequentia, nisi addatur, secundum essentiam divinam, quod verum est, nam sunt unus Deus: at quæ uni tertio eadem sunt, distingui posse ratio ostendit: actio enim & passio res eadem sunt, seu idem motus; tamen sunt duæ relationes oppositæ, & utraque est accidens, & in vario subjecto: relatio enim actionis necessariò est in agente;

agente : in patiente verò passionis relatio. Accidentia , quæ sunt in sub-
jectis numero differentibus , numero quoque differunt : relationes ergò
actionis , & passionis inter se numero differunt ; & proindè differunt rea-
liter inter se , & sunt tamen quid unum uni tertio.

INST. Pater & Filius identificantur in naturâ divinâ adæquatè sum-
ptâ ; quia identificantur divinæ naturæ , quæ est indivisibilis : & sic cum
eâ adæquatè sumptâ sunt unum , & idem.

R. non identificari adæquatè ; quia natura divina est virtute multiplex ,
licet sit indivisibilis ; & potest communicari multis personis. Hinc etiam
fit , ut de eodem virtute multiplici possint dici contradictoria ; quòd quæ
sunt distincta virtualiter , æquivalent multis : at verò unum & idem
non potest esse sibi relativè oppositum , seu sui Pater , & sui Filius
simul.

INST. Omnino rueret tota forma syllogistica , quæ inmittitur huic
principio : Quæ sunt eadem uni tertio , sunt eadem inter se : nam duo
extrema quæ identificantur in conclusione , nunquam adæquatè identifi-
cantur medio termino in præmissis.

R. 1. eam non ruere , quia in tantum conjunguntur inter se prædicatum ,
& subjectum , in quantum uniuntur in medio ; non autem inter se juxta
universam medii amplitudinem conjunguntur. Sic v. c. in hoc syllogismo ,
omnis homo est animal ; Petrus est homo : ergò Petrus est animal ; quia Petrus ,
& animal uniuntur tantum cum homine , prout homo est vivens sentiens ,
non verò prout homo est gradus specificus ; hinc nec Petrus , nec animal
dici species possunt. Secundò , cum attributum aliquod potest secun-
dum aliquid præscindi , secundum illud totum non convenit subjecto.
Animal tribuitur homini , & icitur de animali , quòd sit genus ; ge-
neris tamen ratio homini non tribuitur. Sic quamvis Pater esse dicatur
essentia divina , dicenda tamen non est essentia divina generare , licet Pater
generet ; quòd nimirum inter essentiam divinam , & Patrem , sit distinctio
virtualis .

ARTICULUS SECUNDUS.

Utrum Trinitatis mysterium noverint Judei ?

INDE dubitandi ratio circa quæstionem hanc est profecta , quòd eadem
fides utroque in Testamento viguerit , & Veteris Testamenti autori-
tatibus pluribus mysterium comprobetur. Hanc quæstionem à Sanctis
Patribus expositam proponemus.

CONCLUSIO. Judæorum vulgus Trinitatis mysterium latuit ; nec
ferè , nisi Prophetis , innotuit , iisque , quibus ob vitæ sanctimoniam sin-
gularis è cælo lux fuit oborta.

Prob. 1. pars. Quibus Filius divinus , seu Verbum divinum fuit incognitum ,
& quibus Trinit. mysterium non exponebatur , illos procul dubio latuit illud.

mysterium. Judæorum autem vulgo Dei filius non erat notus, nec mysterium istud illis explanabatur, idque variis de causis.

1. Judæorum vulgo Verbum Divinum erat incognitum: Ex S. enim Ireneo lib. 4. cap. 17. idè à veritate deflexerunt Judæi, quòd Verbum ignorarent, & sine Filio, qui se videndum an iquis præbuerat, possè se cognoscere Deum existimarent. Item ex Euf. lib. 4. de Demonstr. cap. 1. qui esset Messias promissus, non norunt Judæi: *Quippè qui divinam illius naturam ignorarent.* Et cap. 7. Patrem solum ab illis fuisse cognitum addit, & ad unius Patris adorationem à Verbo fuisse institutos.

2. Judæorum vulgo mysterium illud non exponebatur, variis de causis. 1. quòdejus expositio servaretur Christo; seu quia tam reconditam veritatem solius erat Christi edocere, Matth. c. 11. & c. 16. suprà art. 1. citatis. Undè Tert. lib. contra Prax. cap. 13. huic obijcienti, *in antiquis scripturis haberi, ego dixi, vos Dii estis; & nomen illud, Deus, tum Patri, tum Filio fuisse tributum*; atque hinc inferenti duos sic fore Deos; respondet negando illud indè sequi, sed quia sunt unus Deus, Pater, & Filius; illam autem fidem Christi magisterio deberi, *ut ubi venisset Christus tunc & Deus agnosceretur, & Dominus vocaretur At ubi venit Christus, cognitus est à nobis, quòd ipse sit, qui numerum retrò fecerat, factus secundus à Patre, & cum Spiritu tertius, & jam Pater per ipsum plenius manifestatus.*

2. Oeconomiam illà erga Judæos usus fuit Dominus, inquit Eusebius lib. 1. contra Marcell. cap. 1. quòd ab Idololatrià ad unius Dei cultum avocare, & transferre Judæos satis esset: timendumque videretur, ne in Idololatriam exposito sibi mysterio relaberentur.

3. Idè etiam dilata fuit istius mysterii explanatio, ut Novum à Veteri Testamento secerneretur, & ab Ethnicorum superstitione: quod discrimen palàm tradito plebi Judaicæ mysterio penitus fuisset sublatum. Undè Tert. lib. contra Prax. cap. 3. ait Evangelium inter, & Judaïsmum discrimen nullum futurum fuisse constituendum, si trium Personarum fides Evangelio singularis non esset; quod mysterium Filius revelavit & tradidit. *Quæ est, inquit, substantia Novi Testamenti statuens Legem, & Prophetas usque ad Joannem, si non exindè Pater, & Filius, & Spiritus tres crediti, unum Deum sistunt? sic Deus voluit novare Sacramentum, ut novè unus crederetur per Filium, & Spiritum, ut coràm jam Deus in suis propriis nominibus, & personis cognosceretur, qui & retrò per Filium, & Spiritum predicatus non intelligebatur.* Item S. Basil. lib. 2. contra Eunom. ut omnium mysteriorum illustrissimum, Trinitatis commendat mysterium, ut quo à Judæis, simul & Paganis distinguantur Christiani.

Altera conclusionis pars evincitur; Prophetis, scilicet, & viris sanctitate præditis mysterium istud innotuisse; ex eo quod videndi Christi desiderio summo tenebantur, ejusque adventum postulabant. Matth. 13. v. 17. sic Christus ad Apostolos: *Amen quippè dico vobis, quia multi Prophetæ, & Justî cupierunt videre quæ viatis, & non viderunt; & audire*

quæ auditis ; & non audierunt. Joan. 8. v. 56. *Abraham pater vester exultavit , ut videret diem meum : vidit & gavisus est.* Idèd Origen. Hom. 3. in Josue censet duas tribus ; & dimidiam extra Jordanem remansisse ; ut significaretur illis qui ad legem pertinerent , *contigisse quidem scientiam Trinitatis ; sed non integrè , & perfectè , sed ex parte ; quia dispensatio carnis in Christo nondum fuerat impleta.* Concedit autem quandam delineationem habuisse , ut potè quod mysterium in Scripturis contineretur. S. Epiph. lib. 1. de hæres. scribit ab Adamo , Prophetis , & Patriarchis cognitam fuisse sanctam Trinitatem , licet unius Dei cultum Deus Judæis indixisset. *Una tamen & Trinitas semper in illâ singulari divinitate nunciata , creditaque ab illis est , qui ceteris antecellerent ; cujusmodi Propheta , atque eximiâ sanctitate præditi homines fuerunt.* S. Ambros. lib. 1. de Cain , & Abel cap. 8. ait Trinitatis fide ornatum fuisse Abrahamum , cum de eo Joan. 8. dixerit Christus , *Abraham vidit diem meum , & gavisus est.* S. Aug. lib. 2. de Trin. cap. 12. docet Abraham cum tres vidit , Trinitatis figuram , & imaginem conspexisse. Hæc aliàs confirmabuntur , cum probandum erit , fide in mediatorem fuisse olim instructos , qui Deo placerent.

O P P. Ex S. Basil. lib. 5. contra Eunom. ab Hebræis cognitum fuisse Dei Filium , & adoratum ; & proindè novam rationem cultui Christianorum fuisse tantum additam.

R. S. Basil. nihil aliud velle , quàm eos ex Judæis , qui sanctitate præcellerent , hac gratiâ donatos fuisse ; & hac ratione nihil Christiano cultui accessisse ; & , ut habet , Filium & Spiritum Sanctum ab Hebræis fuisse adoratos : quia Creatori suam adorationem deferrebant. Hoc autem nihil aliud subindicat , quàm Filium , & Spiritum Sanctum fuisse in cultu apud Hebræos , quia Deus sunt , non verò ut divinitate eadem cum Patre ornatos venerationi fuisse propositos : nec certè contendit invaluisse apud Judæos publicam de Trinitate professionem , quam , ut suprà notavimus , excludit ; imò & Trinitatis fidem , ut singulare Christianorum privilegium commendat : & ut habet S. Greg. Naz. Orat. 37. *Accessio fidei facta est , quia in Veteri Testamento Pater apertè predicabatur , Filius verò obscurius , in Novo Filius perspicuè annuntiatur.*

I N S T. Judæorum vulgus agnovit Trinitatem , quia cognoverunt Messiam esse Deum , & esse alium à mittente ; non quidem divinitate , quia unus est Deus , sed ratione personæ : nomine siquidem Dei proprio , *Jehova* , Messias nuncupatur , Jerem. 3. & 33. v. 16. Isaïa 28. &c.

R. 1. nomen , *Jehova* , vulgo Judæorum ignotum fuisse ; *Jehova* quidem in Bibliis scribebatur ; sed ex traditione legebant populi , *Adonai* , seu *Dominus* : solius erat summi Sacerdotis semel per annum Sancta Sanctorum ingressi festo expiationis , vocabulum illud proferre in aditu , paucis ex Sacerdotibus audientibus , & procumbentibus ad hanc ceremoniam ; quadraginta per dies summus Sacerdos parabatur : sicque populus rationem divinitatis Messie non tribuebat.

2. Etiam si nomen , *Jehova* , legissent , scripturam non intellexissent :

non enim intelligere illis dabatur: Christi quippè solius erat illud mysterium tradere. Ità Tertullianus libro contra Prax. cap. 13. Quinetiam Matth. 13. v. 11. ipse Christus alloquens Apostolos, ita testatur: *Vobis, inquit, datum est nosse mysteria Regni Dei; illis autem non est datum.* Et v. 13. *Idcò in parabolis loquor eis, quia videntes non vident.* Discipulos etiam Emmaù increpat, Luc. 24. qui, quæ de Messia in Scripturis leguntur, non intelligebant, v. 25. *O stulti, & tardi corde ad credendum in omnibus, quæ locuti sunt Prophete.* v. 27. *Et incipiens à Moyse, & omnibus Prophetis, interpretabatur illis in omnibus Scripturis, quæ de ipso erant.* Et sanè si Messiam Deum futurum esse Judæi novissent, lapidibus Christum, Joan. 8. quòd se Deum faceret, non tentassent obruere; nec Christianos, qui Christum ut Deum adorarent, tam acriter fuissent insectati, ut habetur apud S. Justin. in Dial. adversùs Triph. Hinc Scripturarum bajuli meritò dicti sunt Judæi, & earum onere premi, & eas in Christianorum commoda, & Christianæ Religionis auctoritatem ubique proponere.

IN ST. Novi Testamenti loca minùs evidentè Christi divinitatem probant, quàm veteris Fœderis testimonia; quia quæ sunt novi Fœderis sæpè innuunt, quæ à divinitate aliena sunt; ut quòd Filius sit Pater minor.

R. veteris Testamenti loca pro Messia divinitate nosse nos ut evidentissima, simulque contendere à Judæorum vulgo intellecta non fuisset, & ad retundendam Judæorum pervicaciam admodum esse idonea. Quæ verò Christi divinitati in novo Testamento adversari videntur, Christi humanitatem exprimunt, ut infra quæst. 3. art. 3. exponetur.

IN ST. Judæi, qui humani generis restaurationem, salutis, & meriti causam ad Messiam referebant; cum hæc solius Dei opera sint, Deum illum esse censebant.

R. Judæos expectasse Messiam, non ut humanæ salutis restauratorem &c. sed ut principem potentissimum, qui domitas gentes Judæis subjiceret, eosque omni felicitatis genere cumlaret. Hinc ex populati illà opinione ità ad Christum post resurrectionem Apostoli Act. cap. 1. v. 6. *Si in tempore hoc restitues Regnum Israel?* Qui justī erant apud eos, salutem consequebantur quidem per fidem in Messiam; sed per implicitam, non explicitam, quæ eximiorum tantum erat.

ARTICULUS ULTIMUS.

Quà cautione de hoc Mystério agendum?

CONCLUSIO. Nec levibus, nec nutantibus utendum est argumentis, sed quæ ex revelatione, seu ex Scripturis, & Traditione eruantur.

Cum rationi penitus impervium sit Trinitatis mysterium, rationis ministerio non est utendum, ut ejus asseratur veritas; maximè cum singulare sit Religionis Christianæ mysterium, imò & Christianæ Fidei columna: *Funis*, inquit Orig. Hom. 9. in Exod. *triplex non rumpitur, quæ est Trinitatis fides, ex quâ dependet, & per quam sustinetur omnis Ecclesia.* S. Hilar. lib. 6. de Trin. *Super hanc igitur confessionis petram Ecclesia adificatio est; sed sensus carnis & sanguinis, confessionis hujus intelligentiam non revelat.* Et proinde, nisi solidis nitatur fundamentis columna hæc, corruet tota fides Christiana. Solis ergò Scripturæ, & Traditioni inhærendum, ut hoc sublime mysterium suis solidatum monumentis sit inconcussum. S. Athanas. Epist. 2. ad Serapion. de Spiritu sancto: *Ludentium, inquit, est proprium percunctari quæ scripta non sunt, & dicere, ergò - ne Filius est Spiritus Sanctus, & avus Pater? Ad hunc modum vident, qui habitant in Cæsareâ, & Scytopoli: sufficit ut credatis, quòd non est creatura Spiritus; sed quòd est spiritus Dei: & in hoc Trinitas, Pater, & Filius, & Spiritus sanctus.* Sic S. Basil. Hom. 17. & lib. 5. contra Eunom. Imò, si quid aliud tentetur, perfringi mandata Apostolica S. Athanas. existimat. S. Aug. lib. 1. de Trin. cap. 3. ut cautiones nos reddat, sic monet: *Nec periculosius alicubi erratur, nec laboriosius aliquid queritur, nec fructuosius aliquid invenitur.* Lib. 1. de Civit. c. 23. ait aliam à Philosophis esse apud Christianos docendi rationem: *Liberis enim verbis loquuntur Philosophi, nec in rebus ad intelligendum difficillimis offensionem religiosarum aurium pertimescunt: nobis autem ad certam regulam loqui fas est: ne verborum licentia, etiam de rebus quæ his significantur, impiam gignat opinionem.* Undè & lib. 3. de se ipso ita scribit: *Non pigebit me, sicubi hæsito, querere; nec pudebit, sicubi erro, discere: quisquis ergò audit hæc, vel legit, ubi pariter certus est, perget mecum; ubi pariter hæsitat, quærat mecum; ubi errorem suum cognoscit, redeat ad me; ubi meum, revocet me: ita ingrediamur simul charitatis viam, tendentes ad eum, de quo dictum est: Querite faciem ejus semper.* Quod exemplum si pro lege haberetur, non solum à Catholicâ societate dissensiones omnes removerentur; sed & à societatibus, quæ tanto animorum æstu Ecclesiam Catholicam impugnant.

Ne igitur adversus Ethnicos, Judæos, & Hæreticos hujus mysterii hostes infensissimos ex humano ratiocinio petantur argumenta; nec ratio advocetur, ut mysterii hujus arbitra. Si nobis sit res cum Ethnico, veritas, & Religionis nostræ præstantia suis primò probetur rationibus; & ubi de Religionis veritate constiterit, ex ipsis Religionis principiis ille ad Trinitatis fidem adducatur. Si verò cum Judæis decertandum sit, ex Scripturis excerpantur mysterii fundamenta, & Fidei nostræ veritas; & ubi immutandæ legis necessitate præmissâ, variæ Prophetarum de immutando fœdere certò & clarè dilucidatæ fuerint Scripturæ; quid credendum indixerit novi fœderis institutor, demonstretur. Hanc mox rationem non inibimus: constantes de immutan-

do fœdere Prophetias supponemus ; solisque antiqui Testamenti monumentis adversus Judæos utemur. Si verò contra Hæreticos sit propugnanda veritas, non sola in auxilium vocabitur Scriptura, tum verus, tum nova; sed & ipsa sæculorum antiquorum traditio, & Ecclesiæ auctoritas. Verùm ne argumentorum series inturbetur; contra Judæos, simul & Hæreticos agendum nobis erit: nam quibus autoritatibus premuntur Judæi, iisdem conteruntur & Hæretici. Porro Traditionis antiqua monumenta dum expenduntur, attento animo scopuli graves sunt declinandi: non enim tantum hos in scopulos impegerunt, qui posteriori sæculo antiquas renovarunt hæreses; sed & ex Catholicis Doctoribus quidam, qui adversus veritatem Catholicam ejus hostibus infensissimis arma præbuerunt, non consultò quidem, sed in expendendâ veterum Patrum sententiâ minùs cauti; quos proindè Sociniani nobis opponunt. Quas in examine simili leges æquitas postulet, stabiliemus; tum cuique fiet palàm Deo juvante, ut spes est, ne vel minimum quid in dogmate fuisse à Patribus Nicænis innovatum, & constanti Patrum antiquorum, & superiorum temporum consensio unanimi eos adhæsisse.

Q U Æ S T I O S E C U N D A.

De tribus in Deo Personis.

ERRORES.

NI H I L in hoc mysterio intactum reliquit hominum temeritas. Personarum pluralitatem sustulerunt aliqui: Personarum verò pluralitate admisâ, tres Deos alii induxerunt; seu Deum, qui non esset numero unus, sed specie; alii verò plures Personas agnoverunt, quæ essent Deus; sed quarum prima, seu Pater, esset supremus Deus; Filius verò minor, aut inferior Deus; & Spiritus Sanctus minimus Deus. Consubstantialitatem inter Personas hi penitus sustulerunt; & ex illis quidam Filium, & Spiritum Sanctum creaturas dicere non dubitaverunt.

Inter hæreticos primos est statuendus Simon Magus, qui paulò post Christi mortem, ut habet S. August. lib. de hæres. cap. 1. se omnem Trinitatis Personam esse profiteri ausus est, & in Personâ Patris se legem tulisse, in Filii Personâ conspicabilem se fecisse, & in linguis igneis in Spiritus Sancti ratione super Apostolos descendisse: undè unicam Trinitatis Personam constituebat, quæ ipsemet esset Simon.

Valentinus an. 145. ex S. Athan. lib. de salutari adventu Christi, totam Trinitatem passam esse docuit, Christumque ejusdem cum Angelis fuisse naturæ.

Praxeas Asiaticus omnium primus eandem hæresim Romæ propugnandam an. 196. suscepit, pietatis specie, nempe ut Dei unitatem tueretur.

Hinc Tert. l. contra cum c. 1. sic habet. *Variè Diabolus amulatus est veritatem, & affectavit illam aliquandò defendendo concutere: unicum Dominum vindicat omnipotentem, mundi conditorem; ut & de unico hæresim faciat: ipsum dicit Patrem descendisse in Virginem, ipsum ex eâ natum, ipsum passum, deniquè ipsum esse Jesum Christum.* In Praxeam invehitur Tertull. quòd sibi martyrii gloriam ascriberet, licet in carcerem detrusus, levius, & paucis diebus, fuisset percellus.

Noëtum S. Epiphani. lib. 2. de Hæres. primum Trinitatis adversarium, & ejusdem hæreseos autorem constituit. Hic Ephesius erat, & circa an. 245. prodiiit: patriâ Smyrnæum facit Theodor. lib. 3. Hæres. Fabul. Ille se Moysen, & Fratrem suum Aaronem dicebat. Cum à Presbyteris ut in Trinitatem contumeliosus argueretur, inficiari primò cœpit: Deindè à Presbyteris advocatus, adjunctis sibi sociis decem tria tantum in Trinitate nomina, quæ eidem Personæ convenirent, esse admittenda palàm fuit contestatus; idèò cum discipulis ab Ecclesiâ fuit à Presbyteris expulsus.

Sabellius circa ann. 257. in Libyâ patriâ suâ, & in urbe Ptolemaïde, idem quod Noëtus, fuit professus; ut qui ex Epiph. lib. 2. tom. 1. unicam in Deo admiserit Personam; iisdem fere quibus Noëtus, & Praxeas principiis innixus. S. Aug. lib. de Hæres. cap. 41. miratur quòd ex Noëti, & Sabellii hæresibus duas constituat S. Epiph. cum unius quidem sectæ plura sint tantum nomina. Sabellium nominatim impugnavit S. Dion. Alex. Illius hæreseos sectatores à Romanis dicti sunt Patripassiani, ut notant Eusebiani apud S. Athan. lib. de Synodis.

Inter secundi ordinis hæreticos primus statuendus est Apelles Marcionis discipulus, qui ad an. 146. Deum summum constituit, alterum in tempore fingens à summo illo Deo creatum, cum orbis creandi consilium suscepit. Sic S. Epiph. lib. 1. tom. 3.

Tempore S. Dionys. Romani hæreticos fuisse quosdam docet Sanct. Athanas. Epist. pro Conc. Nicæno, qui cum Sabellianam impugnarent hæresim, tres Deos distinctos asseruerunt. S. Basil. Epist. 70. ad Episc. Gallia, & Italia, hæreticos illos præpotentes primas fides invaluisse testatur, professosque unicum esse supremum Deum, Patrem scilicet; minorem Filium; Spiritum verò Sanctum esse creaturam. Undè qui ab istiusmodi hæreticorum partibus stabant, moralem tantum voluntatis, aut consensus inter Patrem, & Filium unitatem admittebant. Ex S. Greg. Naz. Orat. 1. ad Cledonium, Trinitatem ex magno, majori, & maximo constituebat Apollinaris. Quidam etiam, ut refert S. Hilar. lib. 6. de Trin. divinitatem ut substantiam quandam spectabant, cujus partem obtineret Pater, partem verò aliam Filius; & sic divinitatem varias in partes secabant: quam hæresim lib. contra Auxentium impugnatur; additque aliam, scilicet eorum, qui substantiam quandam primam admittebant, duasque alias substantias, quæ primam illam inter se partirentur.

Tertium hæreticorum genus singularum personarum, primâ exceptâ, divi-

nitatem impugnavit. Hæresis enim nulla Patri æterno divinitatem detraxit, nisi forsân ex errantibus, qui plures Deos induxerunt; quos aliàs cum Idololatriis confutavimus.

Divinitati verò Filii plurimæ adversaræ sunt hæreses. 1. Qui hæretici prioribus Ecclesiæ temporibus Ecclesiam infestant, ut Ebio, Cerinthus, Basilides, & Theodorus, de quo Euseb. lib. 5. Hist. cap. 27. Hi omnes Christum divinitate spoliarent: & cum violatæ fidei Theodorus Coriarius inculcasset, Deo se injuriam non intulisse respondit; sed soli homini, quem negaverat: & sic perfidiæ crimen novo perfidiæ genere, & scelus scelere cumulavit: quare Ecclesiæ communione à Victore Papa fuit interdictus. Hujus discipulus Artemon, ejusque sectatores se antiquis Patribus addictissimos mentiebantur, & per Zephyrinum Victoris successorem in Ecclesiâ, corruptam fuisse prædicationis veritatem dictabant. Iis annumerandi sunt, qui Christum Joseph filium fecerunt, ut Carpocras, de quo S. Epiph. lib. 1. tom. 2. & qui Filium Dei ante Incarnationem extitisse negarunt, inter quos Berillus Bostrensis in Arabiâ Episcopus, apud Euseb. lib. 6. Hist. cap. 33. Eorum omnium hæreticorum hæreses renovavit Paulus Samosatenus, ut referunt Euseb. lib. 7. cap. 27. 28. 29. & S. Epiph. lib. 2. tom. 2. Ob istius hæresim habita sunt Antiochiæ duo Concilia, in quorum altero damnatus est, ac Sede suâ deturbatus; quâ cum cedere nollet; interpellato, qui tùm imperabat Aureliano, vi detrusus est. Hanc hæresim renovavit Phorinus Marcelli Ancyranæ Episcopi discipulus, & Episcopus Sirmienensis, quem damnavit Synodus Sirmienensis an. 350. Mediolan. an. 355. ut refert S. Hilar. lib. de Syn. Hi autem non directè tres personas in Deo negarunt, sed indirectè tantùm: ex quo enim Christo Divinitatem auferunt, unam in Deo personam solùm agnoscunt, & tres negant. Num Marcellus eâ in sententiâ fuerit, aliàs erit expendendum.

Ex his qui Divinitatem Christi impugnaverunt, fuere, qui Verbum non aliquid subsistens dici voluerunt; sed verbum quoddam prolative; & proinde, quod sermonis nostri naturam imitaretur: ita ut ubi fuisset prolatum, esse desineret. Hanc confutat hæresim author tom. 1. in Joan. apud Orig. hujus etiam erroris inculcat Marcellum Ancyran. S. Basil. Epist. ad Episc. maritimos.

Gravissimi omnium Christi Divinitatis impugnatores fuere, Arius, Aëtius, Eunomius, ipsius Arii sectatores, & qui ab eorum partibus steterunt. Arius ex Lybiâ oriundus, & Presb. Alexand. ab Alexandro consecratus, simul & Alexandrinæ cuidam Ecclesiæ præpositus, Christo Divinitatem abstulit, ut testatur ad an. 315. Alexander Episc. Alexand. in epist. ad Episcopos Catholicos. Dotebat autem Deum non semper fuisse Patrem, nec Filium extitisse ab æterno; sed creatum, & factum in tempore; nec essentiâ Patri similem, nec naturâ: item ipsum Verbum & sapientiam, Dei Filium factum esse, ut Deus per ipsum, tanquam per instrumentum nos crearet &c. non esse verum Deum, sed participatione solùm; posse cum converti & mutari, sicut animantia ra-

tione

tione utentia &c. In partes suas Episcopos quosdam Arius adduxit, ut Eusebium Nicomed. Nicænam idè Synodum an. 325. convocavit Constantinus Mag. in quâ proscripta fuit unanimi consensu hæc hæresis. Eam hujus autoritate Concilii oppressam variis in Conciliis renovare tentarunt Ariani. Imperatorem Constantinum perfido solemnique sacramento Arius ludificatus fuit, publicè testatus se Nicænam amplecti fidem; ut communionem Catholicam Imperatoris autoritate obtineret, quam nec ab Alexandro Episc. nec à S. Athan. extorquere potuerat: sed paulò post debitas impietati pœnas dedit; divino quippe judicio improvisâ morte fuit oppressus, cum ventris exonerandi necessitas urgeret, priusquam in Ecclesiam Constant. irrumperet, ut communionem reciperet. Variis artibus usi sunt Ariani, ut Catholicis imponerent; interdum de verbis quæstionem tantum moveri contenderunt, hanc tantummodò scilicet consubstantialis vocem sibi molestam esse testati, & proindè à Symbolo esse amovendam: ut potè etiam quæ à Concilio Antioch. ad an. 272. fuisset proscripta: interdum verba ipsa Arii damnarunt, nempe verbum ex non extantibus constitui, & fuisse tempus, quando non erat; ipsum item verbum, & Deum vocabant, & lumen de lumine: rejecto tamen *consubstantialis* vocabulo. His aut alijs artibus hoc unum tentabant, ut nempe Filium ad creaturarum rationem, superioris tamen ordinis, deprimerent: undè & inferioris Dei nomine Verbum designabant. Aliàs etiam ipsum Nicænum Concil. in sui gratiam interpretari non dubitarunt, ut refert Severus Sulp. lib. 2. Hist. Ariani verò, qui paulò apertius loquebantur, Filium apertè creaturam profitebantur; ex quibus fuere Aëtius Diaconus, & Eunomius ejus discipulus, qui id omnium primus ita professus publicè, ut refert S. Bas. lib. 10. adversus eundem Eunom.

Verùm cresceret in immensum longiùsque protraheretur instituta de Trinitate disputatio, si malas hæreticorum artes, errorisque tam perniciosi capita, progressus, & gradus omnes sigillatim persequeremur: pauca solum notasse sufficiat de illius hæresis origine, ut potè quæ dogmati Catholico firmando plurimum conferant.

S. Athan. Orat. 4. contra Arianos natam hanc hæresim existimat ex non distinctâ duplici in Christo naturâ; & lib. de Synodis refert Armonem hujus jecisse fundamenta.

S. Greg. Naz. docet Orat. 49. hanc hæresim ab Ario excogitatam fuisse; cum sibi suadere non posset Patrem, & Filium ejusdem esse substantiæ; præsertim quòd Pater esset invisibilis, Filiusque tum antiquis, tum etiam humanâ naturâ assumptâ videndum se præbuißet: ex variâ enim illâ formatum assumptione Filium mutationi obnoxium concludebat.

S. Greg. Nyss. Orat. 3. testatur Eunomium in tanta deliria esse lapsum, quòd ea vellet comprehendere, quæ hominis vires superant, verbisque à Scripturâ præscriptis uti noller, aut instar Arii voluerit Verbi generationem expendere.

S. Ambros. tradit lib. 1. de Fide ad Gratian. cap. 5. Arium in hanc hæresim esse prolapsum, quoddam humanæ generationi divinam conferret, & humanis divina metiretur.

Antiqui & ab Ecclesiæ nascentis exordio hæretici Spiritus Sancti divinitatem impugnarunt. Inter eos Valentinus ad Angelorum naturam Spiritum Sanctum redegit ex S. Athan. Epist. 2. ad Serap. ubi eum illius erroris primum authorem facit; & sub finem alios recenset nomine Tropicis, qui Spiritus Sancti divinitatem convellere & labefactare conabantur.

Fuerunt & alii, qui S. Paulum dixerint Spiritum Sanctum, ut docet Orig. Hom. 35. in Luc. Idem 2. de princip. cap. 7. scribit variis dissensionibus fuisse permixtam Ecclesiam à nonnullis, qui cum ignotis quibusdam spiritibus Spiritum Sanctum comparabant.

Arguuntur etiam Montanistæ, quoddam Montanum pro Paraclete habuisse videantur: sed S. Epiph. hæres. 48. quæ est Cataphrygum & Montanistarum, cum Ecclesiâ Catholicâ de Patre, & Filio, & Spiritu Sancto docet consentire Montanistas; aliis licet erroribus adhæserint. Nonnullos ex Montanistis minùs rectè de Trinitate sentire à Theodoro notatur. Ex illis quidam emerferunt, de quibus mentio habetur ad calcem lib. de Præscript. Tertull. cap. 52. hi Spiritum Sanctum à Paraclete distinguebant, & Paracletum plura, & meliora, & majora in Montano, quàm Christum in Evangelio protulisse. Manichæum se esse Spiritum Sanctum jactasse docet S. Aug. contra Epist. fundamenti c. 6. Orig. l. 2. de Princip. cap. 7. testatur quosdam vilibus spiritibus Spiritum Sanctum comparasse; & idè multas turbas Ecclesiis intulisse. S. Athan. Epist. 2. ad Serap. ait ex Arianis quosdam Spiritum Sanctum dixisse non solum esse creaturam, sed unum quoque ex spiritibus ministris, & gradu tantummodò à cæteris differre: ex illis erat Eunom. teste S. Gregor. Nyss. Orat. 1. contra eundem. Hujus hæresis fuit propagator Macedonius Episcopus Constant. à quo Spiritus Sancti impugnatores dicti sunt Macedoniani, etiam Marotoniani à quodam Marotonio Episc. Nicomediæ. Hæc hæresis an. 381. in Conc. Constant. I. proscripta est, & in aliis Conc. de quibus infra.

Istius hæresis originem refert in Arianum dogma S. Athanas. Orat. 4. contra Arian. S. verò Gregor. Naz. in Orat. in laudem S. Athan. asserit, hanc hæresim non statim adeò gravem apparuisse.

Servetus Hispanus Medicus an. 1531. contra veram de Trinitate fidem scripsit, & plurimos ex illis, qui tunc temporis in Lutheri, & aliorum partes à Catholicâ unitate deficiebant, in errores suos traduxit. Inter Serveti discipulos renovatæ sectæ nomen dedit Lælius Socinus Senensis, qui varias peregrinationes, in Galliâ, Angliâ, Hollandiâ, Germaniâ & Poloniâ instituit. In Frisia, promovente Adamo Dorpheni, Servetismus fuit propagatus. Servetus Viennæ Allobrogum in carcerem ob librum de restituto Christianismo fuit conjectus. Ex eo elapsus an. 1553. Genevam se recepit, ibique auctore Calvino, capite fuit amputatus & combustus.

An. 1558. confessioni de Trinitate apud Genevenses Valentinus Gentilis, simulatâ pœnitentiâ, perjurus subscripsit, metu scilicet mortis, & cum eo Paulus Alciatus, & Georgius Blandrata, qui Servetisimum in Poloniâ promovit.

An. 1562. Tiguri Lælius Socinus mortuus est. Hæresim dum viveret, nonnisi disputando proponebat: Nepos ejus Faustus Socinus an. ætatis 23. Lælii supellectilem librariam hæreditario jure acceptam Florentiam transtulit. Ejusdem hæresis fautor Bernardinus Ochinus Senensis Tyguro cum familiâ dimissus in Poloniam venit. An. 1566. Valentinus Gentilis Bernæ capitis supplicio hanc ob hæresim mulctatus fuit.

An. 1568. in Transilvaniâ definitur à Socini discipulis perperam fuisse ab Ecclesiâ Romanâ damnatos clarissimos Patres, Beryllum, Paulum Samofatenum, Arium, Nestorium, Eutychetem, &c.

An. 1570. Faustus Socinus de Scripturæ autoritate scripsit: idem an. 1574. Basileam venit, ubi in excolendâ Lælii patris Theologiâ triennio operam collocavit.

An. 1587. à Blandratâ Transylvaniæ Principis Medico Socinus evocatus fuit. Anabaptistæ, & Antitrinitarii simul consentiebant; sed postmodum divisi sunt; quod hi Christum ut Deum invocari posse assererent, alii negarent.

An. 1597. in Transylvaniâ Georgius Engelinus Trinitatis mysterium impugnavit; sed cum Socino in omnibus non conveniebat.

An. 1598. ob editam de Jesu Christo Salvatore disputationem, vix Cracoviâ Socinus potuit elabi: inde factum, ut ejus discipuli Christophorus Ostorrodus Germanus, & Andreas Veidocus Polonus in Hollandiam venerint, ubi eorum libri fuerunt combusti; ipsisque injunctum, ut intra decem dies recederent. Faustus Socinus mortuus est an. 1604. ætatis suæ 65. Ab eo tempore in propugnandâ illâ hæresi Smalæus, Crellius, Volchelins operam collocarunt.

Ex eorum operibus, & ex Catechesi Cracovianâ majori, liquet hæreseos capita in his posita esse, unicam scilicet esse personam, quæ divinitatem summam habeat, Patrem scilicet æternum: Christum non extitisse, antequam homo esset: Deum tamen verum esse, acceptâ in tempore divinitate, non eâdem quæ Patris est, sed minori & dependenti; Spiritum verò Sanctum non esse Personam, sed virtutem, & Dei efficaciam.



ARTICULUS PRIMUS.

*Utrum sint in Deo tres Personæ , quæ sint
unus Deus ?*

QUÆSTIO non movetur, num eadem Persona Divina tres Personas sustinuerit, videlicet modò Patris, modò Filii, modò Spiritûs Sancti; nam facilè consensisset Sabellius de hâc expositione, ut observat epist. 14. ad Neocæsar. S. Basil. Sed de tribus suppositis agitur, quæ à se invicem distincta subsistant; seu quæ personæ sint inter se distinctæ, simulque in se sint invicem, nempe sint unus Deus. Undè modò terminorum plurimorum usum Theologis familiarem necessitate adacti supponimus, ut quid sit suppositum? quid sit essentia? quos quidem terminos ad planiorem mysterii illius illustrationem infra explicabimus. Sed visum fuit convenientius stabiliri mysterium, priusquam ad mysterii expositionem descenderetur. Probationibus subjungemus solutiones, & subterfugia, quibus uti solent Hæretici; & quæ ad idem argumenti genus pertinent, non dividuntur, ut majori facilitate percipiantur.

CONCLUSIO. Tres sunt in Deo personæ à se invicem distinctæ, quæ sunt unius, & ejusdem substantiæ; seu unus Deus.

Prob. 1. Gen. 1. v. 26. *Faciamus hominem ad imaginem, & similitudinem nostram.* v. 27. *Et creavit hominem ad imaginem suam: ad imaginem Dei creavit illum.* Deus ergò solitarius non est; cum æquales secum personas alloquatur fabricandi operis participes, quæ habeant unam, & eandem Dei naturam, seu sint unus Deus. Per verbum, *Faciamus*, personarum pluralitas inducitur; & per, *similitudinem & imaginem nostram*, substantiæ unitas designatur. Idem nomen, *Elohim*, dixit Deus, & fecit Deus, sæpè ac sapiùs repetitur cap. 1. & cap. 2. Deus ergò fuit idem creans, & alloquens. Isaïa 44. sibi soli Deus tribuit, quòd fecerit cælum & terram. v. 24. *Ego sum Dominus, faciens omnia, extendens cælus solus, stabiliens terram, & nullus mecum.* Inferiorem superior ità non compellare solet, ut Deus Pater personas alias divinas. Gen. 1. *Faciamus hominem &c.* non verò, *Faciam*; nec ad *imaginem meam*, sed *nostram*. Alloquitur ergò Deus personas aliquas secum creationis mundi causas

Nec sanè terram, nec Angelos alloquitur Deus; non enim terra hominis causa efficiens est, nec ad ejus imaginem creatus est homo, sed Dei. De Angelis in creatione silet Scriptura, ut notum faceret ad creationem oculis subjiciendum, non esse necesse de Angelis mentionem fieri. Si Deus Angelos compellasset, cur id in Scripturis expressum non esset? cur eos adhortatus non esset? Deo autem soli, non Angelis, tribuit Isaïas hominis creationem. Persona ergò quam Deus alloquitur, Deus est; cum & Deus dicatur, & fecisse hominem ad imaginem

suam. Undè Angelos Deum alloqui probent adversarii, nullum suppetit argumentum. Qui loquitur, appellatur *Jehova*, *Elohim*, quod nomen Deo creatori maxime proprium est, & soli Deo tribuitur. Voluit Deus edocere se solum esse creatorem; & ideò sanè res creatas non sibi consociavit.

Prob. 2. In utroque Testamento personæ tres traduntur, Pater, & Filius, & Spiritus Sanctus; quandoque nominibus Domini, Verbi, & Spiritûs exprimuntur, Psalm. 32. v. 6. *Verbo Domini cæli firmati sunt: & spiritu oris ejus omnis virtus eorum.* Isaïæ 6. v. 3. *Seraphim clamabant alter ad alterum, & dicebant: Sanctus, Sanctus, Sanctus, Dominus Deus exercituum.* S. Ambr. lib. 2. de Fide cap. 4. sic habet: *Ut ostenderet Trinitatis unam esse Deitatem, cum tertio dixisset, Sanctus, Sanctus, Sanctus, addit singulariter, Dominus Deus Sabaoth.* Aliis in locis ut Zachar. cap. 2. v. 8. duæ personæ designantur: una, quæ mittit: altera, quæ mittitur: utraque dicitur, *Jehova*, & *Dominus exercituum*: ambæ ergò habent eandem essentiam.

Filius, & Pater, Joan. 8. v. 18. & 19. nominantur, & cum illis Spiritus Sanctus. Matth. 28. v. 19. Pater est gignens in essentiâ divinâ. Psalm. 2. v. 7. Hebr. 1. v. 5. & cap. 1. v. 5. Joan. 5. v. 26. Filius genitus est ex iisdem locis; Dei Filius dicitur, Matth. 3. v. 17. & cap. 17. v. 5. Joan. 1. v. 34. Act. 9. v. 20. Unigenitus, Joan. 1. v. 14. & 18. cap. 3. v. 16. Filius proprius, Rom. 8. v. 32. Splendor gloriæ, & character personæ Patris, Hebr. 1. v. 3. Imago Patris, Coloss. 1. v. 15. ita ut qui videt eum, videat Patrem, Joan. 14. v. 9. Spiritus Sanctus à Patre procedit, Matth. 10. v. 20. Joan. 15. v. 26. procedit quoque à Filio, Rom. 8. v. 9. Gal. 4. v. 6. 1. Cor. 2. v. 12.

Prob. 3. A se invicem distinguuntur illæ personæ divinæ, non quidem ratione essentiæ, sed personæ. Dicitur Pater alius à Filio, Joan. 14. v. 16. & 17. Pater Filii, Rom. 15. v. 6. 2. Cor. 1. v. 3. Filius Patris, 1. Cor. 3. v. 23. Spiritus Sanctus Patris, Matth. 10. v. 20. & Filii, Gal. 4. v. 6. esse dicitur. Item Pater cum Filio, Joan. 14. v. 10. & 11. Filius apud Patrem, Joan. 1. v. 1. unus ab altero esse, Joan. 15. v. 16. 1. Cor. 2. v. 12. Pater Filium mittere, Gal. 4. v. 4. dare Spiritum Sanctum, Joan. 14. v. 16. & 17. mittere eum, v. 26. Gal. 4. v. 6. Filius dicitur mittere Spiritum à Patre, Joan. 15. v. 26. Pater per Filium operari, Joan. 1. v. 3. & 5. v. 19. 1. Cor. 8. v. 6. Col. 1. v. 26. Hebr. 1. v. 2.

Prob. 4. Ad divinam, & eandem, & unam in tribus personis substantiam probandam conducerent admodum, quæ scripturæ loca Filii, & Spiritus Sancti divinitatem articulis sequentibus astruunt: sed ea facile quilibet poterit ibi consulere. Satis sit ea modò urgere, quæ ad trium Personarum in substantiâ unitatem in sanctissimâ Trinitatē probandum propius conferunt; simulque demonstrant eas esse numero tres. Matth. 28. v. 19. ait Christus: *Euntes docere omnes Gentes, baptizantes eos in nomine Patris, & Filii, & Spiritus Sancti.* At nisi Filius, & Spiritus Sanctus Patri

æquales essent, & ejusdem cum eo naturæ, ac divinitatis; neque baptis-
mus in eorum nomine, ac professione daretur; neque trium unum ac
singulare nomen esset; *In nomine*, inquit Christus, non in nominibus;
ut & unum Deum per indistinctum divinæ essentia nomen ostenderet,
& personarum discretionem suis demonstratam proprietatibus edoceret.
Pater, & Filius, & Spiritus Sanctus ponuntur eodem nomine, eodem
dignitatis gradu; & de illis eadem eodem modo omnia prædicantur;
& proinde sunt unus, & idem Deus. In Patris, & Filii, & Spiritus
Sancti honorem, cultum, fidem, & obedientiam, æqualiter Baptismi le-
gibus obligamur. Illi tres non sunt Dii, sed unus Deus; quia nulla
res creata ratione sacramenti Deo Patri potest æquiparari. Item in cu-
jus nomine baptizamur, ille verus est Deus; quia in ejus familiam
adoptamur ut filii, Gal. 3. v. 26. 27. Ejus obsequio & cultui astringi-
mur, Matth. 28. v. 20. *Docentes eos servare omnia quaecumque manda-
vi vobis.* 1. Cor. 1. se dicebant Corinthii pertinere, alii ad Paulum, alii
ad Cepham, alii ad Christum: *Numquid Paulus crucifixus pro vobis?
aut in nomine Pauli baptizati estis?* In Dei solius familiam, ut filii
adoptati transferimur, Ephes. 1. v. 5. *Qui prædestinavit nos in adop-
tionem filiorum per Jesum-Christum in ipsum secundum propositum volun-
tatis sue, in laudem gloriæ gratia sue.* Deo verò soli cultum, & ob-
sequium debemus, Matth. 4. v. 10. *Dominum Deum tuum adorabis,
& illi soli servies.* Insuper in Ecclesiam admittimur sacramento Baptis-
mi, cujus author est ille, in cujus nomine baptizamur: præter Deum au-
tem nemo esse potest Sacramenti institutor, seu mediorum, quibus gratia
confertur, & quibus colitur Deus. Item 1. Petri 3. v. 20. sicut arca Noë
octo animas periculo eripuerat; ita nobis salutem confert Baptisma, &
conscientiæ bonæ interrogatio in Deum, & heredes vitæ æternæ nos
efficit; quæ omnia à solo Deo præstari possunt.

Pater autem, & Filius, & Spiritus Sanctus hæc nobis præstant: nos
regenerant; quæ operatio solius Dei est, quâ peccatis abluimur, & Dei
filii efficiamur. Hoc jus nobis tradit Christus, ut filii Dei simus, Joan.
7. v. 12. Spiritus Sanctus quoque regenerationis est author, Joan 3. v.
5. & 6. *Nisi quis renatus fuerit ex aquâ, & Spiritu &c.* Qui rege-
nerationis author est, is pater noster, & Deus est: renascimur enim
ex Spiritu Sancto, ut ex causâ principali; ex aquâ verò, tanquam
ex materiâ, aut instrumento. Paulus 1. Corinth. 11. ut regenerationis
causam principalem Spiritum Sanctum proponit. 1. Cor. 6. v. 11. *Ablu-
ti estis, sanctificati estis, justificati estis in nomine Domini Jesu Christi,
& in spiritu Dei nostri.* 1. Cor 12. v. 13. *In uno spiritu omnes nos in
unum corpus baptizati sumus.* Spiritum Sanctum ut donorum authorem
proposuerat, & cujus beneficio omnes in unum corpus coadunamur,
seu Christi membra evadimus: undè & Titi 3. v. 5. Baptismum vocat
lavacrum regenerationis Spiritus Sancti. Cum ergò Filio, & Spiritui
Sancto cum Patre æquales tribuantur operationes divinæ, & persona-
les; haud dubiè sunt cum Patre unus Deus. Nemo enim operationes

cum Patre æquales edere potest, nisi sit æqualis cum Patre Deus: requiritur enim æqualis divina potestas, & nonnisi Deo essentialia Dei attributa identicè & univocè possunt communicari.

S. Hilarius lib. 2. de Trin. hæc verba: *Euntes docete, baptizantes eos in nomine Patris, & Filii, & Spiritus Sancti*, tam aperta esse existimat, ut paria esse censeat, quæ in verâ Trinitatis fide fideles instituunt. Deinde ex his verbis: *Hic est Filius meus dilectus, &c. Pater major me est. Ego vado ad Patrem, &c. Pater gratias ago: Clarifica me Pater: Tu es Christus Filius Dei vivi*: Sabellum ita constringit, ut responsioni non supersit locus. Alius locus est Joan. 10. v. 30. *Ego, & Pater unum sumus. In duobus istis verbis*, inquit S. Aug. Tract. 36. in Joan. *Quod dixit, unum, liberat se ab Ario; quod dixit, sumus, liberat se à Sabellio. Si unum; non ergò diversi: si sumus, ergo & Pater, & Filius. Sumus enim non diceret de uno; sed & unum non diceret de diversis.* Christus probat oves suas neminem de manu suâ rapturum, quia, inquit, *ego, & Pater unum sumus*. Si autem de solâ voluntatis consensione ageret, nihil concluderet: si de potestatis æqualitate sermonem habeat, idem concludendum superest, ac si de substantiæ unitate loqueretur; cum potentia in Deo, & substantia idem sint. Nec dicit, unum volumus, sed *unum sumus*: quinetiam ex ipsâ Judæorum tunc receptâ sententiâ repetitur argumentum validissimum: ubi enim hæc verba Christus protulit, cum lapidibus obruere statim conati sunt: cum autem causam Christus seiscitaretur; *de bono opere non lapidamus te*, inquit, v. 33. *sed de blasphemiâ: & quia tu, homo cum sis, facis te ipsum Deum*. Intellexerant ergò Judæi hæc verba, *ego, & Pater unum sumus*, naturæ communionem inferre; si autem Patri Filius æqualis non fuisset, facilè hanc à se calumniam depulisset, & debuisset depellere Christus, imò & ab errore Judæos avocare, demonstrando non alio sensu se unum cum Patre asseruisse, quàm Sancti, & Prophetæ fuerint cum eo quid unum, nempe voluntatis consensione. Sed hec ipsum quod Judæi animo conceperant, mirandis suis operibus confirmavit v. 36. *Quem Pater*, inquit, *sanctificavit, & misit in mundum, vos dicitis: quia blasphemas: quia dixi, Filius Dei sum? si non facio opera Patris mei, nolite credere mihi. Si autem facio: & si mihi non vultis credere operibus credite, ut cognoscatis, & credatis quia Pater in me est, & ego in Patre*: proindeque *Ego & Pater unum sumus*. Paulo & Barnabæ divini honores cum deferuntur, ii resistunt, ac se mortales hominibus similes profitentur Act. 14. econtrâ verò existimationem de se, tanquam de Deo, conceptam confirmat Christus. Quis ergò in dubium vocare poterit in Deo pluralitatem Personarum, simul & substantiæ unitatem, si Christo fidem adhibere voluerit?

Alius locus est 1. Joan. 5. v. 7. *Quoniam tres sunt, qui testimonium dant in cælo: Pater, Verbum, & Spiritus Sanctus: & hi tres unum sunt*. Sunt igitur unus Deus tres Personæ, quæ testimonium in cælis ferunt. Locus hic exponetur uberius infrâ.

Prob. 5. Quia unanimis ea fuit Ecclesiæ universæ hanc in fidem consensus ante Nicænum Concilium, & à temporibus Apostolicis; ea omnium Martyrum, & Ecclesiæ Catholicæ doctrina ubique palam exposita. Quis autem non sibi tutò consultum est existimaturus, si cum Apostolorum successoribus, & cum illis, qui tempora Apostolica proximè exceperunt, senserit? Quis è contrario se à verâ Christi doctrinâ alienum non viderit, qui ab illis se discedere fuerit expertus? Audiantur qui propius ad Christum accesserunt; & si tres in Deo personas professi sunt, proficemur & nos; ut eorum quoque sortis partem consequamur. Hæc autem Patrum, Martyrum, & Ecclesiarum omnium per tria priora secula consensus eluceſcet eò evidentius, quòd pro Dei unitate contra Deorum multitudinem propugnandâ plerique scripserint, & fidem suam sanguine fuerint contestati; quòd Judæorum Trinitatis fide divinam unitatem perimi contententium objectiones, tùm & Ethnicorum eâ doctrinâ Deorum pluralitatem aliam induci pugnantium argumenta, tùm & Hæreticorum Trinitatis hostium infensissimorum sophismata susceperint convellenda.

Ex illis Hæreticis alii pro unicâ in Deo personâ decertabant, ut 1^o seculo Simon Magus; 3^o Praxeas, Noëtus, & Sabellius. Alii plures Deos constituebant; sic 2^o seculo Cerdon, Apelles &c. Alii Filio Dei Divinitatem adimere conati sunt; itâ 2^o seculo Carpocrates, & Theodotus; 3^o Beryllus, & Paulus Samosatenus; 4^o incunte Arius &c. Alii tandem Spiritui Sancto Divinitatem negaverunt, ut 2. seculo Valentinus, Montanistæ quidam, & alii; 4^o Macedonius &c.

Jam verò qui veterum Patrum scripta consuluerit, ab istis omnibus pravis dogmatibus statim abhorrebit. Et certè si viri tantæ pietatis Antitrinitariorum opinionibus adhæsissent, non ægrè Judæis, & Ethnicis, & Hæreticis reposuissent, Christianis scilicet de personarum in Deo trium dogmate injuriâ litem moveri: sicque cum Praxeâ, & Hæreticis aliis subito convenissent, tùm de personæ in Deo unitate, tùm de Divinitate Filio, & Spiritui Sancto auferendâ. At ea non fuit antiquorum differendi ratio; quinimò aliena prorsus.

In primis enim à temporibus Apostolicis, quicumque fuerunt unitatis catholicæ participes, ab Ecclesiâ tùm Trinitatis, tùm Divinitatis Filii aut Spiritus Sancti hostes expulerunt.

2. In Deo tres esse personas professi sunt, & ut indubitatum dogma retulerunt 2^o ineunte seculo S. Clem. Rom. S. Ignat. S. Polyc. & eodem jam pro vecto S. Justin. Athenag. S. Iren. & 3^o seculo Tertul. Orig. S. Cypr. S. Greg. Thaum. atque Novatian. Item divinam operandi rationem tribuunt tribus Personis, 2. seculo S. Ignat. S. Justin. Athenag. S. Theophil. Anthioch. S. Iren. & 3. seculo Tert. Orig. S. S. Cypr. Firmilian. & Gregor. Thaum. Attributa quoque divina, seu perfectiones Deo essentielles, ut & adorationem, & latriam singulis personis ascribunt, 2^o seculo S. S. Clem. Rom. Ignat. Polyc. Justin. Athenag. Theophil. Anthioch. Iren. & 3^o seculo Tertul. Unum etiam Deum à Christianis agnoscere.

agnosci, tres licet Personas adorarent, tradunt 2. seculo S. Justin Athen. S. Iren. & 3. seculo Tertull. Orig. S. Cyprian. ac Novatian. Hanc adhuc de Trinitate, & de Dei unicâ in tribus personis substantiâ fidem esse universalem ab initio receptam referunt 2. seculo S. Justin. Athen. S. Iren. & 3. seculo Tertull. Orig. Novatian. Similiter pro Christi divinitate contra Judæos, & hæreticos pugnant S. Justin. Tertull. Orig. Novatian. Tandem substantiæ unitatem illam ineffabilem utcumque delineant 2. seculo S. Justin. Athen. & 3. seculo Tert. S. Cypr. Novatian. Quæ singula, & ampliora longè, fient comperta Patrum veterum doctrinam, deposito partium studio, expendentibus.

S. Clemens Romanus, S. Petri successor, qui, ut cæteri martyres, pro defendendâ Dei unitate occubuit, tres Personas in Deo recenset, & Christum Deum adorat. S. Ignatius Martyr in Antiochenâ Sede sancti Petri quoque successor, personarum divinarum in suis genuinis Epistolis sex sæpè meminit. In Epist. ad Ephes. tribus Personis justificationem ascribit. In Epist. ad Magnes. ait tùm Prophetas antiquos vitæ sanctitatem Christi beneficiis debere: tùm per Christum, Verbum Dei æternum, omnibus Dei unitatem manifestatam fuisse: tùm & Christi Verbo fuisse obsecutos Prophetas. In Epist. ad Trall. de Patre & Filio disserit. In Epist. ad Philadelph. Spiritui Sancto, & Christo, ministrorum institutionem tribuit: Item à Spiritu Sancto accepisse se dicit, quæ de hierarchiâ doceret, & de morum sanctitate: & in iisdem Epistolis, ut videre erit art. sequenti, vocat Jesum Christum, verum Deum, Verbum æternum, Vitam veram, impassibilem ratione naturæ divinæ, omnia animo tenentem, in nobis, ut in Templis, habitantem.

Ab Ecclesiâ Smyrnenfi, in Epist. S. Polycarpi Martyris, traditur sanctissima Trinitas, Pater, & Filius, & Spiritus Sanctus, item unus Deus, & Christi divinitas, ut Dei æterni, omnipotentis, & adorandi. Hæc verba S. Polycarpi Martyris referuntur. *Ob hanc rem te benedico in omnibus, & glorior per æternum Pontificem omnipotentem J. C. per quem tibi, & cum ipso, & cum Spiritu Sancto gloria, &c.* Et paulò post: *Christum namque Dei Filium adoramus, & colimus, &c.* Fit etiam sæpè mentio Trinitatis, ut in fine; per *J. C. gloria Deo Patri, & Filio, & Spiritui Sancto.*

S. Justinus Martyr, qui etiam pro Dei adversus Deorum superstitionem unitate occubuit, Sanctissimæ Trinitatis mysterium sæpiùs commendat, ut dogma in Scripturis traditum, & à Philosophis, ut à Platone, quomodocumque cognitum; ità in Orat. Paræneticâ ad Græcos, ubi ait sub finem, Christum esse eundem cum Patre Deum naturâ, & potentiâ. Item in utrâque Apologiâ, & in Dialogo cum Triphone, in probandâ Christi divinitate laborat. Ejus verba, & probationes adversus Judæos, & Ethnicos, imò & hæreticos, art. sequenti referemus. Satis sit modò observasse S. Justinum pro Dei unitate pugnas, & quæ de tribus Personis, ut eandem divinitatem obtinentibus tradidit, inferere. In Apologiâ ad Antoninum notat ità præcipi in primo Mandato; *Deum suum*

adorabis, atque illum solum coles: nos solum Deum adoramus, & vobis inquit ad Imperatores, *in rebus aliis laei servimus.* In Apolog. ad Senat-
tum sub finem ait, ineffabilis Dei rationem, & verbum, secundum Deum
seu secundam Personam, à Christianis adorari. In Apol. ad Antoninum,
tres Personas recenset, & à Christianis adorari eas docet; atque simul
plurium Deorum cultum repellit; & sic tres Personas esse unum, & eundem
Deum. *Profitemur quidem nos talium qui habentur Deorum esse exper-*
tes, & Atheos; sed non verissimi illius Dei, Patris videlicet justitiæ, &
castitatis, & virtutum aliarum, & ab omni vitiositatis mixtione, &
labe alieni expertes. Verum hunc ipsum, & qui ab eo venit, atque
ista nos, & aliorum obsequentium, exaquatorumque (ad voluntatem
ejus) bonorum Angelorum exercitum docuit, Filium, & Spiritum pro-
pheticum colimus & adoramus; cum ratione & veritate venerantes, at-
que unicuique discere atque nosse volenti, pro eo atque edocti sumus, can-
dide (hec) tradentes.

Addit Christianos pro Atheis non esse traducendos, qui hujus mun-
di conditorem colerent Filium secundum, & Spiritum Sanctum tertium;
subjicitque hanc ob causam Christianos à Gentilibus infantiæ accusari:
quod procul dubio in eorum mentem non venisset, si Christiani Patrem
summum Deum; Christum verò, & Spiritum Sanctum, inferiores Deos
dixissent; cum ipsi sic de suo Jove, & aliis diis sentirent. Et verò fa-
cilè eorum objectionem confutassent Christiani demonstrando ab eorum
placitis se non recedere; sed reponit S. Martyr idè in hunc errorem Ethni-
cos labi, quòd mysterium non caperent: sic verò credere Christianos,
qui à Christo ità fuissent edocti.

Ibidem scribit in trium Personarum nomine nos consecrari: *nam in nomine*
rerum cunctarum parentis, & Domini Dei, & Servatoris nostri Jesu Chri-
sti, & Spiritus Sancti in aqua tum lavantur. Quod iterum repetit ibi-
dem, & addit Spiritum Sanctum per Prophetas res Christi prænuntias-
se, & Christum, antequam homo fieret, cum Moise & Propheis fuisse
collocutum, seque videndum præbuisse. Reprehendit & ibi Judæos, quòd
nec Christum, nec Patrem noscerent. In his igitur familiarem Ecclesiæ
de tribus Personis, quæ sint unus Deus, exponit doctrinam, probatque
Judæos errare, qui censerent patrem aspectabilem se fecisse Judæis, *cum,*
inquit, *Filius Dei esset.* Porro autem si non fuisset idem Deus cum Fi-
lio, gravior longè aberratio fuisset, ut qui inferiorem Deum cum vero
Deo, & superiore confudissent. Alius igitur erat Filius personâ, non
divinitate: ut qui esset Deus Abrahæ. Idem in Dial. cum Triphone
demonstrat Christum, & Filium Dei, & Deum in Scripturis nominari,
& Dominum virtutum; & quæ de summo omnium Domino, ac Deo
dicuntur, ea Christo convenire probat, ut adorationem, &c. Cum au-
tem Tripho ejusque sectatores minimè ferrent Jesum à S. Justino vocari
Deum; tanquam esset alius Deus verus ab illo, qui unus à Judæis colitur,
& qui conditor omnium rerum appellatur: Christianorum fidem expo-
nit his verbis: *Præter hunc factorem omnium alius etiam est, & dicitur*

Deus & Dominus, Filius nimirum ineffabilis, & ingeni, & singularis Dei germen ante creaturas omnino universas à Patre editum virtutem illam esse Dei, ac Deum à Prophetâ nuncupari; non ita ut solis lux solo vocabulo numeratur; sed numero alterum quiddam esse; non tamen recisione, tanquam Patris substantia fecetur; uti cetera omnia divisa atque secta, non sunt eadem atque erant ante sectionem.

Athenagoras in Apol. pro Christianis, sic habet: *Omnis sermo noster Deum unum celebrat conditorem, & Trinitatem Personarum. Idem verbi aeternitatem statuit, simul & ejus cum Patre unitatem, necnon per ipsum omnia esse creata asserit, hæc sunt ejus verba: sed Filius Dei est Verbum Patris in ideâ & efficaciâ; ab ipso enim, & per ipsum facta sunt omnia; cum Pater & Filius unum sint: ita ut Filius sit in Patre, & Pater in Filio per unionem, unitatem, & potentiam Spiritus: siquidem mens & Verbum Dei, Filius Dei est. Addit Dei Filium non esse factum, seu creatum; sed ex substantiâ Patris genitum; Primigenia hic est Patris progenies, quæ, non ut facta; à principio enim Deus, qui est mens aeterna, habebat in se ipso λόγος, id est rationem, cum aeternum sit rationalis. Addit adhuc omnibus fidelibus hoc unum esse votum, ut Trinitatis mysterium intelligant: Quem, utpotè Deum, cum Verbo suo, cognoscere optamus; ut quanam Filii ad Patrem sit unio intelligamus, quid Pater cum Filio communicet, quod sit Spiritus, quæ unitas trium, quæ discretio unitorum, Spiritus scilicet, Filii, & Patris: Et infra fidem Christianam sic describit. Quippè ut Deum asserimus, & Filium ipsius Verbum, & Spiritum Sanctum, qui secundum potentiam vocantur Pater, Filius, & Spiritus. Filius enim Patris mens, Verbum, & Sapientia est. Ut lumen ab igne profluit. Alia addentur art. sequentibus. Hæc Athenagoras de Deo Patre, Filio, & Spiritu sancto in Apol. in quâ adversus Ethnicos probavit, Deum unum esse; Dei naturam in varias partes non posse secari; Deos non posse existere, ut ab Ethnicis fingebantur; unum à Christianis coli Deum, qui Pater esset, Filius, & Spiritus Sanctus. Adjicit tandem hunc Deum Patrem, & Filium venerari Christianos; *Ejus Verbum, inquit, seu verum Deum veneramur. An ita dissenserint fidei Christianæ defensores? nisi hæc Ecclesiæ fuisset fides, quæ ad nostra tempora feliciter est propagata.**

S. Theophilus Antioch. lib. 2. ad Autol. scribit Verbum esse æternum, ex substantiâ Patris, Deum verum; ipsumque Trinitatis mysterium in creatione fuisse delineatum per dies, qui luminarium creationem anteverterunt. *Tres dies, qui præcessere creationem duorum luminarium, Trinitatis mysterium sacrosanctum representant, videlicet Deum, sermonem, sapientiam: ita ut Dei nomine, Patrem, per sermonem, & sapientiam, Filium, & Spiritum Sanctum significet. Infra docet per hæc verba: Faciamus &c. Patrem ad Filium, & Spiritum Sanctum habuisse sermonem: hæc verba ad neminem alium, quàm ad suum sermonem sapientiamque direxit. Hoc igitur dogma receptum erat, tres scilicet in Deo esse personas in eadem naturâ.*

S. Iren. locis hîc, & art. sequenti citandis, Trinitatis mysterium tradit; asseritque eam esse fidem totius Ecclesiæ, Christum nempe ut Deum verè ubique adorari; Verbum esse æternum; & impios esse Valentinianos, qui adversus hoc mysterium pugnarent; tandemque Filium verum esse Deum, & Spiritum Sanctum. Lib. 1. cap. 2. docet fidem in tres personas ab Apostolis Ecclesiæ traditam esse, & ubique scribit fuisse annunciatam: *Ecclesia enim per universum orbem usque ad fines terra seminata, & ab Apostolis, & à Discipulis eorum accepit eam fidem, qua est in unum Deum Patrem omnipotentem. . . . & in unum Jesum Christum Filium Dei, incarnatum pro nostrâ salute; & in Spiritum sanctum, qui per Prophetas predicavit dispositiones Dei, & adventum, & eam, qua est ex Virgine, generationem, & passionem, resurrectionem à mortuis ad recapitulanda universa, & resuscitandam omnem carnem humani generis, ut Christo Jesu Domino nostro, & Deo, & Salvatori, & Regi, secundum placitum Patris invisibilis omne genu curvetur.* Cap. 3. ejusdem lib. docet hanc fidem ab Ecclesiâ custodiri diligenter, quasi unam domum inhabitaret, & unius esset cordis, & animi: *Et consonanter hac predicat, & docet, & tradit, quasi unum possidens os.* Lib. 2. cap. 35. tradit Valentinianos non solum in fabricatorem irreligiosos esse, sed & in Christum, & Spiritum sanctum. Cap. 47. ait à Filio, & Spiritu sancto profectas esse Scripturas sacras, quæ sunt authoritatis divinæ. Et cap. 55. addit per Filium, & Spiritum sanctum cælum, & terram, & mariâ, & omnia quæ in eis sunt, Patrem creasse. Lib. 3. cap. 6. *Nemo igitur alius, quemadmodum predixi, Deus nominatur, aut Dominus appellatur, nisi qui est omnium Deus, & Dominus. . . . & hujus Filius Jesus Christus Dominus noster.* Et cap. 8. asserit ab Apostolo tres personas tradi, earumque varias operationes delineari, nempe Patrem per hæc verba, *super omnia*; & Filium his verbis, *per omnia*; & Spiritum sanctum per hæc, *in omnibus*. Lib. 4. in Præfat. creationem dicit esse opus Dei, nempe Filii, & Spiritûs sancti, quibus & dixit Pater, *Faciamus hominem*. Cap. 5. *Qui super se, inquit, aliquem habet superiorem, alteriusque subest potestati, hic neque Deus, neque magnus Rex dici potest.* Cap. 11. *Qui igitur à Prophetis adorabatur Deus vivus, hic est vivorum Deus, & verbum ejus qui locutus est Moyse &c.* Cap. 14. sub finem ita concludit: *Ab initio assistens Filius suo plasmati, revelat omnibus Patrem, quibus vult, & quando vult, & quemadmodum vult Pater; & propter hoc in omnibus, & per omnia unus Deus Pater, & unum Verbum, & unus Filius, & unus Spiritus, & una fides, & salus omnibus credentibus in eum.* Cap. 19. ut probe Angelorum ministerium ad creationem adhibitum non fuisse, nec ad creaturarum administrationem requirit, sic habet: *Copiosum & inenarrabile ministerium. Ministras enim ei ad omnia sua progenies, & figuratio sua, idest, Filius, & Spiritus sanctus, Verbum, & sapientia, quibus serviunt, & subiecti sunt omnes Angeli.* Cap. 6. veram in Patrem, & Filium, & Spiritum sanctum fidem pluribus extollit.

Cap. 66. ità scribit: *Semper eundem Deum sciens, & semper eundem verbum Dei cognoscens, etiamsi nunc nobis manifestatus est; & semper eundem Spiritum Dei cognoscens &c.* Alia sequentibus artic. referentur.

S. Clem. Alex. Trinitatem personarum, simulque unam Patris, & Filii, & Spiritus sancti divinitatem, in omnibusque aequalitatem sapiùs docet. Lib. 1. Pedag. cap. 6. hæc habet: *O miraculum mysticum! unus quidem est universorum Pater: unicum est etiam Verbum universorum; & Spiritus sanctus, unus, & ipse est ubique.* Item lib. 3. cap. 12. *Laudemus unum Patrem, & Filium; Filium, inquam, pedagogum, & magistrum, unà cum sancto Spiritu, qui unus est omnia; in quo omnia; per quem omnia unum; per quem est, quod semper est.* Igitur personæ tres sunt quid unum in potentiâ, immensitate, adoratione, & affectu. Sic de Christo lib. 1. Pedag. cap. 8. *Nihil ergò odio habet Deus, sed neque verbum; utrumque enim unum est, nempe Deus: dixit enim, in principio erat Verbum.* Et paulò post vocat cum humanitatis Dei sincerum adiutorem. Cap. 3. *In omnibus prodest, & in omnibus juvat Dominus, & tanquam homo, & tanquam Deus: peccata quidem remittens, ut Deus: ne peccemus autem pedagogi ritu instituens; ut homo.* Lib. 5. Strom. neque Patrem absque Filio; nec Filium absque Patre; nec credi in Patrem, quin credatur in Filium, sic instituit: *Jam verò neque est cognitio sine fide, neque fides sine cognitione; sed neque Pater est sine Filio: simul enim cum eo quod est Pater, est Filii Pater; Filius autem verus est de Patre magister; & ut credat quis Filio, oportet nosse Patrem, ad quem refertur etiam Filius.* Et rursus, ut Patrem priùs cognoscamus, oportet credere Filio, quoniam docet Dei Filius. Addit ibidem à Platone in Timæo descriptam fuisse sanctam Trinitatem. Igitur Deus unus est cum Patre Filius, à quo nequit separari; quia sunt unius essentia; & idèò necesse est in eum credi, ut in Patrem. Lib. quoque 7. Strom. sic ait: *unum esse patrem, & filium; unum autem esse Deum, per eos, qui quarunt faciem Dei Jacob, indicatum est, quem solum esse Deum patrem bonum exprimit Servator noster, & Deus.* Docet adhuc varias precum horas, tertiam, sextam, & nonam, esse Trinitatis monumentum. *Jam verò, inquit, triplicem horarum divisionem, que totidem sunt honorata precibus, sciant qui norunt beatam sanctarum mansionum trinitatem.*

Tertull. lib. contra Prax. cum confutat ut hæreticum, quòd Patrem, Filium, & Spiritum sanctum, unam & eandem esse personam assereret, ut Deorum pluralitatem declinaret. Sic ergò ea erat ubique recepta fides, tres scilicet esse personas adorandas, licet unus esset Deus: ex eo verò quòd tres personæ unus essent Deus, sic inferebat Praxeas: ergò sunt unica persona; vel certè multiplex erit Deus, si tres personæ sint à se invicem distinctæ. *Variè Diabolus amulatus est, inquit Tertull. veritatem; affectavit illam aliquandò defendendo concutere; unicum Dominum vindicat omnipotentem mundi conditorem, ut & de unico hæresim faciat; ipsum dicit Patrem descendisse in Virginem, ipsum ex*

eâ natum, ipsum passum; denique ipsum esse Jesum Christum. Cap. 2. asserit à nascentis Ecclesiæ exordio viguisse fidem in tres personas à se invicem distinctas, quarum una sit Pater; altera Filius à Patre procedens, & incarnatus; altera verò Spiritus sanctus à Filio missus. Unicum quidem Deum credimus; sub hac tamen dispensatione, quam œconomiam dicimus, ut unici Dei Filius sit & sermo ipsius, qui ex ipso processerit, per quem omnia facta sunt, & sine quo factum est nihil. Hunc missum à Patre in Virginem, & ex eâ natum hominem, & Deum; filium hominis, & filium Dei, & cognominatum Jesum Christum. Et infra. Qui exinde miserit secundum promissionem suam à Patre Spiritum sanctum Paracletum, sanctificatorem fidei eorum, qui credunt in Patrem, & Filium, & Spiritum sanctum. Hanc regulam ab initio Evangelii decurrisse, etiam ante priores quosque hæreticos, nedum ante Praxeam hæsternum probabit tam ipsa posteritas omnium hæreticorum, quàm ipsa novellitas Praxeæ hæsterni.

Hac præscriptione hæreticam illam opprimi posse novitatem contendit, & satis esse ad confutandum illud dogma, quòd recens & inauditum huc usque fuerit; aggredi tamen se uberiores mysterii expositionem, quæ tùm ad illustrandam, tùm ad corroborandam Christianorum fidem posset conducere. Cap. 10. probat Patrem non esse Filium, nec Filium posse dici Patrem, nec eandem cum ipso esse personam. *Habeat necesse est Pater Filium, ut Pater sit: & Filius Patrem, ut Filius sit. Aliud est autem habere, aliud esse: verbi gratiâ, ut maritus sim, habeam oportet uxorem, non ipse mihi ero uxor. Sic etiam ut Pater sim, Filium habeo, non ipse mihi ero Filius. Et ut filius sim, Patrem habeo, non ipse mihi ero pater.* Cap. 11. hæreticos interpellat, ut scripturarum autoritate opinionem suam confirment; sicut ipse veritatem Catholicam ex iisdem scripturis elicit. Cap. 12. citatis verbis Gen. *faciamus &c.* sic habet: *Fallit, aut ludit; ut, cum unus, & solus, & singularis esset, numerosè loqueretur.* Cap. 21. scribit ab Apostolis Trinitatis fidem esse acceptam; & citatis illis verbis Joan. 1. *In principio erat sermo,* sic habet: *indubitanter alius ostenditur, qui fuerit à principio, alius apud quem fuit, alium sermonem Dei, alium Dominum, licet & Deus sermo, sed quâ Dei Filius, non quâ Pater: alium per quem omnia, alium à quo omnia dispositione alium, non divisione.* Cap. 22. idem probat his verbis Joan. 10. *Ego & Pater unum sumus;* hæc sunt ejus verba: *Unum dicit neutrali verbo, quod non pertinet ad singularitatem, sed ad unitatem, ad similitudinem, ad conjunctionem, ad dilectionem Patris, qui Filium diligit, & ad obsequium Filii, qui voluntati Patris obsequitur; unum sumus, dicens, ego & Pater, ostendit duos esse, quos equat & jungit.* Et cap. 26. probat Filium non esse Patrem, nec Spiritum Sanctum esse Filium aut Patrem; quòd res non sit ipsa res, cujus est, & à quo est; sicut ergo sermo Dei non est ipse cujus est, ita nec Spiritus; & si Deus dictus est, non tamen ipse est, cujus est dictus. Nulla res alicujus, ipsa est, cujus est. Planè, cum quid ex ipso est, & sit

eius est, dum ex ipso sit, potest tale quid & cuius est. Et ideo Spiritus Deus, & sermo Deus; quia ex Deo, non tamen ipse ex quo est. Quod si Deus, Dei tanquam substantiva res, non erit ipse Deus, sed hactenus Deus, quia ex ipsius Dei substantiâ, qua & substantiva res est, & ut portio aliqua totius; multò magis virtus altissimi, non erit ipse altissimus; quia nec substantiva res est, quod est Spiritus; sicut nec sapientia, nec providentia; & hac enim substantie non sunt, sed accidentia uniuscuiusque substantie.

Eodem in capite ex formâ Baptismi novum argumentum colligit. Mandans, inquit, ut tingerent in Patrem, & Filium, & Spiritum Sanctum; non in unum; nam nec semel, sed ter, ad singula nomina in personas singulas tingimur. Et cap. 29. ait Patris Filium passum esse, & mortuum; non Patrem: naturamque Filii, divinam nempe, esse immortalem; mortalem verò humanam ab eo assumptam: Item Spiritum Sanctum in nobis nihil pati; sed tolerandi vires suppeditare. Cap. 30. Si Pater erat qui patiebatur, ad quem Deum exclamabat Filius, cum dixit, Deus Deus? Lib. de Bapt. omnem Baptismi virtutem ex trium Personarum divinarum nominibus repetit. Cap. 6. loquitur de ablutione delictorum, quam fides impetrat ob signata in Patre, & Filio, & Spiritu Sancto; nam si in tribus testibus stabit omne verbum, quantò magis dum habemus per benedictionem eosdem arbitros fidei, quos & sponsores salutis; sufficit ad fiduciam spei nostra etiam numerus nominum divinarum. Subjungit adhuc. Ubi tres, id est, Pater, & Filius, & Spiritus Sanctus, ibi Ecclesia; qua trium corpus est. Lib. de pudiciâ cap. 21. de Ecclesiâ disserens, ita loquitur de Trinitate, uno Deo: Nam & ipse Ecclesia propriâ & principaliter ipse est Spiritus, in quo est Trinitas unius divinitatis, Pater, & Filius, & Spiritus Sanctus.

Orig. Hom. 5. in Exod. ait istius mysterii fidem admodum difficilem esse creditu; cum confitearis, &c. Vide suprâ art. 1. Idem Hom. 13. in Levit. divinitatis unitatem, simul & personarum numerum sic exprimit. Nunc autem unus quidem est panis; una enim voluntas est, & una substantia; sed dua sunt positiones, id est dua personarum proprietates: illum enim Patrem, qui non sit Filius, & hunc Filium dicimus, qui non sit Pater. Hom. 10. in Numer. ait summam perfectionem esse in cognitione mysterii istius. Hom. 12. in cap. 1. Reg. asserit excelsa dici non posse, nisi de Patre, Filio, & Spiritu Sancto. Hom. 8. in Exod. in tres personas fidei professionem in Baptismo fieri docet: *Dixi*, inquit, *valedicimus*, dum baptizamur; solum confitemur Deum Patrem, & Filium, & Spiritum Sanctum; sed hoc confitentes, nisi toto corde diligamus dominum Deum nostrum, & totâ animâ, & totâ virtute adhareamus ipsi, non sumus effecti pars domini. Hom. 1. in Isai. docet ideo ter Sanctus ab Angelis proferri, ut Personarum Trinitas, & naturæ unitas designarentur. Lib. 8. contra Cels. hanc Celsi objectionem refellens, scilicet non esse cur Christiani Ethnicis exprobrarent & vitio verterent, quòd Deo, & Heroibus cultum exhiberent; cum & ipsi Deum, & Christum adorarent; ita respon-

dei : si Celsus intellexisset illud , Ego , & Pater unum sumus : Et illud in preceatione dictum à Filio Dei , sicut ego & tu unum sumus ; non putasset nos & alium colere , præter Deum univerforum Dominum. Ait enim , Pater est in me , & ego in Patre : quod si quis his motus , verebitur ne forte transfugiamus ad eos , qui negant duas esse substantias Patrem , & Filium ; audiat illud : erat autem omnium credentium cor unum , & anima una , ut contempleretur illud dictum , Ego & Pater unum sumus. Unum igitur Deum , sicut rationem reddidimus , Patrem & Filium colimus , constanterque stamus contra alios , non recens exortum , quasi prius non fuerit , niniis honoribus extollimus. Credimus enim ejus verbis dicentis : Antequam Abraham natus esset , ego sum : Itemque , ego sum veritas. Nec est quisquam nostrum tam illiberali ingenio , ut opinetur quod veritatis essentia non fuerit ante adventus Christi tempora. Itaque religiosè colimus Patrem veritatis , & veritatem Filium , duos quidem substantiâ , unum verò concordia , consensu , voluntatisque identitate : adeo ut quicumque vidit Filium , qui est splendor gloriæ Dei , caracter ejus substantia ; viderit in ipso Deum , & in imagine Dei.

Ergo objectio à Celsò instituta nullius momenti erat , videlicet à Christianis adorari plures Deos , Patrem nempe , & Filium ; cum in eorum fide Pater , & Filius essent unus Deus ; & Filius esset æternus , ut Pater.

S. Cyprianus docet tres personas unum esse Deum , & hanc esse fidem necessariò tenendam , & ubique vigere : sic in Epist. ad Jubaianum , ubi ait considerandam esse fidem eorum qui foris sunt , ut Patristianorum , Appellianitarum , Marcionitarum &c. Si eundem Patrem , eundem Filium , eundem Spiritum , eandem Ecclesiam consenserunt nobiscum. Igitur ea fides exigebatur ; quâ quidem ratione utitur ad probandum Baptismum apud hæreticos non confecti ; quia baptizatus non potuit fieri templum Dei : Si Creatoris ; non potuit ; quia in eum non credidit : si Christi ; nec ejus fieri potest templum , qui negat Deum Christum : si Spiritus sancti ; cum tres unum sint , quomodo Spiritus sanctus placatus esse ei potest , qui aut Patris , aut Filii inimicus est ? Nec sufficere probat Baptismum in nomine Christi. Quando ipse Christus gentes baptizari jubeat in plenâ & adunatâ Trinitate. Item lib. de Orat. Dominicâ , in hæc verba , Et remitte nobis debita nostra &c. fidem in sanctam Trinitatem ita commendat : Sacrificium Deo majus est pax nostra , & fraterna concordia , & de unitate Patris , & Filii , & Spiritus sancti plebs adunata. In Ep. quoque ad Magnum sic habet : Si quis illud opponit , ut dicat eandem Novatianum legem tenere , quam Catholica Ecclesia teneat ; eodem Symbolo quo & nos baptizare ; eundem nosse Deum Patrem , eundem Filium Christum , eundem Spiritum sanctum : nec hoc adjuvare tales potest ; nam & Chore , & Dathan , & Abiron , cum Sacerdote Aaron , & Moyse eundem Deum noverant , pari lege & religione viventes unum & verum Deum , qui colendus atque invocandus fuerat , invocabant. Idem S. Cyprian. lib. de unitate Ecclesiæ ait inter tres personas absolutissimam esse unitatem :

Hi

Hi tres, inquit, unum sunt. Addit etiam ex eâ unitate proficisci Ecclesiæ unitatem, quæ nullatenus scindi potest.

Sanctus Gregorius Thaumaturgus referente Sancto Basilio Epistolâ sexagesimâ-quartâ, Sabellianismum, qui purus erat Judaismus, Neocæsareæ oppressit; & ab eo ad Musonjum usque illibata fidei Trinitas in Ecclesiâ Neocæsariensi viguit. Referente Sancto Gregorio Niss. in vitâ ejusdem Sancti, veram Trinitatis, & consubstantialitatis fidem à S. Joanne per revelationem accepit S. Gregor. Thaum. quæ fidei descriptio eximia ab eodem Sancto exscripta, in Ecclesiâ Neocæsariensi scribatur; eaque ideo Ecclesiâ ab Arianorum hæresi tuta fuit.

Novatianus lib. de Trin. Ecclesiæ fidem refert de Trinitatis mysterio ubique receptam; & personarum in Deo pluralitatem, simul & substantiæ unitatem probat. Ejus, & utriusque Dionysii, Romani scilicet, & Alexandrini, item & Lactantii loca att. sequentibus afferentur. Cæteri verò Patres, qui subsequuti sunt, ut SS. Athan. Hilar. Cyrill. Hierosolym. Basil. Gregor. Nazian. Gregor. Niss. Epiphan. eadem ferè argumenta adhibent, ut veritatem catholicam asserant. Addimus pro hæreticis fuisse traductos quorquor ab eâ fide defecerunt, qualis fuit inter alios Noëtus, de quo hæc refert S. Epiphan. lib. 2. tom. 1. *Inter hæc beata memoria Presbyteri ejus rei famâ permoti hominem advocant, deque his omnibus interrogant utrumnam tam contumeliosum in Patrem dogma proposuisset. At ille coram Presbyterorum consensu productus inficiari cœpit. Primò, quod ante ipsum nemo atrox illud, atque exitiale virus evomisset. Postea verò, cum rabiem suam nonnullis, ut ita dicam, aspersisset, ac decem ferè homines sibi adjunxisset, majorem in superbiam, atque audacior factus, palàm hæresim suam disseminavit. Proinde rursum iidem illi Presbyteri, tam ipsum, quàm qui se ad eum infelicitè aggregarent, arcessunt; atque iisdem de rebus sciscitantur. Ille cum grege suo frontem perfricans, audacter contradicere cœpit; quid, inquit, malè feci? unum Deum veneror, unum novi; nec præter ipsum alterum natum, passum, mortuum. Ad quam opinionem cum constanter adheresceres, eum pariter atque ejus discipulos ab Ecclesiâ pellunt.*

Præterea novitatis circa sanctissimam Trinitatem incusatus Praxeas à Tertulliano Romæ hæresim revocare fuit coactus. Sabellius à S. Dionysio Alex. novitatis & hæreseos hanc ob causam pariter fuit damnatus. Item Paulus Samosatenus in utrâque Synodo Antiochenâ fuit accusatus. Deindè in Nicæno Concilio Arius. Ubique igitur proscribebatur, ut blasphemum doctrinam fidei de sanctissimâ Trinitate opposita. Hanc adeò constantem unius substantiæ, sive naturæ in tribus personis fidem supponunt veteres, ut variis expositionibus eam illustrarint S. Justin. Athen. Tertull. S. Cypr. Novat., &c. Deus unus retinebitur, si Filium, & Spiritum Sanctum ad unam causam referamus, non autem componamus, nec commisceamus; & si unam eandemque divinitatis, ut ita loquar, motionem, & voluntatem, essentiæque identitatem intelligamus.

Alias rationes ex æqualitate Patres antiqui repetunt. Si enim, inquit,

in omnibus divinæ personæ sunt æquales, cum quicquid in Deo est, Deus sit, ipsas personas divinas unius & ejusdem substantiæ esse compertum sit: quod autem nihil distinctum, quod substantiam, in eis sit; simulque inter eas summa sit æqualitas; pater ex eo quod Pater, & Filius simul peccata condonent, & nihil sit quod simul non præsent; ac ut uberius dicatur, nullum sit attributum divinum absolutum, in quo non convenient; item etiam quod unus & idem honor eis deferatur, ut vidimus ex Origene. Et verò uti probat S. Aug. Epist. 66. ad Maximum, divinitas in tribus est personis, nec major, nec minor, sed eadem. *Neque enim Pater, inquit, ut haberet Filium de seipso, minuit seipsum; sed ita genuit de se alterum à se, ut totus maneret in se, & esset in Filio tantus, quantus & solus. Similiter & Spiritus Sanctus integer de integro, non procedit unde procedit, sed tantus cum illo quantus ex illo, nec minuit eum procedendo, nec auget habendo.* Item lib. 1. de Doctr. Christi. cap. 5. *In Patre unitas, in Filio æqualitas, in Spiritu Sancto unitatis æqualitatisque concordia: & tria hæc unum, omnia propter Patrem, æqualia omnia propter Filium, connexa omnia propter Spiritum Sanctum.*

Aliam rationem alii repetunt ex eorum conjunctione, quæ dissolvi nequit, ut S. Athan. in Apol. & S. Dionys. Alex. Cum enim Sabellianismi argueretur S. Dionysius, quod innominato Filio solius Patris meminisset; sicque videretur Patrem non alium à Verbo fecisse; hanc calumniam diluit, & respondet Patrem, & Filium, & Spiritum Sanctum, à se invicem seungi non posse; & in Patris, Filique manibus esse Spiritum Sanctum; sed ita ut neque à mittente, neque à ferente segregetur. Et infra: hoc scilicet patet unitatem, quæ divisibilis est, in Trinitatem dilatamus, & Trinitatem, quæ diminui non potest, in unitatem contrahimus. Aliam & validissimam rationem ducunt alii Patres ex naturæ divinæ unitate, ut S. Gregor. Naz. Orat. 32. & S. August. Epist. 66. ad Maximum.

Ex iis ergo certò inferendum superest, sanctissimæ Trinitatis fidem, & consubstantialitatem apud antiquos constantem fuisse.

Objectiones ex Scripturâ Sacrà solvuntur.

Objectionum solutiones à SS. Patribus, Athanasio, Hilario, Basilio, Gregorio Nazianzeno, Gregorio Nyssano, Ambrosio, Augustino, &c. mutuati sumus; horum loca non laudamus plerumquæ, quia nullius apud Arianos momenti eorum est nomen.

O P P. 1. Ariani contra probationes allatas ex verbis Matth. 28. v. 19. non sequi Filium & Spiritum Sanctum esse unius & ejusdem cum Patre divino substantiæ, licet eorum nomen cum Patris nomine in Baptismo conferendo jungatur. Nam personæ creatæ, ut alterius naturæ & minùs dignæ, Deo adjunguntur. 1. Reg. 12. v. 19. *Timuit omnis populus nimis Dominum, & Samuelem.* Exod. 14. v. 31. *Et crediderunt Domino, & Moyse servo ejus.* Act. 10. v. 32. *Commendo vos Deo, &*

verbo gratia ipsius. Ephes. 6. v. 10. Confortamini in Domino, & in potentia virtutis ejus.

R. ex Matth. 28. Unitatem essentia in tribus personis ex illâ juxtapositione colligi, parem scilicet & æqualem Patri, Filio, & Spiritui Sancto fidem, cultum, obedientiam præstari oportere; & eandem in Patre, Filio, & Sancto Spiritu omnipotentiam & naturam agnosci. In illis verò locis quæ obijciuntur, idem deprehendi non potest; non enim ad æqualem cultum Deo, & illis præstandum astringimur. Sic 1. Reg. 12. procul dubio æquè non timendi fuerunt Dominus, & Samuel. Nam timor quidem est debitus Magistratibus, Rom. 13. v. 7. sed timor alius est soli Deo debitus, Malac. 1. v. 6. Isaïa 29. v. 13. Timuit ergò populus Dominum timore, quo eum ut Deum veneratus est: timuit & Samuellem ut Dei Prophetam & Magistratum. Attamen Deus non vult hominem æquè ac seipsum timeri, Matth. 10. v. 28. sicut nec coli, aut esse in veneratione, Isaïa 41. v. 8. Idem esto judicium de loco Exod. 14. v. 31. Undè aliter in Deum credit populus, nimirum fide divinâ; quæ pars est culûs divini; aliter Moyse scilicet ut ministro sibi credita fideliter referenti. Septuaginta sic legunt: *Credidit Moyse*, non verò in Moysem.

Act. 20. v. 32. commendat Apostolus eos Deo, ut ejus beneficio in veritate serventur; & sermoni gratia ejus, tanquam instrumento: quòd si audierint, Verbi divini lectio multum ad eorum utilitatem conferet. In loco Ephes. 6. v. 10. non distinguitur Dominus à robore virtutis ejus; & Paulus vires suas in Deo collocat, & in fortitudine ab eo acceptâ.

IN 3 T. Israëlitas in Moyse baptizatos fuisse, 1. Cor. 10. v. 2. & Discipulos Baptismo Joannis, Act. 19. v. 3. nec tamen ejusdem naturæ dicendos esse Deum, Moysem, aut Joannem. Neque inde discrimen est repetendum, quod in nomine Moyse, aut Joannis fuisse baptizati Judæi non dicantur; perindè enim est; nam alii dicuntur in nomine Christi Baptismum percepisse, Act. 2. v. 38. alii in Christo baptizati, Roman. 6. v. 3. Galat. 3. v. 27.

R. in priori loco 1. Cor. 10. v. 2. Hebraïsmum esse, & loco, *per*, poni, *in*, ut Act. 7. v. 53. ubi dicitur in dispositione Angelorum acceptam fuisse legem, quæ tamen Galat. 3. v. 19. ordinata dicitur per Angelos. Undè sensus est baptizatos Judæos fuisse per Moysen, qui per mare rubrum eos traduxit. Ideò versio Syriaca ita habet, *in manu Moysis*: nec asserit Apostolus, in nomine Moyse, sed in Moyse baptizatos fuisse. Si de ministro dici posset, in nomine ejus baptizatos fuisse Discipulos, an ita constaret Ap. st. 1. Cor. 1. v. 13. profertur: *Num in nomine Pauli baptizati estis?* In Moyse igitur baptizati dicuntur Israëlita, typicè scilicet, & analogicè; aquâ enim nullo modo abluti fuerunt; sed eorum ingressus in mare, & egressus, baptismi effectus delineant. Act. 19. v. 3. non occurrit nomen Joannis, sed in Joannis baptismo, seu quem Joannes administraverat. In locis Act. 2. Rom. 6. & Galat. 3. Historicè referuntur

baptizati quidam; sed forma Baptismi non exprimitur, quæ traditur Matth. 28. Ex quo quidem capite, Patris, Filii, & Spiritus Sancti ducenda est æqualitas.

IN S T. Tres quidem signari Matth. 28. sed proinde non unius essentia esse, imò distingui; cum Dominus ille, & Spiritus distinguantur à Deo, qui per Dominum, & Spiritum Sanctum operatur.

R. Operationes divinas tribus personis tribui: & sic tres illas personas Deum esse: quæ habent divinam potentiam, ac proinde essentiam quoque divinam. Et licet distinguantur tres personaliter, non sequitur distingui essentiâ; imò essentia communis traditur, cum asseritur illis eadem potentia; idcòque sunt unus Deus. Per Filium autem, & Spiritum Sanctum operari quandoque Pater dicitur; non tanquam per instrumenta, aut causas inferiores; sed per Filium, ut per propriam suam essentialem sapientiam; & per Spiritum Sanctum, ut per virtutem suam efficacem. Sic ordo operationum divinarum, & individuus personarum nexus insinuat.

O P P. 2. Tres illos Testes quorum fit mentio 1. Joan. 5. v. 7. *Tres sunt qui testimonium dant, &c.* non esse personas distinctas: testificari enim potest persona, quæ dicitur Pater, per virtutes à se constitutas, & emissas. Sed etiamsi personæ haberentur distinctæ; non magis essent quid unum substantiâ, quàm sint spiritus, aqua & sanguis; cum de illis eadem ratione loquatur S. Joannes: *Quoniam, inquit, tres sunt, qui testimonium dant in cælo, Pater, Verbum, & Spiritus Sanctus; & hi tres unum sunt. Et tres sunt, qui testimonium dant in terrâ, spiritus, & aqua, & sanguis; & hi tres unum sunt, &c.* Addunt hæc verba, nec extate in Græcis exemplaribus vetustioribus, nec in Latinis versionibus antiquioribus occurrere: ut in antiquissimis Bibliis Bibliothecæ S. Germani plusquàm 500. annorum; neque in Colbertinis Ludovici Pii; sed hæc tantum verba, *quoniam tres sunt, qui testimonium dant, spiritus, aqua, & sanguis; & tres unum sunt*: Et, etiamsi extarent, ad probandum tres personas esse unum Deum nihil ea conferre: agitur enim duntaxat de testimonio, quod ab iis testibus, qui personæ non sunt, fieri potest, Jesum scilicet esse Dei Filium, ut fertur v. sequenti: spiritum autem, aquam, & sanguinem non esse unum quid in plano est.

R. Testes de quibus agitur 1. Joan. 5. Patrem scilicet, Filium, & Spiritum Sanctum esse personas distinctas, & ejusdem substantiæ, ut patet ex v. 5. ejusdem capituli, ubi sic habetur: *Quis est, qui vincit mundum, nisi qui credit, quoniam Jesus est Filius Dei?* Ejusdem scilicet substantiæ; non verò adoptivus, seu creatus: fides enim in rem creatam non vincit mundum. Cæterum testis propriè dictus vivit, intelligit, vult, per se subsistit. Porro ejusmodi sunt Pater, Filius, & Spiritus Sanctus. Nam quale est testimonium Patris, tale est Filii, & Spiritus Sancti; & simul in testimonio junguntur, & à testimonio terreno distinguuntur. Sicut ergò Pater testis verè persona est; ità & Filius: &

sicut Filius à Patre distinguitur; ita Spiritus à Patre, & Filio distinguitur, personaliter scilicet, & pariter testatur. Si autem Spiritus S. esset virtus sola Patris; tres non essent testes, sed duo duntaxat: testis enim, & virtus, per quam quis testatur, unicum testem constituunt; & essentia Patris ab ejus virtute non distinguitur. Falsum ergò scripsisset S. Joan. cum tres testes adducere se testaretur. Nec quæstio est, an, qui personarum non sunt, testari possint? sed an tres isti reverà personarum sint? Christum autem esse Filium Dei testatur Pater Matth. 30. v. 17. testatur quoque Spiritus Sanctus ibidem: testatur & ipse Christus de se ipso Joan. cap. 8. v. 18. & c. 10. v. 30. &c. Porro æquale Patris testimonio non esset testimonium Filii, & Spiritus Sancti, quòd scilicet à personâ quæ Patri æqualis non esset, proficisceretur. Et quidem Spiritus, aqua, & sanguis testes, unum non sunt essentiâ, licet sint unum testimonio; & idèò phrasas diversas adhibuit S. Joannes in Græcis exemplaribus. v. enim 7. ità de Patre, & Filio, & Spiritu Sancto loquitur: *& hi tres unum sunt.* Sic autem v. 8. de spiritu, aquâ, & sanguine: *& hi tres in unum sunt.* Equidem in quibusdam codicibus Græcis legi v. 8. *unum sunt*, non inficiamur; sed illi Codices, & pauciores, & recentiores sunt, & non ità authentici.

Addimus locum illum in exemplaribus etiam vetustioribus non occurrere, & in novem Græcis ex Roberto Stephano, & in septem minùs vetustis desiderari. Undè credendum est ab Arianis fuisse erasum, jam ante S. Hieronymi tempora. Primis seculis illum cum Catholicis legerunt antiqui, ut S. Cyprian. lib. de Unitate Ecclesiæ; & eo loco usi sunt, qui adversus Arianos disputarunt.

O P P. 3. hæc verba Joan. 10. v. 39. *Ego & Pater unum sumus*, nec probare personarum multitudinem, seu trinitatem; nec substantiæ unitatem; cum non de aliquâ substantiali unitate, sed tantùm de morali & accidentariâ sermonem haberet Christus. Nam Joan. 17. v. 21. eandem inter nos exoptat unitatem, quâ ipse Patri adunatur, *ut omnes unum sint*, inquit, *sic ut tu Pater in me, & ego in te, ut & ipsi in nobis unum sint.* Et infra v. 22. *ut sint unum sicut & nos sumus unum.* Cum igitur nos inter, imò & cum Deo, sola unitas moralis intercedat, seu quæ petatur ex affectuum conjunctione; ità Patrem inter, & Filium divinum intercedere tantùm similem unitatem contendunt adversarii.

R. Varia exempla & similitudines in scripturis adhiberi, quibus non qui sumus, aut qui esse possimus, sed quid in votis nobis esse debeat, aut quid à nobis sit præstandum, traditur. Sic nobis præcipitur Matth. 10. v. 16. *ut simus simplices, si ut columbe* Item Luc. 6. v. 36. *Miseri-cordes, ut Pater cælestis*: non quòd possimus Dei misericordiam assequi, sed Deum aliquatenus æmulari, dum bona præstamus. Simili ratione, unitatis, quæ inter nos esse debet, in exemplum, unitatem suam cum Patre æterno proponit Christus; ut spiritali consociatione simul conjungamur, sicut unitate substantiæ conjuncti Pater, & Filius à se invicem divelli nequeunt. Updè verba hæc: *Quemadmodum unum sumus*: non identita-

tem, sed imitationem designant: exposcitque Dei Filius, ut sui corporis quasi vinculo inter se se invicem fideles adunentur, in idem cum ipso corpus coeuntes.

IN S T. Hæc verba Joan. 17. voluntatis tantum conjunctionem, seu consensum inter Verbum & Patrem designant. Eo enim sensu de fidelibus dictum est, Act. 4. v. 32. *anima una, & cor unum*. Et 1. Cor. 3. v. 8. *qui plantat, aut qui rigat, unum sunt*: quæ verba nihil aliud præ er animorum ex fidei, & charitatis mutux vinculis repetitam conjunctionem designant.

R. 1. omnem quidem inter fideles unitatem, ex fide, & charitate unanimi esse reperendam, seu ex eo quod Christum omnes induerint, Gal. 3. v. 27. & 28. sed longè aliam Joan. 17. inter Patrem, & Filium significari conjunctionem, scilicet substantialem. Neque verò solam inter fideles, & secum ex voluntatis consensu rogat Christus unitatem; postulasset enim ut ejusdem secum voluntatis eos Pater efficeret: idoneis verbis utitur veritas; precatur nempe, ut non modò sint inter se quid unum per fidem, & charitatem; sed etiam ut naturæ suæ sic affectæ conjunctione, unum secum corpus constituent, cujus ipse caput sit Christus: habet enim naturam cum hominibus communem, & cum justis idem corpus efficit. Etiam si autem Christus postularet, ut fideles voluntate quid unum essent; non sequeretur Patrem, & Filium esse quid unum tantum consensu: nec enim licet à dicto secundum quid, ad dictum simpliciter infetre argumentum. An quod fideles v. c. affectibus conveniant, colligere in promptu erit eos non aliter inter se devinciri? Numquid non multis aliis vinculis inter se possunt colligari? ut conjugio, ut sanguine, propinquitate, beneficiis, gratitudine, & aliis nominibus; imò & ipsius naturæ communis colligatione. Unitas igitur à Christo postulata fidelibus, ceteros unitatis modos non tollit.

O P P. 4. Varia loca adversus Trinitatis mysterium, quibus solum Patrem contendunt esse verum, & unum Deum. Inter alia hunc laudant locum desumptum ex Joan. 17. v. 3. *Hæc est vita æterna, ut cognoscant te solum, Deum verum, & quem misisti Jesum Christum*.

R. solum Deum ibi dici Patrem, ut excludantur qui pro Diis falsò tunc habebantur; non verò personæ ejusdem divinitatis participes: vox quippè *Solus* omnes alios excludit à communione prædicati, cui apponitur; non ceteros. Sic lib. 1. Mach. cap. 10. v. 70. *Tu solus resistis nobis*, inquebat Apollonius ad Jonatham: non exludebatur tamen Simon ipse Jonathæ frater, nec duces, nec milites. Item Luc. 9. v. 36. *Dum fieret vox illa, post Transfigurationem, inventus est Jesus solus*. Hæc voce *Solus* excluduntur Moïses, & Elias; non verò Petrus, Joannes, & Jacobus, qui erant cum Christo. Luc. quoque 10. v. 40. *Domine non est tibi cura, quod soror mea reliquit me solam ministrare*. Solam dixit, ut excluderet sororem; non servos, aut ancillas. Ità Joan. 17. Pater dicitur solus Deus verus, ut removeantur à divinâ naturâ Gentium Di, seu idola; non verò Filius, & Spiritus sanctus. Pariter cum

dicitur Act 4. v. 12. *Non est in alio aliquo salus*, scilicet præter Christum, non excluditur Pater. Similiter 1. Cor. 2. v. 11. dicitur: *Que Dei sunt nemo cognovit, nisi spiritus Dei*, excluditur-ne propterea Deus ipse à spiritu Dei? Matth. etiam 11. v. 2. legitur: *Nemo novit Filium, nisi Pater; neque Patrem quis novit, nisi Filius?* Num idem à suâ ipsorum cognitione Pater, & Filius excluduntur? Vox ergò *Solus* Patri adjuncta excludit quidem personas à Patre sejunctas; non verò eas, quæ sunt in Patre, & unum cum Patre. Sicut 1. Cor. 2. v. 2. cum profiteretur Apostolus se nihil nosse inter Corinthios, nisi *Jesum Christum, & hunc crucifixum*, non excludit Patrem, aut Spiritum sanctum; quia cohæret cognitio hæc cum Christi cognitione. Ad Jo. 17. adeò non excludi Christum, ut imò ex illis verbis pateat Christum esse Deum. Nam undè aliter vita æterna in eo est, ut cognoscamus & Patrem, & Jesum Christum? cum vita æterna præstantissima sit merces, & cognitionis præstantius objectum esse non possit eo, cujus cognitio est vita æterna. Hinc ergò cognitio Christi est præstantissimi omnium objecti: ergò Dei. Prior loci pars opponitur Idolatriæ Gentilium; posterior cæcitati Judæorum, qui Messiam rejiciebant. Utrique autem cognitio ad salutem est necessaria: nec mediator esse poterat Christus, nisi esset unus cum Patre Deus.

Equidem se ob naturam humanam à Patre distinctum Christus significavit; sed se unum dixit ob naturam divinam: nec enim cogitari potest Christus à Patre genitus, & Filius Dei, nisi & ejusdem naturæ cum Patre agnoscatur. Et idem Jo. 5. v. 18. *Judei Jesum interimere voluerunt, propterea quod Deum dixisset Patrem suum, parem se faciens Deo.* Et Jo. 10. v. 33. cum ob hanc causam lapidabant Judæi, quod homo cum esset, *ficeret seipsum Deum.*

Igitur ut genuinus loci Jo. 17. sensus habeatur, vox exclusiva *Solus* construenda est, non cum antecedente pronomine, *Te*, sed cum sequente adjectivo, *verum*: Dominus enim non dixit te solum illum verum Deum; sed *ὁ τὸν μόνον ἀληθινὸν Θεόν*, te illum solum verum Deum. Vox exclusiva, *Solus*, ab antecedente pronomine, *Te*, dividitur per pronomen, *illum*, interpositum; & cum sequente adjectivo, *verum*, jungitur: quod ab Evangelistâ factum non est casu, sed consultò: undè fit ut non Pater excluso Filio, & Spiritu sancto, sit ille verus Deus; sed sit ille Deus, qui solus est verus.

Verborum Christi perspicuitas hos in scopulos Crellium impulit, ut concederet lib. 1. de uno Deo Patre, Christum à verâ Deitate, quæ à supremâ dependeat, verbis illis non removeri. Quantum autem à veritate aberrat in Divinitatis duplicis excogitatione, vel ipsa verba Christi palàm faciunt: nam ibidem Christus vocavit se verum Deum: vera autem Deitas ex Scripturis unica est; nec alia est suprema, & independens; alia inferior, & dependens.

I N S T. Solus Pater est unus Deus, seu supremus, à quo Christus in tempore divinitatis participationem accepit. Undè 1. Cor. 8. v. 6.

Nobis tamen unus Deus Pater, ex quo omnia, & nos in illum. Non prætermisisset autem Paulus Filium, & Spiritum sanctum, si essent unus cum Patre Deus; cum explicaret quis sit ille unus Deus.

R. Filium non prætermitti ab Apostolo, sed Patri ab illo conjungi; ubi scilicet idolum nihil esse docuit; & asseruit unicum esse Deum. *Scimus, inquit v. 4. quia nihil est idolum in mundo, & quod nullus est Deus nisi unus. Nam etsi sunt qui dicuntur Dii, sive in cælo, sive in terrâ (siquidem sunt Dii multi, & Domini multi) nobis tamen unus Deus, Pater, ex quo omnia, & nos in illum : & unus Dominus Jesus Christus, per quem omnia, & nos per ipsum.* Confirmat ergò Patrem, & Filium esse unum Deum; negat enim multos esse Deos, & Dominos, quos colebant Idololatæ, sive in terris, sive in cælis; & probat unum esse Deum; quia una est causa, ex quâ, & per quam sunt omnia. Ità S. ipse Paulus de Deo Rom. 11. v. 36. *Quoniam ex ipso, & per ipsum, & in ipso sunt omnia.* Undè asserendo Christum esse unum Dominum, per quem omnia, & nos per ipsum, docet illum esse unum & eundem cum Patre Deum, seu unam & eandem rerum omnium causam. Et reverâ si excluderet Filium, & Spiritum sanctum, dum dicit unum Deum esse Patrem; excluderet quoque Patrem, dum docet Christum esse unum Dominum; ut Act. 16. v. 28. ubi cum deprehendisset carceris custos neminem aufugisse, licet aperta essent carceris ostia, & ab inferendâ sibi morte deterritus fuisset à sancto Paulo, ad ejus, & Silæ pedes procidit dicens: *Domini quid me oportet facere, ut salvus fiam? At illi dixerunt: crede in Dominum Jesum, & salvus eris tu, & domus tua.* Ibi solius in Christum fidei meminerunt; nec tamen in Patrem. & Spiritum fidem esse necessariam negavêre. Sicut nec excluduntur Pater, & Filius Act. 13. v. 4. & cap. 15. v. 28. ubi solius Spiritûs sancti fit mentio. Hæc autem dissèrendi ratio aliis Apostolis familiaris fuit, ut S. Petro Act. 4. v. 10. & S. Joanni Apoc. 1. v. 8. ubi Filius solus dicitur principium, & finis. Undè colligere est tres personas modò exprimi, ut Math. 28. v. 19. quandòque unicam tantùm; quia sunt unius & ejusdem naturæ. Eo ergò loci, 1. Cor. 8. *unus Deus* absolutè sumitur; & est communis Patri, & Christo, exclusis solis Idolis.

INS T. Deus ille unus, est tota Trinitas. At Pater ille est unus Deus; ergò unica est persona.

R. Equidem illum unum Deum esse Trinitatem adæquatè; & Patrem esse illum unum Deum; sed non adæquatè. Sic homo est Joannes, Jacobus, & Petrus; sed Joannes non est Petrus, nec Jacobus. Item quantitas continua permanens est linea, superficies, & corpus; attamen omnis quantitas permanens non est linea; sicut nec omnis homo est Joannes. Idem de sophisinate adversariorum esto judicium. Enimverò Deus, in majori sumitur collectivè, in minori autem pro personâ. Et proinde istud inferre non licet, quod inferunt adversarii: Deus ille unus, est Pater, & Filius, & Spiritus Sanctus: ergò Filius, & Spiritus Sanctus sunt Pater: non enim persona quæ Deus est, Pater est.

Plurima

Plurima opponuntur ejuscemodi loca, ut Marc. 12. v. 29. Ephes. 4. v. 6. in quibus exponendis non est immorandum, quia eadem redit solutio. Et verò qui sacra instrumenta consuluerit veritatis amore ductus, deprehendet subintelligi continuò personas, quæ non exprimuntur propter naturæ unitatem, & personarum relationem.

Solvuntur objectiones veterum Hæreticorum.

O P P. cum Praxeâ apud Tertull. lib. contra cum cap. 3. Tres in Deo personas agnoscere, in Idololatriam relabi est. Et cap. 13. si unius Deus alterum Deum alloquatur, ut dicitur ubi de creatione mundi, & unus dicat, *fiat*; alius verò, *faciat*, multos esse Deos esse sequitur: unicus autem Deus est. Iisdem fundamentis nitcbatur Noëtus. Et ex S. Greg. Naz. Orat. 37. Tritheitas ideò vocabant Catholicos Ariani, quod unamquàmque personam Deum dicerent.

R. 1. cum Tert. contra Prax. cap. 3. primâ hâc hæreticorum objectione deludi simplices: *Non intelligentes unicum quidem (Deum) sed cum suâ æconomia esse credendum, expavescunt ad ækonomiam, numerum & dispositionem Trinitatis, divisionem presumunt unitatis; quando unitas ex semetipsâ derivans Trinitatem, non destruat ab illâ, sed administretur. Itaque duos & tres jam jactitant à nobis predicari: se verò unius Dei cultores presumunt. Quasi non & unitas irrationaliter collecta hæresim faciat; & Trinitas rationaliter expensa, veritatem constituat.* Ergò personarum pluralitas unitati divinæ officere non credebatur; quia Filius à Patre communicatam naturam acceperat, & eandem cum Patre habebat. Sic igitur Monarchia cum Trinitatis æconomia servatur. Item cap. 13. ait scripturam pluribus in locis, quasi sint plures Dii, sermonem habere; ut cum dicitur, *unxit te Deus, Deus tuus*: sic enim ad Deum fit sermo, & ungi Deum à Deo asseritur. Probat insuper plures esse in Deo personas, & Christo nomen Dei, & Domini, jure meritò ex scripturis tribui.

Addit etiam haberi ex Apost. Christum esse Deum; nec multiplicari divinitatem, cum una sit Patris, & Filii substantia: *qui est, inquit Apostolus, Deus super omnia benedictus in ævum omne. Nam & radium solis seorsum solem vocabo: solem autem nominans cujus est radius, non statim & radium solem appellabo. Nam etsi soles duos faciam, tamen & solem & radium ejus tamen duas res, & duas species unius & indivise substantia numerabo, quàm Deum & sermonem ejus, quàm Patrem & Filium.* Ergò personarum pluralitas divinæ unitati non nocet; quia una & eadem substantia, seu divinitas in personis existit. Item cap. 18. sic habet: *Porrò non periclitatur scriptura, ut illi de tuâ argumentatione succurras, ne sibi contraria videatur: habet rationem, & cum unicum Deum statuit, & cum duos Patrem & Filium ostendit, & sufficit sibi. Filium nominari ab eâ constat. Salvo enim Filio rectè unicum Deum potest designasse, cujus est Filius. Non enim desinit esse qui habet Filium ipse*

unicus, suo scilicet nomine, quoties sine Filio nominatur. Sine Filio autem nominatur, cum principaliter determinatur ut prima persona, quæ ante Filii nomen erat præponenda; quia Pater ante cognoscitur, & post Patrem Filius nominatur: igitur unus Deus Pater, & alius absque eo non est. Quod ipse inferens, non Filium negat, sed alium Deum. Caterùm alius à Patre Filius non est. Itaque non sibi adversari scriptura existimabatur, cum plures in Deo personas, & unum in tribus personis Deum edoceret. Deos plures diversos naturâ negat scriptura, non plures personas in uno Deo. Et sanè si Præter sententia valeret, in eam procul dubio tunc temporis itum fuisset: nec in solvendis illius argumentis ita fuisset laboratum; nec una & eadem divinitas in tribus personis ita constanter vindicata. Si attento animo quæ sequuntur in Tertull. perspiciantur, compertum fiet Deorum multitudinē, non personatum pluralitati, unitatem divinam à scripturis opponi; & cum, cum duos Dominos, aut duos Deos tradit, pluralitatem personarum edocere.

R. 2. cum S. Greg. Naz. Orat. 37. unicum Deum à Catholicis adorari, & simul tres personas in Deo agnosci. Item & injuriâ Trinitatis ab Arianis dictos fuisse Catholicos. Ut autem illud ostendat ipse S. Greg. Naz. his comparationibus utitur: sicut in tribus solibus simul permixtis unicum esse lumen, sic divinitas in tribus unica est. Et sicut unica humanitas pluribus communis est hominibus, ita unica est in tribus personis divinitas: eâ tamen cautione adhibita, quod unitas naturæ in hominibus realis non est, sed mentis nostræ tantum opus. Nam si seorsim spectentur, quos in illius humanitatis participationem venire dicimus; à se invicem discrepare comperiemus, quoad tempus, vires, affectus, &c. Nos etiam ipsos à nobis ipsis quodammodo varios deprehendimus; cum mens nostra simulque corpus perpetuè obnoxia sint mutationi. Paganorum etiam Dii, & ordine, & potestate, & muneribus distinguuntur: perfecta autem inter personas divinas æqualitas est. Præterea Dei unitatem in scripturis statui docet S. Greg. ut Paganorum Diis verus Deus opponatur; nec Dei unici rationem, sive nomen, Patri eadem ratione ac Filio tribui, cum Deus dicitur; quia ex se ipso Pater Deus est; & Filius est Deus; quia ex Deo Patre natus, & quia natura divina una est in tribus personis. Addit in errorem non lapsuros fuisse Arianos, nisi fuissent in perscrutandâ communicatæ naturæ ratione curiosiores. Experiuntur in seipsis quod scribitur Prov. 25. v. 27. *Qui scrutator est majestatis, opprimetur à gloriâ.* Quàm prudenter igitur, simul & feliciter Patrum vestigiis insistentes adversarii scopulos declinassent, si cum S. Greg. Nyss. Epist. ad Ablavium cum singulis Catholicis traditioni constanter esse adhærendum fuissent professi: *Sin, inquit, nostra oratio propositâ questione infirmior arguatur; traditionem quidem, quam à Patribus per successionem accepimus, servabimus in perpetuum firmam & immotam: orationem verò, qua fidei patrocinetur, à Domino requiremus: qua si ab aliquo eorum, qui gratiâ præditi sunt, inventa fuerit; gratias agemus ei, qui gratiam dederit: sin minus id nobis contigerit, nihilo secius qua decreta atque*

statuta sunt, fidem stabilem & firmam retinebimus.

O P P. cum eodem Prax. apud Tertull. cap. 8. lib. contra eundem. Trinitatis dogma à Valentinianorum errore aliud non esse; hi enim nihil aliud docent, quam Æonem ab Æone procedere; & proindè cum eorum dogma proscripsum sit, Trinitatis fidem proscribi quoque oportere.

R. 1. Cum Tert. ibidem cap. 8. errorem à veritate quiddam mutuari solitum esse, ut auctoritatem sibi concilieret; non verò ab errore veritatem quid excerptum. 2. Dogma Valentinianorum ad Trinitatis fidem non accedere; imò penitus esse diversum: nam inter Patrem Æonem, & filium Æonem statuebant illi tantum discriminis, ut Patris notitiam filius assequi non posset; licet eam maximè exoptaret: tradit autem fides Catholica Filium solum nosse Patrem, utpotè qui in ejus sinu sit, & ab eo nunquam avellatur.

O P P. 8. Si Deus ex tribus personis constet, ex partibus erit compositus; erit enim in eo numerus; ubi autem numerus, ibi multa: ubi multa, ibi compositio.

R. cum S. Greg. Naz. Orat. 29. tres in Deo personas nullam compositionem facere; quia non ut simul permixtæ concipiendæ sunt. Et S. Aug. l. 2. cont. Maxim. c. 10. ait tres in Deo personas numerum non constituere; sicut nec constituunt numerum attributa, aut Dei virtutes: *Propter uniuscujusque proprietatem, inquit, tres persone sunt: & propter singulorum perfectionem partes unius Dei non sunt.*

I N S T. Necessariò ex tribus crescit divinitas, & triplex fit.

R. cum S. Aug. lib. 6. de Trin. cap. 1. non crescere divinitatem: incrementum enim indè oritur, quòd res simul additæ aliquid maius faciant; velut corpora corporibus addita; vel cum sublimioris perfectionis rebus aliquid adhæret. Nihil autem huiusmodi in Trinitate contingit: sunt enim æqualis perfectionis personæ sanctissimæ Trinitatis.

O P P. 9. Dei nomine personæ ratio includitur; significat enim cum, qui aliis imperat: sic qui dicit Deum, unam dicit personam, quæ summo cuncta moderatur imperio.

R. Dei nomen non esse nomen personæ determinatæ; sed indicare unam naturam subsistentem per unam, aut per plures personalitates: seu Dei nomen indicare ens perfectissimum, & summum; non verò inferre unitatem personæ.

I N S T. Nomen *Deus* essentiam unam numero indicat: hæc autem non potest pluribus personis communicari; quod persona sit rationalis naturæ individua substantia.

R. eam personæ cognitionem non haberi ex scripturis, sed ex Philosophiâ, quæ fidem non præscribit. Atque, ut id verum esset de essentiâ finitâ; de essentiâ infinitâ falsò diceretur; Licet enim communicabilitas essentiæ finitæ in personâ unâ exhauriatur; non ità exhauritur Essentiæ divinæ communicabilitas. Personæ autem divinæ idem sunt Deus. essentiâ divinâ, quâ Deus unus, non est persona, sed quatenus cer-

to modo essentia divina illi competit; communicatur autem pluribus sine sui multiplicatione, sive sine sui divisione; & sic non multiplex fit essentia divina.

Jam præmonuimus hoc in mysterio investigando, sicut & in aliis quorum fidei placuit Deo nos subicere, rationis, aut philosophiæ præjudicia longius esse amovenda; nec ad utriusque stateram adducendam esse Scripturæ auctoritatem: alioquin hæc detorquebitur in alienum omnino sensum; & qui ita deliquerint (quod Socinianorum peccatum est) maledictis subjiçientur eorum qui addunt verbo Dei, Prov. 30. v. 6. *Ne addas quidquam verbis illius.* Et 1. Reg. 15. v. 23. *Quasi peccatum ariolandi est, repugnare: & quasi scelus idololatriæ, nolle acquiescere.* Et certè cum de Deo loquimur, ex Dei verbis religio nostra summâ animi demissione repetenda est; nec Philosophiam judicem adhibere fas est, aut opiniones præconceptas contra principium fidei disserere Christiano non licet; alioquin Christus, ut & gentibus, videbitur stultitia; & erit offencillo, ut & Judæis, 1. Cor. 1. v. 23.

O p p. ult. ex hâc doctrinâ sequi quaternitatem in Lateranensi Conc. proscriptam, scilicet essentiam divinam, Patrem, Filium, & Spiritum sanctum.

R. tres Personas esse unum Deum profiteri nos cum Lateranensi Concilio; quaternitatem verò remove; necnon contendere quatuor illis nominibus unicam naturam absolutam significari, tres autem res relativas.

ARTICULUS SECUNDUS.

*Verbi Divini, seu Filii, seu Christi Divinitas una
& eadem cum Patris Divinitate probatur.*

REM confectam æstimaremus, si quæ superiori articulo fuerunt exposita, seriò attenderentur: Verbum enim Divinum, seu Filium, seu Christum, unum & eundem cum Patre Deum esse constaret. Nova tamen plurimaque congeremus hîc argumenta; præsertim cum nihil non moliantur factionis Arianae infelicitè posteriori seculo renovatæ defensores, ut à Christianâ Fide Christianorum nomine insignitos abducant.

Adversariorum objectiones, quas adversus probationes à nobis allatas, & dogma catholicum à nobis expositum congerunt, Dei beneficio apertè diluimus. Si quæ verò eruditionis singularis, & curiosioris apud antiquos occurrant, ea sedulò prætermitemus, ut seligamus tantummodò quæ Fidem Catholicam evidenter exprimunt, quæque assensum subito extorquerent, nisi poneret animorum pertinacia obicem gravissimum. Probationes autem nostræ tum Ariatorum, tum Socinianorum hæreses æquè convellunt: nec necesse est sæpiùs repetere, quid has hæreses confodiat. Meminisse oportet Socinianos sentire Christum non fuisse, antequam homo esset; cumque divinitatem quandam habuisse in tempore,

sed longè minorem & aliam, quàm ea quæ Patris est. Igitur si ex probationibus: tam superioris articuli, quàm istius consisteret Christum fuisse anequam homo fieret, & ab æterno esse verum, & unum cum Patre Deum, illique tribuenda esse quæ Deo conveniunt vera attributa, rem adversus illos hæreticos absolverimus. Mihi Theologiæ Candidati parcant, si parùm in istius articuli probationibus videar prolixior: De Fidei capite nunc temporis acriter impugnato agitur: nam si Christus Deus non sit, subvertitur penitus Christiana Religio. Condonabunt, ut spes est, cum attenderint ad argumenta perspicua, quæ stylo uberiori adversus Arianos, SS. Patres, Athanasius, Hilari. Basil. &c. scripserunt, adversus Socinianos hinc revocata sibi longè compendiosius tradi, necnon methodo à S. Hilario feliciter excogitatâ: scilicet sumus probaturi Filium Dei esse unum cum Patre Deum, nomine, naturâ, æternitate, immensitate, omnipotentia, adoratione Deo debitâ, seu laudâ, professione tum ipsius Christi, tum Apostolorum, & Evangelistarum, tum etiam trium priorum seculorum ad Nicænam usque Synodum confessione unanimi. Quæ sigillatim si confecerimus, evidenter sequetur Filium Dei, seu Christum esse verum & unum cum Patre Deum. Quamplurima prætermittemus Scripturæ loca; operosius enim esset omnia exscribere & legere. Satis nobis erit ex veteri Testamento laudatè præsertim quæ à Christo, & Discipulis fuerunt laudata. Spes autem mihi est ejusmodi loca tam aperta visum iri, ut Theologus quilibet in eam sententiam proculdubio sit adducendus.

Prob. ergò Filium Dei cum Patre unum esse nomine, & naturâ. Isai. cap. 6. v. 1. *Vidi Dominum sedentem supra solium excelsum.* Et dixit qui misit Prophetam, v. 10. *Excæca cor populi hujus, ne forè videat oculis &c.* Quæ verba citat S. Joan. cap. 12. v. 40. ut probet ideò Judæos in Christum non credidisse: & addit v. 41. *Hæc dixit Isaias, cum vidit gloriam ejus, & locutus est de eo.* Hic autem de quo Prophetam loquitur, verus Deus Israël fuit; cujus gloriam describit, quem Dominum exercituum bis vocat, & Deum illum fuisse Salvatorem tradit S. Joannes. Quamobrem verus Deus Israël fuit Christus, seu idem cum Patre Deus, tum ex ipso Joanne, tum ex Prophetâ. Verba cohererent tum in fontibus græcis, tum in versionibus genuinis; nec ad alium referri possunt, quàm ad Christum, quem videndo non erant visuri, nec audiendo audituri, & ad quem non erant convertendi, ut sanarentur.

Hæc detorquere conantur Sociniani, docentque accipi posse, aut de Patre, qui dicitur excæcasse, indurasse &c. aut de futurâ Christi gloriâ. Undè Isai. cap. 6. v. 3. *Plena est omnis terra gloriâ ejus:* cum scilicet Christus toti mundo fuit nuntiatus. At quo fundamento hæc proferunt? nullo penitus: nec etiam audent pro certo asserere; sed ut habent, dici potest, verisimile est. An non sic fucum facere student, & Scripturas temerare? Quæ antecedunt & consequuntur, Joan. 12. v. 41. Christum solum respiciunt: hortabatur scilicet Judæos Servator, ut in ipsum cre-

derent, præsertim cum tanta signa edidisset, v. 39. *Propterea non poterant credere, quia iterum dixit Isaias: excæcavit oculos illorum.* Et addit: *Hæc dixit Isaias, quando vidit gloriam ejus, & locutus est de eo. Verumtamen & ex Principibus multi crediderunt in eum.* Porro hæc omnia nonnisi de Christo possunt intelligi. Nec etiam de gloriâ Christi futurâ loquitur Joannes, sed de eâ quâ in ipsum crederent ut in Deum. Ità v. 28. postulat à Patre: *Pater, clarifica nomen tuum. Venit ergò vox de cælo: Et clarificavi, & iterum clarificabo.* Joan. 17. v. 4. *Ego te clarificavi super terram: opus consummavi, quod dedisti mihi ut faciam: & nunc clarifica me tu Pater apud te ipsum, claritate quam habui priusquam mundus esset apud te. Manifestavi nomen tuum hominibus, quos dedisti mihi de mundo: tui erant, & mihi eos dedisti, & sermonem meum servaverunt.* Certè testatur ibi Christus se super terram clarificasse patrem, à quo & ipse postulat, ut tanquam Dei filius cognoscatur; seu ut ad tempus propter exinanitionem occultata Majestas Divina toti mundo innotesceret; seu ut pro filio patris unigenito haberetur, qui esset unus cum eo ab æterno Deus, eâdem gloriâ apud eum ab æterno potitus.

Isaiæ cap. 7. v. 14. *Ecce Virgo concipiet, & pariet filium, & vocabitur nomen ejus Emmanuel, seu nobiscum Deus.* Qui quidem locus à S. Math. cap. 1. v. 23. laudatur, & Christo tribuitur, cum ejus natiuitatis ex Virgine miraculum, nascentisque præstantiam commendat. Hoc autem, inquit, totum factum est, ut impleretur, quod dictum est à Domino per Prophetam dicentem: *Ecce Virgo in utero habebit, & pariet filium, & vocabunt nomen ejus Emmanuel, quod est interpretatum, nobiscum Deus.* Christus ergò Deus vocatur, Deus scilicet nobiscum, οὐ μετὰ. Hinc Matth. 28. v. 10. *Ecce, inquit Christus, ego vobiscum sum omnibus diebus, usque ad consummationem sæculi.*

Jeremiæ 23. Messias qui promittitur v. 5. & 6. Jehova dicitur, & justitia nostra; & proinde verus Deus Israël: *Er suscitabo Davidi germen justum, & regnabit Rex, & sapiens erit, & faciet judicium & justitiam in terrâ. In diebus illis salvabitur Juda, & Israël habitabit confidenter: & hoc est nomen quod vocabunt eum, Dominus justus noster.* Sed Dominus ille, qui apud Jeremiam dicitur Justus, seu Jehova in Hebræo appellatur, Christus est, qui 1. Cor. 1. Justitia nostra dicitur.

Verùm hæc de Christo non exponenda, sed de Deo Patre innuunt Soci-niani. Quo autem fundamento nitantur, ignotum est: juxta enim Hebræum ità veriti debere constat. Et verò Christum vocabant Judæi filium Davidis, qui promittitur: nec certè his inanibus verbis, (ut verisimile est, videtur ità posse intelligi) & similibus nonnisi leves conjecturas innuentibus, tam aperta testimonia eludi possunt. Leviori etiam fundamento urbi Hierosolymitanæ hæc adscribunt; imò ab hoc sensu à ratione penitus abhorrenti abducerentur, si vel attenderent ad vocem eximiam, *Jehova*, quæ nonnisi Deo, & Messîæ à peccatis Israël liberaturo tribuitur.

Zachariæ cap. 1. missus & mittens dicitur Deus, Dominus exercituum, seu verus & unus Deus. v. 8. *Quia hæc dicit Dominus exercituum: post gloriam misit me ad gentes, quæ spoliaverunt vos.* v. 9. *Et cognoscetis quia Dominus exercituum misit me.* Attamen contendunt Sociniani illum qui mittitur non esse Deum, sed Angelum; quia verba hæc ab Angelo prolata sunt, qui cum altero Angelo, & Zachariâ colloquebatur. Sed hæc expositio aliena prorsus est: missus enim, & mittens sunt Dominus exercituum, ut patet ex verborum serie; nam v. 3. & 4. Angelus qui alloquitur Angelum, & Zachariam, nihil aliud profert, quàm mittendum esse Servatorem Dominum exercituum, seu verum Deum à Domino exercituum, seu ab eodem vero & unico Deo. Item Zachariæ c. 11. v. 13. *Et dixit Dominus ad me; Projice illud statuarium, decorum pretium, quo appretiatum sum ab eis &c.* Ironice dicit Dominus se, ut vilissimum mancipium decoro pretio fuisse appretiatum, seu non pluris quàm triginta argenteis æstimatum fuisse; quo quidem pretio ancilla, aut servus à bove cornupetâ occisus Exod. 21. v. 32. æstimabatur. Hic verò Zachar. locus citatur à S. Math. cap. 2. v. 9. quasi ex Jeremiâ, & tribuitur Christo 30. argenteis venundato. Et proinde Christus, Deus ille idem est, & Dominus, de quo Zacharias. Et cap. 12. v. 10. ita Dominus loquitur: *Effundam super domum David, & super habitatores Jerusalem spiritum gratiæ, & precum; & aspiciens ad me, quem confixerunt.* Quem locum S. Joan. cap. 19. v. 37. & Apoc. cap. 1. v. 7. de Christo exponit. Sic ergò Christus est ille Dominus, quem transfixerunt & viderunt Judæi; nec alius præter illum unum Deum occurrit. Nec potest locus ille asseri de Apostolis cruci affigendis; cum nec verbum de illis sit; sicut etiam non dicitur Deus Heb. 11. lapidatus, dissectus, gladio occisus; etsi de discipulis istud asseratur.

Malachiæ 3. v. 1. mittere dicitur Angelum suum Deus Israël, qui viam suam præparet. *Ecce ego mitto Angelum meum, & preparabis viam ante faciem meam.* Quâ ratione paraturus sit Angelus, prænuntiat Isaias cap. 40. v. 3. *Vox clamantis in deserto, parate viam Domini, rectas facite in solitudine semitas Dei nostri.* Hæc vox clamantis in deserto fuit Joannes Baptista, qui viam paraturus erat Christo, Math. 3. v. 3. & cap. 11. v. 10. Marci 1. v. 3. Luc. 7. v. 27. Ergò Dominus Deus est, quem Joannes Baptista prænuntiat, & monstrat; non tantum ad pœnitentiam cohortando, quod & Christus exquebatur; sed excitando, ut in Christum ipsum, qui veniebat, post ipsum crederent.

Addi possunt hæc verba Psalm. 44. v. 9. *Sedes tua Deus in seculum seculi.* Nec enim de Salomone sunt intelligenda, ut ineptè cavillantur nonnulli: siquidem ea Christo tribuit Apost. Heb. 1. v. 8. An enim fuit aliquis aut Angelorum, aut hominum dictus Deus Salomon? Numquid non nefas est divinum cultum rebus creatis deferre, & Patri æterno homines æquare? Christum autem ita Deum esse testatur David; exponente S. Paulo, ut ab Angelis sit adorandus, omnium sit judex, & patri æqualis. v. 2. *Per quem fecit & secula: qui cum sit splendor glo-*

rie, & figura substantia ejus, portansque omnia verbo virtutis sue; purgationem peccatorum faciens, sedet ad dexteram Majestatis in excelsis: tanto melior Angelis effectus, quanto differentius præ illis nomen hereditavit. Cui enim dixit aliquandò Angelorum: Filius meus es tu, ego hodie genui te? Et rursùm: Ego ero illi in Patrem, & ipse mihi erit in Filium. Et cum iterùm introducit primogenitum in orbem terræ, dicit: Et adorent eum omnes Angeli Dei. Et ad Angelos quidem dicit: Qui facit Angelos suos spiritus, & ministros suos flammam ignis. Ad Filium autem: Thronus tuus in seculum seculi, virga aequitatis, virga regni tui. Et sanè ipsi Christo, non homini, nec Angelo, Dei nomen in singulari numero novum Testamentum tribuit; quia solus cum Patre, & Spiritu Sancto Christus verè Deus est.

S. Joannes Evang. totus est in divinitate Christi tradendâ, ut observant Sancti Patres adversùs Cerinthum, Ebionitas, & alios trium priorum seculorum hæreticos. Dei nomen illi tribuit, ut & æternitatem, & alia divinitatis attributa essentialia: Nam. 1. v. 1. *In principio erat Verbum, & Verbum erat apud Deum, & Deus erat Verbum. Hoc erat in principio apud Deum.* v. 4. *In ipso vita erat, & vita erat lux hominum, & lux in tenebris lucet, & tenebra eam non comprehenderunt.* Verbum igitur erat apud Deum ab æterno, Vita, Lux. Interim nihil indè concludi allerunt Sociniani, quòd Verbum dicatur Deus; quia, inquiunt, hominis sermo non est homo; & proindè sermo Dei non est Deus. Addunt etiam vocem, *Deus*, ibi tribui Patri cum articulo, non Verbo. Verùm an potuit Filius Dei clariori sermone Deus dici? An potuerunt etiam divinitatis perfectiones clariùs exprimi? sermo quidem hominis homo non est; sed Filius divinus ita sermo Dei Patris est, ut etiam ab Evangelistâ Deus dicatur.

Porro licet vox *Deus* cum articulo posita tribuatur Patri, non autem Verbo; non indè inferri potest aliùm esse Deum Patrem, aliùm Filium. Nam vox *Deus* aliquandò Patri sine articulo tribuitur eodem in capite, ubi verum Deum significat; aliquandò etiam in aliis scripturæ locis ipsi Filio tribuitur cum articulo, ut Joan. 20. v. 28. & alibi.

Ne verò dubitationi superesse locus posset; non modò Christum esse Deum æternum, & lucem æternam S. Joannes docet, sed & Deum verum: nam 1. Joan. 5. v. 20. *Et scimus quoniam filius Dei venit, & dedit nobis sensum, ut cognoscamus verum Deum, & simus in vero Filio ejus. Hic est verus Deus, & vita æterna. Filioli custodite vos à simulachris, amen.* Christus igitur verus est Deus, & vita æterna. Cum autem S. Joannes Filium verum esse Deum scribit, monet ne in simulachra deficiamus, seu pro Diis Idola veneremur: *Filioli, inquit, custodite vos à simulachris.*

Pronomen autem *hic* referri ad Filium negant Sociniani; quia, ut habent, Pater æternus, solus est ille Deus: Etsi enim, inquiunt, Christus sit Deus verus, non est tamen ex se unus Deus, qui per se & perfectissimâ ratione sit Deus. Verùm hîc agitur de vero Deo, ut subindicat
art.culus

articulus in Græco redditus ; nec adversatur pronomen *hic* quo videtur indicari vox Christus proximè antecedens : ad id enim de quo potissimum sermo est , referri sæpius solet articulus , ut Act. 7. v. 19. & Act. 10. v. 6. Cæterùm nullis argumentis probant Sociniani solum Patrem esse verum illum Deum : sicut enim non potest esse homo absque essentiâ humanâ ; ita nec verus Deus , absque divinâ. Addo pronomen *hic* demonstrare proximè nominatum , de quo perse , & non per accidens , aut obiter agitur : at hîc de Christo per se agitur , non verò per accidens , vel obiter ; uti constat ex solâ capitis lectione. Præterea Filius dicitur vita æterna in Ep. eâdem Joannis , ut c. 1. v. 2. c. 5. v. 11. & 12. & alibi : & verò cur S. Joannes docere voluisset Patrem esse verum Deum , & vitam æternam ? cùm de eo nunquam dubitatum fuerit.

2. Alterum argumenti genus petitum ex Attributis , quæ naturam divinam constituunt , sic exponitur. Dei Filius est Patri coæternus ; ergo Deus ; utpotè genitus ab æterno ex Patris substantia. Is enim est qui dicitur in Scripturis æternus , & æternitatis Pater : qui erat in principio , & in Patre & omnium rerum Creator est , & principium , & finis : qui erat antequam homo fieret ; qui claritatem paternam & divinam habebat , priusquam humanam indueret naturam : qui denique Prophetiæ doctrinæ Author est.

1. Ab æterno Dei Filius est genitus , & ex Patris substantiâ , utpotè Filius naturalis , unigenitus , non adoptivus , ut ex articulo superiori , & isto jam constat. Ab æterno quidem genitus est : nam Psalm. 2. v. 7. *Ego hodie genui te*. Psalm. 109. v. 3. *Ex utero ante luciferum genui te : hodie , & ante luciferum* ; quia tempus non est , in quo genitus sit , sed ab æterno & immutabiliter , & ante omnia.

Verba hæc Psalm. 2. v. 7. *Filius meus es tu ; ego hodie genui te* : Æternitati Verbi non favere Sociniani asserunt ; quia præterquamquod vox , *hodie* , tempus certum designat , addunt insuper juxta litteram dici de Davide , qui neque ab æterno , neque ex essentiâ Dei genitus est.

Verùm facile confutantur ; vox enim , *hodie* , Deum ; qui materia subiecta est , respicit ; seu illum qui genuit , seu eum qui genitus est : siquidem agitur de Christo , adversus quem fremuerunt gentes , v. 1. Qui constitutus est Rex super montem Sion , v. 6. Qui genitus est. v. 7. Qui omnes gentes in hæreditatem accepit , v. 8. & de quo v. 13. dicitur : *Beati omnes qui confidunt in eo*. At fiducia in solo Deo collocari potest ; & proinde subiecta materia non fert , ut vox , *hodie* , tempus denotet , quia tempus in Deum non cadit , & *hodie* æternitatem optimè delineat : præteritum enim , & futurum , & quamlibet successionem remover. Et verò non fert materia , ut alius à Christo Domino intelligatur ; divina quippe prorsus sunt , quæ Davidi non possunt tribui. Undè falsò asserunt adversarii , quæ in Psalmis continentur , primo sensu Davidi convenire ; hæc enim verba ab Apostolo , tum ad resurrectionem , tum ad glorificationem Christi referuntur , quia ex eodem Rom. 1. v. 4. declaratur Dei Filius per resurrectionem , quâ seipsum suscitavit.

2. Dei Filius, ut Sapientia æterna, ante mundi creationem extitit: Nam Prov. 8. v. 22. *Dominus possedit me in initio viarum suarum, antequam quicquam faceret à principio. à b eterno ordinata sum, & ex antiquis antequam terra fieret. Nondum erant abyssi, & ego jam concepta eram, &c.* Illa autem Sapientia Christus est. Quod enim sibi tribuit sapientia, dum seipsam describit c. 1. c. 8. & 9. soli sapientiæ divinæ, seu Christo convenit; non verò sapientiæ in genere & in abstracto, nec per prosopopœiam, ut reponunt Sociniani: non enim induceretur hæc virtus tot capitibus de seipsa sermonem habens; & quidem statim, seu in ipso sermonis exordio, & sine præfatione; nec actio, aut clamor loquens repræsentaretur, ut narrationi major fides conciliaretur. Præterea figuræ locus non est, ubi, quæ esseruntur, vera sunt. Denique si sapientia in genere describeretur, omni sapientiæ conveniret quod ibi describitur: hoc autem est omnino falsum. Ergò de solâ eximiâ, & divinâ sapientiâ sermonem esse constat: neque enim sapientia humana, aut Angelica ante homines, vel Angelos extitit. Sic tamen loquitur sapientia, ut palam fiat eam ab æterno extitisse: *Dominus possedit me*, inquit, *in initio viarum suarum, antequam quidquam faceret à principio.* His enim verbis æterna sapientiæ generatio non obscure innuitur; scilicet verbum *possedit*, idem sonat ac *genuit*: hinc generatio Caini Gen. 4. v. 1. iis verbis exprimitur, *possedi hominem per Deum*, inquit Eva: En ergò sapientia Filius Dei.

3. Messias, seu qui promittitur, Isai. 9. nuncupatur Deus fortis, & æternus, & pater æternitatis, licet puer. v. 6. *Parvulus enim natus est nobis, & filius datus est nobis; & factus est principatus super humerum ejus: & vocabitur nomen ejus, Admirabilis, Consiliarius, Deus Fortis, Pater futuri seculi, Princeps pacis.* Per Patrem futuri seculi, aut æternitatis, non est intelligendus Pater æternus, ut cavillantur Sociniani; nec etiam agitur de futuro seculo, cujus author & Princeps sit Christus: quia qui Pater æternitatis, aut futuri seculi dicitur, dicitur & parvulus natus; *Parvulus enim natus est nobis, &c. & filius datus est nobis*: Pater autem natus non est, sed filius. Nec Christus ibi exprimitur ut Pater futuri tantùm seculi, juxta vulgatam: vox enim Hebræa *אב* significat seculum simpliciter, vel æternitatem; & sic Christus dicitur pater seculi aut æternitatis; quia Pater est vitæ æternæ; & proinde pro vero & summo Deo erit habendus.

4. Mich. c. 5. v. 2. *Et tu Bethleem Ephrata Parvulus es in millibus Juda: ex te mihi egredietur, qui sit dominator in Israël, & egressus ejus ab initio, à diebus æternitatis.* Sic Christus longè antequam Beata Virgo pareret, fuit; utporè cujus egressus fuit ab initio, à diebus æternitatis, & qui egressurus erat ex Bethleem, & Israël dominaturus, natus est Bethleem. Quæ quidem verba de Christo à S. Matthæo c. 2. v. 6. exponuntur, ubi æternitas Verbi apertè designatur, & describitur ejus nativitatis temporariæ locus.

Ludunt Sociniani, cum verba illa ad æternitatem non pertinere scri-

bunt; quia, inquiunt, mentio est, tùm initii, tùm & dierum; quæ in æternitate non occurrunt: undè volunt significari tantùm ab annis antiquis, nempe à Davide stirpis authore, Christum originem esse ducturum. Nam ad æternitatem tradendam, quid illis verbis expressius potest proferri? his quidem verbis *ab initio, & à diebus æternitatis*, utitur Michæas; sed id facit ut æternitatem ad nostrum captum delineet. Et certè si Michæas de Davide tantùm authore stirpis voluisset sermonem habere, repetiisset potiùs originem Christi ab Abrahamo, juxta Matth. 1. v. 1. Undè igitur Sociniani habent hæc verba significare Profapiæ antiquitatem?

5. Christus, seu Verbum, in principio, seu ab æterno fuit, & antequam mundus crearetur; cum ipse sit creator. Joan. 1. v. 1. *In principio erat Verbum.* v. 3. *Omnia per ipsum facta sunt.* Hic de orbis principio sermo est, non de Evangelicæ prædicationis initio, ut volunt Sociniani inauditâ sacrilegâ temeritate; quasi nihil aliud significaretur præter quàm Christum exiitisse, cum Joannes docere incepit.

Etenim si eam doctrinam intendisset S. Joannes, an obscuritatibus rem quam apertè potuisset tradere, implicuisset? Longè quippè removeret Sanct. Joannes hanc detortam nimis expositionem: Verbum enim describit in primis versculis, ut Deum, ut apud Patrem, ut creatorem; deindè ejus incarnationem explicat. Vox illa, *Verbum*, nomen proprium est personæ, quam repræsentat; solusque Joannes Evangelista hoc utitur nomine, priùsquàm de Joanne prænuntio, & de Verbo ipso incarnato disserat: Verbo autem, quod Joannes describit, & nomen, & nominis descriptio Gen. 1. convenit; & proindè idem est Deus. Verbum exhibet Joannes, ut Deum & creatorem; ut qui Deus in mundo fuerit, venerit ad suos, nec fuerit cognitus, fuerit lux, vita, longè perfectior Joanne Baptistâ, qui fuerat quidem missus, ut testimonium perhiberet de lumine; sed non erat lux. *In principio*, inquit, *erat Verbum, & Verbum erat apud Deum, & Deus erat Verbum. Hoc erat in principio apud Deum.* His verbis nihil apertius ad æternitatem, & divinitatem Verbi exponendam. Præterea ineptum prorsus est & absurdum, quod inferunt Sociniani, nempe Joannem non potuisse scribere de æternitate Christi, quia scribendum aggrediebatur Evangelium; quasi verò Matthæus ab Abrahamo, Marcus à Malachiâ, Lucas à Zachariâ ordiri non potuerint? In Evangelio enim, & quæ præcesserunt, & quæ tunc temporis contingunt, referuntur: Joannes autem ab æternitate & creatione mundi suum repetit Evangelium, ut hæreticos refelleret, qui Christum promero homine habebant, uti referunt S. Iren. adversus hæres. S. Epiph. hæc. 27. S. Aug. & alii.

Voces illas, *erat apud Deum*, exponunt iidem Sociniani, quasi sensus sit Christum à Patre cognitum fuisse ab æterno. Sed expositio hæc penitus est aliena; nullibi enim ita usurpatur. Esse apud Patrem denotat ejusdem esse cum Patre substantiæ, vel essentiæ; non verò cognitionem: licet enim Deus omnes res creatas noverit; apud illum tamen esse non dicuntur; Deo quippe cogniti sunt Diabolus, Antichristus,

& Impii; an propterea apud Deum esse ab æterno dicentur? Et cur phrasi obviâ usus non esset Joannes, cum repetiisset, *erat apud Deum*: erat quoque tunc temporis Deo cognitus Joannes Baptista, qui vir erat admirandæ pietatis; nec tamen de eo dicitur, *erat apud Deum*, & *Deus erat*; imò negatur: *non erat ille lux*: Verbum autem erat apud Deum, & Deus erat ab æterno, & antequam caro fieret. Undè repetit, *erat*, & *in principio*, non verò ait, *factus est Deus*, sicut v. 14. *Verbum caro factum est*. Et certè si doctrinam Socinianorum, voluisset tradere Joannes, ut illi arbitrantur; exhibuisset hominem primò, deindè factum Deum; & quâ ratione tantam dignitatem consecutus fuisset, procul dubio explicuisset. Quàm autem alienus sit ab hac Doctrinâ, vel indè planum sit, quod aliquandò factum fuisse Deum nunquam tradat: factum verò fuisse carnem, & longè antequam caro fieret, extitisse, & antequam Joannes nasceretur, scribat. Verbum igitur verus ab æterno Deus est, & unus cum Patre Deus.

Contestantur adhuc illa verbâ, *Verbum caro factum est*, nihil aliud significare, quàm quod caro fuit sermo; seu qui homo erat, legatus fuit Dei: & eam ob causam, inquirunt, Christus dictus, est sermo. At nihil manifestius illis verbis, *Verbum caro factum est*: cur itaque vertunt, *homo fuit*, non *factus fuit*? Cum Joannes de divinâ Christi naturâ loquitur, verbum *erat* semper usurpat; vocibus autem illis *caro factum est* significat Verbum reverâ carnem induisse, quam non habebat: nec aliter vocabulum *fieri*, usurpat, quando illud ad res creatas refert, nisi ad illarum originem significandam. Verbum quod initio, seu ab æterno erat apud Deum, caro non erat. Ergò post illud tempus factum est caro. Ità de Verbo facto homine usurpatur, Rom. 1. v. 3. Galat. 4. v. 4. Si autem sensus Socinianus valeret, verba ità intelligi oporteret, *homo erat homo*.

6. Apoc. cap. 1. v. 8. *Ego sum Alpha & Omega*, inquit Christus, *Principium & Finis*, dicit Dominus Deus, qui est, qui erat, & qui venturus est, omnipotens. v. 17. *Primus & novissimus*. Cum igitur iisdem verbis suam Christus æternitatem exprimat, quibus expressit Deus Isaïæ cap. 41. v. 4. 44. v. 6. & 48. v. 12. ubi se primum & novissimum se vocat Deus Israël; certè Christus quoque verus est Deus, & æternus.

Hic agi de Christo, negant Sociniani: sed perperam; cum in versibus antecedentibus de eodem Christo agatur, qui c. 22. v. 13. iterùm de se ait: *Ego sum alpha & omega, principium & finis*: Quamobrem de Filio agi extra dubium est; præsertim cum c. 2. v. 8. hæc habeantur: *Hæc dicit primus & novissimus, qui fuit mortuus, & vivit*. Equidem lib. 1. v. 4. de Patre dicitur: *Pax ab eo qui est, qui erat, & qui venturus est, &c.* Et à Jesu Christo qui est testis fidelis. Sed non minùs ea Filio conveniunt, de quo Hebr. 13. v. 8. dicitur *Jesus Christus heri, & hodie: ipse & in secula*.

Respondent adhuc Sociniani Verbum, *venturus est*, posse significare, *futurus est*; tùm quod ità usurpetur alibi; tùm quod Joannes dixerit in

eodem capite, *qui est, qui erat, & qui venturus est*; quod idem significat, ac *futurus est*.

Sed hic reponitur veram Christi æternitatem describi; quia rerum omnium dicitur principium & finis; sicque omnia tempora complectitur, & ultra. Et verò quibus terminis magis perspicuis posset describi æternitas? Ille sanè de quo loquitur Jo. Apocal. cap. 1. alius à Christo non potest intelligi, tùm quod iterum venturus sit, nempe in nubibus v. 7. & videndus sit ab omnibus, & ab eis qui cum pupugerunt. Igitur hæc necessariò sunt intelligenda de Christo; cujus divinitas apertè describitur, cum dicitur, *qui est, & qui erat, & qui venturus est, omnipotens*. Licet vox *venturus*, quandoque futurum significet, hic tamen nonnisi venturum significat, cum v. 7. sensus restituatur, & adventus Christi in nubibus describatur. Sic igitur ex connexionione utriusque versus de eodem subiecto agi manifestum est; & Christus dicitur æternus, & omnipotens; & eadem æternitas, quæ Patri v. 4. & 5. tribuitur, Filio quoque vindicatur, v. 8. In iisdem etiam versibus 4. & 5. eodem cultu divino afficitur Filius, cum Patre: æquè enim gratiam ac pacem Joannes precatur Ecclesiis à Jesu Christo, ac à Patre, & à septem quidem Spiritibus, seu à Spiritu Sancto, qui hic per dona definito pro indefinito numero describitur.

7. Filius Dei erat antequam caro fieret, ex Joan. 6. v. 62. *Hoc vos scandalizat?* inquit Christus: *si ergò videritis Filium hominis ascendentem, ubi erat prius*. At locus ubi erat prius, cælum est, in quo Pater est, & ipse Filius tanquam in suo naturali loco fuerat: hinc se homine longè majorem esse subindicat Christus, & pro homine non esse habendum, sed pro Deo, cujus locus cælum esset. Quam Christi mentem rectè ceperunt Judæi, qui propterea scandalum passi, adversus Christum pravè insurgentes, ipsum hominem tantummodò propugnarunt; ut cujus patrem & matrem nossent; v. 42. *Cujus nos novimus patrem & matrem, quomodo ergò dicit hic: quia & de cælo descendit?* Sed nisi mentem Christi probè intellexissent, è benignitate illius fuisset eos ab errore avocare: tantum autem abfuit, ut illos à mente jam conceptâ revocaret; ut imò suam divinitatem toto capite confirmet. Deum enim Patrem suum appellat quater, v. 44. 45. 46. inculcans quod jam dixerat, v. 40. nimirum se esse Filium Dei. Vim quoque vivificandi sibi tribuit, & omnipotentiam planè divinam: v. 47. *Amen, amen dico vobis, qui credit in me habet vitam æternam*: Item v. 44. *Ego resuscitabo eum in novissimo die*. Porro non dicit, *qui credit in Patrem*, sed *qui credit in me*: nec ait, *Deus Pater resuscitabit*; sed *ego resuscitabo eum*. Potuisset - ne Christus de se magnificentius loqui; aut sibi vim tribuere majorem? Non eas sibi sumit partes hoc loco, ut homines trahat ad Patrem; sed ut ostendat homines ad Filium venire non posse nisi traxerit illos Pater, & veniendum esse ad Filium, tanquam ad vitæ æternæ fontem, doceat. Multi ex Discipulis astantibus scandalizati dicebant, versu 61. *Durus est hic sermo*: & v. 65. esse quosdam asserere

Christus, qui non crederent : Et addit v. 66. *Propterea dixi vobis, quia nemo potest venire ad me, nisi fuerit ei datum à Patre meo.* Cum autem multi ex discipulis recessissent, & dixisset Christus ad duodecim, v. 68. *Numquid & vos vultis abire? Respondis ergò ei Simon Petrus: Domine, ad quem ibimus? Verba vite eterna habes.* v. 70. *Et nos credidimus, & nos cognovimus, quia tu es Christus Filius Dei.* Quam responsionem probatam habet Christus. Ergò Deus erat antequam descenderet de cœlo, ut carnem assumeret : & proindè licet caro factus fuerit in tempore ; ab æterno nihilominùs existeret, quâ Deus.

Sociniani, discipulorum illorum instar ; qui ut duriora verba illa ferre non poterant, à Christo recedunt, variisq; & penitùs contortis expositionibus verba illa emollire conantur. Reponunt enim fuisse, & descendisse Christum de cœlo ; non quòd, ut verbum, antequam homo fieret, extiterit ; sed quia homo natus, in cœlum fuit translatus, instar S. Pauli ; & exindè cum descendisset, mortales, quæ à Deo fuerant injuncta, edocuit ; aut quia ibi fuerat cogitatione versatus.

Verùm quælibet Socinianorum opiniones morari nos non debent ; sed lectoribus omne de illis iudicium relinquimus. Nihil enim est quod non referant Scripturæ, si figmenta sua illis affingere cuique sit liberum, ut v. c. hæc, *in principio, &c.* de Evangelii initio exponere : *erat apud Patrem*, de cognitione Patris : *Deus erat*, de destinatione, quâ Christus constituendus erat Deus : *ascendentem ubi erat priùs*, de rapui & commoratione per mentem, &c. Pateor sanè me nihil quidquam, vel in priorum temporum hæreticis deprehendisse, quod sit tam insolens & inauditum, & quod infulsè adeò Verbi divini proculcet authoritatem. An homini pio, erudito, Catholicè sentienti, & in Scripturis versato hæc in mentem unquam venièrè ? An ne ità docuit Ecclesia ? Nonne verba apertè reclamant ? Nonne satius esset religionem Christianam apertè oppugnare ? Sed nullos, aut paucos in errorem induxissent Sociniani, nisi se Verbi divini sectatores fuissent professi. Ii sunt insensissimi religionis Christianæ adversarii, ac nullum vel levissimum Christianæ pietatis sectantur monumentum. Philosophi sunt, unius Dei cultores (si tamen colant) instar Mahumetanorum, & Judæorum ; minùs tamen religiosi ; ut qui se Christianos mentiantur, ut Christianos faciliùs decipiant. Sed ad propositum redeamus. Aperta scilicet est, & obvia horum verborum Christi significatio, Joan. cap. 6. versu 66. *Si videritis Filium hominis ascendentem, ubi erat priùs* : Relativa enim oppositio est inter tempus, quo Christus erat in cœlo, & quo loquebatur. Nec ascendentem mirati fuissent discipuli, si metaphorica tantùm fuisset assumptio : deindè fictitiùs & omninò intolerandus ille Christi in cœlum ante suam prædicationem raptus, nullo prorsùs fundamento nititur : nihil quippè in Evangelio ejusmodi miraculum subindicat ; nec esset cur Joan. 3. v. 13. ità haberetur : *Nemo ascendit in cœlum, nisi qui descendit de cœlo, filius hominis, qui est in cœlo.* Nam si Christus localiter ascendisset in cœlum, antequam descendisset, frustra proferret : *Nemo ascendit in cœlum, nisi*

qui descendit de cælo. Quandò enim descendisset, ut ascenderet? cum priùs ascendisset, quàm descendisset. Præterea dicendus fuisset Christus iterùm ascendere, non simpliciter ascendere.

Adversus detortam adeò Socinianorum doctrinam reclamationem Apostolus: nam Ephes. 4. v. 9. rem confessam ipse loquitur, scilicet non potuisse Christum ascendere, nisi priùs descendisset: *Quod autem ascendit, inquit, quid est, nisi quia & descendit primum in inferiores partes terra?* Heb. c. 9. v. 12. unicum Christi in cælum ascensum prædicat: *Introivit semel in sancta.* Nullibi autem dicit Christus de cælo se rediisse, vel raptum fuisse; sed venisse, descendisse de cælo, & priùs Verbum fuisse apud Patrem, quàm esset in carne, seu in mundo. Joan. 16. v. 28. *Exivi à Patre, & veni in mundum, & vado ad Patrem.* Figuratis expositionibus detorqueri non possunt tam aperta verba. Personæ quidem humanæ dici possunt esse à Deo, sed exire à Deo nullibi dicuntur, nec venisse in mundum.

Verbum Deum extitisse, antequam carnem indueret, iterùm uberri-
mè tradit Apost. Philip. 2. v. 6. ubi scribit Christum priùs in formâ Dei fuisse, quàm in formâ servi, & seipsum exinanivisse, acceptâ servi formâ: *Qui cum in formâ Dei esset, non rapinam arbitratus est esse se aequalem Deo: sed semetipsum exinanivit formam servi accipiens &c.* Si naturalis hæc forma fuisset Christo, eam accipiendo non seipsum exinanivisset, nec eam accepisset, nisi Deus fuisset; nec seipsum æqualem Deo existimasset. Sic ergò Deus, & homo fuit; sed priùs in formâ Dei, servi postea formam accepit, *in similitudinem hominum factus.* Et sic antea nec servus erat, nec hominibus similis. Illam Christi demissionem fusiùs exponens Apostolus: *Habitu, inquit, inventus ut homo. . . . Factus obediens usque ad mortem, mortem autem crucis.* Ità igitur formam servi induit, ut Dei formam non deposuerit; tùm quia deponi non potest; tùm quia se ut Deum semper gessit, & æqualem Patri, & omnia se testatur habere quæ pater. Quibus nihil apertius proferri potest, si Apostoli verbis inhæreamus.

Tricantur Sociniani, dum verba hæc, *qui non rapinam arbitratus &c.* de divino munere, quod in tempore Christus esset consecutus, intelligunt, ut rapinæ seu furti suspicionem removeret. Nam Christus per generationem non temporalem, sed æternam, habet à patre naturam divinam communicatam. Joan. 5. v. 16. *Sicut enim Pater habet vitam in semetipso; sic dedit & filio habere vitam in semetipso.* Pater habet essentialiter, ut ità loquamur, vitam in seipso, habet & Filius; ideò Christus majestatem Deo æqualem, & divinos honores sibi delatos habuit, & voluntariè serviformam accepit. Qui enim Deus, & idem cum Patre Deus erat, non poterat nisi proprio nutu homo fieri.

Addunt Sociniani formâ Dei non designari Dei naturam; quia hæc exinaniri non potest; nec humanam naturam formâ servi, quæ solam hominis, qui & liber & servus esse potest, conditionem referat; maximè cum exteriorem tantùm speciem significet vox *forma*. Sed non nove-

runt Sociniani *in formâ Dei esse*, idem significare, ac *in essentiâ Dei*. An *in formâ accidentali* cogitari potest Deus? Igitur *in solâ formâ essentiali* subsistit; nec dicitur Verbum assumere formam Dei, sed *existere in formâ Dei*. Exinanita quidem non est absolutè natura divina, seu quoad gloriam essentialem, quæ deponi non potest; sed quoad accidentalem, abjecti hominis superinductâ formâ. Undè naturæ divinæ dignitas delituit, & ita fuit obscurata, ut pro blasphemo habitus fuerit Christus, cum se Dei filium, & Deo æqualem professus est. Forma verò servi naturam humanam significat; non tantum conditionem, quâ homo esse non potuit, quin Dei servus esset.

His verbis ejusdem cap. epist. ad Philip. v. 7. *Et habitu inventus ut homo*: contendunt Sociniani Christum, qui opera Dei exquebatur, tunc tantum factum esse tanquam servum, cum fuit occisus; nec significari Verbum incarnatum fuisse. Sed quis, nisi Socinianus, seu Verbi divini hostis insensus, hæc effutiret? Verbi incarnationem 1. Timot. 3. v. 16. Apostolus ita describit: *Et manifestè magnum est pietatis sacramentum, quod manifestatum est in carne*, juxta vulgatam: *Vel quod Deus manifestatus est in carne*, juxta omnes codices græcos. Ubique prædicatum & creditum hoc mysterium docet ibidem Apostolus.

Hæc Apostoli verba referri ad patrem oportere autumant Sociniani, cum dici possit. Deus pater apparuisse in Christo, & Angelis.

Verum quàm ista præter rationem sint, in aperto est. Pater enim caro non est factus, nec venit in carnem, nec particeps factus est carnis; sed solus Filius, Joan. 1. v. 14. 1. Joan. 4. v. 1, & 3. Incarnatio hoc magnum est pietatis mysterium, ex Apost. Non esset autem, si sensu Sociniano explicaretur.

Aliam expositionem non minus à veritate alienam proponunt Sociniani, nempe divinam homines salvandi voluntatem fieri manifestam per carnis infirmitatem. Sed quomodo hæc Christi verba Luc. 24. v. 26. *relata*, de solâ Dei voluntate dicerentur? *Oportuit pati Christum, & ita intrare in gloriam suam*. Quomodo etiam ista Pauli Hebr. 10. v. 3, de ipsâ Dei voluntate intelligerentur? *Ideo ingrediens mundum dicit: hostiam & oblationem noluisti: corpus autem aptasti mihi: blasphemata pro peccato non tibi placuerunt; tunc dixi: ecce venio*. An de solâ Dei voluntate diceretur? *Ecce venio*. Quis ita sentiret? si sit pax & sanæ mentis. An non enim apertè persona inducitur ingrediens mundum, & mortem passâ exprimitur, ut homines mortis illius beneficio consequerentur salutem?

Ista quoque verba detorqueri posse censent Sociniani, si de Christi Ascensione exponantur. Sed ubinam in cælos Ascensio dicitur ingressus in mundum? Certè loquitur Apostolus de Verbo homine futuro, ut Hebr. 1. v. 1. 1. & 4. Et hic docet Deum abjecisse hostias antiquas, quibus peccatum non auferretur: ideo corpus Verbo fuisse aptatum, & per oblationem corporis ejus fuisse nos sanctificatos.

Quod si Verbo Deo fidem haberent Sociniani, qui tam detortis & inauditis

inauditis expositionibus Scripturas conantur evertere, præsertim in præcipuo fidei Christi nati mysterio, deprehenderent, an ad Christum, an ad Antichristi partes pertinerent. Qui enim Incarnationis mysterium evacuat, procul dubio Antichristi est: qui vero illud profiteatur, Christi servus est accendendus, 1. Joan. 4. v. 2 & 3. *Omnis spiritus, qui confitetur Jesum - Christum in carne venisse, ex Deo est; & omnis spiritus, qui solvit Jesum, ex Deo non est, & hic est Antichristus.* In vulgatâ quidem habetur, *in carne*: sed perinde est, seu Verbum dicatur in carne extitisse, seu in carnem venisse. Porro qui venit, distinguitur à carne, in quam venit.

Ad hæc impiè reponunt Sociniani, cum scilicet esse ex Deo, qui confitetur Jesum in ignominiâ occubuisse, quod est in carne venisse. Sed an vox carnis solam abjectionem, & calamitatem designat? An non enim hominem exprimit, qui iis calamitatibus sit subiectus? Ex Deo non fuerunt quamplurimi palàm fateri non dubitantes, in magno contemptu & calamitate fuisse Christum. Et sanè nonnisi tricesimo ætatis anno in carne capisset esse, si tunc solum in carne fuit, cum in calamitatibus fuit conspectus.

Joan. 1. v. 4. *Verbum caro factum est.* Ergò erat antequàm caro fieret. Et verò priusquàm de carne sumptâ Joannes loquatur, primò quid sit Verbum, & quid antea præstaret, tredecim versibus exponit: Verbo autem secundum se ità considerato, transit ad idem Verbum relativè ad carnem, quam assumpsit, & ait illud carnem factum. An clariùs rem poruisset exhibere? Certè nomen, *Deus*, divinam naturam tam apertè exprimit, quàm carnem humanam vox, *Caro*.

Præterea Joanne Baptistâ prior fuit Christus: ergò & ipso antiquior. Joan. 1. v. 15. Joannes testimonium perhibet de ipso, & clamat dicens: *Hic erat, quem dixi: qui post me venturus est, ante me factus est: quia prior me erat. Et de plenitudine ejus nos omnes accepimus, & gratiam pro gratiâ.*

Non est autem Christus solâ dignitate prior, ut volunt Sociniani, sed tempore: *Ante me factus est*, inquit Joan. *quia prior me erat*, ut Deus nempe; ut homo verò, erat posterior. Suam etiam qualemcumque excellentiam Christo ut plenitudini acceptam refert Joannes, & ait gratiam & veritatem per Christum esse factam. Natus quidem est post Joannem Christus sex mensibus; post ipsum quoque docuit: & tamen Joannes à Christo omne donum accepisse se testatur: *De plenitudine ejus*, inquit, *nos omnes accepimus.* Ergò Christus quâ Deus Joanne fuit anterior; & sic æternus est.

Joan. 8. v. 58. æternitatem suam sic exponit Christus: *Amen, amen dico vobis, antequam Abraham fieret, Ego sum.* Ità intellexerunt Judæi, cum Christus ipsis dixisset: *Abraham pater vester exultavit, ut videret diem meum: vidit, & gavisus est.* Sic enim reposuerunt: *Quinquaginta annos nondum habes, & Abraham vidisti?* Eorum interpretationem probatam habet Christus, & asserit se non modò tunc extitisse; sed &

anteà : *Amen, amen dico vobis*, inquit, *antequam Abraham fieret, Ego sum*. Sicque Christus se Deum verum designat.

Cavillationibus à Socinianis adhiberi solitis, cludi Christi verba non possunt quidquid ipsi moliantur; cum aliter nec responderet Christus interrogationi Judæorum; nec eorum objectioni faceret satis: de præcipuo scilicet religionis capite agebatur; quis esset Christus? utrum ante Abrahamum, an post? A bonitate verò Christi alienum prorsus esset populis, quos instituendos suscipiebat, illudere; & aliò detorquere sermonem; nec eorum menti respondere. Tam apertâ explicatione in furorem acti Judæi, lapidibus Christum obruere voluerunt. Undè Christus scandali moti author ipse fuisset, si veritate occultatâ, & verbis alio fine prolatis, in errorem eos impulisset: quod sibi in mentem inducere non possunt, nisi qui volunt decipi & decipere; præsertim cum emphasim & asseverationem adjungat Christus; *Amen, amen* &c. Obvia est interrogatio, & objectio: obvium quoque & apertum responsum.

Aliud argumenti genus sic exponitur. Antequam Verbum caro fieret, paternæ claritatis erat particeps: nam Joan. 17. v. 4. *Ego te clarificavi super terram: opus consummavi, quod dedisti mihi ut faciam: & nunc clarifica me tu, Pater, apud te ipsum, claritate quam habui, priusquam mundus esset apud te*. Gloriam ibi postulat Christus, quam in Deo, & apud Deum habuerat ab æterno, seu ante orbis creationem: igitur fuit ab æterno. Quis enim deprehenderet Christum habere potuisse gloriam, antequam mundus esset, quin eam ab æterno habuerit? Christus eò loci gloriam à Patre postulat, ut calamitosam istam vitam finiat, & pro Deo, & Filio Dei unigenito agnoscat. Post mortem quippè Christus futurus erat apud Patrem, ut ab æterno fuerat; & tùm obitûs dic, tùm datis Spiritûs sancti donis, ubique pro Deo, & Filio Dei prædicandus & habendus. Undè cap. 16. v. 14. ait de Spiritu sancto: *Ille me clarificabit, quia de meo accipiet, & annuntiabit vobis*. Item Joan. cap. 1. v. 14. *Et vidimus gloriam ejus, gloriam quasi unigeniti à Patre, plenum gratia & veritatis*. Et verò Christus exinaniverat seipsum; & idè illa gloria occultabatur: ut ergò agnosceretur ipse postulat cap. 17. v. 4. *Ego, inquit Patrem alloquens, te clarificavi super terram Manifestavi nomen suum hominibus, quos dedisti mihi de mundo*. Christus igitur gloriam, quam Patri suo contulerat, manifestando nomen ejus, postulat & exposcit, v. 4. & 5. & de se dicit v. 10. clarificatum esse in eis, quos dedit illi Pater, seu ab eis adoratum, ut qui parem cum Deo Patre majestatem haberet. Undè scribit S. Hilarius lib. 3. de Trin. clarificationem postulatam, & vicissim redditam ostendere eandem in utroque divinitatis virtutem, & unitatem.

Addit carnis clarificationem postulari à Filio, ut fieret æternæ gloriæ in carne suâ particeps: quam quidem gloriam consecutus est, cum resurrexit, ad cælos ascendit, & ad Patris dexteram sedit.

Reponunt Sociniani verba hæc: *Claritate, quam habui priusquam*

mundus esset, exponenda esse de Dei decreto, & prædestinatione. Verum haud dubiè Christus non usus fuisset verbo, *habui*, quod possessionem veram significat; sed verbo aut *promisisti*, aut *destinasti mihi*. Et certè si valeat hæc explicatio, nihil est, quod in alium sensum, & improprium detorqueri non possit. At urquam, rogo, electi dicti sunt habuisse gloriam apud Patrem; licet gloria ex Dei prædestinantis decreto ipsis promissa sit ac destinata? Undè quidem 2. Timoth. cap. 1. v. 9. dicitur illis gratia data ante tempora secularia; verum paulò antea, quomodò eis data fuerit, exponit Apostolus, scilicet juxta propositum, seu quia ità Deus constituerat ab æterno. At nec gratiam illi, nec gloriam ab æterno apud Patrem habuisse dicuntur: *Qui nos liberavit*, inquit ibi Apostolus, *& vocavit vocatione suâ sanctâ; non secundum opera nostra, sed secundum propositum suum, & gratiam, quæ data est nobis in Christo-Jesu ante tempora secularia.*

Immensitas, & omnipotentia; quæ sunt essentia divine attributa, Filio Dei competere probantur.

In primis Christus immensitatem habet: nam Psalm. 23. v. 1. *Domini est terra, & plenitudo ejus.* Christus autem est ille Dominus, 1. Corinth. 10. nomine enim Domini ibi Christum Apostolus intelligit. Deinde Christus omnipotens est; quia rerum omnium creator est & conservator, Joan. 1. v. 3. & Coloss. 1. v. 26. ubi sic habetur: *Quoniam in ipso condita sunt universa in cælis & in terrâ, visibilia, & invisibilia, sive Throni, sive Dominationes, sive Principatus, sive Potestates; omnia per ipsum, & in ipso creata sunt: & ipse est ante omnes, & omnia in ipso constant.* Idem Psalm. 101. v. 26. *Initio tu Domine terram fundasti, & opera manuum tuarum sunt cæli: ipsi peribunt, tu autem permanes.* Hebr. quoque 1. v. 2. *Per quem fecit & secula.*

Verum locorum illorum, licet apertissimorum, vim infringere conantur Sociniani, & ad opera Apostolorum autoritate Christi edita, aut ad futuri seculi renovationem referunt: quæ autem per Apostolos facta sunt, Christi autoritate facta fuisse probant, ex Joan. 15. v. 5. *Sine me nihil poteris facere.* Addunt verba hæc, *Mundus per ipsum factus est*, sic esse interpretanda, id est, *mundus futurus*; & sic de renovato mundo intelligenda esse, quæ Joan. 1. Coloss. & Hebr. 1. habentur. Sed ad libitum illos divinitatis perduelles detorquere Scripturas, & quidem summâ cum impietate, quis non advertat? Quæstionibus enim, quæ de Verbo moveri poterant, respondet Evangelista: undè si ab ipso quæras, quandò erat Verbum? statim audies: *in principio.* Ubi? *apud Deum Patrem.* Quid præstitit? *omnia per ipsum facta sunt, & sine ipso factum est nihil.* Quibus nihil est apertius ad Verbi essentiam, & orbis creationem exprimendam.

Cætèrùm mundum futurum non posse intelligi his verbis: *Et mun-*

duſ per eum factus eſt, patet, quia nihil vel leviter inducit in hunc ſenſum. Certè ubi ſermo eſt de mundo futuro, addit Scriptura, futurum, ut Heb. 2. v. 5. de creatione autem agebat Joannes; nec magis perſpicuè potuit docere mundum, & omnia fuiſſe à Dei Filio creata.

Coloſſ. 1. v. 16. creationem, non renovationem exprimi apertum eſt. Non enim viſibilia renovata ſunt, nempe bruta &c. nec inviſibilia, nempe Angeli, ſive Throni &c.

Hæc, quæ extant Hebr. 1. expoſitione non egent: *Quem conſtituit heredem univerſorum, per quem fecit & ſecula.*

Sed, inquiunt Sociniani, agit Apoſtolus de futuro ſeculo, quod fecit Chriſtus; quia poſt reſurrectionem tantum conſtitutus fuit heres univerſorum. At graviter hallucinantur: Filius enim unus cum Patre Deus, ab æterno genitus, ab æterno quoque heres eſt, ut & dominus; quia filiatio, & hereditas ſeparati nequeunt.

Addunt Sociniani eſto, Verbum in illis locis designetur creator; non proinde erit cauſa prima, ſed ſecundaria, & instrumentalis; quia Chriſtus hiſ in locis facere, non verò creare dicitur: immò dicuntur per eum factæ res; non verò ab eo: & ſic non tanquam prima cauſa, ſed velut ſecunda, aut instrumentalis innuitur. Prætereà hæc omnia ad ſubjectam materiam, nempe novi Teſtamenti tempus reſtringenda eſſe contendunt Sociniani; ita ut omnia quæ ſunt in Evangelio, per eum facta fuiſſe intelligantur.

Refelluntur, quia Scriptura verbis *facere & creare*, cum de creatione agit, promiſcuè utitur, ut Pſalm. 32. v. 9. Pſalm. 120. v. 2. Iſaïæ 37. v. 16. & 44. v. 24. Jerem. 32. v. 17. Act. 4. v. 24. Act. 14. v. 14. & 17. v. 14. Propoſitio, *Per*, denotat etiam Patrem, Rom. 11. v. 36. 1. Cor. 1. v. 9. Gal. 1. v. 1. Ephēſ. 1. v. 1. Cum autem de renovatione loquuntur Apoſtoli, addunt nova ut ſenſum reſtringant; ita 2. Cor. 5. v. 17. quod hîc nequaquam ſit, etiamſi Joanni conſilium ſit ſcribendi Evangelii. Aliundè Joannes initium duxit à creatione, & à verſu 14. de Incarnatione cœpit diſſerere.

Non modò rerum omnium creatio Dei Verbo, & Chriſto tribuitur, ſed & conſervatio: nam Coloſſ. 1. v. 17. *Omnia in ipſo conſtant.* Et Hebr. 1. v. 3. *Portans omnia verbo virtutis ſuæ.* Item Eccleſiæ conſervatio ipſi tribuitur, Joan. 10. v. 29. & 1. Petr. v. 5. quæ omnia ſoli Deo competunt.

Etcertè iſ eſt omnipotens, quî non modò edit miracula; ſed & edendorum nomine ſuo Diſcipulis facit & conſert poteſtatem. At ſic ſe res habet, ut conſtat ex Math. 10. v. 8. Marc. 9. v. 37. cap. 16. v. 17. &c.

Alia Dei Attributa in abſtracto ſumpta conveniunt Filio Dei.

Chriſti divinitas hinc eluceſcit, maximè quod ei attributa divina in abſtracto ſumpta, conveniant: quippè Joan. 1. v. 4. Chriſtus dicitur

vita, lux. Joan. 14. v. 6. de se ait: *Ego sum via, & veritas, & vita*. Rom. 10. v. 4. vocatur justitiæ nostræ origo. 1. Cor. 1. v. 24. Dei sapientia. v. 30. *Justitia, & sanctificatio, & redemptio*.

In aperto etiam est Christi divinitas; tùm quòd in Patre sit, & Pater in eo, Joan. cap. 10. tùm quòd sit Patris æterni Filius, heres, & imago, Hebr. 1. tùm quòd sit objectum fidei nostræ, Joan. 9. v. 36. &c. spei, 1. Timoth. 1. v. 1. charitatis, 1. Cor. 16. v. 22. tùm denique quòd habeat omnia quæ Patris sunt, juxta illud ipsius Christi, Joan. 17. v. 10. *Mea, inquit, omnia tua sunt, & tua mea sunt*.

Hoc tamen eludere conantur Sociniani, asserendo ad subjectam materiam esse referenda, scilicet ad dona Spiritûs sancti danda, & ad Christi discipulos. Sed apertè omninò tradit Christus, se habere à Patre per æternam generationem omnia quæ Patris sunt; nimirum essentiam, potentiam &c. adeò ut nihil excipiat, nec dicat, *erunt*, sed *sunt*.

Adoratio, seu latria, exhibenda Christo, sicut & Patri.

Adoratione Christus unus est cum Patre Deus; quia vera adoratio Deo soli deferenda; Christo autem esse deferendam veram adorationem testatur Psalter: Psalmo quippè 96. v. 7. ait, *Adorate eum omnes Angeli ejus*. David toto illo Psalmo satis indicat de Deo vero se loqui, deque Domini regno, & potestate, justitiâ, & gloriâ: eum enim opponit simulachris, & Diis gentium, *Confundantur omnes, inquit, qui adorant sculptilia, & qui gloriantur in simulachris suis. Adorate eum omnes Angeli ejus*. Rationem autem addit: *Quoniam tu Dominus altissimus super omnem terram: nimis exaltatus es super omnes Deos*. Hæc porrò Christo tribuit Apostolus, Hebræorum 1. v. 6. Christo igitur sicut & Patri adoratio est exhibenda; nec enim valeret Apostoli ratiocinatio, si hæc verba ab Apostolo ad Deum, & non ad Christum, qui idem Deus non esset, referrentur: nam ostendit hæc ratio Christum longè præcellere Angelis, ut qui ab illis tanquam verus Deus adorandus sit, non velut Dei minister; quemadmodum censent Sociniani. Et verò Christus fuit adoratus à Magis, Math. 2. v. 11. tùm à cæco sanato, Joan. 9. v. 38. ità enim Christus ad cæcum sanatum: *Tu credis in Filium Dei? Respondit ille, & dixit: Quis est, Domine, ut credam in eum? Et dixit ei Jesus: Et vidisti eum, & qui loquitur tecum, ipse est. At ille ait: Credo, Domine. Et prociens adoravit eum*. Ergò Christus fidem in se, & adorationem sibi debitam & probatam habet: quibus nihil est expressius ad probandam Christi divinitatem; præsertim cum non ipse modo Math. 4. v. 10. Diabolum sic repulerit: *Scriptum est enim, Domini Deum tuum adorabis, & illi soli servies*: sed & Paulus & Barnabas, Act. 14. v. 14. Lystris tam constanter à se adorationem removerint, licet eo plebis affectu potuissent uti, ut eos in obsequium Christi facilius adducerent: quin etiam Angelus Apocal. 19. v. 10. adorationem sibi à Joanne delatam ità rejecerit: *Et cecidi, inquit, ante pedes*.

*ejus, ut adorarem eum. Et dixit mihi, vide ne feceris: conseruus tuus sum, & fratrum tuorum habentium testimonium Jesu. Deum adora. Nec enim ibi tantum Angelus, ut & Apoc. 22. v. 9. à se adorationem repellit, sed Deo soli docet esse deferendam. Christus verò non solum adorationem esse sibi debitam testificatur; sed &, quod omnem tergiversationem prævertit, sibi eundem, qui Patri defertur, honorem postulat, Joan. 3. v. 3. *Ut omnes, inquit, honorificent filium, sicut honorificant Patrem.**

Præterea Joan. 14. v. 1. *Creditis in Deum; & in me credite.* Ibi non solum fidem haberi in se postulat Christus; sed & eandem quam in Patrem. Porro in solum Deum fides est habenda; nec potest quis salutem suam rebus creatis credere, & spem in illis collocare: *Maledictus enim, ex Jerem. 17. v. 5. qui confidit in homine... Benedictus vir, qui confidit in Domino.* Credendum autem fuisse in Christum, antequàm glorificaretur, ipse Christus docuit, Joan. 3. v. 18. *Qui credit in eum, non judicatur: qui autem non credit, jam judicatus est: quis non credit in nomine unigeniti Filii Dei.* Cum ergò Christus haberi velit eandem in se fidem & spem, quam in Patrem; unus certè debet dici cum Patre.

Item Isai. 45. v. 23. habetur: *In memetipso juravi &c. & v. 24. Quia mihi curvabitur omne genu:* quæ verba Christo tribuit Apostolus, Rom. 14. v. 10. 11. & 12. *Omnes enim stabimus ante tribunal Christi: scriptum est enim: vivo ego, dicit Dominus, quoniam mihi flectetur omne genu, & omnis lingua confitebitur Deo. Itaque unusquisque nostrum pro se rationem reddet Deo.* Et ipse ibidem dicitur Deus, Dominus, Judex supremus. Igitur ex Isaiâ, Apostolo interprete, Christus Deus est, Dominus, Judex supremus, & illi curvandum est omne genu: nam de illo Deo disserit Isaiâs, qui de seipso, ut habet, ait: *Ego sum Deus, & non est alius.* At Apostolus de illo eodem Deo, qui Christus est, sermonem habet. Ut enim hanc fidem confirmet, Domini nomen septies pro Christi nomine usurpat, & ita concludit: *Unusquisque nostrum rationem pro se reddet Deo;* nempe illi supremo Judici, ante cujus tribunal stabimus; quem solum esse venturum speramus; & cujus futuram hinc gloriam vocat Apostolus, Titi 2. v. 3. *Magni Dei gloriam.* Ipse ergò solus Deus est, & magnus, in quo salus futura est, ex Isaiâ ibidem v. 20. & ex Act. cap. 4. v. 12.

Plures Deos sibi non subordinatos Sociniani fingunt, quos verè & propriè dictos Deos vocant: essentiam tamen divinam multiplicari negant. At hæc omnia inter se minimè consentiunt: asserere enim Deum esse, & illi negare Dei naturam, idem est ac tribuere alicui hominis naturam, & negare hominem esse.

Non major divinitas ab Ethnicis olim deferabatur aliis à Jove Diis, quàm quæ à Socinianis Christo tribuitur. Nam asserere unum esse Deum à se, ut aiunt, & Christum quidem esse Deum acceptâ divinitate dependenter à Patre, est relabi in sententiam idololatrarum, qui unicum Deum colebant, à quo cæteri divinitatem accepissent.

His probationibus vis major accedet, ubi observatum fuerit (ut vel leviter attendenti erit obvium) nulli Angelorum, vel alteri creaturæ unquam fuisse concessa quæ de Christo dicuntur; nempe Deum esse: ejus Patrem Deum; cum adorandum esse ab Angelis: ipsum mutationi non esse obnoxium; habere omnia quæ Dei sunt; esse creatorem. In Scripturis autem impunè non ferunt, qui Dei nomen, aut cultum sibi deferri patiuntur. Nam Act. 12. v. 22. Herodes patitur sibi acclamari voces Dei, & non hominis; & statim percutitur ab Angelo, *ed quòd non dedisset honorem Deo*. Si ergò nec homini, nec Angelo, nonnisi impiè potest tribui Dei nomen, aut adoratio: si autem Verbo & Christo in Scripturis tribuatur; certè Christus verus, & unus cum Patre Deus est; quia Deus unicus est. Cum enim Scriptura nos tanto studio ab Idololatriâ avocet; Dei nomina, dignitatem, potestatem, & cætera attributa in Christum non transtulit, *nisi quia Deus verus est*.

Christus se Deum profitetur.

Tandem profitetur Christus se unum esse cum Patre Deum; & seipsum talem esse probat, Joannis capite decimo: undè blasphemix eum Judæi accusant, quòd cum homo esset, seipsum faceret Deum: nam de seipso dixerat v. 27. &c. *Oves mea vocem meam audiunt: & ego cognosco eas, & sequuntur me: & ego vitam æternam do eis: & non peribunt in æternum: & non rapiet eas quisquam de manu mea. Pater meus quod dedidit mihi, majus omnibus est: & nemo potest rapere de manu Patris mei: Ego & Pater unum sumus. Sustulerunt ergò lapides Judæi, ut lapidarent eum. Respondit eis Jesus: multa bona opera ostendi vobis ex Patre meo, propter quod eorum opus me lapidatis. Responderunt ei Judæi; de bono opere non lapidamus te; sed de blasphemiâ, & quia tu, homo cum sis, facis teipsum Deum. Igitur Christus à se removet hanc blasphemiam, ut jam expositum est. Et v. 37. Si non facio opera Patris mei, nolite credere mihi: si autem facio, & si mihi non vultis credere, operibus credite, ut cognoscatis, & credaris, quia Pater in me est, & ego in Patre. Ergò Christus ad opera quæ à solo Deo proficisci poterant, remittit, ut se Deum esse, & unum cum Patre probaret. An apertius loqui potuit, aut certiori testimonio naturam suam comprobare? cum tam apertè Deum se esse profiteatur, & unum cum Patre; nec alicubi negetur Deus esse, vel affirmetur factus Deus, aut constitutus; imò ne in eam sententiam veniamus, præcavent Apostoli, cum tam disertè asserant eum esse & fuisse Deum ab æterno, orbis creatorem, vitam, lucem; factum verò fuisse hominem. Quod iterum Christus confirmat Joan. 17. v. 10. *Mea omnia tua sunt*.*

Hoc nomen Dei sumendum esse pro eo qui habet potestatem, vel divinitatem à supremo Deo, contendunt Sociniani, & idèd haberi cap. 10. v. 35. 36. Si illos dixit Deos, ad quos sermo Dei factus est, & non potest solvi Scriptura: quem Pater sanctificavit, & misit in mundum, vos dicitis, quia blasphemias: quia dixi, Filius Dei sum? Ex his enim

verbis concludunt cum aliam divinitatem à Patre habere; cum sanctificetur & mittatur à Patre, qui nec potest sanctificari, nec mitti in mundum.

Verum hæc profert Christus non tam ut rationem formalem Deitatis suæ exprimat, quàm ut neget se esse blasphemum, quòd se Filium Dei, & unum cum Patre Deum esse dixisset: & argumentum ità ducit ex Psal. 81. v. 6. à minori ad majus: cum blasphemum non sint magistratus, ad quos sermo Dei factus est, si ob communicatas quasdam Dei proprietates aliquâ ratione Dii dicti sunt; certè nec hanc ob causam blasphemix sum inculandus, cum Propheta Deum me vocarint, ut Isaias. Immo cum ego mediator missus sim, & à Patre sanctificatus, & in mundum missus; longè præstantiori ratione divinitas mihi competeret, quàm Magistratibus. Porro autem sanctificatus dicitur ratione humanæ naturæ, quam & operante Spiritu sancto ad mediatoris munus assumpsit, Lucæ 1. v. 35. *Quod nascetur ex te sanctum, vocabitur Filius Dei.* Et ad Heb. cap. 7. v. 26. *Talis enim decebat, ut nobis esset Pontifex, sanctus, innocens, impollutus, segregatus à peccatoribus.* Missum quoque se dicit, ut significet se ab æterno apud Patrem fuisse.

Frustrâ etiam inferunt Sociniani inferiorem esse mittente missum. Nam æqualis ab æquali mitti potest: Petrus enim & Joannes Act. 8. v. 14. mittuntur Samariam ab Apostolis, quibus inferiores non erant; imò Petrus primatum acceperat. Item Paulus Act. 15. v. 25. ab Apostolis ad Ecclesias mittitur; qui tamen de seipso ità loquitur 2. Corinth. 2. v. 11. ut qui nullâ in re inferior fuerit summis Apostolis.

Denique in hoc cap. Joan. 10. veræ suæ divinitatis argumenta tradit Christus: nam v. 28. ait, *Ergo vitam æternam do eis*: solus autem Deus dare vitam æternam potest, Rom. 6. v. 23. *Gratia autem Dei, vita æterna*, 1. Joan. 5. v. 20.

Aliud argumentum desumitur ex eodem cap. 10. v. 30. *Ego, inquit, & Pater unum sumus*; unitate scilicet essentix: etenim indè probat non posse magis sibi eripi oves, quàm Patri; & proindè non minorem habere se potestatem, quàm habeat ipse Pater: potentia enim Dei, potentia est Christi: nec potentix Dei infinitæ particeps fieri potest res creata. Et sanè si de unitate voluntatis & consensus locutus fuisset Christus, cum dixit eò quod non magis sibi ereptum iri oves, quàm Patri; quia idem esset quod Pater; numquid non reponi potuisset quod extat apud Apost. Rom. 7. v. 18. ipsum quidem præclata velle, quæ non posset exequi? *Velle adjacet mihi, perficere autem bonum non invenio.* Quamobrem hæc Christi verba, *Unum sumus*, idem significant, ac indivisam habemus essentiam; & idè eandem potentiam. Ità quoque Judæi intellexerunt; undè in eum, ut in blasphemum, insurrexerunt; quòd se & Deo Patri æqualem faceret: Nam v. 33. *Quia tu, homo cum sis; facis teipsum Deum.* Non potest quippè fieri, ut, qui tantummodò homo est, sit naturâ Deus, & Filius Dei. Christus autem non inficiatur se verum esse Deum; si enim illud inficiatus fuisset; æquitatis & pietatis ipsius fuisset illos ab errore revocare, sensuque Sociniano divinitatem

tem suam exponere, quod facillimè Judæorum animos pacasset: nec enim Judæi abnuissent Christum Deum esse divinitate minori, & participatâ.

Christus seipsum esse Deum probat, Ma. h. 11. v. 4. ubi hæc Isaia verba: *Ecce Deus vester ultionem adducet retributionis; Deus ipse veniet, & salvabit vos. Tunc aperientur oculi cæcorum, & aures surdorum patebunt. Tunc saliet sicut cervus claudus: sic de se ipso exponit, euntes renuntiate Joanni quæ audistis, & vidistis: cæci vident &c.* Ipse ergo Deus Israël est, cujus adventus prædicitur, & qui nomine *Elohim* insignitur, cum simpliciter enuntiatur, & vocatur v. 4. Deus vester, v. 2. Deus noster, & qui venturus dicitur, etiam Isaia 25. v. 9. *Ecce Deus noster iste, expectavimus eum, & salvabit nos.* Venturus ergo prædicitur Deus, qui cæcis visum restituat &c. Porro autem proficitur Christus se illum Deum esse; cum aliundè hæc præstiterit quæ in Prophetâ continebantur.

Probat iterùm Christus se unum esse cum Patre Deum; quia ejus est filius unigenitus, & ex ejus substantiâ: si enim Pater est homo, sequitur Filium esse hominem: si verò Deus est, Deum esse quoque Filium necesse est. Sic ejus mentem ceperunt Judæi; Joan. enim 5. v. 17. *Jesus autem respondit eis: Pater meus usque modò operatur, & ego operor. Propterea ergo magis querebant eum Judæi interficere; quia non solum solvebat sabbatum, sed & Patrem suum dicebat Deum, æqualem se faciens Deo.* Quòd Deum dixisset patrem suum, & se ei æqualem fecisset; ideò voluerunt eum interficere. An autem ab eâ sententiâ eos avocare conatur? minimè. Imò in eâdem probandâ totus versatur, scilicet se Deum verum, & Dei filium, & unum cum Patre Deum æqualem testatur; ut qui omnia exequatur, quæ Pater; vivificet, ut Pater; judex quoque sit supremus; idemque sibi qui Patri, tribuendus sit honos; & tandem in sui cognitione, æquè ac in Patris, sita sit hominum salus. Quippe v. 19. ità de se loquitur Christus: *Quacumque enim ille fecerit, hæc & filius similiter facit.* v. 21. *Sicut enim Pater suscitavit mortuos, & vivificat: sic & filius, quos vult, vivificat. Neque enim Pater judicat quemquam: sed omne judicium dedit filio, ut omnes honorificent filium, sicut honorificant Patrem. Qui non honorificat filium, non honorificat patrem, qui misit illum.* In sui etiam, & Patris notitiam vitam æternam æquè collocavit, & se unum esse testatur cum Patre: Joan. enim 14. v. 6. *Ego sum via, & veritas, & vita. Nemo venit ad Patrem, nisi per me. Si cognovissetis me, & patrem meum utique cognovissetis: & amodò cognoscetis eum, & vidistis eum. Dicit ei Philippus: ostende nobis patrem, & sufficit nobis. Dicit ei Jesus: tanto tempore vobiscum sum, & non cognovistis me? Philippe, qui videt me, videt & patrem. Quomodo tu dicit: ostende nobis patrem? Non creditis, quia ego in patre, & pater in me est? Verba, quæ ego loquor vobis, à meipso non loquor. Pater autem in me manens, ipse facit opera. Non creditis, quia ego in patre, & pater in me est? Sed si Christus discrepasset à patre, quâ Deus est, an sic ille fuisset locutus? Imò videtur quasi admirari,*

quod se, & non patrem cognoscerent: *Quomodo tu dicis, inquit, ostende nobis patrem? Non creditis, quia ego in Patre, & pater in me est?* Ità autem est in Patre, & pater in eo, ut sint unum, & nunquam sic solus, Joan. 8. v. 16. *Et si judico ego, judicium meum verum est, quia solus non sum, sed ego, & qui misit me pater.* Item quæ facit pater, filius quoque facit; & quæcumque filius facit, & ipse pater facit: Nam Joan. 5. v. 19. *Quæcumque ille fecerit, hæc & filius similiter facit.* Joan. etiam 11. v. 4. Christus de Lazari infirmitate loquens: *Infirmitas hæc, inquit, non est ad mortem, sed pro gloriâ Dei.* Ex quibus optimè infert S. Hilar. lib. 9. de Trin. Christum esse unum cum Patre Deum; ut qui eundem sibi honorem, qui patri defertur, & eandem in se fidem, quam in Patrem, exigat.

Æqualitatem Sociniani in eo reponunt; quod quæ Dei sunt, virtute Dei, & tanquam Deus, fecerit Christus. At sic pariter Apostoli Dii fuissent; cum similia Dei virtute, imò majora promittente ipsò Christo, præstiterint. Quod à fide tamen alienum omninò esse nemo non dixerit.

Evangelistæ, & Apostoli divinitatem Christi profitentur.

1. S. Petrus Ecclesiæ caput. Math. 16. v. 16. *Tu es Christus filius Dei vivi.* Idem Luc. 5. v. 8. piscium multitudinem retibus conclusam animadvertens, procidit ad genua Jesu, dicens: *Exi à me, quia homo peccator sum, Domine.*

2. S. Thomas, Joan. 20. v. 28. ità ad Christum: *Dominus meus, & Deus meus.* His auditis quis non adducatur ad fidem? Nihil enim apertius proferri potest; nec ullus in scripturis, nisi verus Deus, dicitur Dominus Deus, sicut à S. Thomâ vocatur Christus, dum Christum ipsum coram cæteris Apostolis alloquitur. Quod proculdubiò Christus non tulisset, nisi veri Dei fidem contestatus fuisset S. Thomas: nam tùm ipse Thomas, tùm cæteri Apostoli fuissent in errorem gravissimum adducti, non modò silentio Domini, sed & approbatione palàm adjunctâ: *Quia vidisti me Thoma, credidisti.*

Dicunt Sociniani pronomen, *Meus*, vocis Dei vim restringere, quasi esset Deus Thomæ, & non aliorum. Sed an ità sentiebat S. Thomas, ut Christum vellet sui solius Dominum & Deum esse? quantum verò S. Thomæ sensu aliena sit hæc cogitatio, palàm est ex adjunctis. De fide quippè Apostolorum relationi non adhibitâ veniam postulat à Christo, cujus divinitatem contestatam habet, tùm ex incredulitatis sibi exprobratâ notitiâ, tùm ex adhortatione ad fidem veram: *Beati qui non viderunt, & crediderunt.* Familiaris est etiam hominibus piè credentibus ejusmodi exclamatio subitanea: *Deus meus, Dominus meus.* Et reverâ nisi S. Thomas ità sensisset, eum sic turpiter errantem non laudasset Christus.

3. S. Paulus Ephesi Presbyteros alloquens, Act. 20. v. 28. *Attendite, inquit, vobis, & universo gregi, in quo vos Spiritus Sanctus*

posuit Episcopus regere Ecclesiam Dei, quam acquisivit sanguine suo. Nomini Dei ibi præfigitur articulus; & ille unus Deus est Christus, qui solus acquisivit Ecclesiam sanguine suo: nec enim sanguis ille Dei Patris dici potest; quia reverâ Dei Patris non est, sed ipsius Christi. Ut autem pastorum sollicitudinem excitet Apostolus, quanti sit facienda Ecclesia, eorum oculis subjicit; utpotè pretio, quo majus excogitari nequit, comparata, nempe sanguine Dei. Et sanè, si sanguis alterius esset, quàm Dei, nihil concluderet Apostolus: imò in errorem induceret. Ideò Syriaca editio loco *Dei*, legit *Christi*. Et sic interpretatur, cujus sit ille sanguis.

Rom. 9. v. 5. Christum super omnia Deum benedictum scribit Apostolus: *Ex quibus*, inquit, *est Christus, secundum carnem, qui est super omnia Deus benedictus in secula, amen.* Nihil magnificentius est hoc testimonio: Christum enim ut merum hominem; Patriarchis non inferiorem modò, sed & verum anathema, seu virum execrabilem falsò existimabant Judæi; quia scilicet Deum se dixerat. Hæc autem verba idèò subjungit Paulus adversus falsam illam existimationem; & ait Christum esse Deum, & benedictum in secula; secundum carnem quidem esse hominem, sed secundum spiritum esse Deum: undè apponitur *amen*, quod soli divino nomini adjungitur, & verbum *εὐλογητός*, quod ubi de Deo agitur, adhiberi solet, præsertim cum additur, *in secula*.

Quod præclarum testimonium ut evertant Sociniani, hæc verba, *qui est super omnia*, puncto sejungunt à superioribus, ita ut ad Christum non referantur; sed ad Deum; perindè ac si sensus esset: ille qui est super omnia Deus, sit benedictus in secula: adeò ut idem valeret, *benedictus*, ac benedictus sit. Sed tam in removendâ illâ interpunctione, quàm referendo nomine *Deus*, omnes omninò codices Græci consentiunt: imò juxta familiarem Scripturarum consuetudinem interpunctio illa rejicienda est. Nam ubi vox *benedictus* significat *benedictus scilicet*, ei ad quem refertur, anteponi solet, ut Luc. 1. *Benedictus Dominus Deus Israël.* Cum verò postponitur, adjectivi locum habet, ut isto in loco de quo agitur; undè non subauditur verbum *sit*. Et certè nec constructio, nec sententia ejusmodi suppositionem exigunt; præsertim cum sensus tali additamento mutetur. Hic etiam exclamatio non est, imò exprobratio, quòd Judæis beneficia à Christo præstita in exitium eorum vitio proprio cessissent.

Tit. 2. vocat S. ipse Paulus Christum magnum Deum: nam v. 13. *Esperantes beatam spem, & adventum gloria magni Dei, & Salvatoris nostri Jesu Christi, qui dedit semetipsum pro nobis, ut nos redimeret ab omni iniquitate.* Verba hæc, *magni Dei*, ad Christum non refertur docent adversarii, sed ad Patrem; quia conjunctio hæc, *magni Dei, & Salvatoris*, significat gloriam Patris illustratum iri, cum Christus ad judicium venerit. Addunt nec obstarè quòd Pater ad judicium non veniat; cum in ferendo judicio Patris legatus futurus sit Filius. Sed apertius est ibi de solo Christo agi, & eum vocari magnum Deum,

utpotè Patri æqualem. Licet autem sit conjunctio, & *Exspectantes beatam spem, & adventum glorie magni Dei, & Salvatoris nostri Jesu Christi*: Non indè sequitur duas ibi exprimi personas, sed unam; sicut nec in hoc loco, 2. Cor. 1. v. 3. *Benedictus Deus, & Pater Domini nostri Jesu Christi*, non dux personarum, sed unica innuitur. Et quidem Apost. in istâ epist. ad Tit. cap. 2. de Deo Messîa solo loquitur v. 11. *Apparuit enim gratia Dei Salvatoris nostri omnibus hominibus. v. 12. erudiens nos.* Hæc autem apparitio Dei Salvatoris, non Patris fuit, sed Filii: undè v. 13. innuit iterùm magnum illum, non Salvatorem jam, sed judicem venturum; seu non in habitu humili, sed in Majestatis Divinæ splendore. *Exspectantes, inquit, beatam spem, & adventum glorie magni Dei, & Salvatoris nostri Jesu Christi.* Ipse porro solus Filius ibi dicitur ille magnus Deus, de quo sermo est.

4. S. Judas Apost. in suâ epist. v. 5. sic habet: *Commonere autem vos volo, scientes semel omnia; quoniam Jesus populum de terrâ Ægypti salvans, secundo eos, qui non crediderunt, perdidit: v. 21. Vosmetipsos in dilectione Dei servate, expectantes misericordiam Domini Nostri Jesu Christi in vitam æternam. v. 25. Deum Salvatorem vocat: Soli Deo Salvatori nostro, per Jesum Christum Dominum nostrum gloria.* Jesus ergò, qui à peccatis morte suâ liberavit, ex Ægypto populum eduxit: ipse est qui vitam æternam confert: ipse Deus Salvator, per quem ut mediator, & patrem, & ipsummet filium laudamus.

Frustrâ reponunt adversarii Græcis in exemplaribus non extare nomen, *Jesus*, sed, *Domini*: injuriâ siquidem id dicunt: in codicibus enim Græcis apud Robertum Stephanum reperitur. Et etiamsi vox *Dominus* esset loco *Jesus*, versus antecedens ibi de Christo agi evinceret. Nam indicat v. 4. impios, qui præterierant, Christum negasse: *Solum dominatorem & Dominum Nostrum Jesum Christum negantes. Commonere autem vos volo scientes semel omnia, quoniam Jesus populum de terrâ Ægypti salvans, &c.*

Ex his & superioribus inferet, qui verbum sacrum à Deo acceptum reverâ crediderit, qui Christo & interpretibus Christi Apostolis fidem adhibuerit, nullam dubitandi de Filii divinitate superesse rationem. Nam non solum Scripturæ, quæ Deum unum prædicant, Deorumque multitudinem remonent, Christo nomen Dei, naturam, attributa Deo essentialia, & latriam seu adorationem tribuunt; sed etiam se Deum proficetur ipse Christus; & eum pro Deo uno cum Patre profitentur pariter Apostoli, Evangelistæ, ac Discipuli.

Trium priorum seculorum consensione Filii seu Verbi Divinitas confirmatur.

In referendis Sanctorum Patrum ante Nicænam Synodum auctoritatibus, quam secuti sumus S. Hilarii methodum, sequemur continuò; ut de illorum Doctorum, & primorum temporum fide æquum feratur

Judicium. De hoc uno Socinianos præmonitos velim, præjudicatis depositis, suam conscientiam coram omnium supremo Judice consulant, & attentè considerent, num sua de Dei verbo doctrina sit antiquorum Patrum, ac ipsius Ecclesiæ fides.

Mihi tamen parcant Sociniani, quòd ad conscientiæ tribunal eos advocem; utiliter admodum, ut spero, seipsos coram illo sistent, modò veterum Patrum doctrinam, doctrinæ seriem, & ex doctrinâ consecutiones mecum expendant. Quantus esset benignitati divinæ gratulandi locus, si quibusdam saltem daretur prodesse! quod ut labore possim consequi, antiquorum dogmata summâ fide refero.

S. Clemens Romanus.

S. Clemens Romanus S. Petri discipulus in eximiâ ad Corinth. ep. Christum Deum vocat, adorat, operationem divinam ei tribuit; & proinde Christum cum Patre Deum unum nomine & naturâ proficitur cum universâ tunc temporis Ecclesiâ. Quæ superiori artic. retulimus loca, non repetimus. S. Clemens igitur Christum ut Deum adorat, & per Christum, inquit, *oculi cordis nostri aperti sunt*: quod solus Deus efficere potest. Angelis eum longè præstantiorem esse asserit; quia illi Psalm. 101. sunt ministri; ipsi verò filius Psalm. 2. & Psalm. 109. Ait denique Apostolos missos, qui Christi Dei regnum annuntiarent: *Annuntiantes*, inquit, *regni Dei adventum*.

Sanctus Ignatius.

S. Ignatius Episcopus Antiochenus in epist. ad Ephes. utramque Christi naturam, Dei scilicet, & hominis distinguit; necnon docet Christum quâ Deum, esse vitam veram; impassibilem ratione, naturæ divinæ; ratione verò naturæ humanæ, passibilem; corda scrutari, ut Deum nostrum; in nobis, ut in templo, habitare; æternum esse, non factum. Sic ei tribuit quæ soli Deo vero & unico competunt. Medicus autem unus est, inquit, & carnalis & spiritalis; factus & non factus; in principio Verbum, postea verò & homo ex Mariâ Virgine; impassibilis in corpore passibili. In Epist. ad Magnesianos sic habet: *Jesus Christus, qui ante secula genitus est à Patre*. Et paulò post: *Unus est Deus omnipotens, qui manifestavis seipsum per Jesum Christum filium suum, qui est Verbum ipsius non prolativum scilicet, sed substantiale. . . . in omnibus beneplacens suo genitori*. Asserit igitur Christum esse ante secula, esse filium Dei, esse verbum substantiale. Sic non modò Dei nomen Christo tribuit, sed naturam, & omnia divinæ naturæ attributa, & in abstracto. In epist. ad Rom. ita loquitur: *Concedite mihi, ut sim imitator passionum Dei mei*; quem antea in ipsâ epistolæ inscriptione Deum nostrum appellaverat.

Sanctus Polycarpus.

S. Polycarpus S. Joannis discipulus, & Smyrnenſis Epiſcopus in ep. ad Philipp. ſcribit Chriſtum gratiam atque pacem conferre, electis coronas impertiri, & finem bonorum operum eſſe. Porro Deus ſolus gratiam & pacem largitur, coronas electis confert, & bonorum operum eſt finis.

Eccleſia Smyrnenſis in epiſt. de martyrio S. Polycarpi Epiſcopi, refert hunc ſanctum Martyrem, Chriſtum ut æternum Pontificem, & omnipotentem Dei filium adorari cum Patre, & Spiritu Sancto. Locus extat ſuper. attic. Sic Epiſcopi ab Apoſtoliſ inſtituti doctrinam hanc, ut Eccleſiæ dogma conſtans, admittebant; Chriſtumque nomine, naturâ, adoratione, & profeſſione unum cum Patre, & Spiritu Sancto profitebantur. Et verò Eccleſiæ, quas regebant, & inſtruebant, S. Clemens Rom. S. Ignat. & S. Polyc. reclamarent dubio procul, ſi quid novi ab Epiſcopis illis fuiſſet inductum, præſertim circa divinam naturam, pro cuius unitate tot & tam gravia tormenta patiebantur, ut tanquam veri Martyres occubuerint.

Sanctus Juſtinus.

S. Juſtinus Philoſophus, & Martyr in dogmate, quod fuerunt poſtea profeſſi Nicæni Patres, ſitam eſſe docet Religionem Chriſtianam; Chriſtum nempe nomine & naturâ Deum eſſe; divina ei convenire attributa; & ab omnibus eſſe adorandum. Primum docet in Apol. ad Anton. ubi calumniam Atheiſmi repellit: *Proſitemur nos talium, qui habentur (ab Ethnicis ſcilicet) Deorum eſſe expertes, & atheos; ſed non veriſſimi illius Dei Patris &c. Verum hunc ipſum, & qui ab eo venit. . . Filium, & Spiritum propheticum colimus, & adoramus.* Et infra: *Deum ſolum adoramus, & vobis, ſcilicet Imperatoribus, in aliis rebus laſi inſervimus.* Indicat ibidem Filium aliam eſſe perſonam à Patre, licet Deus ſit cum Patre; nec proinde pro Deorum multitudine ſtare Chriſtianos, ut inde falſò colligebat Tripho Judæus.

Item in Dialogo cum Triphone ait Chriſtum, & Dei Filium, & Deum in Scripturis nominari; & ei omnia, quæ Dei ſunt, ut adorationem, convenire: quæ cum Tripho Judæus ferre non poſſet, probat Juſtinus Chriſtum à Prophetâ Dei virtutem, & Deum eſſe nuncupatum; ex Subſtantiâ Patris eſſe; & ſic unum eſſe cum Patre Deum. Locus citatus eſt art. ſuperiori. Oſtendit quoque contra Triphonem S. Juſtinus Chriſtum Deum eſſe verum, & Dominum, & Regem: *Chriſtus enim Rex, inquit, & Sacerdos, & Deus, & Dominus, & Angelus ſeu nuntius, & homo, & Archidux, militiæque Princeps, & lapis, & puer natus; & perpeſſioni primum obnoxius; deinde in cælum revertens, & inde rediturus cum gloriâ & perpetuum obtenturus regnum depradicatus eſt.* Cum autem inſtaret Tripho, exigeretque ut in Chriſto adimpleta Pro-

phetiz probarentur ; Messiz divinitatem prius velle se probare responder sanctus Justinus , & Christum Deum , & Dominum , & æternum vocat : Cumque hanc fidei doctrinam irrideret Tripho , his verbis : *Nam quod ais ante secula Deum fuisse hunc Christum , ac deinde natum fuisse hominem , & non ex homine , non modò admirabile , & præter fidem mihi esse videtur ; verùm etiam stultum.* Pluribus eandem veritatem à Triphone impugnata confirmat sanctus Justinus , confutatque hæresim , quæ Christum ex electione factum esse docebat , & ex homine genitum hominem tantum esse , ut modò censent Sociniani ; probatque eum esse Creatorem Universi , & Deum verum , ex Gen. & ex aliis Scripturæ capiibus , præsertim verò ex Prophetiarum auctoritate , quas Christus solus implevit. *Sunt nonnulli , inquit , ò amici dixi ex genere nostro , profitentes ipsum Christum esse ; sed hominem ex hominibus genitum esse affirmant ; quibus non assentior : neque id sanè multi , qui in eadem mecum sententia sunt , dixerint : Si quidem non humanis traditionibus & doctrinis jussi sumus à Christo ipso credere , sed eis quas beati Propheta promulgarunt , & ipse Christus tradidit.* Sicque Christum esse verum Deum , & æternum asserit ; testaturque nihilominus à Christianis non alium adorari Deum à Deo Judæorum : *neque alium , inquit , vestrum ducimus Deum ; sed illum ipsum qui eduxit patres vestros de terrâ Egypti in manu forti , & brachio excelsò ; neque in alium quemquam speramus ; non enim extat ; verùm in eum , in quem & vos , Deum Abrahæ , & Isaac , & Jacobi.* Sic ergò Christus à Christianis habebatur verus Deus Abrahæ & Israelis , & idem qui à Judæis adorabatur ; & proinde unus cum Patre Deus.

Si autem S. Justin. & Christiani in sententiâ Socinianorum fuissent versati , facilè Judæorum instantiam repulissent , contestati Christum non esse Deum ejusdem naturæ , cujus erat Pater. Hinc non fuisset cur Tripho obstupesceret , & vitio verteret , quòd Christiani adversus Ethnicos cum Judæis unum Deum colere se profiterentur ; & tamen crederent Patrem Deum , & Filium Deum ; sicque multos Deos cum Ethnicis inducerent , sibi que ipsis adversarentur : nec esset cur S. Justin. totus esset in probandâ divinitate Christi , & assereret illius ex Deo Patre generationem inenarrabilem esse ex Isa. c. 53. Nihil enim mysterii occurreret , si juxtâ Socinianos Christus res tantum creata esset.

Querenti Triphoni quomodò probare posset alium esse Deum præter Universi Creatorem , & illum Deum nasci ex Virgine ; S. Justinus respondet , & ostendit alium dici verum Deum in Scripturis præter Creatorem , nempe eum qui se videndum antiquis præbuit ; illum autem Deum non fuisse Patrem , quia Pater à nemine visus est , neque cum aliquo collocutus est : ergo Deum , seu Filium , *alium ab eo esse , qui cuncta creavit , numero dico , non animi conceptione.* Porro generationem ejus ab æterno ex substantiâ Patris , & divinam illius naturam ità delineat : *Præter hunc (Universi scilicet Conditor) Deum & ipsum , qui Abrahæ apparuit , dicere necesse est : alius etiam est , & di-*

citur *Deum*, & *Dominus*, *Filius* nimirum ineffabilis; & *unigenitus*; & *singularis*, *Dei germen* ante creaturas omnino universas à *Patre* editum. Addit virtutem illam esse *Dei*, ac *Deum* à *Prophetâ* nuncupari; non ita ut solis lux, solis vocabulo numeratur, sed numero alterum quiddam esse; non tam in rescissione, tanquam *Patris substantia* secetur, uti cetera omnia divisa atque secta non sunt eadem atque erant ante sectionem. Variis *Scripturæ* locis utitur, ut *Pl. 25. Thronus Deus tuus*, &c. 45. *Ipse est Dominus Deus tuus*, & adorabunt eum. Hisce verbis satis diserte est judicatum amplissimum eum habere à rerum *Creatore* testimonium; adorandum eum nimirum esse & *Deum*, & *Christum*. Et infra sic *Christum* à *Davide* merito appellatum *Deum* asserit. *David* eum ante *Solem* & *Lunam* ex utero natum iri juxta consilium & voluntatem *Patris* cecinit: & *Deum* fortem, & adorandum esse *Christum* declaravit.

Insurgit adversus eum blasphemus *Tripho* his verbis *Sit sanè vester, qui ex gentibus estis, Dominus Christus, & Deus designatus..... nos autem Dei, qui & hunc ipsum fecit, cultores cum simus, non indigemus ejus nec professione, nec adoratione. Cumque instaret ex Isaïæ 42. Ego Dominus Deus, & alteri gloriam meam non dabo. Respondet S. Justin. Deum gloriam suam soli Christo ex eodem Prophetâ dare. Et infra. Nam si dicta Prophetarum intellexissetis, non inficiati estis ipsum esse Deum, singularis, & ingenti ineffabilisque Dei Filium. Deinde confutat eos, qui dicerent eum virtutem esse à *Patre* indistinctam, quâ *Pater* pro libito utatur; & docet esse *Deum* numero à *Patre* distinctum, scilicet personâ, non naturâ: germen hoc esse ante creaturas omnino universas: tum germen ipsum aliud esse à generante, quod unusquisque confitebitur. Sanè universum opus exscribendum esset: congesta enim ibi sunt pro divinitate *Christi* argumenta: satis sit pauca subjicere. Primum inter *Josué* & *Jesum* interponit discrimen, quod *Christi* divinitatem eadem cum *Patre* certò evincit: Namque, inquit, temporaneam ipsis (*Josué* scilicet) tribuit hereditatem, utpotè qui neque *Christus* *Deus* esset, neque *Dei Filius*: Hic autem (nempè *Christus*) post sanctam Resurrectionem possessionem nobis dabit sempiternam. *Deus* ergo est unus cum *Patre*, qui sempiternam vitam largitur. Dein addit à *Christo* habuisse *Josué* sistendi solis virtutem, & *Christum* antiquis se præbuisse conspiciendum.*

Neque verò quæstio est, an *S. Justinus* adversus *Triphonem* rectè disserat; nobis satis sit, eum tunc id supposuisse cum *Triphone*, & adversus *Ethnicos* in utrâque *Apol.* contendisse unicum *Deum* adorandum; & professum fuisse contra *Triphonem*, præter illum conditorem universorum, personam aliam, videlicet *Filium*, *Deum* esse verum, æternum, immensum, omnipotentem, *Deum* *Abrahæ*, & *Judæorum*, seu quem *Judæi* recolerent; & hanc *Ecclesiarum* esse fidem, & *Religionis Christianæ* fundamentum.

Ex quibus sequitur ex *S. Justino* *Filium* esse unum cum *Patre* *Deum*,
&

& ab æterno ratione ineffabili genitum, & ex patris substantiâ; quam substantiæ unitatem, & generationem ineffabilem, & æternam expressit indubitanter, quòd filius sit patris ratio & sapientia. Idem in Apol. ad Anton. opponentibus Ethnicis post Deum parentem secundas partes tribui à Christianis homini crucifixo, hoc fatetur; & ait gentiles mysterium hoc ignorare, & Christianos adhærere Deo ingenito per Filium ipsum, qui virtus Dei, ratio, & verbum ejus fuit. . . . *Et quod rationem, & verbum, quod primum est genimen Dei, absque missione genitum esse dicimus, Jesum videlicet Christum &c.* Addit præter communem mortalium nativitatem, Filium ex Deo rationem, & verbum, & genitum dici: *Jesus Christus, inquit, unus & solus propriè Filius Deo genitus, qui ratio & verbum ejus, & primogenitus, & virtus est.* Ergo ratio verbum est; non quòd in tempore factus sit Dei Filius; sic enim ad cæterarum rerum creationem tantum accederet; sed quia ab æterno genitus solus propriè Filius est, utpotè ex Patris substantiâ. Idem probat in dial. cum Triphone, ut mox retulimus. Item Deo essentielles perfectiones Filio Dei ascribit, ut æternitatem in apol. ad Anton. & in dial. cum Triphon. Eadem habet in apol. ad Senat. ubi ait Christum esse solum Dei Filium, æternum, & ante creatas res, & ab æterno gigni. Porro Filius ejus, qui solus propriè dicitur Filius, verbum, simul cum illo ante creaturas & existens, & nascens; quoniam primitus per eum cuncta condidit, & ornavit. In dial. citato confutat eos qui Christi originem non prævertere incarnationem assererent, & ex hominibus eam ducerent, non ex sacris codicibus, nec à Christo acceptâ doctrinâ, sed ex arbitrio suo; & proindè Arianos, & Socinianos in antecessum refellebat: loca mox retulimus. In apol. ad Anton. addit non Patrem, sed Filium Christum (qui prius verbum existens erat) se videndum præbuisse antiquis, aut in formâ ignis, aut Angelicâ, aut aliâ. In eâdem apol. ad Anton. asserit nomine Patris, & Domini Dei Servatoris Jesu Christi Baptismum conferri: immensum cum esse; & ubique extitisse: futura per Prophetas prænuntiasse; & tandem hominem factum omnia nos docuisse. *Ratio enim, inquit, & verbum fuit, & est in universitate rerum existens. . . . qui & per Prophetas quæ futura erant vaticinatus est.* Docuit adhuc in apologiâ ad Senatum adorationem Christo deferri, & deferendam esse, nullo discrimine posito inter adorationem Patri, & ei delatam. Denique Fidei professionem universalem de Trinitate refert in apol. ad Anton.

Intelligent igitur Sociniani hæreseos suæ capita singula secundo seculo fuisse reprobata; necnon fidem Patrum Nicænorum, temporibus etiam illis ubique fuisse receptam.

Athenagoras.

Athenagoras eodem seculo eandem fidem universi orbis Christiani refert. Nam in apol. pro Christianis docet in Deo tres esse personas, & unum

Deum; Verbum esse unum cum Patre; ex Patris substantiâ; Patris esse rationem, & sapientiam; & hanc esse Christianorum fidem. Ibidem ait Filio Dei competere attributa divina, potentiam nempe, sapientiam, & aternitatem. Et sic ab atheismo Christianos vindicat, quod unum Deum Patrem, Filium, & Spiritum Sanctum colant. Hinc ita concludit: *Quantum igitur in me fuit, etsi non pro dignitate rei, nequaquam nos esse à Deo alienos, qui universitatis hujus opificem, simulque ejus verbum, seu verum Deum veneramus, demonstratum est.*

In initio Apol. Deum unum rerum omnium creatorem esse profitetur, & hanc antevertit objectionem; ridiculum scilicet videri Deo Filium tribuere, quia id Poëtis in more erat; asseritque Filium esse Dei verbum, & unum cum Patre, & aeternum; cum Patris ratio sit; & adducit illud Prov. 8. v. 22. *Dominus creavit me in initio viarum suarum.* Ex quo negat Verbum creatum esse, quia aeterna Patris ratio est. Quare per verbum, *Creavit*, nihil aliud intellexit, quam ordinavit, aut constituit. Antoninum, & filium ejus Commodum allocutus ait, ipsos animorum conjunctione delineare patris, & filii iupremam potestatem indivisibilem: *De vobis enim, patri, & filio in potestate sunt omnia*: sic uni Deo, & Filio ejus, hoc est, Verbo inseparabili omnia subjecta sunt. Athenagoras ergo tradit tum personarum trium fidem ubique receptam, tum Filium ab aeterno Deum, & unum cum Patre Deum esse adorandum; & illius mysterii intelligendi desiderio omnes fideles teneri. Hæc sunt Catholicæ Fidei capita; proindeque Socinianorum blasphemiarum proscriptio.

S. Theophilus Antiochenus.

S. Theophilus Antioch. eodem seculo Episc. Antioch. fidem de Trinitate sanctissimâ refert; & illud asserit mysterium in creatione fuisse delineatum per tres dies, qui præcessere creationem *duorum luminarium*: Patrem allocutum fuisse sermonem, & sapientiam; seu Filium, & Spiritum Sanctum, cum dixit, *Faciamus hominem*, &c. Illius articulo super, exscripsimus verba. Item Filium Dei nomine, naturâ, adoratione, & professione unum esse cum Patre, veluti universalem fidem profitetur. Dei quoque nomine sæpius Filium compellat, & ait Deum Patrem illum habuisse suis in visceribus, lib. 2. ad Autolicum: *Deus habens suum sermonem*; cumque ante omnia genuisse: sic enim habet, *sermonem, λόγον ἑνὸς δάπτου*, seu verbum internum in suis visceribus, genuit eum . . . ante hæc universa. Addit hoc sermone, seu ratione Deum usum esse in mundi creatione: illum esse Dei sapientiam, potentiam, & prophetiarum authorem: *Hic igitur existens spiritus Dei, principium, & sapientia, Altissimique potentia, descendit in Prophetas, per quos, seu organa, de mundi creatione, necnon de reliquis locutus est.* Non enim erant Prophetæ, cum mundus crearetur; sed sapientia Dei, qua in ipso est, sermoque ejus sanctus semper præsto erat. Quare per Salomonem Prophetam sic facit: cum ipso

prepararet oculos, aderam. Undè tùm ex istis, tùm ex Prov. 8. Fili cum Patre coeternitatem exponit. Ut autem à pravâ generationis Verbi ideâ animum revocet, ità loquitur: Nec arbitreris, inquit, ut Poëta, & fabularum scriptores perhibent, Dei filios ex concubitu natos esse; sed intellige hoc loco enarrari sermonem perpetuò existentem, & insitum in corde Patris Dei. Antequam enim quicquam eorum qua facta sunt, fieret, hunc consiliarium habuit, ut qui & mens, & prudentia ejus foret. Sic Verbum inter res factas non potest computari; imò Verbum illud est ex substantiâ Patris, & ab æterno; utpote mens, sapientia, & consiliarius Patris. Æternâ porrò sic generatione delineatâ, primùm temporariam ità describit: Cum verò jam condere qua deliberaverat, instituisse, hunc sermonem genuit prolatum primogenitum universæ creature; nec interim Deus exinanitus est sermone sermonem gignens. Quamobrem Verbum, quâ æternum & Deo intetius, res creata non est, cum sit consiliarius Patris; nec in tempore Filius est genitus, sed ab æterno, ut qui Patris sit mens, & prudentia: genitus verò in tempore dicitur, cum exteriùs prodiit ut creator, seu sono circumvestitus, cum nempè dixit, Fiat. Et laudatis verbis Joan. 1. In principio erat Verbum &c. sic habet: Significans in principio solùm fuisse Deum, & in eo sermonem. Postea infert: Deus erat ille sermo. Omnia per ipsum facta sunt, & sine eo factum est nihil. Deus itaque existens sermo, & ex Deo progenitus, quando vult Pater universorum, mittit eum sermonem ad aliquem locum. Qui adveniens auditur, & videtur ab eo missus, & in loco reperitur. Æternum ergò dicit sermonem, & ex substantiâ Patris ortum; eumque utpote genitum à Patre mitti, & formâ exteriori circumvestiri, & ratione illius formæ in loco esse, & audiri, & conspici.

Tatianus.

Tatianus post S. Justinì præceptoris mortem hæreticus factus, scripsit Verbum Dei unum esse cum Patre Deum, nomine, & naturâ; item ex Patris esse substantiâ, utpotè ipsius Patris rationem; necnon etiam æternum esse; quia creavit Angelos, & orbem: ità enim scribit in orat. ad Græcos. Quippè Dominus mundi, cum ipse sit universorum substantia, nondum condito mundo solus erat. Si verò respicias potentiam ejus, in quâ visibilia & invisibilia cuncta consistunt, omnia cum ipso erant. In ipso enim per potentiam Verbi, tùm ipse, tùm Verbum quod in eo erat, exiit. Igitur æquè æternus est Filius ac Pater. Ibidem docet, cum de orbe creando Deus constituit, Verbum divinum, quod in ipso Patre erat, exteriùs prodiisse, ut orbem è nihilo educeret: hæc sunt ejus verba: Cum voluit autem ipse, Verbum ex ejus simplicitate profiliit. Et Verbum non inaniter prolatum, primogenitum opus sit ipsius Spiritûs. Hoc scimus esse principium mundi: natum est autem per divisionem, non avulsionem. Quod enim avellitur, à primo separatur: quod verò dividitur, id functione donatum propriâ, nihil imminuit illum, à quo vim suam sum-

pſit. Quemadmodum enim ab unâ face alia multe accenduntur, nec tamen prima facis lux minuitur propter plures inde succensus: sic etiam Verbum à Patris potentiâ progreſſum, non relinquit genitorem Verbi expertem: nam & ego ſi loquar, & vos audiat, non tamen propter tranſitum ſermonis, ego qui vobiſcum loquor, ſermone vacuus ſio: ſed vocem meam proferens, ineultam in vobis materiam excolere mihi propono. Et quemadmodum Verbum in principio genitum, mundum & nos viſſim genuit, cum ſibiſmet materiam produxiſſet: ſic ego quoque ad imitationem Verbi regenitus, & veritatis illuſtratus cognitione materia mihi cognata conſuſionem emendo. Addit: Verbum illud cœleſte, Spiritus à Patre genitus, & ratio ex rationali potentiâ hominem immortalitatis imaginem fecit ad imitationem ſui genitoris.

Equidem videtur à S. Juſtini præceptoris doctrinâ Tatianus reſeſſiſſe, cum aſſerit Verbum natum eſſe per diviſionem, non per avulſionem; quia quod dividitur donatum functione propriâ, non imminuit illum à quo vim ſuam ſumpſit: quod verò avellitur, à primo ſeparatur. Verbum autem genitum eſſe non per reſectionem docuit S. Juſtinus. Idem tamen cum S. Juſtino ſentire videtur, & per diviſionem intelligere diſtinctionem; cum ſeparationem apertè neget.

Sanctus Irenæus.

Sanctus Irenæus Lugdun. Episc. S. Polycarpi diſcipulus, Aſianæ, Lugdunenſis, & totius Catholice Eccleſiæ doctrinam referens, fidem in ſanctiſſimam Trinitatem, quæ unus Deus ſit, aſſerit: & ait Verbum Filium Dei eſſe Deum unum cum Patre, nomine, naturâ, adoratione, & profeſſione. Docet 1. Myſterium in ſanctam Trinitatem ubique annuntiari: Chriſtum Deum eſſe Dominum, Regem, & Salvatorem noſtrum: & omne genu illi curvandum; ita lib. 1. cap. 2. ubi addit Eccleſiam per univerſum orbem diſſeminatam diligenter iſtam fidem cuſtodire: locus relatus eſt art. ſuper. Deindè tradit Filium Dei tam eſſe verum Deum, quàm Patrem; & unicum eſſe cum Patre Deum; hancque fuiſſe Chriſti, Spiritus ſancti, & Apoſtolorum doctrinam, & profeſſionem; ſic enim habet lib. 3. cap. 2. *Neque igitur Dominus, neque Spiritus ſanctus, neque Apoſtoli, eum, qui non eſſet Deus, & abſolute nominaſſent aliquandò, niſi eſſet verus Deus: neque Dominum appellaſſent aliquem ex ſua perſonâ, niſi qui dominatur omnium Deum Patrem, & Filium ejus.* Citat ibi tùm illud Pf. 109. *Dixit Dominus Domino meo: tùm Pf. 44. unxit te Deus Deus tuus: tùm & Pf. 49. Deorum Deus locutus, &c.* Et ait ipſum eſſe qui Moyſi dixit, *Ego ſum qui ſum.* Item lib. 4. cap. 1. ſcribit magnum Deum dicendum non fuiſſe Filium, Chriſtum ſcilicet, ſi aliquem ſuprà ſe Deum haberet. Et cap. 11. ait Filium ſuper omnia Deum fuiſſe, qui adorabatur à Prophetis, & Moſi loquebatur. Sic ergò Chriſtum, ut verum Deum cum Patre, adoravit: idè Deum lib. 3. cap. 6. rogat ut hanc ſui cognitionem omni

libus indulgeat : *da*, inquit, *omni legenti hanc scripturam cognoscere te*, quia solus Deus es ; & confirmari in te ; & absistere ab omni hereticâ, & quæ est sine Deo, & impiâ sententiâ. An ita expositâ de Filii divinitate doctrinâ postulasset à Deo, ut hanc cognitionem omnibus necessariam largiretur, & ejus beneficio omnes ab impietate, & hereticâ pravitae avocarentur ; nisi fides de Christi verâ & unicâ cum Patre divinitate in Scripturis contineretur, & esset eximium Dei donum ? Impiam igitur & blasphemam Socinianorum opinionem proscribit, & Nicænis Patribus in anathematibus adversus Arium prævit. Idem cap. 11. relatis infinitis propemodum utriusque Testamenti pro Filii divinitate testimoniis, sic urget eos omnes, qui vel Deum Patrem, vel Filium non agnoscerent : *His igitur sic se habentibus vani omnes, & indocti, & insuper audaces, qui frustrantur opem Evangelii ; & vel plures quàm dicta sunt, vel rursus pauciores inferunt personas Per hæc omnia peccantes incidunt in Spiritum Dei, in irremissibile incidunt peccatum.* His autem argumentis utitur adversus hæreticos, qui duos Deos duorum Testamentorum Authores faciebant. Lib. 1. cap. 11. asserit Prophetas, Christum, & Apostolos alium neminem, præter Patrem & Filium, Deum nominare Lib. 4. idem repetit, & illud addit cap. 1. *Cum sit igitur hoc firmum, & constans, neminem alterum Deum & Dominum à Spiritu predicatum, nisi eum, qui dominatur omnium Deus, cum Verbo suo ; & eos qui adoptionis spiritum accipiunt, hoc est, eos qui credunt in unum & verum Deum, & Christum Jesum Filium Dei, &c.* Ibi Valentinianorum hæresim impugnat. Igitur, ex doctrinâ Ecclesiæ palam à S. Irenæo expositâ, Deus est Christus, non nomine solo, sed naturâ, & idem cum Patre Deus.

Seipfos audiant Sociniani, non alios appello Judices ; si Socinianum dogma tenuisset S. Iren. cum universâ Ecclesiâ, cujus fidem adversus hæreticos ipse refert ; an eâ ratione confutasset eos, qui vel duos Deos Testamentorum duorum authores, vel etiam longè plures admittebant ? An in demonstrandâ Patris, & Filii eadem & unicâ divinitate tantoperè laborasset, ne inde argumentum hæretici illi ducerent, præsertim qui duos facerent veteris & novi fœderis authores ? An ita constanter à salutis expectatione eos repulisset, qui cum Socinianis nunc Ecclesiam vexantibus duos Deos agnoscerent ? nam Sociniani Christo divinitatem inferiorem non negant. Hæc autem non modò cum universâ Ecclesiâ professus fuit S. Irenæus ; sed & Christum æquè verum esse Deum, ac verum hominem, contra aliud genus hæreticorum, qui Christum pro homine mero habebant, probat lib. 3. cap. 10. ex eo quòd Emmanuël sit dictus, à Magis sit adoratus quatenus homo, illique ut Deo oblatum fuerit thus. Ibidem naturæ utriusque dotes uberiùs sic exponit. *Nam secundum id Deus homo erat, ex radice Jesse, & Filius Abraha ; secundum hoc requiescebat Spiritus Dei super eum, & ungebatur ad evangelizandum humilibus : secundum autem quod Deus erat non opus erat illi, ut quis testimonium diceret de homine cum ipse scires quid esset in homine.*

Item cap. 20. oportuerat, inquit, *Mediatorem Dei & hominum per suam ad utrosque domesticitatem, & ad amicitiam & concordiam utrosque reducere, & facere ut & Deus assumeret hominem, & homo se dederet Deo.* Quæ verba laudavit Theodoretus. Deo ergo, & homini Christus quatenus Mediator, consubstantialis est. Quam rationem cap. 29. adversus Ebionitas urget, qui Christum nudum hominem esse asserabant. Si enim, inquit, *Josephi Filius esset: quemadmodum plus poterat, quam Salomon: aut plusquam Jonas habere: aut plus esse, quam David: cum esset ex eadem seminatione generatus, & proles existens ipsorum: ut quid autem beatus dicebat Petrus, quod eum cognosceret esse Filium Dei vivi?* Et antea c. 26. variis argumentis ex Scripturâ deductis confirmat eum non merum esse hominem, sed & Deum; & præter illam, quam super omnes habet, à Patre generationem, recenseri à Scripturâ alteram, quam habet ex Virgine.

Præterea scribit lib. 4. cap. 66. apud Isaiam ita vocari Christum: *Admirabilis, Deus, fortis . . . quoniam verbum caro erit, & Filius Dei, & Filius hominis purus, purè puram aperiens vulvam eam qua regenerat homines in Deum, quam ipse puram fecit, & hoc factus est quod & nos, Deus fortis, & inenarrabile habet genus.* Nec enim Mediatoris munia potuisset exequi Christus, nisi fuisset Deus. Et cap. 11. docet Christum Dominum Deum carnem factum fuisse, ut peccata dimitteret; factum hominis Filium, ut homo, Dei Filius fieret: & ideo Zachariam Luc. 1. in Cantico suo hæc protulisse: *Ad dandum salutis intellectum, idest hanc salutis cognitionem, quæ deerat, nempe Filii Dei, quem sciebat Joannes dicens, Ecce Agnus Dei, &c. qui salus & Salvator verè dicitur, & est de quo dicitur, Ecce Deus meus, Salvator meus, fidens ero in eum.*

Hanc confirmat doctrinam, ostendendo essentialia Deo attributa Dei Filio competere.

1. Docet æternitatem Filio convenire; quia inquit, lib. 4. c. 9. Moysi & aliis Prophetis fuit locutus, & ab illis adoratus, & illis factus aspectabilis. Idem lib. 3. cap. 47. sacras Scripturas illis dictavit. Lib. 2. cap. 43. *Neque enim, inquit, infectus es homo, neque semper coexistebas Deo, sicut proprium ejus Verbum.* Igitur Filius Dei & infectus est, seu res creata non est, & ab æterno coexistit Patri. Et cap. 55. Filii cum Patre æternitatem omnibus in confessio esse tradit: *Cognoscunt enim eum, quibus revelavit Filius; semper autem coexistens Filius Patri, olim, & ab initio, semper revelat Patrem & Angelis, & Archangelis.* Lib. 4. cap. 28. scribit ab æterno Patrem & Verbum mutuam sibi gloriam procurare: *Non enim solum ante Adam sed & ante omnem conditionem, glorificabat Verbum Patrem suum manens in eo, & ipse à Patre glorificabatur; quemadmodum ipse ait: Pater glorifica me claritate, quam habui apud te, priusquam mundus fieret.* Et cap. 37. *Adest enim ei semper Verbum, & Sapientia; Filius, & Spiritus, per quos, & in quibus omnia liberè & spontè fecit; ad quos & loquitur dicens: Faciamus hominem ad imaginem, & similitudinem nostram.* Quibus subjungit: *Et quoniam Verbum, id est Filius, semper cum Patre eras, per multa demonstravimus.*

Quoniam & Sapientia, que est Spiritus, erat apud Deum ante omnem constitutionem, per Salomonem ait Deus, Sapientia fundavit terram, &c. Et rursum: Creavit me Dominus principium viarum suarum, in opera suas; ante seculum fundavit me, &c. Sic verbis ex Prov. 8. desumptis utitur ad probandam Verbi æternitatem. Quo loco Ariani postmodum usi sunt, ut probarent Verbum non esse æternum. Item lib. 2. cap. 18. negit prolatitiam esse Verbi naturam, & temporariam; sed æternam & subsistentem: Lationem prolativi hominum Verbi transferunt in Dei æternum Verbum, & prolationis initium donantes & Genesin, quemadmodum & suo Verbo, &c. Arguit enim ibi Valentinianos, qui prolationis humanæ generationem in Verbum divinum transferebant. C. 35. ait illos non modò irreligiosos esse adversùs Patrem; sed & adversùs Christum, & Spiritum S. Et c. 37. docet Verbum ante creationem, ab æterno Patri ut Sapientiam coexistisse. Lib. 3. cap. 20. ex professo probat, ipsum non tunc incipisse existere, cum carnem induit; quia semper, & ab æterno coexistebat Patri; Ostendimus enim quia non tunc capis Filius Dei, existens semper apud Patrem; sed quando incarnatus est, & homo factus. Idem docet lib. 4. cap. 1.

2. Omnipotentiam Verbi illustrat, tum lib. 2. cap. 3. ubi habet ab illo, utpotè Deo, non ab Angelis, potuisse hominem ad imaginem Dei componi: tum lib. 3. cap. 10. ubi ait ipsummet hominem factum omnipotentiam suam testificari peccatorum veniâ concessâ; solus enim Deus peccata potest dimittere: tum denique lib. 3. cap. 17. ubi scribit visum restituisse, necnon res universas creasse.

3. Immensitatem Filii Dei, & cum Patre æqualitatem tradit lib. 4. cap. 8. hæc sunt ejus verba: *Omni enim mensurâ & ordine Deus facit, & nihil non mensum apud eum & benè qui dixit ipsum immensum Patrem in Filio mensuratum.* Mensura enim Patris est Filius; quoniam & capit eum, & ejus mensura est. Igitur immensus & æqualis in omnibus est Patri. Et antea lib. 2. cap. 41. ait nomine *Deus*, significari Dominum, qui continet cælum & terram.

4. Adoratum fuisse Dei Filium à veteris Testamenti Patribus docet lib. 4. cap. 9. à Magis cultum adorationis ipsi fuisse exhibitum tradit l. 3. c. 10.

5. Ecclesiæ professionem eam esse, quam retulimus, asserit lib. 1. cap. 2. ut constat ex superioribus. An quid ultra postulari possit apertius ad fidei catholicæ probationem? non existimo.

Sanctus Clemens Alexandrinus.

Sanctus Clemens Alex. Presbyter, eruditionis stupendæ vir, Verbum unum esse cum Patre Deum, nomine & naturâ, locis citatis articulo superiori, ex lib. 1. *Padag.* cap. 6. & 8. & lib. 5. & 7. Stromatum contestatus fuit. Essentiali Deo attributa illi vindicat.

1. Æternum Dei æternitate, Verbum esse proficitur. Nam docet lib. 1. *Padag.* cap. 7. ipsum extitisse, antequam caro fieret: Israelitas ex Ægypto adduxisse: & Abraham aspectabile se præbuisse. Ibidem dicit tunc

nominationem non esse Deum Dominum; quia nondum carnem assumpserat. *Adhuc autem erat innominatus Deus Dominus, ut qui nondum homo factus fuerat; vocavit tamen Jacob nomen loci illius speciem Dei . . . facies autem Dei est Verbum, quo Deus illuminatur & cognoscitur.* In admonit. ad Gentes, ait Verbum fuisse ante Davidem, & ex ipsius Davidis testimonio ante luciferum, & apud Deum. Item l. 7. Strom. scribit illud esse Dei sapientiam, & potestatem, & ejus consiliarium ante mundi constitutionem: *Qui ante mundi constitutionem fuit Patris consiliarius: Hæc erat enim sapientia, quâ Deus delectabatur: omnipotens Dei enim virtus, sive potestas est Filius, utpotè ante omnia quæ sunt genita, verbum Patris maxime principale, & ejus sapientia.* L. quoque 7. Strom. tradit principium esse, principio carens & generatione vetustius. L. 1. Pædag. cap. 6. Filium æternum Deum Israelis vocat, & unum cum Patre. Lib. 6. Strom. ait Gen. 1. non dixisse Moysen principium à Deo esse factum, sed in principio Deum fecisse cælum & terram. Addit lib. 3. Strom. non fuisse Christo, *neceffe filios procreare, qui manet in æternum, & natus est solus Dei filius.*

2. Immensum Dei Filium supponit. 1. quia non secùs ac Pater apud justos inhabitat, ut habet in Admon. ad Gentes. 2. quia magnus est inenarrabili magnitudine, & ex Patris substantiâ; utpotè qui sit in Patre ut consiliarius, & ut sapientia: sic enim loquitur lib. 1. Pædag. cap. 5. *Per Isaiam Prophetam narrat ejus magnitudinem: admirabilis consiliarius, Deus potens, Pater æternus &c. ô magnum Deum! ô pefreclum puerum! Filius in Patre, & Pater in Filio.* 3. describit eâ ratione immensitatem Verbi, lib. 7. Strom. & cæteras Dei perfectiones illi tribuit. *Nunquam enim à suâ excedit speculâ Dei Filius; ut qui non dividatur, non dissecetur, non transeat à loco ad locum: sit autem semper, ubique, & contineatur nusquam: tota mens, tota lux paterna, totus oculus, qui omnia videt, omnia audit, scit omnia.* Ibidemque docet eum indefessâ & inexhaustâ potentiâ cuncta operari, & omnia scire. Quæ sanè non nisi Deo soli possunt competere. Addit adhuc Verbum undequaque esse diffusum; vel minima respicere quæ geruntur: quod etiam expressit his verbis in Admonit. ad Gentes: *Hic, per universum terræ faciem diffunditur, per quem effecta sunt omnia, pelagus honorum.* Quid igitur superest inferendum, nisi divinitatis unius esse & ejusdem cum Patre?

3. Scientiam Dei, seu eam quâ Deus hominis cor scrutatur, ut & omnipotentiam Filio pariter tribuit. Ità enim habet lib. 4. Strom. *Justis appropinquat Dominus, & nihil eum latet ex nostris cogitationibus. . . . Dominum Jesum dico, qui omnipotenti suâ voluntate corda nostra intuetur.* Lib. 5. Strom. sic loquitur: *Verbum Patris universorum non est hoc quod profertur; sed sapientia, & Dei bonitas manifestissima.* Et rursus: *Omnipotens potestas & verè divina, quæ non est ejusmodi, ut intelligentia non comprehendi possit vel ab iis qui non consentiunt: voluntas, quæ omnia continet suâ omnipotentia.* Et iterum: *Verbum autem quod progreditur, opificii causa est, & creationis.* Deinde etiam seipsum generat, quan

do Verbum caro factum fuerit, ut etiam cadat sub aspectum. Quapropter naturâ suâ est invisibile Verbum, & omnipotens. Addit quoque Dei Filio nihil esse incomprehensibile, quod soli Deo, & Patri æquali competere potest. Præterea lib. 1. c. 1. pædag. ait Christum Deum, Deo Patri similem remittere peccata ut Deum. Item cap. 3. asserit eum visu perspicacissimo intima videre hominum corda. Et cap. 6. affirmat eum nihil didicisse, quia Deus erat. Idem in admon. ad gentes, docet Verbum esse Patri divino æquale, utpotè cum sit ejus filius: *Verbum divinum, qui reverà est Deus manifestissimus, qui est univerforum Domino exæquatus; quoniam erat ejus filius.*

4. Adorationem Christo debitam jam ex ipso Clemente Alex. inferuimus, simulque Ecclesiæ professionem: hæc ad ejusdem veritatis confirmationem illius verba addemus ex admon. ad gentes: *Crede homo homini, & Deo; crede homo Deo viventi, qui passus est, & adoratur. . . omnes homines credite ei, qui solus est Deus ex omnibus hominibus.* Idem lib. 5. Strom. super. art. citato scribit patrem non esse absque filio, nec in eum credi, quin credatur in filium. Lib. etiam 3. pædag. cap. ult. hæc habet: *Quod ergò restat in tali Verbi celebratione, Verbum orabimus: placare tuus, ô pedagoge, pueris; pater, auriga Israël, Fili & Pater, unum ambo, Domine. Da nobis . . . ut sentiamus bonum Deum, & judicem non acerbum: prastaque ut cum undas peccati absque fluctibus tranaverimus, tranquillii cum S. Spiritu conveniamus, & gratias agamus, & laudemus unum patrem, & filium. Filium, inquam, pedagogum & magistrum, unà cum S. Spiritu, qui unus est omnia, in quo omnia, per quem omnia unum, cujus sunt gloria & secula, cui gloria nunc, & in secula seculorum, amen.* Filius igitur Deus unus est cum Patre; cum ipso adorandus est, & invocandus; author item omnium; & tandem tribus personis pari modo idem cultus est deferendus.

Addimus objectionem, quam prævertit & solvit lib. 7. ubi ex Heb. 1. v. 3. probat Servatorem esse Deum; & addit: *Quocirca Apostolus quoque appellavit filium, characterem, seu typum gloria patris, qui veritatem de Deo docuerit, & expresserit. Quod Deus & pater unus est, & solus omnipotens, quem nemo novit nisi Filius &c. unum autem esse Deum, per eos qui querunt faciem Dei Jacob, indicatum est. Quem solum esse l'eum Patrem bonum exprimit Servator noster & Deus: Scilicet unus est Deus & Pater, excludendo Deos Ethnicorum, aut qui non sunt unus cum Patre Deus; non verò Filium, qui est unus cum illo Deus.* Aliam adhuc rationem affert, quòd nempe Christus solus sit Dei Filius.

Jam quæ fuerit Alexandrinæ & universalis Ecclesiæ fides, potuit ne manifestius exprimi? minime sanè: Attamen, si tam celebris Ecclesiæ Doctor, qualis Clemens Alexand. in Trinitariorum Sententiâ versatus fuisset, an eâ ratione disseruisset? Præsertim cum ex Ethnicis multi recens ad fidem adducti essent Christianâ doctrinâ imbuendi, & aliunde propugnanda foret contra Ethnicorum, & Judæorum calumnias Religio Christiana.

Tertullianus Ecclesiæ Catholicæ defensor, nunquam satis laudandus, docet adversus Ethnicos, Judæos, & hæreticos, Verbum esse unum Deum cum Patre nomine, naturâ, adoratione, & professione. Idipsum nominatum probat adversus Praxeam, qui quidem cum Catholicis unicum esse Deum conveniebat; sed à Trinitate, ne plures Deos inducere cogeretur, abhorrebat. Hunc igitur confutat Tertull. tanquam novitatis hucusque inauditæ propalatorem; contenditque adversus eum à nascentis Ecclesiæ exordio hanc fuisse fidem; nempe unicum esse Deum, & tres personas. Laudavimus locum egregium ex capite 2. libri contra Praxeam excerptum. Est & alius locus ex cap. 9. art. sup. desumptus, ubi ait malè accipere idiotas, aut perversos, quòd diceretur, alius est Pater, alius Filius, alius Spiritus Sanctus, quasi diversitas induceretur, in essentiâ scilicet: quæ sanè verba distinctionem quidem, & numerum inter personas indicant: non verò substantiæ diversitatem. *Non tamen, inquit, diversitate alium filium à patre, sed distributione; nec divisione alium, sed distinctione; quia non sit idem Pater & Filius.* Cap. etiam 1. asserit Patrem non esse Filium, nec Filium esse Patrem. Et cap. 11. affirmat Scripturas omnes Trinitatem personarum demonstrare: *Scripturae omnes, inquit, & demonstrationem, & distinctionem Trinitatis ostendunt: Est enim ipse, qui pronuntiat, Spiritus; & Pater, ad quem pronuntiat; & Filius, de quo pronuntiat. Sic & cetera quæ nunc ad Patrem de Filio, vel ad Filium; nunc ad Filium de Patre; vel ad Patrem; nunc ad Spiritum sanctum pronuntiantur, unamquamque personam in suâ proprietate constituunt.* Cap. quoque 12. probat ex verbis, tum Gen. 1. *Faciamus hominem ad imaginem nostram;* tum & Genes. tertio *Adam factus est tanquam unus ex nobis,* unicam in Deo non esse personam. Alius erat, inquit, pater, alius filius, duæ personæ, non substantiæ, ad distinctionem, non ad divisionem. Sic ergò ex ipso plures personæ sunt, & indivisam substantiam habent, nempe divinam: cum autem duos habere divinitatem indè instarent adversarii. Ergò duos Deos prædicas: absit, inquit, secundum œconomiam dicimus, ad distinctionem, non ad divisionem; seu duas personas distinguimus, quæ non habent divisam naturam. Addit insuper Patrem alium esse à Filio, personâ scilicet? *Duos tamen Deos, & duos Dominos nunquam ex ore nostro proferimus, non quasi non & Pater Deus, & Filius Deus, & Spiritus Sanctus Deus, & Deus unusquisque.* Ait autem duos ità esse dictos, ut Christus cum venisset, Deus agnosceretur; & ideo Rom. 9. v. 5. vocari Deum super omnia benedictum; quia uterque idem Deus est, utpotè habens indivisam divinitatem; quod hâc comparatione illustrat: *Nam, inquit, & radium solis seorsum solem vocabo; solem autem nominans, cujus est radius, non statim & radium solem appellabo. Nam etsi soles duos faciam, tamen & solem, & radium ejus tam duas res, & duas species unius & indivise substantiæ numerabo, quàm Deum, & sermonem ejus;*

quàm Patrem, & Filium. Idem repetit cap. 14. 21. 22. 26. & aliis ejusdem libri suprâ laudatis.

Præterea Verbi divini naturam propriis & singularibus argumentis delineans, asserit Verbum esse unum naturâ, potestate, substantiâ cum Patre Deum. Sic enim habet cap. 2. lib. contra Praxeam: *Quia Filius sermo ipsius, qui ex ipso processerit. . . unius autem substantiæ, & unius statûs, & unius potestatis, quia unus Deus.* Cap. 3. Praxeam sic arguenti: igitur contra fidei, quæ plures Deos removet, legem peccatis: *Quoniam & ipsa regula fidei à pluribus Diis seculi ad unicum & verum Deum transfert: Respondet, & demonstrat contra fidei regulam non peccari: Non intelligentes unicum quidem, sed cum suâ divinitate esse credendum; expavescunt ad οὐνοποιαν: numerum, & dispositionem Trinitariis, divisionem præsumunt unitatis, quando unitas ex semetipsâ derivans trinitatem, non destruat ab illâ, sed administretur. Itaque duos & tres jam jactitant à nobis predicari; se verò unius Dei cultores.* Et cap. 4. *Filium, inquit, non aliundè deduco, sed de substantiâ Patris. . . hoc mihi & in tertium gradum dictum sit, quia Spiritum non aliundè puto, quàm à Patre per Filium.* Hæc iterum toto opere tradit, & præsertim cap. 1. ubi illam in Patre, Filio, & Spiritu S. substantiæ unitatem variis comparationibus ex fonte, radice, & sole ductis illustrat: *Ego verò, inquit, audebo ita differere. Sicut radix fruticem, & fons fluxum, & sol radium emittit, nec frutex tamen à radice, nec fluxus à fonte, nec radius à sole discernitur; sic nec à Deo sermo. Igitur secundum horum exemplorum formam, profiteor me duos dicere, Deum & sermonem ejus; Patrem, & sermonem ipsius: nam & radix, & frutex res due sunt, sed conjunctæ; & fons, & flumen due species sunt, sed indivise.* Porro his comparationibus usus non esset ad exponendam pro virili & confidentius, ut habet, divinam naturam in Patre, & Filio, & Spiritu Sancto, quem ibi patri, & filio adjungit, nisi pater, filius, & Spiritus Sanctus essent unus Deus, juxta fidem tunc temporis receptam.

In aliis operibus nomine totius Ecclesiæ, ut hîc adversus hæreticos & ethnicos, idem proficitur. In apologetico quippè cap. 21. Christianos probat non esse cultores hominis, sed Dei; quia Christus est homo-Deus: *Tunc, inquit, ex Deo prolatum didicimus, ex prolatione generatum, & ideo filium Dei, & cum dictum ex unitate substantiæ: nam & Deus Spiritus.* Sic ergò quia filius, & ex Dei substantiâ, quæ in plures dividi non potest; ideo plures Deos non esse Patrem, & Filium concludit: communicationem autem ejusdem naturæ comparatione jam superius allatâ quodammodo explicat, scilicet solem esse in radio, nec separari substantiam, sed extendi: Ità de Spiritu, *Spiritus, inquit, & de Deo Deus; & paulò post, quod de Deo profectum est, Deus est, & Dei Filius, & unus ambō.*

Idem Tertullianus cap. 6. lib. contra Marcionem, qui plures Deos invehabat, tradit eandem in Patre, & Filio esse substantiam; nec diversum esse Christum à Deo veteris Testamenti; cum Filius ex ejus sub-

stantiâ sit. Item lib. 4. cap. 20. & 25. probat adversus hunc hæreticum, unicum esse Deum. Aequalem etiam esse filium patri variis probat argumentis : Nam lib. contra Praxeam cap. 5. & cap. 22. attendens ad hæc Christi verba ex Joan. 10. desumpta : *Ego & pater unum sumus* : sic habet, *Unum sumus*, dicens, *ego & pater*, ostendit duos esse, quos aequat, & sejungit. Lib. quoque de resurr. carnis cap. 6. sic habet : *Fecit hominem Deus*, id utique quod finxit ; ad imaginem Dei fecit illum, scilicet Christi ; & sermo enim Deus, qui in effigie Dei constitutus, non rapinam existimavit parari Deo : quo nihil expressius proferri potest. Ità etiam scribit lib. de orat. cap. 2. *Dicendo autem patrem*, nimirum (*Pater noster qui es &c.*) Deum quoque cognominamus in patre filius invocatur. Ego enim, inquit, & pater unum sumus.

Filium adhuc cœternum esse Patri pluribus docet idem Tertullianus ; Et idèd dici primogenitum, quia ab æterno genitus est, & ante omnia ; & unigenitum, quia solus ex Deo genitus : ità cap. 7. l. contrà Prax. Idem cap. 5. refellit quosdam, qui Genesis initium ità legebant : *In principio Deus fecit sibi Filium*, quasi creatus esset Filius : Sic autem legendum non esse contendit ; quandoquidem constat Filium ante mundi creationem extitisse ; quia licet eo sensu Deus fuerit solus, quòd nihil extrà Deum eisset, nunquam tamen sine filio fuit, quia intrà se rationem suam habebat, nempe Filium. *Aiunt quidem*, inquit, & *Genesis in Hebraico ità incipere : In principio Deus fecit sibi Filium.* Hoc ut firmum non sit, alia me argumenta deducunt, ab ipsâ Dei dispositione, quâ fuit ante mundi constitutionem ad usque Filii generationem : Ante omnia enim Deus erat solus, ipse sibi & mundus, & locus, & omnia. Solus autem : quia nihil aliud extrinsecus præter illum. Ceterum ne tunc quidem solus ; habebat enim secum, quam habebat in semetipso, rationem suam scilicet : rationalis enim Deus, & ratio in ipso prius : Et ità ab ipso omnia. Quæ ratio, sensus ipsius est, hanc Græci ὁ λόγος dicunt, quo vocabulo etiam sermonem appellamus. Ideoque jam in usu est nostrorum per simplicitatem interpretationis, sermonem dicere in primordio apud Deum fuisse ; cum magis rationem competat antiquiorem haberi : quia non sermocinalis à principio, sed rationalis Deus etiam ante principium : Et quia ipse quoque sermo ratione consistens priorem eam ut substantiam suam ostendat ; tamen & sic, nihil interest. Nam etsi Deus nondum sermonem suum miserat, proindè eum cum ipsâ ratione intrà semetipsum habebat. Et cap. 7. duplicem Verbi nativitatem distinguit, æternam scilicet, cum in ratione Sophiæ generatus est ; & temporalem, cum prodiit exteriori ad res omnes creandas : *Hæc est*, inquit, *nativitas perfecta sermonis*, dum ex Deo procedit ; conditus ab eo primum ad cogitatum in nomine Sophiæ : *Dominus condidit me initium viarum.* Dehinc generatus ad effectum : cum pararet cælum, aderam illi simul. Exindè eum parem sibi faciens, de quo procedendo Filius factus est primogenitus, ut solus ex Deo genitus : propriè de vulvâ cordis ipsius, secundum quod & Pater ipse testatur, cruciavit, &c.

Ejusdem Verbi æternitatem ex Incarnatione repetit ipse Tertullianus, nempe quòd Christus, quà Deus, fuerit antequàm incarnaretur; ut qui Moſem & Prophetas ipſe fuerit allocutus, illiſque ſe videndum præbuerit: Ità lib. 2. contrà Marcion. cap. 17. quo argumento adverſus hunc hæreticum utitur, ut probet Chriſtum Novi Teſtamenti Deum, Deo Veteris Teſtamenti non fuiſſe adverſatum: *Ipfum congregum cum Patriarchis & Prophetis, Filium Creatoris, ſermonem ejus, quem ex ſemetipſo proferendo Filium fecit, ut exindè omni diſpoſitioni ſuæ, voluntatiſque præfecit.* Et lib. contrà Judæos cap. 9. *Qui ad Moſem loquebatur, ipſe erat Dei Filius, qui & ſemper videbatur. Deum enim Patrem nemo vidit unquam, & vixit; & idè conſtat ipſum Dei Filium Moysi eſſe locutum, & dixiſſe ad populum: Ecce ego mitto Angelum meum antè facièm tuam.* Et lib. de præſcript. cap. 13. ait, *Verbum Filium ejus appellatum fuiſſe in nomine Dei variè viſum Patriarchis, in Prophetis ſemper auditum, poſtremò delatum ex Spiritu Dei Patris, & virtute in Virginem Mariam, carnem factum in utero ejus miſſiſſe vicariam vim Spiritûs ſancti qui credentes agat.* Item lib. 5. contrà Marcion. cap. 8. docet Verbum totam Divinitatis ſubſtantiam habuiſſe antequàm caro fieret: *In quo Chriſto conſiſtere haberet tota Subſtantia Spiritus, non quaſi poſtèa obventura illi, qui ſemper Spiritus Dei fuerit, antè carnem quoque: nec ex hoc argumenteris Prophetiam ad eum Chriſtum pertinere, qui ut homo tantum ex ſola cenſu David, poſtèa confeſciturus ſit Dei ſui Spiritum.*

Immutabilitatem Verbi non minùs expreſſè docet idem Tertullianus: tum in lib. contrà Praxeam; tum & aliis in libris, ubi aſſerit mutatum non fuiſſe Verbum, quando carnem induit. Sic enim loquitur lib. de carne Chriſti cap. 3. *Non potes dicere: ſi natus fuiſſet, & hominem verè induiſſet, Deus eſſe deſiſſet, amittens quod erat, dum aſſumit quod non erat. Periculum enim ſtatùs in Deo nullum eſt.* Idipſum probat ex Angelis quorum pedes lavit Abraham, quorum manibus ereptus eſt Loth. *Si igitur, inquit, Angeli converſi in corpulentiam humanam, Angeli nihilominùs permanerent, hoc tu potentiori Deo auſers, quaſi non valuerit Chriſtus verè hominem indutus, Deus perſeverare.* Et c. 14. *Infrà Angelos diminutus, dum homo ſit . . . quà autem Spiritus Dei, & virtus Altiffimi, non poteſt infrà Angelos haberi.* Addit c. 18. non decuiſſe ex humano ſemine Dei Filium naſci.

Hanc Verbi immutabilitatem aliis illuſtrat rationibus, docens ſcilicet, idè Chriſtum, quà Deum, nec fuiſſe morti, nec paſſionibus obnoxium. Ità lib. contrà Prax. cap. 2. jam adducto; necnon cap. 29. ubi dicit Chriſtum, non in divinâ, ſed in humanâ naturâ eſſe paſſum: *Quantum, cum due Subſtantie cenſeantur in Chriſto Jeſu, divina & humana, non ſtet autem immortalem eſſe divinam, ſicut mortalem quæ humana ſit; apparet, quatenus eum mortuum dicat: id eſt, quà carnem, & hominem, & Filium hominis; non quà Spiritum, & ſermonem, & Dei Filium.* Et infrà: *tàm autem incompaſſibilis Pater eſt, quàm im-*

passibilis etiam Filius ex eâ conditione, quâ Deus est. Quam omnem doctrinam, amplissimâ professione complectitur, duas, videlicet divinam & humanam, in Christo naturas verè fuisse conjunctas testificatus. Hincque à Christo phantasma removet, & peccatum: nam lib. de carne Christi cap. 5. Marcionitas, qui phantasticam tantùm Christo carnem tribuebant, impugnans, Christum æquè Deum ac hominem fuisse probat: Sicut, inquit, nec Deus sine Spiritu Dei; nec Dei Filius sine Deo Patre: Ità utriusque Substantia census hominem & Deum exhibuit: Hinc natum, inde non natum; Hinc carneum, inde spiritualem..... Quid dimidias mendacio Christum? totus veritas fuit. Et lib. secundo contra Marcion. cap. 17. Miscente, inquit, in semetipso hominem, & Deum; in virtutibus Deum; in passibilitatibus hominem; ut tantum homini conferat, quantum Deo detrahât: totum denique Dei mei penes vos dedecus, sacramentum est humana salutis. Conversabatur Deus, ut homo divinè agere doceretur. Ex aquo aiebat Deus cum homine, ut homo ex aquo agere cum Deo possit. Ait autem Christum à peccato fuisse immunem lib. de animâ cap. 41. Solus enim Deus, inquit, sine peccato; & solus homo sine peccato Christus; quia & Deus Christus. Item lib. 4. contra Marcion. cap. 9. Tetigit Christus Leprosum, à quo etsi homo inquinari potuisset, Deus utique non inquinaretur. Lib. etiam 5. cap. 20. Æquè non erit Deus Christus verè, si nec homo verè fuit in effigie hominis constitutus: Utrobique enim veritas necesse habebit excludi, si effigies & similitudo & figura phantasmati vindicabitur. Quod si in effigie & imagine, quâ Filius Patris verè Dei predicatus est, etiam in effigie & imagine hominis, quâ Filius hominis, verè hominem inventum..... Sic & Deus inventus est per virtutem, sicut homo per carnem.

Omnipotentiam Christo ut Creatori tribuit etiam Tert. lib. contra Prax. cap. 7. mox citato, & lib. 4. cap. 9. & lib. 5. cap. 20. contra Marc. hanc, quam suis in libris erat professus, Ecclesiæ unanimem, & ubique ab initio receptam de Verbi divinitate fidem esse docet; probaque, tum ex fidei symbolo lib. contra Prax. cap. 1. & 2. jam relatis; tum ex adoratione palàm ab omnibus Christo delatâ: sic enim habet lib. contra Judæos cap. 7. Christi autem regnum & nomen ubique porrigitur, ubique creditur, ab omnibus gentibus suprâ enumeratis colitur, ubique regnat, ubique adoratur, omnibus ubique tribuitur aequaliter; non Regis apud illum major gratia, non barbari alicujus imperiosi letitia, non dignitatum, aut natalium cujusquam discreta merita, omnibus equalis, omnibus Rex, omnibus Judex, omnibus Deus & Dominus est. Eadem repetit adversus Ethnicos in apolog. cap. 1.

Quibus certè omnibus nihil clarius, nihil apertius adjici potest: nec in mentem venisset Praxea, Filium, & Spiritum sanctum unam & eandem cum Patre personam constituere, nisi Ecclesia tres personas unum esse Deum fasset professâ. Hinc enim colligebat hæreticus: igitur Pater, Filius, & Spiritus Sanctus sunt unica persona, sicut & unicus Deus.

De posteriori dogmate, Dei scilicet unitate, cum Praxeâ conveniebat Tert-
de alio à Praxeâ cum Catholicis dissentiebat. At Socinianè sentiens Tert-
nonne in eandem cum Praxeâ sententiam subito descendisset? Pariter an
Judæis, an Ethnicis, an Marcionitis, aut Christum merum esse hominem,
aut phantastico tantum corpore fuisse indutum, vel minorem esse Deum
contententibus, fuisset adeo constanter reluctatus? non quidem, ut vel atten-
denti cuilibet, Fidei Catholica licet infenso, fieri obvium.

Origenes.

Origenes vir eruditissimus, eandem superiorum temporum fidem
apertè proficitur, præsertim in genuinis contra Celsum operibus: ejus
enim opera plurima variis erroribus conspersa fuisse non diffitebitur,
qui Origenem ejusque defensores audierit. Ex corruptis tam eximii vi-
ri libris nihil, nisi à Sanctis Patribus pro vindicandâ contra Arianos
catholicâ doctrinâ laudatum, proferemus.

Verbum, seu Filium Dei, esse unum cum Patre Deum probat Orig. lib.
8. contra Celsum: objiciebat quippè Celsus non esse cur Ethnicos incusa-
rent Christiani, quòd plures Deos colerent; cum ipsi Christiani Christum
pro Deo haberent. Respondet autem Origenes non pluribus Diis ser-
vire Christianos, licet Patri, & Filio servirent; cum unus & idem Pa-
ter, & Filius essent: *Unum igitur Deum*, inquit, *Patrem, & Filium*
colimus. Et ex his Scripturæ locis: *Ego & Pater unum sumus: Pater*
in me est, & ego in Patre: unum esse Deum patrem, & filium pro-
bat. Refellit etiam alium errorem, scilicet recens exortum esse Christum,
quia, ut habet: *Illi credimus dicenti, antequam Abraham esset, ego sum*.
Joan. 8. & credimus eum esse *veritatem*; & veritatis essentiam fuisse
ante adventûs Christi tempora; Patrem, & Filium duos esse substantiâ,
unum verò *concordiâ, & voluntatis identitate*; & qui videt Filium, vi-
det & Patrem Deum, ut in Dei imagine. Locus extat art. super. Pa-
trem ergò, & Filium unum substantiâ fecit, distinctos verò personâ.
Et sanè, si diversitatem substantiæ in patre & filio agnovisset Origenes,
non solvisset Celsi argumentum; imò in Ethnicorum sententiam, quam
impugnabat, descendisset: hæc ergò fuerat Origenis doctrina, filium sci-
licet esse unum cum Patre Deum.

Illustratur admodum hæc sententia ex objectione hæreticorum asseren-
tium Filium Dei non esse Deum, ne duo Dei dicerentur; sed esse unum
Deum Patrem, & unum Dominum Christum, idque probantium ex 1.
Cor. 8. v. 6. *Unus Deus Pater, ex quo omnia; & unus Dominus Jesus*
Christus, per quem omnia. Namque respondet lib. 7. in epist. ad Rom. in
hæc verba, *veritatem dico*, Apostolum asserere Christum esse super om-
nia Deum. Et sicut in isto loco non negatur quin pater sit Dominus, licet
Christus dicatur unus Dominus; ita Christus non negatur Deus, licet
pater dicatur unus Deus.

Attributa Dei essentialia filio competere docet idem Orig. ut æterni-

tatem, quam ipsi tribuit verbis illis, quæ refert S. Athan. lib. de decretis Synodi Nic. *Cum Christus sit similitudo Patris; fieri non potest, ut fuerit, quando non fuerit: quando enim Deus qui secundum Joannem lux dicitur, splendore caruit sue majestatis, ut quis audeat filio principium adscribere, quasi antea non existenti? Cogitet secum quicumque audebit dicere, Erat, quando non erat filius, se hoc ipsum dicere, Erat quando sapientia non erat, quando ratio non erat, quando vita non erat. Idem Origenes alibi dicit, ut habet ibidem S. Athan. Sed fas non esse, quantum in nobis est, spoliare Patrem unigenito suo, semper secum existente verbo. Item in commentariis in epist. ad Rom. quæ, ut ex præfat. patet, non Rufinus, sed S. Hieron. interpretatus est, ita scribit: Non prædestinatus est, ut esset filius Dei, inquit; sed destinatus: semper enim fuit sicut pater; factus est quidem secundum carnem quod prius non erat, non secundum spiritum.*

Attributa quoque divina in abstracto sumpta Christo impertit lib. 6. contra Celsum, & ait hominem esse ad Dei imaginem conditum, seu ad imaginem Verbi, quod est *justitia*, & *veritas*; summumque interesse discrimen inter esse Dei imaginem, & fieri ad imaginem: Dei imaginem, quâ homo exornatur, in animâ & animæ virtutibus sitam esse, seu in justitiæ communione; Verbum autem, seu Christum esse ipsam Dei justitiam: *Servator noster, inquit, non est particeps justitiæ, sed cum ipse sit justitia, participatur à justis.*

In eodem lib. docet Christum esse invisibilem, & incomprehensibilem: *Qui cum in principio apud Deum esset; propter carni coherentes, & carnales, caro factus est: ut caperetur ab eis, à quibus aliquine videri quidem poterat, in quantum Verbum erat, & apud Deum erat, & Deus erat: nunc corporaliter loquens, &, ut caro se prebens, ad se vocas omnes carneos. Tradit etiam cum invisibilem & incomprehensibilem esse æquè ac patrem, quâ patri est magnitudine æqualis, quâ ei pater suam magnitudinem communicavit, & magnitudine suâ imaginem Patris refert; alioquin patrem non perfectè referret.*

Immensitatem etiam Filio tribuit lib. 4. contra Celsum, ubi contendit Christum, cum è cælo descendit, nec mutasse locum, nec solum deseruisse, cum repleat totum orbem, quod ex Jerem. 23. & Act. 17. probat. Item lib. 6. contra eundem filio tradit omnes patris perfectiones: *Communicavit enim, inquit, suam magnitudinem cum unigenito & primogenito creature totius; ut, cum invisibilis Dei sit imago, magnitudine quoque imaginem Patris referat; alioqui non habitura erat imago invisibilis Dei, pulchram, ut ita loquar, proportionem, nisi magnitudo etiam accederet.*

Omnipotentiam ei tribuit lib. 1. de principiis cap. 2. ex Apoc. 1. v. 3. *Hac dicit Dominus Deus, qui est, & qui erat, & qui venturus est omnipotens: quis est alius, nisi Christus? & sicut nemo debet offendi, cum Deus sit pater, quod etiam Salvator est Deus: ita & cum omnipotens Deus pater, etiam nullus debet offendi, quod etiam filius omnipotens dicitur.*

dicitur. Hoc modo namque verum erit illud quod ipse dicit ad Patrem, omnia mea, tua sunt; & omnia tua, mea; & glorificatus sum in eis. Si verò omnia quæ Patris sunt, Christi sunt; inter omnia verò quæ sunt Patris, est etiam omnipotens; sine dubio etiam unigenitus Filius debet esse omnipotens, ut omnia quæ habet Pater, etiam Filius habeat.

Ex Incarnationis mysterio, quod pluribus in locis explicuit, palàm est, quæ fuerit Origenis circà divinitatem Filii sententia; aut potius quæ tunc fuerit totius Ecclesiæ doctrina; præsertim ex operibus indubitatis contra Celsum, in quibus sibi proponit ostendere nullius esse momenti argumenta, quæ Celsus congesserat ex Ethnicorum monumentis, & calumniis Judæorum adversus Christi divinitatem; nec proinde Christianos in Ethnicorum superstitiones relabi, Patrem, & Filium licet adorarent. Id patet ex lib. 1. contra Celsum, ubi cùm instaret, ipse Celsus, cur fugit in Ægyptum, si Deus sit Christus? Respondet: Credimus illum Deum, & hominem fuisse; sed ideò fugisse; quia erat necesse, ut humano more vitam ageret, nec divinitatem in infantiâ, potentiam, & sapientiam manifestaret. Si autem Christum non esse Deum verum censuisset Origenes ipsi per facile fuisset Celsò respondere, nihil mirum, si occultarit se Christus, & instar cæterorum hominum fugerit, cum non fuerit Deus. At verum esse Deum contendit, respondetque corpus, & animam non fuisse Deum, sed Dei instrumenta; & ideò, ut dictum est suprâ, humanâ cum ratione vixisse, atque obiisse, quia voluit, ut est in Evangelio. Addit etiam Judæorum fuisse Christo fidem adhibere; quòd cum Scripturæ tam clarè demonstrarent: quòd miraculis juxtâ Prophetas divinitatem suam probaret; quòd Discipulis se usque ad seculi consummationem affuturum polliceretur; & quòd tandem quæ ante mortem pollicitus erat, mortuus impleverit.

Addit adhuc meritiò accusari Judæos à Christianis, quòd Christum Deum minimè agnoscerent, cui tot in locis Prophetæ testimonium præberent, & qui de se dicit; *Ego sum veritas, & via.*

Lib. quoque 3. scribit Verbum fuisse Dei filium, & Deum, antequàm corpus humanum indueret. Cum autem vitio verteret Celsus, quod Christum hominem pro Deo colerent Christiani; sic respondet Origenes: *Attamen sciant isti criminatores, hunc Jesum, quem jam olim Deum esse credimus, Deique filium, ipsum esse Verbum, veritatem, sapientiam: cæterum mortale ejus corpus, & humanam animam, illius Verbi non solum communicatione, sed etiam unitione & permixtione tantum divinitatis assumpsisse, ut Deus fieret.*

Adorationem insuper Christo delatam fuisse refert Origenes; & ideò à Magis thus oblatum ei fuisse, quia Deus erat. Porro autem soli Deo, & orbis creatori deferri posse adorationem scribit lib. 1. contra Cels. & nulli creaturæ tribui posse sine divinitatis injuriâ; sed Christo, & ejus nomini exhibendum esse hunc honorem. Lib. 5. alio argumento idem probat, & ait Deos quidem dici Angelos quandòque, propter divinitatis quamdam communicationem; sed non adorari: orationes verò ad

Deum per Verbum, & ad Verbum esse dirigendas; Verbumque Deum esse: Hos Spiritus, Angelos ex officio suo nominare docti, invenimus propter divinitatem quamcumque interdum Deos vocari à sacrâ Scripturâ; sed non sic, ut jubeamur eos adorare, aut divinis honoribus colere; quamvis dona Dei nobis afferant. Omnia enim vota, omnes interpellationes, deprecationes, & gratiarum actiones destinanda sunt ad Deum rerum omnium Dominum, per majorem omnibus Angelis summum Pontificem, vivum Verbum, & Deum: gratias agemus etiam ipsi Verbo, interpellabimus, vota & preces ei offeremus. Miratur etiam ibidem Origenes quomodo Celsus crocodilis delatum honorem legibus firmatum probet; damnet verò cultum à Christianis exhibitum virtuti, quam Dei filium, justitiam, & sapientiam dicit, & nobis factum sanctificationem, & redemptionem: Ergo etiam si secundum Deum dicamus; sciant quod his verbis nihil aliud dicimus, quam virtutem in se omnes virtutes continentem, & rationem quæ totius rerum nature ad utilitatem universorum potissimum facta rationem complectatur; quam cum Jesu animâ longè præ cæteris animabus unicam cohesisse tradimus; quod ea sola perfecte capax sit ipsius Verbi summa participationis, & sapientiæ, justitiæque ipsissima. Idem initio lib. 8. Verbum Deum precatur, ut sibi adsit. Lib. quoque 6. scribit orphanos hæreticos esse, non Christianos, ut qui Jesum nec Deum, nec magistrum, nec Dei filium dicerent. Item lib. 8. observat alios quosdam extitisse hæreticos, qui filium majorem patre facerent: hos confutat, docetque patrem filio majorem dici; sic tamen, ut patri non subiceretur: licet enim illæ quæ Verbum & sapientiæ, imperium habeat, patri propterea non imperat. Quam quidem hæresim esse maximè occultam animadvertit ipse Origenes.

In aliis operibus extant istis consentanea; nam in cap. 10. ad Rom. in hæc verba: *Quomodo ergo invocabunt*: probat Christum esse reverà Deum ex Apostolo, quia invocandus est, & adorandus. Item Christum omnia nota habuisse cordis arcana probat in cap. 11. Math. Et præfat. in Joan. ait nullum Evangelistarum tam purè divinitatem exposuisse, quam Joan. Addit adhuc Servatorem nihil ignorare; quia est veritas: esse summè bonum; quia cum patre æterno universorum Deus est: esse æternum; quia illi à Deo dictum est Ps. 2. *Filius meus es tu, ego hodie genui te.*

Non est ergo cur miretur Socinianus, quod à S. Athan. & aliis contra hæresim Arianam tantoperè grassantem Origenes laudatus fuerit. Puduisset proculdubiò tantum Præsulem Origenis fidem Ariano dogmati opponere, nisi certò constitisset de illius fide catholicâ. Arianis enim præsto fuisset hanc authoritatem subito repellere, & Origenem opponere ipsi Origeni. Sed quâ ratione id obtinuissent Ariani? An Judæorum, & Ethnicorum adversus Christi divinitatem argumenta sic convellenda suscepisset Origenes, nisi sensisset catholicè? Ergo cum Orientali Ecclesiâ, Alexandrinâ scilicet, Cæsariensi, & Hierosolymitanâ; imò & cum universali Ecclesiâ, Catholicam de Filii divinitate doctrinam semper est professus.

S. Gregorius Thaumaturgus.

S. Gregor. Thamat. Neocæsariensis Episcopus, discipulus Origenis, vir sanctitate & miraculis commendatus, asserit tres personas unum esse Deum; & Verbum, seu Filium, esse unum cum Patre Deum: id enim constat tum ex S. Basil. Epist. 64. tum ex S. Greg. Niss. super. art. citato. Addere illud quoque possumus, nempe in confessione illâ fidei, quam ex eo refert S. Greg. Niss. Filium dici sapientiam subsistentem; perfectum ex perfecto; sapientiam omnia comprehendentem; virtutem, quâ potuerunt fieri creaturæ; sempiternum ex sempiterno: item Trinitatem perfectâ maiestate, & sempiternitate, & regno minimè dividi; nihil in eâ esse factum, aut serviens; immutabilem esse Trinitatem; Filiumque Patri nunquam defuisse. Idem in orat. ad Origenem Verbum appellat veritatem, & sapientiam, & Deum.

Minutius Felix.

Minutius Felix in Octavio ex eo Christi divinitatem repetit, quod in eo spes collocetur; eosque pariter deridet, qui Christum dicerent mortalem instar aliorum: *Qui putatis, inquit, Deum credi, aut moruisse noxium, aut potuisse terrenum. Na ille miserabilis, ejus in homine mortali spes omnis innititur: totum enim ejus auxilium cum extincto homine finitur.*

Sanctus Cyprianus.

S. Cyprianus Carthagenensis Episcopus, Martyr, & Doctor celeberrimus, necnon Africanæ simul & universæ Ecclesiæ testis illustrissimus, tum circa S. Trinitatis mysterium, tum circa Filii Dei, & Christi consubstantialitatem superioribus Patribus in omnibus consentit: huic autem, ut amplius ex infra dicendis patebit, consentiunt, S. Cornelius Episcopus Rom. & S. Firmilianus Cæsareæ in Cappadociâ Episc. Et proinde in S. Cypriani operibus occurrunt Ecclesiarum, Romanæ, Africanæ, & Orientalis, fidei testes, qui sanctitate & eruditione antiquorum nulli cedunt, nec possunt inferiores haberi. De Trinitate autem S. Cypriani fides, & Ecclesiæ Africanæ art. super. refertur in epist. 71. ad Jubaj. in epist. 7. ad Magnum, & in serm. de orat. Dominicâ; & rem jam confectam rursùm conficimus, cum de Christi seu Filii divinitate probationes peculiates congerimus. Iterùm personas tres unum esse Deum Sanct. Cyprianus demonstrat lib. 2. ad Quirinum contra Judæos, & probat Christum seu Filium Dei esse, verum, & cum Patre Deum unum; quia Dei est Filius unigenitus, Patris sapientia, & potestas: docet enim cap. 1. Christum esse primogenitum, & sapientiam Dei: cap. 3. esse Verbum: cap. 4. manum & brachium Dei. In eodem quoque lib. cap. 1. tradit eum esse æternum, & creatorem: cap. 5. Patriarchis apparuisse: cap. 6. Deum esse: cap. 7. à principio Dei Filium existere: cap. 8. hominem, & Deum esse. In eodem etiam libro cap. 9. scribit Christum esse hominis æquè ac Dei Filium: *Homo, & Deus Christus, ex utroque genere concretus; ut mediator esse inter nos & Patrem posset.*

In aliis suis operibus Christum Deum, & hominem esse semper docuit ipse S. Cyprianus. Etenim in epist. 47. ad Cornelium, gratias agit Deo Patri, & Christo Deo nostro. In epist. 74. ad Pompeium, blasphemari ait in Dominum Deum Christum. Item Christum esse adorandum docet lib. de bono patientiæ, utpotè verum Deum: hæc sunt ejus verba: *Pater Deus præcepit Filium suum adorari, & Apostolus Paulus divini præcepti memor ponit, & dicit: Deus exaltavit illum, & donavit illi nomen, quod est super omne nomen; ut in nomine Jesu omne genu flectatur, cælestium, terrestrium, & infernorum: & in Apocalypsi, Angelus Joanni volenti adorare se resistit, & dicit: Vide ne feceris, quia conservus tuus sum, & fratrum tuorum: Jesum Dominum adora.*

S. Cornelius Papa.

S. Cornelius epist. ad S. Cypr. quæ est 46. inter ejus epistolas ita loquitur: *Nec ignoramus unum Deum esse; unum Christum esse Dominum, quem confessi sumus; unum Spiritum sanctum; unum Episcopum in Ecclesiâ Catholicâ esse debere.*

Sanctus Firmilianus.

S. Firmilianus in epist. ad S. Cypr. art. super. citatâ, eandem astruit veritatem. Jam verò potest-ne magis esse perspicua fidei professio; si attendatur tunc temporis in more fuisse receptum, ut primatum Sedium Episcopi sua secum opera communicarent, præsertim ubi singularis animorum conjunctio accedebat; cujusmodi S. Cornelium inter, & S. Cyprianum semper intercessit. Porro autem S. Cyprian. adeò eam de trium personarum divinitatis unitate fidem vigere supponit, ut de illâ redeuntes ab hæresi hæreticos interrogari velit, ut patet ex epist. ad Jubaj. art. super. citatâ.

Novatianus.

Novatianus Ecclesiæ Romanæ Presbyter eruditus admodum, postea adversus Cornelium Papam schismatis author cum suis, Sanctissimæ Trinitatis fidem, etiam in schismate, cum Catholicâ Ecclesiâ quam deseruerat, servabat: quod consensionis universalis argumento est invicto. Hanc exponit lib. de Trinit. An librum istum unitatis catholicæ particeps, an in schismate scripserit? ignoro. Trinitatis sacrosanctæ unitatem, & Christi divinitatem apertè omninò confirmat, & asserit Christum esse unum Deum cum Patre, nomine, naturâ, adoratione, & professione. Duplicem ibi hæresim impugnat. Adversus primam, quæ Patrem, Filium, & Spiritum sanctum, unam esse personam docebat, argumenta Tertulliani ferme omnia congerit.

Adversus alteram, quæ Christum hominem tantum dicebat, probat Christum esse Deum, & unum cum Patre Deum. Quia autem Ecclesiæ fidei professionem de Trinit. emittit; ideò ab ejus professione incipit.

mus. Cap. 1. asserit ubique credi Deum unum esse & solum; & trinum in personis: *Regula*, inquit, *veritatis* exigit, ut primò omnium credamus in Deum Patrem omnipotentem &c. Cap. 9. Eadem regula veritatis docet nos credere post Patrem, etiam in Filium Dei Christum Jesum Dominum Deum nostrum, sed Dei Filium, hujus Dei, qui & unus, & solus est. . . . in veteri Testamento promissum, in novo exhibitum. Cap. 29. addit professionem in Spiritum Sanctum: *Ordo*, inquit, *rationis*, & *fidei auctoritas*, digestis vocibus & litteris Domini, admonet nos post hac credere etiam in Spiritum Sanctum olim Ecclesia repromissum &c.

Verbum autem unum esse Deum cum Patre, cum adversariis, qui personarum unitatem ex divinitatis unitate inferrebant, supponit, & observat c. 18. ex hæreticis quosdam scripturarum pondere ad divinitatem Christi agnoscendam adductos, eundem cum Patre dixisse, Deumque simul Patrem, & Filium asseruisse: alios autem idèd corporis veritatem ei detraxisse, ne tam humili divinitatis cum corpore confederatione divinitas infirmaretur. Cap. 30. quòd eodem principio niterentur scilicet, quia unicus erat Deus; tùm ii qui unicam in Deo personam agnoscerent; tùm qui Christum merum esse hominem profiterentur; cum utrisque de principio convenit, unum scilicet esse Deum. Et addit cap. 12. adversariis ita certum fuisse Christum esse Deum, ut cum illi divinitatem negare non possent, eandem illum cum Patre personam facerent.

Non mediocriter illustratur ejus doctrina circa unitatem divinitatis in Patre, & Filio ex solutione argumentorum, quæ adversarii proponebant. Cap. 30. sic colligebant, inquit, isti: *Si non Pater sit Christus, dum & Deus Filius Christus: duo Dii contra Scripturas introducti esse videntur.* Ità etiam alii: *Si alter Pater, alter est Filius: Pater autem Deus, & Christus Deus; non ergò unus Deus, sed duo Dii introducuntur pariter, Pater & Filius; ac si unus Deus, consequenter homo Christus; ut merito Pater sit Deus unus.* His autem ità respondet: *Nos enim & scimus, & legimus, & tenemus unum esse Deum, qui fecit cælum ac terram &c. sed quomodo hoc tenemus, & legimus, & credimus, sic Scripturarum cælestium nullam partem præterire debemus.* Deindè laudat Scripturæ loca, quæ docent unum esse Deum, & quæ tradunt etiam Verbum & Christum esse Dominum, & Deum: ità retundit adversarios: Ex eorum enim ratiocinatione sequeretur duos esse quoque dominos. Cap. 31. probat unum esse Deum Patrem, & Filium, dux licet personæ sint; quia non duo sunt innati, sed ex Patre natus est Filius; ita ut sit incomprehensibilis ejus divinitas, & ab æterno, quia ante tempus. Et quia Pater est ab æterno Pater, Filium tantùm præcedere concipitur, quia originis est principium, sed coæternum. Si autem duo essent innati, duo essent principia; sed quia filius genitus est, non discordiam divinitatis facit, nec inæqualitatem divinitatis: *Sed unus Deus est per substantiæ communionem.* Cap. 31. *Sermo Filius natus est, qui non in sono percussæ aëris, aut in tono coactæ de visceribus vocis accipitur; sed in substantiâ prolata à Deo virtutis agnoscitur: cujus sacra & divina natiuitatis*

arcana, nec Apostolus didicit, nec Prophetes comperit, nec Angelus scivit, nec creatura cognovit. Filio soli nota sunt, qui Patris secreta cognovit. Hic ergo cum sit genitus à Patre, semper est in Patre: semper autem sic dico, ut non innatum, sed natum probem. Sed qui ante omne tempus est, semper in Patre fuisse dicendus est: nec enim tempus illi assignari potest, qui ante tempus est. Semper enim in Patre, ne Pater non semper sit Pater: quia & Pater illum etiam quâdam ratione precedit, necesse quodammodo est prior sit quàm Pater sit; quoniam aliquo pacto antecedit necesse est cum qui habet originem, ille qui originem nescit: simul ut hic minor sit, dum in illo esse se scit, habens originem; quàm nascitur, vicinus in nativitate dum ex eo Patre, qui originem solus non habet, nascitur. Hic quidem Patrem ratione originis priorem & majorem facit. Et postea: Cum Patre, inquit, postmodum fuit; quia ex Patre processit, substantia scilicet illa divina, cujus nomen est verbum. Et postea: Deus utique procedens ex Deo secundam personam efficiens, sed non eripiens illud Patri, quod unus est Deus. Si enim natus non fuisset, innatus comparatus cum eo qui esset innatus, equatione in utroque ostensâ, duos faceret innatos; & ideo duos faceret Deos. Ostendit quomodo futuri fuissent duo Dii ingeneriti, & sic duo principia. Et addit: Nunc autem quidquid est, non ex se est, quia nec innatus est; sed ex Patre est, quia genitus est; sive dum verbum est; sive dum virtus est; sive dum sapientia est; sive dum lux est; sive dum filius est; & quidquid horum est, dum non aliunde est, quàm ex patre, patri suo originem suam debens, discordiam divinitatis de numero duorum Deorum facere non potuit, qui ex illo, qui est unus Deus, originem nascendo contraxit. Et proinde sunt unus Deus, quia unam & eandem communicatam habent divinitatem. Et infra: Duos, ait, Deos facere non potuit, qui nec duas origines fecit, qui ex eo qui originem non habet, principium nativitatis ante omne tempus accepit. Et ut habet postea: Idem cum Patre Deus nascitur ex Patre Deo, & aequalis Patri; etiamsi Deus est, qui natus est; unum tamen Deum ostendit, quem hic, qui natus est, esse sine origine comprobavit. Est ergo Deus, sed in hoc ipsum genitus, ut esset Deus. . . . cujus sic divinitas traditur, ut non aut dissonantia, aut inaequalitate divinitatis duos Deos reddidisse videatur. Sic igitur Pater, & Filius sunt unus Deus; nec ulla est divinitatis inaequalitas, aut dissonantia.

Adversus alios hæreticos, qui Christum dicebant merum esse hominem, variis argumentis pugnat idem Novat. cap. 11. quia tam certum est verum esse Deum ex Scripturis, quàm certum sit verum esse Deum hominem: Periculum enim erit, ne homo ex passionibus ostendi non possit, si non potuerit etiam Deus ex virtutibus approbari: non est ergo in unam partem inclinandum, & ab aliâ parte fugiendum; quoniam nec terebit perfectam veritatem quisquis aliquam veritatis excluderet portionem: tam enim scriptura etiam Deum annuntiat Christum, quàm etiam ipsum hominem annuntiat Deum; tam hominem descripsit Jesum Christum, quàm etiam Deum quoque descripsit Christum Dominum. Et cap. 12. ex Pro-

phetâ Osce Christi divinitatem probat, quod salutem in Domino Deo ipsorum se daturum Deus sit pollicitus. Addit cap. 16. Christum dici *primogenitum omnis creature; quoniam secundum divinitatem*, inquit, *ante omnem creaturam ex Patre Deo sermo processit.*

Variis argumentis cap. 14. & sequentibus Attributa Deo essentialia, æternitatem, immensitatem, &c. verbo competere probat ex Scripturis; & ideo Verbum esse fidei, spei nostræ, & invocationis objectum. Ergo, inquit, *ante mundi creationem in gloriâ erat; cum Patrem roget ut sibi, quam claritatem haberet, conferat.* Et in eodem cap. 14. sic habet: *Si homo tantummodo Christus, quomodo adest ubique invocatus? cum hac hominis natura non sit, sed Dei, ut adesse omni loco possit. Si homo tantummodo Christus, cur homo in orationibus Mediator invocatur? cum invocatio hominis ad præstandam salutem inefficax judicetur. Si homo tantummodo Christus; cur spes in illum ponitur? cum spes in homine maledicta referatur. Si homo tantummodo Christus; cur non licet Christum sine exitio animæ negare? cum in hominem commissum delictum referatur posse dimitti. Si homo tantummodo Christus, quomodo Joannes Baptista testatur, & dicit: Qui post me venit, ante me factus est, quia prior me fuit? cum si homo tantummodo Christus, post Joannem natus, ante Joan. esse non possit, nisi quoniam illum quæ Deus est, ante præcessit. Si homo tantummodo Christus; quomodo quæ Pater facit, & Filius facit similiter? cum homo celestibus operibus, Dei similia opera facere non possit. Si homo tantummodo Christus; quomodo sicut Pater in se vitam habet, ita dedit Filio vitam habere in semetipso? cum exemplo Patris Dei, homo in se vitam habere non possit; cum non in æternitate sit gloriosus, sed in materiâ mortalitatis effectus? Si homo tantummodo Christus, quomodo refert: Ego sum Panis vite æterna, qui de cælo descendi, &c. Et cap. 16. ait, quod sit Dei ab æterno lux, sapientia, &c. Cap. 24. idem probat, tum quia qui credit in hominem ex Jerem. 17. maledictus est; qui autem in Christum credit, in æternum non est moriturus: tum quia Paracletum mittit, & à se accepturum quæ nuntiaturus esset, testatur: tum etiam quia Joan. 15. hanc regulam credendi constituit, ut illum esse Deum intelligeremus: *Hæc est vita æterna; & quoniam si se Deum noller intelligi, addidisset, & quem misisti hominem Jesum Christum: nunc autem neque addidit, nec se hominem nobis tantummodo Christus tradidit: Deo junxit, ut & Deum per hanc conjunctionem, sicut est, intelligi vellet. Est ergo credendum, secundum præscriptam regulam, in Dominum unum verum Deum, & in eum quem misit Jesum Christum consequenter se nequaquam Patri, ut diximus, junxisset, nisi Deum quoque intelligi se vellet: separasset enim ab eo, si Deum intelligi se noluisse: inter homines enim tantummodo se collocasset, si hominem se esse tantummodo sciret: nec cum Deo junxisset, si se non & Deum nosset: nunc & de homine tacet, quoniam hominem illum nemo dubitat: & Deo se jungit merito, ut credituris divinitatis sue formulam poneret.* Addit autem ex Joan. cap. 17. Christum fuisse ante mun-*

di constitutionem ; cum ante mundum gloriam apud Patrem haberet : *Deus est igitur , inquit , quoniam ante mundum fuit.*

Socinianorum hîc responsionem prævertit ; nam & illâ solutione utebantur tunc temporis hæretici , habuisse quidem Christum gloriam ab æterno , sed in decreto Dei : *Nec , inquit , predestinatio ista dicatur , quoniam nec posita est ; aut addant hoc , qui hoc putant. Sed va est adjucentibus , quomodo & detrahentibus positum : non potest ergò dici , quod non potest adjici : sublata ergo predestinatione qua non est posita , in substantiâ fuit Christus ante mundi institutionem quoniam & si in predestinatione dicitur gloriosus , & ante mundi institutionem fuisse predestinationem , ordo servetur , & ante hunc erit multus numerus hominum in gloriam destinatus : minor enim per istam destinationem Christus ceteris intelligetur , quibus posterior denotatur. Nam , si hac gloria in predestinatione fuit , predestinationem istam in gloriam novissimus Christus accepit : Ante enim predestinatus Adam esse cernitur & Abel & c. . . . nam cum apud Deum & personarum & rerum omnium ordo digestus sit , ante hanc predestinationem Christi in gloriam multi predestinati fuisse dicuntur. Et hoc pacto minor ceteris hominibus Christus esse deprehenditur , qui melior , & major , & antiquior ipsis quoque Angelis invenitur. Addit cap. 26. & 27. Verbum Deum apparuisse antiquis ; & idè dictum fuisse Deum , non verò Angelos.*

Iterùm illustratur illorum temporum fides ex hæreticorum objectionibus , nam capite 19. ex his verbis Luc. 1. v. 35. *Propterea & quod ex te nascetur , sanctum vocabitur Filius Dei :* concludebant illi dictum esse Filium Dei , qui hominis erat Filius ; quod & colligunt Sociniani : Respondet verò Scripturam commentationi illi hæreticæ viam præcluisse adjunctâ conjunctione : *Propterea & quod ex te nascetur sanctum ; ut illud ostenderet non principaliter hoc sanctum , quod ex illâ nascitur , id est istam carnis corporisque substantiam , Filium Dei esse ; sed consequenter , & in secundo loco : principaliter autem Filium Dei esse , Verbum Dei incarnatum per illum Spiritum , de quo Angelus refert : Spiritus veniet , & virtus Altissimi obumbrabit tibi. Hic est enim legitimus Dei Filius , qui ex ipso Deo est , sanctum illud assumit , & sibi Filium hominis annectit , & illum ad se rapit , atque transducit. Connexione suâ & permutatione sociatâ præstat , & Filium illum Dei facit , quod ille naturaliter non fuit.*

Ad aliam objectionem cap. 20. relatam , si Christus Deus est , ergò mortuus est ; Respondet Christum ex duplici naturâ constare , & in illo mortuum esse , quòd homo est , non quòd Deus. Hæc retulisse satis sit , nihil enim manifestius.

Addimus docere Novatianum cap. 23. ex Joan. 10. se unum cum Patre Deum dixisse Christum : *Ego & Pater unum sumus. Quomodo enim dixit : Ego & Pater unum sumus , si non Deus est & Filius ? Et postea dicit Christum refusasse blasphemiam sibi à Judæis imputatam : Si illos dixit Deos Scriptura , ad quos Dei verba facta sunt , & non potest solvi Scriptura*

Scriptura : quem Pater sanctificavit & misit in hunc mundum, vos dicitis, blasphemus, quia dixi : Filius Dei sum ego. Quibus vocibus neque se negavit Deum ; quin imò Deum se esse firmavit : nam, quia sine dubitatione Dii esse dicuntur, ad quos verba facta sunt ; multò magis hic Deus, qui melior illis omnibus invenitur. Ità, quod ad crimen blasphemia pertinet, filium se, non patrem dicit. Quod autem ad divinitatem spectet ipsius, ego & pater unum sumus dicendo, filium se esse, & Deum probavit.

Hic igitur totius Ecclesiæ etiam cum Novatianis schismaticis consensionem deprehendant Sociniani expositam eruditè, & suas evasiones, & tergiversationes solerter præoccupatas & solutas. Nicænis igitur Patribus innovationem vitio vertere desinant, & in sectâ suâ tam apertè significatam pro merito detestentur, & ad eam Ecclesiam redeant, quæ juxta Christi pollicitationem immunis ab omni errore fuit servata.

Theognostus.

Theognostus, quem citat S. Athan. lib. de decretis Nicænæ Synodi, Filii generationem æternam, & ex substantiâ Patris cum cæteris tertii seculi authoribus profitetur. *Non forinsecus, inquit, aut ex rebus extraneis Filii substantia constat, neque ex non entibus producitur ; sed ex Patris substantiâ ita progenitus est, ut à luce jubar ; ut ex aquâ vapor : neque enim vapor id ipsum est, quod aqua ; neque jubar id ipsum, quod sol ; sed non alienum tamen, verum ut profluentem eum esse dicas ex Patris substantiâ : idque ita ut interim substantia illa Patris, divisionem non patiatur. Quemadmodum enim sol non diminuitur suis ex se profluentibus radiis ; ità nec substantia Patris diminutionem sustinet, imaginem sui Filium progignens.*

SS. Dionysius Rom. & Alexand. martyres.

Ex opere Dionysii Rom. adversus eos, qui Filium Dei creaturam facerent, hæc verba S. Athan. lib. de decretis Nicænæ Synodi laudat, in quibus tum Sabellium, tum eos, qui divinitatem in tres Deos dividerent, refellebat : *Ille enim cum blasphemiam dicit Filium esse Patrem, Patremque Filium : isti autem quodammodo tres Deos constituunt, dum in tres substantias alienigenas, & inter se omnino segregatas sanctam unitatem dispartiuntur : uniri enim necessarium est omnium Deo Dei verbum, & in eodem herere, & versari Spiritum Sanctum, & Sanctam Trinitatem in unum omnium rerum Deum, omnipotentemque, veluti in verticem, principemque consummari, & coalescere. Sic ergo tres personas unum esse Deum cum Ecclesiâ Romanâ professus est. Hæc addit : Non igitur dividenda est in tres deitates admirabilis, & divina unitas : neque sub nomine creationis aut factiōis minuenda est dignitas, & immensa Domini majestas ; sed credendum est in Deum Patrem omnipotentem, &*

in Iesum Christum Filium ipsius, & in Spiritum Sanctum, univique Deo totius universitatis verbum: Ego enim, inquit, & Pater unum sumus, & ego in Patre, & Pater in me: ita enim & divina Trinitas, & sancta prædicatio professioque monarchia conservari possit. Præterea qui Filium, Dei opus faciebant, ut blasphemos ita rejicit: Caterum non minus culpaveris eos, qui Filium Dei opus credunt, & factum esse Dominum opinantur; cum sacra eloquia generationem ei congruentem, & decentem; non autem formationem, & creationem testimoniis suis attribuant. Blasphemia igitur illa, non vulgaris, sed maxima habenda est, si Dominum dicas manu factum: si enim factus est Filius; erat igitur, cum ille non erat: atqui ille semper erat.

Quod autem spectat ad Dionysium Alex. is cum adversus Sabellianam hæresim, ut habet S. Athan. in apologiâ pro illo, scripsisset, & quidam è fratribus Romam trajecissent ad Dionysium Rom. accusassentque suum Episcopum, quasi Christum hominibus tantum accenseret; à Dionysio Romano admonitus apologiam scripsit, & tres esse personas unum Deum probavit. Ità. S. Athan. in lib. de decretis Nicænæ Synodi scribit Euphranorem & Ammonium Episcopos in superiori Libyâ, rudes & indoctos, Sabellii argumentis eò adductos fuisse, ut in Ecclesiis penitus Filii Dei nomen tacerent: illos S. Dion. Alex. ad quem Ecclesiæ illarum cura pertinebat, tum litteris, tum etiam per legatos admonuit: & ut eos edoceret, probavit Filium alium esse à Patre; nec Patrem carnem induisse: sed inluminatus à quibusdam, quod Filium creaturam nominasset, eumque factum esse, & non fuisse consubstantialem Patri dixisset, ad S. Dionysium Rom. Episcopum in depulsionem criminis scribit, se neutiquam dixisse Filium factum esse, quem Patri consubstantialem liberè confitetur. Illius autem forma loquendi, inquit S. Athan. talis est. In aliâ epistolâ, quâ ostendo falsum esse crimen, quod mihi obijciunt, quod Christum esse consubstantialem Deo negassem. Nam tametsi dico me id vocabuli in sacris litteris nec legisse, nec reperisse; verumtamen argumenta mea, quæ postmodum subjunxi, & ab illis tacita sunt, nonne prorsus ab hac sententiâ discrepant? Qui & humanam sobolem pro exemplo allegavi, de quâ nihil dubium, quin sit cum genitore ejusdem generis, atque eo solo parentes à liberis alios esse, quod ipsi liberi sui non sint. . . . Plantam etiam dixi, sive à semine, sive à radice procreata sit, diversam eam esse ab eo, unde progenita sit; sed tamen cum eo omnino naturâ convenire: fluviumque dixi à fonte profluentem, aliud quidem nomen sortiri: neque enim fontem fluvium, nec fluvium fontem dici; sed tamen utrumque simul existere, & fluvium esse aquam ex fonte. Caterum neque opus aliquod esse, neque creaturam verbum Dei, sed proprium paternæ substantiæ germen, idque indivisibile. Postea verò cum Ariani S. Dionysium Alex. suas in partes adducere conati essent, quasi Christum hominem tantum dixisset, librum de illius sententiâ, seu apologiam pro illo S. Athan. scripsit, ostendens eum docuisse Verbum esse æternum, sapientiam, Dei virtutem; fuisse ab æterno, quia Pater fuit ab

æterno, luce semper existente, existente æterno Patre, æternum Filium existere, lumen de lumine: *Hoc pacto*, inquit S. Dionysius apud Athan. *unitatem que indivisibilis est, in Trinitatem dilatamus, & Trinitatem que diminui non potest, in unitatem consummamus; & tamen accusamus quasi qui dicamus Filium unum esse ex numero rerum factarum, & nequaquam οὐσίον τοῦ Πατρὸς, Patri consubstantialem.* Ex utriusque Ecclesiæ, Romanæ scilicet, & Alexandrinæ consensu, & utriusque Dionysii doctrinâ, tres personas unum esse Deum, Filium esse Patri consubstantialem, & probandam esse vocem οὐσίον, utpotè antiquitus usurpatam, probat S. Athan.

Animadvertant Sociniaſi continuatam sic in utrâque Ecclesiâ, Romanâ & Alexandrinâ Catholicæ Fidei professionem, & ab objectionibus, quas ipsi renovant, abhorruisse tunc temporis, tùm Ecclesiæ caput, tùm secundæ Sedis Episcopum.

Synodus Antiochena.

Synodus Antioch. adversus Paulum Samosat. qui divinitatem Christi negabat, Verbum reverà ab æterno existisse proſtitetur, non præscientiâ aut prædeterminatione, ut habent Sociniani, sed substantiâ Deum, & Dei Filium: *Hunc verè Filium genitum, unigenitum Filium, imaginem invisibilis Dei, primogenitum omnis creature, sapientiam & Verbum, & virtutem Dei, qui est ante secula, non præscientiâ, sed substantiâ & hypostasi Deum; Dei Filium in veteri & novo Testamento agnoscentes confitemur.*

Arnobius.

Arnobius Lactantii magister, Ethnicorum objectionem adversus Christi divinitatem convellere conatus, de illius divinitate fidem universalem non modò refert, sed & omnes Deo magis essentielles perfectiones ipsi convenire demonstrat. Christianis quippè se succensere gentiles testabantur, ut habet; non quòd unus ab illis Deus adoraretur; sed quòd in hominis crucifixi adorationem procumberent: *Et Deum fuisse*, inquit, *contenditis, & superesse adhuc creditis, & quotidianis supplicationibus adoratis.* Porro autem in promptu erat Arnobio, cæterisque Christianæ Religionis defensoribus hanc objectionem confutare; si nihil in Christo, quod humanæ naturæ vires excederet, agnovissent; reponendo scilicet Christum, non ut Deum coli, aut adorari; sed homini potiùs propter eximias dotes, concessaque divinitus gratiæ dona, cælestes & debitos honores exhiberi. Sed longè aliam inire respondendi viam: Sibi enim i. probandum sumit, æquiori jure se ad Christi cultum accedere, quàm ad Æsculapii, & Dæmonum aliorum adorationem; cum Christus vera bona hominibus contulerit; hi autem adumbrata tantùm, & sæpiùs certis naturam malis, quæ postmodùm sanarent, infestaverint: nec à cultu Christi dimovendos esse Christianos, quòd à Judæis excep-

rus pessimè Christus videretur: Baccho enim, & Æsculapio, licet dilaniatis &c. suos ipsi non recusabant honores; eos tamen non fuisse Deos; Christum autem verè Deum esse; & proinde illi divinum deberi cultum. Cum vero, inquit, Deus sit re certà, & sine ullius rei dubitationis ambiguo, inficiaturos arbitramini nos esse quàm maximè illum à nobis coli, & presidem nostri corporis nuncupari. Ergo-ne, inquit, aliquis furens, iratus & percitus Deus ille est Christus? Deus, respondebimus, & interiorum potentiarum Deus, & quod magis infideles acerbissimis doloribus torqueat, rei maximè causa à summo Rege ad nos missus, veritatis istius, qui probationem exigeret furiosus, nulla major est comprobatio, quàm gestarum ab eo fides rerum. Item cedendorum, quæ nec possent exequi gentium Dii, miraculorum facultatem Apostolis collatam urget Arnobius.

Ex ipso igitur Arnobio, Christus est unus cum Patre Deus, utpotè qui tùm fuerit adoratus, dona contulerit, se Deum miraculis, & cordium penetratione probaverit, Deus ille sublimis fuit, Deus radice ab intima, Deus ab incognitis regnis, & ab omnium principe Deus sospitator est missus.

Addit Christum ipso die mortis suæ divinitatem suam argumentis confirmasse certissimis. Sic ergò Christus adorabatur ut Deus, multa dona ut Deus contulerat, & miraculis suis se probaverat Deum.

Ad hanc objectionem, Si Deus fuit Christus, cur in formà est hominis visus? & cur more est interemptus humano? sic respondet: An aliter potuit invisibilis illa vis, & habens nullam substantiam corporalem, inferre se & commodare mundo, consiliis interesse mortalium, quàm ut aliquod tegmen materia solidioris assumeret, quod oculorum susciperet injectum... mors illa, quam dicitis, assumpti hominis fuit; ipsius gestaminis, non gestantis. Et infra: Cadere in res divinas non potest mortis occasus. Ergò Christus quàm Deus, & invisibilis, & immortalis agnoscebatur.

Lib. 2. ait rerum ipsarum naturalium in ipsis Philosophis inscitiam deprehendi gravissimam; & se naturæ arcanorum incios lubenter profiteri Christianos, ut quos à curiosiori illarum rerum indagatione avocarit Christus Deus: Et idè, inquit, Christus licet vobis invisus Deus: Deus, inquam, Christus; (hoc enim sæpè dicendum est, ut infidelium dissiliat & dirumpatur auditus) Dei principis iussione loquens sub hominis formà, cum mortalium sciret cæcam esse naturam &c. Lib. 7. asserit Christum esse Deum verum, & non tantùm nomine, omnipotentem, & æternum. Quinimò qualis Dominus rerum est, atque omnipotens ipse, quem dicere nos omnes Deum scimus, atque intelligimus verum, cum ad ejus nominis accessimus mentionem. Deus enim ab æterno, in eo quod Deus est. Deus ergò Christus, ut ab æterno Deus, omnipotens, invisibilis; ratione humanæ naturæ factus aspectabilis, & mortalis tunc credebatur.

Lactantius.

Lactantius vir pietate, verborum elegantia, & eruditione commendabilis;

& ideo Crispi Cæsaris præceptor selectus, tradit Christum esse verum & unum Deum cum Patre, nomine, naturâ, adoratione, & professione. Nam lib. 4. cap. 12. ejus divinitatem ex auctoritate Scripturarum probat, tum scilicet ex Isai. 7. ubi dicitur Emmanuel, hoc est, nobiscum Deus; tum ex Psalm. 84. *Veritas, inquit, de terrâ orta est; quia Deus, in quo veritas est, terrenum corpus accepit, ut terrenis viam salutis aperiret.* Cap. etiam 13. docet Deum omnium parentem, cum religionem suam transferre voluisset, non sicut antea per hominem (Mosem scilicet) novam legem dedisse; sed per Filium, quem ideo nasci voluit tanquam hominem, ut per omnia summo Patri similis existeret. Addit ibidem Lactantius, cum Pater parentibus careat; ideo etiam filium bis nasci oportuisse, ut duplicem haberet nativitatem, alteram sine patre temporariam, alteram sine matre æternam; *Ut mediam inter Deum, & hominem substantiam gerens, nostram hanc fragilem, imbecillamque naturam, quasi manus ad immortalitatem posset educere, factus est Dei Filius per Spiritum, & hominis per carnem; id est & Deus, & homo. Dei virtus in eo ex operibus qua fecit, apparuit; fragilitas hominis ex passione quam pertulit.* Quod pluribus confirmat: redarguitque eos, qui Deo incarnationem vitio vertebant. Et cap. 25. scribit habere Christum spiritalem Patrem Deum; esse Deum, & hominem; Filium esse matris Virginis; & tandem Deum inter, & hominem medium esse constitutum: *Fuit igitur Deus, & homo, inter Deum, atque hominem medius constitutus.*

Idem Lactantius lib. 4. Institut. cap. 6. docet æternum esse Filium, & Patri cœternum, & habere alias Patris perfectiones; hæc sunt ipsius verba: *Deus, antequam præclarum hoc opus mundi adoriretur, seu ab æterno, sic enim æternitatem exprimit Scriptura, sanctum incorruptibilem Spiritum genuit, quem Filium nuncuparet.* Et quamvis alios postea innumerabiles per ipsum creavisset, quos Angelos dicimus; hunc tamen solum primogenitum divini nominis appellatione dignatus est, patriâ scilicet virtute, ac majestate pollentem. *Essè autem summi Dei filium, qui sit potestate maximâ præditus, non tantum congruentes in unum Prophetarum voces, sed etiam Trismegisti prædicatio, & Sybillarum vaticinia demonstrant.* Ergo & ab æterno genitus, & solus Filius; omnipotens, utpotè creator; in omnibus etiam in potentiâ & majestate Patri æqualis; ac proinde in substantiâ. Item cap. 7. tradit Angelis ipsis ejus nomen esse ignotum. Cap. 8. describit æternam ipsius à Patre generationem; & ait eam à nemine cognosci, nec enarrari posse. Addit etiam ibi cum Dei sermonem nuncupari, necnon magno discrimine ab Angelis discrepare; quia isti creantur ad ministerium; ipse verò Deus est & Dominus, & magister. Cap. quoque 9. ait illum esse Verbum, & Dei sapientiam; & ideo λόγος rectè dici à Græcis. Cap. 11. scribit esse Filium Dei primogenitum, opificem rerum, & Patris conciliatorem, quem Pater noluit mittere in potestate & claritate cœlesti; *Ut pœnas pro facinoribus suis lueret, qui Dominum ac Deum suum non recepißet; quod olim Propheta cecinerant sic esse facturum.* Cap. 17. dicit Filium ideo hominem factum esse, *Ut*

per eum qui esset aternus, legem sanciret aeternam. Quin & attributa divina & in abstracto sumpta Christo adscribit: nam cap. 9. & 11. docet Verbum esse veritatem; & cap. 16. esse virtutem, & iustitiam, & sapientiam. Item Christo veram tribuit adorationem, quæ soli Deo competit. Etenim lib. 6. cap. 25. sic habet: *Verbo sacrificari oportet Deo; siquidem Deus Verbum est, ut ipse confessus est.*

Sed nihil ita confert ad illustrandam Lactantii doctrinam, quam obiectio adversariorum, quam sibi proponit lib. 4. cap. 29. & responsum quod adhibet: ex Scripturis enim, & ex doctrinâ Ecclesiæ probat unum esse Deum Patrem, & Filium, eosque habere unam & eandem mentem, & substantiam: *Fortasse queras aliquis, inquit, quomodo, cum Deum nos unum colere dicamus, duos tamen esse asseveramus, Deum Patrem, & Deum Filium; quæ asseveratio plerisque in maximum impingit errorem.* Sic autem ad id respondet: *Cum dicimus Deum Patrem, & Deum Filium; non diversum dicimus, nec utrumque secernimus; quia nec Pater sine Filio potest, nec Filius à Patre secerni; siquidem nec Pater sine Filio nuncupari, nec Filius potest sine Patre generari. Cum igitur & Pater Filium sociat, & Filius Patrem; una utrique mens, unus spiritus, una substantia est: sed ille quasi exuberans fons est; hic tanquam defluens ex eo rivus.* Igitur una est utriusque substantia. Variis comparationibus illam identitatem, & utriusque substantiam esse indivisam exponit, quod nec rivus à fonte, nec manus à corpore sepatetur. Subiungit Itaque loca, in quibus probet Patrem, & Filium duas esse personas, & unum eundemque esse Deum; habere unam & eandem voluntatem, & mentem, & proinde substantiam. Denique, inquit, unum Deum esse tam Patrem, quam Filium Isaias ostendit, cum diceret: adorabunt te, & in te precabuntur, quoniam in te Deus est; & non est alius Deus præter te. Sed & alio loco similiter ait: Sic dicit Deus Rex Israël; & qui eruit cum Deus aternus: Ego primus, & ego novissimus, & præter me nemo Deus. Cum duas personas proposuisset; Dei Regis, id est Christi; & Dei Patris, qui cum post Passionem ab inferis excitavit . . . tamen ad utramque personam referens, intulit: & præter me non est Deus; cum posset dicere, præter nos: sed fas non erat plurali numero separationem tantæ necessitudinis fieri. Unus est enim solus liber, Deus summus, carens origine; quia ipse est origo rerum, & in eo simul & Filius, & omnia continentur. Quapropter cum mens, & voluntas alterius, in alterâ sit, vel potius una; in utroque meritò unus Deus uterque appellatur; quia quidquid est in Patre, ad Filium transluit, & quidquid in Filio, à Patre descendit. Non potest igitur ille summus ac singularis Deus, nisi per Filium coli: qui solum Patrem se colere putat, sicut Filium non colit, ita ne Patrem qui lem colit. Cap. etiam 30. asserit Religionem Christianam in hoc esse sitam, ut unus Deus colatur. Unus igitur à Christianis colitur Deus, quia Pater, & Filius una est mens, una voluntas, una substantia; qui quidquid est in Patre, ad Filium transluit.

Ex temporum consensione argumentum ultimum jam actum agimus,

cum doctrinam à temporibus Apostolicis unanimi seculorum trium consensione catholicâ firmandam suscepimus, tùm adversus hæreses, tùm adversus Judæos, & Ethnicos. Paucis ob oculos ponimus, qui fuerint ubique terrarum adversus hæreses contra Trinitatem Sanctissimam, Patris, Filii, & Spiritûs Sancti divinitatem, motus animorum catholicè sentientium; quæ sollicitudo, quæ scripta, quæ decreta fuerint lata. Hinc enim ex eâ continuatâ conjunctione, & studio palàm fiet, quàm horrenda sit Ariana, & Sociniana innovatio, & blasphemia. Satis sit observasse illos, qui trinitatem & personarum trium unitatem, seu eandem substantiam negarent, statim atque prodierunt, ab Ecclesiæ unitate fuisse repulso, eorumque fuisse proscriptam blasphemiam, ex Tertull. contra Praxeam, ex S. Epiph. contra Noërum, ex Novatiano contra Sabellium; Similiter hæreticos, qui Christo divinitatem competere negabant, exceptos fuisse, ut Ebionitas, Valentinianos, Theodotum Corianum, Paulum Samos. & tandem Arium. Id sic referunt S. Ignat. & S. Iren. qui in prologo lib. 4. ut etiam quædam superioribus adjungamus, damnat quòd Patrem, Filium, & Spiritum Sanctum non sensu catholico, sed blasphemio prorsus, nonnulli agnoscerent fabricatorem, scilicet Patrem, & ex defectu Filium emissum. Ebionitas verò cap. 59. damnat quòd purum hominem Christum facerent, sicque salutem omnem auferrent, Tertull. lib. de præscr. cap. 53. Theodotum hæreticum Bisantinum, qui Christum in persecutione negaverat, ut blasphemum præsertim arguit, quòd hominem tantummodo ex Virgine natum, & nullâ aliâ præ cæteris, nisi justitiæ autoritate præcellentem se negasse contenderet. Cap. 33. Antichristos ait à S. Joanne vocari, qui Jesum non putarent esse Filium Dei. Et lib. contra Praxeam, ut jam notatum est, avitam Ecclesiæ fidem tueretur, & ostendit in quæ absurda impelleretur, qui Patrem passum diceret. Hoc erat tùm Ethnicorum, tùm etiam Judæorum, tùm hæreticorum argumentum, videlicet non colere Ecclesiam unum Deum, cum divinitatem tribus deferret; hincque inferebant Gentiles: ergò non est cur multorum Deorum cultum viciò nobis vertatis. Colligebant Judæi: ergò impii estis Christiani, qui contra aperta Scripturæ loca plures Deos agnoscitis. Concludebant verò cum Judæis hæretici; sicque cum divinitatem Filio negare non possent, eum unam & eandem cum eo, qui diceretur Pater, personam esse contendebant; vel declinandæ blasphemix causâ, ut solebant dicere, ne plures Dii inducerentur, Christum nudum hominem statuebant. Porro autem si Ariana, aut Sociniana doctrina invaluisset, nonne tunc Ethnicorum objectionem sic antiqui repulissent? respondendo scilicet alienos penitus esse ab eorum doctrinâ Christianos, ut qui veram divinitatem, aut divinitatis partes Christo non tribuerent; sed Dei nomen ob quandam virtutum excellentiam illi deferri assererent: Judæorum pariter & hæreticorum objectiones confutassent faciliè. Cum verò aliam rationem penitus inierint, & constanter asseruerint ideò Christianos non colere plures Deos; quia Pater, Filius, & Spiritus Sanctus sunt unus Deus; & Christum, & Spiritum Sanctum esse reverà unum cum

Patre Deum nomine, naturâ, adoratione, simulque inter se distingui ratione personalitatum: sanè quî pudorem omnem non exuerit, non potest quin tam apertam antiquorum doctrinam recognoscat; etiamsi aliundè argumenta quamplurima non suppetere: cum nihil frequentius sit, & apertius hisce objectionibus: & ideò quod à primis temporibus invaluerat dogma, in propatulo est. Imò videant qui aliud censent, cujus sceleris insimulent Sanctos Patres, & universam illorum seculorum Ecclesiam: necesse enim est, ut asserant aliud eos sensisse, & aliud esse locutos; in errorem impulsisse tum Ethnicos, tum Judæos, & hæreticos dogmate proposito, quod non modò rationi, sed & Scripturæ adversari illis videbatur; aut saltem ab errore non revocasse tot Fidei Christianæ adversarios, propositâ scilicet perspicuâ Fidei explicatione.

Novum etiam robur isti historicæ expositioni accedet, si attenderimus quæ fuerit ineunte quarto seculo, & cum Arius prodiit, Ecclesiæ sententia. Omnium Ecclesiarum fermè Episcopos, si paucos excipias, Arius expertus est sibi adversantes Nicæ, qui sic ab hac novitate abhorrebant, ut ejus blasphemix in Concilio Nicæno non prius audita fuerint, quin statim aures suas obturaverint, ne tam execrando contaminarentur sermone: nam ex S. Athan. epist. de Synodo Nicænâ: *Episcopi contra qui convenerant, erant autem illi plus minus trecenti, placide & humaniter postulabant, ut suorum dictorum rationes redderent, seque non impios esse demonstrarent: illi autem vix incœperant hiscere, cum jam & improbarentur, & ipsi quoque inter sese depugnarent, agnitâque sua hæreseos perplexitate, muti prorsus reddebantur.* Et orat. 1. contra Arianos: *Nam & in Nicæno conventu omnes quotquot convenerant illic Episcopi, aures suas ad ista verba obturaverunt, omnesque communi suffragio istam hæresim damnaverunt, & anathemate detestari sunt, dicentes esse alienam diversamque ab Ecclesiasticâ Fide.* Item & orat. 2. contra Arianos: *Quod si fateantur talia nunc se primum audivisse; non inficias eant alienam, & non ex Patribus oriundam esse hanc hæresim; quod autem non à Patribus profectum est, sed nuper inventum; quid de eo aliud existimari debeat, quàm illud ipsum cujus Paulus mentionem facit: in novissimis temporibus deficient quidam à rectâ fide.* Undè autem universus ille tot Patrum consensus, qui ex tam varijs regionibus convenerant; quorum plerique martyrio, alii miraculorum donis, singuli fermè virtutibus eximius commendabantur? Undè, inquam, adversus Arii sententiam ità commoventur, vel novitatem illam tam blasphemam execrantur subitò? nisi quia à decessoribus aliter fuerant instituti. Hæc notasse satis sit, ulterius urgere opus non est.

Novum argumenti genus ex Arii morte ducebant antiqui, quòd animam efflasset eâ ratione, quâ suprà retulimus. Nec virtute suâ destituitur argumentum illud: si enim tam severè, tam apertè in hæresis principem Deus animadvertit, quo tempore delusus Imperator hæreticis favore videbatur, eique gratiam & pacem ab Ecclesiâ extorquere volebat; certè à veritate catholicâ, etiam attestante Deo, aliena erat Arii opinio.

Qui

Qui velatam à nobis Sanctorum Patrum doctrinæ seriem, non verba quædam hinc & inde decerpta perpenderit; non poterit, ut spes est, quin adversus antiquos Patres minùs religiosi animi incuset eos, qui ex illis Patribus aliquos, aut omnes ante Nicænâ Synodum in Arianorum partes traducere non dubitant: nam si attentiori, aut majori labore veterum opera; si diligentiori examine hæreticorum argumenta; fidei verò Catholicæ defensorum responsiones evolissent; si tandem SS. Athan. Hilarii, & aliorum Patrum quarti sæculi adversus Arianos cum illorum scriptis argumenta comparassent, easdemque rationes, quibus Sancti illi usi sunt, deprehendissent, ii certè à tam alieno de illorum Patrum doctrinâ sensu fuissent avocati; erga antiquos Patres pietate ducti, quæ ad mysterium pertinent, à mysterii expositione, seu mysterii substantiam à mysterii ratione scerevissent. Si quædam in antiquorum illorum operibus duriora & minùs consona viderentur occurrere; hæc benignâ interpretatione exponenda atque emollienda judicassent: mysterium enim, in se, revelatum est, non item, quale sit. In ipsis Conciliorum actis à definitionis ratione definitionem ipsam, qui adversus Concilia majori reverentiâ ducuntur, distinguunt quotquot sunt Theologi: cum igitur quæ ad mysterii fidem pertinent in illis operibus ubique clarè ac distinctè animis lectorum obversentur, in hoc est insistendum. Aliud officii incumbit; expendendum, scilicet quibus verbis & expositionibus usi tunc temporis ipsimet fuissent, si cum Catholicis sensissent, & adversus Ethnicos, Judæos, & hæreticos pugnassent, & priusquam ad tam accuratam dicendi normam adversus Arianam & Macedonianam hæreses Concilia nos adduxissent. His legibus adhibitis Patrum nomini nullam prorsus praviæ suspensionis notam inussissent. Mihi tam aperta antiquorum videtur sententia superiùs exposita, ut mirari subeat, quomodò in aliam sententiam vel descendere quis posset, modò sit æquus rerum aestimator. Ita etiam 4. sæculo constans erat à Patribus illis accepta doctrina, ut S. Athan. lib. de Decr. Nic. Syn. scripserit Arianos non potuisse ullum antiquorum pro suo errore adducere. Hæc præscriptione adversus eos utitur Orat. 2. contra ipsos mox laudatâ.

De Socinianorum mente irreligiosâ, non est quod moveamur: alio enim animo non ducuntur, ut observatum est, dum scripturas, aut antiquorum doctrinam laudant, quàm ut Christianorum personam eimentiti, faciliùs fidelibus illudant: nihil quod Christi discipulos sapiat, sentiunt, aut præ se ferunt; pro meritis Philoſophis sunt habendi, & pro infestissimis nominis Christiani hostibus.

Objectionum ex Scripturis solutio.

Opponunt 1. adversus loca, quibus Christum nomine & naturâ Deum, seu Verbum, seu Filium esse unum Deum cum Patre probavimus; Dei nomen multis tribui, qui divinitatem non obtinent. Nam Exod. 7. v. 1. Moyses dicitur Deus Pharaonis. Item Angeli & Judices dicuntur Dii Ps. 81. v. 6. Angelus etiam Gen. 31. v. 13. se Deum Bethel vocat, & Exod.

3. v. 6. se dicit Deum Abrahami, Isaaci, Deum Jehova. Verbo dicam, pluribus aliis in locis Dei nomen variâ ratione usurpatur.

R. jam ex superioribus constare, quâ ratione communicatum quandoque fuerit Dei nomen; & nulli unquam tributum fuisse sicut Verbo, seu Christo. Moyſi quidem datum fuit; sed non simpliciter, at respectu tantum Pharaonis, ut significaretur autoritas à Deo Moyſi tradita in Pharaonem. Fateor pariter plurali numero Deos dici Angelos & Judices, etiam ex ipſo Christo, Joan. 10. v. 34. sed neminem est videre in Scripturis, cui nomen Dei simpliciter tribuatur: nec etiam ob munus propheticum, Christum dictum esse Deum nomine, Sociniani volunt. Superest ergo dictum fuisse Deum ob essentialiam; cum simpliciter dicatur: *Verbum erat Deus*. Angelus de quo in Genesi, si Filius Dei fuit, ut ex antiquis plures convenerunt; sensu genuino se Deum Jehova dicit: si verò Angelus fuit, quod ad verum maximè accedit; figuratè hoc nomen sibi arrogat; ut qui Dei nomine agat. Ambiguitas autem omnis tollitur, Act. 7. v. 53. Gal. 3. v. 19. & Heb. 2. v. 2. 3. 4. 5. &c. ubi præsertim Dei Filium inter, & Angelos discrimen summum profertur. Non verò ea est de Messia, cui nomen Jehova tribuitur, prophetica differendi ratio, ut cum Jerem. 23. v. 6. in casu recto vocatur Jehova, seu Dominus; Christus scilicet, verus & æternus Deus. Sicut & Isa. 42. v. 8. ubi de se ait: *Ego Dominus, hoc est nomen meum*. Illud autem nomen refertur ad subiectum, de quo Propheta loquitur, nempe germen Davidis justum futurum esse Regem, à quo in terris exercenda sit justitia, imò & qui sit justitia nostra; seu Messias, qui Davidis germen est, & dicitur Zach. 9. v. 9: Rex justus: & 1. Cor. 1. v. 30. justitia, sanctificatio, redemptio. Nullibi porro magistratus in novo Testamento dicuntur Dii. Undè Apostolus 1. Corinth. 8. v. 5. multos quidem vocari Deos ac Dominos dicit; sed illis divinitatem detrahit, & à Christianis unum tantummodò credi Dominum, unumque coli Deum proficitur.

O p p. 2. Non ideo Christum probari Deum esse ab æterno, quia est Dei Filius: Sancti enim & Fideles non sunt ab æterno; & tamen dicuntur Filii Dei, Joan. 1. v. 12. & 13. necnon 1. Joan. 3. v. 9. & 10. Ad hæc addunt Christum dici unigenitum, quòd inter omnes Dei filios sit clarissimus & præcipuus: quâ ratione Isaacus, & Salomon vocati sunt unigeniti, licet alios fratres habuerint.

R. si filiatio Christi alterius naturæ non esset à justorum filiatione, quæ adoptiva est; singulari revelatione ad illam exprimendam opus non fuisset S. Petro, qui Math. 16. v. 16. hanc emittit confessionem: *Tu es Christus Filius Dei vivi*. Nec ideo beatus dicendus fuisset, quòd à Patre hanc fidem accepisset; nec tanta merces ei concedenda fuisset, ut caput Apostolorum fieret, simulque ligandi & solvendi potestatem obtineret. *Respondens autem Jesus dixit ei: Beatus es Simon Barjona; quia caro & sanguis non revelavit tibi, sed Pater meus, qui in cælis est* Nec silentium fuisset Apostolis de tanto mysterio præcipiendum. Deindè si

Sola filiatio illa esset adoptiva, an Christus ipse Lucæ 10. v. 21. dixisset: *Nemo scit quis sit Filius, nisi Pater?* An & ipse Pater dixisset, Math. 3. v. 17 & c. 17. v. 5. *Hic est Filius meus dilectus, in quo mihi bene complacui?* An etiam Apostolus Rom. 8. v. 32. ipsum Christum dixisset proprium Filium Dei, seu à Patre æterno, & ex ejus substantiâ generatum? Alii enim non sunt proprii filii; & qui ex Patris substantiâ prodeunt, licet adoptentur, non proprii sunt filii. Sic ergo Christus dicitur Filius Dei proprius, prout opponitur adoptivo. Quam adoptivam filiationis rationem à se Christus ut amoveret, Joan. 5. v. 17. Deum Patrem, proprium suum Patrem vocat. Hinc graviter offensi Judæi lapides in eum coniecerunt; quia, ut habetur v. 18. *Patrem suum dicebas Deum, æqualem se faciens Deo*: quod certè non moleste tulissent, si adoptivam tantum Filii rationem sibi vindicasset.

Ad id quod adjectum est, dico Christum non dici unigenitum, quòd cæteris filiis dignitate præcellat; sed quòd ex Patris substantiâ sit solus. Isaacus autem dictus est unigenitus, ex Sarâ scilicet; & idè solus hæres. Prov. 4. v. 3. Salomon non dicitur unigenitus juxta textum hebræicum; sed unicus. At etsi vulgatam editionem retineamus; nihil tamen indè potest colligi, quod tantillum faveat adversariis: nam Salomon ibi dicitur unigenitus: vel quia erat instar unigeniti unicè dilecti à matre; vel quia Davidis filius erat ex Bersabee unicus.

INST. 1. Ex Filii nomine nihil in gratiam Verbi divinitatis inferri potest; cum filiationis ratio nonnisi verbo homini, seu ratione humanitatis competat. Et sinè in veteri Testamento Filii nomen Verbo non ascribitur: namque creatum fuit duntaxat, ut ejus ministerio in rebus cæteris creandis Deus uteretur, qui in eas immediatè agere non poterat.

Respondet S. Athan. orat. 5. contra Arianos, in antiquo Testamento æternæ Verbi generationis mentionem fieri Psalm. 2. v. 7. Psalm. 109. v. 3. Prov. 8. v. 25. & in aliis locis laudatis. Et licet Filii nomen reticeret vetus Testamentum, numquid satis non est, si ejus mentio fiat in novo? At Manichæorum instar vetus Testamentum à novo divellere placet Socinianis.

Idem S. Athan. in lib. de decretis Nic. Synodi sic arguit: si à Deo, non genitum, sed creatum fuisset Verbum, ut eo mediatore creaturas conderet Deus, ne immediatè in res creandas ageret; alio adhuc mediatore opus fuisset, quo Verbum crearet; cum ex ipsis Arianis Verbum creatura esset. Præterea creatio immediata Verbum in præstantioris naturæ ordine non constituisset; cum à nobis Adamus naturâ non discrepet, licet à Deo immediatè fuerit conditus. Addit denique impietatem hanc in Paulo Samosatensi damnatam fuisse; nempe Verbum rationem filii ex humanitate mutuari; contendique Filii nomen proprio sensu esse usurpandum; & proindè ex substantiâ Patris esse, unumque cum Patre Deum.

Inst. 2. Genitus est: ergo cæpit esse Filius.

Rt. S. Basil. lib. 2. contra Eunomium, hoc sophisma olim ab Arianis

inventum, impudenterque vulgatum, inde ortum esse, quod ineffabilem Verbi generationem ad hominum, aut animalium generationes traducerent; duobus autem verbis totum hoc mysterium à S. Spiritu fuisse traditum: cum enim Evangelista in principio Verbum esse dixerit, rei, quæ anterior esse possit, excogitationem tollit: non enim principium esset, si ab aliquo priori superaretur. Cum etiam dixerit, *erat*, ab omni existimatione, quod non fuerit, animum avocat. Solvit eadem ratione idem sophisma S. Greg. Naz. orat. 25. ubi ait principio non carere Filium, cum Filius procedat; non tamen principio posteriorem esse; sed Deo Patri coæternum, illi, ut Soli lumen, coexistere; & absque principio esse quantum ad tempus, ut tempori non subjaceat.

IN ST. 3. Vel Pater Filium existentem genuit, vel non existentem: si existentem, quâ ratione generaret? si non existentem; igitur Filius est Patre posterior.

Respondet S. Greg. Nazianz. orat. 35. Scripturam temporum ordinem immutare, ut nos à quaestionibus de temporibus averiat: sic quod futurum est, ut præteritum; & quod præteritum est, ut futurum explicat. Hanc verò Eunomianorum objectionem, *Existentem, vel non existentem genuit Pater*, dicit non posse pertinere, nisi ad res, quæ ex esse, & non esse constant; seu ad nos homines, qui in patribus nostris partim existimus: de increatis porro, aut æternis, idem dici non posse.

IN ST. 4. Aut Verbum voluntariè genitum est, aut non: si primum; ergo Pater prius voluit gignere, quàm genuerit; si posterius; ergo vis illata est Patri.

Rt. S. Athan. orat. 4. contra Arianos, ex fidelibus plerosque hoc sophismate delusos fuisse, & hanc propositionem, *Ex voluntate & arbitrio genitum esse Filium à Patre*, catholicè posse usurpari à Catholicis: hæreticam verò in hæreticis esse, si per eam intelligant fuisse tempus, cum non esset Filius; & cum à liberâ voluntate Patris pendere, ut cæteras res creatas. Addit S. Athan. Filium non rerum creatarum instar creatum fuisse; nec ullum de illius creatione consilium iniisse Patrem: alioquin in quo Pater consilium de isto creando suscepisset? Ergo eâ voluntate, quâ bonus est Pater, eadem genuit Filium: cum igitur nec ex consilio bonus sit, nec invitus; ita nec consilio Filium genuit, nec invitus. Sicut ergo Pater totum quod est, cum voluntate est; ita Filius: summum enim est discrimen inter hæc, *Ex voluntate*, aut *cum voluntate factum*: nec Filii ex voluntate oriuntur, sed ex naturâ.

S. Hilarius lib. de Synodis damnat hanc propositionem, nempe contra Patris voluntatem natum esse Filium: non enim nolens Pater, seu coactus, vel naturali necessitate ductus, & cum nollet, genuit Filium; sed volens, sine tempore, & impassibiliter, & ex se.

S. Gregor. Naz. orat. 35. quaerit ab hæreticis: aut Deus est Deus, quia vult; aut quia non vult: aut Filius creatus est, quia Deus voluit; aut quia Deus noluit: quidquid autem responderint, sibi etiam responsum habeant. Si dicant, quomodo ergo genitus? *Haud magna*, inquit, *esset*

hac generatio ; si à te percipi posset : nobis etiam ignotum est , quo pacto in lucem prodeamus ; quomodo ergo ad Dei conceptum alluigemus . Silentio ergo generatio Verbi colenda est . Abunde magnum tibi est scire cum genitum esse . Quo autem modo genitus sit , ne ipsis quidem Angelis , nedum tibi intelligere conceperim . Addit S. Ambrosius lib. 4. de Fide cap. 4. nihil in sempiternâ generatione , nec velle , nec nolle , præcedere : nec generationem esse in voluntatis possibilitate . Sic quoque S. Epiphani. hæres. 69. & S. Aug. lib. 15. de Trinit. cap. 20.

I N S T. Actio quâ Filius gignitur , v. c. intellectio , aut Filii est , aut non : si primum , seipsum genuit Filius : si posterius ; ergo quædam operatio in Patre est , quæ non occurrit in Filio.

R. generationem Verbi nobis incognitam esse ; & proindè nullius adversus dogma catholicum momenti esse objectionem hanc . Nihilominus Theologi respondere solent , unicam quidem esse mentem trium personarum ; quia unica substantia est , proindèque una mentis perceptio : sed quæ in Patre Filium parit , Pater est ; & in Filio , Filius est : non enim Filius merus actionis terminus ; sed substantia est per se subsistens : Verbum tamen cognitione suâ aliud Verbum non producit ; quia nempe jam productum est quod produci potest : & idem est dicendum de actu amoris . Sed ut benè observat S. Hilarius lib. 7. de Trinit. non ex humano , aut seculi sensu de Dei rebus loquendum . *Hoc ipsum quod legimus , inquit , piè , accuratèque teneamus ; in simplicitate quippè fidei est ; nec per difficiles nos Deus ad beatam vitam quæstiones vocat ; nec multiplici eloquendi facundia genere sollicitat . In absoluto nobis ac facili est aser-*

I N S T. Aut Filius semper generatur , aut ab eo generando destitit Pater : si primum ; igitur terminum nunquam aut perfectionem integram consequetur : si posterius ; gignere cœpit Pater : quidquid enim finem habet , habet quoque initium .

R. S. Aug. epist. 174. Patrem continuò generare , & Filium continuò generari ; nec indè minùs perfectam esse generationem ; sicut nec splendorem ex Sole prodeuntem continuò esse minoris perfectionis ; in Deo autem idem esse generari , & esse genitum .

O B J. 3. Christum creaturis esse annumerandum , quia dicitur Colos. 1. v. 15. *Primogenitus omnis creatura :* primogenitus enim , & qui subsequuntur filii , ejusdem sunt naturæ : & proindè idè primogenitus omnis creaturæ dicitur ; quia cæteris novæ creationis rebus præstat .

R. Christum primogenitum esse omnis creaturæ ; quia quâ Verbum est , res omnes creatas præcedit , & eas creavit : non autem rerum creatarum primogenitus dicitur , quòd ejusdem sit cum illis naturæ . Ità primogeniti sensum exponit Apost. v. 18. *Ut sit , inquit , in omnibus ipse primatum tenens .* Et v. 16. *Primogenitus omnis creaturæ : quoniam in ipso condita sunt universa in cælis & in terrâ &c.* Et v. 17. *Et ipse est ante omnes , & omnia in ipso constant ;* quoniam omnia condidit , quia ante omnia fuit , quia omnia condidit . Et certè de novâ creatione hîc agi ab-

surdè diceretur: ut enim Christus nunquam fuit vetus homo; ità nunquam fieri novus per regenerationem potuit: nam antequam Christus nasceretur, novæ creaturæ jam fuerant, nempe justi. Primogenitus etiam dicitur; quia omnia creavit, tùm visibilia, tùm invisibilia: at omnium visibilium, scilicet rerum corporearum; & invisibilium, nempe Dæmonum, mediator non est Christus; nec illa per Christum ad novæ creaturæ rationem accedunt. Præterea si de novâ hominis reparatione ageret Apostolus, cur non dixisset novam creationem? cur ità primam creationem significasset, *quoniam per eum facta sunt universa, quæ in cælis visibilia & invisibilia, sive Throni, sive Dominationes &c.*? An potuit Apostolus quæ ad creationem pertinent, omnia manifestiùs exprimere? Creaturæ creatio absolutè posita, Marci 10. v. 6. Rom. 1. v. 20. Heb. 4. v. 13. 2. Petri, 3. v. 4. & alibi, primam creationem designat. Ubi verò de reparatione agitur, ut 2. Cor. 1. v. 17. Galat. 6. v. 15. creationi aut creaturæ vox, *nova*, additur. Præterea vox, *omnis*, complectitur quidquid creatum est: quamobrem impietatis est Scripturæ verba, vel sensum ità immutare; debemus enim religiosè servare & verba, & Scripturæ sensum. Deniquè Filius *primogenitus omnis creature*, quâ homo est, dici etiam potest; quia in primogenito spectari possunt natura, origo, antiquitas, & dignitas: naturâ & origine fratribus similis est primogenitus; sed antiquitate & dignitate præcellit. Porro autem hîc ad naturam & originem Christi non attendit Apostolus; sed ad antiquitatem & dignitatem, dicendo scilicet Christum hominem longè præstare cæteris hominibus, ut qui omnia creaverit. Addit Apostolus Coloss. 1. v. 15. *cum esse imaginem Dei invisibilis*, quâ scilicet Filius Dei est; quia tam perfectâ similitudine Patris naturam assequitur, quâ Deus est, ut qui videat Filium, videat & Patrem: idem est enim cum Patre Deus.

IN S T. 1. Christum esse tantùm Angelum; quia Heb. 1. v. 4. *Tantò melior Angelis effectus, quantò differentius præ illis nomen hereditavit.* Nec enim fit comparatio, nisi inter ea, quæ sunt ejusdem generis.

R. nihil aliud velle Apostolum, nisi Christum ratione humanitatis minoratum esse ab Angelis, ratione verò divinitatis, quâ creator fuit, longè præstantiorem esse. Et verò Apostolus præstantiam Christi expositurus, quæ Christo & Angelis tribuuntur, inter se confert: orditur inprimis à nomine Filii, & ait v. 5. nulli Angelorum hoc tributum fuisse; solum Christum ab æterno genitum fuisse; & ità propriè Filium esse & Deum. Deindè v. 6. vult ut ab omnibus Angelis adoretur: *Et adorent eum omnes Angeli Dei.* Describit insuper & Christi, & Angelorum opera: Angelis quippè Deus utitur, inquit v. 7. tùm ad ventos, tùm ad flammæ, & alia excitanda: Filius verò non ut servus est, sed ut Dominus & Deus. Nam v. 8. *Thronus tuus, Deus, in seculum seculi.* Item Deus creator est v. 12. & v. 13. ad dexteram Patris dicitur. Denique v. 14. Angelis etiam ad custodiam hominum & ad alia opera utitur. Sic ergo probat Apostolus tantò meliorem Angelis effectum esse Christum, qui humanâ indutus carne, illis inferior videbatur: in toto autem contextu de Filio

agit; & semper Filium compellat; & proinde ut verum, & unum cum Patre Deum adorandum proposuit: nec enim quidquam concluderet Apostolus, nisi sic Christum Angelis præcellere demonstraret. Idem Apost. cap. 2. divinæ naturæ præstantiam maximè tradit, cum tantas imminere pœnas ejus leges violantibus asserit, & longè graviores iis, quæ aliorum Dei legum leges violantibus fuerant inflictæ. Undè si Christus naturâ non esset alius à Moyse; non esset, cur gravius animadverteretur in eos, qui Christi mandata infringere, quàm in eos qui Moylis violarent præcepta.

Frustrâ cavillantur adversarii circa hunc locum in objectione citatum, quasi verò nonnisi inter ea, quæ sunt ejusdem generis, fieri possit comparatio; ac proinde Christus sit ejusdem naturæ cum Angelis, quòd cum ipsis comparetur. Inter res enim etiam diversæ naturæ, in Scripturis comparationes frequentes occurrunt, ut Psalm. 88. v. 11. *Melior est dies una in atriis tuis super millia.* Item Prov. 8. v. 11. *Melior est sapientia cunctis pretiosissimis.* Non igitur mirum est, quòd Apostolus Angelis Verbum comparet, naturæ discrimen simul indicans, cum Verbum dicat Filium, & Dominum, & Deum ab Angelis ipsis adorandum: Angelos verò creaturas, & servos, & adoratores.

INST. 2. Christus non est verus Deus, seu Deus summus; primò enim in eum credendum non est, ut ait ipse Joan. 12. v. 44. *Qui credit in me, non credit in me; sed in eum qui misit me.* Ergò Christus non sibi, sed Deo fidem haberi postulat. Deindè omnem potestatem sibi à Patre datam confitetur, Math. 28. v. 18. & ab eo se fuisse exaltatum, Philipp. 2. v. 9. Omnia deniquè non sibi, sed Patri suo vindicat, cum testetur Joan. 5. v. 19. se nihil à se facere posse. *Filius*, inquit, *non potest à se facere quidquam, nisi quod viderit Patrem facientem.* Ergò non habet cum Patre eandem potentiam, essentiam, & voluntatem: præsertim cum asserat non venisse se, ut faceret voluntatem suam, sed ejus qui misit illum. Math. etiam 24. v. 36. diem judicii nescire se fatetur. Item ab Apostolo 1. Cor. 15. v. 28. dicitur subjiciendus Patri cum cæteris rebus creatis: *Cum autem subjecta fuerint illi omnia, tunc & ipse Filius subjectus erit ei, qui subjecit sibi omnia, ut sit Deus omnia in omnibus.* Igitur non est æqualis Patri, nec ejusdem cum eo potestatis, & naturæ. Hæc autem non solum arguunt Christum esse Patre multò inferiorem, sed etiam nihil aliud esse præter hominem purum; & si quid præ aliis hominibus habeat, hoc totum habere, quòd ex B. Virgine, mirabiliter operante Spiritu Sancto, prodierit, quòd nempè Dei Filius sit, & quâdam ratione Deus, sed inferiori longè à Patre.

R. Joan 12. sensum verborum Christi clarum esse: hic enim est, videlicet cum, qui credit in Christum, non credere in Christum solummodò, vel in solum hominem; sed etiam in eum à quo missus est, nimirum in Patrem. Sic Gen. 32. v. 28. & cap. 35. v. 10. ubi sic habetur: *Non vocaberis ultra Jacob; sed Israël erit nomen tuum:* & tamen v. 20. 23. & 29. retinetur Jacobi nomen. Item Exodi 16. v. 8. *Non*

contra nos est murmur vestrum, sed contra Deum; id est non tantum contra nos, sed & contra Deum. Innumera sunt ejusmodi loca, cum in veteri, tum & in novo Testamento. Non igitur exclusivè loquitur Christus, quasi fidem in se habendam esse neget; sed asserit non in se solum credendum, sed & in Patrem, à quo missus erat: quod & exponit ipse Christus v. 45. his verbis: *Et qui videt me, videt eum qui misit me. Ego lux in mundum veni, ut omnis qui credit in me, in tenebris non maneat.* Christus igitur v. 44. fidem à se non removet; verum indicat non in se solum fidem esse habendam, sed & in Patrem. Caterum fidem in Christum haberi oportere ostendimus, tum ex his Joan. cap. 3. v. 18. *Qui credit in eum, non judicatur: qui autem non credit, jam judicatus est;* tum ex istis cap. 14. v. 1. *Creditis in Deum, & in me credite.*

Quod attinet ad hæc Christi verba Math. 28. v. 18. relata: *Data est mihi omnis potestas in cælo & in terrâ:* ea ad Mediatoris officium pertinent; ut is, sicut habet Apostolus Coloss. 2. v. 20. quæ in cælo & in terrâ sunt, conciliet: multa quippè ut homo accipit à Deo; omnia autem, ut Deus, habet, quæ Pater.

Ad hæc Philip. 2. v. 9. *Propter quod & Deus exaltavit illum:* Respondeo hunc locum esse intelligendum de carnis dispensatione; non verò de naturâ divinâ: nec de nomine Jesu; quia datum aliis fuit; sed de potestate illi, quâ homo est, concessâ.

Ad locum Joan. 5. v. 19. respondeo habere Christum omnia à Patre, non ex dono gratiæ; sed ex naturæ communione: nam Joan. 5. v. 26. *Sicut Pater habet vitam in semetipso; sic dedit & Filio habere vitam in seipso.* Et certè quemadmodum Pater, qui homo est, per generationem humanam Filio naturam communicat; ita & Deus divinam: videt, inquit S. August. ab eo se habere potentiam, à quo se videt habere existendi naturam: Et quod ait se non posse, non deficientis est; sed in eo quod de Patre natus est, permanentis. Et ut habet tract. 20. in Joan. *Ne fieret inde intellectui occasio errandi, subjunxit: Quacumque enim Pater facit, hac eadem & Filius facit similiter; non alia & similia, sed eadem.* Pariter respondent Sanctus Basil. & S. Ambr.

Humanæ quoque naturæ tribuendum est, quod Math. 24. dicat nescire se diem Judicii; sicut & quod sitim, & famem patiatur; non verò divinæ: quæ respondendi ratio ante Conc. Nicæn. fuit SS. Just. Iren. Orig. Novat. & post Conc. Nic. S. Athan. orat. 4. contra Arianos, S. Basil. epist. 391. ad Amphiloc. S. Greg. Naz. orat. 36. Hinc S. Ambros. docet juxta hanc responsionem, illam futuri Judicii cognitionem non esse optandam, nec excellentiorem eâ, quam ipse, ut homo, non habebat: quid autem contrà reponant Ariani, non habent. Docent insuper illi Patres, Christum, quâ Verbum, omnia novissè: Ità S. Athan. lib. de Decret. Nicæn. Synod. S. Hilar. lib. de Synod. S. Bas. lib. de Spir. Sanct. S. Cyril. assertionem 29. Thesauri; asseruntque Filium, quâ Verbum, & Patris virtutem, potentiam, & sapientiam, quæ Pater vellet, prætuisse;

& quæ resciret, intellexisse. Undè infert Conc. Sirmienſe ex S. Hilar. lib. de Synod. in Patre & Filio naturæ unitatem: alterius enim naturæ eſſe Filius non poteſt; cum ſit Patris virtus, potentia, & ſapientia. Ex hoc etiam infert Judicii diem non poiuiſſe ignorare Chriſtum quæ Deus eſt, ut- pote qui ſit omnium rerum creator; & in quo Col. 2. v. 3. *sunt omnes theſauri ſapientia & ſcientia abſconditi.*

Aliam amplectuntur alii reſponſionem, cum aliis Scripturæ locis inſtitutâ comparatione: Gen. enim 18. v. 21. inquiunt, de Sodomitis dicitur: *Descendam, & videbo*: at Deum proculdubiò crimina Sodomitarum non latebant: ultionis igitur tempus verbo, *videbo*, deſignatur. Item Gen. 22. v. 12. de Abrahamo habetur: *Nunc cognovi quòd times Deum.* Porro autem ignota Deo non erat Abrahamæ fides tories laudata. Quid ergò vult intelligi? apertam & conſpicuam ſe fidem Abrahamæ facturum. Matth. etiam 7. v. 23. ſic alloquitur peccatores: *Non novi vos*: an tamen Judex ſupremus peccatores eâ ratione repulſos punit, quos non novit? De juſtitiâ quippè Dei nemo irâ ſentit, niſi fuerit impius. Quid igitur verbis illis notatur? Scelerum reos ſcilicet eſſe indignos, qui veniant in Dei notitiâ. Sic forſan, inquiunt, Chriſtus ſe diem Judicii fatetur neſcire, ne ſuam illius dici cognitionem patefaceret, ut indè vigilantiori animo ſaluti quiſque incumbere. Undè ſic ſe neſcire proſtebatur, ne alteri reſcirent; ſe verò non ignorare, cum illum ſciret Pater æternus. Quamobrem hanc diei Judicii cognitionem Chriſto competere Apoſtoli conſtabat: ideòque Act. 1. v. 6. diem illum ſe ab illo edoceri poſtulant, eiſque reſpondet v. 7. *Non eſt veſtrum ſcire tempora, vel momenta, quæ Pater poſuit in ſua potestate.* Noverant ergò Apoſtoli æconomia quâdam noluiſſe Chriſtum ipſis Judicii diem apertum facere.

S. Amb. lib. 5. de Fide cap. 7. ex veteribus S. Matth. codicibus, in quibus hæc verba, *neque Filius*, non occurrunt, colligit ab Arianis illa fuiſſe inſerta: ſed cum in omnibus, tum Latinis, tum Græcis S. Marci exemplaribus extant, non eſt quòd in eis hæreamus; ſicut nec in ſolvendis quæ petuntur ex interrogationibus, Marc. 6. v. 38. & Joan. 6. v. 5. *Quor panes habetis?* nam Chriſtus hoc dicebat, ut tentaret Philip-pum; ipſe enim ſciebat quid facturus eſſet.

Ad verba ex 1. Cor. 15. v. 28. deſumpta, dico ea de humanâ Chriſti naturâ eſſe intelligenda: nam, ut obſervat Novatianus, ſi duplicem in Chriſto naturam hæretici diſtinxerint, in tot errores non impegnerint. Ità etiam lib. de nat. hum. de fidelibus omnibus Chriſti membris eundem locum exponit S. Athan. adeò ut, cum membrorum inſtar Chriſti capitis fuerimus imperio ſubditi, tunc & ipſe Chriſtus in ratione capitis pro membris ſubjicietur: quæ ſubjectio naturæ divinæ Verbi nullatenus officit.

S. Hilar. lib. 11. de Trinit. ſic ratiocinatur, & ait, aut verbis illis Chriſtum deſtruendum fore ſignificari; aut regno deſtituendum, cum illud Patri tradet; aut divinâ exuendum eſſe naturâ, ut poſſit Deo ſubjici: ſed, inquit, non ea eſt Apoſtoli mens, nec doctrinæ ordo. 1. enim

statuit deferendum Christo regnum v. 26. & 27. *Omnia enim subjecit sub pedibus ejus: cum autem dicat, omnia subiecta sunt ei; sine dubio prater eum, qui subjecit ei omnia.* 1. istud eo consilio factum esse dicit, ut *Deus sit omnia in omnibus.* Si ergo cum regnum Filio Pater tradidit, illud obtinere non destitit; nec eo etiam exuatur Filius, cum illud cesserit Patri. 3. indicat servitutis nomine non hinc infirmam & inhonestam subjectionem intelligi, quasi rebellis aliàs Filius eâ ratione sit puniendus; quis enim tam blasphemè loqueretur de Filio Dei homine, qui non venerat, ut voluntatem suam faceret, nec fecit: *Veruntamen*, inquit, *non quod ego volo, sed quod vis tu.* Et licet calicis fœx amara videretur penitus; illam tamen Patri morem gerens, lubenti animo sorbuit. Tam insignia igitur obedientiæ argumenta adeo horrendam ab eo suspicionem amoveant. Quid ergo designare voluit Apostolus? Incarnationis scilicet mysterio rem omnem Deo subjici jam cœpisse: absolutam autem futuram esse subjectionem, cum, inimicis virtutibus Christi ministerio destructis, omnia Patri subjicientur; ubi nimirum ad perfectam ejus similitudinem fideles accesserint, & unum quid cum Christo absolutissimum constituerint: *Nam Deus eris omnia in omnibus*: nec ulla tunc in Christi corpore infirmitatis humanæ supererunt vestigia; nosque ut sui partes corporis suâ cumulabit gloriâ.

INSTR. 2. Christus Patrem se majorem fatetur esse. Joan. 14. vers. 28. *Pater major me est.*

R. Patrem esse majorem Christo, quâ homo est; & etiam aliquo sensu, quâ Deus est; non quod non sit idem cum Patre Deus; sed quod à Patre communicatam habeat divinitatem. Priorem responsionem adhibent SS. Athan. Hilar. lib. 9. Conc. Paris. & Aquileense, & alii Catholicæ Fidei defensores adversus Arianos. Posteriori utitur responsione Tertull. lib. contra Prax. cap. 3. *Pater*, inquit, *Filio major dici potest, quia Trinitatis origo est; proinde illius esse principaliter à quo communicatur in Filium: & dum illius est, proinde monarchiam esse quâ à duobus tam unicus continetur.* Et cap. 9. *Pater enim tota substantia est; Filius verò derivatio totius est portio, sicut ipse proficitur; quia Pater major me est, à quo & minoratus canitur in Psalmo, modicum quid citra Angelos. Sic & Pater alius à Filio, dum Filio major: dum alius qui generat; alius qui generatur: dum alius qui mittit; alius qui mittitur: dum alius qui facit; alius per quem fit.* Ità etiam Novat. lib. de Trin. cap. 31. his verbis: *Quia Pater Filio aliquo modo prior, quia & Pater; illum etiam quâdam ratione precedit, quod necesse est quodammodo prior sit, quâ Pater sit: quoniam aliquo pacto antecedat necesse est eum qui habet originem, ille qui originem nescit: simul ut hic minor sit, dum in illo esse se scit habens originem &c.* Sic quoque Alexander Alex. in epist. contra Arium ad Alexandrum Constantinop. apud Theodor. lib. 1. Hist. cap. 3. Sic pariter Sardic. Conc. in Epist. Synodicâ apud eundem Theod. lib. 2. cap. 6. Ità tandem S. Athan. orat. 1. contra Arianos, S. Basil. lib. 1. 3. & 4. contra Eunomium, S. Gregor. Naz. orat.

35. & orat. 36. & Sanct. Augustinus lib. de Fide, & Symb. cap. 9.

INSTR. 3. Sequitur indeclinabiliter Filium, quā Filium, minorem esse Patre; eā enim ratione Filius non habet id quod Pater habet.

Rt. S. Ambr. lib. 4. de fide ad Gratian. cap. 4. habere Filium naturam Patris, seu divinitatem; sed non Patris proprietatem, seu paternitatem; & Filium non esse minorem Patre, cum ejusdem naturæ sit, & habere se profiteatur quæ Patris sunt. Addit ejusdem esse naturæ fontem, & fluvium; lucem, & splendorem; ex fluvio licet non scaturiat fons, nec ex splendore lux oriatur. Ex S. Hilar. lib. 9. de Trinit. Pater, quā Pater, Filio major est; sed Filius, quā Filius, Patre non minor est; cum Filii natura cum Patre minorem esse non patiatur; quia eadem est divinitas. S. Greg. Naz. addit orat. 34. quæ est 2. de Theologiâ, hæreticorum ratiocinationem ex eo deficere, quod absolutum inferant ex dicto secundum quid: quod enim Pater, quā principium est, major dicitur, colligunt; ergo major est secundum naturam: at hæc consequentia falsa est; nam si Pater, quā Pater, perfectioris esset naturæ, quia scilicet Patris rationem Filius non assequereur; eodem jure Filius esset Patre major, cum Pater Filii rationem nec ineat, nec inire possit.

At, inquebant, saltem prior censetur Filio Pater.

R. Prior erit origine; sed non prior dignitate, aut tempore; quia relata sunt simul: paternitas autem est nomen relationis; sed hæc responsio infra fusiùs exponetur.

OPP. 4. Profitetur Christus se non esse verum & summum Deum: nam Marc. 10. v. 18. *Quid me dicis bonum? Nemo bonus, nisi unus Deus.* Et Math. 19. v. 17. *Quid me interrogas de bono? Unus est bonus, Deus.* Patrem insuper suum Deum esse profitetur: Joan. enim 20. v. 17. *Ascendo, inquit, ad Patrem meum, & Patrem vestrum; Deum meum, & Deum vestrum.*

R. hæc dixisse Christum Marc. 10. & Math. 19. non eo consilio, ut malus existimaretur; sed ut hominis illius fidei defectum argueret; qui licet Christum pro homine mero haberet, bonum tamen vocare non desinebat. Ut autem Christus divinitatis suæ argumenta præberet, jussit statim illum adolescentem venditis bonis sibi adhærere.

Aliam responsionem afferunt S. Greg. Naz. orat. 36. S. Ambr. lib. 2. de fide cap. 1. & S. Aug. lib. 3. contra Maximin. cap. 23. videlicet non excludi Filium, nec Spiritum Sanctum. Sicut nec 1. Cor. 2. ubi dicitur: *Quæ Dei sunt nemo scit, nisi Spiritus Dei*: nec etiam Math. 11. ubi habetur: *Nemo novit Patrem, nisi Filius.*

Ad Joan. 20. Resp. Christum, ut hominem, homines allocutum ibi fuisse: *Vade, inquit, ad fratres meos, & dic illis, ascendo* &c. Pater autem est Deus & Dominus Filii ratione naturæ assumptæ. Addit S. August. tract. 121. in Joan. non dixisse Christum, Patrem nostrum, nec Deum nostrum; sed Patrem meum, & Patrem vestrum: Patrem meum naturâ, & Patrem vestrum gratiâ. Cætera hujusmodi loca ad humanam Christi naturam pertinent.

S. Gregor. Naz. aliter responderet orat. 36. & ait idèò Christum vocasse Patrem solum Deum verum, ut verum Deum idolis opponeret Nam & Baruch 3. Filius solus Deus vocatur: *Hic est Deus noster, & non existimabitur alius adversus eum.* Et paucis interjectis: *Post hac in terris visus est, & cum hominibus conversatus est.* Undè patet particulam, *solum*, non esse exclusivam Filii. Ità ceteri Patres.

INST. 1. Christus merus homo est tantum, ex 1. Timoth. 2. v. 5. *Unus & mediator Dei, & hominum, homo Christus Jesus.* Et 1. Cor. 15. v. 21. *Quoniam quidem per hominem mors, & per hominem resurrectionis mortuorum:* quod & constat ex Symbolo Apostolico.

R. hîc non tradi Christum esse merum hominem, sed esse verum hominem: nec potuisset esse, ut suprà fuit probatum, mediator, nisi Deus & homo esset, & quidem meriti infiniti. Vox autem, *homo*, denotat concretum, utramque videlicet naturam, & personam; nam juxta utramque mediator erat. In altero verò loco 1. Cor. 15. v. 21. pariter vox, *homo*, concretum designat, per quod facta est resurrectio; nam, ut Deus, nec mori potuit, nec resurgere. Symbolum verò Apostolicum Christum ut verum Deum & unum cum Patre proponit, ut scilicet objectum fidei & adorationis: *Credo in Deum Patrem: credo in Jesum Christum.*

INST. 2. Christum esse putum hominem, quia conceptus est de Spiritu Sancto, & ab ipsâ conceptione Filius Dei est dictus.

R. nullibi propter mirabilem conceptionem Christum Dei Filium dici: sanè quidem Rom. 1. v. 3. & 4. sic loquitur Paulus: *De Filio suo, qui factus est ei ex semine David secundum carnem, qui predestinatus est Filius Dei in virtute secundum spiritum sanctificationis ex resurrectione mortuorum Jesu Christi Domini nostri:* sed quid autem indè colligitur? Christum videlicet esse Filium Dei, non ratione carnis assumptæ; hoc enim sensu est Filius Davidis: sed ratione spiritûs sanctificationis, virtutibus etiam, & miraculis, & præsertim resurrectione mirabili Christum fuisse Dei Filium demonstratum. Sic patet sub unâ ratione Christum esse Filium Dei, quatenus ex Deo est, nempè & secundum spiritum: sub alterâ autem Filium David, videlicet secundum carnem. Porrò cum Christus Joan. 10. v. 25. se Deum esse doceat, eo ipso Filium Dei se probat; adeò ut vel Deum esse, vel Filium Dei, sensu eodem usurpari sit manifestum.

INST. 3. Luc. 1. v. 35. *Idèòque & quod nascetur ex te sanctum, vocabitur Filius Dei.* Ibi particula, *idèò*, denotat, rationem ob quam Christus vocabitur Filius Dei, hanc esse, nimirum quòd conceptus sit de Spiritu Sancto. Ergò Christus dicitur Filius Dei ab ipsâ ejus conceptione, tanquam à causâ.

R. particulam, *idèò*, ibi non esse causalem, quasi Christi conceptio sit causa propter quam Christus vocandus sit Filius Dei; sed illativam tantum, ut significetur idèò miraculosam futuram esse conceptionem; quia qui concipiendus est, Deus est. Nec certè unquam Christus seipsum.

nec alii eum Dei Filium vocarunt, ob hanc rationem scilicet, quod ita conceptus fuerit. Sensus ergo istius loci talis est: hic Filius Dei vocandus est, quia sanctus est qui nasciturus est, divinâ videlicet, æternâ, & essentiali sanctitate. Hanc quidem sanctitatem Angelus non exprimit, sed Elizabetha satis indicat, dum eum vocat, Luc. 10. v. 43. *Dominum suum*: imò Angeli eum ut *Dominum*, Luc. 20. v. 11. & Magi adorant ut *Deum*: & Isaias cap. 9. v. 6. Deum eum nuncupat. Particula, &, additur, & quidem non otiosè; ad orationem enim simpliciter conjungendam sufficiebat particula, *ideò*: adjicitur ergo particula, &, ut sensus sit non solum Verbum æternum Filium Dei esse, sed & *quod ex se nasceretur sanctum*, vocatum iri Filium Dei: quia idem ille Filius Dei æternus ex Mariâ nasciturus erat. Ista verò temporalis Christi conceptio non est causa, cur Christus vocetur Filius Dei Patris; nam & dici potius debuisset Filius Spiritûs Sancti, quàm Filius Dei Patris: hæc enim conceptio in eo posita erat, ut humanæ naturæ jungeretur divina persona: id autem competebat Spiritui Sancto ex Scripturâ & Symbolo; & sic ratione conceptionis Christus qui nascebatur, dicendus fuisset Spiritûs Sancti Filius, non Dei Patris.

Objectionum ex Sanctis Patribus solutio.

Præmonemus, ad quamlibet ex antiquis oppositam difficultatem, quæ pro Catholicâ Fide ex illis attulimus argumenta præ oculis esse habenda, ut ex eorum comparatione, quid de quaestione propositâ senserint, æquum feratur iudicium. Quo tempore floruerint illi antiqui jam scripsimus, & adversus quos disseruerint. Quoslibet, etiam ex infensissimis Ecclesiæ hostibus, rogavimus ut attendant an Patres eâ de Fidei capitibus disserendi ratione usi fuissent, si Catholicæ Fidei adversam sententiam, aut Socinianam fuissent secuti? An circa mysterium de uno in tribus personis Deo dubitare videantur? An eam fidem constanter adversus Ethnicos, Judæos, & Hæreticos profiteantur? & an quæ loca difficultatem in eorum operibus pariunt, ad mysteriî substantiam, aut explanationem pertineant? Hæc superiùs exposita iterùm si repeteremus, Lectoribus essemus oneri & tædio.

O P P. 1. S. Clementem Rom. lib. 2. Const. cap. 34. lib. 3. cap. 17. lib. 6. cap. 11, & 27. docuisse Patrem esse instar Episcopi, Filium instar Diaconi, Spiritum Sanctum instar Diaconissæ; & hunc Filio subjici à quo creatus sit.

R. nihil ejusmodi extare in operibus S. Clementis indubitatis, nempe in epist. ad Corinth. quæ sola ex operibus Sancti istius superest, in quâ mysterium Trinitatis tradit: cætera enim quæ nomine Clementis citari possunt opera, supposita sunt; quanquam in illis etiam occurrant, quæ Fidei Catholicæ admodum sunt consona. Lib. quippè 3. Const. cap. 17 ubi locutus author de Patre, ut causâ, seu principio Filii, & emissionem Spiritûs Sancti, subjungit: *Pater qui est super omnia Deus; Christus unigenitus, Deus, dilectus Filius, gloria Dominus; Spiritus Sanctus, Para-*

cleus, qui à Christo mittitur. Ex quo constat confectorem aut interpolatorem sibi non consentire.

Et certè quomodo tunc temporis Simon Magus se Deum esse dixisset, qui, ut Pater, Samariam descenderat; Judæis apparuerat, tanquam Filius, & ad reliquas gentes, quasi Spiritus Sanctus venerat; nisi tunc persuasum fuisset Patrem, Filium, & Spiritum Sanctum esse Deum unum? Nec post Simonem Menander, & qui hæretici Christum hominem fecerunt, ut Cerinthus, Ebion, Carpocrates, & alii, statim ab Ecclesiâ fuissent expulsi. Igitur Christum esse unum cum Patre, & Spiritu Sancto Deum, Catholicæ Ecclesiæ, & S. Clementis fides erat.

OPP. 2. S. Ignatium personas tres agnovisse, sed diversæ substantiæ; cum Christum Patri subiciat, & Episcopo Patrem, Presbyteris Filium, & Spiritum S. Diaconis, & conservis comparet; itemque solum Patrem doceat esse verum Deum, Filium Patre minorem, & illius adoratorem.

R. in epistolis non interpolatis, sed genuinis, de quibus docti conveniunt; seu in exemplari Mediceo, seu in epistolis ad Ephesios, Magnesianos, Trallianos, Romanos, Philadelphios, Smyrnaeos, nihil extare, quod fidem Trinitatis vel minimum lædat. Ait quidem S. Ignatius in ep. ad Magnes. Christum fuisse quidem Patri subiectum, sed secundum carnem: *Subiecti. inquit, estote Episcopo vestro, & vobis mutuo, ut Jesus Christus Patri secundum carnem.* Quo sensu Christum Patre minorem, & Patris adoratorem agnovit ipse S. Ignatius, qui ibidem docet, & Dei Filium esse, ex Patris essentiâ, & habere attributa, quæ soli unico Deo possunt competere. Idem in epist. ad Ephes. scribit Christum esse factum quâ hominem; non factum quâ Deum; esse vitam veram; nihil ipsum latere; & in nobis esse ut in templo. In ep. ad Magnes. ait eum ante secula apud Patrem extitisse; esse Verbum Patris æternum; non à silentio procedere; & Prophetas unicum Deum prædicasse Jesum Christum, *qui ante secula.* In epist. ad Trall. & Rom. Deum Christum vocat: & in actis ipsius martyrii, quærenti Trajano quis esset Theophoros? respondit eum esse qui Christum haberet in pectore.

Ceterum nullibi S. Ignatius Patrem Episcopo, Filium Presbytero; Spiritum S. Diaconis comparat; sed monet ut Presbyteri obsequantur Episcopo, sicut Christus Patri secundum carnem: ita in epist. ad Smyr. & ad Magnesianos. Hoc & addit in epist. ad Philadelph. *Unus est Episcopus simul cum omni Presbyterio, & Diaconis conservis meis:* quibus subiungit: *quia & unus est ingenitus Deus Pater; & unus unigenitus Filius, Deus, Verbum, & Homo; & unus Paracletus Spiritus veritatis.* Sic Ecclesiasticam Hierarchiam allusione ad S. Trinitatem factâ illustrat, in quâ personarum ordinem describit. Si quid aliud occurrat apud eundem S. Ignatium, non in genuinis ejus epistolis, sed in supposititiis aut interpolatis deprehenditur; & proinde nullius sanè momenti, nec in illis est immorandum. Consulantur probationes ex S. Ignatio, art. 1. & 2.

OPP. 3. S. Justinus qui obiit circa an. 164. docet Verbum alterius esse substantiæ à Patre : vult enim in dial. cum Triph. ad eum non pertinere attributa essentialia, invisibilitatem scilicet, & immensitatem : ait quippè Patrem idèò non apparuisse ; quia invisibilis, & immensus est : Filium verò se aspectabilem præbuisse ; quia visibilis est, & quia non est immensus.

R. S. Justinum ibi non agere de ratione, quâ Pater à Filio distinguitur ; seu non idèò Patrem à Filio distinguere, quia Pater invisibilis est, vel immensus ; nec rationem illam physicam adhibere ; sed cum Triphone supponere in Scripturis designari Deum alium invisibilem, alium visibilem, ut indè inferret Verbum divinum, seu Filium esse reverà Deum ; & in Scripturis Deum appellari : quod negabat Tripho, ne duos Deos agnosceret. Deum ergò probat in Scripturis dici, tùm qui dicitur in iisdem Scripturis invisibilis, tùm & qui vocatur aspectabilis, ratione scilicet speciei assumptæ, non ratione naturæ : nam Exod. 33. idem qui se conspicabilem facit, ratione propriæ substantiæ conspici se non posse asserit. Justinus ergò argumentabatur ex principio, de quo inter eos constabat ; non verò ex ratione physicâ ; quasi non posset Pater eâ ratione, quâ Filius, videri, specie nempè assumptâ, aut modis illis, qui in Scripturis continebantur : & hoc satis erat ad propositum. Probat autem præter illum invisibilem & immensum, qui in Scripturis Deus dicebatur ; alium quoque dici Deum, qui videndum se præbuerat, & Messias erat. Cum enim S. Justinus Christum verum esse Messiam, & Deum, sibi probandum sumptisset, & in eo impletas fuisse Prophetias ; inprimis sibi ostendendum esse asserit, Messiam esse verum Deum, non tantùm nomine, ut Solis radius Sol dicitur ; sed etiam naturâ, ut ex ipsius probationibus 1. & 2. art. allaxis plùs quàm satis est apertum.

INST. 1. S. Justinus docuit in dial. Filium, quâ Deum, Patris voluntati administrasse, præsertim in creatione mundi : ut indè cognoscatis, inquit, eum rerum universarum Patri administrum esse, prout jam assensu estis.

R. catholicè illa de Verbo æterno à Catholicis dici posse, ut dicta fuere à S. Athan. lib. de Decret. Nic. Synod. S. Basil. l. de Spir. S. cap. 16. videlicet eo sensu quòd non instar Angelorum ministraverit, sed ut potestatis focus, Verbum, Sapientia, & ejusdem cum Patre substantiæ & potentiz. Et indè Novatianus cap. 31. lib. sui, Filium esse ejusdem substantiæ cum Patre probat : indèque S. ipse Justinus pariter colligit non modò Patrem, vel universorum conditorem, esse Deum ; sed & Filium, qui ratione personæ est ab eo distinctus ; qui que in Scripturis Deus virtutum, & Dominus gloriæ appellatur.

INST. 2. S. Justinus asserit Filium de voluntate Patris esse.

R. etiam catholicè hæc dici à Catholicis, scilicet eo sensu, ut habet S. Athan. quòd Pater Filium invitum, aut ab extrinseco impulsus non genuerit ; sed eâ voluntate, quâ vult esse bonus, & Deus vult

esse Pater. S. Hilar. lib. de Synodis ait hæc dici posse, ut corporalis passionis excogitatio à Verbi generatione amandetur, & intelligatur ipsum ex essentia Dei esse. Ergò ex S. Justino Filius verè est Deus, & ex substantia Patris genitus; non verò factus, vel creatus.

INST. 3. S. Justinus credidit Verbum ita esse ex voluntate Patris, ut de eo faciendo deliberaverit; sicut & de ceteris rebus creatis: vult enim Verbum à Patre alium numero esse Deum.

R. S. Justinum per numerum intelligere personam, non aliam divinam naturam: addit enim Filium esse ex Patris substantia, & Patrem nihil substantiæ deperdidisse, cum illum genuit: sicut de substantia ignis nihil decedit, cum alium ignem producit. Et si Judæi, inquit, intellexissent Scripturas, non inficiati essent Deum esse Dei Filium: *Et ego rursùm, inquit, ad Scripturas rediens, persuadere vobis conabor, istum qui Abrahæ, & Jacobo, & Mosi apparuit, Deusque esse dictus, & scriptus est, alium ab eo esse, qui cuncta creavit Deo; numero dico, non animi conceptione. Similiter alibi: Alius est, & legitur Deus, & Dominus super & præter opificem universorum.*

INST. 4. In eodem dial. S. Justinus ait quoddam atheos, & impios blasphemare parentem universorum, docentes Christum esse Deum Abrahami, Isaaci, & Jacobi; cum quibus nihil esse fidelibus communionis asserit.

R. S. Justinum in toto opere adversus Triphonem ostendere aliam esse à Patre personam, quæ Deus verus sit, ut supra probatum est: unde meritò in eos invehitur, qui Christum esse Patrem impiè docebant; cum alius sit Pater, alius Filius; & Deus unus sit cum Patre Filius ille, qui & Abrahæ Deum se in veteri Testamento dicit: *Alii namque alio modo blasphemare, & maledictis incescere parentem universitatis, & qui ab eo venturus vaticiniis promulgatus est, Christum & Deum Abrahæ, & Isaaci docent &c.* Eos igitur perstringit, qui tùm Deum Patrem, tùm Christum Deum Abrahami blasphemarent: & sic non modò ea verba fideliter versa non nocent; quin etiam prosunt admodum, & catholicum sensum referunt.

Alia levioris momenti opponuntur, ut quòd in dial. dicat Christum factum esse Angelum, & ideo vocari Deum. Equidem factus est Angelus, seu Nuntius Patris, cum caro factus est; sed non eà unicà ratione dicitur Deus, at quòd sit Patris Filius æternus: *His nominibus, inquit, appellari habet; cum ex paterni consilii & voluntatis administratione, tum ex voluntaria Patris generatione:* attamen, ut jam inseruimus, sine diminutione substantiæ, quæ eadem est in utroque divina.

Aliud est quod opponunt Sociniani, scilicet S. Justinum non modò Filium à Patre alium fecisse, quod personæ discrimen innuit; sed à Patre aliud, quod naturæ diversitatem apertè significat, ex ipso Theologorum consensu, qui eà ratione personarum & naturarum diversitatem tradunt esse exponendam. Addunt etiam, licet S. Justinus in Apol. 2. dicat Filium germen esse à Patre editum, non verò aliud esse à generante; nihil inde

indè posse inferri, quòd S. Justinus alio genere uti non potuerit, quàm neutro, cum nomina *γεννημα* germen, & *γενόμενον* genitum, quæ neutrius sunt generis, usurparet. Verùm quàm inanis sit hæc objectio, nemo non videt. Num enim S. Justino alia erat sollicitudo, quàm ut unicuique esse Deum evinceret; & Patrem, & Filium esse Deum; Filiumque non esse opus Patris, sed germen ab æterno genitum? Et certè Pater, & Filius ab eo nullibi dicti sunt divisæ naturæ; nullibi saltem in operibus genuinis hoc scripsit, nempe, erat, cum non esset Filius. Alia expendere in animo non est, cum non in verbis, sed in sensu posita sit res catholica. An ità cavillari deceat de tempore, quo fidem tuto, & simplici animo antiqui exponebant? An accuratam loquendi rationem, quam Theologorum industria ob emergentes hæreses excogitare fuit coacta, in antiquis illis oportet inquirere? Et illas nisi deprehenderint, an licet statim inclamare Arianum dogma esse? Profectò Socinianis indulgeremus libenter, si Arianas propositiones apertas invenirent; sed cum ubiquè sparsum apud hæres illos dogma catholicum occurrat, cum illis res esset adversus Ethnicos, Judæos, & Hæreticos, contra quos nihilominus constanter asserunt unum esse Deum; atque Patrem, Filium, & Spiritum Sanctum esse ejusdem naturæ: undè petitur quæ sit illis Patribus injuria? Sed ut modò in S. Justino hæreamus, si quæ 1. & 2. art. exscripsimus de tribus personis uno Deo, & de Christo Dei Filio evolvantur, & quodnam fuerit S. Justinus propositum attendatur, nemo est, qui non confiteatur eum cum Catholicis sensisse, aut cum S. Justino sentire modò Catholicos, & sensisse SS. Patres Nicænos. Illius doctrinæ & operum series facilè, & uno intuitu ibi potest conspici.

I N S T. adhuc. S. Justin. in dial. scripsit Christum testificatum fuisse sine Deo Patre se salvari non posse; nempe per hæc Psalm. 21. verba: *Deus Deus meus* &c. Si autem Filius Dei, neque quia Filius Dei, neque quia mundus à peccato, prout Isai. dicit, absque Deo se salvari posse affirmat; quoniam modo vos, aut alii salutem citra spem ejusmodi expectatis?

R. ad humanam Christi naturam esse hæc referenda, ut vel ex ipsis S. Justinus verbis elucescit.

O P P. 4. Athenag. in Apol. Filium esse æternum non profiteatur, nisi quatenus est in efficientiâ, & ideâ Dei instar cæterarum creaturarum: *Verbum Patris*, inquit, *in ideâ & efficientiâ Dei existit.*

R. Verbum, seu Filium in ideâ Patris activè fuisse; quia Filius creator futurus erat: non verò passivè, seu ut creandus, & instar creaturæ, & quasi constituto tempore conditus fuerit. Subjungit enim Athenagoras: *Ab ipso, & per ipsum facta sunt omnia*: Et addit Filium, seu Verbum esse ab æterno; quia Pater ab æterno rationem habet; cum primogeniam esse Patris progeniem; hancque rationem Deum esse; & unum esse Deum cum Patre substantiâ & potentiâ *cum Pater, & Filius unum sint.*

I N S T. Frustrà responderetur Athenagoram agnovisse Verbum distinctum, quod rationem in Deo esse ab æterno agnoverit: nam rationem illam, internam scilicet, à Deo non distinxit; sed externam tantum, seu Ver-

bum externum, quod prodiit, & prolatum fuit, cum Deus orbem condidit, seu cum perpolianda fuit materia.

R. Athenagoram rationem illam internam, seu Verbum internum, prout Filius Dei est, à Patre divino distinxisse ratione personæ; non verò ratione divinitatis. Idem Verbum internum, cum mundum creavit, prodiit quidem exteriùs, *sed ut rerum cunctarum idea, & perfectio foret.* Sic Verbum, quà internum, ab æterno à Patre genitum fuit, & prodiit creator orbis. Docet igitur Athenagoras Verbum esse Patris progeniem, non quasi factum sit; cum Verbo illi interno divinitatem, adorationem, eandemque cum eâ, quæ Patri adscribitur, æternitatem, & alias divinitatis perfectiones tribuat; & subjungat unum Deum à Christianis credi, & Filium Dei ab omnibus Deum haberi; & idèò eundem honorem Patri, & Filio deferri; unumque esse Christianorum votum, ut Trinitatis mysterium intelligant: *Quem, inquit, utposè Deum cum Verbo suo cognoscere optamus, ut quam Filii ad Patrem sit unio, intelligamus; quid Pater cum Filio communicet; quid sit Spiritus; quæ unitas trium; quæ discretio unitorum, Spiritus scilicet, Filii, & Patris.* Ibi manifestè Filium à Patre ratione personæ distinxit Athenagoras; non enim in votis esset intelligere Deum esse rationalem &c. cum illud satis omnibus obvium sit. Optat igitur ut omnes intelligant quomodò ratio Dei, seu Filius, sit à Patre distinctus, & unus cum eo Deus æternus, omnipotens, adorandus &c. Ergò Dei Verbum agnovit nomine, naturâ, origine, & professione Deum; cum ità ab omnibus Christianis agnosceretur, & adoraretur. Art. 1. & 2. sunt loca.

O P P. 5. Tatianum in orat. cont. Græcos docuisse in patre fuisse ab æterno Verbum, sicut cæteras creaturas; & per rationalem vim tempore constituto erupisse.

Resp. 1. Tatianum (quod & aliis antiquis contigit) scripsisse quo tempore fides vigeat integra, simplexque exponendi ratio; nec enim tunc cautionibus erat locus, cum hæretici mysterium istud non eâ subtilitate, quâ Sociniani, impugnassent. Ideòque nihil mirum, si quadam minùs accuratè de Trinitatis mysterio protulerit Tatianus.

R. 2. ipsum Tatianum sub duplici consideratione Verbum spectasse, nempe quatenùs ab æterno genitum est, & est in sinu Patris; & quatenùs prodiit exteriùs, creando universum orbem, aut colloquendo cum hominibus. Cæterùm Verbi generationem æternam esse Tatianus novit, & ex substantiâ Patris non divisâ, aut imminutâ, sicut fax communicâ luce nihil sui deperdit: *Natum est autem, inquit, per divisionem, non avulsionem: quod enim avellitur, à primo separatur; quod verò dividitur, id functione donatum propriâ, nihil imminuit illum, à quo vim suam sumpsit.* Verbo quoque adscribit abstracta Dei attributa, nempe esse Spiritum, & rationem, cum dicit Spiritum à Patre genitum, & rationem, ut art. 2. retulimus. Ideò autem ipsum voluntate erupisse asserit, ut generationem eius æternam, & spirituales esse significet; nam cum ipso per rationalem vim λόγος ab æterno fuit.

INST. Deum ab æterno fuisse solum docet, & Verbum è Patris potentiâ progressum.

R. idèò eum docuisse Deum ab æterno fuisse solum, quòd nulla extaret creatura: Verbum enim creatura non est. Sic ergò Verbum Deum censuit nomine, naturâ, origine &c. Verbum autem è Patris potentiâ progressum esse dicit, quatenùs externum est, & creans: & idèò subjungit genitorem non remansisse Verbi expertem. Ergò aliâ ratione spectavit Verbum, ut prodit exteriùs; aliâ, ut ab æterno in Patre manet: extant loca suprâ.

O P P. 6. S. Theophilum Antiochenum ad an. 182. lib. 2. ad Autolicum, ubi ait Verbum non esse æternum; sed generatum, cum Deus mundum condidit. Addit & illud in rebus creandis, & constituendis, esse Dei administrum: item Patrem nec visum, nec videri posse; quia nec loco includi, nec in loco inveniri potest: Verbum verò apparuisse; quia nec est invisibile, nec immensum; sed & in loco inveniri & includi potest.

R. hæc tradere Sanctum Theophilum de Verbo, ut prodit exteriùs, seu ut prolatitum est; non ut Verbum est interius, & ab æterno. Verbo illi intimo, quod est in visceribus, ut ait, Patris, tribuit æternitatem, nomen Dei, & attributa divina. Ait illud extitisse, ut Dei consiliarium, mentem, & sapientiam, antequam ulla res crearetur: hunc postea genuisse prolatitum; non ità tamen ut interiori illo se privaret: & sic Verbum fecit nomine, naturâ, & origine Deum, illique contulit attributa Dei abstracta, & unum Deum cum Patre agnovit: sunt loca art. 1. & 2.

O P P. 7. ex S. Iren. lib. 3. cap. 6. solum Patrem verum esse Deum, Deum Abraham, & *supra quem alius Deus non est.*

R. S. Iren. hæc tradere de Deo Patre, ut opponebatur Deo Valentinianorum, qui alium Deum, Deo Patre superiorem constiuebant; non verò excludendo Filium, quem lib. 4. cap. 26. docuit esse unum cum Patre Deum, imò & esse illum Deum Abrahami, Isaci &c.

INST. Ex lib. 4. cap. 37. Filius non fuit unus cum Patre Deus, qui Patri ministravit, nec eadem ejus est cum Patre natura; ut qui visibilis fuerit, Pater autem invisibilis.

R. ex S. Iren. lib. 2. c. 2. Filium, & Spiritum Sanctum ministrasse Patri, at non ut ministros: sed ut ejusdem omnipotentis socios. Undè Patrem allocutum esse Filium, & Spiritum Sanctum observat, & dixisse: *Faciamus hominem ad imaginem nostram.* Et addit: *& fecit Deus*, scilicet Filius ad imaginem suam, Patre quidem benè sentiente; Filio verò ministrante & formante; Spiritu verò nutriente & augente. Porro nullibi tradit Verbum esse visibile ratione naturæ suæ divinæ; licet visum fuisse scribat. Undè fit in aperto eandem esse trium personarum substantiam.

INST. Christum diem Judicii nescivisse, & Patre minorem esse scripsit ipse S. Irenæus lib. 2. cap. 48. & 50.

R. eum de humanâ Christi naturâ præcisè sumptâ differere; non verò de divinâ. Et verò quomodò Christum diem Judicii ignorare supponeret, quem rerum omnium creatorem agnovit? Ex eâ porro Christi hominis ignorantia colligit Irenæus argumentum adversus Gnosticos, qui

perfectam mysteriorum doctrinam sibi tribuebant. S. Irenæi doctrinam suprâ exposuimus art. 2. & 3.

O P P. 8. ex Clemente Alex. lib. 1. pædag. cap. 8. solum Deum Patrem Christi bonum esse, & Deum.

R. id Clementem asserere, non excluso Filio: imò Patri Filium conjungere ibidem in bonitate, & divinitate, simulque in adoratione debitâ: *Ut sit veritate apertum, quòd, qui est universorum Deus, unus solus sit bonus, justus, opifex, Filius in Patre, cui gloria in secula seculorum, amen.* Ibi quippè probandum sibi sumebat eundem, & justum, & bonum, Christi Patrem esse; quod hæretici negabant.

I N S T. 1. Clementem Alex. lib. 6. Strom. asserere Filium diversæ naturæ esse à Patre; ut qui dicatur à Patre factus: *Unus enim, inquit, est reverà Deus, qui fecit principium universorum, significans primogenitum Filium, ut scribit Petrus, præclarè intelligens illud: In principio fecit Deus cælum, & terram.* Item lib. 4. docet, Deum non cadere sub demonstrationem; Filium verò habere demonstrationem. Lib. quoque 7. scribit Filii naturam omnipotenti Deo proximè accedere; necnon Patrem esse primam causam, & Deum dici cum articulo; Filium verò secundam, & Deum dici absque articulo.

R. Clementem Alex. uti verbo, *facere*, pro verbo, *generare*: cumque profiteri Verbum, & æternum, & omnipotens, & unum cum Patre Deum; ut ex ipso superiùs exscripsimus: imò in hoc 6. lib. probare contendit Filium esse verum Deum æternum, Patris sapientiam, & consiliarium; quæ omnia rei creatæ non competunt: Filii autem naturam omnipotenti Deo proximè accedere docuit lib. 7. quia eadem est in Patre, & Filio divinitas. Similiter ait visibilem fuisse Filium; sed ratione speciei assumptæ, non ratione divinitatis: nam eum, ut Deum, invisibilem esse docuit, ut patet ex probationibus superiùs allatis. Quòd autem Filium dixerit sine articulo Deum, & secundam causam; non significat propterea divinitatem in Filio minorem: Deus enim Pater, ut etiam suprâ probatum est, absque articulo Deus sæpiùs dicitur. Aliundè verò eandem divinitatem in Patre, & Filio tradidit. Equidem Filium dixit secundam causam; sed ut eum secundam personam esse ostenderet. Constantem ejus doctrinam art. 2. & 3. expositam non repetimus.

I N S T. 2. In lib. hypotyposeon Clementis, extabat hæresis Ariana, ut testatur Photius in Bibliothecâ.

R. ex eodem Photio illud opus fuisse corruptum, & proindè ex eo nihil posse deduci.

O P P. 9. Tert. adv. Prax. cap. 3. & 4. inæqualem potestatem Patri, & Filio, & Spiritui Sancto tribuere; quia eandem vult esse in illis, & Angelis administrandi orbis potestatem, quæ est in Rege, filio Regis, & ministris; monarchiam esse unius, & principaliter Patris; eam à Filio participari, & ab Angelis administrari.

R. Tert. in omnibus comparisonem non instituere: sed in eo tantum, ut quâdam ratione unitatem monarchiæ in Patre, & Filio exprimat;

non verò, ut unitatem substantiæ excludat; sic enim habet: *Nullam dico dominationem ità unius sui esse, ità singularem, ità monarchiam, ut non etiam per alias proximas personas administretur.* In eo ergò comparatio est, quòd sicut conveniunt admodum princeps, & filius, & administri, in Reipublicæ procurandâ tranquillitate; ità patris, & filii monarchia in bonum universi tota conspiret, nec dividatur illa, licet, ut habet, duobus unicis contineatur, & in tertium gradum dividatur. Hæc enim non affert, ut excludat unitatem substantiæ; imò & indè illam asserit: ex unitate quippè substantiæ patris, & filii, unitatem monarchiæ docet. Idem Tertullianus cap. 2. arguit Praxeam, quòd se unicum Deum colere velle significaret; quasi non unicum Deum nos colamus, inquit; non sic quoque unus sit omnia, dum ex uno omnia, per substantiæ scilicet unitatem; quam quidem pluribus ità exponit: *Tres autem 1.º statu, sed gradu: nec substantiâ, sed formâ: nec potestate, sed specie: unius autem substantia, & unius status, & unius potestatis; quia unus Deus, ex quo & gradus isti, & forma, & species, in nomine Patris, & Filii, & Spiritus Sancti deputantur.* Ergò tantum abest, ut Tertullianus excludat substantiæ, & potestatis unitatem; quin potius substantiæ, & potestatis unitatem hinc repetat, quòd sint unus Deus: undè ait illam monarchiam quidem communicari Filio, dum scilicet à Patre generatur: *Sed proinde, inquit, cap. 3. illius esse principaliter, à quo communicatur in Filium:* at eam non vult esse communicatam filio, ut communicatur Angelis: *quale est, inquit, ut Deus divisionem & dispersionem pati videatur in Filio, & in Spiritu Sancto secundum & tertium fortis locum; tam confortibus substantia Patris, quas non patitur in toto Angelorum numero, & quidem tam alienorum à substantiâ Patris?* Ergò ex ipso non divisionem patitur monarchia, licet communicetur Angelis: ergò à fortiori nec in tribus personis: quia non sunt Angeli ejusdem cum Patre substantiæ; & , ut benè monet, destruunt monarchiam, qui duos Deos inducunt, ut Valentiniiani, & Prodicti: *Cum alius Deus inferitur adversus creatorem. Tunc malè, cum plures, secundum Valentiniianos, & Prodictos: tum in Monarchia everisionem, cum in creatoris destructionem.*

I N S T. I. Filius habuit monarchiam, seu potestatem participatam; ut qui eam ad tempus acceperit, Patri restituendam: *Ità, inquit ibidem cap. 4. eam nemo hoc nomine destruet, si Filium admittat, cui & traditam eam à Patre, & à quo quandòque restituendam Patri constat.*

R. ibi Tert. agere de specie quâdam potestatis communicatæ Filio Dei, prout mediatoris officium habuit; non verò de potestate divinâ. Ut enim manifestiùs Patrem à Filio distingui probet, hoc argumento utitur: Filius, quâ incarnatus, accepit potestatem à Patre restaurandi generis humani, & , ut habet, illud Deo subjiciendi: ubi verò post resurrectionem nihil sordium superfuerit, tunc cessante usu illius potestatis subjicietur ipse: non enim agit de potestate divinâ: & ut duas esse personas evincat, ità dissert in fine: *Hoc uno capitulo Epistola Apostolica*

potuimus jam & Patrem, & Filium ostendisse duos esse, praterquam ex nominibus Patris, & Filii. Hinc sequitur Patrem, & Filium distinctas esse personas; quia alius est, qui subjicit; alius est, qui subjicitur Dei Filius homo factus.

INST. 3. Docet Tertullianus cap. 7. Verbum non habere eandem perfectionem cum Patre; ut quod ipsum Verbum perfectionem suam sit consecutum, cum Deus per illud orbem creavit: *Tunc igitur, inquit, ipse sermo speciem & ornatum suum sumit.*

R. locutum fuisse Tertull. de perfectione extrinsecâ, de quâ jam superius differuimus; non verò de intrinsecâ: *Primum, inquit, ad cogitandum.... dehinc generatus ad effectum:* seu primum ab æterno generatus, deinde externus prodiit, cum è nihilo orbem eduxit. Et sanè omnem scrupulum eximit Tertullianus, si quis superesset, quòd tam sapè docet Verbum reverà Deum esse, & ab æterno, & unius cum Patre substantiæ: & proinde non censuit Verbum perfectionem intrinsecam accepisse, cum orbem creavit. Ibi quippè Tertullianus Praxeæ objectionem (scilicet Verbum esse quid inane) confutans, Verbum esse quid reale, & ex Patris substantiâ, & Patrem Filium sibi parem genuisse probat; huncque esse primogenitum, & unigenitum: *Exinde cum parem sibi faciens, inquit, de quo procedendo Filius factus est primogenitus, ut ante omnia genitus, & unigenitus, & ex Deo genitus propriè de vulvâ cordis ipsius.* Addit cap. 12. cum Judæis Praxeam, & illos sentire, qui unum Deum ità crederent, ut illi neque Filium, neque Spiritum Sanctum annumerarent.

INST. 3. Non totam substantiam Patris, sed tantùm portionem Filio tribuit Tertullianus cap. 9. *Pater enim tota substantia est; Filius verò derivatio totius, & portio, sicut ipse profitetur; quia Pater major me est.*

R. ità locutum esse Tertullianum, ut ostenderet Patrem esse aliam à Filio personam, utpotè qui ejus principium: ità enim seipsum exponit: *Sic & Pater alius à Filio, dum Filio major: dum alius qui generat, alius qui generatur.* Variis ipse comparisonibus, tùm ex ramo, tùm ex fonte deductis, substantiæ in Patre, & Filio unitatem illustrat cap. 13. has in probationibus retulimus.

INST. 4. Tertullianus docet Filium esse visibilem; Patrem verò invisibilem: ità cap. 14. lib. ejusdem contra Prax. lib. contra Judæos c. 9. lib. 2. contra Marcion. cap. 27. & lib. 4. cap. 22.

R. eum non docere Filium esse visibilem, quâ Deum; imò istud negare eodem in cap. 14. lib. contra Praxeam: *Dicimus enim, inquit, & Filium suo nomine eatenus invisibilem, quâ sermo & spiritus Dei ex substantia conditione jam nunc, & quia Deus, & sermo, & spiritus.* Et addit: *visibilem autem fuisse ante carnem.... in visione, & in somnio, vel in formâ qualicumque &c.* Ut autem probet Filium esse aliam à Patre personam, hoc argumento utitur; alium nempe dici Deum in Scripturis, qui visus fuit; alium qui diceretur invisibilis; quia nunquam visus esset. Sic Filium conspicabilem fecit ratione speciei assumptæ.

OPP. iterum Tertullianum Filio Dei denegasse attributa essentialia, æternitatem scilicet lib. advers. Hermog. cap. 3. cujus hoc erat argumentum, ut materiam esse æternam probaret: Deus semper est Deus, etiam ab æterno Dominus est: nullâ porro ratione potuit semper Dominus haberi, si non fuisset aliquid retrò semper, cujus semper Dominus haberetur: ergo existit ab æterno materia. Tertull. autem de principio illo convenit cum Hermogene; sed negat Deum fuisse ab æterno Dominum; & proinde non extitisse ab æterno materiam; sicut nec fuisse Judicem, aut Patrem ab æterno; quia peccatum ab æterno non erat, nec Filius: & proinde æternitatem denegavit Filio, sicut & materiæ, & peccato: *Nam, inquit, ex quo esse cœperunt, in qua potestas Domini ageret, ex illo per accessionem potestatis, & factus, & dictus est Dominus; quia & Pater Deus est, & Judex Deus est; non tamen ideo Pater, & Judex semper; quia Deus semper: nam nec Pater potuit esse ante Filium, nec Judex ante delictum. Fuit autem tempus, cum & delictum, & Filius non fuit, quod Judicem, & qui Patrem Dominum faceret.*

R. ad subjectam materiam si attendatur, statim nullius momenti visum iri difficultatem: in hoc enim contra Hermog. opere, non de Trinitate sermo est, sed de creatione mundi. Ab æterno quippè materiam fuisse Hermogenes opinabatur: quòd ab æterno Deus diceretur Dominus: ostendit verò Tert. nihil ab æterno fuisse creatum, non Angelos, non homines, seu Dei filios, quorum respectu Deus diceretur Pater; aut si nomine Filii Filium Divinum intelligat, eum considerat extrinsecè, prout sermo prolatus fuit sono circumvestitus; non verò quatenus est sermo interior, Deus, & apud Deum: hæc enim ratione argumentum Hermogenis diluit. Ibi de habitudine creatoris ad materiam extrinsecâ, movebatur quæstio: nam indè contendebat Hermog. esse ab æterno materiam, quòd ab æterno Deus, quâ Dominus, habitudinem extrinsecam ad materiam haberet; aliam enim habere non poterat: hanc autem Deum ab æterno habitudinem ad materiam habuisse negat Tert. sicut nec habebat ad Verbum, quâ externum, aut prolatus, aut creator est. Ex quo enim ad filium, ut creatorem, pater habitudinem non dicit; quia per Verbum, *omnia facta sunt Joan. 1.* rectè sequitur materiam non extitisse, quia non fuerat à Verbo creata. Et verò duplicem Verbi respectum accuratè distinguere solet Tertullianus, nimirum quatenus internum est, seu nondum creator; vel quatenus externum est, seu sono, aut alterâ specie circumvestitum: sub priori respectu æternum & Patri cœternum esse proficitur lib. contra Prax. cap. 5. quia ratio Patris est &c. ut in probationibus ostendimus. Item lib. isto contra Hermog. cap. 45. Verbum, quâ sermo interior est, seu sophiam distinguit à sermone, quatenus prolatus est, seu quo usus est Deus in orbe condendo, sono & aëre illum circumvestiens: *Sed primò, inquit, sophiam conditam initium viarum in opera ipsius: dehinc & sermonem prolatus, per quem omnia facta sunt.* Et cap. 19. scribit Verbum, seu sophiam esse æternum, & apud Deum: *hæc denique sola cognovit sensum Domini. quis enim scis quæ sunt Dei, & quæ in ipso, nisi spiritus qui in ipso? Sophia autem Spi-*

ritus, hæc illi consiliarius fuit, via intelligentiæ & scientiæ ipsa est... quis non hanc potius omnium fontem & originem commendet? Cap. quoque 20. ait in principio, non in materiâ, aut ex materiâ, Deum omnia fecisse, ut Hermog. falsò contendebat: Autè, inquit, sophia cogitando & disponendo jam fecerat. Probat etiam ex S. Joan. sermonem Deum esse, & apud Deum, & omnia per ipsum facta esse: Et sermo erat apud Deum, & Deus erat sermo.

INSTR. Tertullianus sermoni etiam interiori, seu sapientiæ negat æternitatem: ita enim ratiocinatur cap. 18. contra Hermog. Si materia esset æterna, esset aliquid sapientiæ Dei antiquius, nempe materia Verbo esset antiquior. Sic ergo supponit Verbum non habere æternitatem, quam haberet materia, si esset æterna. Addit eo tempore creatam fuisse sapientiam, cum idè creando orbe Deus cogitavit; ità c. ult. ejusdem lib. ubi ait Prophetas & Apostolos nullam materiam designasse, ad quam Deus, cum creare vellet, accesserit; sed scripsisse 1. sophiam condidisse, & deindè sermonem protulisse, quo omnia condita sunt: & sic sermo interior æquè ac exterior ex Tert. creatus est.

R. Tertullianum ex absurdo, quod ex Hermogenis doctrinâ sequebatur, Hermogenem confutare, scilicet ex eâ, quam materiæ tribuebat, æternitate, sequi materiam Verbo Dei esse aliquo modo præferendam; quia materia esset ingenua, ut pater; filius verò, licet ab æterno, nihilominus esset genitus, & haberet principium, etsi creator sit; sicque materia æquaturæ patri ingenuo, & præponeretur filio genito, qui filius prodiit, & natus est exterius, cum dictum est: *Fiat*. Nolu it autem Tert. hîc asserere filium in tempore fuisse factum: nam docuit eum ex substantiâ Patris natum esse, & in ipso patre subsistere, quod ex ipso & in ipso fuit; & Deum esse, & unum cum Patre Deum, verba illius sunt: si enim ex Patre, & in Patre; ergò immutabilis, ut Pater, ergo Deus ut Pater; quidquid enim in Deo est, Deus est: etsi, ut habet, Deus, & unus cum Patre Deus, æternus ut Pater: *Agnosco ergò*, inquit Hermogenes, idcirco etiam sophiam Dei natam & conditam predicari, ne quid innatum & inconditum præter solum Deum crederemus. Si enim intra Dominum quod ex ipso & in ipso fuit, sine initio non fuit: sophia scilicet ipsius exindè nata & condita, ex quo in sensu Dei ad opera mundi disponenda capis agitari: multò magis non capit sine initio quicquam fuisse quod extra Dominum fuerit. Si verò sophia eadem Dei sermo est sensu sophia, & sine quo factum est nihil, sicut & dispositum sine sophiâ, quale est ut filio Dei sermone unigenito & primogenito aliquid fuerit præter Patrem antiquius: & hoc modo utiquè generosius, nedum quod innatum nato fortius, & quod infectum factò validius? quia quod, ut esset, nullius eguit authoris, multò sublimius erit eo, quod ut esset, aliquem habuit authorem. Et intrà: ità & hoc nomine materiam Deo præponit Hermogenes, præponendo eam filio. Filius enim sermo, & Deus sermo: & ego & Pater unum sumus: nisi quod sustinebit æquo animo filius eam præponi sibi, quæ Patri adequatur. Cap. 20. ait sermonem à Joanne dici factorem omnium. Quomodo autem pugnet Tert.

Tert. pro Verbi cum Patre æternitate, ex probationibus suprà sit perspectum, præsertim ex l. cont. Prax. cap. 5. & c. 7.

Cæterùm elucescet admodùm quæ fuerit Tertulliani de Filiis divinitate fides, si, quod de superioribus authoribus jam fuit observatum, hîc vel solummodò moneamus; neminem scilicet pro Dei unitate contra idololatrias, pro Christi Divinitate, & pro pluribus in Deo personis contra Judæos, & Praxeam, seu pro fide postmodùm Nicæa sancitâ, feliciùs Tertulliano pugnassee: sed nec ipse, cum infeliciter Montanistis adhæsit, hanc fidem ubique terrarum, & præser. in Romæ conspicuam, Zephyrino, nec aliis Catholicis exprobrat; nec ipsi Tertulliano hanc doctrinam vitio vertunt Catholici, ut qui cum eo de præcipuò Christianæ religionis dogmate convenirent. Etenim adeò palàm erat Christianorum fides illa, ut Luciano gentili, ad an. 174. in Philopatro, nihil ad religionis Christianæ ludibrium magis facere visum fuerit, quàm facera & ridicula istius mysterii expositio. Introducit tùm ethnicum sic interrogantem Christianum, quemnam igitur tibi jurabo: tùm & Christianum ità respondentem; Deum altè regnantem, magnum & æreum, atque æternum filium Patris, unum ex tribus, & ex uno tria. Quo tempore florebat Tert. non defuerunt alii præter Praxeam hæretici Trinitatis hostes infensi, scilicet Theodorus Coriarius Bisantinus, & Artemon, qui à Victore Papâ ideò communione Catholicâ fuit privatus. Ex quibus tam Tertulliani, quàm Ecclesiæ universæ 2. & 3. sæculis fides postea 4. sæculo Nicæa definita in aperto ponitur.

OPP. 10. Origenes docuit Verbum creatum esse, & solâ participatione Deum: nam lib. 6. contra Celsum observat, cum nomini præfigitur articulus, verum in Scripturis Deum designari; cum verò non præfigitur, Dei filium, aut eos qui participatione quâdam Dii nominantur, significari: ita quoque tom. 2. in Joan. Præterea, malè de Trinitate censuisse Origenem tradunt S. Epiph. in ep. ad Joan. Hieros. & hæres. 64. S. Hieron. epist. ad Avitam, Theophilus Alex. epist. 1. & 2. necnon S. Aug. lib. de hæres. num. 43. ubi refert eum docuisse Filium Patri collatum, mendacium esse, non veritatem; & tantùm distare à Patre, quantum Apostoli à Christo; nec orandum esse Filium cum Patre. Unde Synod. 5. ad an. 513. act. 8. & Can. 11. Origenem damnavit; sicut & Conc. Lateranense sub Martino I. c. 18. Item author Anonymus lib. 5. Apolog. pro Origene apud Photium Codice 117. fatetur Origenem docuisse Filium non esse adorandum, nec simpliciter bonum nec cognoscere Patrem. Ideò sæpiùs author Arianae hærescos à pluribus nuncupatur Origenes.

R. loca quæ cont. fidem pugnant, ab inimicis Origenis, aut ab hæreticis fuisse ejus operibus inserta, ut ipsemet conqueritur in epist. ad amicos suos. Alexandria commorantes, quam Rufinus in Apologiâ refert: ità etiam Author ejus Apologiæ apud Photium codice 117. præcipuè quoad doctrinam Trinitatis: item Pamphilus Mart. in Apol. quam Rufinus refert: item & ipse Rufinus eorum librorum adulterationem pluribus confirmat, simulquæ ab hæres. si Origenem vindicat. Et certè S. Athan. Ecclesiæ Alex. Episcopus, & Catholici dogmatis defensor eximius, Origenis ejusdem Ecclesiæ

alumni autoritate adversus Arianos in illius doctrinâ versatos usus non fuisset, si vel minimâ suspitione laborasset Origenis doctrina: immo verò à tanti nominis authore laudando non tantùm abstinuisset S. Athan., sed & ab ejus sententiâ alienum se fuisset testificatus. At ipse S. Athan. sanctorum & eruditissimorum Episcoporum vestigia sectatus, Origenis doctrinæ Catholicæ continuò adhæsit; nec ullum unquam Origeni circa Sanctissimæ Trinitatis fidem Catholicam errorem vitio versum habuit confutandum. Hoc in capite non paucos habuit, nec indignos, quos imitaretur; nec paucos, nec indignos sortitus est imitatores. Origenis igitur doctrinæ discipulus S. Athan. Heralam Episcopum Alex. unum ex decessoribus suis, Gregorium Thaumaturgum. S. Firmilian. & alios secutus est. S. etiam Athanasium, damnatâ hæresi Arianâ. imitati sunt SS. Basil. & Greg. Naz. qui in eâ confutandâ summam operam collocarunt: nec mirum sanè; cum aperta sit Origenis doctrina in operibus ejus genuinis, ubi Verbum, & Christum, nomine, naturâ & professione Deum facit, ut ex libris cont. Celsum in probationibus ostendimus. Ergo siue consulantur ejus opera genuina; siue ejus discipuli, fidei Catholicæ professionis gloria tanto viro non potest eripi.

Nec indè Conciliis & SS. Patribus, qui Origenis opera damnarunt, vel levis sit injuria: propterea enim ejus opera proseripsērunt, vel quòd alios errores continerent v. c. animas omnes simul fuisse creatas, & in corpora postmodùm detrusas, quòd in quâdam peccata fuissent lapsæ. pœnas damnatorum finitum iri &c. aut quòd Origenis operum depravorum autoritate uterentur hæretici, fidelesque tanti nominis gloriâ deciperent facilè: non verò quòd in fide Trinitatis aberraverit. Etenim tam eximie eruditionis virum in gravissimo religionis Christianæ dogmate sibi ipsi fuisse contrarium præter fidem est. Cum ergò tùm in locis à nobis in probationibus adductis; tùm in indubitatis cont. Celsum operibus, fidem Catholicam non modò tradat, sed exponat, & propugnet; in aliis operibus eandem haud dubiè docuerat: sed hæc fuerunt interpolata studiosè; nec visum fuit hæreticis, aliundè posse comparari tanti nominis autoritatem: Undè Concilii s. Sanctionibus fidei, & fidelibus prudenter fuit consultum, ne tam illustribus viri nomine in erroribus propugnandis hæretici abuterentur. Addimus loca, quæ fidei Catholicæ favent, Origenis operibus à Rufino non fuisse inserta; cum ante Rufinum ea ex ejus operibus pro fide Nicænâ S. Athan. & alii adduxerint; & de ejus librorum adversus Celsum integritate apud omnes constet.

INST. Sed in libris contra Celsum, eosdem errores videtur tradere: lib. enim 2. docet Patrem Filio præcepisse orbis creationem, & Filium creaturam esse: lib. etiam 6. ait Verbum totius creaturæ esse primogenitum. Et lib. 8. scribit Filium esse Patre inferiore; item Patrem, & Filium esse unum concordia, non verò naturæ unitate.

R. Patrem præcepisse Filio creationem juxta mentem Origenis, non ut inæquali, sed ut potestatis socio; & sic maximè illustrari filii omnipotentiam, qui creare potuit. Dico quoque ex ipsius Origenis mente filium esse creaturam, quatenus Verbum prolaticum: item primogeni-

rum totius creaturæ esse, quia ab æterno genitus; aut ex Apost. Col. 1. & ex S. Athan. orat. 3. quia per ipsum filiorum adoptionem omnes consequimur. Dico adhuc Origenem probare Patrem Filio majorem esse, adversus hæreticos quosdam occultos, eo quod à Patre procedat. Aio tandem unitatem concordia non excludere unitatem substantiæ; imò eam involvere, ut probatum est superius, & quidem ex Origenis proposito, & verbis. Nec intelliget quis facile, quâ ratione possit vel in suspitionem adduci doctrina virorum illustrium, qui pro Dei unitate contra Ethnicos tam egregiè decertarunt; qui cum Judæis, & hæreticis de illâ unitate consenserunt; & qui plures in Deo personas constanter professi sunt. Origenis doctrinæ series refertur superius art. 2. & 3.

O P P. 11. S. Greg. Thaumaturgus, ex S. Basil. epist. 64. Filium creaturam, & facturam esse docuit.

R. S. Greg. Thaumaturgus ex eodem S. Basil. filium, quâ hominem, creaturam fecisse; ut Aeliano, quem ad fidem sensum adducere studebat, se attemperaret. Is Neocæsareæ Sabellianismum oppressit, & ab eo ad Musonium usque in eâ Ecclesiâ fidei Trinitas viguit illibata. Tandem ex S. Greg. Niss. in ejus vitâ veram Trinitatis, & consubstantialitatis fidem, à S. Joanne per revelationem accepit, quæ in Neocæsariensi Ecclesiâ servabatur, eamque ab Arianâ hæresi tutam fecit. In orat. verò ad Origen. Verbum dicit esse veritatem, & sapientiam: undè igitur Socinianorum ducatur scrupulus, quis intelligat?

O P P. 12. S. Cyprian. ep. 73. docere Christum profiteri Patrem esse majorem se, & Patri se in omnibus obsequi.

R. S. Cyprian. de Christo homine disserere, ut vel legenti obvium est.

O P P. 13. Novatianum cap. 17. scribere filium esse minorem Patre; & Patri se nunquam adæquasse; & facturum fuisse rapinam, si Patri se adæquasset; eumque in omnibus Patri obsequi: his enim Philipp. 2. laudatis verbis: *Qui cum in formâ Dei esset, non rapinam arbitratus est esse se equalem Deo*, hæc habet: *Quamvis enim se ex Deo Patre Deum esse meminisset, nunquam se Deo Patri aut comparavit, aut contulit, memor se esse ex suo Patre, & hoc ipsum quod est, habere se, quia Pater dedisset. Indè deniquè & ante carnis assumptionem, sed & post assumptionem corporis, post ipsam præterea resurrectionem, omnem Patri in omnibus rebus obedientiam prestitit pariter ac prestat.*

R. Novatianum dixisse filium esse minorem Patre, nec ipsum filium se æquare Patri, imò & illi fuisse obsecutum, ut eum distinctam à Patre personam esse ostenderet, uti ex Novatiani proposito fit palàm: addit enim, *non ingenuus est; ut Pater, sed genitus; & quidquid habet, communicatum habet: Quamvis enim se ex Deo Patre Deum esse meminisset &c.* non tamen idè inæqualem divinitatem habet: nam, ut docet cap. 31. *ad hoc genitus est, & æqualem divinitatem accepit &c.* Suprà impugnabat Sabellianos asserentes unicam esse in Deo personam, ac proindè Verbum non esse personam à Patre distinctam. Porro si existi-

masset filium non esse Deum, facilè Sabellianos confutasset, hanc rationem adducendo, nempe tantùm abesse, ut filius esset eadem persona cum Patre, quin imò nec Deum esse, nec eundem cum Patre Deum.

INSTR. 1. Novatianus ità docuit filium esse alterius naturæ à Patre, ut voluerit Filium Patri fuisse obsecutum in creando mundo. Addit etiam Patrem esse immensum & invisibilem; non verò filium, qui æternus non est, ut Pater; cum ab pso genitus fuerit, quandò Pater voluit: sic enim habet cap. 25. *Deo precipiente ut homo fiat, Deus refertur esse qui hominem facit. . . . Deum Patrem immensum atque sine fine, non qui loco claudatur, sed qui omnem locum claudat: nec eum qui in loco sit, sed potius in quo omnis locus sit: omnia continentem, & cuncta complexum, ut meritis nec descendat, nec ascendat; quoniam ipse omnia & continet, & implet.* Et cap. 31. *Ex quo (scilicet ex Patre) quandò ipse voluit, sermo filius natus.*

R. has propositiones in Catholicis esse catholicas jam superiùs abundè demonstravimus. Obedivit quippè filius, ut socius potestatis; non ut minister: immensus est, & invisibilis Pater; quia nullam speciem, quàm se conspicabilem faceret, accepit: processit filius ex patre, quandò voluit; quia Pater eum non invicis generavit; sed, ut docet, ab æterno processit, & ante omne tempus; quia pater ab æterno pater: origine quidem pater filium præcedit; sed quatenùs est principium, non quàm Deus: verba sunt in probationibus cap. 21. 24. 31. Æternitatem quoque, immensitatem, omnipotentiam, & quæ Deo competunt attributa, filio convenire confirmat; & adversus Sabellianos concludit, in Scripturis alterum dici Deum, qui nunquam visus est, nec unquam loco fuit contentus; alterum verò qui quandòque se videndum præbuit; qui tamen ambo sint unus Deus.

INSTR. 2. Alienus fuit Novatianus à tribuendâ patri, & filio substantiæ unitate: cap. enim 22. docet hæc verba Joan. 10. *Ego & Pater unum sumus*, intelligenda esse de unitate concordiæ: *unum autem quod ait, ad concordiam, & eandem sententiam, & ad ipsam charitatis societatem pertinet, ut meritis unum sit Pater, & Filius per concordiam, & per amorem, & per dilectionem.*

R. per unitatem concordiæ non excludere Novatianum in Patre, & Filio substantiæ unitatem, quam supponit, & propugnat. Nam c. 21. probandum sibi sumplerat adversus Sabellii hæresim, Filium divinum, seu Christum, non esse Deum patrem; licet Deus esset, & unus ex Scripturis esset cum patre Deus: quia verò Sabelliani frequenter objiciebant, ut habet cap. 22. illa verba: *Ego & Pater unum sumus*: & indè inferbant eundem esse, qui Pater, & Filius diceretur; hanc cavillationem confutat, & probat, *unum neutraliter positum, societatis concordiam, non unitatem personæ sonare*, ut loquitur: *Ego & Pater*, designare proprietatem personæ; *sumus*, designare duas personas. Ergò cum duas esse in Deo personas colligeret; non quidem omnem unitatis divinæ rationem explicuit; sed eam, quæ sufficeret proposito; nempe duas esse personas,

patrem, & filium; licet unitate concordia, & dilectionis unum essent; quæ differendi ratio par est: amici nimirum, licet concordia, vel amici iæ vinculis, aut charitatis infusa beneficio sint unum cor, & anima una; plures esse numero personæ non desinunt. Novatianus autem non ait hoc in cap. patrem & filium esse unum substantiæ unitate; quia adversus Sabellianos opportuna non erat expositio illa. Insuper satis erat aliquo modo exponere duas esse personas, quæ unum quid esse non desinere. Eodem tamen in opere eam substantiæ unitatem in patre, & filio tam apertè profiteretur in probationibus quis suprâ scripsimus, ut dubitationem omnem procul removeat: probat enim unum esse Deum, Patrem & Filium, qui ex substantiâ patris est genitus. Oportet consilere loca quæ retulimus art. 2. & 3.

OPP. 14. S. Dionys. Alex. in epist. ad Euphranorem, & Ammonium, docere filium Dei esse creaturam; opus Dei à substantiâ patris alienum, sicut vitis aliterius naturæ est ab agricolâ, & navis ab opifice; nec fuisse antequàm fieret. Undè S. Basil. epist. 141. ad Maximum Philosophum, Anomæorum authorem S. Dionysium facit; eumque, dum vehementiùs adversus Sabellium pugnaret, in oppositam hæresim incidisse scribit; & inter personas tres, essentiæ, & potentiæ, & gloriæ diversitatem induxisse; aliquandòque consubstantialiale verbum rejecisse, aliquandò approbasse. S. Basilio assentiuntur Rufinus, & S. Hieron. nec diffidendum S. Dionysii autoritatem ab Arianis fuisse laudatam plurimum.

R. de Christo, ut homine, locutum S. Dionys. tunc fuisse, divinitate non exclusâ: ità S. Athan. in epist. de ejus sententiâ. Cum enim viros rudiores, licet Episcopos sibi subjectos, à Sabellianis in errorem inductos ad fidem revocare conaretur, argumento eorum animis accommodato Christum aliam à Patre personam esse ostendit, industriam medici hæc in parte imitatus, imò & æconomiam Apostolorum, qui quandòque solius Christi humanitatis meminerunt; ut SS. Petr. Act. 2. Stephan. Act. 7. Paulus Act. 13. cum adhuc Judæi non pares essent, quibus Christi divinitas aperiretur. A Verbo autem divinitatem non exclusit S. Dionys. quinimò, cum quidam Alexandriâ Romam transvecti, apud S. Dionysium Rom. hæresicos eum minùs prudenter inculassent, utpotè nequidem monitum; ab ejus communione non recessit S. Dionys. Rom. sed eum monuit tantum, ut suam aperiret sententiam; quod fortiter executus est in pulcherrimâ apologiâ quam scripsit, ubi fidem suam apud S. Dionysium Rom. purgavit; & in quâ professus est Patri consubstantiali Filium, & coæternum; quia Filius æternæ lucis est splendor; Deus autem Pater æterna lux; & proindè æternus illi cohærens splendor Filius. In alio quidem loco Filium esse creatum dixit, sed quatenus corpus creatum induit.

Universæ palàm erat Ecclesiæ S. Dionysium Alex. pro Verbi divinitate stare constanter; ideò an. 266. ab Episcopis Orientalibus fuit vocatus ad Synod. Antioch. contra Paulum Samosat. qui pro meto homine Christum esse habendum, & unicam esse in Deo personam, secundâ

Synodo Antioch. an. 272. referente, contendebat. Cum autem ad Synodum Antioch. an. 266. gravibus infirmitatibus, & senio confectus S. Dionys. Alex. non posset accedere; fidem suam, & Ecclesiæ suæ, ad Synodum transmisit: in eâ docet tùm Verbum, quâ Verbum, non esse creatum; tùm duplicem nativitatem habere, æternam scilicet à Patre, & temporalem ex Mariâ: ità S. Athan. in eâ epist. ubi ex utriusque Dionysii, & Ecclesiæ Rom. & Alex. consensione, necnon autoritate, adversus Arianos fidei antiquitatem probat, simul & consubstantialis vocis usum.

Jam si vel minimâ suspitione S. Dionysius Alex. laborasset, an ipsum S. Dionys. Rom. novitatibus adeò infensus pro Catholico Episcopo exposita sententiâ habuisset? An Orientales fidei suspectæ Episcopum, Pauli Samosatani patronum futurum, ad fidei defensionem Alexandriâ Antiochiam evocassent? An non potius de S. Dionysio desiciendo, ut de Paulo Samosat. cogitassent? Conspicua igitur erat omnibus S. Dionysii fides pro Verbi, seu Christi, divinitate verâ, & cum Patre æterno eâdem. Undè autem S. Bas. & alii aliter de S. Dionysio Alex. censuerint? Undè S. ipsum Dionysium cum S. Dionysio Rom. non audierint? nescire me fateor. In eam de S. Dionysio Alex. sententiam forsitan descendit S. Basilius, quòd, ut exponit, quædam tantùm ejus opera perlegisset, non omnia; ex aliis autem intellexisset proculdubio, quæ fides S. Dionysii fuerit.

O P P. 15. an. 272. à 2. Synodo Antiochenâ, ex 80. Episcopis constante, Paulum Samosatenum vocem *Consubstantialis* profitentem ab Ecclesiâ pulsum fuisse, quemadmodum patet ex Epistolâ Patrum ad Dionys. Rom. & Maximum Alex. necnon ad Ecclesiam Catholicam, in quâ *Consubstantialis* vocabulum damnatum est. Adde insuper ex illo Concilio Episcopos sex, qui priori Synodo interfuerant an. 266. ad Paulum Samosatenum ex communi Patrum sententiâ scribere hanc esse fidem ab antiquo acceptam, Patrem videlicet Filio præcepisse ut mundum conderet, ut se manifestum Patriarchis faceret, & legem ferret; ideòque Angelum in Scripturis dici: Deum autem universi Angelum existimare impium esse.

R. Hæc Catholicè scribi potuisse, ut sæpius observavimus, & à Catholicis post Nicænam Synodum fuisse scripta. Porro autem ad intelligentiam hujus rei favet admodum disserendi necessitas, & occasio. Eandem enim esse personam Patrem, Filium, & Spiritum S. Paulus Samos. contendebat &c. Appositis verò argumentis ununtur illi Patres, quibus ostendunt Christum esse sapientiam, Verbum, virtutem Dei, substantiam, Deum, & Dei Filium: & adductis variis Scripturæ locis: omnes, inquit, *Scriptura divine Deum Filium Dei declarant.* Ut autem Filium aliam esse à Patre personam probarent, implevisse scribunt voluntatem Patris in creatione universi. Addunt Filium, Deum esse generatum à Patre, tanquam actum viventem, Deum, Dominum, & Angelum Dei; & à Patre missum: Patrem verò seu Deum universi, Angelum dici, impium esse aiunt; quia scilicet Pater à nullo procedit. Cæterum vocem consubstantialis, eo sensu

quo usurpabatur à Paulo samosateno damnatur; non verò recto sensu, ut q. 1. exponetur.

O P P. 16. Pierius Mart. Presbyter Alex. ex Photio Codice 119. ait Filium & Patrem, duas esse essentias, & naturas: item Spiritum Sanctum Filio, & Patri inferiorem esse.

R. Non extare omnia Pierii opera; quæ si extarent, palàm fieret illum nomine essentia intellexisse personam; & Spiritum Sanctum dixisse inferiorem Patri & Filio, quòd ab utroque procedat.

O P P. 17. Ex Arnobio lib. 1. verum Deum non habere patrem & matrem.

R. Ita locutum Arnobium, sensu Ethnicorum scilicet, qui Deos ex maris & femina commixtione genitos esse profitebantur; quia, ut habet, Deus omnipotens non cœpit ex aliquo tempore. *Vos habetis*, inquit, *Deos sexibus discretos, ex commixtione natos*; nos, ingenitos: de Patris autem æterni Filio nullatenus cogitabat tunc temporis. Cæterùm pro Filii divinitate pugnavit, ut in probationibus exposuimus.

O P P. ult. ex Lactant. lib. 2. cap. 8. & 9. *De matre natus est qui ante eam fuit; de Patre, qui aliquandò non fuit: hoc fides credat, intelligentia non requirat; ne aut non inventum putet incredibile, aut repertum non credat singulare*: & sic ab æterno non fuisse genitum Verbum censuit. Porro tempus notat quandò Verbum creatum fuerit, nempe quandò de creando orbe Pater cogitavit. Lib. quoque 4. c. 6. Filium ait esse Angelum, & similem Angelis, quoad creationem; licet Dei appellatio soli Filio tributa sit. *Deus igitur antequàm præclarum, &c.* quem locum in probationibus retulimus.

R. Hæc lib. 1. cap. 9. verba à plurimis, & 8. vaticanis codicibus, & antiquioribus, & melioris notæ abesse; nec nos priorem loci partem idè in probationibus laudasse, quòd à quodam Ariano inserta sint, ut propositio ista, *erat quandò non erat*, utcumque probaretur; aut auctoritatem aliqualem sortiretur. Similiter & à Manichæo quodam quæ sequuntur paulò post sunt inserta, videlicet de principio boni & mali: sed nec ad propositum faciunt hæc verba; nec profectò sibi attendebat interpolator: Priora enim Verba destruunt quod ille sibi ex sequentibus colligendum sumit: profiteretur quippe Filium esse cœternum Patri, & æqualem: *sicut mater*, inquit, *sine exemplo genuit authorem suum, sic ineffabiliter lacer genuisse credendus est cœternum Deum.*

Addit Patrem esse omnis boni fontem, & ab eo Filium, tanquam rivum, profluxisse similem ipsi, & virtutibus Patris prædicum; & proindè existimavit Filium Patri consubstantialem: ejusdem enim planè naturæ & substantiæ sunt fons, & rivus. Cap. verò 6. lib. 4. non vult docere Filium Dei genitum fuisse, paulò antequàm hoc mundi opus adoriretur; nec comparisonem instituit Verbum inter & Angelos. Etenim æquivocè nomen Angeli, seu missi, Verbo tribuit; aut ad hunc locum Coloss. 2. v. 10. *Ipsè est caput omnis principatus*, alludit, dum Verbum vocat supremum Angelum: mox quippè subjungit: *Hunc tamen solum primogenitum divini*

nominis appellatione dignatus est, patriâ scilicet virtute, ac maiestate pollentem: esse autem summi Dei Filium, qui sit potestate maximâ præditus. Addit postea de eo Salomonem locutum, cum dixit: *Deus condidit me in initio viarum suarum* &c. Ergo censuit Lactantius Filium esse ab æterno genitum, cumque verè Deum esse.

INSTR. Lactantius lib. 4. cap. 8. ita Filium ab Angelis distinguit; magna, inquit, inter hunc Dei Filium, & ceteros Angelos differentia est. Illi enim ex Deo taciti Spiritus exierunt; quia non ad doctrinam Dei tradendam, sed ad ministerium creabantur; ille verò cum sit & ipse Spiritus, tamen cum voce ac sono ex Dei ore processit, sicut Verbum. Et sic instat Angelorum, levi discrimine addito, generatus est Filius.

R. Lactantium non in eo tantum Angelos inter & Filium Dei discrimen ponere, quod Filius sit sermone prolarus; Angeli verò non ita: nam in primis duplicem Christi nativitatem distinguit; æternam alteram, quâ Filius Dei est, quam vocat in Spiritu; alteram verò in carne. Addit multiplicem natum errorem ex indistinctâ illâ duplici Nativitate: deinde inquit quomodo ab æterno genitus sit: & respondet à nemine posse sciri. In his ut steteret, exoptarem: erat enim vir Christiana dogmata non ita edoctus, ut in iis exponendis operam collocare deberet. Mystrium aperte tradidit, ut in Scripturis continebatur; ex quo nobis abundè sit satis. Si enim ulteriùs progressus aliquid è suo in expositione tradendâ addidisset, nihil indè adversus fidem Catholicam posset erui: nam arbitrio suo videretur uti, potius quàm legitimis probationibus: nihilominus in eadem expositione deprehendimus, quæ ad fidem spectant; ibi siquidem Dei filium, Dei sermonem tacit; Angelos verò spiritus. Addit quæ merè sunt physica, & parùm ad rem pertinent. Præterea magnum, ut habent verba quæ obijciuntur, inter Dei Filium, & Angelos reponit discrimen; & ait Filium cum voce ac sono ex Dei ore processisse; cum scilicet ille magister futurus esset doctrinæ Dei, & cælestis arcani ad hominem profereudi. Postea subdit cum ab æterno in Patre, & ex Patris substantiâ esse: *Quia Dominus de ore suo vocalem spiritum, quem non utero, sed mente conceperat, inexcogitabili quâdam maiestatis suæ virtute ac potentiâ, in effigiem, quæ proprio sensu, ac sapientiâ viget, comprehendit.* Addit eum alios spiritus in Angelos figurasse; nostros verò spiritus dissolubiles esse, quia mortales sumus. Aliis similibus additis redit ad fidem, & Filium sermonem facit ex substantiâ Patris procedentem: *Quandò magis Dei vocem credendum est, & manere in æternum; & sensu, ac virtute comitari, quam de Deo Patre tanquam rivus de fonte traduxit. Quod si quis miratur ex Deo Deum prolatione vocis, ac spiritus potuisse generari; si sacras voces Prophetarum cognoverit, desinet profecto mirari.*

Sic Lactantius Verbum divinum non solum spectat ut internum, ut sapientiam, & rationem patris, ac Deum ab æterno; quia Deus ratione, ac sapientiâ nunquam caruit; & quia ex patris est substantiâ: sed etiam Dei verbum considerat ut externum, prolatum, sono circumvestitum, & sic in tempore positum; quia Deus procedentem de ore suo vocalem Spiritum

ſpiritus cum Angelis qui creati ſunt, confert. Variis deindè ſacris contextibus æternitatem Verbi, & divinitatem probat, præſertim ex illo Joan. 1. *In principio* &c. Et cap. 9. in ſermone, ſeu in verbo, duo diſtinguit, ſermonem ſcilicet, & rationem: *Sed melius Greci λόγος dicunt, quàm nos verbum, ſive ſermonem; λόγος enim & ſermonem ſignificat, & rationem; quia illa eſt vox, & ſapientia Dei.* Et proindè Verbum æternum fecit, quâ ratio & ſapientia Patris eſt.

INSTR. Lact. c. 14. probat ex ipſo Chriſto unum Deum eſſe colendum: *nec unquam, ſe Deum eſſe dixit: quia non ſervaffet fidem, ſi miſſus, ut Deos tolleret, & unum affereret, induceret alium præter unum.*

R. Chriſtum quidem non ſe dixiſſe Deum à patre diverſum; hoc enim ſi præſtitiffet, Deos gentium non ſuſtuliffet pro munere; nam alium Deum præter unum induceret, & ſe ab eo ſepararet: ſed ubi Chriſtus ſe Deum dixit, ſe unum cum Patre Deum, & ab æterno, nuncupavit; & eâ ratione non niſi Deos gentium excluſit. Ea eſt Lactantii ſententia, ut ex locis laudatis, & doctrinæ ſerie palàm eſt; & ideo in capitibus ſequentibus pro divinitate Chriſti pugnat, & eas, quæ ex paſſione peterentur objectiones, ſolvit: imò c. 16. aſſerit eum qui ipſe eſt *Virtus, & ipſe juſtitia*, deſcendiſſe ut eam doceret, hominemque formaret. Et cap. 17. ait illum eſſe æternum, & aded miſſum fuiſſe ut *denuò per eum qui eſſet æternus, legem ſanciret æternam.* Cap. 18. ſic ſcribit, *quid de hujus crucis indignitate dicemus, in quâ Deus à Dei cultoribus ſuſpenſus atque ſuffixus eſt?* ſed & ex objectionibus Ethnicorum facilè conſtabit de Lactan. ii hîc ubique receptâ: opponebant enim cap. 12. Gentiles dedecere naturam immortalem fieri hominem; nec Deum viam, quâ hominibus prodeſſet, idoneam ſelecturum fuiſſe, ſi humanam naturam induiſſet: nam ſi ut Deus conſpectus fuiſſet, omnes in Dei venerationem adduxiſſet. Porro niſi Filium verum & unum cum Patre Deum eſſe cenſuiſſent Chriſtiani, an hæ objectiones in Ethnicorum animos veniſſent? an in ſequentibus capitibus probaſſet ipſe Lactantius, verum Deum debuiſſe hominem fieri? Deniquè c. 23. tradi Deum ſolum eſſe poſſe hominis doctorem. Cap. 24. ait Chriſtum, ſi Dei majeſtatem oſtentatſet, ejus majeſtatem homines non ſuſtinuiſſe; & idcirco neceſſum fuiſſe, ut eſſet Deus homo. Cap. 25. docet ipſum Chriſtum fuiſſe Deum & hominem, inter Deum atque hominem medium conſtitutum.

INSTR. Lactan. cap. 29. ejusdem lib. 4. non vult Patrem & Filium eſſe unicum Deum, ſeu habere eandem unitatem eſſentialem, ſed moralem tantum: ita enim exponit Patrem, & Filium, unum eſſe Deum, ſicut Pater & Filius jure civili faciunt unam domum; quia ſunt duo tanquam unus; & unus tanquam duo: *Cum quis, inquit, habet Filium, quem unicè diligit, qui tamen ſit in domo, & manu Patris; licet ei nomen Domini, poteſtatemque concedat; civili tamen jure & domus una, & unus Dominus nominatur.* Sic hic mundus, una Dei domus eſt; & Filius, ac Pater, qui unanimiter incolunt mundum, Deus unus; quia & unus & tanquam duo, & duo tanquam unus. Neque id mirum; cum & Filius ſit in Patre, quia Pater diligit Filium; & Pater in Filio, quia voluntati Patris fideliter pareat.

R. Lactantium hanc comparationem instituere, non ut Mysterii expositionem aptam, & idoneam proponat; sed ut accommodato exemplo, & ut ait, *propiore* utatur. Suam mentem Lactantius in eodem cap. apertè explicat: sibi enim proponebat explicandam Dei cum Patre unitatem in substantiâ, ut objectionem illam dilueret, scilicet quomodò Christiani unum Deum colerent, qui duos asseverarent, nempe Deum Patrem, & Deum Filium: quæ professio plerosque in errorem ageret præcipites; quòd etiam Deum æternum, & mortalem faterentur Christiani: Docet ergo Christianos Deum Patrem & Deum Filium nosse, & unum Deum profiteri; quia Pater non secernitur à Filio; cum utriusque sit una mens & una substantia: Cum, inquit, dicimus Deum Patrem, & Deum Filium; non diversum dicimus, nec utrumque secernimus; quia nec Pater sine Filio esse potest, nec Filius à Patre secerni. Ad exponendam porro illam Patris, & Filii unitatem exemplo illo domûs, & Patris familias utitur, ut quòd accommodatum aliquo modo, seu nobis familiarius existimet, & ut loquitur, propius. Deindè auctoritatem Isaïæ suprà relata adhibet, ut probe tam Filium, quàm Patrem, esse unum Deum æternum; tam Filium esse Deum, quàm Patrem; unamque esse substantiam, & unam voluntatem in Patre & Filio. Adde Lactantium tribuere Filio omnia Dei attributa: nam. cap. 12. ejusdem libri docet Filium Dei esse veritatem: cap. 16. dicit Christum professione esse Deum. lib. 6. cap. 25. ait ipsi verbo Sacrificari, quia Deus est: *Verbo verò Sacrificari oportet Deo; siquidem Deus Verbum est, ut ipse confessus est.* lib. 4. cap. 13. tradit Filium, ut in omnibus foret Patri similis, qui Pater est sine Patre & Matre, idcirco bis esse natum, ut ipse fietet *αὐτός*, atque *αὐτός*, hoc est sine Patre & Matre, nempe Deus sine Matre, & homo sine Patre. Cap. ult. ejusdem libri Arianos hæreticis annumerat: Cum enim Phryges, aut Novatiani, aut Valentiniiani, aut Marcionita, aut Anthropiani, aut Ariani, seu quilibet alii nominantur; Christiani esse desierunt ij, qui Christi nomine amisso, humana & externa vocabula induerunt. Sola igitur Catholica Ecclesia est quæ verum Dei cultum retinet; hic est fons veritatis; hoc est domicilium fidei; hoc Templum Dei, quòd si quis non intraverit, vel à quo si quis exiverit, à spe vite ac salutis æternæ alienus est. Vox, Ariani, in textum non irrepluit, ex Baronio ad an. 315. cum in novem pervetustis exemplaribus manuscryptis quibus Aldus ad editionem suam usus est, & in aliis duobus Bibliothecæ Vaticanæ legatur, ut & in omnibus editionibus, si excipiantur Thomasius, & Gazæus in notis ad Lactantium. Exortis Arianis Scripsit Lactantius; nam in præfatione institutionum, ob pacem Ecclesiæ red-ditam Constantino magno gratulatur fuso Licinio, scilicet an. 317. Arius autem an. 315. prodierat. Accedunt ex ipso quæ suprà ad probandam veritatem Catholicam congestimus.

Addemus 1. sæculo pro hæretico habitum esse Beryllum Bostrensis Ecclesiæ in Arabiâ Episcopum, quòd prædicasset Verbum non habuisse divinitatem, antequàm inter homines versaretur. A Conciliis, & Origene ab errore revocatus fuit ex Euseb. lib. 6. cap. 33. Hæreticis pariter annumerati

sunt Noëtus, Hermogenes, Sabellius, Paulus Samosatenus, & alii de quibus art. 1.^o qui omnes contra divinitatem Christi, & tres personas unum Deum pugnabant; quibuscum nec sensit Lactantius, nec laudati Patres; imò verò Nicænis Patribus certâ fidei professione præiverunt.

ARTICULUS QUARTUS.

Probatur Spiritûs Sancti Divinitas.

QUAM viam inivimus in probandâ Christi divinitate, eandem hîc sequemur. Argumenta varia tûm art. 2. tûm 3. pro Spiritûs Sancti divinitate attulimus: ubi enim probatum fuit art. 2. tres personas esse in Deo, quæ sint unus Deus; & Spiritum Sanctum esse tertiam ex illis personam; eo ipso Spiritum Sanctum Deum esse naturâ, nomine, adoratione, & professione jam evicimus. Novis tamen argumentis rem jam penè confectam absolvemus.

1. Deum esse nomine, & naturâ, tûm ex Scripturis apertis, tûm ex attributis divinis, quæ Spiritui Sancto competunt, probamus ex Act. 5. ubi Ananiam, qui non integrum venditi sui agri pretium, sed partem tantum detulerat, sic alloquitur S. Petrus v. 3. *Anania cur tentavit Satanâ cor tuum, mentiri te Spiritui Sancto, & fraudare de pretio agri. V. 4. Non es mentitus hominibus, sed Deo.* Ibi Spiritum Sanctum vocat Sanct. Petrus Deum, & Dei naturam humanæ naturæ oppositam ei tribuit: igitur Spiritus Sanctus ex Apostolorum sententiâ post Pentecostem pro Deo habebatur, & est habendus.

Reponunt Sociniani Græcè non haberi: *mentiri Spiritui Sancto; sed fallere Spiritum Sanctum*; & Spiritûs Sancti nomine intelligendos esse Apostolos, quos fallere tentaret; aut certè intelligendum esse accidens, seu divinam gratiam.

Verùm trlicantur adversarii; eadem enim est vis verborum, seu sit fallere, seu mentiri: quem enim fallere volunt homines, huic mentiuntur. Et verò peccaverat Ananias mentitus Spiritui Sancto, eum se posse fallere ratus; & ideo periculum fecerat, nûm posset fallere.

Neque nomine Spiritûs Sancti possunt intelligi Apostoli; quia immediata Dei est & hominum oppositio: *Non es mentitus hominibus, sed Deo.* Negat ergò Apostolus solis Apostolis mentitum fuisse, sed Deo, Spiritui scilicet Sancto: nam nullibi homines etiam Sancti, aut Apostoli Spiritu Sancto pleni, dicti sunt Spiritus Sanctus; & si per Spiritum Sanct. intelligerentur Petrus, & Apostoli, non dicendus fuisset Ananias mentitus Spiritui Sancto, sed Spiritibus Sanctis, nempe Apostolis. At repugnat oppositio Dei, & hominum, ut jam monuimus; & Petrus sibi, & Apostolis non tantum mentitum fuisse Ananiam dicit, sed Deo, & Spiritui Sancto.

Nec etiam dici potest Ananiam, & Saphiram homines tentasse; ten-

tarant enim Spiritum Sanctum, seu *Spiritum Domini*, art. 5. v. 9. Cul autem unquam in mentem venit blasphemiam, quæ est in Spiritum sanctum Math. 12. v. 31. non aliam esse à blasphemiam in homines; cum Math. 28. v. 19. jubeantur Apostoli in nomine Spiritus sancti, sicut & Patris, & Filii conferre baptismum? An juberentur in nomine suo baptismum conferre? sed & cum relatum legimus Spiritum S. descendisse in formam columbæ, & linguarum ignearum, & Apostolos locutos fuisse, prout Spiritus Sanctus dabat illis eloqui; an in seipsos ipsi descenderunt?

Sed neque etiam possunt adversarii, per Spiritum sanctum intelligere accidens, seu gratiam divinam; cum accidens non fallatur, & quæ hinc de Spiritu Sancto dicuntur, nequaquam convenire possint accidenti. 1. Cor. 3. v. 16. *Nescitis quia Templum Dei estis, & Spiritus Dei habitat in vobis: si quis autem Templum Dei violaverit, disperdet illum Deus: Templum enim Dei Sanctum est, quod estis vos.* Illius potro sumus Templum, qui habitat in nobis; & Deus est, cujus templa sumus; sed Spiritus Sanctus in nobis, ut in Templis commoratur: Ergo Spiritus Sanctus est Deus.

Hebr. 1, qui per Prophetas fuit locutus, Deus est: is est autem Spiritus Sanctus, Act. 27. v. 25. *Quia bene Spiritus Sanctus locutus est per Isaiam Prophetam ad patres nostros dicens, vade ad populum istum.* Item Luc. 1. v. 67. Spiritu Sancto repletus prophetat Zacharias. & 2. Petri 1. v. 21. *Spiritu Sancto inspirati locuti sunt sancti Dei homines.*

Pl. 77. v. 46. *Tentaverunt Deum; & sanctum Israël exacerbaverunt.* Et Pl. 94. v. 8. *hodie si vocem ejus audieritis, nolite obdurare corda vestra sicut in exacerbatione secundum diem temptationis in deserto; ubi tentaverunt me patres vestri, probaverunt, & viderunt opera mea.* Qui tentatus dicitur in deserto, verè Deus est Israël: sed ex Apost. Heb. 3. v. 7. Spiritus S. tentatus est, quapropter sicut dicit Spiritus Sanctus, si vocem ejus audieritis, nolite obdurare corda vestra, sicut in exacerbatione secundum diem temptationis in deserto, ubi tentaverunt me patres vestri, probaverunt & viderunt opera mea. Igitur Spiritus Sanctus ex Scripturis Deus est.

2. Spiritus Sanctus Deus unus est naturam cum Patre & Filio: Illi enim, ut Patri & Filio, tribuuntur perfectiones, quæ soli Deo conveniunt: ut quod in nobis habitat ut in Templo: nam qui se apud homines justos inhabitaturum per Prophetas pollicetur, Jer. 31. Deus verus est, & Israël Deus; is autem est Spiritus Sanctus, ut liquet ex his verbis 2. Cor. 6. v. 16. *Vos enim estis Templum Dei vivi, sicut dicit Deus: quoniam inhabitabo in illis, & inambulabo inter eos, & ero illorum Deus.*

Spiritui Sancto tribuitur scientia Deo propria: Nam Rom. 8. v. 27. dicitur scrutari corda. Joan. 116. v. 13. asseritur illum omnia scire, & esse Spiritum veritatis: cum autem venerit ille Spiritus veritatis, docebit vos omnem veritatem. 1. Joan. 5. v. 6. dicitur veritas ipsa, quoniam Spiritus veritas: ea novit, quæ sunt Dei: æquè ac Spiritus hominis novit quæ sunt hominis, 1. Cor. 2. v. 11. *Quis enim hominum scit quæ sunt hominis, nisi*

Spiritus hominis, qui in ipso est? Ita & que sunt Dei, nemo cognovit nisi Spiritus Dei.

Reponunt Sociniani Spiritum Sanctum se habere ad Deum Patrem, ut Spiritum hominis ad hominem; & proinde eum non distingui à Deo Patre, sicut nec Spiritum hominis ab homine; alioquin Apostoli comparatio nulla esset. Addunt Patrem à Christo Spiritum dici, Joan. 4.

Verum constat nomine Spiritus Sancti, Patrem nullibi conjunctim denominari. Allatæ art. 2. & hic astruendæ probationes satis superquæ Spiritum Sanctum à Patre secernunt: quod & apertè colligitur ex Joan. 15. v. 26. ubi Spiritus Sanctus à Patre dicitur procedere: At Pater à seipso non procedit. Idèò autem Patrem Spiritum Christus vocat, ut spiritualement cultum significet, & ostendat eum non circumscribi Templo Hierosolimitano. Neque 1. Cor. 2. Spiritum Dei Spiritui hominis æquat Apostolus: ibi enim vult tantum docere Spiritum Sanctum à Patre personam esse distinctam, & esse ex Patris substantiâ, utpotè qui sit in Patre, & quæ Dei sunt perscrutetur. Et certè si comparatio in omnibus postularetur, esset Dei pars Spiritus Sanctus, non secus ac hominis Spiritus pars est hominis. Ergò accommodatè ad inexistentiâ essentialem exprimendam adhibetur.

Spiritui Sancto tribuitur divina immensitas: Psalm. enim 138. v. 7. in loco definito non habitat; sed est ubique terrarum. Sap. 1. v. 7. *Spiritus Domini replevit orbem terrarum.* Joëlis 2. v. 28. *Effundam spiritum meum super omnem carnem:* quem locum S. Petrus Act. 2. v. 17. de Spiritus Sancti descensu interpretatur: & ibi additur v. 4. *Et repleti sunt omnes Spiritu Sancto.* Ità etiam Titi cap. 3. v. 6.

Tribuitur etiam Spiritui Sancto omnipotentia: nam creator est, Job. 26. v. 13. & cap. 33. v. 4. Item Ps. 32. v. 6. *Verbo Domini cæli firmati sunt, & spiritu oris ejus.* Hinc quæcumque præstant Pater, & Filius, præstat & Spiritus Sanctus: Apostolos enim mittit; à quibusdam locis revocat; eos regit; & Ecclesiæ præest: Act. quippè 13. v. 2. *Ministrantibus autem illis Domino, & jejunantibus, dixit illis Spiritus Sanctus: Segregate mihi Paulum, & Barnabam in opus ad quod assumpsi eos; tunc jejunantes & orantes, imponentesque eis manus, dimiserunt illos: & ipsi quidem missi à Spiritu Sancto, abierunt Seleuciam.* Et cap. 16. v. 6. de SS. Paulo & Timoth. *Transeuntes autem Phrygiam & Galatia regionem vetati sunt à Spiritu Sancto loqui Verbum Dei in Asia.* Cap. quoque 2. v. 28. *Attendite vobis, & universo gregi, in quo vos Spiritus Sanctus posuit Episcopos regere Ecclesiam Dei, quam acquisivit sanguine suo.* Pariter peccata dimittit Spiritus S. & sanctitatem confert æquè ac Pater, & Filius. Nam Joan. v. 22. *Accipite Spiritum Sanctum: quorum remiseritis peccata &c.* Rom. 1. v. 4. sanctificationis Spiritus dicitur; adoptionis verò, Rom. 5. v. 5. Charitas ipsa, Rom. 5. v. 5. *Charitas Dei diffusa est in cordibus nostris per Spiritum sanctum, qui datus est nobis.* Nos verò idcirco 1. Cor. 6. v. 11. dicimur abluti, sanctificati, justificati in nomine Christi, & in spiritu Dei. Et in ejus nomine idèò baptizamur, Joan. 3. v. 5. *Nisi quis re-*

natus fueris ex aquâ, & Spiritu sancto, non potest introire in Regnum Dei. Quod natum est ex carne, caro est; & quod natum est ex spiritu, spiritus est.

Sanctitatem autem, non secus ac Pater, & Filius infundit; eam largiendo, non verò accipiendo. Undè Tit. 3. u. 5. renovatio omnis Spiritui sancto tribuitur: *Secundum suam misericordiam salvos nos fecit, per lavacrum regenerationis & renovationis Spiritus sancti, quem effudit in nos abundè per Jesum Christum Salvatorem nostrum; ut justificati gratiâ ipsius, heredes simus secundum spem vitæ æternæ.* Quis autem filios Dei facere potest, & hæc quælibet præstare, nisi solus Deus?

Pariter interiùs nos edocet, ut Pater, & Filius: Joan. enim 16. v. 13. *Cum venerit spiritus veritatis, docebit vos omnem veritatem.* Item Luc. 12. v. 12. *Spiritus sanctus docebit vos in ipsâ horâ quid oporteat vos dicere.* Solus autem Deus est, qui docet interiùs, ex Isa. 54. v. 13. Joan. 6. v. 45. & 1. Joan. 2. v. 27. ubi Joannes hortatur fideles, ut maneant in unctione quam acciperunt: *Et non necesse habetis, inquit, ut aliquis doceat vos; sed sicut unctio ejus docet vos de omnibus, & verum est, & non est mendacium: & sicut docuit vos, manete in eo.*

Ut paucis cætera complectamur, nos liberos facit, 2. Cor. 3. v. 17. Sapientiam & loquendi facultatem largitur, Matth. 10. v. 19. & c. Marci 13. v. 11. Luc. 12. v. 12. & c. Joan. 12. v. 26. Act. 2. v. 4. 1. Cor. 2. v. 13. & cap. 12. v. 8. Miracula operatur, Matth. 12. v. 28. 1. Cor. 12. v. 4. Hinc observat S. Greg. Niss. orat. 3. de Oratione Dominicâ, Spiritum sanctum Deum esse, cum regnum Dei sit: nam ubi apud S. Math. habetur: *Adveniat regnum tuum*: legitur Luc. 11. *Adveniat Spiritus Sanctus.* Igitur habet Spiritus Sanctus quælibet essentialia Deo attributa.

Æqualitas quoque cum Patre, & Filio tribuitur Spiritui sancto; & idè ejus nomine pariter sanctitatem consequimur. Addi potest eum creaturis annumerari non posse; cum Deus sit, & dicatur sanctitas, unctio, & sigillum; nosque simus ejus templa, & sit nobis solacium, ut Filius: hinc Joan. 14. v. 16. *Et ego rogabo Patrem, & alium Paracletum dabit vobis, ut maneat vobiscum in æternum, Spiritum veritatis, quem mundus non potest accipere; quia non videt eum, nec scit eum: vos autem cognoscetis eum; quia apud vos manebit, & in vobis erit.*

Adoratio Deo propria, seu latria, Spiritui Sancto pariter ac Patri & Filio deferenda est: Nam Pl. 94. v. 6. *Venite adoremus, & procidamus, & ploremus ante Dominum, qui fecit nos: Quia ipse est Dominus Deus noster: Et nos populus pascuæ ejus, & oves manus ejus.* Hodie si vocem ejus audieritis, nolite obdurare corda vestra. Hortatur ibi David, interprete Apostolo Hebr. 3. v. 7. ad Spiritus sancti fidem, adorationem, & obsequium; in quibus præsertim positus est latriæ cultus. Quapropter, inquit Apostolus, sicut dicit Spiritus sanctus: *Hodie si vocem ejus audieritis, nolite obdurare corda vestra.* Igitur Spiritui sancto debetur latriæ cultus; ideoque non modò jubemur illum ut magistrum, Deum,

& Dominum audire, juxta illud Apocal. 2. v. 7. *Qui habet aurem, audias quid Spiritus dicat Ecclesie*; sed etiam eum ut omnium bonorum authorem invocare, 1. Co. 13. v. 13. & in eum credere, ut constat ex Apostolorum Symbolo, in quo in ipsum Spiritum sanctum, ut & in Patrem, & Filium, fides exprimitur. Hinc ex praxi Ecclesie in eum fidei professionem edere tenebatur adultus, priusquam juxta Math. 18. v. 19. in trium personarum nomine consecraretur.

Ultimò, ad Spiritus sancti divinitatis commendationem, ex sceleris in eum perpetrati gravitate, non levis momenti argumentum accedit. Nam nisi Spiritus sanctus esset cum Patre, & Filio Deus; undè in eum blasphemia, tam horrendum à Christo definiretur sacrilegium, ut nec in istà, nec in alterà vità condonetur? *Omnia*, inquit Christus Marc. 3. v. 28. & 29. *dimittentur filiis hominum peccata, & blasphemia, quibus blasphemaverint: qui autem blasphemaverit in Spiritum sanctum, non habebis remissionem in æternum, sed reus erit æterni delicti.* Et Math. v. 32. *Quicumque dixerit verbum contra Filium hominis, remittetur ei: qui autem dixerit contra Spiritum sanctum, non remittetur ei, neque in hoc seculo, neque in futuro.* An majorem divinitatis gradum, quàm Dei Filius, obtinet Spiritus sanctus? Absit: eadem enim est trium personarum divinitas, & unica. Ut quid igitur hæc, nisi ad Spiritus sancti divinitatem commendandam? Ananias, & Saphira inflicta mors, itemq; Simoni Mago comminationes intentatæ, sint exemplo.

Hæc singula Sociniani, interpretatione detortâ, penitus conantur eludere; & nomine Spiritus sancti posse intelligi contendunt Evangelium, quod 1. Cor. 2. v. 10. Deus nobis revelasse dicitur per Spiritum suum; & 2. Tim. 1. v. 10. manifestasse per illuminationem Christi: vel quòd etiam quæ à Deo revelantur, nos spirituales efficiant; vel quòd designet donum Dei, 2. Cor. 1. v. 22. dictum, *pignus in cordibus nostris.*

Sed quæstio non movetur quid nomine Spiritus sancti possit intelligi; sed quid designetur. Evangelium autem Spiritus sancti nomine designari, quis vel minimo æquitatis & religionis sensu, ex locis quæ obijciuntur, colligeret? Evangelii quippè revelatio Spiritui sancto tribuitur, ut causæ efficienti: nam ipse interius nos edocet: undè Apostolus subjungit: *Spiritus enim omnia scrutatur, etiam profunda Dei.* An autem Evangelium Dei profunda scrutatur? an novit? an revelat? an est in Deo? an Jesum ex mortuis, ut Spiritus sanctus Jesum suscitavit? an ab Evangelio revelatum est Paulo Evangelium, quod à Spiritu sancto prædicandum accepit? An Apostoli repleti sunt Evangelio, ut loquerentur Evangelium? an tunc tantum discere cœperunt Evangelium? an Evangelii cognitio linguarum donum illis contulit? an dona, quæ à Deo conferuntur, Spiritus sancti nomine possunt intelligi? Quis audivit hæc pro Spiritu sancto coli? Neque illa diffiteri possunt adversarii; cum in Deo esse Spiritum sanctum agnoscere teneantur.

Addunt Sociniani ex actionibus divinis, quæ Spiritui Sancto tribuuntur, non posse colligi eum esse personam divinam; quia aliis rebus pariter,

quæ personæ non sunt, actiones istæ tribuuntur: sic peccatum occidere dicitur Rom. 7. v. 11. Lex loqui Rom. 3. v. 19. Charitas omnia sperare, credere, sustinere, 1. Cor. 13. v. 7. Ventus spirare ubi vult, Joan. 3. v. 8. Sic Spiritui Sancto, seu virtuti Dei, opera divina tribuuntur.

Verùm quæ opponuntur, ut accidentia referuntur, non ut substantiæ; nec voluntas, nec deliberatio illis adscribuntur: Et si quandòque scriptura illis, quæ ad personam pertinent, videatur vindicare; de illis alibi propriè loquitur. De Spiritu autem Sancto semper, ut de personâ divinâ, sermonem habet, ut ex probationibus sit compertum: nec Spiritus Sanctus dici potest accidens; alioquin, cum sit in Deo, ex accidente Deus componeretur, & ex aliquo, quod Deus non esset. Ergò virtus Dei substantialis est, sed ita ut sit Dominus, & Deus 1. Cor. 12. v. 11. *Unus atque idem Spiritus dividens singulis prout vult: hæc autem omnia operatur unus Dominus.*

Deniquè actiones à suppositis proficiscuntur, non verò ab accidentibus: item sumus Templum Spiritus Sancti, non accidentis. Donum quidem Spiritus Sanctus est, sed notionale atque personale; quia scilicet procedit ut donabile; & quæ de eo dicuntur, non nisi personæ possunt convenire. Licet autem dari secundum mensuram & augeri dicatur; nihil inde colligi potest: quia hæc de donis ab eo collatis sunt intelligenda.

Probatur Spiritûs Sancti divinitas ex traditione.

Ex traditione Patrum eadem veritas pariter confirmatur; unum enim cum Patre, & Filio, Spiritum Sanctum esse Deum nomine, naturâ, adoratione, & professione, ante Nicænam Synodum professi sunt quotquot pro mysterio Trinitatis steterunt: doctrinam eorum art. 2. laudavimus. Addemus pauca.

S. Justinus in apol. ad Antoninum, cum Filio adoratum fuisse Spiritum Sanctum docet: *Filium*, inquit, & *Spiritum Propheticum colimus & adoramus, & Deum solum adoramus.* Et ibidem ait ipsum Spiritum sanctum, antequàm fierent quæ futura erant, per Prophetas pronuntiasse, & sicut personam distinctam adoratum fuisse in Ecclesiâ. Quod & repetit, ubi de Baptismi administratione: ait enim ablui baptisatum in nomine *Spiritûs sancti, qui per sacros vates prænuntiavit omnes res Christi.* Item in dialogo cum Triphon. scribit à Spiritu sancto in prophetiis Christum vocari Dominum virtutum.

Athenagoras in Apolog. Spiritum sanctum Patri, & Filio consubstantialem esse docet, ut qui Deus sit, à Deo emanet, ad Deum reflectatur instar radiorum Solis, & sit unus Deus cum Filio, & Patre. *Dominus enim creavit initium progressionis ejus ad opera sua. Quamquam & ipsum Spiritum sanctum agentem in illis, qui propheticos sermones fundunt, ita à Deo emanare, ad ipsamque reflecti dicimus, ut emissi à Sole radii reciprocant. Quis igitur non miretur nos, qui cum Patrem prædicamus, & Deum Filium, & Spiritum sanctum, ita ut unionis eorum non, & ordinis distinctionem exponamus, impios & sine Deo homines*
vacari &

vocari? Et addit: *Ut Deum asserimus, & Filium ipsius Verbum, & Spiritum sanctum.*

S. Irenæus locis suprâ laudatis art. 2. tradit ab æterno esse Spiritum sanctum, ubique præsentem seu immensum, & omnipotentem: sic enim habet lib. 4. cap. 53. *Qui ab initio in universis dispositionibus Dei affuit hominibus, & futura annuntiavit, & præsentia ostendit, & præterita enarrat.* Eodem lib. cap. 17. scribit Filium, & Spiritum sanctum, quæ ad Patrem pertinent exequi; iisque Angelos subijci; nec eorum ministerio egere: *Copiosum & inenarrabile ministerium; ministrat enim ei ad omnia sua progenies, & figuratio sua, idest, Filius, & Spiritus sanctus; Verbum, & sapientia, quibus serviunt & subiecti sunt omnes Angeli.* Et cap. 37. *Adest enim ei semper Verbum, & sapientia; Filius, & Spiritus sanctus, per quos, & in quibus omnia libere & sponte fecit; ad quos & loquitur, dicens: Faciamus hominem.* Vocat quoque Spiritum sapientiam, cujus æternitatem probat, & ostendit illum esse creatorem: *Quoniam autem, inquit, & sapientia, quæ est Spiritus, erat apud Deum ante omnem constitutionem, per Salomonem ait: Deus sapientia fundavit terram.* Cap. 66. ait homini spiritali semper esse eundem Deum, eumque nosse Verbum Dei semper extitisse, licet recens sui notitiam præbuerit: *Et semper eundem Spiritum Dei cognoscere, etiamsi in novissimis temporibus novè effusus est in nos, & à conditione mundi usque ad finem ipsum humanum genus.* Item omnem veritatem novisse illum docet, & Scripturarum divinarum esse authorem. Cap. 75. dicit Apostolum lac præbuisse Corinthiis, cum in iis parvulis adhuc non esset Spiritus sanctus, quem vocat vitæ escam: solus autem Deus esse potest esca vitæ, ut & vita: *Quibuscumque enim imponebant Apostoli manum, accipiebant Spiritum sanctum, qui est esca vitæ.* Lib. 5. cap. 7. scribit absque Spiritu sancto non perfici in nobis Dei imaginem, nec nos spiritales effici: quod fusiùs exponit cap. 9. ubi ait absque Spiritu sancto esse nos carnem, & sanguinem; nec absque eo haberi justitiam; *Quoniam igitur sine spiritu Dei salvari non possumus, adhortatur Apostolus nos per fidem, & castam conversationem conservare spiritum Dei, ut non sine participatione sancti Spiritus facti, amittamus regnum celorum.* Addit ibidem justos esse templa Spiritus sancti, qui ut Rex, & Dominus in ipsis versatur: *Illa enim, inquit, dominatur, & præest, & disponit &c. quemadmodum ipse velit.* Quæ omnia ad gratiam referri non possunt; sed necessario ad personam, quæ sit Deus. Hinc ita concludit: *Nolite errare, quoniam nisi verbum Dei inhabitaveris, & spiritus Patris fuerit in vobis; vanè autem, & prout evenit, conversati fueritis, quasi (hoc) tantum caro, & sanguis existentes, Regnum Dei possidere non poteritis.* Quæ singula nonnisi vero Deo, & proinde unico cum Patre, & Filio Deo, possunt competere.

S. Theophilus Antioch. lib. 2. ad Autol. superioribus hæc adjungit: *Docemur etenim, inquit, & instruimur à sancto Spiritu, qui locutus per Prophetas, jam olim omnia quæ mundo eventura essent, prædemonstra-*

vit. Præterea Spiritum S. sicut personam distinctam, & Scripturarum; & Prophetiæ authorem, cum superioribus Patribus adorandum censet.

S. Clemens Alex. suprâ citatis illud quoque adjicit lib. 1. pædag. nempe Spiritum sanctum esse immensum: *Et Spiritus sanctus unus, & ipse est ubique.*

Tertullianus locis suprâ laudatis addit. Lib. cont. Prax. cap. 12. Spiritum Sanctum esse tertiam personam, & in creatione adhæsisse Patri: ibidem cap. 25. docet tres, Patrem, Filium & Spiritum Sanctum unum esse. *Ita connexus Patris in Filio, & Filii in Paracleto, tres efficiunt coherentes, alterum ex altero, qui tres unum sint, non unus, quomodo dictum est: Ego & Pater unum sumus; ad substantiæ unitatem; non ad numeri singularitatem.* Et cap. 26. Sic habet: *sicut ergo sermo Dei non est ipse, cujus est; ita nec Spiritus; etsi Deus dictus est, non tamen ipse est, cujus est dictus: nulla res alicujus, ipsa est, cujus est.* Cap. 30. ait, *Christum effudisse Spiritum Sanctum, tertium numen divinitatis, & tertium nomen majestatis.* Et cap. 31. Judæis annumerat eos, qui unj Deo non adjungunt Filium & Spiritum Sanctum; & tradit unicum esse Deum cum Patre.

Origenes lib. 3. Periarchon. suprâ positus addit Spiritum Sanctum æternam esse sanctitatem, non verò sanctificari; & solam Trinitatis substantiam esse sanctam naturâ suâ: in fine cap. 5. sic habet: *Et Spiritui Sancto per quem cuncta sanctificantur, qui ab ipso Patre procedit, cui est gloria æterna in secula.* Lib. 7. in cap. 9. Ep. ad Rom. tradit eundem Spiritum Sanctum continere omnia, & replere omnem orbem terrarum; unamque esse Trinitatis naturam, & substantiam: Itaque quoque Homil. 5. in Josue.

S. Greg. Thaumaturgus superioribus adjicit in confessione fidei jam adductâ, Spiritum Sanctum ex Deo substantiam habere; super omnia & in omnibus esse Deum; nihil factum esse in Trinitate; invertibilem & immutabilem esse Trinitatem.

S. S. Cornelius, Cyprianus, & Firmil. pro Trinitate art. 2. adducti sunt. Nihil præclarius paucis illis S. Cypr. Ep. ad Jubaianum verbis, ubi ait neminem esse posse Dei creatoris Templum, nec Spiritus sancti; nisi Christum ut Deum colat: *Nam cum tres unum sint, quomodo Spiritus Sanctus placatus esse ei potest, qui aut Patris, aut Filii inimicus est?*

Ex Novatiano addimus tantum illum docere, cap. 29. in Spiritum fidem exigi, & esse exigendam.

Adducti quoque sunt SS. Dionysius Romanus & Alexandrinus; & ex posteriori laudamus tum locum ex respons. ad propositiones Pauli Samosat. resp. ad quæst. 6. desumptum. *Non enim, inquit, impunè feret is, qui adversus benignum Spiritum Sanctum blasphemus est; Spiritus autem est Deus: tum & alium ex epistolâ, quam ad eundem Samosat. scripsit excerptum, ubi dicit tam Christum, quam Spiritum sanctum, Deum esse perinde ac Patrem; & quidem pari cum illo dignitate: Qui, inquit, ex Deo natus est ante secula, idem novissimis temporibus ex matre ortus est.*

propterea Deicida sunt Judæi; quoniam Dominum gloria crucifixerunt: nisi enim esset Christus ipse existens Deus Verbum, non potuisset non esse peccato obnoxium: nullus enim non obnoxius est peccato, nisi solus Christus, & Pater Christi, & sanctus Spiritus.

Argumentum illud ex traditione scriptâ urget S. Athan. Ep. 2. ad Serapionem, ubi docet fidem istam à Christo fuisse traditam, ab Apostolis prædicatam, & à Patribus servatam.

Argumentum ex totius Ecclesiæ consensione, necnon professione, maxime illustratur ex eo quodd, cum prodierunt qui sancti Spiritus divinitatem impugnarunt, statim pro hæreticis habiti, omnibus Catholicis exosi fuerint; nec aliâ ratione potuerint esse communionis Catholicæ participes, quàm ejusmodi ejuratâ hæresi. Sic an. 362. Concilium Alexandrinum ex Episcopis Italiæ, Arabiæ, Ægypti &c. congregatum, ubi constituit Ep. ad Antiochenos, omnia charitatis officia erga eos, qui ab Arianis ad Ecclesiam Catholicam transirent, esse præstanda; eâ lege admitti voluit, ut Nicænæ synodi, simul & Spiritus sancti fidem profiterentur: *Nihilque, inquit, amplius ab illis exigatis, quàm ut execrentur Arianorum hæresim; consiteanturque sanctorum Patrum in Nicænâ synodo fidem; execrentur item eos, qui dicunt Spiritum sanctum esse creaturam, & divisum à substantiâ Christi.* Huic synodo præerat S. Athan. Macedoniani tunc Spiritus sancti divinitatem apertè impugnabant. In eadem firmandâ fide unanimiter steterunt subsequentes synodi; ut ea quæ habita est in Illyrico sub Imperat. Valentiniano, Valente, & Gratiano, cui interfuit S. Amb: Deindè Romana sub Damaso, quæ, sicut & Illyrica, eam fidem ad Orientales transmissit: Et tandem Concilium œcumenicum secundum, quod hanc hæresim an. 381. proscripsit. Priusquam autem habita fuisset illa synodus, exigebatur fides in divinitatem Spiritus sancti ab iis, qui omnem hæreseos suspensionem diluere volebant, ut jam vidimus. Hanc exactam ab Antiochenis statuente Concilio Alex. exegit quoquè ab Eustathio Sebasteno S. Bas. Ep. 78. Cæterum, ut docet S. Greg. Naz. orat. 52. inter hæreticos recensebantur, qui Spiritus sancti divinitati non assentiebantur: Sicut autem Eustathii Sebasteni communionem non complexus est S. Basil. nisi postquàm Catholicæ in Sancti Spiritus divinitatem professioni subscripsit: ita etiam nec Paulinum Antiochenum excepit S. Epiphanius, ut videre est lib. 3. tom. 2. hæres. 77. Undè ante & post Conc. Oecumenicum eadem fidei professio, scilicet Spiritus sancti divinitatis, in Ecclesiâ viguit.

OPP. 1. Spiritus sanctus creatus est, Amos 4. v. 13. ubi secundum 70. Interpret. legitur de Deo: *Qui firmat tonitru, & creat spiritum.* Item Joan. 1. dicitur factus à Filio, *per quem omnia facta sunt.* Nec est etiam æternus: nam Joan. 7. v. 39. *Nondum enim erat spiritus datus, quia Jesus nondum erat glorificatus.* Et Math. 3. v. 11. annumeratur creaturis, igni scilicet: *Ipse vos baptisabit in Spiritu sancto, & igni:* ideoquè non est Deus.

R. ad primum locum, non de Spiritu sancto, sed de vento agi

Amos 4. ità versio Latina: *Formans montes, & creans ventum*: quænam admodum legunt SS. Hieron. & Theod. Sed etiamsi ibi ageretur de Spiritu sancto, non sequeretur eum creaturam esse, ut, cum dicitur Judic. 11. v. 29. *Factus est super eum spiritus Domini*: hæc Spiritus sancti manifestationem significant, non creationem.

R. ad secundum, omnia quidem à Verbo creata esse; sed iis propterea non esse annumerandum Spiritum sanctum; quia pari jure inter res creatas Pater referretur: sic respondent SS. Basil. lib. 3. cont. Eunom. Greg. Naz. orat. 37. Ambros. lib. 36. contra Maxim. cap. 17.

R. ad tertium, non agi quoque Joan. 7. de Spiritu sancto; sed de dono ipsius Spiritus sancti, nondum quidem impertito, sed die Pentecostes dando.

R. ad quartum Matth. 3. idè ignem Spiritui sancto adjungi, ut designentur Spiritus sancti operationes & dona, quæ nobis præstat & confert; non verò quasi sint generis ejusdem. Quis enim creatori creaturam adæquarit? Hinc licet Exod. 14. v. 31. Moyses Deo, & Act. 15. v. 28. Spiritui sancto adjungantur Apostoli; non proindè illi adæquantur.

INSTR. Vel genitus est Spiritus sanctus, vel ingenuitus: si ingenuitus; ergò est Pater; aut certè erunt duæ personæ absque principio; si genitus; ergò Filius: si aliquid aliud; ergò creatura. Deindè si Spiritus sanctus ab aliquo procedat; aut à Patre; aut à Filio: si à Patre; Filius, & Spiritus sanctus erunt fratres: si à Filio; Spiritus sanctus Patris erit nepos.

Rt. 1. S. Basil. Hom. 17. contra Sabellianos, fidei constanter esse ad hærendum; & falsum esse omnia referenda, aut ad ingenuitum, aut ad genitum, aut ad rem creatam; cum Spiritus sanctus non sit ex eo eorum genere; ut qui à Patre per Filium procedat.

Rt. 2. S. Gregor. Naz. orat. 37. non aliam nobis traditam esse rationem, quàm Filium à Patre distinguamus, quàm quæ ex Filii ratione petitur; sed idè eadem regulam metiendam esse Spiritus sancti processionem; nec ideas, aut conceptus ex carne petitos, ad divinitatis naturam explicandam esse transferendos: alioquin & varium sexum in Deo inducemus. *Verum*, inquit, *manifestationis, ut ità dicam, mutuaque illorum differentia diversa quoque ipsi nomina procuravit*: Patris scilicet, qui generat; Filii, qui generatur; & Spiritus sancti, qui procedit. Addit alium esse procedendi modum, qui triplici specie ab hæreticis proposita non includitur; & de hoc sermonem habere Joan. cap. 15. dum de Spiritu sancto ait: *Qui à Patre procedit*.

R. 3. Spiritum sanctum, licet per generationem non procedat, ut Filius; eandem tamen habere cum Filio naturam: plurima enim ejusdem naturæ etiam in creatis occurrunt, quæ variam sortiuntur originem, ut in Adamo, qui per creationem; in Evâ, quæ per educationem ex Adami latere; & in Setho, qui per generationem, in lucem prodierunt omnes ejusdem naturæ participes. Nec Spiritui sancto deest aliquid, licet Filius non sit; quia Deus est; sicut nihil deest Filio, licet Pater non sit: alio-

Quin & Patri deest aliquid, nempe quòd Filii rationem non obtineat.

Sed, inquiunt, cujus generis est processio hæc? At quæ scimus? Quæ temeritas, velle animo complecti quæ in Deo maxime sunt abstrusa? cum ne intelligere quidem possimus quæ nobis magis obvia sunt. Nihil enim in naturâ occurrere deprehendimus, quod ad personatum divinarum rationem accedat: & pudendum penitus, indignumque est de divinis judicandi, & censendi rationem ex creatis rebus ducere.

O P P. 2. Spiritus sanctus non novit Patrem, ex Math. 11. v. 27. *Nemo novit Patrem, nisi Filius*: ergò Spiritus sanctus, sicut extræ res creatæ, excluditur.

R. Spiritum sanctum ibi non excludi; cum nihil non sit Spiritui S. apertum: nam *omnia scrutatur, etiam profunda Dei*, 1. Cor. 2. v. 10. Quis igitur, nisi impius, negare poterit à Spiritu sancto Patrem & Filium cognosci? Et verò quemadmodum, ubi Apostolus asserit, *neminem ea que Dei sunt, nosse, nisi Spiritum sanctum*; propter particulam, *nisi*, Filium ipsum à cognitione Patris non excludit: sic etiam cum ait Christus neminem nosse Patrem, nisi Filium; nemo sanæ mentis Spiritum sanctum ab ejus scientiæ communione secernet.

I N S T. Spiritus sanctus non est Deus; cum postulet, obsequatur, contristetur: Rom. 8. v. 26. *Similiter autem & Spiritus adjuvat infirmitatem nostram; nam quid oremus sicut oportet, nescimus: sed ipse Spiritus postulat pro nobis gemitibus inenarrabilibus*: & Ephes. 4. v. 30. dicitur contristari.

R. ibi agi de gratiâ interpellandi & gemendi, quam confert Spiritus sanctus, infundendo ejusmodi affectus: Matth. enim 10. v. 20. *Non enim vos estis, qui loquimini; sed Spiritus Patris vestri, qui loquitur in vobis*. Contristari etiam dici potest figuratè; sicut & Deum irasci, & pœnitere dicimus.

O P P. 3. Spiritus sanctus non habet naturam fœcundam, ut Filius: ergò non est Deus, ut Filius.

R. Spiritum sanctum non habere naturam fœcundam notionaliter; sed habere fœcundam absolutè; quia eandem habet divinitatem, & perfectionem, (pirationem videlicet passivam, quâ paternitati, & filiationi æquivalet.

O P P. 4. Nullibi describitur debita Spiritui sancto adoratio; nec ulli defertur; nec ad eum preces diriguntur.

R. 1. cum S. Greg. Naz. orat. 37. traditione non scriptâ nobis constare de adoratione Spiritui sancto debitâ.

R. 2. Spiritum sanctum cum esse, in quo Deum adoramus, & per quem accedimus ad eum rogaturi. Insuper, qui uni personæ adorationem exhibet, aliis quoque eam defert, cum sint unus Deus. Quod autem Ecclesiæ preces ad Spiritum sanctum non dirigantur, nihil inde sequitur: ex veteri enim Ecclesiæ disciplinâ ad Patrem, ut ad Trinitatis principium, preces referebantur: quod & statutum fuit in tertiâ Synodo Carthag. can. 23. Itâ instituti videmur exemplo veterum, qui semper

ad Patrem omnia referebant. Plurimæ etiam preces ad Spiritum sanctum nunc temporis diriguntur, ut *Veni sancte Spiritus: Veni creator Spiritus* &c.

O P P. ult. ex S. Irenæo lib. 4. cap. 17. & 37. & ex Tatiano in orat. contra Græcos: Spiritus sanctus est Christi, & Dei minister; & ex Novatiano cap. 24. de Trin. *Minor est Christo.*

R. Spiritum sanctum originis ratione posse Christi ministrum dici; & illo minorem eo sensu, quo Dei Filium Patre minorem dixere plures Patres suprâ laudati. Undè Novat. cap. 31. sic loquitur: *Aliquo pacto antecedit necesse est eum qui habet originem, ille qui originem nescit; simul ut hic minor sit, dum in illo esse se scit habens originem, quia nescitur.*

I N S T. Veteres de Spiritûs sancti divinitate silent; quod & fatetur S. Hieron. epist. ad Pammach. nec nomine Dei donatur in Concilio primo Constantinop. quæ vulgaris erat Macedonianorum objectio, qui Spiritum sanctum peregrinum Deum appellare non dubitabant.

R. satis nobis esse, quod apud antiquos occurrant attributa divina Spiritui sancto vindicata, & in eum æquæ ac in Patrem & Filium fides exigatur. Quando adversus Ethnicos pugnabatur, mysteriorum expositionem uberrimam non tradebant veteres; sed quod disputatio trahebat, illuc se conferebant. Præterquam quod antiquorum omnia scripta non fuerunt ad posteros transmissa: probat tamen S. Basil. lib. de Spiritu sancto, plurima nos per traditionem habere de Spiritûs sancti divinitate, nihilque certius proponi. Conc. Constantinop. primum, ad Macedonianorum doctrinam dijudicandam convocatum, sancivit Spiritum sanctum tertiam Trinitatis personam, Deum esse, ut in quem sit credendum; ut cui sit adoratio deferenda; ut qui cum & Patre & Filio sit glorificandus: quæ singula soli Deo conveniunt.

Q U Æ S T I O T E R T I A.

De variis vocabulis, quæ ab antiquis & recentioribus ad illustrandum Trinitatis Mysterium fuerint usurpata.

A R T I C U L U S P R I M U S.

Quid de illis sentiendum sit?

A D varia, quibus istius Mystéri difficultates exponerentur, excogitanda vocabula, Patres antiquos, tum Orientales, tum Latinos, variæ compulerunt hæreses; sed, ut observat S. Ambrosius lib. de dignitate hu-

manz conditionis cap. 2. ad explicandam Patris, & Filii, & Spiritûs sancti naturam, quibuscumque verbis utamur, nihil aliud per hæc, quàm nostri sermonis significamus inopiam; *ut posè pauperes sensu, pauperiores verbis.* Hinc plura ex SS. Patribus monita att. ult. quæst. 1. retulimus.

Ex voces sunt Trinitas, essentia, natura, substantia, existentia, consubstantialis, similis in substantiâ, persona, subsistentia, processio, relatio, circumincessio, quibus, quid tribus personis commune, quid verò singulare sit, exprimitur. Patris verò, & Filii, & Spiritus sancti nomina in Scripturis traduntur. Singulis personis singula etiam vocabula tribuuntur. De quibus omnibus omnibus erit agendum, & paucis.

Ità invaluit Trinitatis vocabuli usus apud antiquos & recentiores, ut temerarium penitus foret illius usurpationem improbare: nam præter Tert. lib. cont. Prax. S. Cyp. Ep. 73. S. Athan. Ep. 1. ad Serapionem, SS. Epiph. Hieron. & Aug. eo pleraque Concilia, ut Chalced. &c. usa sunt. Idoneum est illud maximè ad personarum numerum simul, & unitatis essentiam exprimendam.

Quæ. 1. utrum dici possit, Divinitas est Trinitas: quæ propositio damnatur can. 2. conc. 1. Braccarensis.

R. hanc propositionem de reali essentia divinæ cum personis divinis identitate intellectam, à SS. Patribus usurpari sapius, ut à S. Athan. epist. 1. ad Serap. ubi sic habet: *tota Trinitas, unus Deus est*: à S. Epiph. hær. 74. ubi ità scribit: *ea sancta Trinitas appellatur, in quâ tria sunt; sed una trium consensio; singularis divinitas*: Item à S. Aug. l. 5. de Trin. cap. 8. l. de fide & symb. cap. 9. & à Toletanâ synodo 11. in professione fidei. Attamen à Braccarensis patribus merito fuit hæc propositio improbat, sensu nempe Priscillianii Sabellianam hæresim in Hispaniâ renovantis.

Non æquè vocabulis, Ternario, Ternione, Triplicitate, Triformitate, & Ternitate uti deceret; quòd hæc nomina quid à Trinitate alienum inferant, nempe trium rerum substantialiter distinctarum numerum & compositionem: Ideòque nomen triplex à S. Aug. lib. 6. de Trin. cap. 7. & 8. rejicitur. Improbatur quoque Triformitatis nomen à S. Aug. epist. 177. *quòd una in Deo forma sit*, nempe divinitas. Nec Deus etiam dicendus est ternus; distributionem enim importare videtur hoc nomen, sexque Deos inducere: Non enim dicuntur bini, nisi sint quatuor, nec terni nisi fuerint sex. Aliud de Trino est sentiendum; vocabulum enim illud essentia unitatem designat.

Q. 2. quid per essentiam, seu naturam, & hypostasim significetur?

R. vocabula illa *essentia*, seu essentia, quandòque pro ipsâ personâ fuisse usurpata, seu pro hypostasi, ut à S. Ignat. epist. ad Magnesianos; à Picro Mart. & Presb. &, ex Photio cod. 119. Pamphili Martyris præceptore; & demùm à S. Greg. Niss. lib. 12. adversus Eunom. Utrumque vocabulum confuderunt S. Dionys. Rom. apud S. Athan. lib. de decretis Synodi Nicænæ; Nicæni Patres in expositione fidei, & Sardienfes in epist. Synodicâ apud Theod. lib. 2. c. 8. Ità quoque plerique alii, ut ipse S. Athan. lib. de Synodis, & alibi; Basil. Ancyranus apud S.

Athan. in eodem libro; S. Epiph. hæres. 69. S. Cyrill. Hierosol. Catechesi 6. S. Greg. Naz. orat. 34. & S. Hieron. epist. ad Damasum, ubi de illius vocabuli significatione differens, idem esse essentiam & hypostasim, seu ὑπόστασις & οὐσία demonstrat: undè tres hypostases dicere timuit. Sufficiat, inquit, nobis dicere unam substantiam, & tres personas; taceantur tres hypostases, si placet, & una teneatur.

Distinxerunt verò utrumque nomen Conc. primum Constant. in epistola Synodicâ; Chalcedon. in fidei expositione act. 5. Constant. 3. act. 4. & 18. S. Basil. epist. 43. S. Gregor. Naz. orat. 21. item & cæteri. Eo autem sensu sumplerunt οὐσίαν seu essentiam, ut generale quid & commune designaret; ὑπόστασιν verò, ut aliquid singulare, quo res sit individua substantia: & hic est usus Ecclesiasticâ consuetudine receptus; quia nostra loquendi consuetudo jam obtinuit, inquit S. Augustin. lib. 5. de Trin. cap. 9. ut hoc intelligatur, cum dicimus essentiam, quod intelligitur, cum dicimus substantiam; non audemus dicere unam essentiam, tres substantias; sed unam essentiam, vel substantiam; tres autem personas.

Varia quoque fuit usurpatio vocis φύσις, seu natura. Quidam autem non ita idoneam illam, ut vocem οὐσία, existimarunt, ut S. Greg. Naz. orat. 51. Eam pro hypostasi S. Cyrill. Alex. cont. Nestorium usurpavit, ut & in epist. ad Successum; undè factum est, ut scripserit unam esse Dei Verbi incarnatam naturam.

Nomina personæ & substantiæ idem sunt apud Latinos, quod ὑπόστασις, & οὐσιότης apud Græcos. Substantiæ nomen nonnisi abusivè de Deo posse dici censuit S. August. lib. 7. de Trin. cap. 5. quod nomen istud à substando accidentibus dictum videatur: nomen verò hypostasis plerumque sumitur pro basi, seu rectum fundamento, ut 1. ad Cor. cap. 9. v. 4. Hebr. 1. v. 3. & 3. v. 14. item à 70. Interpretibus Psalm. 38. & Sap. 16.

De voce οὐσιότης seu Consubstantialis.

Qr. 1. num antiquum sit nomen, Consubstantiale, seu οὐσιότης? & num à Nicænis Patribus fuerit adinventum?

Rt. S. Athan. lib. de decretis Nic. Synodi, & in lib. de sentent. S. Dionys. Alex. nomen οὐσιότης ab antiquis usurpatum fuisse longè ante Synodum Nicænam, ut à Theognosto erudito scriptore, & ab utroque Dionys. Romano & Alex. Cum enim S. Dionysius Alex. incusaretur, quasi Filium velut Patris opus traduxisset, simulque fuisset professus cum Patri non esse consubstantialem; ex Synodo Romanâ Latinorum sententiam transmisit S. Dionys. Rom. ad S. Dionys. Alex. qui à suspitione pravâ fidem suam liberavit, ut exscripsimus. Et proinde S. Dionys. Alex. cum Aegyptiis Libyæ, & Pentapolis Episcopis, & S. Dionys. Roman. cum suâ Romanâ Synodo, Consubstantialis professionem exigendum esse conveniebant. Invaluerat igitur prœculdubio apud antiquos, & Consubstantialis fides, & vocabuli Consubstantialis usus.

Eandem

Eandem antiquam illius vocabuli usurpationem lib. 1. Hist. cap. 8. probat Theodoretus tùm autoritate ejusdem S. Ath. & Ægypti Episcoporum. tùm & Eusebii Cæsariensis consensu: hæc sunt S. Ath. & 70 Ægypti & Lybia Episcoporum verba in epist. ad Africanos: *Siquidem præfati Episcopi abhinc annis propè centum & triginta, tùm qui Roma, tùm qui in nostrâ civitate pontificatum gessere, accusaverunt eos, qui Filium creaturam dicerent, aut qui negarent eum consubstantialem Patri: neque ejus rei ignarus Eusebius Episcopus Cæsarea, qui quum prius suffragaretur Arianicæ sectæ, postea tamen Concilio Nicæno subscripsit.* Utuntur ergò S. Ath. & 70. Episcopi auctoritate tùm veterum Episcoporum, ubi de S. Dionysii Alex. sententiâ fuit actum; tùm & Eusebii Cæsar. qui de illius vocabuli antiquitate in suâ ad Cæsareenses epistolâ itâ differit apud eundem Theodor. lib. 1. cap. 12. *Quod quidem sic expositum rectum videbatur assensione approbari: nam nonnullos veteres Episcopos scriptores, viros sanè disertos & illustres in Patris, & Filii divinitate explicandâ, hoc verbo consubstantiali usos fuisse cognovimus.* Addimus ex Synodo Parisiorum in litteris ad Episcopos Orientales à S. Hilario relatis, Consubstantiale verbum in Gallicanâ Ecclesiâ viguisse.

Qr. 2. num explicando Trinitatis Mysterio idonea illa sit vox *Consubstantialis*, seu *ὁμοούσιος*? & num à Conc. Nic. rectè & appositè fuerit Fidei Symbolo inserta? Ab eâ voce, ut quâ confodereur Arianæ hæresis, abhorrebant Ariani: idè Nicænæ Synodi conabantur elevare auctoritatem, quòd tam peregrinam vocem adhibuisset: nec diffitebantur quandòque profiteri se nonnisi de verbo illo contendere, quamvis penitus à Catholicis dissentirent. Episcopi alii Nicænæ Fidei vindices eruditi & constantes, inter quos eminebat Basil. Ancyranus, adversus vocabulum illud insurrexerunt acriter, rejiciendumque contestati sunt diutius, ut quod à Conc. Antiocheno fuisset reprobatum. Et sanè ex illis Episcopis nonnulli tanto æstu vocabulum illud insectati fuerunt, ut factioni Arianæ adversus sinceram fidei defensores adhæserint sæpiùs.

R. idoneam maximè esse illam vocem ad explicandam veram Trinitatis fidem.

Prob. 1. ex ipsâmet Arianorum sententiâ, qui vocabulo illo fidem Catholicam de Filii unâ cum Patre divinitate palàm significari censuerunt: & idè illius vocabuli sciendi occasionem præbuerunt, sicuti refert S. Athan. lib. de decretis Nic. Synodi. In has verborum formulas, Deum de Deo, Filium Patri per omnia similem, & immutabilem, Arianæ factionis Episcopi non ægrè consentiebant; à nomine verò *Consubstantialis* abhorrebant, utpotè quod eorum effugiis locum non relinqueret: *Omnes eorum argutias*, inquit ipse S. Athan. lib. de Synodis Arim. & Seleuc. *quibus simpliciores fallunt, excludit.* Cerè cum omnia queant facia lenociniisque sophismatum adulterare, & pro libidine mutare; hanc solam vocem adaperientem ipsorum hæresim reformidant, quam Patres pro munimento, & arce contra illorum impias commentationes inscripta retulerunt. Addit verbum illud ab Episcopis Nicænis & Arimi-

nenſibus probatum fuiſſe. Demonſtrat inſuper hoc verbo fidem contineri Catholicam, & Arianam hæreſim penitus convelli: non poſſe ſincerâ mente Filium exiſtimari ex Patre prodire, quin ut Catholicum admittatur illud nomen: hoc verbo uſos eſſe Nic. Patres, ut omnis tolleretur dubii occaſio; & ne Filio tribueretur ex Patre origo, quæ aliis creaturis competit: & tandem ſecum Arianos non conſentire, utporè cum ex illis quidam verbi iſtius uſum Nicææ probaſſent. Indicat adhuc Patres Nicææ Synodi, cognitâ perversâ Arianorum interpretatione, de verbis iſtis, *ex Deo eſſe*, quæ itâ detorquebant, ut designaretur unica perſona, quæ Deus eſſet; definiſſe ex Patris eſſentiâ Verbum eſſe: quia autem iſtis vocabulis etiamnum abutebantur Ariani; ideò Patres verbum *Conſubſtantiale* ad amovendas omnes eorum tergiverſationes inſerviſſe. Sic quoque S. Ambr. lib. de Filii divinitate cap. 4. ubi de Arianis ſic habet: *Cum viderunt ſe in hoc verbo concludi, nullam omninò mentionem huius fidei voluerunt.* Et libro 4. de fide cap. 7. notat illi voci inſtituendæ præbuiſſe occaſionem Euſebium Nicomediensẽ, factionis Arianæ principem, qui ſic mentem ſuam explicarat in epiſt. quâdam: *Nam quid eſt aliud, inquit, cur quæſionem Patri nolint Filium dici, niſi quia nolunt verum Dei Filium conſiteri? Sicut author ipſorum Euſeb. Nicomed. epiſt. ſua prodidit dicens: ſi verum Dei Filium & increatum dicimus, cum Patre incipimus conſiteri. Hac cum lecta eſſet epiſtola in Concilio Nicæano, hoc verbum in tractatu fidei poſuerunt Patres, quod id viderunt adverſariis eſſe formidini, ut tanquam evaginato ab ipſis gladio, ipſorum nefanda caput hæreſeos amputarent.*

2. Hæc fuit in Concilio Nic. Euſebii Cæſar. ſententia, obſcuram quidem hanc eſſe vocem; Catholicam tamen fidem continere, & in uſu fuiſſe apud antiquos: ſic in epiſt. ad Cæſar. quam Theodoretus refert lib. 1. hiſt. cap. 12. ubi ait ſe in Nic. Symboli fide fuiſſe baptiſatum, & conſtitutum Sacerdotem: vocem *Conſubſtantialis* non eſſe corporaliter intelligendam, ita ut Dei ſubſtantia divideretur: poſtulaſſe ſe vocis illius ſenſum; ac Patres reſpondiſſe illam vocem eadem exprimere, ac iſtas, *ex Patre eſſe, non tamen Patris partem eſſe*: hoc verbo denotari Filium eſſe ex Patris ſubſtantiâ, non per mutationem quamdam; cum Patris ſubſtantia mutationi non ſit obnoxia: nullâ item ſimilitudine cum rebus creatis poſſe conferri; ſed in omnibus Patrem referre, & ex ejus ſubſtantiâ eſſe genitum, & veteres illud uſurpaſſe in Patris & Filii divinitate explicandâ, eoſque fuiſſe diſertos & illuſtres.

3. Sic Patres Ariminenſes cenſuerunt, teſte ipſo S. Athanaſio in lib. de Synodis Arim. & Seleuc. Sic etiam cenſuit S. Baſil. epiſt. 141. ubi ſcribit Filium neque eſſe propriè ſimilem Patri, neque diſſimilem; cum ſimile & diſſimile nonniſi de qualitatibus dicerentur: Dei autem ſubſtantiam qualitatibus non ſubjacere. Addit per quæſionem identitatem proferri, & proindè veram fieri profeſſionem fidei. Idem etiam docent SS. Greg. Naz. & Niſſ. & Epiphan. tùm lib. 2. tomo 2. tùm & lib. Anacoratus, ubi nomen illud, ut fidei vinculum pluribus extollit, quo &

corum qui solam Filii adoptivi rationem Verbo tribuebant, simul & Sabellii, qui unicam personam admittebat, destrueretur hæresis.

4. Miretur nemo Sanctorum Patrum pro *ὁμοιότητι* vindicando constantiam. Ab Arianæ factionis hominibus unica offensionis ratio dicebatur hæc vocula. Sed numquid non ut oppressâ voce fides opprimeretur? An erant audiendi, ut habet S. Athan. lib. de decretis Nic. Synodi, qui lite ceciderant, & Judicium suorum in exprimendo contra novitatem Arianam iudicio carpebant solertiam? In propatulo erat non tam vocabulo, quàm Fidei Nic. illos Arianæ doctrinæ defensores subdolos insidias moliri: fiet, inquit, animorum consensus, si vel solum illud vocabulum removeatur. Sed erat fidei tessera; nec talem unquam patietur Fidei Catholicæ integritas, Symbolo Catholico fieri injuriam, vel ullum Catholico dogmati detrimentum inferri. Familiare est animis hæreticis, etiamsi graviter à se invicem dissentiant; in dogmatibus, aut in dogmatum expositionibus conciliationis vias specie tenus hinc & inde conquire, ut conjunctis viribus contra Ecclesiam Catholicam animosius deserviant. Abhorret sinè, & abhorrebit semper ab ejusmodi conciliationum rationibus Ecclesia mater, quam regit, & ad seculorum consummationem reget Dei spiritus. Quantâ igitur Lude digni SS. Athanas. Hilar. & alii, qui pro verbi illius defensione tam constanti animo steterunt. Nicænæ formulæ vindicibus gravissimæ persecutiones, exilia, tormenta, & mortem ipsam intulerunt Ariani; nec tamen à decretis illius Synodi recesserunt unquam. Horum exemplum secutus est S. Basil qui, ex S. Greg. Niss. lib. 1. contra Eunom. licet Valentis Imper. Præfatus, ipsi nihil non grave minitatus esset, ut ad verbum *ὁμοιότητι* fidei formulæ tollendum induceretur; nihilominus intrepidè reluctatus est.

Opponebant etiam Verbum illud in Scripturis non extare, nec proinde admittendum.

R. 1. S. Athan. lib. de synodis Arim. & Seleuc. *Nihil id referre, si quis voces in Scripturâ non repertas usurpet, quandiu pias sententias complectitur: contra hæreticus, tametsi voces suas ex sacris litteris mutuetur, nihilominus suspectus animoque corruptus audiet à Spiritu sancto: quare tu enarras justificationes meas &c.* Cum autem Verbum illud Bas. Ancyr. cum aliis Catholicè sentientibus, qui vocabulo *ὁμοιότητι*, remoto verbum *ὁμοιούσιον* non adhibebant, impugnaret; câ ratione respondit S. Hil. lib. de Syn. *Quod non accipiendum idcirco sit, dicitis, quia nusquam scriptum reperiretur, quod à vobis dictum satis miror: si enim homousion propter novitatem verbi repudiandum sit: vereor ne homousion periclitetur, quia nusquam scriptum reperitur: sed hinc non calumnior; malo enim aliquid novum commemorasse, quàm impiè respuisse. Prætermittâ itaque quæstione novitatis, ne in his qui dem resideret quæstio, quæ communi omnium nostrum iudicio damnatur.*

R. 2. S. Athan. non esse cur vocabuli usum Nicanis Patribus vitio verterent Arianij, cum & ipsi formulis suis recentibus ista verba, quæ in Scripturis non extarent, insererent; ut ex non entibus esse Verbum; eras quando non erat. Cæterum addit nova & peregrina verba sacris expo-

nendis Mysteriis adhibere pium quandoque esse; cujusmodi erat verbum *ἐμῶν* à Conc. sancitum.

R. 3. æquivoco vocabulo, *simile*, seu *ὅμοιον*, velle uti Arianos; ut non aliam Filio ex Deo originem tribuerent, quàm quæ cæteris creaturis competeret: autoritate ergò muniendum erat vocabulum, quod omnem dubii tolleret occasionem, cujusmodi est *ὁμοῦντος*. Quòd enim homines Deo dicerentur similes, inferebat Aëcius, nihil aliud occurrere discriminis inter Christum & homines, quàm quod ex majori vel minori cum Deo Patre similitudine repeteretur.

4. Addit S. Amb. lib. de Filii divinitate contra Arianos cap. 3. si Filium esse Patri consubstantialem de fide sit; posse id vocabulo exprimi: cum Rom. 10. v. 10. habeatur: *Corde creditur ad justitiam; ore autem confessio fit ad salutem*: igitur, ut habet, aut totum meum sene, aut totum omite.

5. Ex Scripturis illud vocabulum etui posse adjiciunt alii; cum essentia Dei in eis tradatur per hæc verba: *Ego sum qui sum: qui est, misit me*. Ita S. Epiph. hæc. 73. & S. Athan. lib. de decretis Nicæn. Syn.

O P P. tum Ariani, tum Bas. Ancyt. cum suis, verbum illud non fuisse adhibendum; quòd esset obscurum; quòd varios pateretur sensus, & Deo indignos; quòdque faveret Paulianistis. 1. enim in multis individuis specie multiplicari naturam significat. 2. Indicat naturam derivatione quâdam & participatione communicari; & proindè de solis corporeis dici posse: sic Filius in humanis dicitur Patri Consubstantialis, quòd paternæ substantiæ quandam partem sortiatur. Ergò nullam aliam ideam menti ingerere consubstantialia potest, quàm quòd exter aliqua substantia Patre, & Filio anterior, in cujus participationem uterque veniat; aut quòd Filius sit ex substantiâ à Patre divisa; ita ut in duobus sit res una divisa; & ideo substantiæ dicantur unius; quia portio defecta de toto in naturâ eâ sit, undè defecta est. Undè concludunt illud vocabulum à Patribus Antiochenis an. 272. meritò fuisse rejectum, sicque rejiciendum esse.

R. à Patribus Antioch. fuisse improbatam Pauli Samosatani sensu vocem illam; non verò eo sensu quo ipsam consecrarunt Nicæni Patres, tum ad sancendum dogma Catholicum, tum etiam ad tollendas Arianorum tergiversationes, qui variis artibus conati sunt viris aliundè catholicè sentientibus illudere. Undè S. Ath. lib. de Synodis Arim. & Seleuc. ad Episcopos Catholicè sentientes, qui de solo Verbo *ἐμῶντος* contendebant, ita dislerit: si obscurum videatur vocabulum *ὁμοῦντος*, non proindè est improbandum, sed à viris eruditis quærendam esse ejus expositionem; aliquin eodem jure quidquid obscurum continent Scripturæ, rejiciendum foret; quod non decet Christianos, sed hæreticos: *Quæ enim, inquit, non intelligimus in Scripturis, non abdicamus; sed requirimus ab illis, quibus Dominus revelaverit, & ab eis discere cupimus.*

Rt. S. Hil. lib. 4. de Trin. recto sensu vocem hanc ab Ecclesiâ propugnari. *Ne quid in hominibus à Patribus nuncupati enunciatione, & in eâ quod semper fuerit confessione suspicionis relinqueretur, ista memorata sunt: quibus*

*& subsistere Filium in substantiâ, quâ genitus ex Patre est cognoscetur; & Patri de substantiâ quâ manebat, per Filii nativitatem nihil esse decerp-
tum.* Idem lib. de Syn. sub finem, ad Basil. Ancyr. & ad suos, ait verbum
Consubstantialiale variis modis spectari posse; unicum verò sensum esse
Catholicum, quo unicam in tribus personis naturam divinam significat.

INST. 1. Non modò hæreticos illos sensus vocabulum illud continet;
sed & significat tres personas esse consubstantiales instar Petri & Pauli,
qui in humanitate consubstantiales sunt: & proindè tres esse Deos seque-
tur. Nam ex S. Ath. in quodam dialogo de Trin. ex S. Bas. in epist. 43.
& ex Conc. Constantinop. sub Flaviano adversus Eutichetem act. 2. Christus
nobis & Deo consubstantialis esse dicitur: ergò sicut humanitas in Christo
est numero distincta, ità & divinitas.

R. illius Dialogi Ath. non esse authorem; sed alium multò ætate
posteriores, ut qui Monothelitas confuteret. Cæterum nihil aliud velle vi-
detur author ille, quàm vocabulo *Consubstantialiale* in Trinitate unita-
tem naturæ significari, ut etiam in tribus hominibus, sed non eâdem ra-
tione. S. pariter Basil. nihil aliud vult, nisi vocabulo *ὁμοῦς* designari
substantiam tribus personis communem; verbo verò *ὑπόστασις* proprietates
personales, seu inter personas discrimen exprimi. Concilium autem Con-
stantin. sub Flaviano Consubstantialiale nomen strictè non usurpat; sed tan-
tùm ut Christum verè hominem, & verè Deum profiteatur.

INST. 2. Non aliâ de causâ post Nicænam Synodum ab ipsis Pa-
tribus Nicænis adhuc supersticibus in Conc. Antioch. an. 341. omnium illud
vocabulum fuit, nisi quòd pravos sensus referret, & recens esset excogita-
tum à Paulo Samosateno. Et idè fuit à Conc. Antioch. proscriptum, cu-
jus vestigii inhaeserunt Conc. Sirmiense. an. 351. Arimin. an. 359. & Con-
stantin. an. 360.

R. 1. à Nicænis Patribus, qui Conc. Antioch. an. 341. interfuerunt,
formulam Nicænam servatam fuisse intactam. Equidem ab illis Episcopis
verbum *ὁμοῦς* quatuor variis formulis à se confectis non fuit insertum;
non quòd ab illis reprobaretur; sed quòd in hæresibus aliis proscriben-
dis laborarent, nec de substantiæ in tribus personis unitate quæstio movere-
tur. Illud quidè vocabulum Pauli Samof. sensu à Conc. Antioch. ad an. 272
fuit rejectum; sed, ut jam monuimus, ipsius Pauli sensu, & aliis pravis signi-
ficationibus jam observatis: Quam quidè œconomiam (ut plerisque placet)
Concilia Sirmiense, Arimin. & alia fuerunt imitata; præsertim ut de voca-
bulis disceptationes removerentur, & Ariani, qui illius contentiois præ-
textu Catholicis permixti, quasi propter unicum vocabulum in Synodum
Nic. insurgent, certò dignoscerentur, an Catholicè, an Arianè sentirent.
Undè Fidei Catholicæ propugnatores egregii præcipuam in eo collocabant
operam, ut ostenderent Antiochenos Patres in illo vocabulo rejiciendo
Nicænis Patribus qui illud usurpabant, consentire; & eâ nos reverentiâ
duci oportere erga antiquos, ut eos inter se non opponamus, cum à se
invicem non dissideant, ut monet S. Ath. lib. de Syn. Arim. & Seleuc. Nam
committere istos cum illis sanctis, videlicet Antiochenos Patres cum Nicæ-

nis prorsus indecorum esset ; eò quòd omnes Patres sint : *Rursus*, inquit, *dijudicare istos bene, istos male dixisse, nequaquam sanctum est : omnes enim in Christo dormierunt : quapropter neque contentiosius agendum est, neque numerus eorum, qui congregati fuerunt, in comparationem mittendus ; ne videantur recenì illi Nicenses eos, qui pauciores sunt, perstringere ; neque tempora metuenda sunt, ne priores videantur posteriores exavèrora-re : omnes enim isti (quemadmodum dixi) Patres sunt : sed tamen neque isti quasi novum aliquid sapientes id in scripta rerulerunt ; neque sui fiducia voces in Scriptura non solemnes deffendunt, sed à Patribus incitari eorum vocabulis uti voluerunt. Scribentium propositum studiosè attendatur, ut ibidem monet. S. Ath. alioquin, sibi perpetuò adversari viderentur. Sic S. Ignatio mart. qui Christum vocavit ingenitum Deum, alii repugnare viderentur Patres, qui solum patrem divinum ingenitum dixere. abeis tamen non dissentit ; cum per ingenitum nihil aliud intelligeret, quàm non factum. Ergò injurià Nicæni Patres damnarentur, quòd ab Antiochenis reprobaturum vocabulum usurpassent ; cum & ipsi Antioch. Patres arguendi quoque forent, quòd decessorum suorum utriusque Dionysij Rom. & Alex. qui vocabulo illo uti fuerant, vestigiis non insitissent : sed neutri sunt damnandi ; imò omnes probandi ; cum ad proferendas temporum suorum hæreses idem ea vocabula usurpaverint, & de sententià Catholicâ unanimiter consenserint. Et verò an non sibi assentitur Apostolus, cum de lege quædam proferre videtur opposita, quæ maximè sunt consona, ut ejus proposito congruant & conducant ? Sic ergò ad utriusque Concilii propositum adhibere animum opus est, & utriusque Concilii consensus unanimis competietur.*

Ad Pauli Samosatæni mentem, vocem *ὁμοῦς* exosam habuere Patres Antioch. quòd corporali sensu intellecta, sicut ille intelligebat, aut naturam divinam in duas dividi, aut unicam personam in Deo esse significaret : contra verò Nicæni Patres eam probant, ut naturæ divinæ unitatem, & personarum pluralitatem exprimerent : minis tamen cautè locutos fuisse Patres Antioch. fatetur ibidem S. Athan. Idèò Episcopi tùm congregati hominem hærescos condemnatum abdicarunt, & de Filii divinitate simplicius scribentes, non exquisitam diligentiam in tractatu hujus vocis, consubstantialis, adhibuerunt ; sed ut acceperant de consubstantiali, ità locuti sunt : scilicet Pauli hæretici sensum reprobant. Eam Catholicam illorum Patrum consensionem sic exponit, & vindicat S. Hil. lib. de Synodis : *Malè intelligitur ὁμοῦς ; quid ad me bene intelligentem ? Malè οὐνοῦ Samosatænus confessus est ; sed numquid melius Ariani negaverunt ? Octoginta Episcopi olim respuerunt ; sed recenì decem & octo nuper receperunt ; & mihi quidem ipse ille hic numerus sanctus est, in quo Abraham victor Regum impiorum, ab eo qui ate ni Sacerdotis est forma, benedicitur ; illi contra hæreticum improbaverunt, numquid & isti non adversum hæreticum probaverunt ? Græcis auctoritas est veterum ; numquid & horum levis sanctitas est ? Si contraria invicem senserunt, debemus quasi judices probare meliora : si vero & pro-*

bando & improbando unum utrique statuerunt, quid venè constituta con-
jecimus?

Quod spectat ad Conc. Sirmienſe, legitur in quâdam fidei formulâ, quam refert S. Ath. lib. de Synodis Arim. & Seleuc. substantiæ vocabulum tanquam simplicius à Patribus Nicænis positum, fuisse à formulâ Sirmienſi remotum, eò quòd à populis ignoraretur, & scandalo eſſet, ut potè cum in Scripturis non contineretur. Quæ singula continuò contra formulam Nicænam opponebant Arianī; quorum dolum deprehenderunt tandem Catholici Episcopi, quòd hæresim Arianam ex illis plerique recusarunt damnare, ut multoties postea renuerunt.

Dixi plerosque: aderant enim alii variis illis Synodis ex parte Basil. Ancyranī, qui cum eo pro fide Nic. pugnabant; sed tamen voci ὁμοούσιος erant valdè infensi; & qui propterea verbum ὁμοούσιος, seu substantiâ simile suis formulis inferebant, cum quibus S. Hil. lib. de Synod. 1. hæreticas, quæ voce illâ exprimerentur, sententias rejicit, ut quæ priorem substantiam, quæ divisa duabus personis communicaretur, aut Patrem & Filium unam eſſe personam illo vocabulo significarent. Contendit 2. æquè periclitari ὁμοούσιος ac ὁμοόσιος, ut quòd non magis in Scripturis contineretur; & tam humanè cum illis agendum eſſe cenſet, ut ipſe veniam ab eis postulet, quòd in eorum formulâ aliquid non intelligeret: *Non quòd quidquam vos secundum mensuram scientiæ ignorare ausus sum dicere; sed super fidei Catholica unitate patimini non minus in nobis eſſe ſollicitudinis, quàm in vobis, epistolam quam à vobis οὐνοῦ, & οὐρανῶν expositione apud Sirmium Valens, & Ursatius, & Germinius poposcerunt legi, intelligo in quibusdam non minus circumſpectam eſſe, quàm liberam; & quia homoouſii, & homoiousii demonstratio nihil reliquis difficultatis: & quidem de homoiousio, quòd eſt ſimilis eſſentia, commune iudicium eſt; de homoouſio, quòd eſt unius eſſentia tractantes, primum idcirco reſpuendum pronuntiat, quia Verbi huius enunciatione ſubſtantia prior intelligeretur, quàm dum inter ſe partiti eſſent, intelligo vitium intelligentiæ, & profanus hic ſenſus eſt, & communi iudicio ab Eccleſiâ reſpuendus. Secundò quoque id addidiſtis, quòd Patres noſtri, cum Paulus Samosatenus hæreticus pronuntiatus eſt, etiam homoouſion repudiaverint, quia per hanc unius eſſentia nuncupationem ſolitarium atque unicum ſibi eſſe Patrem & Filium predicabat; & hoc ſanè nunc quoque profaniſſimum Eccleſia recognoscit, Patrem & Filium in his nominum profeſſionibus ad unionis ſingularis ſolitudinem negat: personarum proprietate revocare. Tertiò etiam hæc cauſa improbandi homoouſii commemorata à vobis eſt, quia in ſynodo, quæ apud Nicaam fuit, vocati Patres noſtri propter eos, qui creaturam Filium dicebant, nomen homoouſii adhiberent; nec contineri in Scripturis verbum οὐνοῦ, quo uterentur. Sed urget ſummâ charitate ſervatâ: ut probari poſſis οὐνοῦ, non improbemus οὐνοῦ. Cogitemus tot ſacerdotes ſanctos & jam quieſcentes. Quid de nobis Dominus iudicabit, ſi nunc anathematizantur à nobis? Quid de vobis erit, qui rem eò deducimus, ut quia Episcopi non fuerunt, nos quoque*

nec erimus? ordinati enim ab his sumus, & eorum sumus successores. Renuntiamus Episcopatu, quia officium ejus ab anathemate sumpserimus. Date veniam fratres dolori meo. Impium est quod audetis: non patiar hanc vocem, ut in Anathemate sit, *ὁμοούσιος* secundum religiosam intelligentiam confitens. Nomen nihil habet criminis, quod sensum non perturbat religionis: *homousion* nescio, nec intelligo nisi tantum similis essentia confessionem. Testor Dominum cæli atque terra, me, cum neutrum audissem, semper tamen utrumque sensisse, quod per *homousion*, *homousion* oporteret intelligi: id est, nihil simile sibi secundum naturam esse posse, nisi quod esset ex eadem natura. Regeneratus pridem, & in Episcopatu aliquantisper manens, fidem Nicenam nunquam nisi exultaturus audiui: sed mihi *homousii* & *homousii* intelligentiam Evangelia, & Apostoli intimaverunt. Pium est quod volumus: nec damnemus Patres, ne animemus hæreticos: ne, dum hæresim expellimus, hæresim nutriamus: interpretati Patres nostri sunt post Synod. Nic. *homousii* proprietatem: religiosi extant libri, manet conscientia: si quid ad interpretationem addendum est, communiter consulamus. Potest inter nos optimus fidei status condi, ut nec ea quæ benè sunt constituta, vexentur; & quæ malè sunt intellecta, refecentur.

Q. 3. num statim à Concilio Nicæno ad Catholicam fidei professionem, verbo *ὁμοούσιος* uti in fidei formulis fuerit necessarium?

R. in Occidente vocis illius usum ad fidei tesseram non exactum fuisse: non enim extat in fidei professione, quam Marcellus Ancyrr. Romæ Julio Papæ & Sardicensi Concil. obtulit, ut hæreseos, cujus à Concil. Hierosol. & Constant. seu ab Eusebianorum factione damnatus fuerat, suspicionem purgaret. Nec extat in pœnitentiæ libello, quem Ursacius & Valens eidem Julio, ut erroris sui veniam deprecarentur, obtulerunt: nec in Concilio Aquileensi S. Ambr. qui pro illo vocabulo stabat, exigit.

Hæc erat etiam in Oriente virorum pacis catholicæ studiosorum tunc temporis æconomia, ut S. Athan. & S. Basil. in Oriente, & S. Hilar. in Occidente, qui sequenti quæstione laudandi vocis illius usum non postularunt, cum vocabuli *ὁμοούσιος* usurpationem non improbarunt. Imò S. Bas. epist. 300. eisdem Episcopos vindicat. Sunt, qui nondum *ὁμοούσιος* profitentur, inquit, quos jure quis dignos reprehensione dixerit, & eosdem iterum jure excusandos. Patrum enim vestigiis non insistere, & suam ipsorum excogitatam sententiam velut potiorem, voci illorum anteferre, tanquam præsumptionis plenum non vacat culpâ; eandem verò rursus à nonnullis reprehensam suspectam habere, videtur aliquatenus illos à culpâ liberare. Undè Synodum Antioch. quæ *Consubstantialis* nomen fidei formulæ non inseruerat, non minus probavit Conc. Chalcedon.

O. P. P. ex epist. 78. S. Basil. Nicæna professio, tùm à redeuntibus ab hæresi exigenda erat: tùm & ab iis, qui hæreseos suspicionem laborabant; quam ideo exegit ipse ab Eustathio Sebasteno.

R. non quoad verba, sed quoad sensum necessariò exigendam Nicænæ fidei

fidei professionem existimasse S. Basil. Convenit igitur ut suscipiantur, si se juxta verba, quæ à Patribus nostris Nicæe sunt exposita, & juxta intellectum, qui sanè per verba illa significatur, credere consueverint. Sunt enim quidam, qui in hac fide sermonem veritatis dolo invertant, & ad suam ipsorum sententiam intellectum ac mentem verborum torqueant. Idem epist. 86. Dianxi Cæsareensis fidei professionem refert, qui cum fidei Constant. an. 360. subscripsisset, & ideò ab ejus communione recessissent S. Bas. illius Ecclesiæ tunc Presbyter, Clerus, Monachi, & alii; Dianxus ut S. Basilio & aliis faceret satis, Nicænam fidem professus est, ubi decidisset in morbum, ex quo & mortuus est: *Accitis nobis dicebat, testem esse Dominum, quod simplici corde Constantinop. fidei consenserit quidem; verum nullà in re irritam voluerit eam fidem, quæ Nicæe à sanctis Patribus exposita est; neque aliud in corde habuerit, quàm quod ab initio traditum acceperet; imò precari se quoque, ut non separaretur à sorte beatorum illorum Episcop. 318. qui piam illam fidei predicationem promulgaverint orbi; atque istà satisfactione nos ità permovet, ut solutà omni cordium nostrorum hesitatione ad communionem illius accefferimus, & à concepto errore quieverimus.* Et, ut refertur in vitâ S. Greg. Naz. Patris à Gregorio Presbytero conscriptâ, secessio similis contigerat Neocæsareæ: cum enim Gregor. Episc. Naz. animi simplicitate in eandem fidei formulam à Constantio propositam cum plurimis aliis præstantissimi nominis Episcopis Dianxo, & aliis consensisset, eique subscripsisset, & grave ideò schisma in Nazianzenâ Ecclesiâ fuisset concitatum; filii Gregorii consilio fidem Nicænam apertè professus fuit, & omnes statim in concordiam rediit. Undè patet diluendæ de fide suspicioni parem fuisse Nicæne fidei professionem, seu ipsam verbis, seu aliis expressam: hanc autem vocabulo *ἑνωσις* contineri S. Basilius & alii censabant, ut mox exponendum erit.

De vocabulo *ἑνωσις*.

Post Concilium Nicænum extiterunt sententiæ, seu partes quatuor. Arianorum erat prima, seu Anomatorum, quos Filium, creatum, & Patri æterno dissimilem, dicere palàm non pudebat. Ità profitebantur Aëtius à Leont. Antioch. Diaconus factus, Eunomius, Euzoïus, Uranius Tyri, Valens, Ursacius, Germinius, Auxentius, Demophilus, quemadmodum refert Sozom. libro 4. cap. 12. & hæc erat Arii vera opinio, quam quidem exponere reformidat.

Secunda erat aliorum, qui palàm Anomatorum blasphemiam profiteri non ausi, Imperatoris Constantii qui *dissimilis* vocem ferre non poterat, iram reveriti, eâ tergiversatione usi sunt, ut similem esse docerent Patrè Filium, non tamen substantiâ: suam autem mentem sic interpretabantur, ut, quemadmodum vivorum hominum effigies ab hominibus naturâ substantiaque sunt diversæ, & eternâ specie, ac lineamenti sunt tantùm similes, seu eos refutunt; ità Patri æterno Filium esse similem, quòd cum patet, repræsentaret, profiterentur; non verò divinitate, vel æternitate,

vel unâ naturæ proprietate parem atque æqualem. Proinde consubstantialis & similis substantiæ voces tanquam peregrinas rejiciebant. Anomæos tamen anathemate quandòque damnabant, licet verbo tenus ab Anomæis dissiderent. Horum Princeps erat Acacius Cæsariensis. Ex Anomæis plerique partes illas amplectebantur, ut Georg. Alexand. Eudoxius Antiochenus, aliique complures, qui postea simul cum Acacio Anomæorum doctrinam tam audacter Antiochiæ professi sunt, ut ex Ariminensi Seleuciensiſque formulis similitudinis vocabulum abraſerint, filiumque substantiâ & voluntate Patri dissimilem esse, atque ex nihilo procreatum propugnarint. Ità Sozom. lib. 4. c. 29.

Tertia eorum erat, qui vocem *ὁμοούσιον* rejiciebant, quòd in Scripturis non contineretur; Filium tamen Patri per omnia similem esse substantiâ docebant, & se Nicæn Synodo adhærere constanter profitebantur. Princeps eorum erat Basilius Ancyra. qui Sirmienti Synodo contra Photinum an. 351. præfuit. In eadem sententiâ erant Georgius Laodiceus, Silvanus Tarsensis, Sophronius, Eleusius Cizicenus, Marcus Arethusius, Cyrillus Hierosol. Eusebius Samosat. Meletius Antioch. & major pars Episcoporum Orientalium.

Quarta pars erat formulæ Nicænæ addictorum, à quibus partibus stabant Romani Pontifices cum toto ferme Occidente. Stabant quoque Orientales plurimi, inter quos erant commendatissimi S. Athan. S. Basil. & Pontici, S. Greg. Naz. S. Greg. Niss. & plures alii.

Quæritur 1. num vox *ὁμοούσιον* fidem Nicænâ exprimeret? & an quæ eâ uterentur, Nicænæ fidei adhærere se contestati, vocabulum licet *ὁμοούσιον* rejicerent, sint pro Catholicis habendi?

R. voce *ὁμοούσιον* Nicenâ fidem fuisse contentam, & significaram.

1. sic Ariani censuerunt. 2. sic sentire se professus fuit Basil. Ancyra. cum suis. 3. ea quoque fuit Nicænæ formulæ defensorum sententia. Ex quibus facilè conficietur Basilium Ancyra. & alios, tum ab hæreticis, tum à Catholicis fuisse Catholicos habitos.

1. Arianæ sectatorum mens elucescit maximè, quòd in 2. formulâ Sirmienti utrumque vocabulum *ὁμοούσιον*, & *ὁμοιότης* simili censurâ perstrinxerint, & à fidei professione amandarint, non aliâ de causâ, quàm quòd eandem utriusque vim agnoscerent. Ideò pariter Valens, Ursacius, & alii Eusebiani in epist. ad Germinium relatâ in fragmentis S. Hilarii, ad fidei Ariminensis professionem Germinium hortantur, in quâ Filius Patri non in substantiâ, aut in omnibus, sed absolutè diceretur similis. Hanc quoque formulam non esse immutandam asserunt; alioquin Basilii Ancyra. professionem à se damnatam restitutum iri. Germinius autem in suâ responsione ad Ruffinianum proficitur Filium esse in omnibus Patrem similem, & ex Patris substantiâ; mirariſque se testificatur, quòd Valens, aut esset oblitus, aut simularet se oblitum, coram Constantio, & Episcopis pluribus Constantinopoli post longam conversationem tandem constitutum fuisse Patri Filium esse in omnibus similem.

2. Hæc etiam fuit sententia Basilii Ancyra. & Episcoporum cæterorum,

qui cum eo Filium ejusdem esse cum Patre substantiæ contestabantur: improbato enim *ὁμοούσιος* vocabulo, ut obscuro, & à Patribus Antioch. damnato; vocem *ὁμοιόσιος* formulis suis inferebant, ut omni tollendæ difficultati aptiorem; & pro fide Nicænâ steterunt constanter; nec exiliis & persecutionibus aliis ab eâ fide dimoveri potuerunt. S. Hilarius lib. de Synod. refert à Basilio Ancyrano, & ab Episcopis Orientalibus quamplurimis Acacium & alios Arianæ factionis Episcopos in Synodo Seleuciensi fuisse abdicatos; fidemque Catholicam de eadem Filii cum Patre substantiâ confirmatam; longè tamen alienos fuisse hos Episcopos ab admittendo *ὁμοούσιος* vocabulo.

Ex S. Epiph. lib. 3. tom. 1. hæres. 73. Basil. Ancyran. cum aliis fuit professus Filium ejusdem esse cum Patre substantiæ; aliud sentientes anathemati subjecit, & damnavit verbum consubstantiale, quod personæ unitatem inducere censeret. Post longam cum Eusebianis disceptationem, coram Constantio Imper. tandem conventum erat, ut Filius diceretur Patri similis in omnibus: cum autem Valens vocem hanc *in omnibus* addere noller subscriptioni suæ, ad id ab Imperatore adactus est; & Basilius Ancyran. hæc verba *in omnibus* explicuit, aliquid etiam clarius addendo subscriptioni: *non in voluntate tantum, sed in essentiâ & existentiâ, & in omnibus*: quæ verba omnem scrupulum eximunt. Caterùm pro vindicandâ sincerâ illorum fide, gravissimi momenti est maximus ille zelus, quo insurrexerunt in Arianos, an. 358. in Ancyran. Syn. cont. secundam Sirmientem formulam; an. 359 in Seleuciensi contra Acacianos; an. 363 in Antiochen. sub Joviniano; an. 365, in Lampfaceno & Tyanensi; an. 381. in Conc. Constant. cui præfuit S. Meletius, admirandæ fidei & pietatis Episcopus. Adhæc adde ipsum S. Meletium, qui an. 363. præfuit Concilio Antioch. cui, teste Socrate lib. 3. hist. cap. 25. aderant viri eximiâ sanctitate præditi, ut Eusebius Samosatenus, & Pelagius Laodicensis, nomine Synodi ad Imp. Jovinianum fidei libellum scripsisse, in quo unanimi consensione profitentur Episcopi omnes Nicænæ fidei adherere se, probandumque *ὁμοούσιος* verbum, sensu recto usurpatum. *Visum est*, inquit, *inæ prudentiæ significare, quod fidem sancti Concilii jam olim Nicææ congregati, & approbemus & teneamus; quandoquidem vocabulum consubstantialis, quod quibusdam videtur parum rectè in eâ positum, est probè à Patribus, commodâque interpretatione explicatum; quæ quidem interpretatio ostendit Filium ex Patris substantiâ genitum, Patri secundum substantiam similem; ut neque affectionem ullam in ejus inexplicabili generatione debere intelligi, neque vocabulum substantia apud sanctos Patres ad consuetudinem græci sermonis capi; sed ab illis poni ad everrendum illud pestiferum dogma.* Iidem Episcopi (ut narrat ipse Socrates lib. 7. hist. cap. 11.) Nicænam fidem à se continuo fuisse servatam Liberio Papæ testificantur per legatos suos Eustathium Sebastenum, Sylvanum Tarsensem, & Theophilum Cistabazæ, qui Romam fuerunt missi, tum ut exponerent Arianorum factione mala infecta; tum ut cum Liberio Pontifice communicarent, & ad Valentianum Imperat. defer-

rent epistolas. Attamen à communione suâ Episcopus illôs repulit Liberius, utpotè quos pro Arianis haberet. Testantur legati se *Fidem eorum qui Filium Patri dissimilem esse docent, jampridem rejecisse; Filium in omnibus Patri similem confiteri, atque illam vocem similem, nihil à voce consubstantiali discrepare.* Quâ fidei professione auditâ, Liberius non modò eos communionis suæ fecit participes, uti testatur Socrates lib. 4. hist. cap. 12. sed etiam ad Episcopos Orientales rescripsit, ut ad fratres Catholicos. Titulus epistolæ hic est: *Dilectis fratribus, & comministris Eustathio, Cyrillo, & universis per Orientem orthodoxis Episcopis.* De illorum fidei cum Ecclesiâ suâ, & Occidente toto consensione gratulatur; & quòd fidem Nicænam fuerint amplexi. *Hoc insuper, inquit, professi sunt charissimi fratres, Eustathius, Sylvanus, ac Theophilus, tum ipsos, tum vestram charitatem semper hanc fidem habuisse, & ad extremum usque spiritum servaturos esse. . . . His acceptis litteris legati in Siciliam proficiscuntur; ubi Concilio Siculorum Episcoporum convocato, coram illis similiter fidem consubstantialis servare consentunt, fideique formulam in Concilio Nic. confirmatam ratam faciunt.* Sicque testibus, Liberio, Siculis, & Occidentalibus, cum Nic. Patribus illi sentiebant.

3. Catholicam, seu Nicænam fidem Basilium Ancy. & alios qui stabant à Basilii Ancy. partibus, fuisse professôs, ejusdem fidei vindices eruditissimi & constantissimi SS. Athan. Hilar. Basil. & alii palàm sunt testificati; nihilque missum fecerunt, ut eos ad concordium adducerent; seu verbo *ὁμοιούσιον* vellent adharere, seu nollent; & ipsôs, ut cum Catholicis cæteris *ὁμοιούσιον* usurparent, inducere conati sunt. S. Athan. lib. de Synod. Arim. & Seleuc. docet verba hæc, *simile secundum substantiam*, non tam apertè tradere Filii naturam, quàm hæc, *ex Patris esse substantiâ*; quòd nempe stannum argento simile judicetur, licet argenti substantiæ nihil obtineat; ità verò de Catholica Basilii, & aliorum sententiâ constituit. Cæterum, quoniam ex substantiâ Patris Filium esse dicere, & similem Patri substantiâ; quid aliud istis innunt, nisi eum consubstantialem esse? Etenim quemadmodum, si solum eum dicas similem substantiâ, non planè indicas eum ex substantiâ esse; ità rursùm, qui consubstantialem eum dicit, utriusque sententiam complectitur, quam habes dictum ex substantiâ, & quam illud dictum, similem substantiâ esse.

Hæc etiam fuit mens S. Hil. qui l. de Syn. comparatione inter *ὁμοούσιον* & *ὁμοιούσιον* institutâ, utrumque vocabulum fidei exprimendæ aptissimum esse docet, simul & facilem esse posse utriusq; abusum: *Potest, inquit, una substantia impie dici, & pie taceri. Habes nativitatem, habes similitudinem. Quid verbi calumniam suspiciosè tenemus, rei intelligentiâ non dissidentes? credamus, & dicamus esse unam substantiam; sed per nature proprietatem, non ad significationem impie unionis; una sit ex similitudine, non ex solitudine. Sed forte parum proprietatis in se habere similitudo videatur.* Tum probationes subiungit, quibus constat aptissimam illam esse vocem *ὁμοιούσιον*, quòd nonnulli similitudinis ratio inter duas res æquales intercedat. Ostendit etiam idem esse, & esse simile, aut esse æquale; item æqualitatem

non occurrere inter duo dissimilia, nec in unico similitudinem : sicque in omnibus similem Patri Filium asserere solidis fundamentis, esse æqualitatem fulcire : *Nec me fallit, Fratres charissimi, quosdam esse, qui similitudinem confitentes, negant æqualitatem: sed quaro unde comparetur inæqualitas? Namque si secundum essentiam, & virtutem, & gloriam, & tempus, Patri Filius similis est: interrogo ex quo non videatur æqualitas? Ità similitudo proprietas est, proprietas æqualitas est, & æqualitas nihil differt: quæ autem nihil differunt, unum sunt: non unione persona, sed æqualitate nature.* Ubi verò eadem Patri & Filio competere attributa demonstravit, in substantiæ unitate agnoscendâ fidem esse firam docet; & Episcopos, qui vocabulo ὁμοούσιον utebantur, pro Catholicis & Fratribus excipit, & utrumque vocabulum, & ὁμοούσιον & ὁμοῦσιον expositionem indigere ostendit verbis istis paulò superius citatis: *ut probari possit ὁμοούσιον non improbemus ὁμοῦσιον &c.*

Concilii Parisiensis par quoque fuit sententia in epist. ad Episcopos Orientales, in quâ Patres Gallicani de suppresso Arimini substantiæ nomine conquesti, se vocabulum, *simile*, nunquàm improbasse profitentur; modò non pro divinitatis unione, sed unitate sumeretur.

Eadem fuit quoque S. Basilii sententia in epist. 41. ubi docet vocabulis ὁμοούσιον & ὁμοῦσιον idem significari, modò recto sensu adhibeatur ὁμοούσιον & substantiæ mutationem non inferat, denotetque lumen de lumine, Deum de Deo; cum nullum discrimen intersit lumen inter, & lumen: sic enim ipse loquitur: *si verò quis ab ὁμοῖς similis significatione, ἀπαρνησάτων, non Evarians, abstulerit, quod Constantinopolitani fecerunt, suspectam habeo dictionem illam; utpotè quæ gloriam unigeniti diminuat.* Idem in epist. 300. dicit eos esse excusandos qui vocem ὁμοῦσιον à quibusdam reprehensam, habebant suspectam, quòd damnata in Antiocheno fuisset; modò tamen aliis vocibus fidem Nicænâ exprimerent ut verbo ὁμοούσιον. Audiendus est autem hoc in negotio præcipuè S. Basilii, qui suo tempore, etiam S. Athanasio teste, inter Episcopos erat ornamentum Ecclesiæ eximium; & præsertim cum ex S. Gregor. Niss. ipsius fratre, constantiâ præstantissimâ Valentis præfecto restituerit, ne tolleretur verbum ὁμοῦσιον, consensissent licet quamplurimi Episcopi: *At verò tantum abesse aiebat ut aliquid vel demeret vel adderet fidei, ut ne ordinem quidem formulæ fidei mutare cogitaret.*

4 Hinc facillè colligitur pro Catholicis habitos fuisse; & esse habendos Basil. Ancyr. SS. Meletium. Antio. Euseb. Samosat. Pelagium Laodi. Cyril. Hieros. & alios qui Verbum ὁμοούσιον adhibebant: & idò cum illis non esse agendum ut cum Arianis monet S. Athan. lib. de Synodis Arim. & Seleuc. cum omnia Nicænâ Syn. scripta reciperent, & de solo Consubstantialis vocabulo ambigerent; sed tanquam cum fratribus; quia cum iis esset de solis verbis controversia: *Ceterum, inquit, adversus eos, qui ex omni parte Synodum convitiis carpunt, ista pauca ad refutationem suffecerint: adversus autem eos, qui omnia Synodi scripta recipiunt, de solo autem Consubstantiali ambigunt, non ut adversus inimicos affici nos deceat;*

neque enim veluti adversus Ariomanitas, aut adversus patrum hostes cum fratribus disceptamus; ut cum quibus eadem sit sententia, controversia autem de verbis. Nam cum profiteantur Filium ex Patris substantiâ, & non ex aliâ substantiâ esse; nec creaturam eum, nec opus existere, sed genuinum & naturalem Patris fetum, & aternaliter cum Patre esse, cum ejus & ratio & sapientia sit; non longè absunt à recipiendâ hac voce consubstantialis. Talis autem est Basil. ex Ancyra in scriptis suis de fide.

S. Hilarius lib. de Syn. pariter eos vocat, scilicet Basil. Ancy. Eleus. Cyzic. &c. sanctos, viros acerrimos fidei contra hæreticos defensores, & apostolicæ doctrinæ studiosos. Item ait eos non esse Arianos; sed, negando homousion, censeri pro Arianis; de verbis tamen esse quæstionem: Reliquus, inquit, mihi sermo ad sanctos viros Orientales Episcopos dirigendus est, ut, quia jam de fide nostrâ nihil inter nos suspicionis relictum est, ea qua adhuc in suspensionem ex verbis veniunt, purgentur: & dabunt veniam ex communi scientia fide secum liberius locuturo. O studiosi tandem Apostolica atque Evangelica doctrinæ viri, quos fidei calor in tantis tenebris hæretica noctis accendit; quantam spem revocanda vera fidei attulistis, constanter audacis perfidia impetum retundendo . . . Testis enim Dominus est conscientie meæ in nullo me expositiones has, quas in Syrmium detulistis fidei vestra velle convellere.

Ad vindicandam Episcoporum illorum sententiam Catholicam confert admodum; tum communicatio, quâ viris sanctissimis conjuncti erant illi Episcopi, ut S. Meletius cum S. Basilio, Greg. Naz. & aliis; tum & sanctitas eorum eximia, quæ universæ Ecclesiæ venerationi summæ est, ut SS. Meletii, Eusebii, Samosatani Pelagii Laodicæni, & Cyrilli Hierosol.

Merito igitur Conc. Alex. præfide S. Ath. epist. ad Imp. Jovinianum à Theodoro relato lib. 4. Hist. cap. 3. fidem Nicænam esse solam sectandam constituit, utpotè ab Ecclesiæ primordio predicatam, cui Ecclesiæ omnes, quæ ibi nominantur, assentirentur, exceptis paucis, quæ secta favent Ariana; nam istarum omnium reipsâ exploratè cognitam habemus sententiam. Inter eas autem Ecclesiæ pleræque verbum consubstantiale probabant: ejusmodi erant Orientis Ecclesiæ & Ecclesiarum illarum Episcopi, de quibus mox actum est. Undè colligere est Catholicè sensisse, quos S. Ath. pro Catholicis habebat cum Concilio Alexand. & quo tempore Imperator Catholicus regnabat.

Hinc merito Socrates lib. 1. cap. 18. scribit disputationes de iis vocibus inter catholicè sentientes à pugna nocturnâ non discrepasse; quod non sese mutuo intelligerent: Verum, sicut nos ex variis epistolis, quas post Concilium Episcopi alter ad alterum scripserunt, perspicuè deprehendimus, verbum consubstantiale nonnullorum animos vehementer conturbavit; in quo quidem excutiendo dum multum temporis ac studii consumebant, ejusque vim tanquàm ad vivum expendere curiosè nimium molebantur, intestinum bellum inter ipsos excitarent; atque ea qua gerebantur, nihil à pugna nocturnâ discreparunt: nam minime omnino ab se mutuo videbatur intelligi, cur se inter ipsos maledictis concidere occa-

pissent. Etenim qui vocem, *Consubstantialia*, repudiabant, illos, qui eandem receperant, Sabellii & Montani opinionem de integro introducere censuerunt, & ob eam causam eos blasphematores nuncuparunt, tanquam Filii Dei essentiam tollere molientes. Idem quoque sensisse utriusque vocabuli defensores tradunt Sozom. lib. 1. c. 12. S. Cyrill. Alex. in dial. 1. de Trinit. & Facundus Hermianensis lib. 2. cap. 6.

ΟΡΡ. ὁμοιούσιον idoneum non fuit ad exprimendam fidem; cum, qui uterentur illo, & vocem *ὁμοούσιον* rejicerent, pro hæreticis habiti fuerint.

R. pro hæreticis non fuisse habendos, nec habitos, qui catholico animo, vocabulo illo Patris, & Filii, & Spiritus sancti substantiæ unitatem, & ita fidem Nicenam exprimi censuerunt; quales erant Bas. Ancy. Georg. Laodicens, Marcus Arelusius, S. Cyrill. Hieros. S. Melet. Antioch. & alii Orientales: & ided qui ὁμοούσιον utebantur, de verbis solis questionem cum illis Episcopis moveri temporibus illis palam significarunt, ut SS. Ath. Hilar. Bas. Liberius Pontifex, & Gallicani Episcopi jam laudati. Fuisse quidem monent in Oriente non paucos Episcopos Arianae hæreseos participes, qui cum Acacio Cæsar. filium, non quoad substantiam, sed quoad qualitates quasdam esse Patri similem asseriebant; sed istos in Seleuciensi Concilio damnarunt Bas. Ancy. & Episcopi, qui cum eo sentiebant, & loquebantur. Igitur qui verbum ὁμοούσιον probarunt, aut rejecerunt, ita definiunt, ut fidem catholicam expriment, aut rejiciant: si primum intendunt exequi, inter Catholicos recensentur: si posterius aggrediantur, ab Ecclesiæ unitate cum cæteris hæreticis repellantur.

Illi quidem, hæretici, aut Semiariani à quibusdam dicti fuerunt, qui ὁμοούσιον uterentur; sed si consulantur qui sic disserunt, Verbum Divinum inter creatas res voce illâ deprimi censuerunt; ex quibus fuit Sulpitius Severus. Interea, inquit lib. 2. hist. *Ariani non occultè, ut antea, sed palam ac publicè hæresis piacula predicabant: quin etiam Nicenam Synod. pro se interpretantes, quam unius littera adjectione corrumperant, caliginem quamdam injecerant veritati: nam ubi ὁμοούσιον erat scriptum, quod unius est substantia; illi ὁμοιούσιον, quod est similis substantia, scriptum esse dicebant; concedentes similitudinem, dum adimerent unitatem; quia multum ab unitate similitudo distaret, ut, verbi gratiâ, pictura humani corporis esset homini similis, nec tamen haberet hominis veritatem.* Sic pariter Philastrius Brixien. Episcopus in suo de hæresibus libro, Semiarianos docet esse, qui Filium Deum esse profiterentes, unum cum Patre, Spiritum sanctum rebus creatis annumerarent.

INST. SS. Athan. & Hil. vocabulum ὁμοούσιον damnant; quod similitudo, de qualitatibus, & figuris, & per participationem; non verò de substantiis, significet; & proindè solis rebus creatis conveniat. Ità uterque in lib. de Syn. & S. Ath. iterum tom. 1. in confutatione hypocrisis Meletii Antioch. *Qui similem, inquit, Deo Filium statuit, Deum esse negat: & ided à Meletii communione semper abstinuit.* Item S. Ambr. lib. de divinitate Filii cap. 1. ait negari divinitatem Filii hoc

vocabulo, & induci duplicem naturam, aliam Patris, aliam Filii: *Homo enim ad similitudinem Dei factus est; nec tamen Deus est.*

R. vocabulum quidem illud *ὁμοούσιος* expositum phylicè, similitudinem tantum ratione qualificatum significare; sed alio sensu, & quidem recto & catholico, à Bas. Ancyr. & à suprâ laudatis Episcopis fuisse usurpatum, ex ipsorum SS. Athan. Hilar. Bas. Liberii, & Gallic. Episcoporum testificatione.

Quod spectat ad librum inscriptum, *confutatio hypocrisis Meletii*; is non est S. Athan. utporè cum prorsus adversetur ejus doctrinæ. Author illius videtur fuisse Paulini Antioch. sectator quidam. Cæterum S. Athan. mediatâ saltem cum S. Meletio communione jungebatur; communicabat enim cum S. Basilio, & aliis qui cum S. Meletio communicabant. Et insuper se ab ejus communione non posse discedere testatus fuit S. Bas. epist. 325. Et in aliud tempus communionem etiam immediatam cum S. Meletio habendam distulisse S. Athan. refert; non quod de S. Meletii fide dubium pateretur ipse S. Athanasius; sed ne læderet Eustathianos, qui Eustathii Episcopi Antioch. deturbationem Eusebianâ factione iniquè peractam detestati, seorsim cum Episcopis suis conveniebant, nec adduci potuerant, ut cum S. Meletio Episcopo Catholico communicarent; licet ejus electioni viri admodum Catholici, nempe S. Greg. Naz. pater, S. Eusebius Samos. & alii consensissent; ipseque S. Melet. Catholicam fidem coram Constantio Imperatore, in Ecclesiâ Antioch. & in concione publicâ fuisset professus, & pro veræ fidei defensione sustinisset exilium. Ideò autem à S. Meletio Catholici plures Antiochiæ recedebant, quòd Melet. ab Arianis promotus diceretur; & proindè illorum esse particeps videretur. Interim Eustathianos in unitatem cum Meletianis adducere S. Athan. meditabatur; &, ne illorum animos offenderet, communicationem suam cum S. Meletio in tempus opportunius differebat.

S. Ambr. pravo, non recto sensu usurpatum *ὁμοούσιος* vocabulum improbavit, præsertim quòd ejus temporibus post Conc. Const. 1. an. 381. universim fuerat illud rejectum, aut saltem in fidei formulis non adhibebatur, & de solo *ὁμοούσιος* usurpando universi convenerant.

INST. 2. S. Hieron. in Chronico asserit Meletium an. 363. cum suis in Conc. Antioch. *ὁμοούσιος* rejecisse, nomenque instituisse *ὁμοιούσιος*, ut medium dogma, nempe Macedonianum vindicaret.

R. S. Hieron hoc in negotio non esse audiendum, ut qui S. Meletio fuerit infensus, & à S. Paulino Antioch. S. Meletii æmulo consecratus Presbyter. Aliundè quæ profert in Chronico, S. Meletii famæ, & veræ fidei non nocent; ea enim non certò tradit, sed rumori qui spargeretur, tribuit. Et certè, si Antioch. Concilii acta S. Hieron. præmanibus habuisset, aut consulere potuisset proculdubio; quod opponitur, non deprehendisset. Vulgabatur quippè vocabulum *ὁμοούσιος* fuisse rejectum in Concilio Antioch. cui præerat S. Meletius, & constitutum fuisse dogma Macedonianum; quæ tamen penitus erant supposita; cum in illo Conc.

Conc. de quo loquitur, Nicæna formula fuisset lecta & recepta; & proinde verbum *ὁμοούσιον* probatum. Equidem antea non utebatur eâ voce S. Meletius; sed alienus omnino erat à Macedonii doctrinâ. Ann. 364. subsequenti, ejus & Orientalium Episcoporum nomine legati Liberium & Occidentales adierunt, omnemque suæ fidei suspensionem Liberio & Occidentalibus exemerunt. Quin etiam Concilio Constantinop. adversus Macedonii dogma præfuit idem S. Meletius, cujus & catholicum animum tantopere commendat S. Bas. in epist. 50. ad S. Athan. atque neminem fide, moribusque S. Meletio posse comparari. Lege tùm epist. 320. ad Petrum Alex. S. Athanasii successorem; tùm & epist. 325. ad S. Epiph. ubi testatur se ab ejus communione nunquam discessurum. Præterea S. Epiph. hær. 73. S. Meletium, ut virum pietatis admirandæ & fidei integræ vindicat. Sed quid adjici posset iis, quæ ad ejus commendationem profert S. Greg. Niss. in orat. ejus funebri habitâ coram Patribus omnibus Concilii Constant. 1. an. 381. in quo decessit? Ubi eum novum Apostolum vocat, Ecclesiæ vulnere medicum, Ecclesiæ caput, aut Concilii præfulem: *Cum capite*, inquit, *omnia adempta sunt*. Vir divinus, mansuetissimus hominum, ac alter Moyses suo tempore dicebatur; dignusque fuit, dum viveret, quem veneratione singulari, & publicâ religiosissimus Imperator Theodosius Magnus complecteretur.

IN ST. 3. ex Socrate lib. 4. cap. 11. legati Orientalium Liberio Papæ testati fuerunt se fidem eorum jam pridem rejecisse, qui Filium Patri dissimilem dicerent: illis ergo aliquando adhæserunt.

R. non sequi illos iis adhæsisse; nam ab Arianis semper abhorrue- rant: sic quippè Liberium alloquuntur, apud quem audierant ut hæretici: & Liberius in suo responso refert eos contestatos fuisse, se cum Episcopis, à quibus missi fuerant, fidei Nicenæ semper adhæsisse, & semper adhæsurus

IN ST. 4. S. Bas. epist. 82. asserit legatos Liberio significasse, fuisse se ab Eudoxio delusos; & ideo Romam accessisse, ut Patrum fidem acciperent.

R. de Eustathio Sebasteno, & similibus tantùm aliis versipellis hominibus hæc habere S. Basil. neque enim existimabat pravè sensisse legatos omnes, qui ad Liberium missi fuerunt; nec Orientales, à quibus legationem acceperant: in eadem enim epist. laudat, ut beatum virum, Silvanum Episcopum Tarsensem, qui è numero legatorum erat. Sed jam exscripsimus quæ de Meletio & aliis Episcopis, qui pro *ὁμοούσιον* stabant, censeret ipse S. Basilus.

Non est quod immoremur in confutandâ eorum sententiâ, qui SS. Athan. Hil. Bas. & alios, in vocis *ὁμοούσιον* interpretatione prudenter œconomiâ fuisse usos asserere non dubitant, tùm ut suis partibus adjunctis eâ ratione Basilio Ancyra. & aliis, amplificarentur; tùm ut sibi confiderent, catholicè sentientium aucto sic numero; undè fieret ut de illis deturbandis Concilia non haberent Ariani. Etenim hanc in sententiam descendit nunquam, qui noverit quâ constantiâ SS. Athan. Hilat. &

Basil. Christi partes propugnarent; quot periculis omnium gravissimis capita objecerint, ne vel leviter, aut Arianis communionem, aut verborum novitate & mutatione, fides læderetur. Aded non pro Episcopatu servando laborabant, etiam in medium adductis vocabulorum expositionibus detortis, ut obtulerit S. Athanasius Arianis se prompto animo à suâ sede recessurum, si Nicænæ fidei vellent subscribere. Ad res suas promovendas alia & facilior occurrebat via; sed viris tam eximii unica salus, & Dei gloria erat sollicitudini.

ARTICULUS SECUNDUS.

De vocabulis Personâ hypostasi, substantiâ, & existentia relatîva, & absolutâ.

QUOD hic de personâ, idem de substantiâ, aut hypostasi dictum volumus. 2. & 3. seculis in usu fuit personæ nomen, ut quo frequenter Tert. utatur lib. cont. Prax. Facundus Hermianensis lib. 1. in usum prædicationis personæ nomen tunc fuisse sumptum observat, cum Ecclesiam Sabellius impugnaret. Illud nomen adhibuerunt, qui subsecuti sunt SS. Patres & Concilia, ut monet S. Aug. lib. 5. de Trin. cap. 9. & lib. 7. cap. 4. itaque loquendi causâ de ineffabilibus, ut fari aliquo modo possemus, quod effari nullomodo possumus, dictum est à nostris grecis una essentia, tres substantia: à Latinis autem, una essentia vel substantia, tres persone; quia, sicut jam diximus, non aliter in sermone nostro, id est Latino, essentia quàm substantia solet intelligi. Quamquam & nos, sicut dicimus in Deo tres personas, ita & tres substantias, cum hoc addito, individuas, & unam substantiam communem, quæ est essentia, dicere possumus.

Verbum hypostasis variè intellectum gravibus dissidiis locum dedit. Quandoque enim pro naturâ usurpabatur ex S. Ath. orat. 5. ubi sic loquitur: *Una est essentia & hypostasis quæ dicit: ego sum qui sum; & non duplex, ne duosint principia.*

Ex S. Hil. lib. de Syn. nomen substantiæ pro personâ familiari erat in usu, & Synonyma erant vocabula hypostasis, & substantia. S. verò Epiph. lib. 3. tom. 1. docet per hypostasim ab Orientalibus personarum proprietates substantiales, existentesque declarari. In collatione cum Severianis an. 533. habitâ conveniunt Catholici, veteres, maximè Romanos, pro substantiâ & naturâ, substantiam; Orientales autem, pro personâ substantiam; & pro naturâ hypostasim nuncupasse. Utriusque linguæ peritus S. Athanasius indè natam æquivocationem sustulit Concilii Alex. an. 363. cui præerat, autoritate. In epist. Synodicâ cui subscripsit Paulinus Antioch. Episc. monet & hortatur Episcopos qui tunc Antiochiæ versabantur, ut singulos sive qui unam, sive qui tres hypostases agnoscerent, ad pacem adducerent, solius Nicænæ Syn. postulatâ professione & ne vel levis superesset scrupulus, addit, diligenter à se habuit inquisitione in hypostasis unius,

aut ternæ usurpatione, nihil à fide alienum se deprehendisse.

Qr. quæ fuerit inter Ss. Meletium, & Paulinum Antiochiæ Episcopos de unâ vel triplici in Sanctissimâ Trin. admittendâ hypostasi contentio? Et num ad fidem pertinuerit? Priusquàm, quid de hâc quæstione sit sentiendum, exponam; Ecclesiæ Antiochenæ status paucis videtur explicandus, ne Theologorum animi, auditis Antioch. Episcoporum Catholicorum simul contra Canones plurium nominibus, nonnihil molestiæ patiantur. Audient præter duos istos Catholicè sentientes extitisse alios duos, Euzoium scilicet factioni Arianz præfectum, & Apollinistarum ducem, aliàs S. Meletii Presbyterum, Vitalem. Intereà Eudoxio Ariano Constantinopolim Imperatoris Constantii autoritate an. 361. translato; de S. Meletio Sebastîâ pariter transferendo Antiochiam convenere, tùm Episcopi Catholici, qui Meletii Catholicum animum & pietatem insignem noverant; tùm & factionis Arianz Episcopi, qui Meletium secum sentire censebant.

Tunc autem Eustathiani, qui à temporibus S. Eustathii Antiochiæ Episcopi ab Arianis in quodam conventu Antiocheno impiè penitus depositi, & jam à pluribus annis demortui, seorsim convenerant, Episcoporum Arianorum Antiochiæ sedentium communionem exosi, ad S. Meletii, quem Arianorum factione institutum suspicabamur, communionem adduci non poterunt. Coram ipso Constantio, & universâ Antioch. Ecclesiâ Episcopi, &que astantibus, in concione publicâ fidem Catholicam professus S. Meletius, in exilium ab Imp. fuit amandatus, & in ejus locum susceptus Euzoius. Quocircà advenit, ut Arianz partis viri seorsim; Eustathii discipuli seorsim pariter, & Meletiani seorsim quoque conventus celebrarent. Sicque tres in partes divise fuere in urbe Antiochenâ Christiani. Pars etiam quarta postmodum ex Apollinaristis coaluit, & Vitalem Episcopum fuit sortita: Et sic Episcopi Antiocheni nomen, tùm Meletius Catholicus, tùm Euzoius Arianus, tùm Vitalis Apollinarista sibi vindicabant, solâ Eustathianorum partē Episcopo destitutâ. Postea Constantio Imper. mortuo, & Juliani jussu ex exilio revocatis Episcopis, Lucifer Calaritanus à Concilio Alex. Antiochiam ad Eustathianos cum Meletianis conciliandos missus, zelo nimium præcipiti, non expectato S. Meletii reditu, Paulinum pietatis singularis Presbyterum Eustathianum creatum Antiochenum Episcopum; in hunc ratus consensuros Catholicos omnes, nec S. Meletii sanctitatis, aut ejus pro fide laborum & molestiarum rationem esse habituros. Sed alius fuit Catholicorum affectus, qui exulem S. Meletium, confessorem exilium, debitâ veneratione fuerunt prosecuti; nec adhæserunt S. Paulino. Tunc autem, ex S. Basil. epist. 349. inter Paulinum & Meletium fuit excitata contentio: in Deo unam, & singularem hypostasim S. Paulinus profitebatur; S. verò Meletius tres. Hanc quæstionem gravis momenti ducit S. Bas. & eos qui unam tantum in Deo hypostasim agnoscerent, Sabellianismi non dubitat incusare. Ed usque contentionis æstus exarserat, ut se mutuo velut hæreticos exagitarent, licet de fide Nicenâ convenirent. Hanc deplorat calamitatem, & explicat S. Greg. Naz. Idem dissidium exseribit, lib. 1. Hist. cap. 29. Rufinus. Cæterum de Verbis folis fuisse motam litem,

mox ex S. Ath. & ex Syn. Alex. retulimus; nec tamen sopita fuit contentio. Nam postmodum illius questionis occasione, unius ab istis, vel trium hypostaseon ab aliis professio exigebatur, sicut refert S. Hier. in epist. ad Damasum Papam, ubi ait, *non novi Vitalem, Meletium respuo, ignoro Paulinum*. Adpicit à se homine Romano novellum nomen exigi ab Apostolis non traditum, interrogamus, quid per tres hypostasas posse arbitrentur intelligi: tres personas subsistentes aiunt: respondemus nos ita credere. Non sufficit sensus, ipsum nomen efflagitant; quia nescio quid veneni in syllabis laet: clamamus, si quis tres hypostasas, aut trias enypostatas, hoc est, tres subsistentes personas non conficietur, anathema sit: & quia vocabula non edificimus, heretici iudicamur. Si quis autem hypostasim aliam intelligens, non in tribus personis unam hypostasim dicit, alienus à Christo est. Addit apud totam humaniorum litterarum scholam nihil aliud hypostasim significare, quam *ὑπόστασις*; aitque tres substantias prædicare, sacrilegorum esse; cum sola Dei natura verè sit, & subsistat; & quæ creata sunt, propriè non sint; cum aliquandò non fuerint. Sufficiat nobis dicere unam substantiam, tres personas subsistentes, perfectas, æquales, coeternas. Taceantur tres hypostasas, si placet, & una teneatur. Non bonæ suspicionis est, cum in eodem sensu verba dissonant. Sufficiat nobis memorata credulitas: aut, si rectum putatis tres hypostasas cum suis interpretationibus debere nos dicere, non negamus: sed, mihi credite, venenum sub melle laet. Quam fidei professionem perstringit S. Hieron. præsertim quòd exigeretur; eam exegit S. Epiph. à S. Paulino; nec alià lege ad communionem eum admisit ex S. Basil. epist. 325. ad S. Epiph. quàm cum tres hypostasas admittere se professus est. Eam Paulini Antioch. professionem describit S. Epiph. har. 77. Extat tamen in Concilio Ephes. Acacii Beroënsis epistola ad S. Cyrill. quæ est 15. inter S. Cyrilli epist. in quâ scribit Paulinum tres hypostasas noluisse proferre: sed hæc altercatio erat tantum de vocibus, quas ille, vel iste admittere renuebat, ut habet S. Gregor. Naz. in orat. funebri S. Athan. Nam cum *ἕνα*, sive substantia una, & hypostasas tres à nobis pie dicerentur (quòd alterum divinitatis naturam, alterum personarum trium proprietates declares) atque eodem quidem modo apud Romanos intelligerentur: ceterum ob linguæ illius angustiam & verborum, hypostasim ab *ἕνα* distinguere non possent, eoque factum esset, ut pro eâ, ne tres substantiæ admittere viderentur, personarum vocabulum inducerent. Quid tandem contigit? res profectò ridicula, vel potius miseranda. Diversa fidei speciem præbuit levis & jejuna de vocum sono altercatio: hic deinde & Sabellianismus ob tres personas excogitatus est, & Arianismus ob tres hypostasas; quorum utrumque peritæ contendendi studium effinxerat. Sic postea, licet inter se de fide convenirent Orientales & Occidentales; Orientales tamen Occidentalibus Ariani esse videbantur, quòd tres substantias in Deo esse profiterentur: & pariter Orientalibus Occidentales Episcopi favere Sabellio censebantur, quòd unam in Trinitate substantiam dicerent.

Quæritur 2. in quibus sita sit ratio personæ.

R. cum SS. Patribus jam laudatis personam significare quod singulare est: vulgò autem definitur *rationalis natura individua substantia*: dicitur *individua*, ut designetur substantia per se subsistens, seu quæ apta non est existere per aliud suppositum: undè ab hac definitione excluduntur accidentia, & partes totius: item & hæc ratione ita contrahitur substantia, ut aliis suppositis communicari non possit. Natura ibi sumitur pro essentiâ, quæ quidem communicari potest. Additur *rationalis natura*, id est intellectualis. Et sic ad rationem personæ quinque requiruntur, nimirum ut sit substantia, intellectualis, completa, per se subsistens, & incommunicabilis. Personæ autem nomen, in divinis, relationem significat, ut subsistentem; seu essentiam divinam, quatenus habet relationem conjunctam; & proindè nomen personæ concretum est.

Traditum à S. Aug. regulæ lib. 5. cap. 8. de Trin. est inhærendum; nempe quidquid in Deo ad se dicitur, substantialiter dicitur: quod autem ad aliquid, non substantialiter, sed relativè dicitur: undè quidquid ad se de personis divinis dicitur; non pluraliter, sed singulariter accipitur: hinc dicitur magnus Pater &c. non tamen dicuntur tres magni; & proindè, si persona esset quid absolute, Pater, & Filius dicerentur una persona. Ità S. Bas. epist. 43. ad S. Greg. Niss. hypostasis sensum definit, ut aliquid singulare exprimat: undè in recto proprietates relativas significat persona; in obliquo verò essentiam divinam: quod etiam ipse S. Bas. docet lib. 2. cont. Eunom. S. Aug. epist. 66. ad Maximum, ita confutat Arianos, qui diversæ naturæ Patrem & Filium esse probabant; quod iste, Pater esset; & ille, Filius: *Quis enim non videat ista vocabula non in se ipsis demonstrare naturas; sed alterius ad alterum significare personas? Tale est etiam illud, quod simili loquuntur errore, ideo Filium alterius esse naturæ, diversæque substantiæ; quia Pater Deus non est de altero Deo: Filius autem Deus est quidem, sed de Patre Deo: & hic non indicatur substantia, sed origo; id est non quid sit, sed undè sit quisque, vel non sit.* Etenim si Pater, Pater esset, quæ essentiam habet; cum essentia nihil aliud sit, quàm ipse Deus, Pater esset, quatenus Deus est; & illi idem esset Patrem esse, quod Deum esse: quod dictu nefas est. Sic etiam habet Toletana Synod. 14. his verbis: *Quod enim Pater est, non ad se, sed ad Filium est; & quod Filius est, non ad se, sed ad Patrem est. Similiter & Spiritus sanctus non ad se, sed ad Patrem, & Filium relativè refertur; in eo quod Spiritus Patris & Filii predicatur.* Et verò cum constet nihil in Deo absolute esse, quod tribus personis non æquè conveniat; indè colligitur per id solum, quod est proprium, & tribus non commune, constitui quamlibet personam, uti docent SS. Athan. orat. 2. Hilar. 12. de Trin. Bas. epist. 349. SS. Greg. Naz. orat. 23. & Niss. lib. 1. cont. Eunom. Bernard. epist. 170. seu tractatu de erroribus Petri Abailardi cap. 3. & Conc. Later. 4. adversus Joachimum Abbatem cap. 2.

Nec indè sequitur relatione solâ constitui personam; & cum generatur

Filius Divinus, generari filiationem solam: generatur enim ea persona quæ est Filius, ex essentiâ divinâ & proprietate, seu filiatione constitutus. Cum verò sapientia gigni dicitur, de termino completo est sermo, seu de Filio, qui sapientia est. Lateran. etiam Synodus definiit contra Joachimum essentiam, aut divinitatem, in abstracto sumptam, non generare.

OPP. 1. ex S. Aug. cap. 6. lib. 7. de Trin. personam ad se dici, non ad alterum; quod idem est ac secundum essentiam dici, non secundum relationem: Quid ergo? num placet, ut dicamus Patrem personam esse Filii, & Spiritus sancti; aut Filium personam esse Patris, & Spiritus sancti; aut Spiritum sanctum personam esse Patris, & Filii? Sed neque persona ita dici alicubi solet; neque in hac Trinitate, cum dicimus personam Patris, aliud dicimus, quàm substantiam Patris. Quocirca, ut substantia Patris ipse Pater est, non quo Pater est, sed quo est; ita & persona Patris non aliud quàm ipse Pater est: ad se quippè dicitur persona, non ad Filium, vel Spiritum sanctum: sicut ad se dicitur Deus, & magnus, & bonus, & justus, & si quid aliud hujusmodi: & quemadmodum hoc illi est esse, quod Deum esse, quod magnum, quod bonum esse; ita hoc illi est esse, quod personam esse. Addit etiam cap. 4. loquendi consuetudine, & disputandi necessitate factum, ut tres personas potius diceremus, quàm unam.

R. cum eodem S. Aug. personam ad se dici in obliquo, non in recto: Nihil enim aliud persona dicit in recto, quàm proprietatem, quâ constituitur in esse personæ: Et ut videre est, personæ nomen latè hoc in loco usurpat S. Aug.

INST. Relationes divinæ supponunt personas jam constitutas: omnis enim relatio supponit extrema realiter distincta: nulla autem in divinis est distinctio, nisi inter personas. Ergo relationes divinæ non constituunt personas.

R. Relationem omnem supponere extrema distincta, vel facere: Prioris generis sunt creatæ relationes; posterioris verò increatæ. Et sanè, Pater, vel Pater est, quâ essentiam habet divinam; vel quâ habet paternitatem. At Pater non est, quâ Deus; alioquin aut Filius esset Pater, aut non esset Deus: Ergo Pater est, quâ habet Paternitatem; & proindè personæ divinæ non constituuntur in esse personæ per naturam divinam, quæ ipsis communis est; sed per proprietates personales, seu per relationes. Undè persona divinâ constituitur ex proprietate personali in recto & ex essentiâ divina in obliquo.

Queritur 3. an detur in Deo subsistentia absoluta?

R. Non dari in Deo subsistentiam absolutam. Nam 1. sunt tantum tres personæ: At essent quatuor, si subsistentia daretur absoluta: quia tam per subsistentiam absolutam constitueretur persona, quàm per tres relativas. 2. Ex Conc. Ephesino. *Siquis in Christo hypostases dividat, Anathema sit.* At datâ hypostasi absolutâ, posset in Christo duplex admitti hypostasis. 3. In Concil. Const. 3. debetur deitatem in tribus subsistentiis subsistere,

non in quatuor: Ex in Imp. Justinii confessione habetur, unam esse in Christo substantiam. 4. substantia naturam ultimò complet: At naturâ divinâ non completur ultimò per substantiam absolutam; cum per relationes ulteriùs compleatur. Denique inutilis est ejusmodi substantia; ideòque penitus est rejicienda tanquam aliquid in Deo distinctum.

OPP. Ex S. Aug. lib. 7. de Trin. cap. 4. *omnis res ad se ipsam subsistit, quântò magis Deus?*

R. S. Aug. non loqui de substantiâ, prout hypostasim significat; sed tantùm prout designat substantiam, aut esse divinum substantiale, non verò personam: dixerat enim antea, quòd, quemadmodum essentia dicitur ad esse, ita & à subsistere, substantia.

INST. 1. ex Agathone Papâ, & Syn. Rom. in epist. quæ habetur in 6. Syn. actione 4. *Confitemur trium substantiarum unam substantiam.* Unica ergò est substantia trium personarum, quæ nonnisi absoluta esse potest.

R. nomine unius substantiæ, substantiam seu naturam divinam intelligi: Eo sensu quandòque id occurrit apud antiquos quosdam, qui duas substantias Christo, idest, duas naturas inesse scribunt. Præterea græcè habetur in Agathonis epist. trium *ὑποστάσεων* unam *οὐσίαν* seu naturam.

INST. 2. Non potest Deus concipi, quin concipiatur subsistens per se, aut ens absolutum; præsertim cum substantia absoluta sit perfectio simpliciter simplex.

R. Deum concipiquidem, in ratione essentia, tanquam ens absolutum; ut potè cum ab altero non pendeat, nec alteri sit inhærens: sed non concipi ut subsistens substantiâ absolutâ; alioquin natura divina fieret incommunicabilis. Undè substantia absoluta perfectio simpliciter simplex non est in Deo: nam naturæ divinæ communicationem impediret; nec *hic Deus*, aliud exprimit distinctè præter Deitatem; indistinctè verò & confusè tres substantias.

INST. 3. subsistit Natura divina per substantiam absolutam, priusquam substantiæ dentur relativæ: Prius enim est rem esse, quàm operationes elicere, & proprietates ex naturâ suâ emittere; actiones enim sunt suppositorum.

R. quod objicitur, in creatis quidem rebus habere locum, quia operationes sunt termini accidentales; secùs verò in divinâ naturâ.

INST. 4. præcis relationibus natura divina existit in se, & independentè ab alio quocumque subjecto: Ergò verè est subsistens; cum existere in se & non in alio, sit subsistere.

R. Naturam divinam præcis relationibus non esse quidem in subjecto informationis, aut inhæssionis; sed tamen non habere suum ultimum complementum, per quod fit incommunicabilis.

Quæritur 4. Num Deo deneganda sit absoluta existentia, sicut ipsi denegatur absoluta substantia? num etiam dentur in Deo tres existentia relativæ, sicut dantur tres substantiæ? Sed cum has quæstiones non moverint SS. Patres, non est cur in illis multùm immoremur: undè,

Respondeo primò dari in Deo existentiam absolutam: nam cum existentia sit de essentia Dei conceptu, ut art. 1. quæst. 1. probatum est, & essentia personis æquè conveniat; indè consequens est dari existentiam absolutam, & tribus personis communem.

R. 2. non admittendas esse in Deo tres existentias relativas. 1. quia multiplicatis existentis multiplicarentur essentia. 2. cum existentia nihil aliud sit, quàm rei duratio, seu in esse consistentia; & æternitas Dei sit duratio; si plures in Deo æternitates non sunt, nec etiam existentia plures. Eodem quoque pacto cresceret immensitatum numerus, &c. quod à ratione est alienum. 3. Cui bono essent relativa illa existentia? cum, quidquid eis attribuitur, præstet existentia. 4. Indistinctam semper Dei essentiam & existentiam agnovere SS. Patres; præsertim quòd Deus necessariò existat; & de aliis certum sit, aliquandò non fuisse, & potuisse non esse: tùm quòd etiam Deus existentiam, ut essentiam suam, his verbis, *ego sum qui sum*, significarit: undè aliàs probatum est, ne ipsa quidem ratione, aut cogitatione separari posse existentiam ab essentia Dei.

O P P. Paternitas est aliquid actu; cum & ab essentia sit distincta, & à Filiatione &c. Ergò actu seorsim existit; cum à Filiatione differat proprio existendi modo, qui nihil aliud est, quàm existentia illa relativa. Et idè S. Aug. lib. 7. de Trin. cap. 4. & 6. sic habet: *aliud est esse Deum, aliud est esse Patrem*. Item S. Cyr. dial. 7. de Trin. ita loquitur: *uterque Pater & Filius subsistit, propriamque dicitur habere existentiam*.

R. velle S. August. alià ratione manifestari, quid sit Pater; alià, quid sit Deus: undè lib. 5. de Trin. cap. 10. *Non dicimus*, inquit, *in Deo tres essentias*. S. autem Cyrill. existentiam usurpat pro hypostasi: Neque verò negamus relationes esse aliquid actu, prout à se invicem distinguuntur; sed dicimus non distingui per existentiam singularem: non enim distinctio ab existentia repetitur, nec ab ipsa essentia; sed ex ipsis proprietatibus relativis: & ut sæpiùs jam dictum est, existentia non est ad aliud, sed ad se; seu est aliquid absolutum, & non relativum.

I N S T. 1. Productionis terminus est existentia: nam productio terminatur ad existentiam: at in Deo plures sunt productiones; & proindè plures termini existentes, saltem per existentias relativas.

R. productionis terminum esse existentiam producendam, vel communicandam: sed non producendam semper; nec proindè opus esse, ut plurium productionum termini sint plures existentia: satis quippè est, si sint plura entia, quibus una existentia absoluta communicetur, quemadmodum contingit in divinis processibus.

I N S T. 2. Personalitas Verbi non præscinditur ab existentia; nec enim potest concipi, quin concipiatur existens: igitur habet suam existentiam propriam.

R. personalitatem Verbi non præscindi præcisione negativà ab existentia; sed præcisione tantùm abstractivà: undè concipitur ut aliquid existens confusè, scilicet per existentiam divinam, quæ communis est tribus.

bus personis; substantiæ enim divinæ instar modorum concipiuntur, imperfectæ quidem; & quia non existunt modi, nisi per existentiam subiecti; ita quoque personalitates non existunt, nisi per existentiam Dei.

Quæritur 5. num in Deo sit numerus?

R. cum Concilio Tolet. 11. in professione fidei, ubi sic habet: *In relatione personarum numerus cernitur; in divinitatis verò substantiâ quid numeratum sit non comprehenditur.* Nec simplicitati Dei nocet numerus ille; non enim numerus totum, & partes infert, cum rei simplicissimæ tribuitur.

Quæritur 6. num in Deo sint tres substantiæ, tria entia, tria individua?

R. 1. S. August. lib. 5. de Trin. cap. 7. his verbis: *Sed quia nostra loquendi consuetudo jam obtinuit, ut hoc intelligatur, cum dicimus essentiam, quod intelligitur, cum dicimus substantiam; non audemus dicere unam essentiam, tres substantias; sed unam essentiam, vel substantiam, tres autem personas.*

R. 2. in Deo esse tria entia relativa, & unum ens absolutum. Sic S. Alexander Alexandr. Episc. in epist. ad Alexandrum Episc. Constantinop. apud Theodoret. lib. 1. hist. cap. 4. Sic quoque S. Augustin. lib. 1. de Doctr. Christ. cap. 5.

R. 3. propriè non esse individua in Deo, seu tres personas non esse sub specie propriè dictâ; quia Deus nulli speciei, vel generi subiacere potest. Nec ullibi S. Athan. tres personas esse tria individua docuit: non enim ejus est opus variarum quæstionum, in quarum septimâ habetur tres personas esse individua tria. Aliundè nec author ille stricto sensu individui nomen usurpat.

Quæritur 7. num sint in Deo tres unitates, tres veritates, tres bonitates?

R. 1. unicam esse in Deo unitatem absolutam, seu essentiæ; sed plures esse unitates relativas; quia tres personæ unitatibus relativis distinguuntur.

R. 2. unicam esse in Deo veritatem essentialem: nam ex S. August. lib. 7. de Trinit. cap. 1. Deus dicitur verus, non relativè, sed ad se ipsum.

R. 3. unicam quoque bonitatem esse: nam ex eodem S. Aug. lib. 5. de Trin. cap. 8. *Bonus Pater, bonus Filius, bonus Spiritus Sanctus: nec tres boni; sed unus bonus.* Lib. 7. c. 6. Deus ad se dicitur magnus, & bonus. Equidem bonum & ens convertuntur; sed cum tres personæ sint tria entia relativa, quæ non habeant tres existentias relativas, sed unicam absolutam, non sunt nisi unicum bonum.



ARTICULUS TERTIUS.

*De nominibus Patris, & Filii, & Spiritûs Sancti,
& aliis quæ tribus Personis tribuuntur.*

AD exprimendum Sanctissimæ Trinitatis Mysterium alia nulla tradunt Scripturæ sacræ ex S. Bas. lib. 5. contra Eunom. quàm Patris, & Filii, & Spiritûs sancti vocabula: quocircà nihil aliud est inquirendum, quàm quod ex ipsis Scripturæ verbis menti objicitur. S. Greg. Niss. orat. 1. contra Eunom. cum infectatur hæreticum, quod suppressis Patris, & Filii, & Spiritûs sancti nominibus, creatorem, creaturam, & creaturæ creaturam, seu opus operis usurparet. Sic, quæ Christus tradidit, & emendare; & quæ veram Trinitatis ideam exhibent vocabula, corrigere non formidat: iis enim auditis nominibus ad cogitandum quid ineffabile inducimur; cum Patris nomen, non essentiam, sed ad Filium relationem significet. Aliundè etiam à Christo discimus à nobis non exigì rei ineffabilis scientiam; & satis esse fidei traditæ inhærere.

Patri æterno tribui solent nomina ingeniti, causæ, & principii sæpiùs exposita. Nomen verò Patris aliis est præferendum; quod unicum in Scripturis tradatur, & ex S. Athan. orat. 2. contra Arianos, Patri æterno propriè conveniat: semper enim Pater est Pater, seu Filium semper generat; cum sit immutabilis. S. Greg. Naz. ità nomen illud exponit orat. 35. *Nec enim essentia nomen est Pater, viri acutissimi, nec actionis; sed relationem eam indicat, quam Pater erga Filium habet, vel Filius erga Patrem: ut enim apud nos appellationes istæ germanam quamdam conjunctionem, & necessitudinem indicant; ad eundem modum illic genitorem ac genitum eandem habere naturam significant. Sed sic sanè in vestri gratiam Pater essentia quadam: Filium utique simul introducet; non autem removebit, & alienabit: ut & communes notiones ferunt, & ipsa nominum horum vis ac facultas. Sit etiam actionis, si ità videtur; ne sic quidem causam obtrinebitis: eodem enim modo dicemus hoc egisse Patrem, ut consubstantialis ipsi Filius esset: etsi aliqui absurditate non caret huiusmodi actionis opinio.*

Dicitur Pater principium, originis scilicet, non creationis; Filius enim, & Spiritus sanctus eandem creationis, sive operum ad extra principii rationem, sicut & eandem cum Patre divinitatem obtinent: originis verò principii ratio Patri convenit respectu Filii; & Filio, & Patri respectu Spiritûs sancti. Hæc distinctione corrui istud Arianorum argumentum, videlicet fuisse in tempore Filium, utpotè genitum: non enim ab alio est, tanquam à principio creationis, quæ sit in tempore; sed tanquam à principio originis, cui Filius est cœternus. Alio etiam

scnsu Pater æternus dicitur principium, ut qui non sit ab alio, sed principium sine principio; quæ principii ratio Filio non competit.

Pater non est dicendus author personarum divinarum; si authoris nomine designetur aliquod jus, aut dignitas: ita S. August. lib. 2. cont. Maximinum cap. 14. *Sed habet, inquis, Dei Filius authorem Patrem. Si propterea Deum Patrem Deo Filio dicis authorem, quia ille genuit, genitus est iste; quia iste de illo est, non ille de isto; fateor & concedo. Si autem per nomen authoris minorem vis facere Filium, Patremque majorem, nec ejusdem substantia Filium, cujus est Pater; detestabor & respuam: quia & Filius hominis, in quantum est Filius, habet authorem, de quo natus est, Patrem; nec tamen ideo non est ejusdem substantia, cujus est Pater. Quare author appellari potest Pater; quia de ipso est Filius.*

Secunda persona Verbum æternum dicitur, ut & Sermo sæpè ab antiquis, ut à Tertull. lib. contra Hermog. cap. 20. & lib. contra Prax. cap. 13. à Novat. lib. de Trin. cap. 20. à S. Aug. serm. 118. in Joan. & tandem à Paulino in natali S. Felicis. Frequentior tamen est Verbi usurpatione apud eosdem, & apud Patres, qui post Nicenam Synod. floruerunt. Dicitur Filius; quia verè generatur à Patre, & est Patris imago; ut qui divinam Patris naturam referat & contineat.

Sancti Spiritus nomen tertiæ personæ negavit Eunomius, eamque solo nomine Paraclæti compellavit; eo scilicet animo, inquit S. Greg. Niss. or. 1. cont. hunc hæreticum, ut omnem cum Patre Spiritui Sancto æqualitatem auferret, quæ illo vocabulo designabatur. Hoc nomine ex S. Aug. lib. 5. de Trin. cap. 11. non designatur ejus ad Patrem & Filium relatio: quia nomen Spiritus, relationis nomen non est; sed per nomen doni & conjunctionis significatur, quòd ab utroque procedat; & consequenter Pater & Filius dicendi sint donator, Spiritus Sanctus vocatur etiam Paraclætus ex S. Ath. or. 5. quòd consolatoris vices obeat.

ARTICULUS QUARTUS.

De Processionibus.

QUæritur 1. utrum, quid, & quotuplex sit in Deo processio?

R. 1. admittendas esse in Deo processionem; cum Filius à Patre, & Spiritus Sanctus à Patre & Filio procedant. Et verò si nulla esset in Deo processio, unica esset in Deo persona; cum non distinguantur personæ divinæ, nisi oppositione relativâ, quæ oritur ex processione: vel quilibet personæ essent innascibiles, & improductæ; & consequenter plures Dei; nam solâ naturæ diversitate scernerentur.

R. 2. processionem in Deo sumi pro unius personæ ab aliâ origine; quæ quidem processio non oritur à principio, tanquam à causâ propriè dictâ: Omnis enim effectus mutationi, & dependentiæ obnoxius est, arguitque aliquid se ipso naturâ prius. Eadem autem natura communicatur

divinis personis, quæ procedunt; & proinde omnis dependentiæ ratio ab iis excluditur; nec inter easdem ulla repetitur prioritas, nisi originis, quæ una persona est ab alterâ. Undè ex S. Aug. genitorem inter & genitum est ordo naturæ; non quòd alter sit prior altero, sed quòd sit ab altero.

Ac ne de nomine sit ulla contentio, principii & causæ vocabula plerùmque ut Synonima à SS. Patribus usurpantur, ut à S. Greg. Naz. or. 29.

R. 3. Duas esse in Deo processiones, nempe Filii & Spiritûs Sancti; à Patre quippè procedit Filius, à Patre & Filio Spiritus Sanctus. Nec plures, nec pauciores, ex Scripturis & traditione, sunt admittendæ: alioquin everteretur Mysterium; quia tunc essent plures, quàm tres personæ.

O P P. Repugnat duplex in Deo processio; quia productione terminî infiniti, Filii scilicet, exhauritur potentiæ fecunditas.

R. unicâ processione non exhauriri Divinam fecunditatem; quis ex Scripturis & traditione duæ sunt in Deo processiones. Nec in contrarium obstat ullatenus, quod indè perperam colligunt nonnulli, plura fore infinita, quæ manifestam involvunt repugnantiam: licet enim plura infinita in omni genere perfectionis absoluta non possint dari; possunt tamen dari plura infinita relativa, quæ naturæ divinæ identificentur, & variâ ratione, licet nobis ignotâ, procedant.

Queritur 1. num ejusdem rationis sint Filii & Spiritûs Sancti processiones?

R. Filii & Spiritûs Sancti processiones ejusdem non esse rationis. Etenim in sacris Scripturis Filii processio dicitur generatio; non sic Spiritûs Sancti productio. Idèd Filius dicitur genitus. Ps. 20. v. 7. *Dominus dixit ad me Filius meus es tu, ego hodie genui te*: Quo loco Apostolus utitur Heb. 1. v. 5. ad divinitatem Christi asserendam. Et Ps. 109. v. 3. *Ex utero ante Luciferum genui te*: Quo utitur ipse Christus Matth. 22. Isaiæ quoque 53. v. 8. habetur *Generationem ejus quis enarrabit*? Joan. etiam 3. v. 16. *Sic Deus dilexit Mundum, ut Filium suum unigenitum daret*. Item 1. Joan. 5. v. 20. *Ut simus in verò Filio ejus*. Ergo Filii processio juxta Scripturas est generatio.

Præterea hoc ipsum tradunt unanimi consensu Sancti Patres; tùm ii, qui sanctam Synodum Nicænam antecessere; tùm & illi, qui eam sunt subsequuti. Attamen eorum testimonia referre supervacaneum duximus; cum nullus revocare possit in dubium illa esse apertissima, & numero ferè infinita.

Quod attinet ad Spiritûs Sancti processionem, ea nec in Sacris Codicibus, nec in sanctorum Patrum monumentis nomine generationis appellatur: immò à productione Filii penitus secernitur. Quod & potissimum his habemus expressum verbis in Symbolo, quod à nonnullis sub sancti Ath. nomine vulgatum est. *Filius à Patre solo est; non factus, nec creatus; sed genitus. Spiritus Sanctus à Patre & Filio; non factus, nec creatus, nec genitus; sed procedens.*

O P P. Non est cur Filii processio generatio potiùs dicatur, quàm processio Spiritûs Sancti; cum Filius & Spiritus Sanctus pariter in naturæ similitudinem vi processionis procedant.

R. ex vulgari generationis definitione, quam non omnino exactam esse censent non pauci, nihil adversum nos erui posse: licet enim in scholis vulgò recepta generationis definitio Spiritus Sancti processioni conveniret; non idcirco genitus ille dicendus esset; quia Filium non idcirco genitum diximus, quod ejus origo vulgari generationis idcirco respondeat; sed quia solus Filius tum in Script. dicitur genitus tum & in symb. quod S. Ath. nomine circumfertur. Cum ergo Spiritus Sanctus nec in script. nec à SS. l. a tribus genitus dicatur; nec ejus quoque processio generatio dicenda est.

Cur autem processio Filii dicatur generatio; productio verò Spiritus sancti dicatur tantum processio, sequentibus conclusionibus aperiemus; & quid potissimum S. Patres Dei Verbum exponentes docuerint, palam faciemus.

CONCL. I. Discriminis, quod inter utramque processionem intercedit, ratio nulla evidens afferri posse nobis videtur.

Prob. quia Verbi generationem, ut ineffabilem, ut nemini notam, referunt Scripturæ; & Scripturarum autoritate freti SS. Patres adversus hereticos, curiosiores Mysterii tam occulti & tam sublimis indagatores, insurgunt; docentque ipsis etiam Angelis illud esse incognitum: unde illos, qui scrupulosius inquirerent, damnaverunt.

1. Ut ineffabilem Verbi generationem referunt Scripturæ, & ex Scripturis SS. Patres. Isaïæ quippe 53. v. 8. *Generationem ejus quis enarrabit?* Matth. quoque 11. v. 27. *Nemo novit Patrem nisi Filius, &c.* Quod & probant loca scripturæ & SS. Patrum 1. q. art. 1. & 3. adducta. His S. Irenæum addemus qui hæreticos Verbi generationem suo more explanare conatos ita comprimit lib. 2. cap. 48. *Generationem ejus quis enarrabit? vos autem generationem ejus ex Patre divinantes, & verbi hominum per linguam factam prolationem transferentes in Verbum Dei, justè decemini à nobis ipsis, quòd neque humana, nec divina noveritis; irrationabiliter autem inflati, audaciter inenarrabilia Dei Mysteria scire vos dicitis. Quandoquidem & Dominus ipse Filius Dei ipsum judicii diem & horam concessit scire solum Patrem, manifestè dicens: de die autem illa & hora nemo scit, neque Filius, nisi Pater solus. Si igitur scientiam dei illius Filius non erubuit ad Patrem referre, sed dixit quòd verum est: neque nos erubescimus, quæ sunt in questionibus majora secundum nos, referre Deo; nemo enim super Magistrum est. Si quis itaque nobis dixerit, quomodo ergo Filius prolatus à Patre est? Dicimus ei, quia prolationem istam, sive generationem, sive nuncupationem, sive adaptionem; aut quomodolibet quis nomine vocaverit generationem ejus inenarrabilem existentem, nemo novit; non Valentinus, non Marcion, neque Saturninus, neque Basilides neque Angeli, neque Archangeli, neque potestates, nisi solus, qui generavit Pater, & qui natus est Filius. Inenarrabilis itaque generatio ejus cum sit; quicumque nituntur generationes & prolaciones enarrare, non sunt compotes sui, ea, quæ inenarrabilia sunt, enarrare promittentes. Et de illis hæc appositè addit, cap. 49. Hinc quasi obstricti caveant, primæ generationis ejus prolationem & generationem enarrant, assimilantes eum hominum verbo emissionis. Igitur primis seculis fides erat Verbi generationem nulli rei*

creata cognitam esse; eamque proinde ab hominibus explanari non posse: imò reos esse homines, qui eam se animo complecti censerent, dum eam quibusdam comparationibus conarentur illustrare.

2. Ideò ab illà inquisitione, ut non traditâ, S. Ath. epist. ad solitar. abstinere se professus est; & ab eâ solitarios avocavit, suo exemplo proposito. *Quando enim magis scribere volebam, & Instantius rem urgebam, ut divinitatem Verbi intelligerem; tantò longius ejus rei cognitio à me subterfugebat, & sentiebam me tantum à tergo relictum esse, quantum me promovisse & assequutum esse arbitrabar. Nam hoc ipsum, quod & animo comprehendere videbar, scribere non potui; & quod scribebam, minus erat, quam concepta in animo veritatis umbra.* Item orat. 3. cont. Arian. sic habet: *indecorum est querere quomodo ex Deo Verbum sit, aut quomodo sit Dei splendor, aut Deus, & quis sit modus generationis Dei. Insanieris enim qui talia auderet: quoniam rem ineffabilem & propriam divinæ naturæ, & duntaxat ipsi ac filio suo cognitam, verbis interpretari conatur.* Si igitur ipse S. Athan. ob exortam Arii hèresim de hoc Mysterio explanatius agere coactus, censuit ultra quæ fidei sunt, sibi non esse progrediendum: imò si periculo non vacare asserit inquisitionem ulteriorem; hæc sanè nobis pro lege constitui debet tanti viri sollicitudo.

Alia non fuit disserendi ratio cæterorum iisdem temporibus adversus Arianos fidei defensorum, qui doctrinæ nobis in Scriptoris traditæ standum esse prædicant; & innumeras quæstiunculas, quibus Ariani Mysterium aut implicabant, aut molestiam rudioribus faciebant, eâ cautione ex Scriptoris acceptâ, remonent; variisque rationibus, iisque solidissimis, utuntur. S. Hil. lib. 2. de Trin. ipsis Angelis ignotam esse Verbi Divini generationem proficitur. Item S. Basil. Hom. 25. ità loquitur: *Ubi enim, inquit, nec tempus, neque ævum intercedit, neque item modus intelligitur, nec spectator adfuit, nec est qui exponat; quomodo mens aliquid imaginabitur? quomodo mentis cogitationibus lingua famulabitur? Pater autem erat, & Filius est genitus: ne dicas, quando; sed neglige hanc quæstionem: ne quæras, quomodo? est enim hîc impossibilis responsio. Nam, quando, tempus habet; quomodo verò, quandam ad modos corporeos declinationem. Et Hom. 29. sic habet: Ne quæras quæ inveniri non possunt; non enim invenies. Si enim quæris, à quo discere potes? à terrâ? non substiteras: à mari? nondum erat liquidum: à cælo? non eras elevatum: à Sole, & Lunâ, ac astris? nondum creata erant: at à sæculis? ante sæcula unigenitus. Ne interroges ea quæ non semper sunt, de semper existente: si verò non vis, sed contendis; derideo tuam amentiam: imò potius deploro tuam temerariam audaciam. In principio erat Verbum, & Verbum erat apud Deum, & Deus erat Verbum: vox, erat, obliteras vocem, non eras; &, Deus, obliteras vocem, non Deus. His, quæ scripta sunt, crede; quæ non sunt scripta, ne quære.*

Utramque Verbi generationem silentio esse adorandam docet quoque S. Meletius Antioch. aitque de Verbi generatione non esse agendum, ne à nobis temeritatis pœnas Deus exigat. Sic apud S. Epiph. lib. 3.

tom. 1. hēr. 73. *Quamobrem verendum nobis est, ne, dum de his quæ assequi non possumus, quo jure, quæque injuriâ disputare volumus, ne de his quidem quæ attingere possumus, disputandi facultas relinquatur: nam ex fide loqui, non ex his quæ quispiam loquitur, fidem adhibere convenit; credidi enim, inquit, propter quod & locutus sum: Postquàm autem dixit timendum ne nobis idem, quod Zachariæ, obveniat, qui humano sensu divinam potestatem voluit admetiri, hæc addit: Etenim quantò quisque ad scientiam propius videtur accedere; tantò magis reputare cum animo suo debet hominem se esse; quâ de re audi quid ille dicat: ego verò dixi in excessu meo; omnis homo mendax. Itaque cum præceptorem veritatis habeamus; nullos amplius humanos doctores adjungamus; sed apud nos ipsi cogitemus; ac neque divinarum rerum modos & rationes, neque quidpiam aliud curiosius indagemus: ut enim Filii generationem explicare nemo potest; ità & modum illum quo Pater genuit, enarrare nullus potest.*

S. Greg. Naz. orat. 23. ait in hac vitâ non posse cognosci Verbi generationem: *At verò Patris proprietates hæc est. Quòd ingenitus sit; Filii, quòd genitus; Spiritus Sancti, quòd procedat: quòd si modum quæris; quid eis relicturus es, quos solos mutuo se cognoscere, atque à se mutuo cognosci Scriptura testatur? aut iis etiam nostrum, qui postea divinitus illuminabuntur? Et orat. 29. quærit ab inquirentibus quomodo sit generatus Filius? Si creatus est; quæro quomodo sit creatus? Si enim in generatione passio est, occurrit quoque & in creatione: non enim alio pacto affingi, aut administrari possunt creature. Cum igitur creatio ejus sit naturæ, ut eam nemo nostrum assequi possit, nihilque in creaturis simile comperiat: potiori jure dicendum nihil occurrere animo, quod ad generationem Verbi accedat: Non inquirenda est, inquit, Verbi generatio; quidquid enim dici aut excogitari potest, ejus naturâ longè est inferius. Satis, si Verbum ut Filium, & Patrem ut Patrem noverim. Hic hæreo, ne mihi contingat, quod attentè oculos in Solem conjicientibus: aut enim excæcantur; aut oculorum infirmitatem patiuntur. Audis Spiritum ex Patre procedere; id quomodo fiat, ne anxio studio perscrutemur: & si curiosius insistas, unionis cum corpore quæram rationem: & si quæ penes te sunt, mente assequi non valeas; quomodo ad superiora assurges? Et orat. 35. ipsis Angelis incognitam esse docet Verbi generationem, silentioque colendam; nec sufficientis dignitatis futuram fuisse, si à nobis intelligatur.*

Idem etiam docet S. Aug. lib. 2. contra Maximin. cap. 14. his verbis: *Cur Filius dicatur Filius, & non Spiritus Sanctus; & quid inter nasci, & procedere intersit, de illâ excellentissimâ naturâ loquens explicare quis potest? Non omne quod procedit, nascitur; quamvis omne procedens, quod nascitur. Hæc scio: distinguere autem inter illam generationem, & hanc processionem nescio, non valeo, non sufficio. Ac per hoc, quia & illa, & ista est ineffabilis, sicut Propheta de Filio loquens ait, generationem ejus quis enarrabit? Ità de Spiritu Sancto verissimè dicitur, processionem ejus quis enarrabit? Et tract. 99. in Joan. ità scribit:*

Quid autem illic intersit inter procedere & nasci, & longum est querendo disserere; & temerarium, cum differueris, definire: quia hoc & menti utcumque comprehendere; & si quid forè mens indè comprehenderit, lingua difficilimum est explicare, quantuslibet presit doctor, quantuslibet adsit auditor.

O P P. inquiri posse quâ ratione, & cur Verbi processio generatio sit, non item processio Spiritûs Sancti; & his quæstionibus, quantum humana patitur infirmitas, rationes subjacere; cum præsertim de catholico dogmate contra hæreticos aut infideles non agatur: imò potius videtur id optimum factum; scilicet ut paratiores simus rationem fidei nostræ reddere, & hæreticorum tela facilius retundere, Sanctorum Patrum æconomiam imitati, qui innumeris penè comparationibus hoc mysterium illustrarunt, ut quæstione secundâ, articulo 2. & 3. fuit observatum. Ità Sanctus ipse Athan. orat. 3. contra Arianos, ut Verbi generationem, & cum Patre æterno substantiæ unitatem explicaret, ex verbo nostro ducit ideam quandam, remoris nimirum mutabilitate, originis tempore, & aliis quæ rem creatam comitantur. Et lib. de Syn. Arimin. & Seleuc. à Verbi Divini generatione passionem omnem, & substantiæ divisionem excludit, quia Filius, Patris ratio, & sapientia dicitur. Quâ quidem comparatione nititur sententia, quæ Filium idèò genitum asserit, quia Verbum est, seu quia procedit per intellectum.

R. cum S. Athan. orat. 2. inter eas quæ tom. 2. habentur: *Fateor, & hoc ex Scripturâ didicimus, ut sciamus, querenda quadam esse, ut quæ apprehendi possint: ut enim audacter omnia perscrutari pium non est: à omnem prorsus inquisitionem negligere non est sanctum: est cuiusvis quod adoret scire, secundum quod scriptum est: Nos adoramus quod scimus. Querere autem quantum, qualiter, quomodo, ubi, insanientium est.* S. Athanasio suffragatur S. Hilarius lib. 2. de Trin. his verbis: *Incipe, percurre, persiste: ei si non perventurum sciam; gratulor tamen profecturum: qui enim pie infinita persequitur, etsi non contingat aliquando, tamen proficiet proleundo.* Nullum ergò, dicis, officium est fidei, si nihil poteris comprehendere. Imò hoc officium fides profiteatur, id undè queritur incomprehensibile sibi esse se scire. Igitur inculpate fieri possunt circa Verbi generationem inquisitiones: imò pium & sanctum est inquirere, an sola Filii processio generatio sit; & cur potius quàm Spiritûs sancti processio; ut, quod queritur, nobis esse incomprehensibile sciamus: hoc quippè officium est fidei. Querere verò quomodo generetur Filius; & quis sit modus generationis Filii, & processionis Spiritûs sancti, hoc non licet: *Querere autem, inquit S. Athan. quantum, qualiter, quomodo, ubi, insanientium est.* Idem repetit epist. ad Solitarios, & epist. 2. ad Serap. Idem etiam tradunt SS. Patres in probatione laudati.

Cæterum ne quis forsan putet SS. Patrum dicta hæc in re non satis coherrentia videri, discat necesse est, SS. Patres, quos adamussim sequimur, non sic intelligendos esse, quasi prohibuerint quilibet quæstiones circa divinas processiones, sed certas tantum, easque curiosiores.

Varias profectò his quæstionibus, an, & cur sola Filii processio generatio

ratio dicenda sit, pro virili parte responsiones afferunt varii Theologi, quas non ut illicitas, sed ut insufficientes, nec forsan satis tutas, sequi renuimus: quandoquidem nec in Scripturis, nec apud SS. Patres reperiuntur; licet de Catholico dogmate contra hæreticos, aut infideles non agatur: attamen semper timendum esset, ne videremur iis assentiri, qui naturali rationis præsidio mysterium illud demonstrandum aggrediuntur; vel ne Philosophi, aut hæretici mysterium naturali ratione inniti suspicarentur. Adeò non ex rationis præsidio fidei novum comparatur propugnaculum; quin imò arx fidei aggressoribus sit patentior, & proinde facilior impugnata. Imitandi ergò sunt illi, qui ut nationibus infensis opponant & objiciant propugnacula, vias omnes intercludere conantur, nullumque ad vallatam urbem aditum relinquunt, quem firmissimis muniant præsidiiis; alioquin hostes subito irrumperent, & impetum facerent. Retinendis fidei dogmatibus non minor est adhibenda cautio: nec nobis credatur; sed experimento calamitoso. Undè sapiùs relatæ, tum hæreticorum antiquorum, præsertim Eunomianorum; tum & postremi seculi aberrationes prodierunt; nisi quia, prætermisissis Dei Verbo, & Traditione Apostolicâ, in fidei regulam & judicem humana ratio fuit advocata? Si Spiritus Sanctus, inquiebant Eunomiani, ex Patre procedat; igitur & Filii frater est: si ex Filio; igitur Patris nepos est. Quæ absurda declinassent proculdubiò, si sacrorum codicum monita, *Generationem ejus quis enarrabis?* & Sanctorum Patrum exempla non fuissent ab iis parvi habita. Miretur igitur nemo, si cautionibus illis veritati Catholicæ consulendum esse censuimus.

Plurimas comparationes adhibent SS. Patres. Ut ostendatur Filius Dei Patri consubstantialis; confertur homini ex homine genito: ut principio suo coætæ- nus designetur; assimilatur radio solis: ut Patri perfectè similis ob oculos ponatur; imagini ex speculo nitido, & politissimo: ut immaterialiter genitus probetur; Verbo per hominis intellectum efformato. Sed ex iisdem SS. Patribus hæ comparationes pro rudioribus quibusdam delineationibus sunt habendæ: monent quæ SS. illi doctores hæc delineationes eo fine adhiberi, ut ostendatur Mysterium illud non esse impossibile. cum ipsius vestigia in naturâ occurrant. Ex allatâ S. Ath. comparatione, esto, repetatur sententia, quæ contendit ideò Filii processionem esse generationem, quia procedit per intellectum: Sed num ideò par est exponendæ Filii generationi, & discernendæ à profectione Spiritûs Sancti? Et licet comparationes ejuscemodi attulerint SS. Patres, an ideò Theologis fas est suas sententias, quasi totidem definitiones, statuere; neque minis acriter pro illis decertare, quàm pro indubitato dogmate? Quâ etenim ratione, cum ea, quæ sensibus obvia sunt, vix queamus percipere; ad ea, quæ naturæ vires superant, sic assurgemus? Max formidini condonare forsan vix poterunt Theologi, variis questionibus & principiis assuefacti: Forsan, inquam, egrè patientur à tris in scholâ viis me recedere; sed indulgeant formidanti, qui, ubi de Mysteriis agitur, nihil audet proferre, nisi quod ex Scripturis est excerptum, aut à SS. Patribus traditum. Aliundè verò, cur inquirerem quod non Deus revelavit? & cur

investigare Myſteriorum rationes, quas non inconſultò videtur occultare: Proceſſionem Filii & Spiritus Sancti inter ſe differre; alteram dici generationem; alteram, proceſſionem ſimpliciter, *indubitata fide teneo: ſed quare, aut quomodo? nescio; nec eâ ſane ignorantia periclitari puo, ut verbis utar* S. Aug. Cont. Priſcill. cap. 11. *quid enim opus eſt, inquit, idem S. Doctor. Enchir. 57. Ut hoc atque ejuſmodi vel affirmentur, vel negentur, vel definiantur cum discrimine, qua ſine crimine ne dicuntur?*

Jam conſtitui licitam haberi poſſe conqueſſionem illam legibus exſcriptis; ſed quod in aliis inculpatum dico, mihi non liberum eſſe cenſeo; quod enim non eſt ex fide, ſeu contra conſcientiæ ſtimulos, peccatum eſt ex Apoſt.

INSTR. Nihil aliud ſibi volunt SS. Patres ſuperius relati, niſi tùm Verbi generationem, tùm Spiritus Sancti proceſſionem, nec comprehendere, nec plenè ab hominibus explicari poſſe; & ſi eorum œconomia perpendatur, non eâ diſſerendi ratione utuntur, quam adhibent, cum hæreticis diſputant. Ubi enim ad Catholicos habent ſermonem, prudenter admonent ſolummodò, ne minùs cautâ expoſitione margaritas ante porcos projiciant; aut infirmis moveant ſcandalum.

R. non modò nos revocare SS. Patres à curioſiori proceſſionum indagatione, quòd hominum mentem & ſermonem, Myſterii comprehenſio & explanatio longè ſuperet; ſed multis aliis de cauſis, ut palam eſt: *Indecorum eſt, inquit, S. Ath. lib. 3. cont. Arian. querere quomodo ex Deo Verbum ſit, aut quomodo ſit Dei ſplendor, aut quomodo gignat Deus, aut quis ſit modus generationis Dei.* Et ex S. Baſil. Hom. 29. *Filius genitus eſt; ne dicas quando: ſed neglige hanc quaſtionem: ne queras quomodo; eſt enim hic impoſſibilis reſponſio.* Nec ſolos alloquuntur hæreticos; ſed & ſæpiùs fideles ex locis citatis, ut S. Ath. epiſt. ad ſolitarios.

At, inquirunt, uſurpata ſæpiùs hæc graviffimis in difficultatibus dicendi ratio, *nescio, O! altitudo, quis enarrabit?* Theologum non minùs dedecet, quàm Philoſophum ad fidei principia, vel ad Dei omnipotentiam, tanquàm ad Azylum, confugere.

R. Philoſophos à Philoſophiæ principiis recedere, cum ex fide, vel ex omnipotentia, rerum naturalium deciſionem, aut definitionem repetunt; quod nihil aliud eſt, quàm profiteri ſuam in dicendis novis confidentiam, ſimul & in probandis illis novis axiomatibus inſcitiam oſtendere. E contrariò cum Theologus Theologiæ principis inſiſtens, ad exponenda nova placita nihil in Theologiæ fontibus, Scripturâ videlicet Sacrà juxta SS. Patres expoſita, vel in Apoſtolicâ traditione deprehendit, quod illi viam ad propoſitæ quaſtionis explanationem ſternat ullatenùs; an non prudenter ſibi ab illis quaſtionibus definiendis temperat, ſuamque inſcitiam humiliter tunc proficitur? præſertim ſi Sanctos in illâ humili & demiffâ profeſſione ſequatur duces, quos, eruditionis licet ſummæ, poſterioribusque ſeculis venerandæ, non puduit fateri ſe nescire, quod nesciebant, ut S. Hil. qui l. de Trin. de generationis Filii ſecreto diſſerens, ſic habet. *Ego nescio, non requiro; conſolabor me tamen: Archangeli nesciunt, Angeli non audierunt, Propheta non ſenſit, Apoſtolus non interrogavit, Filius ipſe non edidit,*

CONCL. II. non placet sententia prima, quæ Filium ideò esse Filium statuit, quòd fœcundam à Patre naturam accipiat; talem verò Spiritus sanctus non habeat.

Prob. nam ad generationis rationem non exigitur, ut naturæ fœcunditas à Patre communicetur: non enim in creatis semper Filius generat; nec vulgaris definitio aliquid hujuscemodi continet; & , eâ sublatâ fœcunditate, non definit esse generatio, v. g. mulorum. Aliundè in Filio divino Patris fœcunditas non occurrit, cum non generet Filius.

Obr. S. Bas. lib. 5. c. Eunom. cap. 12. ad hanc quæst. cur Spiritus S. Filius Filii non dicatur, respondet: *Non quia non est ex Deo per Filium, sed ne Trinitas Filios ex Filiis habere dicatur*: Et sic ne infinita Filiorum multitudo invehatur. Unde non aliam rationem asserre videtur, cur Spiritus Sanctus non sit Filius, quàm quòd non habeat naturam fœcundam. Igitur Filius ideò Filius est, quia fœcundam à Patre naturam accipit.

R. S. Basilium alienum omninò fuisse ab assignando discrimine, quod intercedit inter Verbi generationem, & Spiritûs Sancti processionem; imò rotus est Hom. 25. in rejiciendâ illius inscrutabilis discriminis investigatione; quia, ut docet, nec spectator adfuit, nec est qui exponat. Et Hom. 29. hanc inquisitionem amentix tribuit. In loco qui objicitur, ignotum nobis esse illud discrimen supponens, docet tantùm hac cautione usos esse sacros codices, & Spiritum Sanctum Filium Filii non dixisse, licet ex Filio procedat; ne scilicet mens nostra humanam Filiorum successionem in Deo suspicaretur.

INST. Ex Conc. Florentino habetur distingui Spiritum sanctum à Filio; quia naturam fœcundam Filius accipit.

R. non ideò hoc tradi in Concilio Florentino, quòd Filii rationem in fœcunditate quam Filius accipit constituat: sed quia in illo Concilio, num Spiritus sanctus ex Filio procederet, agebatur; hâc ratione Latini adversus Græcos utebantur, nempe Filium ideò distingui à Spiritu sancto, quòd Spiritus sanctus ab eo procedat; alioquin non distinguendum fore.

CONCL. III. Nec generationis Verbi rationem assequi videtur sententia, quæ Verbum ideò genitum esse docet, quòd per intellectionem actualem, prout est ultima Dei differentia, procedat.

Prob. 1. Nam hæc sententia principio à nobis aliàs confutato nititur, ultimam scilicet Dei differentiam esse intellectionem actualem. 2. etiam si vera esset ista sententia; non ideò Verbi generatio hoc pacto exponeretur: non enim in naturæ divinæ similitudinem Filius procederet, quatenus divina est substantia; quippe natura divina, ut sic considerata, substantia est infinita, & immensa &c. sed tantùm quatenus talis esset, nempe intelligens. Porro autem similitudo in naturâ penes differentiam specificam non est; sed etiam penes gradus genericos: nec enim Petrus Paulo similis est in naturâ, quia rationalis; sed etiam quia animal.

CONCL. IV. Nec etiam placet opinio, quæ Verbum ideò Filium esse tradit, quòd procedat ut imago; non verò ita Spiritus sanctus.

Prob. 1. Nam ad generationis rationem ea representatio non exigitur,

sed sola naturæ communicatio. 2. Imaginis ratio non videtur sufficiens; ut Filius dicatur genitus; non verò Spiritus sanctus: licet enim Filius in humanis Patrem non repræsentet, non definit esse Filius; quod nempe in naturâ similis procedat; è contrario ignis v. c. ab igne ut similis oritur; nec ideo est Filius. Verbum igitur Divinum vera quidem est Patris imago; sed non ideo est Filius, quia imago; sed est imago, quia idem est in naturâ cum Patre, & ratio similitudinis ex identitate naturæ sequitur.

Opponunt Philosophos & Medicos ad Filii rationem exigere, ut sit Patris characterum repræsentatio.

R. Philosophos & Medicos exigere, ut Filius naturam Patris specificam habeat; non tamen ut ipsius individuum & omnimodam perfectionem assequatur accidentariam; alioquin crassior eorum esset aberratio.

CONCL. V. Nec etiam facit satis ex omni parte sententia, quæ Filium ideo esse genitum asserit, quod per intellectum perfectissimum procedat. Sic mentem suam exponunt illius sententiæ defensores. Dei Filius per intellectum perfectissimum procedit; & proinde, cum sit intellectus divini terminus, necessariò perfectissimus est. Terminus autem perfectissimus est substantialis; & proinde principio suo simillimus, quod processio per intellectum sit origo viventis à principio vivente conjuncto, in similitudinem naturæ: nam in se rem intellectam secundum similitudinem habet intellectus; qui finitus est, similitudinem accidentalem efformat; qui verò infinitus est, similitudinem substantialem efficit. Ea non est, inquiunt, Spiritus sancti processio; quia non per assimilativam facultatem, qualis est intellectus; sed per voluntatem, cujus est in rem animatam pondere quodam impelli, procedit.

Verùm ex illis rationibus nulla satisfacit

Prob. 1. Nam in eam sententiam adduci non poterit, qui cum nominis non infimi Philosophis voluntatem & intellectum, etiam in hominibus intrinsecè non distingui censuerit; sed extrinsecè duntaxat, seu habitâ ratione habitudinis ad objecta, circa quæ versatur anima; ita ut intelligere dicatur, si circa verum; velle verò, si circa bonum versetur; quibus suppositis nihil ad stabiliendum mox expositum discrimen conficietur. 2. esto, etiam in nobis intrinsecè distinguantur intellectus, & voluntas; an ideo dicemus facultates esse in Deo intrinsecè distinctas?

3. produci supponitur intellectionis terminus, quo visum aliàs objectum, aut intellectum, mente repræsentetur; quæ repræsentatio tantum est objecti metaphorica similitudo, seu intentionalis species; nec enim alia competit intellectui assimilandi ratio. Quis autem hanc in Deo necessitatem induxerit? numquid non omnia sunt Deo præsentissima? & an aliquid repræsentatio illa metaphorica habet, quod ad generationem substantialem accedat? 4. suppositis etiam principiis illis, non videbitur indè inter utramque processionem discriminis quid excogitari posse; nam quo jure vi processionis Filius Patri dicetur similis, quia per intellectum divinum procedit; eadem ratione Patri, & Filio in naturâ erit Spi-

ritus sanctus similis, quòd à divinâ voluntate procedat : nihil enim aliud est habere naturæ similitudinem vi processionis, quàm habere naturam divinam eandem vi processionis : & si Patris, & Filii voluntas Spiritum sanctum cum Patre & Filio unum substantiâ faciat ; nonnisi naturæ est illa unitas ; & idèd erit utrobique paritas. Igitur tam processio per voluntatem erit generatio, quàm per intellectum. Et sicut intellectus divini terminus est identicè substantialis ; quia naturæ divinæ identificatur, non quidem per se, quoniam intellectus assimilare tantum intentionaliter supponitur ; ità voluntatis divinæ terminus esset pariter identicè substantialis ; quia divinæ naturæ pariter identificaretur. Ultimò, Pater Divinus res possibiles intelligit, nec tamen res illæ verbo sunt naturæ similes ; licet sint divinæ cognitionis termini.

O P P. 1. ex S. Athan. lib. de decretis Nicenæ Synodi, Verbum idèd Filius est, quòd sit Verbum : sic etiam S. Aug. & alii.

R. antiquos ità differuisse, ut à generatione Verbi omnem passionem excluderent, & omnem imperfectionem ; satisque iis fuisse, si ad agnoscendam ipsius Verbi filiationem Arianos adigrent. S. August. docet quidem omnem rem cognitam sui producere notitiam ; non verò voluntatem : verum mentem abusive parere ab eo dici, quis non videat ?

Nec illud discrimen sufficit, quòd ex actionibus immanentibus petitur ; quòd nempè sint duæ in Deo, sicut & in hominibus, immanentes actiones ; idèdque duæ sint in Deo processionem, quarum una assimilet, intellectio nimirum, quæ sit generatio. Nam si idèdque duæ tribuuntur Deo actiones immanentes ; quia duæ sunt in hominibus ; tres etiam Deo assignandæ erunt, cum tres sint actiones in hominibus immanentes : nam præter voluntatis & intellectus actiones, memoria quæ est in nobis immanens, suam quoque habet actionem.

O P P. 2. Si Filius non esset Filius, quia procedit per intellectum, & Spiritus Sanctus per voluntatem ; Verbum & Spiritus Sanctus essent immediatè à naturâ divinâ ; nec esset determinatus processionum divinarum numerus. Cur enim potius essent tres, quàm quatuor personæ ? Cur Filius potius 2. persona, quàm Spiritus Sanctus ? cum enim aliqua immediatè oriuntur ab aliquo principio : non est cur potius unum dicatur tale, quàm aliud. Posito autem quòd Verbum procedat per intellectum, Verbum concipitur procedere ut Filius, quia procedere concipitur in similitudinem naturæ &c.

R. asseri non debere à naturâ divinâ immediatè procedere Verbum & Spiritum Sanctum : natura enim divina neque generat, neque generatur, ut habetur in Conc. 4. Later. cap. 2. *Damnamus*. Et verò ignotum nobis est, ut ex sacris codicibus & SS. Patribus accepimus, quâ ratione processionem Verbi, & Spiritus Sancti distinguantur : Nec illud discrimen sufficienter videtur repeti posse, quòd Filius per intellectum procedere supponatur : nam Sententia illa plurimis nutantibus & incertis nititur principiis, quæ, licet pro veris haberentur, non tamen explicarent quâ ratione Filius esset Filius, non Spiritus Sanctus.

INST. 1. Filius ideo Filius est, quia procedit ut similis in naturâ; intellectus autem assimilatur in naturâ, si sit perfectissimus, qualis est divinus.

R. 1. non constare omnino utrum intellectus assimilet; nec utrum producat terminum, saltem cum objectum est presentissimum, ut est in Deo; ea quippe est ratio cur non detur species expressa in beatis.

R. 2. licet hæc supponantur, non propterea videbitur intellectus assimilare in naturâ; quia assimilatur tantum ex se intentionaliter, seu producit tantummodo speciem objecti representativam; & proinde intellectus perfectissimus producit speciem objecti perfectissimam: non enim in alio genere assimilabit, quam in illo, in quo assimilatur; sic intellectus non vult, licet sit perfectissimus.

INST. 2. Intellectus perfectissimus perfectissime assimilatur, & proinde in naturâ; præsertim si terminus ejus non sit accidens: intellectus autem divini terminus non est accidens, &c.

R. intellectus divini terminus per se substantialem non esse, sed identice tantum; quia identificatur naturæ Divinæ: sic, cum terminus voluntatis divinæ sit pari jure identice substantialis; quo jure Filius esset Filius, eodem jure Spiritus Sanctus videretur esse Filius.

De principio Processionum.

Duplex principium divinarum processionum distinguunt Theologi, *quo* & *quod*: Principium *quod* dicunt esse suppositum; principium verò *quo*, virtutem; principium *quo* iterum subdistinguunt, in proximum, & remotum. De principio *quod* conveniunt omnes: de principio autem *quo* dissentiunt Theologi. Alii essentiam divinam, prout ab intellectu & voluntate distinguitur, pro principio *quo* processionum divinarum radicali constituunt: Imò & alii pro principio proximo; quia, inquit, Filius dicitur Filius naturæ: nam eodem cum proportionem modo ratiocinandum est de fecunditate Dei, ac creaturarum: creaturæ verò fecundæ non sunt ex eo quod intelligant aut velint; cum per actiones immanentes non producat terminus: sed ex eo quod sint naturæ.

Sed gravibus difficultatibus hæc opinio implicatur: quia Spiritus Sanctus æquè Filius esset, ac Verbum; procedit enim æquè similis in naturâ, ac Verbum: & aliunde essentia Divina nec generat, nec generatur ex Conc. Later. 4. nec processionis divinæ modus ad creaturarum processionem accedit.

Undè hanc opinionem temeritatis inculant nonnulli; quia in Scripturis, quarum Verba sensu proprio sunt usurpanda, Filius vocatur Verbum propriè, & Spiritus Sanctus amor: Et ideo volunt intellectionem & volitionem esse principium *quo* proximum divinarum processionum.

Sed hæc etiam sententia difficultatem patitur: tum quia tribus personis intellectio & volitio sunt communes: tum quia intelligentes naturæ, quatenus intelligunt & volunt, non censentur fecundæ; sed quatenus sunt naturæ; tum denique quia principium *quo* à terminò rea-

liter distinguitur; principium enim *quod* à suo termino distinguitur per principium *quo*, juxta illud Philosophorum axioma, *propter quod unum quodque tale & illud magis tale*: Divina verò intellectio à Filio non distinguitur, nec volitio à Spiritu Sancto.

Verùm isti respondent intellectiōnem quidem & volitionem essentielles, tribus personis esse communes; non autem notionales: & licet personæ non intelligantur fecundæ, quā intelligentes; nihilominus tamen intellectiōnem & volitionem esse principium *quo* proximum; quia agens non dicitur fecundum secundum principium *quo* proximum, sed secundum remotum, naturam scilicet. Licet etiam, inquirunt, principium *quod* à reproductâ per principium *quo* distingueretur realiter; intellectio verò non distingueretur à Filio secundum se: attamen ipsa distingueretur per Paternitatem sibi adjunctam. Neque semper verum est illud axioma *propter quod unum quodque tale, & illud magis tale*: Nam ex Philosophis & Theologis, qui species admittunt, per impressas cognoscuntur objecta; nec tamen, ex eorum consensu, ipsæ cognoscuntur species impressæ.

At in quonam discrepant intellectio notionalis, & essentialis? sunt ne actus duo, aut duæ perfectiones distinctæ? numquid intellectio notionalis communis non est tribus personis, sicut essentialis? cum terminus ille notionalis intellectiōni nihil reale addat, & intellectio naturam divinam absolute sequatur; & proinde tam, ut est in se, Filio & Spiritui Sancto communicatur intellectio, quàm ipsa natura divina. Quòd si intellectio in Patre propter adjunctam sibi paternitatem à Filio distingueretur, relationes se haberent ut conditiones: quod utique verum esse nequit comprobari, ut ex sequentibus palam erit. Ex Philosophis & Theologis species impressæ non cognoscuntur quidem; quia non ideò cognoscuntur objecta per species, quòd cognoscantur ipsæ; sed quòd objecta optimè exhibeant: nec illo axiomate physico, tanquam inconcussò nitimur; sed ut principia, de quibus agimus, impervia esse rationi ostendamus; cum eâ in re libimet ipsi adversetur ratio.

Nec forsàn volitio est Spiritus sancti principium *quo*; licet Spiritus sanctus dicatur amor. Quamvis enim Theologi de hoc conveniant, nempe Spiritum sanctum amorem dici; non tamen consentiunt volitionem esse principium *quo* Spiritus sancti. Potest etiam amor specialem ordinem habere ad volitionem, ut ad conditionem; non ut ad principium *quo*: vel forsàn Spiritus sanctus dicitur amor; quia producit amorem, & sic per appropriationem.

Volunt alii processionum principia esse relationes; cum per paternitatem in esse principii v. c. Pater constituatur: nam generare non omnibus personis convenit, sed ad solum Patrem pertinet; & Filius non est Filius, nisi quā genitus à Patre, ex S. August. lib. 6. de Trin. cap. 1.

Respondent verò multi relationes non esse principia, sed tantum conditiones; quòd agendi principia non sint relationes. Deinde, inquirunt, individuum quā individuum, seu Socrates quā Socrates, non generat; sed natura ipsa principium est generationis: relationes autem in divinis

sunt instar individuationis in humanis : sublatâ enim relatione , oppositio tollitur ; & proindè distinctio. Ex quo consequens est relationes divinas non esse divinarum processionum principia.

Difficultates etiam involvunt istæ rationes ; quia , cum per solam paternitatem distinguatur Pater à Filio ; hæc non modò se haberet instar conditionis , sed etiam principii.

At , inquiunt , debet esse aliquod fundamentum relationis inter Patrem , & Filium ; illud autem est principium *quo*.

R. relationem creatam accidentalem indigere fundamento ; non verò essentialem ; quia hæc est aliquid primum in re : sic nullum est fundamentum relationis inter potentiam & actum. Undè hoc fundamento non indiget divina relatio.

Quamobrem satius mihi videtur fateri nobis esse ignota hæc omnia , utpotè abstrusa , & non revelata. Nec mirum profectò ; si enim pleraque nos lateant , præsertim cum nobis naturaliter non sit notum Mysterium ; potiori jure nobis ignotus est modus à Deo non traditus. Timerem , si scrutarer ulterius , ne mihi vitio verteretur , quod ex S. Irenæo retulimus , videlicet obstetricum vices gerere , qui modos illos , Deo non revelante , inquirunt. Neque necesse est definire illa principia ad solvendas hæreticorum objectiones : cum enim totum sit fidei mysterium ; cum adversariis est expendendum quid de illo sit traditum , & nihil ultra : si enim ex rationibus illis mox adductis , vel forsan validioribus quæ possent adinveniri , Mysterium ipsam impugnarent , colligerentque non ad fidem pertinere , quòd tam nutantibus principiiis niteretur ; non ità facilè comprimeretur adversariorum pertinacia.

Opponunt constare Filium dici , Verbum ; & Spiritum sanctum , amorem ; & Verbum esse intellectus terminum , & amorem , voluntatis. Igitur intellectus & voluntas sunt principium *quo* processionum. Undè Eccli. 24. v. 5. sic de se ipsâ loquitur divina Sapientia : *Ego ex ore Altissimi prodivi primogenita ante omnem creaturam*. Quod autem ex ore prodit in Deo , per intellectum procedat necesse est. Quid enim aliud per os significaretur , quàm rei intellectæ expressio ? Rei verò intellectæ expressio est terminus intellectionis. Idem esto judicium de Spiritu sancto , qui dicitur amor.

R. quidem ex Scripturis constare Filium dici Verbum ; sed ratione nullâ subindicatâ , cur ità vocetur. Undè Verbi nomen à S. Basilio Spiritui sancto tribuitur , lib. 5. contra Eunom. ubi laudat verba hæc Ephes. 6. *Assumite gladium Spiritûs , quod est verbum Dei*. Sic pariter licet Spiritus dicatur amor , non idèò voluntatis est terminus ; ac idèò fortasse dicitur amor , quia producit amorem. Nec etiam amor propriè videtur esse voluntatis terminus ; sed pondus , quo in rem amatam ferimur. Ex verbis autem Eccl. nihil colligitur ; cum & de Spiritu sancto pariter dicatur Psalm. 31. *Verbo Domini Cæli firmati sunt , & Spiritus oris ejus omnis virtus eorum*. Undè cum de Spiritu sancto hæc verba Theologi soleant intelligere , sequeretur indè Spiritum sanctum pro principio.

cipio habere intellectum: & proinde argumentum, quod ex Eccl. loco conficitur, deducitur ex falso supposito.

ARTICULUS QUINTUS.

De Relationibus Divinis.

EXISTERE in divinis relationes non probamus: eas ab initio tractatus supposuimus; unum tantummodò monemus, nempe relationes spectari, vel prout insunt, vel prout terminum respiciunt, seu secundum esse *in*, vel secundum esse *ad*.

CONCLUSIO. Relationes secundum esse *ad*, in divinis sunt reales.

Prob. 1. quia Personæ Divinæ in Scripturis nominibus relativis exprimuntur. 2. eâ ratione à se invicem realiter distinguuntur ex Concilio Tolet. 4. in confess. fidei, & ex Conc. Later. 4. sub Innoc. III. cap. *Firmiter*. Cum igitur realis relatio non fiat, nisi per entia realia; hinc relationes divinæ secundum esse *ad* reales sunt necessariò. Probationes, quas quæst. 2. art. 2. pro tribus in Deo personis attulimus, conclusionem istam evincunt.

OBJ. Ubi est relatio realis, ibi est dependentia: at in Deo dependentia non est.

R. illud tantummodò verum esse in relationibus, quæ à subjecto, cui insunt, diversæ sunt naturæ: in divinis autem eadem est natura, seu idem esse absolutum. Vndè ex S. Aug. lib. 5. de Trin. cap. 6. 8. & 9. quamvis diversum sit Patrem esse, aut Filium esse; non est tamen diversa substantia: neque hæc secundum substantiam dicuntur, sed secundum relativum; quod tamen relativum non est accidens, quia non est mutabile. Licet ergò, ubi relatio accidentaliter occurrit, ibi sit dependentia; cum tamen relationes divinæ ejus non sint naturæ, profectò quæ de accidentalibus dicuntur, his tribuenda non sunt; non enim subjecto adveniunt, cum sint per se subsistentes. Cæterùm quidam ex Patribus quæst. 2. art. 2. & 3. relati, speciem quamdam dependentiæ procedentis à principio, seu originis in personis agnoverunt: sed talis dependentia est valde impropria.

INST. 1. Quod constituit, distinguit quoque: sed quod constituit, dat existere: per relationes autem secundum esse *ad* non existunt divinæ personæ: igitur nec constituuntur; & ideo non sunt reales.

R. quod constituit, ut v. c. in homine rationis principium, non dare semper existere. Vndè licet relationes divinæ tres in Deo personas constituent; per eas tamen non existunt personæ, sed per existentiam divinam absolutam, per quam existunt ipsæ relationes.

INST. 2. Si relationes sunt perfectiones reales secundum esse *ad*, Pater erit perfectior Filio; quia paternitatem habebit formaliter & identice; Filius verò tantum identice, in quantum Deus est.

R. non ideo Patrem perfectiorem esse Filio; Filius enim habet filiationem, quæ est perfectio æquivalens paternitati.

Quæritur quot sint in Deo relationes reales?

R. quatuor esse, quia tot sunt relationes, quot exigunt duæ processiones: at duæ processiones postulant relationes quatuor, scilicet procedentis ad principium, & principii ad terminum procedentem. Sic quatuor sunt relationes oppositæ, nempe paternitas, quâ Pater ad Filium; filiatio, quâ Filius ad Patrem; spiratio activa, quâ Pater & Filius, tanquam unus spirator, ad Spiritum S. & spiratio passiva, per quam Spiritus S. ad Patrem & Filium refertur, tanquam ad unum spiratorem. Nec tamen est quaternitas in Deo, licet quatuor reales sint relationes; quia spiratio activa à paternitate & filiatione non distinguitur. In divinis enim non est distinctio, ubi non est relationis oppositio: at nulla intercedit relationis oppositio spirationem activam inter, & paternitatem; sicut nec inter eandem spirationem, & ipsam filiationem; cum activa spiratio communis sit Patri & Filio. Unde s. August. lib. 5. de Trin. cap. 13. & Conc. Lugdun. sub Greg. X. cap. unico de summâ Trin. damnant eos, qui temerario ausu asserere præsumpserint Spiritum Sanctum à Patre & Filio, tanquam ex duobus principiis, non tanquam ex uno procedere: ita etiam Eugen. IV. in decreto unionis. Pater ergo & Filius non sunt duo principia Spiritûs Sancti, sed unum principium: & sicut Pater & Filius sunt unus Deus; ita & relativè ad Spiritum Sanctum sunt unum principium.

Spiratio activa relatio quidem est substantialis, quia à subjecto inhesionis est independens; nec tamen personam constituit; quia personis jam constitutis inest, Patri scilicet, & Filio. Recensentur etiam relationes intelligentis & volentis ad objecta sua; sed in Deo intelligens, & objectum intellectum; volens, & objectum, in quod fertur voluntas, non differunt; quia Deus, cum seipsum intelligit, singula quoque intelligit; & cum seipsum amat, quilibet etiam amore digna diligit. Porro autem non datur relatio realis ejusdem ad seipsum.

OPP. 1. Spiratio activa Patris realiter à spiratione Filii distinguitur; quia identificatur paternitati, quæ realiter à filiatione distinguitur.

R. spirationem activam Patris non distingui à filiatione, ipsi paternitati licet identificetur; quia utrique communis est spiratio activa. Quamvis enim identificetur paternitati divinitas; non proinde à seipsâ, prout est in Filio, distinguitur realiter; quia utrique communis est.

INST. 1. Producentis & producti relationes realiter distinguuntur; spiratio activa est relatio producentis; filiatio verò est producti relatio.

R. relationes producentis & producti non distingui realiter, quando non opponuntur, eidemque personæ conveniunt. Porro autem spiratio activa, & filiatio non opponuntur, eidemque conveniunt personæ, ut dictum est.

INST. 2. Generari, & spirari distinguuntur realiter: igitur generare, & spirare,

R. patem non esse rationem propter rationem mox allatam. Ceterum in rebus creatis multa ejuscemodi occurrunt ex Philosophis repetenda.

O P P. 2. Quod est communicabile realiter distinguitur ab incommunicabili: at paternitas est incommunicabilis; activa autem spiratio est communicabilis: igitur paternitas, & activa spiratio distinguuntur realiter. Idem dixeris de filiatione, & spiratione activâ.

R. sufficere rationis distinctionem, aut saltem virtualement, ut communicabile, & incommunicabile simul sint in eodem, nec distinguuntur realiter: nam v. g. in Patre paternitas, quæ est incommunicabilis, non distinguitur realiter ab essentiâ divinâ, quæ est communicabilis

ARTICULUS SEXTUS.

De Notionibus.

P E R notionem aliud nihil intelligitur, quàm nomen per modum formæ aliquid significans, seu per modum proprietatis in abstracto sumptæ, per quam una persona ab aliâ secernitur: cujusmodi sunt paternitas Filiatio &c. Nomen illud fuit usurpatum à S. Basil. epist. 43. & à S. Aug. lib. 5. de Trin. cap. 6. & 7. Notiones habentur etiam pro characteribus, & propriis signis, per quæ persona dignoscitur; eo sensu sumuntur à Tert. cont. Prax. cap. 1. à S. Greg. Niss. lib. 1. c. Eunom. & S. Greg. Naz. orat. 37. ubi sic habet. *Mutua eorum relationis differentia, diversa quoque ipsis nomina procreavit.*

C O N C L. Quinque sunt admittendæ notionēs, ut hæreticis responderi possit: Dum enim quærent quomodo tres personæ, quæ sunt unus Deus, distinguantur; respondemus distingui proprietatibus, seu notionibus, quæ sunt Innascibilitas, Paternitas, Filiatio, Spiratio activa, & passiva; quia tot sunt termini quibus Trinitatis Mysterium explanamus, personasque divinas à se invicem secernimus: sic in Patre occurrunt innascibilitas, & paternitas: ingenitus enim seu innascibilis dicitur Pater; quia non procedit ab alio; nec se habet instar Patrum nostrorum, qui ab aliis gignuntur. Tribuenda quoque est ipsi Paternitas; quia Pater est Filius. Filio etiam Filiatio ascribitur; quia verè generatur Filius. Pariter activa Spiratio Patri & Filio tribuitur; quia Spiritus Sancti sunt principium: Tandem passiva spiratio Spiritui Sancto competit; quia spiratur.

Non sunt tot relationes, quot notiones; quia notionēs oppositionem necessariò non dicunt. Posset absque hæresi hic numerus, vel augeri, vel minui; quia nihil indè contra fidem directè vel indirectè sequeretur: nihil etiam in Conciliis de earum numero fuit definitum; non tamen à Communi sententiâ esse recedendum judicavimus.

O B I I. innascibilitas perfectio esse non potest; cum sit mera negatio: & aliundè satis intelligitur Pater non esse ab alio, cum Pater dicitur.

R. cum infero perfectionem, quæ ad primæ in divinis personæ digni-

tatem spectat, seu negationem principii, à quo Pater procedat; & sic innascibilitas est quodammodo fundamentum paternitatis: nec sine innascibilitate Pater satis intelligeretur non esse ab alio; Patres enim nostri ab aliis gignuntur.

INS T. Ut notio esse & dici possit, non sufficit eam esse fundamentaliter perfectionem: idèd enim improductivitas, seu non producere in Spiritu Sancto, foret notio sexta.

R. improductivitatem non esse nostro concipiendi modo fundamentaliter perfectionem. Nam licet in Deo ejusdem perfectionis sit producere & produci; id tamen vix in animum nostrum inducimus: longè enim apud nos præstat dare, quàm accipere.

INS T. Quo jure innascibilitas in Patre admittitur; eodem jure inspirabilitas in Filio, & ingenerabilitas in Spiritu Sancto erunt dicendæ notiones.

R. id non esse necesse; quia inspirabilitas & ingenerabilitas non negant esse absolute ab alio, sed tantum secundum quid, nempe hæc vel illâ ratione: innascibilitas verò negat esse ab alio simpliciter & absolute. Deindè cum secunda persona dicitur Filius, satis intelligitur per spirationem non procedere: ita etiam cum tertia persona dicitur Spiritus Sanctus, indicatur satis per generationem non generare. Undè supervacaneæ forent illæ notiones superadditæ. Insuper adinventæ fuerunt notiones, ut personarum naturam exponerent; simul & discrimen, quod inter eas intercedit, notarent: porro id omne notiones assignatæ præstant; nullam scilicet personam Patre priorem, nullam posteriorem Spiritu Sancto in divinis existere: Proindè notiones aliæ forent supervacaneæ.

ARTICULUS ULTIMUS.

De Circuminfessione.

CIRCUMINSESSIO, quæ dicitur à Græcis *μετέωσις*, est intima & perfecta inhabitatio unius personæ in alterâ: de quâ Christus Joan. 14. ita loquitur: *Non creditis quia ego in Patre, & Pater in me est Pater in me manens facit opera.* Ex quo fit, ut personæ divinæ se invicem pervadant, & absque se invicem seorsim esse nequeant. Hinc ut art. 2. quæst. 2. vidimus, essentia divinæ in personis divinis consubstantialitatem repetunt antiqui, ut S. Ath. qui orat. 4. cont. Arianos ita circuminfessionem explicat, & ostendit quid ex eâ possit colligi: *Filium Germanum*, inquit, *è Patre esse non sentiunt; sed non ita est, ut illi arbitrantur, qui cum non censeant eum esse genuinum Filium, in Filium genuinum mendacia fingunt, cui soli compertum illud dictum: ego in Patre & Pater in me: est enim Filius in Patre, quatenus intelligere conceditur, eò quod, quidquid est Filius, id universum sit proprium substantia Patris: veluti ex lumine proradiationem; & Fluvium ex fonte; ut, qui Filium videat, id videat quod est Patri suum ac proprium; ac intelligat, quod*

Filius sit; eam essentiam ex Patre esse; æquo ità cum in Patre existeret. Estque vice versà Pater in Filio; eò quod id quod est Patri proprium, id ipsum sit Filius; ut in radiis sol., mens in ratione, fons in flumine; atque ità quis videns Filium, videt id quod proprium est substantia Patris, & intelligit Patrem in Filio esse. Nam cum species Dei, Deitasque Patris essentia sit Filii; bonè consequitur, ut Filius in Patre existere dicatur, & Pater in Filio. Idèdque meritò cum antea dixisset: Ego & Pater unum sumus: subintulit ista: Ego in Patre, & Pater in me; ut identitatem divinitatis, essentia unitate demonstraret.

S. Hil. lib. 3. de Trin. ait quibusdam impossibile videri, ut quod in altero sit, æquè id ipsum extra alterum sit. Et reverà explicatu id admodum esse difficile dicit; sed tamen illud intelligi, ubi mente capimus quæ sit Patris, quæ Filii natura; scilicet Patrem esse æternum, immensum, immutabilem, ab æterno ex propriâ substantiâ Filium generasse, ratione tamen incomprehensibili: Filium patiter esse æternum, immutabilem; sicque Patrem & Filium esse in sese invicem; quia quidquid Patris est, præter paternitatem, est in Filio; & quidquid est Filii, præter filiationem, est in Patre; & uterque unum sunt.

S. Basil. epist. 43. exemplo catenæ rem illustrat, cujus extremum qui arripit, alterum extremum aliò trahit: ità sunt in sese invicem Pater & Filius & Spiritus Sanctus: ut neque à se invicem abscindi ac seungi queant.

S. Dionis. lib. de divinis nominibus cap. 2. utitur exemplo plurium lucernarum, quarum lumina in unum ità conjunguntur, ut uno ac eodem fulgore splendant: neque certè cujuscpiam facis lumen ab aliis scerni posset; cum tota sint in totis sine mixtione temperata lumina. Aliud exemplum etiam alii adhibent, personarumque divinarum mutuam, ut ita loquar, permeationem ex vasis in vase, aut corporis in corpore ductâ similitudine delineant: quas, & alias illustrationes, ubi de consubstantialitate ex primorum seculorum patribus, & ex SS. Ath. Hil. Greg. Naz. Aug. collegimus.

His autem rationibus confirmari potest personas divinas secundum essentiam, originem, & relationem, & secundum se totas, esse in sese invicem. 1. Secundum essentiam, cum in eà identificentur, & in tribus una sit eademque essentia. 2. Secundum originem, quia principio suo inexistunt. 3. Secundum relationem; cum nulla sit relatio, quæ cum naturâ divinâ non identificetur. Undè Ecclesia in hymno feriæ 2. ad laudes: *In Patre totus Filius, & totus in Verbo Pater.*

O P P. Oppositum quatenus oppositum opposito suo inexistere non potest; sicut nec relatum suo correlato. At Paternitas & Filiatio sunt relationes oppositæ.

R. non posse quidem esse in se invicem sub eâ ratione, sub quâ opponuntur; sed secundum essentiam, in quâ non opponuntur.

I N S T. Paternitas non potest esse in Filio; alioquin Filius diceretur Pater.

R. non esse Paternitatem in Filio per modum formæ, aut proprietatis.

tatem spectat, seu negationem principii, à quo Pater procedat; & sic innascibilitas est quodammodo fundamentum paternitatis: nec sine innascibilitate Pater satis intelligeretur non esse ab alio; Patres enim nostri ab aliis gignuntur.

INS T. Ut notio esse & dici possit, non sufficit eam esse fundamentaliter perfectionem: idè enim improductivitas, seu non producere in Spiritu Sancto, foret notio sexta.

R. improductivitatem non esse nostro concipiendi modo fundamentaliter perfectionem. Nam licet in Deo ejusdem perfectionis sit producere & produci; id tamen vix in animum nostrum inducimus: longè enim apud nos præstat dare, quàm accipere.

INS T. Quo jure innascibilitas in Patre admittitur; eodem jure inspirabilitas in Filio, & ingenerabilitas in Spiritu Sancto erunt dicendæ notiones.

R. id non esse necesse; quia inspirabilitas & ingenerabilitas non negant esse absolutè ab alio, sed tantum secundum quid, nempe hanc vel illam rationem: innascibilitas verò negat esse ab alio simpliciter & absolutè. Deindè cum secunda persona dicitur Filius, satis intelligitur per spirationem non procedere: ita etiam cum tertia persona dicitur Spiritus Sanctus, indicatur satis per generationem non generare. Undè supervacaneæ forent illæ notiones superadditæ. Insuper adinventæ fuerunt notiones, ut personarum naturam exponerent; simul & discrimen, quod inter eas intercedit, notarent: porro id omne notiones assignatæ præstant; nullam scilicet personam Patre priorem, nullam posteriorem Spiritu Sancto in divinis existere: Proindè notiones aliæ forent supervacaneæ.

ARTICULUS ULTIMUS.

De Circuminfessione.

CIRCUMINSESSIO, quæ dicitur à Græcis *μετῃσέως*, est intima & perfecta inhabitatio unius personæ in alterâ: de quâ Christus Joan. 14. ita loquitur: *Non creditis quia ego in Patre, & Pater in me est Pater in me manens facit opera.* Ex quo fit, ut personæ divinæ se invicem pervadant, & absque se invicem seorsim esse nequeant. Hinc ut art. 2, quæst. 2. vidimus, essentia divinæ in personis divinis consubstantialitatem repetunt antiqui, ut S. Ath. qui orat. 4. cont. Arianos ita circuminfessionem explicat, & ostendit quid ex eâ possit colligi: *Filium Germanum, inquit, è Patre esse non sentiunt; sed non ita est, ut illi arbitrantur, qui cum non censeant eum esse genuinum Filium, in Filium genuinum mendacia fingunt, cui soli competit illud dictum: ego in Patre & Pater in me: est enim Filius in Patre, quatenus intelligere conceditur, eò quod, quidquid est Filius, id universum sit proprium substantia Patris: veluti ex lumine proradiationem; & Fluvium ex fonte; ut, qui Filium videat, id videat quod est Patri suum ac proprium; ac intelligat, quod*

Filius sit; eam essentiam ex Patre esse; æquo ita cum in Patre existeret. Estque vice versa Pater in Filio; eo quod id quod est Patri proprium ad suum, id ipsum sit Filius; ut in radiis sol., mens in ratione, fons in flumine; atque ita quis videns Filium, videt id quod proprium est substantia Patris, & intelligit Patrem in Filio esse. Nam cum species Dei, Deitasque Patris essentia sit Filii; bene consequitur, ut Filius in Patre existere dicatur, & Pater in Filio. Ideoque merito cum antea dixisset: Ego & Pater unum sumus: subiunxit ista: Ego in Patre, & Pater in me; ut identitatem divinitatis, essentia unitate demonstraret.

S. Hil. lib. 3. de Trin. ait quibusdam impossibile videri, ut quod in altero sit, æquè id ipsum extra alterum sit. Et reverà explicatu id admodum esse difficile dicit; sed tamen illud intelligi, ubi mente capimus quæ sit Patris, quæ Filii natura; scilicet Patrem esse æternum, immensum, immutabilem, ab æterno ex propriâ substantiâ Filium generasse, ratione tamen incomprehensibili: Filium patiter esse æternum, immutabilem; sicque Patrem & Filium esse in sese invicem; quia quidquid Patris est, præter paternitatem, est in Filio; & quidquid est Filii, præter filiationem, est in Patre; & uterque unum sunt.

S. Basil. epist. 43. exemplo cæcenæ rem illustrat, cujus extremum qui arripit, alterum extremum aliò trahit: ita sunt in sese invicem Pater & Filius & Spiritus Sanctus, ut neque à se invicem abscindi ac sejungi queant.

S. Dionis. lib. de divinis nominibus cap. 1. utitur exemplo plurium lucernarum, quarum lumina in unum ita conjunguntur, ut uno ac eodem fulgore splendant: neque certè cuiuspiam facis lumen ab aliis secerni posset; cum tota sint in totis sine mixtione temperata lumina. Aliud exemplum etiam alii adhibent, personarumque divinarum mutuam, ut ita loquar, permeationem ex vasis in vase, aut corporis in corpore ductâ similitudine delineant: quas, & alias illustrationes, ubi de consubstantialitate ex primorum seculorum patribus, & ex SS. Ath. Hil. Greg. Naz. Aug. collegimus.

His autem rationibus confirmari potest personas divinas secundum essentiam, originem, & relationem, & secundum se totas, esse in sese invicem. 1. Secundum essentiam, cum in eâ identificentur, & in tribus una sit eademque essentia. 2. Secundum originem, quia principio suo inexistunt. 3. Secundum relationem; cum nulla sit relatio, quæ cum naturâ divinâ non identificetur. Undè Ecclesia in hymno feriæ 2. ad laudes: *In Patres totus Filius, & totus in Verbo Pater.*

O P P. Oppositum quatenus oppositum opposito suo inexistere non potest; sicut nec relatum suo correlato. At Paternitas & Filiatio sunt relationes oppositæ.

R. non posse quidem esse in se invicem sub eâ ratione, sub quâ opponuntur; sed secundum essentiam, in quâ non opponuntur.

I N S T. Paternitas non potest esse in Filio; alioquin Filius diceretur Pater.

R. non esse Paternitatem in Filio per modum formæ, aut proprietatis

is personalis ; sed per simplicem cum essentiâ identificationem : ad hoc autem, ut Filius esset Pater ; esset necesse , ut Paternitas per modum formæ, & proprietatis personalis in eo existeret.

QUÆSTIO QUINTA.

De processione Spiritûs Sancti.

ARTICULUS PRIMUS.

ERRORES.

CIRCA processionem Spiritûs Sancti error primus est Eunomii ; qui Spiritum Sanctum à solo Filio productum contendit : sed hic error facile refellitur , paucisque ex SS. Basîl. Greg. Naz. & Niss. infrâ confutabitur.

Gravioris autem momenti alter error est , qui Græcis quibusdam tribuitur , Spiritum Sanctum ex Patre quidem procedere , at non ex Filio. Exarsit primum contentio hæc tempore Michaëlis Cerularii Patriarchæ Constant. qui an. 1053. Romanam Ecclesiam scriptis oppugnavit , quemque Leo IX Pontifex doctè ac peritè confutavit.

In Lateran. Conc. 3. an. 1180. & in Later 4. an. 1215. res composita videtur ; sed reverà tunc Orientales Patriarchæ ex Latinis erant.

Michaël Paleologus an. 1261. Joanni Theodori Lascaris Filio cujus tutor erat, imperium & oculos eripuit , & Constantinopolim à Latinis per annos 38. occupatam stratagemate recuperavit. Cum autem à Sicilia Rege Carolo S. Ludovici fratre sibi metueret ; conciliando Gregorii 10. animo studuit , quò sibi tutum & integrum Imperium faceret. Undè tunc temporis nempè an. 1274. celebratum fuit Concilium Lugdunense, in quo Græcorum Præsulum legati , & summo Pontifici obsequium , & S. Spiritûs processionem ex Patre & Filio fuerunt professi. Sed plerique ex Græcis obstitere , & inter alios Josephus Constantin. qui Patriarchatum ideò deponere fuit coactus , suffecto in ejus locum Becco , qui 1. fuit erroris Græcorum acerrimus propugnator , deindè perlectis testimoniis , quæ ex Scripturâ & Patribus Nicephorus Blemides collegerat , Latinorum partes egregiè juvit. Ab Andronico autem Filio an. 1283. interemptus fuit simul & sepulturâ privatus Michaël Paleologus , & Beccus exauctoratus , & Josephus restitutus ; sicque dissensio longè gravior exarsit. Tandem Joannes Paleologus Imp. an. 1439. cum Patriarchâ Josepho , & aliis insignibus Græciæ Episcopis, Ferrariensi seu Florentino Concilio interfuit , & pace compositâ in eandem cum latinis de processione Spiritûs Sancti professionem Græci consenserunt , habitis prius eruditis , & quamplurimis disputationibus ; atque idem esse constitutum est , procedere Spiritum Sanctum.

pet Filium, ut plerumque habent Patres Græci, aut ex Filio. Ab hac fide non videntur defecisse Græci: licet enim Græcorum sententiæ in Florentino propugnator Marcus Ephesinus ab isto errore non discesserit; imò etiam contra Latinos librum ediderit; & quamvis eidem errori quidam in Græciâ forsân adhæreant, indè non est petendum, quæ sit Ecclesiæ Græcæ sententiæ; sed ex Conciliis, & ex fidei professionibus: nec ullum illius abdicatæ fidei publicum extat monumentum; imò fidem Catholicam propugnavit Gregor. Constant. Episc. Josephi successor, & ex ejus mandato Georgius Scholarites.

ARTICULUS SECUNDUS.

*Ex quo procedat Spiritus Sanctus? an ex Patre
& Filio?*

CONCLUSIO I. A Patre procedere Spiritum Sanctum apud omnes tum Græcos, tum Latinos Catholicos semper indubitatum fuit. Prob. Nam Joan. 15. v. 26. *Qui à Patre procedit.* Item Rom. 8. & 9. Idè in confutando Eunomio, qui solus à Patre non procedere Spiritum sanctum excogitarat, ut Spiritum sanctum solus Filii opus esse, & Filium creaturam eo præstantiorem assereret, non immorabimur.

CONCL. II. Ex Patre, & Filio Spiritus sanctus procedit.

Prob. 1. Qui est Filii Spiritus, à Filio infunditur, à Filio accipit, & mittitur; hic ex Filio procedit; non enim aliud in divinis est processionis argumentum. Singula hæc conveniunt Spiritui sancto.

1. Spiritus sanctus Filii Spiritus dicitur Rom. 8. v. 9. *Si quis autem Spiritum Christi non habet, hic non est ejus.* Galat. 4. v. 6. *Misit Deus Spiritum Filii sui in corda vestra.* Ità dicitur Spiritus Patris, quòd item procedat à Patre. Math. 10. v. 10. *Spiritus Patris vestri qui loquitur in vobis.* Rom. 8. v. 7. *Si tamen Spiritus Dei habitat in vobis.*

2. A Filio Spiritus Sanctus infunditur, accipit, & mittitur: Joan. quippè 20. v. 22. *Insufflavit, & dixit eis: Accipite Spiritum Sanctum.* Et Joan. 16. v. 13. *Non enim loquetur à semetipso, sed quæcumque audiet, loquetur.* Hinc S. August. tract. 99. in Joan. sic habet: *Ab illo igitur audit, audit, & audiet à quo est: ab illo est, à quo procedit. Et prius audire, hoc est illi quod scire, & scire illi hoc est quod esse.* Item Joan. cap. 15. v. 26. *Cum autem veneris Paraclitus, quem ego mittam vobis à Patre, Spiritum veritatis, qui à Patre procedit, ille testimonium perhibebit de me.* Ac rursùm cap. 16. v. 7. *Si enim non abiero, Paraclitus non veniet ad vos.*

3. Cum Græcis dissensio mora facillè componetur, si Patribus adhaereatur, quos seu Latinos, seu Græcos, in Conciliis Orientalibus & œcu-

menicis, Ephesino scilicet, Constantinop. 2. & 3. & Nicæno 2. pro sinceris Fidei Catholica testibus, & interpretibus sequendis unanimi cum Latinis consensione Græcorum decessores laudarunt. Hi autem sunt ex Latinis SS. Julius & Felix Pontifices Romani, Hilarius, Ambr. August. Leo: ex Græcis SS. Athan. Basil. Gregor. Naz. Greg. Niss. Theophil. Cyril. Alex. Joan. Chrysost. Proclus. Ità in Ephesino act. 1. Sic etiam in 2. Constantinop. cap. 30. referente Calecà; en verba: *In omnibus sequimur & Sanctos ac Doctores sanctæ Dei Ecclesiæ, Athanas. Hilar. Bas. Gregor. Theologum, Greg. Niss. Ambr. August. Theophil. Cyrill. Joan. Constantin. Leonem, Proclum, & omnia quæ in collatione 3. Latine leguntur, & in eo quod ουνόδοις dicitur, anathemati subjiciuntur quicumque memoratos illos Patres non recipientes, omnia, quæ ab iis dicta sunt, non profitentur.* Addit idem Calecas: *Præcipue verò S. Augustinum sanctæ & œcumenicæ Synodi, ut ex illarum constat 3. 6. & 7. præstantissimum Doctorem Ecclesiæ & sanctum prædicarant.* In 6. Synodo act. 8. commendantur ut sancti & eximii viri, Ambr. Aug. Leo. Et in 7. ejusdem ponderis decernitur esse autoritas Athan. Cyrill. Ambr. Leonis, Aug. & aliorum, quorum doctrinæ deferendum est. Illi autem omnes Spiritum sanctum ex Patre Filioque procedere sentiunt, & profitentur. A Patribus Orientalibus, quorum præcipua est apud Orientales autoritas, initium ducimus.

1. Sanctus Athan. epist. 1. ad Serap. Spiritum S. à Filio procedere supponit; cum enim indè inferrent hæretici, Patrem esse avum, si ex Filio procedat Spiritus sanctus, S. Athan. eos non arguit, quòd ad Patrem solum Spiritus sancti originem non referre Catholicos assererent; sed cum illis de fide Catholicorum conveniens, in id unum solummodò incumbit, ut eos ab ejusmodi quæstionibus removeat. Et in epist. ad Jovinianum cum Conc. Alex. damnat ut hæreticos, qui rebus creatis annumerarent Spiritum sanctum, & conditum fuisse per Filium assererent.

S. Bas. lib. 2. contra Eunom. qui Spiritum sanctum contendebat à Filio solo procreatum esse; Filium & Patrem sancti Spiritus esse principium sic probat. 1. quia nihil oritur à Filio, quòd à Patre quoque non ducat originem: scriptum est enim Joan. 17. v. 10. *Mea omnia tua sunt, & tua mea sunt.* 2. quia à Patre, & Filio Spiritus sanctus oritur, tanquam ab uno principio, non tanquam à duobus. 3. quia nec à Patre, nec à Filio secernendus est Spiritus sanctus, cum ab Apostolo Dei, & Patris, & Filii dicatur Spiritus. Igitur sicut Patris, sic Filii est Spiritus; & proindè ab utroque procedit.

Si cum Græcis, quos impugnamus, idem sensisset S. Basil. Eunomium repulisset facilius, asserendo tantum abesse, ut unius Filii Spiritus sanctus esset opus, quin nec à Filio, sed à solo Patre procederet. Item etiam lib. 5. cont. eundem Eunom. probat Filium id esse respectu Patris, quod Spiritus sanctus respectu Filii: *Propterea & Dei quidem Verbum Filium est; Filii autem Verbum Spiritus.* Obijcienti autem Eunomio, cur ergò Spiritus sanctus, cum à Filio procederet, non diceretur Filii Filius, S.

S. Basilii non respondet Spiritum sanctum non esse Filii Filium, quòd nihil à Filio accipiat, sed à Patre tantummodò (quod proculdubio respondere in promptu erat, & omnem removisset difficultatem) Sed, cum à Filio Spiritum sanctum procedere crederet, reponit idè Spiritum sanctum non dici Filii Filium, ne Trinitas Filios ex Filiis habere suspecta, ut est in hominibus, infinita putetur multitudo. Addit etiam ejusmodi quaestiones non esse movendas, quare scilicet Spiritus sanctus, aut Filii Filius, aut imago non dicatur: eò quòd de illis nihil habeatur in Scripturis: talia autem inquirentes Saducæis comparat, qui resurrectionem negabant, quòd non exponeretur quâ ratione fieret. Probat insuper Apostolum clarè significasse per Filium procedere Spiritum sanctum, quando cum Patris, & Filii æquè Spiritum esse dixit. Undè sic prosequitur: *Generat Deus, non ut homo: generat autem verè: & quod ex eo genitum est, est Verbum non humanum. Edit autem Verbum verè ex ipso, & emittit per os Spiritum, non qualis hominis est; quoniam nec os Dei corporale: ex ipso autem Spiritus, non aliundè.*

Eandem veritatem profitetur S. Gregor. Niss. lib. 7. contra Eunom. Porro, inquit, idem nobis & de Spiritu sancto dicendum est, cujus in solo ordine differentia constituta est: nam ut Patri conjunctus est Filius, cum ex illo esse habeat; non tamen posterius existit: sic etiam Spiritus sanctus proximè haret Filio, qui solâ cogitatione secundum rationem principii prius consideratur productione Spiritus. Nam temporum intervalla in illâ vitâ, quæ seculum omne precedit, locum non habent; adrò ut detractâ principii ratione, nullâ re sancta Trinitas à seipsâ dissideat. Ergò sublatâ ratione principii, nulla est in Trinitate differentia. Item ex Dydim. Alexand. lib. de Spiritu sancto, à Patre & Filio differt Spiritus sanctus; & ut se habet Filius ad Patrem; ità se habet Spiritus sanctus ad Patrem & Filium: ergò ab utroque Spiritus sanctus procedit.

Doctrinam hanc sic exponit S. Epiph. hæc. 61. quæ est Sabellianorum: *Non alienus est à Patre, Filioque non alienus; verum eadem ex substantiâ, eademque divinitate, ex Patre & Filio, & cum Patre ac Filio subsistens semper Spiritus sanctus.* Et in hæc. 74. Pneumatomachorum, ait Spiritum sanctum à Patre & Filio procedere: *Jam verò cum Christus à Patre profectus, Deus videlicet à Deo credatur: & Spiritus à Christo, utpote qui ab utroque procedit, inquit, & hic de meo accipiet.* Et in brevi fidei expositione, Fidei Catholicæ formulam inserit, in quâ de Filio & Spiritu sancto ità constituit: *Filium verè à Patre genitum, & Spiritum sanctum à Patre Filioque non alienum.* Et in Anchorato: *Igitur Deus est à Patre, Filioque procedens Spiritus: cui menti sunt ii, qui de præiò suberaxerant.* Idem habet infrâ his verbis: *Spiritus à Patre Filioque semper aspirat; neque creatus est Filius, neque creatus Spiritus sanctus.*

S. Cyrillus lib. 1. de adoratione sic ait de Spiritu sancto: *Est Deus; & Pater, & Filius, ille qui substantialiter ex utroque, nimirum ex Patre per Filium profuit.* Et in responsione ad objecta Orientalium ad

anathematissimum nonum : & assert. 14. Thesauri ita scribit : *Cum igitur Spiritus sanctus nobis immissus conformes nos Deo efficiat : procedat vero is à Patre & Filio : manifestum est ex divinâ essentiâ ipsum esse essentialiter in ipsâ, & ex ipsâ procedentem ; sicut & Spiritus qui ex humano ore procedis. Item & alibi sæpius.*

Circa annum 637. Maximus Abbas Martyr, qui tanta pro defendendo adversus Monothelitas dogmate Catholico pilius est, eam fidem proficitur in epist. ad Martinum Presbyterum Cyprium.

2. Latinorum Patrum eadem fuit expositio fidei S. Hilar. lib. 2. de Trin. Spiritum sanctum à Patre & Filio procedere sic docet : *Loqui autem de eo non est necesse ; quia de Patre & Filio authoribus confitendus est.* Lib. 12. in præclarâ oratione, quæ habetur ad finem epetis, fateatur inprimis Spiritus sancti ex Patre per Filium processionem sibi ignotam esse ; deindè se eam fidem profiteri, & in eâ in Baptismo fuisse institutum : *Nam, inquit, ut in eo quod ante æterna tempora unigenitus tuus est, cessante omni ambiguitate sermonis, atque intelligentia, difficultate, solum quod natus est manet ; ita quod ex te per eum sanctus Spiritus tuus est, etsi sensu quidem non percipiam ; sed tamen teneo conscientia : in spiritualibus enim rebus tuis hebes sum.* Et infra : *Ut quod in generationis mee symbolo baptizatus, in Patre, & Filio, & Spiritu sancto professus sum, semper obtineam ; Patrem scilicet te nostrum, Filium tuum unâ tecum adorem, & sanctum Spiritum tuum, qui ex te per unigenitum tuum est, promerear.*

S. Ambr. lib. 1. de Spiritu S. cap. 3. *Si Spiritum dicas ; & Deum Patrem à quo procedit Spiritus ; & Filium, quia Filii quoque est Spiritus, nuncupasti.* Lib. de dignitate humanæ conditionis cap. 2. ait animam esse sanctissimæ Trinitatis imaginem, per intellectum, voluntatem, & memoriam : *Nam sicut, inquit, ex Patre generatur Filius, & ex Patre Filioque procedit Spiritus sanctus ; ita ex intellectu generatur voluntas ; & ex his item ambobus procedit memoria, sicut facile à sapiente quolibet intelligi potest.*

S. August. epist. 66. ad Maximum sic scribit : *Patris & Filii est Spiritus.* Et infra : *Sic à Patre Filioque procedit, ut nec à Filio, nec à Patre sit factus.* Item epist. 170. & 144. inter ea quæ fide inconcussâ sunt tenenda, ex Patre & Filio processionem Spiritus sancti reponit. Lib. quoque 4. de Trin. cap. 20. hæc habet : *Demonstratur per congruam significationem non tantum à Patre, sed à Filio procedere Spiritum sanctum : qui ergo à Patre procedit & Filio, ad eum refertur à quo natus est Filius.* Lib. etiam 5. cap. 14. docet Patrem & Filium esse Spiritus sancti unicum principium. Similiter lib. 2. contra Maximinum Ariano- rum Episc. cap. 14. & lib. 15. de Trin. cap. 26. ait Spiritum sanctum Patris & Filii non dici filium ; quia ambo non generant ; sed ab iis procedit. Idem pariter S. Leo epist. 93. cap. 1.

Non est ergo cur Patrum Latinorum cum Patribus Orientalibus in eandem fidem conspiciantur, auctoritatem rejiciant quidam ex Græcis ;

præsertim cum acceptam à prioribus fidem ad posteros transferant , & priusquam circa materiam hanc , vel ullus fieret sermo , aut ulla quaestio moveretur , universalis Ecclesiæ doctrinam tradiderint à majoribus acceptam , ut à Tert. qui lib. contra Prax. cap. 4. sic loquitur : *Ceterum qui Filium non aliunde deduco , sed de substantiâ Patris , nihil facientem sine Patris voluntate , omnem à Patre consecutum potestatem ; quomodo possum de fide destruere monarchiam , quam à Patre Filio traditam , in Filio servo ? hoc mihi & in tertium gradum dictum sit , quia Spiritum non aliunde puto , quam à Patre per Filium &c.* Et cap. 8. *Sicut tertius à radice fructus ex frutice ; & tertius à fonte , rivus ex flumine ; & tertius à Sole , apex ex radio ; nihil tamen à matrice alienatur , à quâ proprietates suas ducit : ita Trinitas &c.*

3. His argumentis conclusio firmari potest. Ideò Filius ex Patre procedere dicitur , quòd Pater Filii fons & origo dicatur , ut colligitur ex S. Athan. orat. 2. & ex S. Basil. Hom. contra Sabellianos : quòd Filius sit ex Patris substantiâ , ut habetur in Symbolo Nicæno ; & apud ipsum S. Athan. & alios : denique quòd Patris sit imago. At Filius pariter S. Spiritus est fons & principium : dicitur Spiritus S. ex substantiâ Filii : item Verbum , & imago Filii &c. quemadmodum videri potest apud S. Ath. tum in lib. de humanâ naturâ susceptâ , tum in orat. 4. contra Arianos , tum & in epist. 2. ad Serap. ubi ex his Christi verbis Joan. 16. v. 14. relatis , *Ipse me clarificabit , quia de meo accipiet* , tradit ex substantiâ Filii esse Spiritum sanctum , & omnia à Filio accipere. Eadem habet S. Cyrillus in commentariis in Joan. & in epist. ad Nestorium. Spiritus S. dicitur etiam imago Filii à S. Basil. lib. 5. adversus Eunom. Item quoque à S. Cyril. assert. 33. Thesauri , Spiritus sanctus dicitur Filii Spiritus. Igitur quo jure Filius ex Patre procedere ab ipsis Græcis SS. Patrum Orientalium discipulis asseritur , eodem jure à Filio Spiritus pariter procedere dicendus est ; nisi diversas iisdem ex principis conficere velint illationes : quod nihil aliud esset , quàm duplicem adhibere mensuram ; alteram , quæ vera esset fidei tessera ; aliam verò , quæ pro arbitrio fidem humanam constitueret. Quam duplicem in eadem materiâ differendi rationem abominabitur quisque prophetis oraculis imbutus.

4. Antiqua est hæc fidei professio , habeturque in Conc. Aquisgranensi , in Tolet. 3. in 4. & 6. & in aliis art. 4. mox adducendis , ubi de particulâ , *Filioque* , in Conc. Aquisgran. an 809.

5. Jam ex superioribus est observatum à SS. Gregor. Naz. Gregor. Niss. & Aug. lib. 7. de Trin. cap. 6. & lib. 15. cap. 26 nullam inter personas divinas occurrere oppositionem , nec proinde distinctionem , nisi quæ petitur ex relationibus. Ergò nulla esset Spiritum sanctum inter , & Filium differentia , si sanctus Spiritus à Filio non procederet : nulla enim inter eos esset relatio , quæ in origine fundatur , seu in eo quòd una persona ex alterâ procedat.

O P P. 1. Quaslibet ex codicibus sacris , & ex traditione collectas auctoritates ad propositum non facere ; cum in illis de æternâ processione

non agatur, sed de solâ missione temporali.

R. pertinere authoritates suprâ laudatas non tantum ad temporalem Spiritus sancti missionem, sed ad æternam illius processionem, ut vel legenti compertum sit. Præterea missio in tempore processionem arguit, ut mox retulimus ex SS. Patribus.

IN ST. Si hæc designarent certò Spiritum sanctum à Filio procedere, non licuisset negare Spiritus sancti principium esse Filium; quod tamen Catholici viri & eruditissimi negarunt; nec istud eis vitio versum est. Dixerat quippè S. Cyril. in anathematismo 9. Filium esse Spiritus S. principium; hoc verò negavit Theodoretus in confutatione illius anathem. & addidit esse quidem Filium Spiritus sancti principium, utpotè consubstantialem, & ex Patre procedentem; non verò quòd à Filio, aut per Filium existentiam habeat; quod asserere, inquit, *blasphemum & impium est*. Quam doctrinam iterum repetit in epist. ad Joan. Antioch. apud D. Cottelerium in monumentis Ecclesiæ Græcæ tom. 1. Ad illud porro Theodoretæ S. Cyrilus, imò & Concilia Ephesinum & Chalced. & Theodoretæ hostes obmutuerunt; nec ulla fuit à Theodoro retractatio postulata: & proinde S. Cyril. & comitiorum illorum Patres ratam habuerunt Theodoretæ adversus S. Cyril. animadversionem; & sic blasphemam esse hanc propositionem, nimirum à Filio Spiritum sanctum procedere. Eidem suffragatur sententiæ S. Damascenus lib. 1. de fide orthodoxâ, ubi sic loquitur: *Scire oportet nos non dicere Patrem esse ex aliquo; sed ipsum dicimus Patrem esse Filii: Filium verò non dicimus principium, neque Patrem; sed eum dicimus, & ex Patre esse, & Filium Patris. Porro Spiritum sanctum tam ex Patre esse profiteamur, quàm Patris appellamus Spiritum; sed eum Filii Spiritum non nominamus. Et alibi queque sic habet: Sed & Filii, & Spiritus est; non tanquàm ex ipso, sed quòd per ipsum ex Patre procedat; solus enim Pater principium est.*

Præterea ex Patribus jam laudatis plerique dicunt quidem Spiritum sanctum ex Patre procedere per Filium, sed non ex Filio: & proinde Spiritus S. non est dicendus procedere ex Filio, tanquàm ex principio originis immediato. Græci hoc utuntur fundamento, ut videre est in sess. 25. Conc. Florent. contenduntque non posse admitti hanc præpositionem, *ex Filio*, quòd præpositio hæc causam principalem designet.

R. 1. etiamsi Theodoretus tam pravè de S. Cyrillo sensisset; nihil indè roboris accederet contrariæ sententiæ: nam quæ adversus Sanctum Cyril. scripsit, tum 5. tum 6. Syn. quæ Græcis ipsis summæ sunt venerationi, rejecerunt. Quietiam ex Græcis adversantur Latinorum sententiæ, Theodoretæ verba repellere tenentur; cum probent Spiritum Sanctum existentiam habere per Filium, neget verò Theodoretus. Quid autem hoc in negotio voluerit Theodor. non est compertum: Solus Theodor. hanc propositionem S. Cyrillo vitio vertit; silet insensibilissimus ei Nestorius; silet Joan. Antioch. & qui Nestorio favebant, aut S. Cyrillo adversabantur. In Symbolo, quod Joannes Antiochenus cum Orientalibus S. Cyrillo per Paulum

Emiffenum proposuit, nihil occurrit, quo Cyrilli sententia perstringatur aut revocetur. Non aliud igitur occurrit, nisi pravo sensu expositam fuisse S. Cyrilli sententiam, & Theodoretum Eunomii errorem illi tribuisse. Negabat autem Eunomius à Patre procedere Spiritum Sanctum; ad quam sententiam visa sunt Theodoro accedere verba S. Cyrilli, quæ ideo rejicit ut blasphema & impia: nullum quippè aliud extabat tunc temporis dogma de Spiritu S. processione quod pro blasphemo haberetur, præter Eunomii doctrinam: neque enim hæc quæstio, an à Patre & Filio procederet Spiritus S. ad hæc usque tempora inter Catholicos nota fuerat; nec alias probationes adversus S. Cyrillum adducit Theodoretus, quam quæ adversus Eunomium afferri solebant. Theod. ergo propositionem interpretatus est eo sensu, ut assereret blasphemum esse docere Spiritum S. existentiam habere ex Filio, aut per Filium, nullâ Patris mentione factâ: *Proprium autem, inquit, Spiritum Filii si quidem ut ejusdem cum eo nature, & ex Patre procedentem dixit; simul consuebimus, & tanquam piam suscipimus vocem: si verò tanquam ex Filio, aut per Filium existentiam habeat; hoc ut blasphemum & impium rejiciemus; credimus enim & omino dicenti, Spiritus qui ex Patre procedit.*

Utrum Spiritus S. procedat ex Patre & Filio, aut per Filium ex Patre, non expendit Theodoretus, nec de illâ quæstione differit; sed in convellendo Eunomii errore, quem à S. Cyrillo scriptum injuriâ censebat, collocat omne studium; de quæstione verò, an ex Patre & Filio procederet Spiritus Sanctus, siluisse videtur; quia de dogmate illo, ut jam monuimus, nulla fuerat concitata controversia. Attamen si liceat ex Theodor. verbis conjicere, quæ fuisset ejus sententia, si de illâ quæstione aliquid statuendum fuisset; illum continuò eam in fidem, quæ Spiritum Sanctum ex Filio procedere, asserit, fuisse descensurum, argumento sunt ejus discedendi rationes, quæ habentur lib. 3. Hæc. fabul. ubi probat Spiritum Sanctum ex Deo, & ex Patre habere existentiam, & Deum esse: ex Patre verò & Filio procedere nullatenus negat. Imò innuit eum ex Filio, ut principio, procedere: adductis enim his Apost. verbis 1. Cor. 2. v. 10. *Spiritus omnia scrutatur, etiam profunda Dei:* ait solum Spiritum Dei nosse quæ sunt Dei: docet quoque Spiritum Sanctum habere existentiam ex Filio; & quam tribuerat S. Cyrillo Eunomii sententiam ita refellit. *Cum de ejus cognitione testimonium tulisset, ostendit etiam undenam habeat existentiam; nos enim, inquit Apost. non Spiritum hujus mundi accepimus, sed Spiritum qui ex Deo est. Hæc ratione cum Patre & Filio illum semper conjungit; cum creaturâ autem nunquam conjunxit: non enim creatura partem illum esse novit, nec primam facturam nominat secundum Arii & Eunomii & Macedonii blasphemiam. Hinc fit compertum S. Cyrilli mentem non capisse Theodoretum.*

Nec sanè cæteros Patres, ut & Concilia Ephesinum, & Chalcedonense, nec etiam ipsum Joan. Antioch. & reliquos Orientales ullatenus fugiebat alienum esse Cyrillum à sententiâ blasphemâ, quam ei Theodoretus tribuerat. Nam cum Fidei suæ expositionem circa capita & dubia, quæ de

S. Cyrilli doctrinā patiebantur, ad S. Cyrillum per Paulum Emissenum Episcopum transmittunt, ut vel sic incomperto fieret, quæ mens ejus esset; in eâ formulâ de Spiritû Sancti processione ne verbum quidem habent. Undè colligere est Joannem Antioch. & reliquos Orientales existimasse de Spiritu Sancto Catholicè sentire S. Cyrillum, qui in epist. suâ ad Joan. Antioc. per Paulum Emissenum pacis legatum significat ex chartâ, seu expositione à Joan. missâ manifestum fieri, superfluum omninò fuisse disfectionem Ecclesiarum, & citra ullam causam motam fuisse. Inferit etiam ipse S. Cyrillus in medio & sub finem epist. Spiritum Sanctum procedere ex Patre: *Est autem, inquit, non alienus à Filio*, hoc scilicet exigente essentia ratione. Expostulat insuper in epist. suâ ad Eulogium Presb. suum Constantinopoli agentem, in quâ exponit quæ hoc in negotio egisset, ut quorundam posset, qui ipsius verba in pravos sensus detorquebant, criminationes dispellere; vultque pariter tradi confutationes, quas adversus Andream & Theodoretum pro capitibus suis scripserat. Quod argumento est S. Cyrillum, etiam post suam cum Joanne Antiocheno reconciliationem, à suâ sententiâ nunquam discessisse; quin imò eam constanter propugnasse. Et verò cum Orientales & universa Ecclesia in duobus Conciliis Oecumenicis 4. & 5. post S. Cyrilli mortem, de Orthodoxâ Sancti Cyrilli doctrinâ convenerint; cumque à suâ de Spiritu Sancto sententiâ, ipsis non ignorantibus recesserit nunquam; sanè mentem ejus non ceperat Theodoretus: hæresim quidem impugnabat, sed quæ non esset Sancti Cyrilli. Adde Theodoretum in suâ epist. ad Sanctum Leonem Papam & alios, profiteri se cum Latinis Catholicè semper sensisse, nihilque adversus Sanctum Cyril. à tempore pacis inter Orientales & Sanctum Cyrillum motum fuisse. Ipsi autem compertum erat, & Latinos omnes, & S. Cyril. semper credidisse Spiritum Sanctum à Patre per Filium, aut ex Filio procedere.

IN Chalced. Syn. qui Theodoro infensi erant, ne verbum quidem de hâc blasphemîâ fecerunt; quia constabat de Theodoro hallucinatione; cumque disputationis artu abreptum imposuisse S. Cyril. hæresim, de quâ ne quidem cogitaret; idè Sanctus Cyril. in propugnandâ fide omnem operam collocans, hanc objectionem prætermittit: noverat enim calumniam hanc facillè & ex se ipsâ dispulsum iri; & Catholicum dogma, quod non apperebatur, integrum esse permanens. S. Damasceni verbis hæc adhiberi potest benigna interpretatio, scilicet eum negasse à Filio, tanquam principali principio, Spiritum Sanctum procedere, seu à principio, quod à se, & non ab alio producendū vim haberet; eam enim virtutem Filius divinus habet à Patre. Porro autem si S. Damascenus Spiritum Sanctum à Filio non procedere existimasset, sed à solo Patre; non adderet, ut habetur in objectione, Spiritum Sanctum esse per Filium ex Patre: nam dicere Spiritum esse ex Patre per Filium, est docere dogma Catholicum, ut & Filium non esse principale principium, quia à Patre procedit: undè subjungit, *quia solus Pater principium est*.

Non est immorandum in eo quod ex Patribus laudatis objicitur, scilicet dixisse plerisque *per Filium* procedere Spiritum sanctum: nam propo-

sitiones *ex* & *per* idem significare sæpius pluribus probat ipse S. Basil. lib. de Spiritu sancto; & distinctionis, quæ fieret inter illas præpositiones, Eunomium & Aëtium auctores esse. His autem rationibus nititur, ubi observavit natam inde quorundam expostulationem, quod in concionibus frequenter Deo gloriam per Filium in Spiritu sancto exhibuisset, & ex iis inducerent hæretici naturarum diversitatem. Sic enim Aëtius perperam docebat, ubi dicitur de Patre, *ex quo omnia*; de Filio, *per quem omnia*, & de Spiritu sancto, *in quo omnia*; in Patre, Filio, & Spiritu sancto diversitatem naturæ denotari; cum *ex quo* designaret creatorem; *per quem*, ministrum & instrumentum; *in quo*, tempus & locum; & sic nihil aliud significare Spiritûs sancti vocabula, quàm designationem loci & temporis. Addit idem Sanctus Basil. cap. 3. ejusdem libri de Spiritu sancto, illud inter has propositiones ex philosophis deductum discrimen, in doctrinam Evangelicam simplicem & ignaram artificii ab illis hæreticis fuisse translatum. Probat postea tres illas præpositiones in Scripturis aliud nihil significare, quàm trium personarum distinctionem; non verò varias naturas. Hinc de eodem Patre Rom. 11. *per quem*, & *ex quo*, dicuntur; & proinde *per quem*, nihil aliud, quàm *ex quo* designat; non verò ministerium: alioquin colligeretur Patrem divinum esse alterius ministrum. Præterea ibidem S. Basilus ait particulam *ex quo* de tribus personis æquo jure proferri; nempe de Filio Lucæ 8. v. 46. Joan. 1. v. 16. & cap. 16. v. 14. Ephes. 4. v. 16. Coloss. 2. v. 19. Item de Spiritu sancto, Joan. 3. v. 5. *Per quem* verò, & de Patre quoque dici, ut Isaiæ 3. Rom. 6. v. 4. 1. Cor. 1. v. 9. Gal. 4. v. 7. *In quo* similiter dici de Patre Ps. 70. & 88. Etiam præpositionem *per*, loco *ex*, usurpari, ut Genes. 4. v. 1. *posseidi hominem per Deum* & 1. Cor. 7. homo dicitur esse per mulierem. Probat adhuc cap. 7. Scripturas, ubi de Filio agitur, has propositiones adhibere, *per*, *de*, *in*, cum de beneficiis à Christo acceptis habent mentionem. Idem habetur tum in libris S. Gregorii Niss. Cont. Eunom. editis à Jacobo Gretsero; tum & apud S. Ambr. lib. 2. de Spiritu sancto cap. 10. Et proinde ex illis præpositionibus nullum inter divinas personas discrimen potest repeti; præsertim cum illarum præpositionum usus promiscuè usurpetur, non modo in Scripturis, sed etiam à Patribus, uti constat ex autoritatibus Græcorum & Latinorum suprâ adductis. Et certè, cum in capitibus, quæ adversus Conc. 7. ad Adrianum I. misit Carolus M. inter alia Concilio 2. Nicæno Galli vitio verterent, quod Tharastius act. 3. Spiritum procedere per Filium asseruisset, hanc loquendi formulam patribus esse Familiarem, & proinde admittendam in responso ad Carolum tradidit Adrianus: quod vel argumento est an iquos Patres, imò & recentiores indiscriminatim sumpsisse allatas jam præpositiones. Undè in Conc. Florentino Archiep. Nicænus sess. 25. demonstravit Græcos Patres hanc loquendi formâ fuisse usos, *ex Patre per Filium*, procedere Spiritum sanctum; Latinos verò, *ex Filio & Patre*, sæpius; nec inter se discrepare has loquendi rationes, sed tantum specie tenus; nolle tamen Græcos hanc præpositionem, *ex*, in usum admittere; quod apud eos causam principalem significaret, Græci postea Paleologi Imp. jussu in-

ter se Synodos coëgerunt, & idem decreverunt: & Joseph Patr. Constant. ex Patrum consensu profert idem esse *per Filium*, & *ex Filio* procedere; sed tamen voce, *ex*, non usuros, nihilque se addituros esse Symb. testantur.

O P P. 2. Patrum illorum auctoritates, qui, aut de Spiritûs sancti ex Filio processione ne verbum quidem habent, ut S. Athan. epist. 2. ad Serap. aut liberam opinandi rationem relinquunt, ut S. Hilar. lib. 8. de Trin. ubi sic habet: *Neque in hoc nunc calumnior libertatem intelligentia, utrum ex Patre, an ex Filio Spiritum Paracletum putent esse.*

R. 1. SS. Athan. & Hilar. satis apertè Spiritûs sancti ex Filio processionem docuisse, quemadmodum liquet ex antea dictis.

R. 2. Sanct. Hilarius in totum in eo fuisse, ut ex illâ variâ intelligendæ Spiritûs sancti processionis ratione nihil contra Patris, & Filii substantiæ unitatem posse inferri ostenderet: *Nunc*, inquit, *non calumnior*; seu in hoc nunc temporis non hæreo, in impugnandâ scilicet opinandi libertate, quam sibi faciebant adversarii de Spiritûs sancti processione: licet autem de solâ Filii cum Patre probandâ substantiæ unitate vellet cum adversariis sermonem instituere: attamen ut Spiritûs sancti ex Patre & Filio processionem exponeret, scribit non in dubio relictam à Christo fuisse hanc doctrinam; cum Joan. 16. ex Patre Spiritum sanctum procedere, & à Filio accipere, & mitti docuerit.

I N S T. Synodus Constant. 1. in Symbolo, Spiritui sancto cum Patre & Filio communem deberi adorationem definit; & Patrem singulare illud habere, quod ex ipso Spiritus sanctus procedat. Igitur Spiritus sanctus procedere à Filio tunc non credebatur; nec enim id siluisset Concilium ob hæreses contra Spiritûs divinitatem coactum.

R. Idèò de câ questione silet Concil, quia tunc temporis de illâ non movebatur controversia: & quia Macedoniani adversus Spiritûs sancti divinitatem pugnabant; idèò Spiritum sanctum cum Patre & Filio, ut qui cum illis esset unus Deus, adorandum esse decernit. Inserit tantùm hæc Christi verba Joan. 15. v. 26. *Qui à Patre procedit*: & Eunomii à Filio solo Spiritum sanctum creati asserentis hæresim damnat, ac conficit.

O B J. ult. Si Spiritûs sancti Filius sit principium; vel numero erit idem cum Patre principium; vel specie: si primum; ergò non erunt duæ personæ, sed una: si secundum; ergò erunt duo numero principia.

R. Licet Pater, Filiusque sint unum & idem numero vel specie principium (si verbis illis uti liceat, ubi de Deo agitur) non proindè una erit numero persona; quod nimirum spiratio activa in Patre, & Filio personalis non sit; verùm utrique communis, habeantque Pater & Filius proprietates alias, quibus constituuntur in ratione personæ: nec enim ex unitate principii unitatem personarum colligere licet; alioquin cum rerum creaturarum sit unicum principium, unica quoque in Deo foret persona. S. August. lib. 5. de Trin. cap. 14. *Faciendum est*, inquit, *Patrem, & Filium principium esse Spiritûs sancti, non duo principia; sed sicut Pater, & Filius unus Deus, & ad creaturam relativè*

unus creator, & unus Dominus: sic relativè ad Spiritum sanctum unum principium. Concilium Lugdun. sub Gregor. X. cap. unico de summa Trinitate hæc habet: *Fideli ac devotâ professione facemur, quòd Spiritus sanctus æternaliter ex Patre, & Filio, non tanquam ex duobus principis, sed tanquam ex uno principio: non duabus spirationibus, sed unicâ spiratione procedit.* Ibi damnat eos, qui à duobus principis, ex Patre nempe & Filio Spiritum sanctum procedere traderent. In Concilio Florentino cum Latinos incusarent Græci, quòd in Trinit. agnoscerent duo principia, in ultimâ sessione ità definitum fuit: *Quòd Spiritus sanctus ex Patre, & Filio æternaliter est, & essentiam suam, suumque esse subsistens, habet ex Patre simul & Filio, & ex utroque æternaliter tanquam ab uno principio, & ab unicâ spiratione procedit.*

INST. Ex S. Hilar. lib. 2. de Trin. Pater & Filius sunt Spiritus sancti authores: igitur & duo principia.

R. Patrem & Filium dici Spiritûs sancti authores adjectivè; non verò substantivè; quia Pater & Filius per unam & eandem virtutem producant Spiritum sanctum. Undè Pater & Filius dici possunt duo spirantes, non duo spiratores, aut duo principia; quia unica est spiratio, quæ se habet per modum formæ: indè etiam, licet tres personæ divinæ sint tria supposita, unum tamen dicuntur creaturarum principium; quia unica in tribus est omnipotentia & divinitas: sicque cum una sit in Patre & Filio spiratio activa, debent quoque dici unum principium.

INST. Vel productio, quâ Spiritus sanctus à Patre procedit, perfecta est, vel non: si primum; ergò supervacanea est illa, quæ Filio tribuitur: si secundum; ergò imperfectum aliquid à Patre oritur.

R. falso fundamento istud argumentum niti; quia nempe duplex supponit principium, ex quo Spiritus sanctus procedat. Deindè sic quæri posset num perfecta sit mundi productio, quâ creatur à Patre; & proindè num Filii, & Spiritûs sancti frustranea sit operatio? Cum autem cavillatoria esset hæc quæstio, ità & inanis est altera. Præterea Filius quâ Filius, formaliter Spiritum sanctum non emittit; sed quâ spirator, & per spirationem activam à Spiritu sancto distinguitur.

Quæritur num si à Filio non procederet Spiritus sanctus ab eo esset distinctus?

R. non iri distinctum; quia personarum distinctio ex relationibus oppositis oritur; sublati enim relationibus non multiplicantur personæ, nec à se invicem discrepant, ut docent Concil. Tolet. Ss. Greg. Naz. & Niss. & alii mox laudati. Relationes autem illæ debent esse oppositæ, non disparatæ tantum; alioquin paternitas, & spiratio activa distinctas personas constituerent. At nisi Spiritus sanctus à Filio procederet, non essent inter eum & Filium relationes oppositæ; quippe quæ ex processione, seu ex origine manent; ergò &c.

OPP. 1. S. Anselmus fidei catholicæ adversus Græcos eximius defensor in lib. de Spiritûs sancti processione cap. 3. & 4. docet varias personas per variam procedendi rationem constitui, & Spiritum sanctum

à Filio alium esse; quia existit à Patre procedendo, non verò nascendo; ut Filius; hæc sunt ejus verba: *Habere utique à Patre esse Filium, & Spiritum sanctum, sed diverso modo; quia alter nascendo, alter procedendo. . . . & ideo cum nascitur unus, non potest cum eo nasci ille, qui per hoc alius est ab eo: quia non similiter nascitur, sed procedit: & cum unus procedit, nequit ille procedere simul, qui per hoc est alius ab illa; quia non similiter procedit, sed nascitur: & ideo non habet hic unitas illa vim consequentia; quia pluralitas obviat, quæ ex nativitate nascitur & processione: nam etsi per aliud non essent plures, Filius & Spiritus sanctus, per hoc solum essent diversi.*

R. hanc S. Anselmi non fuisse mentem, cum cap. 2. Axioma receptum docuerit, nempe solam relationis oppositionem inter personas divinas discrimen facere: *Supradicta, inquit, relationis oppositio, quæ ex eo nascitur, quia supradictis duobus modis Deus de Deo est, prohibet Patrem, & Filium, & Spiritum Sanctum de invicem dici: & propria singulorum aliis attribui. Sic ergo hujus unitatis, & hujus relationis consequentia se temperant; ut nec pluralitas, quæ sequitur relationem, transeat ad ea, in quibus prædicta simplicitas sonat unitatis: nec unitas cohibeat pluralitatem, ubi eadem relatio significatur: quatenus nec unitas amittat aliquando suam consequentiam, ubi non obviat aliqua relationis oppositio; nec relatio perdat quod suum est, nisi ubi obsistit unitas inseparabilis. Quod autem separatâ relationis pluralitate personas distinguere asserit; non ideo statuit relatione disparatâ constitui personam, sed à se invicem distinguere; quatenus una oppositio alteri responderet. Quibus relationibus positis una persona refertur ad aliam, sicut & ab eâ procedit.*

O P P. 2. Quod rem in esse confluunt, eam à quocumque alio distinguit. At per spirationem passivam Spiritus sanctus in suo esse constituitur. Igitur etiam à quovis alio, ideoque à Filio distingueretur, licet ab eo non procederet; Sicut etiam à Spiritu Sancto Filius nunc realiter distinguitur, licet ab eo non procedat: Ergò in hypothese factâ Spiritus S. distingueretur realiter à Filio.

R. rationem alicujus rei constitutivam in esse, eo modo esse distinctivam, quo est constitutiva. Unde si Spiritus Sanctus à Filio non procederet, in esse quidem virtuali Spiritum Sanctum constitueret spiratio passiva, sed non in esse reali, quo à Filio distinguitur. Licet verò Filius à Spiritu Sancto non procedat, tamen ab ipso distinguitur; quia Filiatio passivæ opponitur spirationi mediante spiratione activâ, cui identificatur, & cujus est radix: quamvis enim in suo formali conceptu spirationem activam non includat Filiatio, reverà tamen illam infert. In hypothese autem factâ spirationi activæ non identificaretur Filiatio: Et sic Filius à Spiritu Sancto non distingueretur.

O P P. 3. A Filio solo licet Spiritus sanctus procederet, à Patre tamen realiter distingueretur. Igitur pariter à Filio realiter distingueretur, si à solo Patre procederet.

R. eâ in hypothese quidem impossibili Spiritum sanctum originem sal-

tem mediatam à Patre habiturum fore; cum spirandi facultatem à Patre Filius accepisset; sicque saltem mediatè fore opponendum Patri: si verò à solo Patre procederet Spiritus sanctus, nec immediatè opponeretur Filio; proindèque ab eo non distingueretur.

ARTICULUS TERTIUS.

Utrum Symbolo Constantinopolitano Particulas, ex Filio, addiderit Ecclesia Latina? Et an eas addere licitum fuerit?

CONCLUSIO. Ecclesia Latina Symbolo illi nihil quidquam addidit.

Prob. 1. Quia Symbolum illud integrum & absque addi amento servat & veneratur Ecclesia Latina; sed novum confecit his particulis insertis (ex Filio) jure suo usà: Cuilibet enim amplissimæ Ecclesiæ licet apertas fidei suæ formulas fidelibus proponere; præsertim cum dogma Catholicum rudiores in fidei formulâ non deprehendunt. Sic Conc. Constant. servato integro Synodi Nic. Symbolo novum & longè uberius edidit, seu in suo addidit, quæ in Nicæno non extabant. v. c. *Ex Spiritu Sancto: Ex Mariâ Virgine: Sedes ad dextram Dei: Cujus regni non erit finis: Unam sanctam, Catholicam, & Apostolicam Ecclesiam: Unum Baptisma in remissionem peccatorum: Resurrectionem mortuorum: & futuri seculi vitam.* Undè comparatione ductâ Latinam in Florentino Conc. firmatam additionem à Græcorum calumniis vindicat Josephus Methonenlis in lib. pro Conc. Florent. relatis ex Apologiâ pro Conc. Chalcedon. verbis Maximi, qui pariter pro Concilii Chalcedon. definitionibus pugnans, argumentum colligebat ex æconomia Concilii Const. 1. Quod sibi nemine refragante liberum esse censuerat Symb. Nic. mox laudata verba inferere; aut potius illis additis novam (sicuti fecit) fidei formulam edere. Simile infert argumentum pro Flor. Conc. Josephus Methonenlis, scilicet potuisse pariter ab Ecclesiâ Latinâ Constant. Symbolo aut quædam addi, aut uberiores proponi expositionem: hæc sunt verba Maximi: *Post Nicænam Syn. à Doctis Patres, atque omnis Synodus orthodoxorum, sanctorumque Patrum, non aliam omninò fidei definitionem induxerunt eo ipso quo de suis verbis aliquid inseruerunt, ut vos affirmatis strenuè delirantes, & penitus insanientes; sed ipsam ut primam & unicam à trecentis octodecim Patribus sanctam, firmam & ratam esse voluerunt, explicantes eam, ac velut apertius explanantes propter eos, qui illam ejusque dogma à pravis interpretationibus ad suam detorquebant impietatem. Igitur Symboli fieri potest uberior interpretatio, aut editio novi Symboli, ut novum aliquod dogma hæreticum contra verum Symboli sentum comprimatur.*

Hæc fuit S. Anselmi adversus Græcos pro Ecclesiæ Latinæ defensione:

d-d ij,

pugnantis responsio eo æquior, quòd contentionibus omnibus occurrat. Id enim lib. de processione spiritûs S. cap. 22. Constant. 1. Syn. an. 381. habita Symbolo nihil quidquam additum à Latinis fuisse scribit; sed novum aliud fuisse editum; quia ut habet à Const. nt. Synodo editum integrum cum Græcis servamus & veneramur: istud autem, quo frequentius in populi audientiâ utimur, Latino more dictatum cum additamento supra dicto edidimus. Quod autem queritur, quare hoc Græcorum Ecclesiæ consensu factum non est; respondemus, quia & nimis erat difficile Latinis eorum Episcopos ad consulendum de hac re colligere, nec erat necesse; unde non dubitabant hoc in questionem adducere. Quæ est enim Ecclesiæ, quæ vel per amplitudinem unius regni dilatatur, cui non liceat aliquid secundum rectam fidem constituere, quod in conventu populi utiliter legatur, aut canteur? Quando ergo magis licuit Latinis hoc constanter proferre, in quo omnes gentes, & omnia regna, quæ Latinis utuntur litteris, pariter concordant. Ideo autem addit Ecclesiæ Latinam his particulis additis novum Symbolum confecisse, quòd quidam minùs perspicaces fidem Ecclesiæ universæ in Symb. Const. verbis non animadverterent, scilicet Spiritum sanctum ex Filio procedere; & quòd hinc dogma illud negandi occasionem quidam sumerent. Quoniam igitur & necessitas cogebat, & nulla ratio prohibebat, & vera fides hoc admittebat, fiducialiter asseruit Latinitas quod credendum & confitendum esse cognoscebat: Scimus enim quod non omnia, quæ credere & confiteri debemus, ibi dicta sunt; nec illi, qui Symbolum illud distavere, voluerunt fidem Christianam esse consentiam ea tantummodo credere & confiteri, quæ ibi posuerunt. Ut enim alia taceam, non ibi dicitur Dominus ad infernum descendisse; quod tamen pariter & nos & Græci credimus. Si autem dicunt nullomodo debuisse corrumpi Symbolum tantâ autoritate taxatum; nos non iudicamus esse corruptionem, ubi nihil addimus quod his, quæ ibi dicta sunt, adversetur. S. Anselmi sententiam quicumque attentiori mente ponderavit, procul dubio ut veram & aptissimam, quâ Græcorum objurgationes comprimantur, existimabit.

Tandem illius responsionis soliditas eo clariùs elucet, quòd eadem fuerit SS. Athanasii, & Episcoporum Ægyptiorum, SS. Basilii, Gregor. Naz. & Epiphaniî responsio art. ultimo exteibenda, ubi quæremus an Spiritûs sancti divinitas fuerit in Concilio Nic. definita.

O P P. 1. ab Ephesinâ Syn. act. 6. prohibitum fuisse, ne quid Symbolis adderetur: cum enim expositio Nestoriana à quodam Carisio Philadelphis Presbytero oblata fuisset, Statuit Concilium nemini licere alteram proferre fidem, vel conscribere, aut componere, præter eam, quæ definita est à Sanctis Patribus Nicææ congregatis cum sancto Spiritu; qui autem ausi fuerint aut componere fidem alteram, aut proferre, vel offerre converti volentibus ad agnitionem veritatis, sive ex gentilitate, sive ex qualicumque heresi; hos quidem si sunt Episcopi, aut Clerici, alienos esse Episcopos ab Episcopatu, & Clericos à Clericatu decrevit: si verò Laici fuerint, anathemati subijci. Igitur Ecclesiæ Latinæ non liquit novum Symbolum conficere, additis illis particulis, ex Filio.

R. de novis fidei formulis, quas ederent Ecclesię amplius adversus novitates, prohibendis non cogitasse Patres Ephesinos; cum decessorum, nempe Constant. primi Episcoporum, vestigiis insistentes, adversus Nestorianam novas sanctiones consecerint; pariterque omnes ferme subsequentes Synodi hæreticas novis decretis compresserint innovationes. Nihil igitur aliud sancivit Synodus Ephesina, quàm privatis hominibus non licere nova symbola, præsertim doctrinæ catholicæ adversa conticere, cujusmodi erat Nestoriana Carisi formula; vel etiam cum nulla urget necessitas. In Latina verò Ecclesiâ Symbolum, cui verba fidesque sunt inserta, non est privati cujusdam viri opus, nec catholicæ fidei adversatur; sed est dogma catholicum, & Ecclesiæ Latinæ consentientis definitio.

Hic usus in Ecclesiâ invaluit, ut qui ab hæresi ad unitatem catholicam transirent, non solum in Symbolo contentam fidem profiterentur, sed simul erroris sui singularem proscriptionem adderent.

INST. 1. In Concilio Ephesino non tantum prohibitum est, ne à privatis fieret Nicænæ fidei contraria expositio, sed absolutè, ne vel à Synodis, aut Ecclesiis amplissimis, etiamsi urgeat necessitas, nova edatur expositio fidei prioribus in Conciliis jam exposita; vel ne illis Symbolis aliquid inferatur: Ità intellexit Chalcedonense Conc. act. 2. Cum enim Judices omnem ambiguitatem è Symbolis amoveri, puramque fidei expositionem fieri postularent, clamaverunt Episcopi expositionem fieri non posse; regulam esse, quæ aliam expositionem fieri prohiberet; & symbola Conciliorum Nicæn. & Constant. legi jubent. Idem pariter sanciunt Concilium quintum in collatione 6. & Concilium sextum act. 18.. Et verò si licuisset addere quiddam illis symbolis, quo aut fides uberius exponeretur, aut subortæ prosciberentur hæreses; Patres Ephesini inseruissent facile Symbolo Constantinop. adversus Nestorium, vocem *Deiparam*; & Chalcedon. adversus Eutichetem, *Christum esse ex, & in duabus naturis &c.* Sed intacta illa symbola esse servanda censuerunt: ideòque absque ejusmodi additionibus damnarunt hæreticas Nestorii & Eutichetis novitates. Non ergò fuit, cur Latini voces illas *Filioque* Symbolo Constantinop. infererent; aut illis insertis conficerent novum Symbolum. Undè in epist. de pace S. Cyilli Alex. ad Joan. Antioch. in Chalced. Concilio lecta & probata legitur: *Non patimur ut concutiat-ur fidei symbolum à Patribus Nicæa conditum: nec enim, aut nobis, aut aliis unam omninò voculam ibi positam immutare, vel unam syllabam præterire permittimus, memores ejus, qui dixit, ne transferas terminos antiquos, quos posuerunt patres nostri: non enim loquebantur illi, sed Spiritus Dei Patris.*

R. novas fidei expositiones, quæ fierent à Synodis, aut ab Ecclesiis, adèò non prohibuisse Concilium Ephesinum; quin imò novam fidei definitionem adversus Nestorium protulit, & adversus Eutichetem Chalcedonense, & Constantinop. tertium adversus Monothelitas: nec cogitasse Ephesinos, aut Chalcedonenses de prohibendis additionibus illis, seu ne quid

ad Catholicam fidem apertius exprimendam Symbolo novo constituitur. Cur enim in eam mentem venissent? cum nihil Symbolis Nic. & Constantinop. additum ad hæc tempora fuisset; sed novum à Patribus Constant. editum fuisset Symbolum. Quid ergò ex ipsorum proposito elucescit? Caritas vir privatus erroneam fidei expositionem offert Concilio Ephesino: ejusmodi fidei professiones damnat Synodus à privatis tentatas, & adversas fidei, aliaque Patres nolunt proponi dogmata, quàm quæ in Conciliis Catholicis superioribus, Nicæno scilicet & Constantinopolitano, probata fuissent. Illam adversus synodica decreta esse debere reverentiam fatemur, ut intacta servantur, nulloque immutentur additamento, quamvis facili, quamvis ad convellendas hæreses idoneo. Nec ab Ephesinis & Chalced. Patribus immutata fuerunt Nicæna & Constantinop. formula. Nullam pariter immutationem in Symbolo Constant. à Latinis fuisse factam contendimus. Quid igitur fuit præstitum? Explicitis utriusque Concilii, Ephesini & Chalcedonenfis definitionibus, Nestorii & Eutichetis doctrinam hærescos damnaverunt. Occidentalis similiter Ecclesia, novo Symbolo confecto, his particulis, *Filioque*, additis, ampliori expositione proposuit, quod in Symbolo Constant. implicitè continebatur: cum enim diceretur Spiritus S. in illo Symbolo ex Patre procedere; implicitè saltem intelligebatur procedere ex Filio; quia scilicet quæ Patris sunt, Filii sunt. Abstenuit adeò Ecclesia Latina ab immutando Symbolo Constantinop. ut illud integrum continuò servarit; palàm conscribi, & postmodum typis edi curarit; nec Græcis, aut aliis vitio verterit unquam, quòd illud Constantinopol. Symbolum intactum servarent.

INST. 2. Non licet per modum glossematis verba quædam scripturis inferere; quia Dei verbum est fidei regula: nihil ergò pariter Symbolo inferi potest; alioquin genuinus Patrum & Conciliorum sensus periclitaretur. Nam quisque Patrum definitionibus posset pro arbitrio suo adjicere, illasque immutare.

R. Scripturis nihil addendum esse, Deut. cap. 4. v. 2. & cap. 5. v. 22. nihil etiam licere in monumentis traditionis immutare; quia fidem ab Apostolis acceptam referunt. Nihil verò ab Ecclesiâ Latinâ in Symbolo Constantinop. mutatum fuit; sed aliud paucis additis fuit confectum, & uberiores fidei expositionem proponere semper licuit Ecclesiæ, & licebit.

INST. 3. Recens est illa excusanda Ecclesiæ Latinæ ratio: censebantur enim Latini Concilio Constantinop. addidisse verba illa, *Filioque*. Hinc Leo III. additionem illam Symbolo Constant. factam improbavit, & Caroli Magni legatorum supplicatione nunquàm potuit induci, ut illam probaret; imò ut quàm alieno ab illâ additione esset animo testaretur, in argenteam laminam Symbolum Constant. absque adjectione ullâ incidi, simulque juxta Petri corpus reponi jussit, ex Magist. Sent. lib. 1. dist. 11. Et an. 809. Synodo Aquisgranensi per legatos suos declaravit, molestè se ferre talem Symbolo factam additionem; & quòd cum tali

additione cantaretur in Ecclesiis. Leo III. in actis Smaragdi apud Symundum tomo 2. Conciliorum Gallie, & apud Baron. ad an. 809. ita respondit Bernario & Jesse Episcopis, & Abbati Adalardo legatis: *Cum enim urgerent legati, numquid non bene iam auctores (Synodi Constantinopolitanæ Patres) fecissent, si quatuor tantum addendo syllabas, tam per necessarium fidei sacramentum cunctis deinde seculis perspicuum redderetur?* Respondet Papa piè & prudenter: *Sicut non audeo dicere, non bene fecisse, si fecissent; quia procul dubio sicut cetera, que vel omiserunt, scientes utique & non tam humanà, quàm divinà illuminati providentiâ fecerunt: ita quoque non audeo dicere istud eos nobis minus intellexisse, & perpensis cur dimiserunt, vel cur dimissum, ne ultra mitteretur, sicut & cetera prohibere, tu & tui videre quid seminis de vobis: nam & ego me illis, non dico, præferam; sed etiam illud absit, mihi ut coquare præsumam.* Post multa in actis iidem sic rogant missi: *Ergo ut video illud, de quo quæstio agitur, de sæpè facto Symbolo tollatur, & tunc demùm à quolibet licitè ac liberè, sive cantando, sive tradendo, discatur & doceatur.* Respondet Papa: *Ita proculdubio à nostrâ parte decernitur: ita quoque ut à vestrà assentiatur, à nobis omnimodis suadetur.* Leonem idèò laudat Photius in epist. ad Patriarcham Aquileensem, quòd Symbolum tabulis, ut suprà notavimus, inscribi iusserit. Igitur ex Papæ, legatorum, & omnium consensu palàm erat Symbolo Constantinopolitano fuisse addita vocabula, *Filioque*. Hinc querelis Græcorum datus est locus; hinc in Concilio Florentino contentiones; hinc Ecclesia Latina ipsa nunc temporis professionem illam Symbolum vocat Constantinopolitanum.

R. cum illi legati testarentur se proponere Symbolum Const. cum additione illâ, prudenter admodum Leonem III. rejecisse illam additionem; ne de Patribus œcumenici Concilii Const. ferre iudicium videretur; aut se illis æquare, aut præferre, ut habet. Igitur reverentiâ erga Conc. œcumenicum ductus, ne quid Symbolo adderetur, constantèr institit; ne scilicet de Conc. œcumenici autoritate quid detrahi videretur; & ne de iis, quæ S. Spiritu duce instituta fuerant, iudicium unquàm fieret. Si autem legati exposuissent servato Conc. Symbolo integro, variarum Ecclesiarum consensione probatum fuisse novum symbolum cum illa particula *Filioque*; ob rationes sæpiùs expositas, non restitisset Leo 3. Imò cùm de dogmate illo, traditione antiquorum auditâ, conveniret, & summâ cautione monumentorum antiquorum integritati, & Conciliorum œcumenicorum autoritati consultum esse voluerit; facile in novi Symboli confirmationem, aut in uberiorem de Spiritû Sancti processionem ex Filio fidei explicationem consensisset. Hinc Leonis 3. successores in hanc cum Hispanis, Germanis, & Gallis consensionem aut sententiam descenderunt; præsertim ubi Conc. Constant. reverentiam debitam non imminui deprehenderunt; ut quòd integrum ubique servaretur; & uberior hæc fidei de Spiritu Sancto explicatio, quæ in cæteris Symb. Const. fidem & verba referret, Symbol. Const.

vocaretur : Et ideo etiam nunc vocatur vulgò Symbolum Const. quamvis sit alia fidei & fusior explanatio.

ARTICULUS QUARTUS.

Quo tempore , particulis ex Filio additis , in Ecclesiâ novum Symbolum prodire cœperit.

R Esp. 1. à Conc. 1. Nic. an. 787. novum illud Symbolum non fuisse sancitum, ut in sess. 5. Conc. Ferrariensis ex vetustissimi cujusdam Codicis autoritate probare nitebantur quidam Latini, & inter alios Julianus Cardinalis, Andreas Colossensis, & Martinus Polonus. Verùm Græcos latere non potuisset decretum illud; ejusque etiam mentionem habuissent Latini, cum quæstio moveri cœpit; validissimoque illo argumento repulsæ fuissent Photii calumpniæ: illius autem autoritatis memoria nullibi extat. In actione quidem 1. Conc. 7. refertur epist. Synodica Tharasi Patriar. Const. ad Patriarchas Alexand. Antioc. & Hierosol. ubi profitemur in eâ Spiritum Sanctum ex Patre per Filium procedere. Et actione 7. in definitione latinè factâ, Spiritus Sanctus dicitur ex Patre & Filio procedere; græcè verò ex Patre, & cum Patre & Filio adorari; undè, ut credere est, aut Tharasi sententia, aut potius Latina Concilii versio ita opinandi locum præbuit.

2. Non videtur certum quòd Andreas Colossensis in Concilii Ferrariensis sess. 7. profert, nempe in magno quodam Occidentalium Concilio, cum maximum in Gallis & Hispaniis schisma immineret, hanc formulam fuisse confectam: id enim gratis profertur, cum nullum ejusmodi Concilii monumentum supersit.

3. Hujus Symboli Authorem, qui Damasum Pontificem dicunt, non attendunt Leoni tertio injuriam fieri: improbasset enim in Ecclesiâ Romanâ receptum Symbolum: nec altum apud Historicos Ecclesiasticos de illo Symbolo silentium advertunt, nec ulla Damasi opera genuina superesse præter Epistolas, quarum alix apud S. Hieron. alix verò apud Theodoretum reperiuntur.

4. Nec Nicolai I. temporibus novum illud Symb. Romæ invaluit: non enim id exprobat Nicolao Photius, qui tam acerbè & Nicolaum & successorem ejus Adrian. II. carpit. Referuntur quidem apud Baron. ad an. 863. quædam Photii epist. ad Orientis sedes Patriarchales, in quibus Symb. Const. adulteratio objicitur; sed Epist. illæ schismatico Patr. Const. qui sedit ad an. 995. ad an. 999. in Codice Collegii, quod Græci Romæ habent, ascribuntur: in illis nec mentio Nicolai habetur. Andreas Coloss. in Conc. Florent. hanc additionem à Photio summis Pontificibus Nicolao & Adriano nunquam fuisse objectam observat. S. Antoninus parte 3. tit. 22. cap. 13. asserit Nicolaum primum à Photio fuisse excommunicatum, quòd addidisset Symbolo

Symbolo Spiritum Sanctum à Filio procedere; sed quo fundamento? Ignotum est: nec tam citò à Leonis III. sententiâ & proposito descivisset Nicolaus primus, qui 40. annis post Leonem III. circa an. 858. Pontificatum obtinuit.

5. Nec etiam Romæ hoc contigit Joannis VIII. tempore, qui Adriano II. successit circa an. 882. cum enim pacis amantissimus esset, aut aliis rationibus ductus, Photii votis annuit, & ad Synodum Photianam, quæ œcumenicæ 8. acta abrogavit, legatos misit, qui subscripserunt, simulque Symbolo Const. præter additionem.

6. Nec etiam hæc contigerunt an. 1014. cum Henrici Bavari Imp. votis annuens Benedictus VIII. Symbolum publicè recitari & cantari iussit. Nec sub Pontifice Sergio III. qui Christophorum è Monasterio tractum an. 909. de sede deiecit, & in vincula contrussit: nihil enim quod ad hanc questionem pertineat, tempora illa referunt.

Non ergo constat, quo tempore in Romanâ Ecclesiâ Symbolum illud fuerit receptum; præsertim cum nihil de illo novo Symbolo statuerit.

R. 2. In quibusdam Ecclesiis Hispaniarum illius novi Symboli primum monumentum reperiri sub Rege Recarde, qui an. 10. regni sui ad fidem Catholicam Gothos Arianos adduxit in Conc. 3. Tolet an. 589 in confessione fidei. In Toletano 4. an. 633. can. 1. hanc fidem Hispani profitentur. Item & in Toletan. 6. an. 638. can. 1. Spiritum Sanctum ex Patre & Filio procedere docetur. Et in Tolet. 8. an. 653. can. 1. tunc temporis, ut habetur in illo canone, in Sacris Missarum solemnibus canebatur novum illud Symbolum. Similiter in Tolet. 11. an. 675. in Braccarenfi 4. eodem anno, & in Toletano 12. an. 681. can. 1. idem Symbolum celebratur. Undè tunc temporis, & multò antea Hispaniæ Episcopi aliâ fidei professione utebantur, quàm Agatho, & Concilium Romanum 225. Episcoporum; quàm & Ecclesia Hierosolimitana, sicuti patet ex Epistolâ Ophronii Patriarchæ ad Sergium Patr. Const. act. 10. Conc. 6. relata; quàm & ipsum Concilium Sextum, ut liquet ex actione 18. Cæterum apud omnes Hispaniarum Ecclesias non receptum fuit illud Symbolum; nempe in iis, quæ Missâ Mosarabicâ utebantur: cantabatur enim in illâ Conc. Niceni Symbolum. Nec etiam apud Ecclesiam Hispalensem recipiebatur: Nicenam enim fidei formulam Sacrificii tempore recitabant, ut ejusdem Ecclesiæ Episcopus Isidorus habet lib. 1. de Eccles. Officiis cap. 16. Niceni autem nomine, ut alibi sæpius, Constantinopolitanum notum intelligitur, ut videre est in eadem Missâ Mosarabicâ, quæ diu in Hispaniis fuit usurpata; imò & in pluribus Toleti Ecclesiis adhuc retenta, ut Salamanticæ; licet Alphonso 6. temporibus à Gregorio VII. abrogata fuerit.

R. 3. an. 767. cum in Gentiliaca Synodo de Spiritûs Sancti processione altercatio mota fuit, Constant. Symbolum absque hac additione cantabatur, ex Valafrido Strabone lib. de rebus Ecclesiasticis cap. 22. ubi sic habet: *Sed apud Gothos & Germanos post abjectionem Felicis heretici, sub gloriosissimo Carolo francorum Rege idem Symbolum latius & crebrius in-*

Missarum cepit Officiis cantari. In Synodo autem Fancofordiensi, an. 794. cui Carolus Magnus interfuit, & in Conc. Forojulienſi, cui præfuit Paulinus Aquileenſis; novum illud Symbolum approbant Galli. Ubi enim in illo Concilio actum est de iis, quæ Synodus Const. in suo Symbolo interſiſſet, quæque non extabant in Nicæno, additur: *Sed & postmodum propter eos videlicet hæreticos, qui susurrant Spiritum Sanctum solum esse Patris, & à Patre solo procedere, additum est, qui ex Patre Filioque procedit.* Arguebant Conc. 7. quòd act. 3. ut in responſo ad objectionem 3. art. 3. notatum est, Tharalius scripsisset Spiritum Sanctum, à Patre per Filium procedere. Et in responſo suo Adrianus ait, perindè esse apud antiquos, *ex Filio*, aut, *per Filium*, asserere Spiritum sanctum procedere. Vnde quidem universalis Ecclesiæ consensus quoad dogma manifestus est. In Conc. verò Aquisgranensi an. 809. de processione Spiritus Sancti ex Filio quæstionem à Joanne Hierosolimitano fuisse motam nonnulli asserunt, simulque quæstionem definiunt, & novum Symbolum probant: Imò ut Leonem III. In suam sententiam adducerent, Bernarium & Jesse Episcopos, & Adalardum Abbatem miserunt, ut art. 4. retulimus. an. 909. In Conc. Trosleiano in pago Sueffionensi, præside Heriveo Remensi, in can. 14. damnantur Photierrones, qui Spiritum Sanctum à Filio tradebat non procedere.

R. ultimò nihil hac in re certò statui posse, viderique sensim novum illud Symbolum ab Hispanis initium duxisse, & à Galliâ in Germaniam, & tandem in Romanam, & alias Ecclesias fuisse tractum.

ARTICULUS ULTIMUS.

Quæstiones quædam circa Spiritus Sancti divinitatem solvuntur.

QUÆST. 1. num in Conc. Niceno Spiritus Sancti Divinitas fuerit definita; & ex hypotefi quod explicite definita non fuerit; num ante Conc. Const. 1. pro hæreticis habiti ſint, qui Spiritus Sancti divinitatem non ſunt profeſſi.

R. in Concilio Nicæno non quidem explicite Spiritus sancti divinitatem fuiſſe definitam. Ea fuit ſententia S. Athan. & 90. Episcoporum Ægypti & Libyæ in epiſt. ad Episcopos Africanos: ſcribit enim ibi de Spiritu ſancto fidem fuiſſe Nicææ ſancitam; quia in Spiritum ſanctum fides in eâ Synodo fuit decreta. *Eadem illic Nicæna Synodus blaſphematores Spiritus ſancti, dicentesque eum eſſe creaturam ſubverſit.* Nam cum Patres ſtatuiſſent de fide in Filium, id ſtatim adjectum voluere; credimus & in Spiritum ſanctum, ut perfectam & plenam de ſanctâ Trinitate fidem, confeſſionemque abſolventes, formam ejus, quæ in Chriſto eſt, fidei, & doctrinam Catholica Eccleſia, exhiberent, cum & vobis & omnibus ſit notum, neminique unquam Chriſtianorum dubium fuerit nos in

Deum, non in creaturam fidem habere. Eadem est quoque doctrina SS. Basilii, Greg. Naz. & Epiphani. qui nullum Nicææ singulare, seu non expressum, non planum, sed transeunter emissum fuisse decretum asserunt. S. Basil. epist. 60. Ecclesiæ Antiochenæ, sic habet: Quoniam verò doctrina de Spiritu sancto indefinita est, propterea quòd nondum compiterent bellum contra Spiritum sanctum gerentes, an non condemnandi sint, qui Spiritum sanctum creatura ac servilis esse natura dicunt? In eà Synodo nulla facta est incusatio: nihil enim prorsus creatum est in divinà & beatà Trinitate. Et in epist. 78. quæ fidei professionem, cui subscripsit Eustathius Sebastenus complectitur, tradit non expressè, sed implicite in Concilio Nicæno decisum fuisse Spiritus sancti divinitatem. Sententia verò de Spiritu sancto in transcurso sine omni diligentia posita est, propterea quòd nondum mota esset ista questio, sed adhuc credentium mentibus securus, ac nullis objectus insidiis ineßet de Spiritu sancto intellectus. Idem repetit epist. 325. quæ est ad Epiphanium, nihil nempe nos posse, ne vel syllabam unam ad Nicænam illam fidem adjicere, excepta de Spiritu sancto doxologia, ejus rei majores illi nostri velut in transcurso meminervnt, nondum mota de Spiritu sancto questione.

Ità S. Greg. Naz. in orat. 52. quæ est epist. 1. ad Cledonium adversus Apollinarium: Ut illud insuper explicantes, quod ab illis minus plenè de Spiritu sancto dictum est, propterea quòd hæc questio nondum excitata & agitata fuerat, nempe unam eandemque Patris, & Filii, & Spiritus sancti divinitatem agnoscendam esse, Deum quoque videlicet Spiritum profitendo. Eos igitur qui ità sentiunt, ac docent, pro sociis habet, quemadmodum & ipsi habemus: eos autem, qui secus sentiunt, aversare; atque à Deo, & Ecclesià Catholicà alienos existima.

Ità pariter Sanct. Epiphanius lib. 3. tom. 1. seu hæc. 74. cum enim Pneumatomachis, qui Nicæna Synodo, ut quæ de Spiritu sancto nihil statuisset, adhærere se profiterentur, responderet nihil quidem expressè in Concilio fuisse statutum: Quanquam nulla tùm de his, quæ singulis temporibus occurrunt, cavere Synodi ac decernere solent: quare cum Arius in Filium maledicta conjiceret, propterea uberiori quâdam disputatione argumentum illud est accuratissimè tractatum: ad hanc autem Spiritus sancti fidem Concilium adigere, cum in Patrem, & Filium, & Spiritum sanctum fidem exigat.

Ex quibus secunda pars colligitur facilè, videlicet ante Constantinop. Synodum pro hæreticis fuisse habitos, qui Spiritui sancto divinitatem detraherent. Hinc S. Athan. cum Synodo Ægypti & Libyæ Episcopos eos ut blasphematores perstringit. S. Basil. epist. 78. ad Spiritus sancti divinitatis professionem vult eos adigi, qui in alià sententiâ fuerant; & anathemati, qui eam fidem negarent, subjici: Hoc cautionis protendatur, inquit, ut anathematizent ipsi eos, qui Spiritum sanctum creaturam esse dicunt; etiam eos, qui id cogitant, & qui id non consentiunt illum naturâ sanctum esse, sicut naturâ sanctus est Pater, & naturâ sanctus est Filius; sed alienum illum à divinâ & beatâ naturâ faciunt: est an-

tem declaratio recti sensûs in eo, si à Patre, & Filio non separetur. S. etiam Greg. Naz. orat. 52. dicit eos, qui sic censerent alienos ab Ecclesiâ existimandos esse, & cum ipsis abruptendam esse pacem & societatem.

Q. 2. quis omnium primus Spiritûs sancti divinitatis apertam professionem edidisse videatur?

R. fuisse S. Athan. cum Conc. Alex. an. 362. ut docet S. Gregor. Naz. in ejus orat. funebri.

Quæritur 3. cur S. Basilius Spiritûs sancti divinitatem professus, Dei nomen Spiritui sancto ad catholicam fidei professionem necessariò non esse tribuendum existimavit?

R. 1. extra dubium esse S. Basilium Dei nomen Spiritui S. non semper tribuisse, licet pro ejus divinitate pugnaret constanter: Hom. quippè 17. quæ est in sanctum baptisma, Spiritum sanctum Deum dicendum esse negat; sed Dei Spiritum dicendum esse contendit: *Neque igitur alienus est à gloriâ Dei Spiritus, ex ineffabiliore ineffabiliter prolatus; neque ipse Deus est, sed Dei Spiritus, & apud Deum, qui & à Deo mittitur, & per Filium nobis suppeditatur.* Ideò à suis Monachis circa Spiritûs sancti divinitatem, fidei & novitatis fuit incusatus, ut patet ex ejus epist. 79. cumque huic calumniæ amovendæ studet, aliud nihil proficitur, quàm Filii & Patris Spiritum esse Spiritum sanctum, Filio & Patri conjunctum; creaturarum numero non ascribi; nosque in ejus nomine consequi baptismum; adeò ut eos, qui Spiritum sanctum creaturis annumerabant, anathemati subjiat. Epist. 78. in fidei professione, quam tradit, Spiritum sanctum Dei nomine non insignit.

R. 2. S. Basilium justis de causis à tribuendo Spiritui sancto Dei nomine abstinuisse per tempus aliquod: tunc enim ad fidei catholicæ integritatem Spiritui sancto Dei nomen deferendum non erat, modò ejus agnosceretur divinitas; ut ex locis laudatis Hom. 16. epist. 73. & 78. evincitur: ibi enim suis argumentis Spiritûs sancti divinitatem licet asserat, & de tacito Dei nomine conquererentur Monachi; non proindè ad illud Spiritui sancto tribuendum fuit adductus. Ad vindicandam S. Basilii œconomiam confert plurimùm ipsa Synodus œcumenica post S. Basilii obitum circiter annis duobus habita, quæ Spiritui sancto Dei nomen in Symbolo non defert, dum ipsam Spiritûs sancti divinitatem contra Macedonianos confirmat.

S. Gregor. Naz. in orat. 10. quæ est funebris in Basilii laudem, & suam & hanc S. Basilii œconomiam explicat; ità scilicet affectum fuisse tantæ pietatis Episcopum, ut juxta Davidis consilium loquendi rationem summâ prudentiâ esse temperandam existimaret, persecutionumque tempore paulisper esse tacendum, donec prior loquendi facultas esset restituta. Ità enim cautum erat hæreticorum dolo, ut, qui Spiritum sanctum Deum diceret, de sede deturbaretur. Tàm validis autem Spiritûs sancti divinitatem argumentis firmabat, ut tùm ejus scripta, tùm sermo nonnisi Spiritûs sancti opus videretur. *Sed tamen propriam vocem interim*

usurpare differebat, tùm ab ipsomet Spiritu, tùm à sinceris ipsius propugnatoribus in gratia loco hoc poteris, ne hoc suo consilio offunderetur, nec committerent, ut dum unam voculam mordicus retinere conarentur, propter inexplebilem cupiditatem omnia perderent, co. vulsâ nimirum turbulento tempore, ac distractâ pietate: ipsos enim nihil ex eo incommodi ac detrimenti accepturos, si vocabula parùm immutarentur, modò aliis verbis eadem docerentur: neque enim salutem nostram in verbis potius, quàm in rebus consistere; quippè ne Judæi quidem resiciendi sint, si ad aliquod tempus pro Christo vocem Uncti sibi concedi postulantes, in nostrum numerum atque ordinem ascribi velint, ac Reipublica non posse majorem perniciem ac pestem afferri, quàm si Ecclesia ab hereticis occuparetur.

Constat autem, inquit S. Gregor. Naz. neminem nec scripto, nec voce Spiritûs sancti divinitatem validiùs propugnasse, quàm S. Basilium; hocque sibi imprecatur, Spiritu sancto velle se orbari, nisi eundem, quem Patri, & Filio, & Spiritui sancto, ut qui eis consubstantialis esset, honorem deferret; seque cum eodem de industriâ pepigisse, illâ lege nempe, ut qui nihil vel sibi, vel dignitati metuere potuerat Gregorius, publicam & liberam fidei professionem ederet, Basilii etiam publicis sermonibus fidei instruendæ inserviret: hæc ergò idem S. Greg. protulit, ne verbis velut solis fidei tessleris adhareamus: *Sed ne quidem pietatis normam ac regulam solas eas voces, quæ in illius libris reperiuntur, esse existimantes, imbecilliores fidem habeant, eamque de divinitate discernendi rationem, quam ei tempus illud non sine Spiritûs numine offerebat in pravitatis suæ confirmationem trahant; verum eorum, quæ ab eo scripta sunt, sensum & scopum, quem sibi, dum hæc scriberet, proponebat, expendentes, tùm ad veritatem magis accedant, tùm in iis, qui in impietate versantur, os obstruant.* Addit à se invicem non discrepare Evangelistas, licet isti divinitatem, alii humanitatem apertius tradant. Idem orat. 44. docet aliquos Spiritûs sancti divinitatem agnoscere, & de solo Dei nomine altercari, quos pro fratribus haberi vult; ne nominis causâ pro hostibus audirent, simulque ne nominis silentium opprobrio vertetur: *Vim divinitatis ac potentiam nobis date, & nos vicissim divinitatis vocem vobis concedemus. Naturam aliis vocibus, quibus plus tribuitis, confiteamini, ac vos ut infirmos curabimus, nonnulla verbis grata & jucunda susurrantes.* Etenim turpe quidem illud est, turpe, inquam, & peralsurdum, cum animo optime valeatis circa vocis sonum, jejunos & minutos vos præbere, ac thesaurum occultare, quasi aliis eum invidentes, aut metuentes ne linguam quoque vestram sanctificetis.

Opp. hæc in æconomia peccasse S. Basilium, cum ipse S. Gregor. Naz. cum S. Basilio amicitia ætissimæ vinculis conjunctissimus non diffiteatur, minùs probatam à viris tùm scientiâ, tùm pietate insignibus hanc æconomiam; ut quæ nimiam præ se ferret humanæ prudentiæ speciem, & tumidi ac minùs sinceri animi suspicionem ingereret: imò eam fidei bono exitiosam carpebant alii; quippè quæ in fidelium, quos vel turbantes corrigere, vel constantes firmare operæ pretium erat, detrimen-

tum & perniciem cederet. Ità S. ipse Greg. Naz. epist. 36. ad S. Bas. ubi refert sic adversarios de S. Basilio disseruisse: *Ille autem fidei doctrinam obscurè ostendit, ac velut obumbrat, nec veritatem liberè proficitur, politicè magis quàm aurem obtruens, dicendique facultate versutiam regens.*

R. 1. relatas adversariorum contra S. Basilium rationes in convivio sibi propositas sic dispellere ibidem S. Gregorium Naz. *Quoniam, inquam, ego in obscuro positus, ac plerisque incognitus, sic, ut nec qua loquar, nec an loquar, fermè homines sciant, sine periculo philosophor. Illius autem major habetur ratio, utpotè cujus nomen sum ob ipsius virtutem, tum ob Ecclesiæ splendorem multò sit illustrius, ac palàm est quidquid dicitur, ingensque circa eum bellum est, cupientibus nimirum hæreticis nudam & apertam vocem ex ipsiusmet Basilii ore arripere, ut ipse quidem ex Ecclesiâ expellatur, cui solus penè veritatis igniculus restat, ac vitalis facultas, vicinis omnibus capitis ac subjugatis; malum autem in civitate radices agat, atque ex hac Ecclesiâ non secùs atque ex aggere quodam & propugnaculo terrarum orbem populerur. Præstat itaque œconomiam quamdam ad veritatem adhibitam fuisse, nobis videlicet temporì quasi nebulae cuidam nonnihil cedentibus, quàm ut eà ob predicationis perspicuitatem opprimeretur. Nos enim ex eà re nihil damni facimus, si ex aliis quoque dictionibus, quibus id certò colligatur, Spiritum S. Deum agnoscamus: neque enim in verborum sono potius, quàm mente & sententiâ sita est veritas. Ecclesiæ autem grave vulnus acceptura est, si ob unius hominis ejjectionem veritas profligetur. Scribit & alibi seipsum in odium populi venisse, quòd Spiritui sancto Dei nomen detulisset. Igitur Dei nomen Spiritui sancto tutà & prudenti conscientiâ ob calamitosi temporis angustias, & propter œconomiam à S. Basilio non deferebatur.*

R. 2. S. Basilium eò tandem necessitatis fuisse adductum, ut ipsemet Dei nomen Spiritui sancto tribuendum propugnaret; quia, prioris œconomix rationibus procul remotis, gravius illo silentio Ecclesiæ inferebatur detrimentum; cum indè hostes Ecclesiæ in Spiritus sancti divinitatem debacchandi causam arriperent, aut in Ecclesiâ infirmi scandalum paterentur. Idèò in Apologiâ suâ, seu in epist. 80. ad Eustathium Medicum, varias, quæ sibi ab adversariis imponderentur, calumnias recenset, observatque sancti Spiritus divinitati insidias moliri, quotquot sibi adversarentur; Deique nomen, quod Patri & Filio non negabant, Spiritui sancto concedere nolle: variasque rationes affert, ut injuriâ nomen illud Spiritui sancto negari confirmet; tum quòd in omnibus Patri & Filio conjunctus sit, eademque autoritate & potestate polleat; tum quòd, cum Deus sit, suis nominibus non est privandus, neque iis titulis, quibus honorari simul & designari solet divinitas: neque idèò esse, cur Dei nomen ei negaretur. Undè totus in eo est S. Basilius, ut à blasphemis Filii & Spiritus sancti divinitatem vindicet. Item in lib. de Spiritu sancto undiquè congerit argumenta, ut Spiritus sancti divinitatem demonstraret.

Q. 4. an donum & donatum in Spiritu sancto discrepent?

R. ex S. Aug. lib. 5. de Trin. cap. 15. ab æterno processisse Spiritum Sanctum ut donum, quòd esset donabilis, licet non essent quibus daretur; dici verò donatum à tempore, quo creaturarum intellectualium animis fuit illapsus.

Q. ultimò cur Spiritus Sanctus sub specie ac figurâ columbæ, aquæ, ignis, venti & linguæ igneæ conspicabilem se fecerit?

R. Spiritum Sanctum aspectabilem se sub columbæ figurâ præbuisse, ad significandam Spiritualem ipsius fecunditatem simul & mansuetudinem, simplicitatem, innocentiam; & cum absque felle sit columba, non aliter affectum iri, quibus inesset. In aqua quoque suam præsentiam expressit, quia lavaturus erat ac mundaturus animam à sordibus peccatorum juxta illud Ezechielis 36. *Effundam super vos aquam mundam, & mundabimini ab omnibus inquinamentis vestris.* Sub ignis etiam apparuit figura, cum quia ignis est Symbolum divinitatis, secundum illud Deuter. 4. *Deus noster ignis consumens est;* cum quia inquit Sanctus Gregorius Homiliâ trigésimâ in Evangel. per cum peccatorum rubigo consumitur. Item sub specie venti vehementissimi seipsum in discipulos immisit, ut justo timore incusso, eos ad dona percipienda faceret magis idoneos, juxta illud Prophetæ: *A timore tuo concepimus & parturivimus Spiritum.* Tandem Spiritus Sanctus sub figurâ linguæ igneæ super Apostolorum capita descendit, ut eos, inquit S. Greg. Homil. 30. in Evang. ardentem pariter & loquentem faceret; & indè palam significaret viri Apostolici linguam debere esse igneam, ut amoris divini flammam in cordibus hominum accendat. Undè Sanctus ipse Pontifex ibidem addit: *Linguas igneas doctores habent, quia dum Deum amandum prædicant, corda audientium inflamment: nam otiosus est sermo Doctoris, si præbere non valet incendium amoris.*

O p p. cum Celsò relatam à S. Matth. sub columbæ specie apparitionem Spiritûs Sancti, instar fabulæ esse habendam. Vel si verum sit Spiritum Sanctum in formâ columbæ apparuisse, consequens erit, ut indè colligebat Tertullianus, inter Spiritum Sanctum & columbam unionem fuisse Hyposthaticam.

Rt. Orig. lib. 1. cont. Celsum hanc Sancti Spiritus apparitionem idèd non posse in dubium vocari; quòd in Scripturis veracibus tradatur, & hodiè vestigia Spiritûs Sancti sub columbæ specie missi, vel aspectabilis, servantur apud Christianos; hæcque expellant dæmonia, multasque Sanationes perficiant.

Ad aliam difficultatem respondet S. Aug. lib. 2. de Trin. cap. 6. ubi Tertuliani errorem confutat, Spiritum Sanctum in personæ unitatem columbam sibi non conjunxisse: *Neque enim columbam beatificavit Spiritus, sibi quæ & personæ suæ in unitatem habitumque conjunxit in æternum.* Et lib. de agone Christi cap. 22. *Quia non Columbas liberare venerat Spiritus Sanctus, sed hominibus significare innocentiam & amorem Spiritualem, quod in Columbe specie visibiliter figuratum est:* Ita etiam lib. 2. cont. Maximin. Arianum. cap. 19.

QUÆSTIO ULTIMA.

De missione divinâ.

ARTICULUS UNICUS.

Quid & quotuplex Missio ?

RESPONDEO Missionem aliam esse internam, externam alteram.

Interior seu interna ex S. Aug. epist. 66. & ep. 107. & 108. est processio unius personæ vel duarum ab alia, nempe Filii à Patre, & Spiritus S. à Patre & Filio: *Ex Patre*, inquit, & *Filio Sanctus credendus est Spiritus non solum processisse, sed semper ad peragenda opera Trinitatis omnino procedere.* Hancque doctrinam ut fide inconcussâ tenendam tradit epist. 222. idque lib. 1. de Trin. cap. 4. probandum sibi sumit. Externa missio ex eodem S. Aug. lib. 3. de Trin. cap. 5. nihil aliud est, quàm ad hominum aspectum in aliquâ formâ corporea venisse; aut externa Dei operatio in quâdam figurâ, quæ sensibus percipitur. Addit. S. Aug. lib. 4. de Trin. cap. 19. & 20. missionem exteriorem posse in inferioritatis signum adduci, quo sensu Filius ut homo missus, inferior est Patre; aut in processiois argumentum, quâ ratione personarum divinarum æqualitati non obest: ita etiam lib. 5. de Trinit. cap. 14. & lib. 14. de Gen. ad Litt. cap. 26.

Quæritur 1. cui personæ mitti conveniat?

R. cum S. August. missionem exteriorem processiois interioris esse signum; & proinde Filium & Spiritum sanctum solos verè & propriè mitti. Hinc lib. 5. de Trin. cap. 21. scribit Patrem non fuisse missum; quia non procedit ab alio.

Cum autem tribus personis communis sit illa operatio externa, hoc sensu dici potest Pater mitti; & Filius, & Spiritus sanctus seipsos mittere. Sic S. August. lib. 4. de Trin.

Quæritur 3. num reverà se conspiciendum in formâ exteriori Pater æternus obrulerit?

R. 1. non unanimem fuisse antiquorum sententiam. Ex antiquis permulti, ut S. Justinus dial. cum Triphone, Tertull. lib. contra Judæos, lib. cont. Prax. & lib. 2. cont. Marcion. cap. 17. Novat. lib. de Trin. cap. 16. Euseb. & alii, Filium solum antiquis apparuisse asseruerunt; Patrem æternum solum esse invisibilem, & de illo scriptum esse: *Nemo Deum vidit unquam.* Ex quo inferbant Ariani Filium aliterius esse à Patre naturæ.

R. 2. alios censuisse Patrem, sicut & Filium, & Spiritum sanctum in antiquorum conspectum venisse: Pater enim, ut habet S. Aug. lib. 2. de

de Trin. cap. 9. & 10. in Baptismo Christi fuit locutus, sicque in formâ sensibili se conspicuum exhibuit. Nec constat, inquit cap. 12. quænam ex personis tribus deambulaverit in terrestri Paradiso, & cum Adamo sermonem habuerit: nec etiam, inquit cap. 17. num tres personæ simul Abrahamo apparuerint. Addit adhuc esse nimis temerarium asserere, nunquàm Patribus, aut Prophetis per aliquas visibiles formas Deum Patrem apparuisse; nec temerè statuendum, quænam ex tribus personis apparuerit: nisi cum ex Scripturæ verbis aliqua prodeunt indicia, ex eodem sancto Augustino, lib. 3. de Trinit. cap. 11.

Angelorum ministerio fuerunt administrata, quæ in veteri Testamento scribuntur; quamvis Deus ipse vel dixisse aliquid, vel fecisse legatur. Undè etiam Act. 7. v. 53. à sancto Stephano dicitur Lex ab Angelis accepta, & epist. ad Heb. 2. v. 2. per Angelos data. Illa fermè singula docuerat antea sanctus Gregorius Nissen lib. 1. contra Eunom. promiscuè scilicet personas tres apparuisse. Idem quoque antea tradiderant SS. Epiphanius & Ambrosius, hic tractatu de Symb. cap. 10. *Qui Filius ab Isaia Propheta in regnantis solio habituque visus est: sed propter consortium majestatis, unitatemque substantia Spiritus sanctus in Propheta est locutus*: Ille in expositione fidei, num. 14. Ecclesiæ veræ & orthodoxæ communia dogmata explicans, unum eorum hoc esse docet, *Patrem, Filium, & Spiritum sanctum ab orbe condito Sanctis suis per visum apparere dignantes, quantum capere quisque poterat, ac Patrem interdum esse conspectum, aliàs Filium, aliàs Spiritum sanctum.*



TRACTATUS DE ANGELIS

QUÆSTIO UNICA.

ALIIQUORUM animis molesta forsan erit istius unicæ quæstione circumscripti Tractatûs brevitâs : molestior forsitan futura differendi ratio ; cum nihil certi definiam , ubi Scripturas duces , aut Traditionem Apostolicam præviâ sequi non datur. Scholæ tamen placita , ne quid Theologiæ Candidatos lateat , attingam ; & ex variis sententiis proponam , quæ propiùs ad veritatem accedere videbuntur. Qui curiosioris tenebuntur indagationis desiderio , Theologis aliis consultis vota sua explebunt uberrimè.

ARTICULUS PRIMUS.

Utrum existant Angeli?

ANGELORUM existentiam negarunt Saducæi , de quibus Act. 23. v. 8. *Saducæi enim dicunt non esse resurrectionem , neque Angelum esse , neque Spiritum* : seu nihil existere censebant , quàm quod sensu perciperetur.

Angeli nomen non naturæ , sed est officii , ex S. August. lib. 5. c. 19. de Gen. ad Litt. & conc. 1. in Psalm. 103. Indè Malach. 2. v. 7. Sacerdotibus ; & cap. 3. v. 1. Joanni Baptistæ ; & Christo Isaiæ 9. secundum 70. Interpret. Angeli nomen tribuitur. Hic autem pro naturâ singulari usurpatur.

CONCLUSIO. De fide est existere Angelos.

Prob. Id enim apertè tradunt Scripturæ communi veterum Patrum consensu expositæ , ut Gen. cap. 16. v. 7. cap. 19. v. 1. cap. 21. v. 17. cap. 22. v. 11. Exod. 14. v. 19. Num. 22. v. 22. & Math. 18. v. 10. ubi sic loquitur Christus : *Angeli eorum* (scilicet parvulorum) *in cælis semper viant faciem Patris mei*. Hebr. 1. v. 4. Apost. ostendit Christum majorem esse Angelis , eosque asserit esse spiritus administratorios. Item cap. 1. & 2. inter Filium , & Angelos comparisonem instituit ;

& ex Psalm. 8. Christum Angelis minorem factum ostendit, quatenus nempe humanam induit naturam.

Ad occultos afflatus, quibus quasi Dei nuntiis divinæ voluntatis admoncantur homines, loca hæc immerito detorquentur ab Anabaptistis; cum ut personas, & substantias subsistentes, Angelos, & eorum dicta, & facta Scripturæ referant & describant. Hæc fuit antiquorum interpretatio & sententia: Tertull. quippe in Apol. cap. 12. ita scribit: *Dicimus esse substantias quasdam spirituales; nec novum nomen est. Sciunt Damones Philosophi, Socrate ipso ad Damonii arbitrium expectante.* Item Origen. lib. 1. de princip. cap. 5. Itemque S. Aug. in Psalm. 103. ubi hæc habet: *Esse Angelos novimus ex fide, & multis apparuisse scriptum legimus & tenemus; nec inde dubitare fas nobis est. Spiritus autem Angeli sunt; cum mittuntur, fiunt Angeli; & cum spiritus sunt, non sunt Angeli. Angelus enim officii nomen est, non naturæ nomen. Quæris nomen hujus naturæ? Spiritus est. Quæris officium? Angelus est.* Ex Symbolo Constantinop. sunt quædam res creatæ à Deo conditæ. Ex Synodo Lateran. 4. cap. 1. seu firmiter: *Deus utramque creaturam de nihilo condidit, spiritualem, & corpoream.* His autem vocibus (invisibiles & spirituales creaturæ) Angelos designant duo illa Concilia. Denique ipsi etiam Ethnici in eandem sententiam conspirant, ut docet Tertul. supra, Minut. Felix in Octavio, S. Aug. lib. 9. de civit. cap. 19. &c.

Queritur an naturali ratione possit demonstrari Angelorum existentia?

R. non possè: si quæ enim demonstratio daretur, vel ex causis, vel ex effectibus esset repetenda: non ex causâ; non enim eos necessariò, sed liberè Deus creavit: non ex effectibus; nihil enim Angelis tribuitur, quod in alteram causam referri non possit; ut cælorum & siderum motus tam uniformis; vel tam stupenda Energumenorum opera, licet exteris linguis utantur, vel aperiant occulta, seu etiam motus edant penitus insolentes: Ex plurimorum enim sententiâ à formâ propriâ cæli, & sidera moventur; & aliundè animæ separatæ idem quod Dæmones, aut Angeli præstare posse videntur.

Insuper hominum animis plura quidem occurrunt stupenda, quæ ideo existere Angelos non arguunt; quasi eorum effectuum alia præter Angelos non sit causâ: Præterquamquod enim tales effectus, vel per animas propriis corporibus unitas; vel per animas à corpore sejunctas effici possint, eâ insuper est nostra infirmitas, ut nec plerumquæ nobis innotescant, quæ in nobis posita ex variis corporum nostrorum humoribus malè affectis proficiuntur, quæ ipsorum Philosophorum & Medicorum animos torquent tam acriter, & in varias partes scindunt.

Equidem Plato, Aristoteles, & Stoici Angelos existere censuerunt, seu genios quosdam qui non essent aspectabiles; sed in eam illi venerunt sententiam, non certâ quâdam naturæ ratione; sed quod non caperent quæ Dæmones ad hominum animos decipiendos oraculis, incantationibus, & aliis præstigiis efficerent. Hoc & aliorum animos impellit non mediocriter, quod scilicet ad ornamentum orbis universi videatur ipsis necess-

farium, ut sint res materiæ penitus expertes; sicut & existunt res omnino materiales; & aliæ partim materiæ participes, partim materiâ solutæ; cuiusmodi sunt homines. Sed undè necessitas illa fieret conspicua? cum naturæ illæ prorsus Spirituales argumentis evidentibus non innotescant; nec majori jure videantur requiri, quàm ut Deus rem creatam omnium perfectissimam, quam efficere potest, producat.

ARTICULUS SECUNDUS.

An, & quando sint creati Angeli?

ANGELOS creatos fuisse constat; cum nihil sit præter Deum, quod creatum non fuerit. Undè & de omnibus & de Angelis ipsis habetur Col. 10. v. 16. *In ipso (nempe Christo) condita sunt universa in cælis, & in terrâ, visibilia, & invisibilia, sive Troni, sive Dominationes, sive Principatus, sive Potestates: omnia per ipsum, & in ipso creata sunt; & ipse est ante omnes.*

De Angelorum creationis tempore nec meminit, nec sermonem habet Moyses; quia ex SS. Chrysost. Hom. 2. in Gen. & Aug. lib. 12. confes. cap. 17. rudem admodum plebem & sensibus addictam instituendam aggrediebatur, nec eam expositionem postulabat instituti ratio: nam ex S. Hyer. epist. 19. nihil aliud præter rerum corporearum creationis seriem susceperat scribendam.

Indè triplex orta est antiquorum & recentiorum sententia: Placet illis ante cælum fuisse creatos Angelos; his verò cum rebus cæteris fuisse conditos: aliis tandem universo Mundo jam condito. De his nihil certi potest definiri; cum nec Scripturæ, nec unanimis Patrum traditio quidquam tradat certâ consensione.

CONCL. I. Cum rebus cæteris creatos fuisse Angelos probabilius censemus cum S. Aug. lib. 12. de Civit. cap. 15. & lib. 12. de Confes. cap. 13. S. Greg. lib. 28. Moral. cap. 7.

Prob. Quia hæc opinio ad Scripturæ sensum propius accedere videtur: Nam Eccl. 18. v. 1. *Qui vivit in æternum creavit omnia simul.* Exod. 20. v. 11. *Sex diebus fecit Dominus Cælum & Terram, mare, & omnia, quæ in eis sunt.* Consuetudinis autem Scripturarum est per hanc ultimam loquendi formulam cæteris creaturis Angelos annumerare, ut Ps. 103. v. 4. Ps. 48. v. 2. &c. Proverb. 8. v. 27.

CONCL. II. Quo in loco creati fuerint Angeli est incertum; quia de creationis Angelorum loco nihil definiunt Codices Sacri, nihil SS. Patres unanimiter constituunt. Probabilius tamen est, eos ut qui cæteris rebus creatis præcellant, in cælo fuisse creatos, & proinde in loco præstantissimo, qui alius à summo cælo non est. Hinc è cælis dejecti dicuntur rebelles Angeli: nam Isai. 14. v. 12. *Quomodo cecidisti de cælo Lucifer? Lucæ 10. v. 18. Videbam Satanam sicut fulgur de cælo cadentem.* Ex quibus colligit S. Aug. lib. 11. de Civit. cap. 33. Dæmones de cælis

cælorum, id est, de summo cælo fuisse deturbatos. Indè est etiam quòd Athenag. in Apol. & Novatian. lib. de Trin. eorum creationem in cælis constituent.

OPP. Isa. 14. v. 13. Angelorum princeps ait; *In cælum conscendam, super astra Dei exaltabo solium meum, & ascendam super altitudinem nubium, & similis ero altissimo.* Ergo in cælum creati non erant Angeli sed in aëre.

R. hæc Scripturæ verba secundùm litteram ad Regem Babylonis pertinere, qui tam insolenti ambitu tenebatur, ut diceret in cælum, seu in Judæam cælum dictam, utpotè Deo dicatam; aut in Dei templum, seu in montem testamenti conscendam; supra illud ponam solium meum; similis ero altissimo; Israëlitas in mei venerationem adducam; & inter Deos post mortem recensëbor. Alio sensu naturali juxta SS. Patrum sententiam verba hæc Diaboli casum referunt: Quem sensum innuit S. Aug. lib. 14. de Civit. cap. 15.

ARTICULUS TERTIUS.

Cujus naturæ sint Angeli? An Corporei? An Spirituales?

NIHIL in hac materiâ videtur aptius, quàm quod S. Greg. Naz. docuit orat. 34. sub finem his verbis: *Spiritus porro atque ignis, Angelus appellatur; illud, quia intellectu naturâ est præditus; hoc, quia purgandis animis nostris adhibetur: Quandoquidem primaria quoque illa essentia iisdem nominibus in Scripturâ nuncupatur. Sed sint sanè illi corporei, aut quàm proximè ad hoc accedentes. Videsne quomodò circa hujusmodi sermonem astuemus, nec, quò progrediamur, habeamus: aut certè non ultrà progredi possimus, quàm quòd Angelos quosdam & Archangelos scimus, Thronos, Potestates, Principatus, Dominationes, splendores, ascensus, intelligentes virtutes, vel mentes potius, puras naturas, minimèque adulterinas, ad malum immobiles, vel certè non facilè mobiles, perpetuos choros, circa principem illam causam agitantes; aut si quid aptius quicquam earum laudibus decantandis asferre queat, purissimo splendore illinc perfusas, aut pro naturæ ordinis cujusque proportionè, alias alio modo collustratas.* In istâ idèò quæstione, & in sequentibus nihil, nisi quæ aliorum sunt, referemus; quæ dubia, ut dubia; quæ certa, ut certa & constantia proponemus.

Incorporeum plurimis modis sumitur. 1. pro eo, quod non est corpus. 2. pro eo, quod non constat ex corpore tanquàm ex parte. Origenes lib. 2. de princip. cap. 8. scribit in Scripturis non tradi sine animâ esse Angelos, quamvis ea sit plurimorum sententia: dici tamen posse animâ donari; si anima dicatur substantia, motûs, sensûs & rationis capax. 3. incorporeum dicimus, quod nullo pacto pendet à corpore. Plurimi ex antiquis

Angelos ex animâ & corpore subtile componi censuerunt. Ità S. Just. cum in Dial. cum Tryph. ubi vult eos inusitato ciborum genere uti; cum & in utrâque Apol. ubi censet eos cum mulieribus stupri consuetudinem habuisse, ex eoque concubitu procreatos dæmones. Idem habent Athenag. in Apol. S. Clem. Alex. lib. 3. Strom. & Tatian. in orat. ad Græcos his verbis: *Dæmones omnes non ex carneâ, sed spiritali concreione constant, qualis est ignis & aëris; quæ corporum constitutio à solis illis perspicì potest, qui Spiritu Dei muniuntur.* Et addit, non tamen facillè mori, quia carnei non sunt.

Tert. lib. 2. cont. Marcion. cap. 8. materiales eos vocat, & ab hominibus, ut Dei imaginibus, præstantiâ naturæ superari: *Nam etsi Angelus, qui seduxit, sed liber & sua potestatis qui seductus est, sed imago & similitudo Dei fortior Angelo; sed afflatus Dei generosior spiritu materiali, quo Angeli confisterunt, qui facit, inquit, Spiritus Angelos & apparitores flammam ignis: quia nec universitatem homini subiecisset infirmo dominandi, & non potiori Angelis, quibus nihil tale subjecit.* Et lib. 3. cap. 8. & 9. phantasticum non fuisse Christi & Angelorum corpus, sed solidum ex visu & tactu demonstrat.

S. Aug. lib. 1. cont. Academicos cap. 7. Aërea animalia dæmones vocat, sensuum acumine, sed non ratione superiora. Item epist. 115. ad Nebridium eos subtilissimi sensûs animantes appellat. Epist. quoque 3. ad Fortunatianum Sancti Hyer. autoritate utitur, ut Deum corporeis hominum & Angelorum oculis impervium probet. Lib. etiam 2. de Trin. cap. 7. & lib. 83. quæst. 47. corporcos Angelos esse supponit.

Spirituales Angelos videntur existimasse, S. Ignat. in epist. ad Trall. ubi eos vocat incorporeas naturas; S. Iren. lib. 3. cap. 23. ubi ait sine carne esse Angelos; & Eusebius, qui lib. 3. de Demonst. cap. 3. id tanquam dogma communi sententiâ probatum scribit: *Accepimus, inquit, esse quosdam post supremum Deum potestates naturâ incorporeas, intelligentes, rationales, omnique virtute præditas, quæ circum regem universi choros exerceant: quarum plures etiam usque ad homines istius Patris putu, quâdam salutarî dispositione mittantur, quasque & cognoscere, & venerari pro ratione graduque dignitatis edocti sumus, ut soli Deo, qui Rex est universi, adorationis honorem tribuamus.* Ità pariter SS. Basil. in Psal. 31. Greg. Niss. lib. 12. contra Eunom. Gregor. Naz. orat. 34. Epiph. hæc. 16. Paulinus in epist. ad S. August. inter S. August. epist.

Volunt aliqui dubium hæc in materiâ fuisse S. August. licet in sententiam, quæ Angelis corpora tribuit, propensior videatur. Etenim in Enchir. cap. 19. difficillimam esse dicit quæstionem de corporibus Angelorum. Lib. 1. Retract. cap. 26. id quod dixerat quæst. 67. quosdam, scilicet Angelos animaliter vivere, retractat velut audaciùs dictum. Lib. 21. de civit. cap. 10. cum dixisset Dæmonibus quoque sua esse corpora ex aëre conflata: addit tamen contentione dicendi non esse cum illis decertandum, qui contrarium dicerent: *Si autem quispiam, inquit, nulla habere corpora Dæmones asseris, non est hæc de re aut laborandum.*

operosa inquisitione, aut contentiosa disputatione certandum.

In Concilio 7. aët. 5. refertur Joannem Episcop. Theſſilon. cenſuiſſe Angelos omninò corporis expertes non eſſe; verùm tenui corpore præditos, aëreo nempe, vel igneo; ac multoties in proprio corpore viſos eſſe; eaque in ſententiâ fuiſſe SS. Baſilium, Athan. & Methodium: quam ſententiam & ejuſdem Synodi Patres videntur acclamatione ſua comprobafſe. Cum enim Episcop. Theſſalonicenſis oſtendiſſet Angelos pingi oportere, *quia circumſcripti ſunt, & velut homines apparuerunt*; ſancta Synodus reſpondit: *Etiâ Domine*. Licet autem opinionem non probaſſe dicerentur Concilii Patres, ſed conſecutionem inde deductam, videlicet pingi poſſe Angelos; nullam tamen erroris notam huic ſententiæ inuſſiſſe fatendum eſſet; & proindè non cenſuiſſe ad fidem pertinere ſententiam, quæ corpus omne Angelis negat; nec cuiſpiam hæc in parte faciendam eſſe moleſtiam.

Si ratio conſulatur ſibi ſoli relicta, vix tamen quidquam in loco finito concipit, quod non ut corpore circumvolutum apprehendat.

Hinc colligi poteſt nec in Scripturis, nec in Traditione confici poſſe, Angelos eſſe omnis materiæ expertes. 1. enim quæ ex Scripturis petuntur probationes, ut Pſal. 103. & Heb. 1. ubi Angeli dicuntur ſpiritus; non illius ſunt momenti, ut corporis naturam Angelis detrahant; cum tenuioris corporis res eodem nomine in Scripturâ appellentur, ut aër & ventus, Pſal. 145. & 148. &c. 2. nec etiam illud ex Traditione poteſt colligi; cum tam varia fuerit Patrum ſententia.

Nec Conc. Later. 4. ſub Innoc. III. quæſtionem illam definiit: controverſia enim non erat, an Angeli eſſent omnis materiæ expertes, an non? ſed tantùm, an omnium viſibilium & inviſibilium auhor Deus eſſet adverſus hæreſim Manichæorum, contra quam hoc decretum fuit ſancitum. Hoc unum igitur ex ſuperioribus ſuperest colligendum, varias nempe de Angelorum naturâ fuiſſe veterum opiniones, liberumque olim fuiſſe relictum alterutri adherere ſententiæ. Ceterùm cujuſcunque ſint momenti argumenta, quæ parti neganti favent, in affirmantem ſum propenſior.

C O N C L. Materiæ omnis Angeli expertes dicendi videntur.

Prob. 1. quia in hunc ſenſum exponi poſſunt Scripturæ, & à pluribus exponuntur. 2. quòd ſpiritus vocentur. 3. quòd moveantur in inſtanti; nec alias operationes eliciant Angeli præter ſpirituales, quæ nullatenus è materiâ pendent: nam ſolùm intelligunt, volunt, & moventur: operandi autem ratio eſt neceſſariò naturæ conſentanea. Igitur Angeli expertes materiæ dicendi videntur.



ARTICULUS QUARTUS.

Quæ sint Angelorum apparitiones?

IN dubium vocari non potest, quin Angeli se videndos sæpissimè præbuerint, cum tam frequentes Angelorum apparitiones Scripturæ referant.

Queritur 1. numquid certi de illarum apparitionum qualitate, & modo statui possit? an: num à talibus quæstionibus satius abstinendum foret?

R. cum S. Augustino in Enchir. cap. 59. nihil certi constitui posse; iis tamen quæstionibus utiliter mentem exerceri, modò intra debitos humilitatis limites contineatur. *Et absit, inquit, error opinantium se scire quod nesciunt: quid enim opus est, ut hac atque hujusmodi affirmemur, vel negemur, vel definiamur cum discrimine, quando sine crimine nesciuntur.*

Quer. 2. num in promptu sit Dæmonum apparitiones à sanctorum Angelorum manifestatione secernere?

R. cum S. Augustino discrimen vix posse percipi; quòd nempe bonorum habitum & speciem Dæmones sæpius induant, & sic beatos se Angelos mentiantur: hanc tamen discriminis rationem tradit ipse Sanct. Aug. nempe si aut in errorem, aut in peccatum inducere velint: ità in Enchir. cap. 60. *Quando sensus corporis fallit, mentem verò non movet à verà rectaque sententià, quā quisque vitam fidelem gerit.* Addit eos si ne dono singulari vix secerni posse: ità lib. 2. de Gen. ad Litt. cap. 14. *Hunc discerni non arbitror, nisi dono illo, de quo ait Apost. cum de diversis Dei muneribus loqueretur, aliis dijudicatio spirituum: non enim magnum est, tunc eum dignoscere, cum ad aliqua pervenerit, vel perduxerit, quæ sunt contra bonos mores, vel regulam fidei: tunc enim à multis discernitur.* Illo autem dono, in ipso primordio, quo multis adhuc bonus apparet, continuò dijudicatur, an malus sit. Tamen & per corporalem visionem, & per imagines corporalium, quæ demonstrantur in spiritu, & boni instruunt, & mali fallunt. Intellectualis autem visio non fallitur: aut enim non intelligit, qui aliud opinatur, quàm est; aut si intelligit, continuò verum est.

Quer. 3. num vera sint corpora, quæ sibi sumunt tùm Angeli, tùm Dæmones? & quomodo?

Rt. S. Augustinus in epist. ad S. Paulinum, Angelos assumere vera corpora. Idem asserit lib. 15 de civit. cap. 23. his verbis: *Apparuisse hominibus Angelos in talibus corporibus, ut non solum videri, verum etiam tangi possent, eadem verissima Scriptura testatur.* Et finè tam aperta sunt Scripturæ verba, ubi de Angelorum apparitionibus sermonem habent, ut ad apparitiones imaginarias detorqueri non possint: se enim conrectandos non solum à Sanctis, sed ab aliis, & à plurimis præbuerunt.

buerunt Angeli, ut ex Gen. 18. & 19. præsertim verò ex libro Tobie compertum fit. Illa autem corpora, quæ sibi sumunt Angeli, aut sunt hominum, qui recens occubuerunt; aut ex aëre, aut ex aliâ materiâ componuntur: Sic Tert. lib. de animâ cap. 57. Illa verò corpora hypostaticè sibi non uniunt, aut physicè; quia unio hypostatica divina est penitus, & soli Christo competit. Virtute naturali ea corpora sumunt Angeli; cum virtus ea sit communis bonis & malis Angelis, nec Angelicam virtutem excedat.

Formam humanam sibi sumere solent Angeli; quia est perfectior simul & aptior legationi Angelorum: sic enim, & ad hominum commoda, si boni; & ad hominum infelicitatem procurandam, si mali, magis idonei & accommodati videntur.

Vitales tamen in corporibus assumptis non eliciunt operationes; quia physicè corpora sibi non conjungunt; nec eis inest principium internum vitaliter informans, ut loquuntur. Quare cum sermonem habuisse, vel comedisse feruntur, non ficto quidem & inani phantasmate sumptis escas, sed metaphoricè tantum loquebantur & comedebant; quia cibos non convertebant in sui substantiam. Undè Raphaël Tobie cap. 11. & 19. *Videbar quidem vobiscum manducare & bibere: sed ego cibo invisibili, & potu, qui ab hominibus videri non potest, utor.* Ità de aliis operationibus, quæ ipsis tribuuntur Angelis.

ARTICULUS QUINTUS.

Utrum Angeli sint immortales?

DUPLEX est immortalitas: alia quæ ex naturâ oritur, quâ sit, ut res nec destrui, nec annihilari possit, qualis est solus Deus; alia verò ex singulari Dei beneficio habetur; quæ iterum duplicis est generis: una nimirum, quâ res talis est naturæ, ut in æternum sit permanens, si soli suæ naturæ permittatur, nec destruat à Deo; utpotè quæ nec qualitatibus contrariis, nec ex materiâ & formâ constet, seu à corruptionis principiis longè abhorreat: alia verò immortalitatis est species, quâ res licet naturâ suâ corruptioni sit obnoxia, à corruptione tamen immunis conservatur, cujusmodi erunt post resurrectionem corpora. Hac autem immortalitate immortales tantum esse Angelos plerique crediderunt, quod singulari Dei beneficio à corruptione tuti servarentur: ità S. Iren. lib. 1. cap. 64. & Arnob. lib. 2. S. Ambr. lib. 3. de fide cap. 3. In negotio ex principiis philosophicis definiendo dicam cum aliis, Angelos ità immortales esse, ut nunquam perituri sint; quia nullum est in eis corruptionis principium: annihilari tamen possunt ex S. Cyril. assert. 10. Thef. & S. Aug. epist. 56. quia perire potest quicquid est ex nihilo factum.

ARTICULUS SEXTUS.

An differant Angeli? & quomodo?

RESP. 1. discrimen illud penitus esse nobis incognitum. Unde S. Aug. adversus Priscillian. cap. 11. sic habet: *Esse itaque sedes, dominationes, principatus, potestates, in cœlestibus apparatibus, firmissimè credo, & differre inter se aliquid indubitata fide teneo. Sed quo, & quam ista sint, & quid inter se differant nescio. Nec eâ sanè ignorantia periclitari me puto, sicut in obedientiâ, si Domini præcepta neglexero.*

R. 2. probabiliter statui posse, numero tantum illos differre. 1. quia ejusdem sunt naturæ ex Sanct. Basil. lib. 3. cont. Eunom. *Angeli omnes, inquit, ut appellationis unius sunt inter se, & tamen eorum alii gentibus præsent: alii verò fidelium singulis assistunt: quanto autem gens universa uni homini præstat; tantò utique majorem esse necesse est dignitatem Angelij eius, qui toti genti præsidet, quam illius cui unius tutela committitur.* Ac demum ita concludit. *Quorsum hæc oratio? ut intelligamus non prorsus ut aliquid ordine ac dignitate secundum est ac tertium, hoc & naturam habere alteram: nam ut in Angelis alius est princeps, alius est subiectus; & tamen naturâ Angeli sunt omnes, & in dignitate quidem est differentia, in naturâ verò communio: nam & stella à stellâ differt in gloriâ, & natura stellarum omnium est una.*

Sic etiam S. Gregor. Niss. lib. 6. cont. Eunom. & lib. de opificio hominis cap. 17.

Docent quidam omnes Angelos specie differre, quòd scilicet non consent ex materiâ, ex quâ, inquit, repetitur individuationis principium.

Verum non placet hæc sententia; quia falso nititur principio: neque enim verisimile est individuationis principium ex materiâ repetendum esse; alioquin specie differrent animæ à corporibus separatæ: quod nullus sanæ mentis dixerit.

Ceterum quo fundamento asseratur non posse creari Angelos, qui solo numero differant, non video.

ARTICULUS SEPTIMUS.

Quis sit Angelorum numerus? & quo sint ordine inter se constituti?

CONCLUSIO I. Incertum est quot sint Angeli, cum Angelorum numerus nullibi tradatur.

Prob. quia innumeros esse constat: Dan. quippè 7. v. 10. *Millia millia ministrabant ei, & decies millies centena millia assistebant ei.* Item Apoc. cap. 5. v. 11. *Et erat numerus eorum millia millium.* Quibus ver-

bis incertus numerus, & propemodum infinitus exprimitur. Similiter Job. 25. v. 3. *Numquid est numerus militum ejus.* Equidem eorum numerus Deo est cognitus; sed à nobis definiri non potest.

OPP. Deut. 32. v. 8. juxta 70. Interpret. *Constituit terminos Gentium juxta numeros Angelorum.* Et proinde populorum numero Angelorum numerus responderet; sicque non tantæ amplitudinis est.

R. in Hebræo, & in Vulgatâ non haberi *juxta numerum Angelorum*, sed *juxta numerum filiorum Israël*. seu, ut habetur, divisit Altissimus gentes varias, mundi partes illis largitus; & tunc sufficientem terræ partem filiis Israël, quibus, ut observant plures Interpretes, septem populorum terras destinavit & concessit. Igitur Deut. 32. non agitur propriè de Angelis, vel de eorum numero; sed de filiis Dei, seu Israëlitis.

CONCL. II. Est inter Angelos ordo hominibus incognitus.

Prob. Nam S. Iren. lib. 2. cap. 54. hunc ordinem omnes homines latere supponit; & idè in Valentinis, qui summam Deorum cognitionem sibi tribuebant, ita insurgit: *Dicant nobis, quæ sūt invisibilium natura: enarrent numerum Angelorum, & ordinem Archangelorum: demonstrent Thronorum sacramenta: doceant diversitates Dominantium, Principatum, Potestatum, atque Virtutum.* Item S. August. lib. contra Priscillianistas cap. 11. ordinem illum scribit in Scripturis non esse traditum. Idem quoque docet Enchir. cap. 50.

Quæritur 1. an liceat de Angelorum ordinibus nobis incognitis differere?

R. licere, servatis modestiæ, & humilitatis legibus: traditos enim in Scripturis Angelorum ordines licet referre; retulerunt nempe S. Iren. & S. Athan. cujus hæc sunt verba in epist. ad Serap. *Ante homines Angeli, Archangeli, Cherubim, Seraphim, Virtutes, Principatus, Potestates, Dominationes, Paradisus; & ita singula in suo ordine & vocabulo permanent.* Thronos verò, qui hîc omissi sunt, ibidem postea commemoravit, & alibi, ut orat. 3. & 4. in Arianos. Plerosque recensent S. Basil. lib. de Spiritu sancto cap. 16. S. Epiph. hæc. 64. S. Greg. Naz. orat. 3. 4. S. Greg. Niss. Hom. 15. in Cantica, S. Cyrill. Alex. sapius. Alios autem esse ordines præter laudatos in Scripturâ docet S. Chrysost. orat. 5. contra Anomæos, & Hom. 4. de incomprehensibili Dei naturâ, ubi sic habet: *Sunt enim vel aliæ virtutes, quarum ne nomina quidem novimus. Cogitate animo, quanta sit hæreticorum insolentia; servorum ne appellationes quidem scimus, & illi Domini substantiam curiosius inquirunt. Sunt enim Angeli, Archangeli, Throni, Dominationes, Principatus, & Potestates: sed non soli illi sunt cætus in cælis: verum infinitæ gentes, & nationes ineffabiles, quas nulla explicare potest ratio. Undenam constet, quarum plures iis alias esse virtutes, quarum ne vocabula quidem novimus, nimirum qui illa dixit Paulus, & hoc asseveravis alterum, cum sic de Christo loquitur? Constituit eum super omnem Principatum, & Potestatem, & Virtutem, & Dominationem, & omne nomen, quod nominatur non solum in hoc seculo, sed etiam in futuro. Videtur, ut*

sint aliqua nomina, quæ manifesta illis erunt, cum sint ignota modo: nam propterea dixit, non solum quæ nominantur in hoc seculo, sed etiam in futuro. Licet igitur de illis ordinibus sermonem instituere: quamvis aliunde quidquam certi hæc in re non possit constitui.

Queritur 1. quid de ordine à S. Dionysio inter Angelos constituto sit sentiendum, de novem scilicet Angelorum ordinibus; ita ut primo loco ponantur Seraphim, secundo Cherubim, tertio Throni, quarto Dominationes, quinto Virtutes, sexto Potestates, septimo Principatus, octavo Archangeli, nono Angeli: cum S. Gregorius Magnus Principatus quinto loco, & Virtutes septimo ponat.

R. de illâ ordinatione statuendum esse, quod ipse S. Dionysius eodem cap. 6. de Cælesti Hierarch. constituit: *Quante quidem, inquit, sint & quales supercælestium essentiarum dispositiones, & quo pacto earum sacri ordines initiuntur, solum exactè nosse censeo divinum illum, à quo consecrantur, Principatum.*

Quer. 3. an etiam inter Dæmones quidam sit ordo?

R. ordinem quemdam inter eos constitutum esse: sic Origen. Hom. 15. in Josue, ubi hæc habet: *Undè mihi videtur esse infinitus quidam numerus contrariarum virtutum, pro eo quòd per singulos penè homines sunt spiritus aliqui, diversa in iis peccatorum genera molientes: verbi causa, est aliquis fornicationis spiritus; est ire spiritus alius; est avaritiæ spiritus; alius verò superbia &c. Sic ex Origene, qui variis affectibus obnoxii sunt, quamplurimis iis spiritibus subjacent, & pro variis cupiditatibus pravis, variis aguntur spiritibus. Hoc etiam ibidem addit: Sed puto magis principem quidem fornicationis spiritum unum esse; innumeros verò esse, qui in hoc ei officio pareant, & per singulos quosque homines diversi spiritus sub eo principe militantes, ad hujusmodi eos peccata sollicitent. Iis autem præesse & præstare supremum quemdam omnium maximè improbum Dæmonem infert ex Apost. ad Ephes. cap. ult. v. 12. Quoniam nobis est colluctatio adversus Principes, & Potestates; adversus mundi rectores tenebrarum harum, contra spiritualia nequitie in cælestibus. Et verò cum peccatum naturam non destruat, non fuit subversus ordo inter eos constitutus. Undè cum Job. cap. 10. v. 22. legamus in inferno nullum esse ordinem; de ordine, qui ad beatitudinem spectat, sermo est; non de ordine potestatis, qui à Deo est institutus: præterquamquòd juxta 70. versionem nulla superest difficultas; ita enim legitur: *Ubi non est lux, neque est videre vitam hominum.**

Queritur ultimò, an aliis possint donari nominibus Angeli, quàm quibus in Scripturis insigniuntur?

R. non esse donandos; & ideo Patres Concilii Romani an. 745. sub Zachariâ Act. 3. cujusdam Aldeberti orationem, cui Angelorum octo nomina inferuerat, damnant, eamque decernunt igni esse tradendam; cum Ecclesiâ non plus quàm trium, SS. Michaelis, Gabrielis, & Raphaelis, Angelorum nomina referat.

ARTICULUS OCTAVUS.

Quæ sit Angelorum intelligentia?

PLURIMAS, quæ hîc moveri possent quæstiones, ubi de beatorum visione, solvimus; ibidemque variam cognoscendi rationem distinximus; eam scilicet, quæ ex rebus creatis oriatur; alteram verò, quæ ex Deo ipso: Verbis autem explicare, nec cogitando consequi licet, quæ propriè sit Angelorum cognitio, ut tradit S. Ambr. lib. 5. de fide cap. 1. & lib. 7. in Lucam. Paucis ergò quæ supersunt tractanda, expediemus.

Quæst. 1. an multa tùm bonis Angelis, tùm Dæmonibus ignota sint?

R. 1. illis esse ignota plurima: Judiciî diem ignorant, Matth. 24. v. 26. Marc. 13. v. 32. Ephes. 2. v. 9. & 10. Non statim in cœlestium mysteriorum agnitionem adducti sunt, ex S. Iren. lib. 2. cap. 48. Verbi generationem non noscunt, ut exscripsimus quæst. 1. art. 1. & quæst. 1. art. 3. de Trin. Ex Orig. Hom. in Cant. non solum in hominibus, sed etiam in Angelis Mysteriorum cognitio innovatur, & per singularem tantummodò revelationem, quæ sunt supra naturam cognoverunt.

2. Nec Angeli sancti, nec Dæmones noverunt futura. Id jam aliàs probavimus, idemque apertè tradunt Scripturæ, ut Isaia 41. v. 22. *Accedant & nuntient nobis quæcumque ventura sunt: priora quæ fuerunt nuntiate: & ponemus cor nostrum, & sciemus novissima eorum, & quæ ventura sunt indicate nobis. Annuntiate quæ ventura sunt in futurum, & sciemus quia Dii estis vos.* Et cap. 44. v. 6. *Ego primus, & ego novissimus, & absque me non est Deus. Quis similis mei? vocet & annuntiet: & ordinem exponat mihi, ex quo constitui populum antiquum: ventura & quæ futura sunt annuntient eis &c.* Hinc veri Prophetæ ex rerum prænuntiatarum complemento à Deo se missos fuisse comprobant; alios verò illusores esse, ut Deut. 18. v. 22. Jerem. 28. v. 9. Undè Tert. Apol. cap. 20. sic habet: *Idoneum testimonium divinitatis, veritas divinationis.* Et ex S. Hil. lib. 9. de Trin. proprium Deo quid aliud est, quàm cognitio futurorum? Si quid ergò futurum portendunt Dæmones, ex causis necessariis, atque naturalibus illud colligunt. In naturalibus etiam sæpius falluntur, cum rerum ordinem Deo placet immutare.

3. Nec Angeli, nec Dæmones liberas animorum cogitationes noverunt: nam à Deo solo eas investigari & cognosci docet Scriptura: lib. quippè 3. Reg. cap. 8. v. 39. *Tu nosti solus cor omnium filiorum hominum.* Quod & 2. Paralip. cap. 6. v. 30. iisdem verbis repetitur. Item Ecclesiast. 42. v. 18. *Abyssum & cor hominum investigavit.* Jerem. 17. v. 9. *Pravum est cor omnium & inscrutabile; quis cognosces illud? Ego Dominus scrutans cor, & probans renes.* Ex quibus solius esse Dei nosse cordis intima colligunt Tert. lib. 5. cont. Marcion. cap. 15. S. Ambr. in cap. 5.

S. Luc. S. Aug. epist. 6. Quid plura? Ex istis verbis, *Cognovit autem Jesus cogitationes eorum*, inferunt Patres Christum verum esse Deum, quod nempe secretas mentium cogitationes haberet compertas: ita Clemens Alex. lib. 5. Strom. S. Cypr. lib. de orat. Dominicâ, Novatian. lib. de Trin. cap. 13. S. Hilar. in Psalm. 139. S. Chrysost. Hom. 24. in Joann. & alii. Terminis illis sententiam nostram exprimit Origen. Hom. 8. in Gen. *Ipsi enim velut procurationem animarum nostrarum tenent, quibus, dum adhuc parvuli sumus, velut tutoribus & actoribus committimur usque ad præsinitum tempus à Patre. Et ipsi ergò nunc de profectu unius cujusque nostrum dicunt; quia nunc cognovi, quia tu times Deum. Verbi causa, propositum habeo martyrium, non ex hoc dicere ad me Angelus poterit, quia nunc cognovi, quod tu times Deum; Deo enim soli cognitum est propositum mentis: si verò accessero ad agones, protulero bonam confessionem, quæ inferuntur constanter cuncta suscepero, tunc potest dicere Angelus, velut confirmans me & corroborans, nunc cognovi quod tu times Deum.* Et verò de ratione libertatis est, ut perfectum in actionem suam dominium obtineat voluntas; quod profectò non consequeretur, si ipsâ invitâ in Angelorum notitiam venirent, quæ veller occultare. Quòd si ergò aliquid ejusmodi perspectum habent Angeli, aut divinæ revelationi, aut conjecturis, aut operantis arbitrio totum debent.

Quandòque SS. Patres, ut S. Basil. de verâ virginitate, & alii, Angelos nullibi non adesse scribunt; non quòd Angelis divinam tribuant cognitionem, aut immensitatem; sed ut ad venerationem Deo ubique præsentis deferendam nos exemplo Angelorum incitent.

4. Longè minor est Dæmonum, quàm bonorum Angelorum cognitio: nam multa naturalia ignorant; & aliundè pleraque illis absconduntur, quæ divinitus hominibus conceduntur, ut gratia interior, quâ juvatur homo; alioquin, ut docet S. Aug. lib. de Gen. ad Litt. cap. 17. ab inducendis in peccata piis hominibus sapiùs abstinere: nolent enim ab homine superari. Incognitum etiam ipsis fuit Trinitatis & Incarnationis mysterium, quòd naturalem cognoscendi facultatem excedat. Undè docet S. Ignat. epist. ad Ephes. tria mysteria amoris, quæ in silentio peracta sunt, Dæmonibus incognita fuisse; videlicet Beatæ Mariæ virginitatem, Incarnati Verbi nativitatem, & mortem. Multa etiam quæ ad Incarnationem spectant, in notitiam Dæmonum non venisse tradunt S. Justin. in Apol. ad Antonin. & S. Iren. lib. 5. cap. 21.

Quæ sit Angelorum & Dæmonum latitudo, ita tradit S. Aug. lib. 9. de civit. cap. 21. *Tantum verò eis innotuit, quantum voluit: tantum autem voluit, quantum oportuit. Sed innotuit, non sicut Angelis sanctis, qui ejus secundum id quod Dei verbum, participatâ æternitate perfruuntur: sed sicut eis terrendis innotescendum fuit. . . sed per quadam temporalia sua virtutis effecta, & occultissima signa præsentis, quæ Angelicis sensibus etiam malignorum spirituum potius, quàm infirmitati hominum, possent esse conspicua. Deniquè quando ea paululum supprimenda judicavit,*

& aliquantò alius latuit; dubitavit de illo *Demonum Princeps*, eumque tentavit, an *Christus* esset.

Quæritur 1. an Angeli per infusas species res corporales habeant sibi perfectas?

R. per species infusas Angelos non cognoscere res corporeas; quia ex S. Aug. lib. 1. de Gen. ad Litt. cap. 8. non tam in creaturis, quam in Verbo creaturas cognoscunt: *Neque enim*, inquit, *sicut pecora*, solo sensu corporis vident Angeli hæc sensibilia; sed si quo sensu tali utuntur, agnoscunt ea potius, quæ melius noverunt interius in ipso Dei Verbo, à quo illuminantur, ut sapienter vivant. Et lib. 4. cap. 24. In quo sunt omnium, etiam quæ temporaliter facta sunt, æternæ rationes, tanquam in eo, per quod facta sunt omnia. Non remanet Angelica scientia in eo, quod creatum est; quin hoc continuò referat ad ejus laudem, atque caritatem, in quo id non factum esse, sed faciendum fuisse cognoscitur. Nam si vel ad seipsam, in quâ veritate stando dies est, natura Angelica converteretur, sequæ amplius deleteretur quàm illo, cujus participatione beata est; intumescens superbiam caderet, sicut *Diabolus*. Et cap. 29. & 30. distinguit, ut aliàs observavimus, duplicem in Beatis & Angelis cognitionem, matutinam scilicet, quâ creaturæ in Verbo; & vespertinam, quâ in seipsis creaturæ cognoscuntur. Cap. 31. & 32. in Angelorum cognitionem creaturas venisse scribit, cum è nihilo eductæ sunt: si autem Angelis creaturarum species innatæ aut ingentæ fuissent, longè ante earum productionem illas compertas habuissent: *Mens verò Angelica purâ charitate inherens Verbo Dei*, posteaquàm illo ordine creata est, ut precederet cetera, prius ea vidit in Verbo Dei faciendâ, quàm facta sunt. . . . quæ isidem facta in eis ipsis etiam cognovit, minore utique notitiâ, quæ vespere dicta est, quàm notitiâ sanè precedebant quæ fiebant; quia precedit cognitionem qui aliquid cognosci potest. Nisi enim prius sit quod cognoscatur, cognosci non potest.

Et verò ex sententiâ, quæ rerum species Angelis connaturales asserit, gravia sequuntur incommoda; scilicet quælibet singularia eis esse cognita; nihil in terrâ fieri, quod eos lateat; nihil novi discere Angelos, aut *Dæmones*: quæ singula & rationi, & communi Antiquorum sententiæ, & Scripturæ adversantur.

O B J. Angeli perfecti creati sunt: igitur omnibus rerum intelligibilium speciebus donati sunt. 1. Non possunt res materiales naturaliter in spirituale naturam agere; & proindè nec immittere in eam species: & sic eas aliundè mutantur Angeli; ergò à Deo. 3. Alia est cognoscendi ratio Angelorum à ratione, quâ homines cognoscunt: sed homines mediis, quæ ex objectis profluunt, speciebus ad eliciendam cognitionem juvantur: ergò non eadem in Angelis exigenda est necessitas; sed species innatæ à Deo acceperunt.

R. 1. gratis hæc omnia supponi.

Primò enim, licet debitâ perfectione ornatî fuerint Angeli; undè ad perfectionis cūmulum ejusmodi species conferre probantur?

Secundò, quòd rerum materialium virtus in spiritualia non agat; quid hoc ad specierum connaturalium necessitatem?

Tertiò, si aliam ab Angelo agendi rationem sortitus esset homo, quòd corporis utatur auxiliò; undè inter Angeli & hominis operandi rationem ducetur discrimen? ubi scilicet anima à sensibus atque corporis vinculis libera sibi soli permittetur? Omnis ergò illa specierum connaturalium necessitas corrui. Sed de omni specierum genere fusiùs, ubi de speciebus expressis & impressis tractatum fuit. Fateri liceat cognitionis Angelorum rationem nobis esse ignotam, simul & species illas connaturales nobis inutiles videri.

Quæritur 3. an Angelorum bonorum cognitio ab errore penitus sit immunis.

R. errore omni vacare: ità S. Aug. lib. 2. de bapt. cap. 5. *Homines enim sumus: undè aliquid aliter sapere, quàm res se habet, humana tentatio est in nullo autem aliter sapere, quàm res se habet, Angelica perfectio est.* Et lib. 9. de civit. cap. 22. *& ideo certius etiam temporalia & mirabilia ista noverunt; quia eorum principales causas in Verbo Dei conspiciunt, per quod factus est mundus.*

Q. 4. an & quomodò se invicem alloquantur Angeli?

R. non posse in dubium vocari, quin Angeli semetipsos alloquantur: tum quia ex Isaï. 6. v. 3. *Duo Seraphim clamabant alter ad alterum, & dicebant &c.* Tum quia Zachar. cap. 2. v. 3. *Angelus alius egrediebatur in occursum ejus (nempe alterius Angeli) & dixit ad eum &c.* Tum etiam quia 1. Cor. 13. v. 1. *Si linguis hominum loquar, & Angelorum, charitatem autem non habeam, factus sum velut aes sonans, &c.* De propriâ locutione Apostolorum disserere existimavunt S. Basil. Hom. in hæc verba, *In principio erat Verbum*, S. Chrisost. & alii.

Cujuscumodi verò sit Angelica collocutio, me ignorare fateor: referam solummodo quid S. Greg. Niss. lib. 13. cont. Eunom. scripsit. *Inexperta materia, & intelligibili naturâ mentis ætio, sermo est nequaquam materiali utens organorum ministerio: Etenim in humanâ naturâ nihil opus haberemus verborum ac nominum usu, si nudos animi motus mutuo demonstrare possimus; nunc cum interiores mentis nostræ motiones, pro eo quod carnis involucre natura nostra circumscribitur, palàm fieri nequeant, necessario facimus, ut certas nominum impositiones tanquam signa rebus affingentes illarum ope mentis nostræ opus invicem vulgemus.* Cum ergò ità visum est Angelis, suam mentis cogitationem ad alios dirigunt; & sic colloquia, aut sermonem miscant.



ARTICULUS NONUS.

An ad inferiora mittantur omnes Angeli?

VARIÆ sunt hæc de re Antiquorum sententiæ. Quibusdam tantum Angelis hanc demandatam esse Provinciam asserunt ex SS. Patribus nonnulli. S. Dionysius lib. de Cœlest. Hierarch. cap. 13. supremos Angelos nunquam ad hæc infima mitti contendit. S. etiam Gregorius Hom. 34. in Evang. duos solum infimos Angelorum ordines perferendis in terram nuntiis adhiberi putat. Sentiunt alii cujusque ordinis Angelis illud officii præcipi, varique munia illis injungi.

Hanc sententiam posteriorem, quam probat S. Bern. serm. de S. Bened. & de S. Michael, amplectimur, tum quod Isaias cap. 6. v. 6. ex Seraphim unum ad se purgandum accessisse referat; tum quod Apostolus Hebr. 1. v. 14. omnes Angelos ministros divinæ voluntatis vocet: *Nonne, inquit, omnes sunt administratorii spiritus, in ministerium missi propter eos, qui hereditatem capient salutis?* Quod clarius etiam perspectum sit ex proposito Apostoli: ut enim probe Filium Dei omnibus creaturis, imò & ipsis Angelis, qui præstant cæteris rebus creatis, dignitate longè superiorem esse, ita loquitur v. 4. *Tantò melior Angelis effectus, quanto differentius præ illis nomen hereditavit:* nimirum quod Dei Filius sit, & illi sint tantummodò ministri. Si autem à ministerio eximerentur supremi ordines, Angelis & Archangelis præstare quidem diceretur Christus; sed non omnibus Angelis; & proinde nullius ponderis esset Apostoli disceptatio: sed cum dicat, eos omnes esse administratorios spiritus, neminem prorsus exceperit. Hunc esse Apostoli sensum inde deducitur, quod validum ex illâ autoritate duxerint argumentum Veteres, qui contra Arianos, aut Eunomianos disputarunt: scilicet inde colligebant, communi lege servitutis, cui omnes creaturæ, & præstantissimi Angeli astringuntur, non teneri Christum: sic Sanctus Athanas. orat. 2. & 3. contra Arian. Sanctus Gregorius Niss. lib. 3, contra Eunom. & Sanctus Chrysostomus Hom. 8. in Gen.

ARTICULUS DECIMUS.

Quibus creaturis præficiantur Angeli? & quorum custodia eis demandetur?

ERRORES hi lib. 2. Lactnat. c. 15. inseruntur: 1. in res terrenas ab initio potestatem Diabolo fuisse à Deo traditam. 2. tunc tantum hominibus custodiendis præpositos fuisse Angelos, cum hominum salutem à Daemonum insidiis fuit timendum. 3. Deum Angelis præcepisse, ne terræ contra-

gione macularentur. 4. Diaborum ad mulierum congressum Angelos pellexisse, & ab eo tempore in terram cecidisse. 5. Ex iis quosdam in diaboli ministros evasisse, & quia mediæ cujusdam naturæ erant, cæli pariter & inferorum aditu fuisse interdictos. Hinc ait duo genera dæmonum exorta esse, unum cæleste, alterum terrenum.

CONCL. I. Non solum specialem aliquorum hominum curam habent Angeli Sancti; sed etiam omnium hominum custodiæ præficiuntur & incumbunt.

Prob. prima pars: Nam Sanctos Angelos singularem hominum quorundam curam gerere patet ex Gen. 48. v. 16. Judith. 13. v. 2. & Act. cap. 12. v. 15. ubi sic de Sancti Petri Angelo loquuntur, qui domi erant, cujus ostium pulsabat S. Petrus è carcere eductus, *Angelus ejus est*. Hanc veritatem tuetur Origen. tùm lib. 5. cont. Celsum, tùm & lib. 8. contra eundem. Tuentur pariter S. Greg. in orat. habitâ in laudem Origenis, Lact. lib. 2. cap. 15. Euseb. lib. 3. de demonstr. cap. 16. & S. Amb. orat. de Basilicis non tradendis hæreticis c. Auxentium: hæc sunt ejus verba: *& respexit, & vidit Angelorum millia: advertitis igitur quòd servulos Christi ii magis custodiant, qui non videntur, quàm qui videntur: sed & illi si custodiunt, vestris custodiunt orationibus advocati*. Idem etiam habet lib. 2. de Jacob. v. 6.

Prob. 2. pars: Nam singulis hominibus præfici Angelos Sanctos liquet ex his Christi verbis Matth. 18. v. 10. relatis: *videte ne contemnatis unum ex his pusillis: dico enim vobis, quia Angeli eorum semper vident faciem patris mei, qui in cælis est*. Inde singulorum hominum curam Angelis esse demandatam infert Origenes, & beneficia quæ præstant recenset Hom. 20. in Num. ubi sic habet: *Adest, inquit, unicuique nostrum, etiam minimis qui sunt in Ecclesiâ Dei, Angelus bonus, Angelus qui regat, qui moveat, qui gubernet, qui pro actibus nostris corrigendis, & miserationibus exposcendis quotidie videat faciem Patris, qui in cælis est; sicut Dominus designat in Evangeliiis*. Et Hom. 8. in Josuë ait Angelos custodes à Dæmonibus nos tueri, non secus ac Israëlitas, qui hostes suos Hættas oppresserunt. & Hom. 1. in Ps. 37. ab Angelis nos corripi & castigari ex Pastoris libello tradit.

S. Basil. initio lib. 3. cont. Eunom. docet traditos nobis fuisse Angelos custodes, testes, doctores, & duces: *Quod verò singulis fidelium adsit Angelus, ut pedagogus quidam & Pater ad vitam dirigendam, nemo contradicit, qui verborum Domini recordatur dicentis; ne contemnatis unum ex his pusillis*. Plurima hujuscemodi tradit S. Aug. epist. 1. 0. & alibi.

Non solis fidelibus præfici Angelos, videtur sentire S. Basil. Hom. 6. existimans Angelos custodes in creatione fuisse datos. Eadem est sententia S. Greg. Niss. lib. de vita Moïsis, ubi sic loquitur. *Posteaquam in peccatum natura nostra lapsa est, non omnino à clementiâ divinâ neglectam, neque absque suo patrocinio dimissam; sed Angelorum, qui naturâ in corporei sunt, aliquem in adnuncium cuique constitutum fuisse, naturæque nostræ corruptorem in omnibus contra annitentem prævium aliquem atque maleficum demonem; ad malè vivendum homines impellentem, ad singu-*

los destinasse. Sic sentiunt S. Hier. in Matth. & Theodor. in Gen.

Innumera recensentur in Scripturis beneficia, quæ nobis præstant, tum ut bonorum operum occasionem subministrarent, simulque cogitationes bonas suggerant; tum ut à Dæmonum insidiis tucantur, & auxilium præbeant; tum ut variis periculis nos subducant: ita se præstiterunt erga Jacobum, Moysen, Eliscum &c. tum ut preces & bona opera suâ apud Deum intercessione commendent, ut Tobix 12. &c.

Undè Tert. lib. de anima cap. 51. scribit nobis ex vitâ decedentibus adesse Angelum comitem, ex cujus aspectu, quid de nobis Deus statuerit, colligere in promptu sit.

Quæritur 1. an cuique suus sit quoque Dæmon.

R. Hanc esse multorum sententiam, ut Orig. lib. 1. de Prin. quod colligit ex Lib. Pastoris, & ex Epist. S. Barnabæ; quæ tamen opera non probantur ut genuina. Ità etiam S. Greg. Niss. lib. de vitâ Moïsis.

Antiquis Philosophis familiaris fuit de Angelis doctrina, quos genii nomine designarunt. Undè non solis hominibus, sed etiam civitatibus præesse illos genios arbitrati sunt, ut videre est apud Tert. lib. de Idol.

Quærit. 2. An Ecclesiæ generali, & Ecclesiis quibusque, regnis & civitatibus sui sint Angeli.

R. Ecclesiæ universalis curam gerere dicitur Michaël: sic Orig. Hom. 11. & 13. in Lucam. Cuique etiam Ecclesiæ duplicem Episcopum, visibilem unum, invisibilem alterum docet S. Greg. Naz. orat. 32. ubi cum Ecclesiæ suæ Constantin. ultimam salutem precatur, hæc habet: *Valete Angeli hujus Ecclesiæ præsides, meeque præsentia ac peregrinationis: si modo eo in manu Dei res nostra sunt.*

R. 2. Regnorum & Civitatum custodiæ præficiuntur Angeli: nam Daniel cap. 10. v. 13. alterum Angelum vocat Persarum principem; alium verò Græcorum. Item S. Clemens Alex. dubitans, num singulis hominibus hæc gratia sit concessa, Gentibus præfectos fuisse censet lib. 6. Strom: *Nam per gentes, inquit, & civitates sunt distributa Angelorum præfecturæ: forsasse autem etiam ex iis sunt deputati singulis.*

Orig. Hom. in Jerem. terræ & elementis præesse Angelos docet. Idem tradit S. Basil. lib. de Spiritu Sancto ex Deut. 32. Josue 5. & Daniel 10. Hæc autem orbis procuratio Angelis credita, videtur niti fundamento, quod tradit S. Aug. lib. 8. de Gen. ad Litt. cap. 13. divinæ nempe providentiæ decreto & ordine corporalem spiritali subdi creaturam.

Adversus superiora obijci potest, solis justis præfici Angelos. Nam Ps. 90. v. 11. *Quoniam Angelis suis mandavit de te, ut custodiant te &c.* Et Heb. 1. v. 14. dicuntur *administratorii spiritus, in ministerium missi propter eos, qui hereditatem capient salutis.* S. etiam Chrysost. in eâ sententiâ fuisse videtur Hom. 3. in epist. ad Col. Idem traditur in orationibus, quæ in Baptismo adhibentur: *Quasumus, inquit Sacerdos, ut mittere digneris sanctum Angelum tuum de cælis, ut custodiat hunc famulum meum.* Præterea cum homo Angelis sit naturâ inferior, multis hominibus invigilare posse videtur unus Angelus.

Ad hæc omnia paucis responderi potest. 1. Singularem quidem justorum curam ab Angelis exigi, nihilque, quod in electorum gratiam non cedat, constitui. 2. S. Chrysol. de efficaci Angelorum custodia ibi agere; aut saltem hanc ejus fuisse privatam sententiam. 3. Ecclesiam in Baptismo singularem à Deo gratiam petere, ut perducatur ad gratiam Baptismi. Quod 4. loco assertur, gravis non est momenti; cum ab aliquibus sanctis Patribus negetur.

Subjungenda videntur, quæ observare solent SS. Patres jam antea laudati, hæcque ad superioris doctrinæ probationem conducunt. Monet 1. Orig. Hom. 14. in Num. tutelæ Angelicæ beneficia fore percepturum, qui perpetuæ orationi dederit operam; aut qui nihil non tentarit, quod fratres ad meliorem frugem revocet. 2. Monet etiam Hom. in Josué, eadem beneficia percepturum, qui Scripturarum incubuerit lectioni, quod illæ sint divinus liber, quo pascuntur & delectantur Angeli. 3. Monet adhuc lib. 5. contra Cels. easdem prærogativas habiturum, qui vestigiis Christi constanter inhaerit, & solâ mente Deum amat. Addit verò Hom. 2. in Jerem. nos ab Angelis deferi, cum eorum consiliis aut non oblectamur; aut remedia, quæ nobis proponunt, respuimus. Sicut enim famæ suæ periculum aut jacturam ne faciant medici, aut ne operam perdant, ab ægrotis, qui curari nolunt, secedunt; ita se gerere Angelos docet. Idem Hom. 10. in Jerem. tradit gravem ab iis, qui Angelorum consilia parvi fecerunt, Judicii die repetendam vindictam; & tunc, ut docet Hom. 10. in Num. ab hominibus inquirendum fore, num Angelorum curæ & studio responderint. S. Bas. lib. 3. contra Eunom. hæc de Angelorum custodia tradit: *Castrametabitur Angelus Domini in circuitu timentium ipsum*. Omni namque, ut habet epist. 41. in Christum credenti Angelus assistit, nisi illum à nobis per improbas actiones profligaverimus. Sicut enim fumus apes fugat, & foetidus odor columbas expellit; sic Angelum vitæ nostræ custodem abigit multâ lacrymarum aspergine dignum & graveolens peccatum.

Quer. ult. quorum Angelorum ministerio in infligendis pœnis utatur Deus?

Respondet 1. Origenes Hom. 2. in Jerem. utrosque à Deo tam bonos quam malos ad hoc ministerium adhiberi. S. August. lib. 1. Quæst. Evangelic. q. 10. vindicis Dei statuta legis instar & judicis, pio & laudabili animo implere posse Angelos beatos; ad eos verò solos misericordiæ officia pertinere.

Respondet 2. Orig. lib. 8. cont. Celsum, qui omnium, quæ in nostros usus cederent, curam gerere Dæmones contendebat; & proinde cultu, quem grati animi officium exigeret, non esse fraudandos: respondet, inquam, Origenes, hoc esse falsum, simulque contendit malorum & calamitatum solummodò authores illos esse & ministros.

Resp. 3. nonnisi reprobos Angelos divinâ ordinatione ad inferenda hominibus mala seligi. Sic S. Aug. lib. de Agone christiano, cap. 7. ubi docet divinâ ordinatione, & justitæ œconomiâ fieri, ut homo improbus

in peccati poenam sit aliorum sceleratorum vexator. Idem lib. 83. quest. q. 53. hanc justitiæ divinæ æconomiam exponit iterum, ostenditque non perfecti, seu justî hominis ministerio, sed improborum consiliis homines decipi, qui merentur decipi, ut ex Achab à Pseudo-Prophetis decepto elucescit.

Ex eâ ineffabili rerum administratione addit S. Aug. emanare illam Legis vinæ imaginem, quâ fit, ut hominibus pro ipsorum meritis utendum esse judices decernant. Sic ad carnificis officium obeundum, non innocentis viri, sed hominis mortis supplicio dammati natus fesse insumendas constituant, ut à reo reus poenas debitas reposcat. Ideò jussos dicit fuisse Israelitas ab Ægyptiis pretiosa vasa mutuo accipere; sicque illis illudere, quod essent digni, qui Ægyptios deciperent, & pro cupiditate permitterentur vasa aurea, quibus inhiabant adhuc terrenarum rerum studiosi, potere non reddituri, & accipere quasi reddituri; quam & tam diuturni laboris non injustam mercedem esse Deus voluit. Ex quibus colligit creaturarum Justissimum Ordinatorem per seipsum efficere, quæ Majestatem decent. Ità verò de Israelitis vasa mutuantibus loquitur: *Non enim erant idonei, quibus diceretur, Diligite inimicos vestros: sed tales erant, quibus tantummodò dici oporteret: Diliges proximum tuum, & oderis inimicum tuum.* Ex quibus facîle conpicere quisque potest, quæ sint beatorum Angelorum munera.

FINIS.



PRIVILEGE DU ROY.


L OUIS PAR LA GRACE DE DIEU, ROY DE FRANCE ET DE NAVARRE : A nos Amez & Feaux Conseillers les Gens tenans nos Cours de Parlement, Maistre des Requestes ordinaires de nôtre Hôtel, Grand Conseil, Baillifs, Seneschaux, Prevosts, leurs Lieutenans, & à tous autres nos Justiciers & Officiers qu'il appartiendra ; Salut. Nôtre bien Amé FRANÇOIS FEU Docteur en Theologie de la Faculté de Paris, Curé de l'Eglise Paroissiale de saint Gervais & saint Protas en nôtre bonne Ville de Paris, Nous a fait remontrer, qu'ayant composé des Ouvrages intitulez, *Theologici Tractatus ex Sacris Codicibus & Sanctorum Patrum monumentis excerpti* ; lesquels il desireroit faire imprimer, pour instruire les personnes consacrées à l'Eglise, dans les maximes principales de la Religion Chrétienne ; il a recours à Nous, & Nous a fait supplier tres-humblement de lui vouloir accorder nos Lettres de Permission sur ce necessaires. A CES CAUSES, desirant traiter favorablement l'Exposant, & contribuer à l'avantage que le public tirera d'un si bon Ouvrage : Nous permettons & accordons par ces Presentes audit Sieur FEU, de faire imprimer lesdits Traitez par lui composez, vendre & debiter dans tous les Lieux de nôtre Royaume, par tels Libraires ou Imprimeurs, en telle marge, caractere, nombre, volume, & autant de fois que bon lui semblera, durant le temps & espace de dix années consecutives ; à comter du jour que lesdits Traitez seront achevez d'imprimer pour la premiere fois, en vertudes Presentes. Pendant lequel temps, Nous faisons tres-expresses deffenses à tous Imprimeurs, Libraires & autres, d'imprimer, faire imprimer, vendre & distribuer lesdits Traitez, sous pretexte d'augmentation, correction, changement de titre, fausse marge, ou autrement, à peine de trois mille livres d'amende, payables par chacun des contrevenans, applicables, un tiers à Nous, un tiers à l'Hôpital General de nôtre bonne Ville de Paris, & l'autre tiers à l'Exposant, de confiscation des Exemplaires contrefaits, & de tous dépens, dommages, & interets ; à condition qu'il sera mis deux Exemplaires desdits Traitez dans nôtre Bibliotheque publique, un en celle du Cabinet de nos Livres en nôtre Château du Louvre, & un en celle de nôtre tres-Cher & Feal le Sieur Boucherat Chevalier Chancelier de France, avant que de les exposer en vente : A la charge aussi que l'impression en sera faite dans le Royaume, & non ailleurs ; & que lesdits Traitez seront imprimez sur de beau & bon papier, & de belle impression ; & ce suivant ce qui est porté par le Reglement fait pour la Librairie & Imprimerie au mois de Juin

1618. enregistré en nôtre Cour de Parlement le 9. Juillet ensuivant, à peine de nullité des Presentes; lesquelles seront enregistrées dans le Registre de la Communauté des Imprimeurs & Libraires de nôtre bonne Ville de Paris. Si vous mandons & enjoignons, que du contenu en icelles vous fassiez jouir pleinement & paisiblement l'Exposant, ou ceux qui auront droit de lui, sans souffrir qu'il leur soit fait empêchement. Voulons aussi qu'en mettant au commencement ou à la fin dudit Livre, une copie des Presentes, ou extrait d'icelles, elles soient tenues pour bien & deuëment signifiées, & que foy y soit ajoutée, & aux copies collationnées par un de nos Amez & Feaux Conseillers & Secretaires, comme à l'Original. Commandons au premier Huissier ou Sergent sur ce requis, de faire pour l'exécution d'icelles, tous Exploits, Saisies, & Actes nécessaires, sans demander autre permission: C A R tel est nôtre plaisir. D O N N E' à Versailles le vingt-septième jour de Decembre, l'an de Grace mil six cens quatre-vingt-onze, & de nôtre Regne le quarante-neuvième. Signé M O U R E T.

Registré sur le Livre de la Communauté des Maîtres Imprimeurs & Marchands Libraires le 32. Aoust 1692.

Signé, P. AUBOUIN Syndic.

Achevé d'imprimer pour la premiere fois, en vertu des Presentes, le vingt-unième jour d'Aoust 1692.



ERRATA.

Pag.	Lin.	Err.	Lege
20	10	Tert. l. 1. cont. Marc. c. 1.	cap. 10
21	9	notam secundum se	notam esse secundum se
	42	quoad not nota	notae
22	11	S. Aug. lib. de mor. Manich. c. 5.	cap. 10
23	10	fecerit.	fecerit?
	19	Sap. 13. v. 7.	Sap. 13. v. 7.
	31	vegetas mole.	vegetas molem
24	5	non eximere	non
25	9	consulto obruit	inconsulto obruit
26	6	Sic l. de Musica.	sic l. 6. de Musica
	29	l. de lib. 1. arb.	lib. 1. de lib. arb.
	lib. 1.	de vera Relig.	dele 1.
27	11	lib. de mor. Manich. c. 48	lib. 1. de mor. Manich. c. 48
28	41	S. Bas.	S. Greg. Mag.
29	10.	l. de dono Inter. c. 13.	lib. de dono Inter. c. 6.
30	12	S. Epiph. hær. 45.	hær. 66
	26	Theod. l. 1. hær. fabu. c. 18.	cap. 17
	35	probatum Insuper	Probatum 1.
31	11	ut unicus sit.	ut unus sit 3.
	21	Tert. l. 3. c. Marc. c. 30	c. 3.
32	13	Lact. l. 1. c. 3. & 19.	c. 19
33	9	Lact. l. 1. c. 14.	c. 13.
34	13	S. Aug. l. 1. Conf. c. 3.	l. 1. de Civ. & l. 3.
35	33	Lact. l. 1. c. 17	c. 16
36	6	S. Aug. Fortunat	S. Aug. ad Fortunat.
37	23	staret Apollo	stabat Apollo.
38	11	Euseb. l. 1. de prep. c. 13	c. 1.
	15	cap. 2	c. 13
39	14	Et c. 4.	lib. 4
40	3	Lact. lib. 1. c. 11	c. 10
	21	Arnob. l. 7.	lib. 1.
	14	rubricatum	Jubricatum
	24	Arnob. l. 9	lib. 6
	43	Sap. 13. v. 17.	v. 10
41	8	colligit	colliges
42	10	Lact. lib. 10	lib. 1.
43	10	S. Greg. Niss. orat. 8	orat. 1. c. Eunom.
44	8	Lact. l. 1. c. 8	c. 7
45	31	Euseb. l. 4. de prep. c. 1.	c. 3
46	2	Tert. l. 1. c. Marc. cap. 6.	c. 5
47	15	ad orationem	adorationem
	29	affirmationi	affirmativa
48	20	S. Aug. l. 8. de Trin. c. 4	l. 5. de Trin. c. 8 & 9.
49	11	S. Bas. epist. 8	epist. 80.
	30	Inde	in Deo
50	39	S. Bern. serm. 8 in Cant.	serm. 81. in Cant.
51	39	S. Hil. l. 1. de Trin.	lib. 1.
52	19	Theodor. q. 20. in Exod.	Interpr. 20 in Genes.
	18	lib. 4. hist. c. 10	c. 9
53	17	lib. de Trin. c. 5	c. 6
54	31 & 35	S. Aug. l. 1. de Trin. c. 10	c. 11
55	9	S. Bas. ep. 14	epist. 148
	11	S. Greg. Naz. orat. 15.	orat. 23
56	32	cap. 1. lib. de pudic.	c. 21
57	25	S. Aug. epist. 102.	ep. 102.
	30	lib. 11. de civ. c. 14.	c. 17.
58	21	1. ad Tim. 6. v. 10	v. 16
	35	erat	esset
59	11	S. Aug. lib. 11.	Confess.
	16	Ps. 5. v. 8.	Ps. 89. v. 8
	35	Ps. 104. v. 8.	Ps. 108

5-2



